


# Kadede Kap Psam Akan



The New Testament and Psalms in the Pohnpeian language of  
the Federated States of Micronesia (old translation, but  
with new alphabet)

**Kadede Kap Psam Akan**  
**The New Testament and Psalms in the Pohnpeian language of the**  
**Federated States of Micronesia (old translation, but with new**  
**alphabet)**

Public Domain

Language: Pohnpeian

2022-10-19

---

PDF generated using Haiola and XeLaTeX on 11 Nov 2022 from source files dated 11 Nov 2022  
37a21c36-e1b6-5f19-a4ad-18a956f43e1a

## Contents

Psalm . . . . .	1
Matäus . . . . .	59
Markus . . . . .	82
Lukas . . . . .	96
Ioanes . . . . .	121
Wiawia . . . . .	140
Men Rom . . . . .	163
Men Korint I . . . . .	173
Men Korint II . . . . .	183
Men Kalesia . . . . .	189
Men Episu . . . . .	193
Men Pilipi . . . . .	197
Men Kolose . . . . .	200
Men Tesalonik I . . . . .	203
Men Tesalonik II . . . . .	205
Timoteus I . . . . .	207
Timoteus II . . . . .	210
Titus . . . . .	212
Pilemon . . . . .	214
Men Ipru . . . . .	215
Iakopus . . . . .	222
Petrus I . . . . .	225
Petrus II . . . . .	228
Ioanes I . . . . .	230
Ioanes II . . . . .	233
Ioanes III . . . . .	234
Iudas . . . . .	235
Kaudial . . . . .	236

## PUK EN PSALM.

### 1

- <sup>1</sup> MEID pai ol o, me sota alialu ni padak en me doo sang Kot akan, o me so duki ong me dipan akan, o me so mondi ren me malaun akan,  
<sup>2</sup> A me kin peren kida kapung en Ieowa o madamadaua duen a kapung ni ran o ni pong!  
<sup>3</sup> A rasong tuka pot, me padedier ni kailan pilap akan, me kin kapareda wa ni a ansau, o ta kan sota kin mongala, a karos a wiawia pwaida.  
<sup>4</sup> Me doo sang Kot akan sota kin dueta, a re rasong dip me ang kin iririp sili.  
<sup>5</sup> I me doo sang Kot akan sota pan pwai kida nan kadeik, o me dipan akan nan momod en me pung kan.  
<sup>6</sup> Pwe Ieowa kotin mangi al en me pung kan; a al en ir; me doo sang Kot akan, pan soredi.

### 2

- <sup>1</sup> DA me men liki kan lingaringarki, o da me wei kan lamelam eki me mal akan?  
<sup>2</sup> Nanmarki en sappa kan kin kangudi o saupeidi kan kapukapung pena, en kaokaoe dodok en Ieowa o Sapwilim a me keidier.  
<sup>3</sup> Kitail en kawela ara men saliedi o kase sang kitail ara sal akan!  
<sup>4</sup> A me kotikot nanlang, kotin kiparamateki, o Kaun o kotin mamale kin irail.  
<sup>5</sup> Eu ran a pan kotin kapung ong ir ni a ongiong; o ni a ongiong lapalap a pan kotin kamasak irail.  
<sup>6</sup> A ngai kasapwilada ai Nanmarki pon dol en Sion sarau.  
<sup>7</sup> A ngai pan padaki wei duen aude pan kapung en Ieowa! A kotin masani ong ia er: Koe nai Ol, ran wet I kaipwi uk adar!  
<sup>8</sup> Poeki re i, I ap pan ki ong uk, en sosoki men liki kan, o en aneki imwin sappa kan.  
<sup>9</sup> Koe pan kawe irail ekidi sokon mata, o kamor irail pasang rasong dal akan.  
<sup>10</sup> Ari, komail nanmarki kan en dukidi, o komail saunkapung en sappa kan en lolekongala!  
<sup>11</sup> Papang Ieowa ni lan o pereperen ni masak!  
<sup>12</sup> Metik sapwilim a Ol, pwe a der ongiong, o komail ap lokidokila pon al o, pwe a ongiong kak madang tapida. A meid pai ir karos, me liki i.

### 3

- <sup>1</sup> O IEOWA, ai imwintiti me toto, o ir me toto, me kangudi ong ia!

- <sup>2</sup> Me toto kin inda duen ngen i, me dene sota sauas pa i ren Kot. Sela.  
<sup>3</sup> A komui Ieowa pere pa i, o komui pan kotin kalingana ia da, o kamait ia la.  
<sup>4</sup> I kin likwiri ong Ieowa ki ngil laud; o a kotin mangi ai ngidingid sang ni sapwilim a dol sarau. Sela.  
<sup>5</sup> I kin wonon, o mamair, o pirida, pwe Ieowa kin kotin kolekol ia.  
<sup>6</sup> I sota kin masak saunpei nen pak toto, me kin kapal ia pena.  
<sup>7</sup> Kom kotida Maing, Ieowa o sauasa ia, ai Kot! Pwe kom kotin pikir ai imwintiti karos, o kawelar ngi en me sapung kan.  
<sup>8</sup> Ieowa me sauas patail. Kom kotin kamauyada sapwilim omui aramas akan! Sela.

### 4

- <sup>1</sup> KOT kapung pa i, kom kotin mangi ia ni ai likelikwir. Pwe kom kin kotin kamait ia la ni ai ansau apwal. Kom kotin maki ong ia o mangi ai kapakap.  
<sup>2</sup> Komail saumas akan! Arai da mar ai pan susued? Arai da omail pok ong me mal kot, o omail perenki likam? Sela.  
<sup>3</sup> Komail lolekongala, ap asa, me Ieowa kotin piladar sapwilim a lelapok o. Ieowa kin kotin mangi ia ni ai likelikwir ong i.  
<sup>4</sup> Ni omail makar, komail der wia dip. Komail madamadauaki mongiong omail ni omail wendi pon los o ap auiaui. Sela.  
<sup>5</sup> Komail mairongki mairong pung o liki Ieowa.  
<sup>6</sup> Me toto kin inda: Is me pan kasale ong kitail me mau kan? A Ieowa, kom kotin kamaraine kin kit marain en silang omui!  
<sup>7</sup> Komui kotin kaperenda mongiong i laud sang ansaun arail wain o korn me toto.  
<sup>8</sup> I kin wonon o mamair ni popol; pwe komui ta Maing, me kotin sauasa ia da, pwe i en kak molelele.

### 5

- <sup>1</sup> IEOWA kom kotin ereki ai lokaia o kotin mangi ai madamadaua.  
<sup>2</sup> O kotin mangi ai likelikwir, ai Nanmarki o ai Kot, pwe i pan potoan kapakap ong komui.  
<sup>3</sup> Maing Ieowa, kotin mangi ngil ai nin soran, nin soran i men tu ong komui o masamasan.  
<sup>4</sup> Pwe komui kaidin Kot amen, me kin mauki tiak sapung, me morsued sota pan mimieta mo 'mui.

- 5 Me aklapalap akan sota pan pwaida mon silang omui, kom kin kotin suede ki me sapung kan.
- 6 Kom pan kotin kamela me likam kan; leowa kin kotin tataki me kamela o kotaue aramas akan.
- 7 A i pan pedelong ong nan tanpas omui, pweki omui kalangan lapalap, o kaudok ni lan inen wong sapwilim omui im en kaudok o.
- 8 Maing kom kotin kalua ia ni omui pung, pweki ai imwintiti kan; kom kotin kaineneta al omui mo i.
- 9 Pwe sota me melel kot ni au arail; o lol arail rokeki kaopa. Kapinwor arail rasong sousou me so ser pena; o re kin aksansale mauki lo arail.
- 10 Kom kotin kadeik irail da, Maing Kot, pwe ren pup kidi pein arail inong. Sikin ir wei, pweki arail dip lapalap, pwe re kin kangudi ong komui.
- 11 Karos, me liki komui ap pan peren kida, re pan pereperen kokolata, pwe kom kin kotin sinsila irail. Irail pan pereperen, me kin pok ong mar omui.
- 12 Pwe komui Maing kin kapaiada me pung kan. Komui kin kotin nekid ir ala ki omui kalangan dueta pere eu.

## 6

- 1 MAING, kom der kotin kaloke kin ia omui ongiong, o der kame kin ia omui ongiong lapala!
- 2 Maing, kom kotin maki ong ia, pwe ngai me luet. Maing, kom kotin kamau ia la, Maing leowa, pwe ti kan me luetalar.
- 3 O ngen i waponda melel. O Maing, arai da?
- 4 Maing, kom kotin saupei dong ia, dorela ngen i. Kom kotin sauasa ia ni omui kalangan!
- 5 Pwe murin melar solar me pan tamanda komui; o is me pan kapinga komui wasan mela?
- 6 I panga kida ai sangesang sang sautik lel mansang; i kawisokisokela ai los pil en mas ai.
- 7 Mom ai suede kilar ai insensued, o i malar, pweki kamakamasak pai me toto.
- 8 Komail aramas morsued akan karos kaiwei sang ia, pwe leowa kotin mangi ai sangesang.
- 9 leowa kotin mangi ai ngidingid, o leowa kotin mangier ai kapakap.
- 10 Ai imwintiti karos pan namenokela o masakada melel, re pan tangwei o madang sarodi.

## 7

- 1 MAING, i kin liki komui leowa, ai Kot. Kom kotin sauasa ia ong ai imwintiti kan karos, o kotin dore ia la,
- 2 Pwe ren der dueta laien amen kol ia di o tapeng ia pasang, pwe sota pil amen saundur.
- 3 Maing, ai Kot, ma i wiadar mepukat, o ma pa i kat wiadar sapung,
- 4 O ma i depukki mesued en akai ar wiawia mau ong ia, pwe i dorelar, me imwintiti ong ia, ap sota karepa,
- 5 A ma so due, ai imwintiti en kaloke ia, o kol ia di, o tiakedi maur i nani pwel, o kawela mar ai. Sela.
- 6 Maing, kom kotida ni omui ongiong o kotin palian makar en ai imwintiti kan, o kotin opadang ia, pwe re kotin inau kidar kapung,
- 7 Pwe wei kan pan pokon dong ir; o re kotin purodala pweki irail.
- 8 leowa iei saunkapung en wei kan. Maing, kotin sauasa ia, duen ai pung o duen ai lelapok!
- 9 Re kotin kadukiedi mesued en me doo sang Kot akan, ap kotin katengedi me pung kan. Pwe komui Kot pung, kin kotin kasaui mongiong o mudilik kan.
- 10 Kot iei pere pa i, me kin kotin sauasa me melel ni mongiong arail.
- 11 Kot saunkapung pung amen, me kotin ongiongada ni ran karos.
- 12 Ma meamen sota pan wukila, a ap kotin ada sapwilim a kodlas o onopada kasik katieu o kainene wong i,
- 13 O kotin pwil poa kanangan kasik katieu men kamela. A kotin kaonopada sapwilim a kanangan kasik katieu, pwe men karongala.
- 14 Kilang, a lamelam me dir en sued, a lisenaneki men kaoka oe o pan naitikedi likam.
- 15 A weiradar por eu o wiadar lolia, ap pein pupedi ong lole, me a weiradar.
- 16 A men kamela pan sapale dong pein mong a, o a dodok sued pan pupedi ong pein a al en wel.
- 17 I pan kapinga leowa, pweki a pung, o i pan kauleki mar en leowa me lapalapa.

## 8

- 1 MAING at Kaun, mar omui meid lingan nan sap karos! Irail kin kapinga komui nanlang!
- 2 Sang nan au en seri pwelel, o ir me kin kangkang didi, re kotin wia kidar manaman eu ong omui imwintiti kan, pwe komui en kamela me imwintiti o, o me aktuau o.

- <sup>3</sup> Ma i kilekilang lang, dodok en lim omui, saunipong o usu kan, me re kotin wiadar:
- <sup>4</sup> Dakot aramas o, pwe komui kin kotin kup-kupura i, de nain aramas, pwe komui kin kotin apapwali i?
- <sup>5</sup> Re kotin kasapwilidier i ansau kis pan tounlang kan, a re kalinganadar i, o kawauialar i.
- <sup>6</sup> Re kasapwiladanger i wiawia en lim omui kan. Kom kotin kaloedier karos pan nā a kan:
- <sup>7</sup> Sip o kau kan, o pil man en sap akan,
- <sup>8</sup> O manpir en pan lang, o mam en nan sed, karos me kin memaureki nan madau.
- <sup>9</sup> Ieowa at Kaun, mar omui meid lingan nan sap karos!

## 9

- <sup>1</sup> I MEN kapinga Ieowa sang nan mongiong i meler, o kasokasoiia duen sapwilim omui dodok kapuriamui kan karos.
- <sup>2</sup> I men pereperen o polauleki komui o kauleki mar omui; komui me lapalapia,
- <sup>3</sup> Pwe re kotin kaloedier ai imwintiti kan, irail pupedier o melar.
- <sup>4</sup> Pwe re kotin apwali ia ni ai pung o ai dodok. Komui kaipokedi pon mol omui duen saunkapung pung amen.
- <sup>5</sup> Kom kotin kapung ong men liki kan o kotin kamela me sapung kan, kom kotin kawelar mar arail kokolata.
- <sup>6</sup> Imwintiti o soledier, a namenokalar melel. Komui kotin wuketedi kanim akan; o solar, me pan taman irail ada o tou ar akan.
- <sup>7</sup> A Ieowa pan kotin kaunda kokolata. A kotin kaonopada mol a, pwen kadeikada.
- <sup>8</sup> O a pan kotin kadeikada sappa ni pung, o kakaunda wei kan pung.
- <sup>9</sup> Ieowa sile pan me samama kan, silepa ni ansau apwal.
- <sup>10</sup> I me irail, me asa mar omui kin liki komui, pwe komui sota kin muei sang irail, me kin rapaki komui, Maing Ieowa.
- <sup>11</sup> Kauleki Ieowa, me kin kaunda nan Sion. Komail padaki ong wei kan a wiawia!
- <sup>12</sup> Pwe a kotin taman irail ada o kotin kain-oma nta 'rail. A sota kin kotin maliela likwir en me samama kan.
- <sup>13</sup> Maing Ieowa, kom kotin maki ong ia. Re kotin mangi ai apwal ren ai imwintiti kan, kom kotin dore ia la sang nan wanim en mela.
- <sup>14</sup> Pwe i en kasokasoiia duen omui dodok kapuriamui pan wanim en nain Sion, perenki sauas pa om.

- <sup>15</sup> Men liki kan pupedi ong nan por o, me pein irail weiradar, o nā 'rail lodi ong insar, me pein irail wiadar.
- <sup>16</sup> I me kitail asaki, Ieowa me kotin kapung pung. Me sapung kan salidi ong pein ar dodok en pa ar akan. Sela.
- <sup>17</sup> Me sapung kan en lokidokila nan wasan mela, o men liki kan karos, me kin monokela Kot.
- <sup>18</sup> Pwe me samama o sota pan monokinokla kokolata, o me luet akan sota pan kaporoporeki mal kokolata.
- <sup>19</sup> Maing, kom kotida! Pwe aramas ender pwaida, a men liki kan karos en pakadeikada mo omui.
- <sup>20</sup> Maing, kotiki ong ir men kamasak, pwe men liki kan en dedeki, me re udan aramas eta. Sela.

## 10

- <sup>1</sup> MAING, da me kom kotin doo sang ia, o da me kom kotin rir sang ia ni ansau apwal?
- <sup>2</sup> Me sapung kan ni ar aklapalap re kin kaloke me samama o; re kin pokon pena o madamadaua duen ar morsued.
- <sup>3</sup> Pwe me sapung o kin suaiki a tiak sued, o me norok moni, kin muei sang Ieowa, lalau e.
- <sup>4</sup> Me sapung o kin lamelame ni a aklapalap, me a sota kotin mangi duen mepukat. Ni song en a tiak sued karos, a kin lamelame me sota Kot.
- <sup>5</sup> A kin pwaida ni a dodok kan. A sapwilim omui kapung me doo sang i; a kin lalau e a imwintiti kan karos.
- <sup>6</sup> A kin indinda nan mongiong i: I sota pan lodi; i sota pan diar ai apwal kot kokolata.
- <sup>7</sup> Au a me dir en lalau e, o malaun, o kotaue, o pan lo a kin me sued o me apwal.
- <sup>8</sup> A wonon o masamasan nan kanim akan, a kin rir kamela me makelekel o, o por en mas a kin masamasan me sapai o.
- <sup>9</sup> A kin masamasan wasa rir dueta laien amen nan deu a, a kin auiaui, pwen koleidi me luet o, a kin saikidi me luet o ni a insar.
- <sup>10</sup> A kin dairukorokedi o karakarakedi, o me sapai kan pan lodi ong ni kiki kong kelail akan.
- <sup>11</sup> A kin indinda nan mongiong i: Kot pan monokela, a kin karirila silang i, a sota man mangi.
- <sup>12</sup> Re kotida Maing Kot, kotin pokada lim ar, kom der kotin maliela me luet akan.
- <sup>13</sup> Menda me doo sang Kot o kin mamaleki Kot, o a kin indinda nan mongiong i, me dene kom sota pan kotin mangi.
- <sup>14</sup> Ari so, kom kotin mangi, pwe kom kotin irerong me luet o kankangeranger

akan, pwen sauasa ir. Me sapai o kin mued ong komui pein i, o komui me sauas pa en me sapoupou o.

<sup>15</sup> Kom kotin katip pasang pa en me sapung o, o kotin depuk ong mesued o a tiak sued lao solar pan diarakada.

<sup>16</sup> Ieowa me Nanmarki kokolata; men liki kan en nikilar sang nan sap we.

<sup>17</sup> Maing, kom kotin mangier inong en me luet akan; kom kotin kamanada mongiong arail, karong omui mamangi mepukat,

<sup>18</sup> Pwen sauasa me sapoupou o samama o, pwe aramas en sappa en solar kangudi.

## 11

<sup>1</sup> I LIKI Ieowa, a menda komail indang ngen i: Piridalang pon omail nana dueta manpir amen?

<sup>2</sup> Pwe kilang, me doo sang Kot akan kaonopadar kasik katieu o pwilikidi ar kanang en kasik katieu pon sal o, pwen rir kasikiedi me melel ni mongiong arail.

<sup>3</sup> Pwe ma ur akan rongk pasang, da me aramas pung en wiada?

<sup>4</sup> Ieowa kotikot nan tanpas a sarau, mol en Ieowa mimi nanlang, silang i kin amasani sili, kil en silang i kin sosong aramas akan.

<sup>5</sup> Ieowa kotin song me pung, ap kotin tatak me sapung o morsued.

<sup>6</sup> A pan kotin kamoredi ong me doo sang Kot akan liol, o kisiniai, o swepel, o a pan katinge kin irail melimel.

<sup>7</sup> Ieowa me pung o a kotin pok ong me pung. Silang i irerong ong me melel o.

## 12

<sup>1</sup> MAING kom kotin sauasa, pwe me lelapok kan malaular, o me melel akan me malaular ren aramas akan.

<sup>2</sup> Irail kin lokaia likam, amen amen ong men impa, re lokaiaiki lol riapot.

<sup>3</sup> Ieowa pan kotin usada kil en au karos me lingkaping o lo, me kin lokaia wei ni aklapalap.

<sup>4</sup> Me kin indinda: Lo atail, me kit pan pwai kida, o kil en au at me kit keleki; is at kaun?

<sup>5</sup> Ieowa kotin masani: I pan uda, pweki kankangeranger en me luet akan o sangesang en me samama kan: I pan sauasa i, me kin inong iong.

<sup>6</sup> Masan en Ieowa me makelekeleta silper, me kamakelekel kidar nan dal pwel en kisiniai pan pak isu.

<sup>7</sup> Komui Maing, pan kotin pera irail, o sinsila mon di wet kokolata.

<sup>8</sup> Pwe me sapung kan pan totolar wasa karos, ma aramas sued pukat kin kaunda aramas akan.

## 13

<sup>1</sup> MAING arai da kom pan kotin malie ia la? Arai da komui pan kotin karirila silang omui mo i?

<sup>2</sup> Arai da i en perki nan lol ai o salo mi nan mongiong i ran karos? Arai da ai imwintiti en kaurur kin ia?

<sup>3</sup> Maing ai Kot, kom kotin masan dong ia o sapeng ia. Kom kotin kamaraini mas ai, pwe i ender mela.

<sup>4</sup> Pwe ai imwintiti ender inda: I kaloedier i. O me palian ia ender perenki ai pupedier.

<sup>5</sup> A i kin liki omui kalangan; mongiong i en peren kida omui kotin sauasa ia. I pan kauleki Ieowa duen a kotin wiawia mau ong ia.

## 14

<sup>1</sup> ME pweipwei o kin indinda nan mongiong i: Sota Kot. Sota katepa 'rail, o arail tiak meid sued; sota amen mia, me kin wia me mau.

<sup>2</sup> Ieowa kin irerong aramas akan sang nanlang, pwen masani, ma amen mia, me lolekong o rapaki Kot.

<sup>3</sup> A ir karos suedelar o karos sota konong, sota me kin wiada me mau, sota amen.

<sup>4</sup> Irail karos me kin wiada mesued, sota ar lolekong, o me kin kawela nai aramas akan, lao medi kila, a re sota kin likwir ong Ieowa?

<sup>5</sup> I wasa re kin masak, pwe Kot kotikot ren kadaudok en me pung kan.

<sup>6</sup> Komail kin kawela inong en me luet; aki Ieowa, me a kin kaporoporeki.

<sup>7</sup> O i men, sauas pan Israel en kodo sang nan Sion, o Ieowa en kotin lapwada sapwilim a salidi kan! I me Iakop pan insenemaui o Israel pan pereperenki.

## 15

<sup>1</sup> MAING, is me pan kaukauson nan tanpas omui? Is me pan mimieta pon sapwilim omui dol sarau?

<sup>2</sup> Me kin kekeitwei ni makelekel, o me kin wia me pung, o me kin lokaia melel sang nan mongiong;

<sup>3</sup> Me sota karaun mal ki lo a, o me sota kin wia mesued ong men imp a;

<sup>4</sup> Me kin mamaleki me lokidokilar o, ap kakaki me masak Ieowa kan, o me kin kaula melel, menda ma a sued ong pein i;

<sup>5</sup> Me sota pan piti sang en amen na moni, o me sota pan ale kisakis, pwen kawela

me pung amen. Ari, me kin apwali mepukat, sota pan luetala kokolata.

## 16

- 1 MAING Kot, kom kotin sinsila ia, pwe i liki komui.
- 2 Ngai potoan ong Ieowa: Komui ta ai Kaun, sota eu pai, me i asa, pwe komui eta.
- 3 O I kin indang sarau kan, me kin mi nan sappa: Met akan pwin isou, me I kin pokepoke sang ni mongiong i.
- 4 A irail me kin idedauen amen, pan lodi ong apwal toto. I sota mauki arail mairong, me doleki nta, de mar arail I sota pan inda.
- 5 A Ieowa ai pai o ai peren; Komui kin kolekol ai soso.
- 6 I di radar ai pwais en sap kaselel eu, ei pai kaselel eu, me i sosokier.
- 7 I kapinga Ieowa, me kotin kalolekong ia; pil ni pong mudilik i kan kin padaki ong ia.
- 8 I kin ariri Ieowa ansau karos, pwe a kotikot ni pali maun i, i ap sota pan luetala.
- 9 I me mongiong i kin peren kida, o ngen i kin popol, pwe pil pali uduk ai pan moleilei.
- 10 Pwe kom sota pan kotin mauki, ngen i en mimieta nan wasan mela, o kom sota pan muedi ong, me sapwilim omui sarau men pan mor pasang.
- 11 Kom kin kotin kaasa kin ia al maur; peren lapalap mi mon silang omui, o meid ligan ni pali maun en lim omui kokolata.

## 17

- 1 MAING kom kotin ereki me pung o kotin mangi ai likwir o kotin kupura ai kapakap, me sota kin koweï sang nan kil en au likam eu.
- 2 Ai pung en pwili sang re omui, o kom kotin masan dong me pung.
- 3 Kom kotin kasauï mongiong i ni pong, o komui kotin sosong ia, ap sota me kom kotin diar. I inaukidi, me i sota pan sapung ni ai lokaia.
- 4 I kin rukila pan masan en silang omui sang mon tiak en aramas o al en men kamela.
- 5 Ni ai alialu wei i sota muei sang nan lip en aluwilu omui, ai kakaweï sota katia sang.
- 6 I likwiri ong komui, Maing Kot, kom kotin mangi ia, o kapaike dong ia karong omui, o kotin ereki ai kapakap.
- 7 Kom kotin kasaleda omui kalangan kapuriamui, pwe pali maun omui sauas pan ir, me kin liki komui, ong ir me palian ir.

- 8 Sinsila ia dueta por en mas eu, o kotin pera kin ia mot en lim omui,
- 9 Mon me sapung kan, me men kawe ia la, mon ai imwintiti, me kin kapil ia pena.
- 10 Re kin kapiridi mongiong arail; o sang nan au arail re kin lokaia aklapalap.
- 11 Wasa se kin kola ia, re kin kapil kit pena, mas arail kin masamasan, pwen kase kit di ong nan pwel.
- 12 Dueta laien amen, me inong iong manga, o dueta laien pul amen, me wonon nan wasa rir.
- 13 Maing, kom kotida, kaloedi o kanamenokla i; dorela maur i sang me sapung kan ki omui kodlas,
- 14 Sang ren aramas akan ki lim omui, Maing Ieowa, sang ren aramas en sappa wet, me pwais arail ni maur et; kom kotin kadire kila kaped arail omui dipiso kan, me nairail seri ol me toto, o nairail akan me pan sosoki luan arail kapwa.
- 15 A i pan ariri silang omui ni ai pung, o i pan medikila mom omui ni ai pan pirida.

## 18

- 1 I KIN pok ong komui Maing, ai kel.
- 2 Ieowa ai paip, ai kel, ai saundur ai Kot, ai paipalap, me i kin liki, pere pa i, menkamaur pa i o sile pa i!
- 3 I kin ngidingid ong Ieowa, me kaping en ko ong, o i pan dorela sang ai imwintiti kan.
- 4 I lodi onger sal en mela kan, o pilap en Pileam akan kamasak ia er.
- 5 Sal en wasan mela kol ia dier, o sal en mela kaloe ia dier.
- 6 Ni ai masak i likwir ong Ieowa o weriwer ong ai Kot; I ap kotin ereki ngil ai sang nan tanpas a, o ai likwir lel ong karong a kan.
- 7 Sappa rerer o mokidedar, o pason en nana kan ititekok o rerer, ni a kotin ongiongidar.
- 8 Atiniai koda sang nan silang i, o kisiniai kelail sang nan au a, ap kareda liol.
- 9 O a kotikidier nanlang o kotidido, o rotorot impan aluwilu a kan.
- 10 O a kotikot pon Kerup amen o kotin pirwei, o a kotin dake pa en ang.
- 11 Tanpas a im pwal iei rotorot, o katau laud, o tapok rotorot, kapil pena i.
- 12 Ligan me mi mo a, kamueit pasang tapok kan iang akel o liol.
- 13 O Ieowa kotin wiadar nansapwe nanlang, o me Lapalapia kotin poronelar kapil i iang akel o liol.
- 14 A kotin kasik wei sapwilim a kanang en kasik katieu, o kotin kamueit irail pasang. A kotin wiadar liol toto o kamasak irail adar.



15 Al en pil akan ap sansaladar, o pason en sappa weiweidar ki ar ongiong Maing, mon ang en silang omui.

16 A kotikidier lim a sang nan wasa ileile, a kotin kol ia di o kotin api ia dar sang nan pil kalaimun akan.

17 A kotin dore ia la sang ai imwintiti kelail akan, sang ir, me kailong kin ia, ir me i sota itar ong.

18 Irail kaloie ia dier ni ai ran apwal, a Ieowa kotin wialar sauas pa i.

19 O a kotin kalua ia wasan saladok, a kotin kamaio ia da, aki a kotin kupukupura ia.

20 Ieowa kin kotin sauasa ia duen ai pung, a kotin katingi ong ia duen makelekel en pa i kan.

21 Pwe i kin weweid nani al en Ieowa, o i sota kin katiwo ong ai Kot.

22 Pwe a masan akan mi mo i, o i sota pan kase sang ia a kusoned akan.

23 Pwe ngai unsokalar mon silang i o suedeki ai sapung.

24 O Ieowa kotin katingi ong ia duen ai pung, o duen makelekel en pa i kan mon silang i.

25 Komui me kalangan ong me mau kan, o lelapok ong me lelapok kan,

26 O makelekel ren me makelekel akan, o sapung ren me sapung kan.

27 Pwe kom kin kotin dorela aramas luet akan, ap kadukiedi mas en me akla-palal akan.

28 Pwe kom kin kotin kamaraini ai lamp, Ieowa ai Kot kin kamaraini ai rotorot.

29 Pwe ni ai iang komui i kak kaloedi karis en saunpei kan, o ni ai iang ai Kot, i kak luswei pon kel takai.

30 Al en Kot me unsokala; masan en Ieowa me makelekel. I pere pan karos, me liki i.

31 Pwe ia amen Kot impan Ieowa, de ia paip eu impan atail Kot?

32 Iei Kot, me kotin aude kin ia manaman, o kaunsokala al ai.

33 A kin kotin wiai ong nä i kan dueta nä en tia, o kotin kasapwil ia dang wasa ileile.

34 A kotin padaki ong pa i kan tiak en mauin o, pwen kak ong kaonopada kasik katieu mata.

35 Kom kotiki ong ia pere pan maur omui, o lim omui pali maun kamana ia da, o omui opampap me kasapwil ia da.

36 Kom kotin kaonopadar al, me i pan weweid ia, pwe nä i kan ender krisedi.

37 I pan tang wong ai imwintiti kan o kono irail edi, o i sota pan puredo, lao karos lodier.

38 I pan kamor irail pasang, re sota pan kak palian ia, o re pan pupedi ong pan nä i kan.

39 Kom kak kamana kin ia omui manaman ong ni pei; Kom kak kasedi ong pan nä i kan karos me palian ia.

40 Kom kin kotin kaloedi ong ia ai imwintiti kan, pwen kawela, me kailong kin ia.

41 Re kin likelikwir, a sota sauas parail ren Ieowa, a sota kotin sapeng ir.

42 I pan suk irail pasang dueta pwel par nan kisiniang; i pan kase ir ala dueta pwel samin sang nani al o.

43 Kom kin kotin dore ia sang ren akamai en aramas, o kom kotin kasapwil ia dang men liki kan; o wei eu me i sasa kin upa ong ia.

44 Ni ar ronger, re peiki ong ia er, o nain men wai kan peikiong ia ni lingkaping.

45 Nain men wai kan poridier o rerer o pwarado sang nan ar im kalaimun akan.

46 Ieowa kotin ieias; kaping ong ai paipalap; o kaping ong Kot ai saundor.

47 Kot me kotin depuk ong ai imwintiti kan, o a kotin kaloedi ong ia ai imwintiti kan;

48 Kom kotin dore ia la sang ai imwintiti kan, o kom kotin kasapwil ia dang ir, me palian ia. Kom kin kotin sauasa ia ong me morsued ong ia.

49 I me i men danke komui, Maing Ieowa, nan pung en men liki kan o kauleki duen mar omui,

50 Komui me kotin kamaurada meel sapwilim a nanmarki o a kotin sauasa mau sapwilim a Dawid keiedier o kadaudok a kokolota.

## 19

1 LANG pokon kin kasokasoi duen lingan en Kot o aude pan lang kin katitiki dodok en lim a kan.

2 Ran eu kin kasokasoi ong eu ran o pong eu kin padaki ong eu pong.

3 Sota kaparok o sota lepen lokaia, ari so, ngil a kin peido.

4 O a loua padak lel ong sap karos, o a kaparok lel imwin sappa. A kotin wiai ong katipin im pwal eu pan lang;

5 O a kin pedoi sang nan a pera dueta ol kamod amen, o kin pereperen dueta ol kamod amen ni a tangwei pon al o.

6 A dakada ni eu imwin lang ap tangalang imwin teio, o sota me kak rir sang mon karakar a.

7 Kapung en Ieowa me unsok o kin kain-senemauiala ngen en aramas akan. Kadede en Ieowa me melel o kin kalolekongla me lolepon.

8 Kusoned en Ieowa me pung o kin kaperenda mongiong en aramas.

- Kusoned en Ieowa me makelekel o kamarainiada mas en aramas.
- <sup>9</sup> Lomwin Ieowa me min o kin duedueta. Masan en Ieowa kan me melel, o pung kaulalap.
- <sup>10</sup> Irail me kasampwal sang kold o kold lingan toto, o iau sang onik o onik kasampwal.
- <sup>11</sup> Ir me pil kin katamanda sapwilim omui ladu, o me kin kapwai ir ada, ar kat- ing me lapalap.
- <sup>12</sup> Is me kak asa duen toto en a sapung? Kom kotin lapwada dip ai me rir akan.
- <sup>13</sup> Pil perewei sang sapwilim omui ladu me akdhalap, pwe ren der kaloe ia di, i ap pan pungala, o pan makelekel sang dip lapalap kokolata.
- <sup>14</sup> Kom kotin kupura kaparok en au ai o lokolokaia en mongiong i mo 'mui, Ieowa ai paipalap o ai saundor.

## 20

- <sup>1</sup> IEOWA en kotin mangi om kapakap ni ran apwal o; mar en Kot en lakop en pera uk!
- <sup>2</sup> A en kotin porone dong uk sauas pam sang nan tanpas sarau i o kamana uk ada sang nan Sion.
- <sup>3</sup> A en kotin kupura om mairong karos, o om mairong isis en konkon re a. Sela.
- <sup>4</sup> A en kotiki ong uk, me mongiong om anane, o kotin kapaiaada om inong karos.
- <sup>5</sup> Se pan ngisingiski omui sauasa kit, o ni mar en atail Kot kit pan kida at plak. Ieowa en kotin kapwaiada om poekipoek karos!
- <sup>6</sup> I ap asaer, me Ieowa kin kotin dorela sapwilim a me keiedier, o a pan mangi i sang nan sapwilim a lang sarau, lim a pali maun kin sauasa kaulalap.
- <sup>7</sup> Mo kan kin kaporoporeki war o os akan; a kit kin keleki mar en Ieowa atail Kot.
- <sup>8</sup> Irail lodier o pupedier, a kit uda o kasi- nenda.
- <sup>9</sup> Maing kom kotin sauasa nanmarki o, o kotin mangi at likwir ong komui!

## 21

- <sup>1</sup> MAING Ieowa, nanmarki o kin peren kida omui manaman, o a polauleki melel omui sauasa i!
- <sup>2</sup> Kom kotiki ong i, me mongiong i inong iong, o kom sota kin sopeiwei sang, me kilin aua poekipoki. Sela.
- <sup>3</sup> Pwe kom kin wudokedi ong poa me mau kan; kom kotin kalisorop kidi i nin kold kasampwal eu.
- <sup>4</sup> A kin poeki re omui maur, komui ap kotiki ong i maur warai kokolata.

- <sup>5</sup> A lingan me lapalap ki omui kotin sauasa i. Kom kin kotin kapwataki i manaman o lingan.
- <sup>6</sup> Kom kotin kasapwilada i, pwen wia kamau men kokolata; kom kaperenda i mon silang omui.
- <sup>7</sup> Pwe nanmarki kin liki Ieowa, o a pan dadaurata ki kalangan en me lapalapa.
- <sup>8</sup> Lim omui pan diar omui imwintiti kan karos, o lim omui maun pan diar me kailong kin komui.
- <sup>9</sup> Kom pan wia kin ir ala stop en kisiniai eu, ni omui pan kotin pwarado. Ieowa pan kotin kawe ir ala ni a ongiong, o kisiniai pan kang ir ala.
- <sup>10</sup> Kom pan kotin karosela kadaudok arail sang nan sappa, o wa 'rail sang nan pung en aramas akan.
- <sup>11</sup> Pwe irail inau kidar, me re pan wia sued ong komui a re sota pan itar ong.
- <sup>12</sup> Pwe komui pan kotin kasaloe ir ada, pwe ren tang; kom pan kotin padok wong ir omui sal en kasik katieu.
- <sup>13</sup> Maing kom kotida ni omui rosong kit ap kaulaki o kapinga omui manaman.

## 22

- <sup>1</sup> A I Kot, ai Kot da me komui likidmalie kin ia la? I likelikwir, a sauas pa i me doo.
- <sup>2</sup> Ai Kot, nin ran i kin likwir, a kom sota kin sapeng, o ni pong i pil sota kin nenenla.
- <sup>3</sup> Ari so, komui ta me sarau, komui me kotikot pan kaul en kaping en Israel.
- <sup>4</sup> Sam at akan liki komui, o ni ar liki, kom kotin sauasa irail er.
- <sup>5</sup> Irail likwir ong komui, rap dorelar, re liki komui, rap sota namenokala.
- <sup>6</sup> A ngai dueta kamatul amen, a kaidin ol amen, me aramas akan kin lalaue o mamaleki.
- <sup>7</sup> Karos me kilang ia, kin lalaue, ia, sara pasang au arail o tuetuäl mong arail:
- <sup>8</sup> A kin liki Ieowa, i en dorela i, o kamaioda i, pwe a kin kupura i.
- <sup>9</sup> Pwe komui kotin kaipwi ia sang nan kaped en in ai; komui ta, me i liki sang ni ansaun ai mi ni maramaran in ai.
- <sup>10</sup> Sang nan kaped en in ai i lokidokilang komui; komui ta ai Kot sang ni ansaun ai mi pon kopan in ai.
- <sup>11</sup> Kom der kotin doo sang ia, pwe ansaun kalokolok korendor, ap solar sauas pa i.
- <sup>12</sup> Kau ol kalaimun kan kapil ia penaer, o kau ol en Pasan kele ia pena.
- <sup>13</sup> Irail sara dong ia dueta laien weriwer o laualo amen.
- <sup>14</sup> Ngai wudokilar dueta pil, ai kokon akan karos mui pasanger, o mongiong i pei pasanger nan kaped i dueta wi.

- 15 Ai kelai ngalangal lar dueta diper en dal eu, o lo i pasadang pan ngatangat ai, o komui kin wia kin ia me melar amen.
- 16 Pwe kidi kan kapil ia pena, o pwin aramas sued eu kele ia pena, irail kapore pasang pa i o nä i kat.
- 17 I kak wadok kokon ai kan karos; a irail kin kilekilang ap peren kida.
- 18 Re kin nek pasang ai likau kan nan pung arail, o re doropweki ai likau pup.
- 19 A komui Maing ender doo sang ia! Ai kel madangdo o sauasa ia!
- 20 Dorela maur i sang kodlas, pwe me ta ieu, o sang nan kel en kidi!
- 21 Sauasa ia sang nan au en laien, o dore ia la sang ose en man laualo!
- 22 I pan padaki ong ri ai kan duen mar omui, o i pan kapinga komui nan momodisou.
- 23 Kapinga Ieowa komail me masak i, o kadaudok en Iakop en kalinganada i, o wan Israel karos masak i.
- 24 Pwe a sota kotin mamaleki de suedeki me luet akan; o a sota kotin karirila silang i sang irail; o ni a likwir ong i, a kotin erekier.
- 25 I pan kapinga komui nan momodisou kalaimun; i pan kapwaiada ai inau mon ir me lan i.
- 26 Me luet akan en manga o medila, o me idok Ieowa, pan kapinga i; ngen omail pan memaureta kokolata.
- 27 Ni imwin sap karos re pan tamanda Ieowa, ap wuki ong i, o di en men liki karos pan kaudoki ong i.
- 28 Pwe wein Ieowa, o a kotin kaunda men liki kan.
- 29 Me wi kan karos nin sappa pan mangamanga o kelepuiki; karos, me pan wiala pwel o sota kak kolekol maur ar, pan pongi i.
- 30 Kadaudok eu mia, me pan papa i, re pan padaki ong seri o seri en seri kan duen Ieowa.
- 31 Re pan pwarado o padaki ong aramas akan, me pan ipwidi mur duen a pung, o duen me a kotin wiadar.

## 23

- 1 IEOWA sile pa i, i sota pan anane meakot.
- 2 A kotin kamanga ia nan mos kaselel o kalua ia wong ni pil lamelamur.
- 3 A kotin kamanada ngen i, a kalua ia pon al pung pweki mar a.
- 4 I lao weid nan mot en mela, i sota pan masak mesued kot, pwe kom kotin ieiang ia, omui irar o lepin saipali kamait ia la.
- 5 Kom kotin kaonop dang ia tepel eu salong ai imwintiti kan. Kom kotin keiekidi mong ai le, o ai dal kin wudewudok.

- 6 Pai o kalangan pan idauen ia arain ai maur, o i pan mimieta nan tanpas en Ieowa kokolata.

## 24

- 1 SAPWILIM en Ieowa sappa o audepa kan, sap o meakoros me kauson poa.
- 2 Pwe a kotin pasonedier ni kailan madau, o a kotin wiadar pon pil akan.
- 3 Is me pan kodalang pon dol en Ieowa? O is me pan kak uda ni mol en Ieowa sarau?
- 4 Me pa a kan sota sapung o mongiong i makelekel; me sota kin mauki padak sapung, o me sota kin kaula likam.
- 5 I me pan kamaula ren Ieowa, o a pan pung kila ren Kot a saunkamaur.
- 6 I kainok, me kin peiki ong Kot, me kin rapaki silang omui, Kot en Iakop. Sela.
- 7 Komail ritingada wanim laud o langada wanim nin sappa, pwe Nammarki lingan en kotilong!
- 8 Is Nanmarki lingan men et? I Ieowa roson o manaman, Ieowa me rasong nan mauin.
- 9 Komail ritingada wanim laud o langada wanim nin sappa, pwe Nanmarki lingan en kotilong!
- 10 Is Nanmarki lingan men et? I Ieowa Sepaot; I Nanmarki lingan. Sela.

## 25

- 1 MAING, i kin inong iong komui.
- 2 Ai Kot, i liki komui, sauasa ia, pwe i ender sarodi, o ai imwintiti kan ender peren kida.
- 3 Pwe karos me liki komui, sota pan sarodi, a me pan muei sang komui pan sarodi.
- 4 Maing, kom kotin kasale ong ia al omui kan, o kotin padaki ong ia omui tiak kan;
- 5 Kalua ia ni omui melel o kalolekong ia! Pwe komui ta ai Kot, me kin sausa ia, ran karos, i kin auiaui komui.
- 6 Maing, kom kotin tamanda omui kalangan o omui kapunglol, me tapidar mon kaua.
- 7 Re der kotin kupura dip en ai titikiti o ai sopeik; a kupura ia ni ar kapunglol o kalangan! Maing Ieowa.
- 8 Ieowa me mau o lelaptop, i me a kotin padaki ong me dipan akan pon al o.
- 9 A kin kalua pung me luet akan, o a kotin padaki ong me luet akan al a.
- 10 Al en Ieowa kan me dir en kalangan o melel ong ir, me kin kolekol a inau o masan akan.
- 11 Maing, kom kotin maki ong ia ai sapung kan me lapalap, pweki mar omui.
- 12 Is ol, me kin lan Ieowa? A pan kotin padaki ong i duen al o, me a en pilada.

- 13 Ngen e pan mi wasa mau o kaudaudok a pan aneki sap o.  
 14 Ieowa kompoke pan me kin lan i, a pan kotin padaki ong i duen a inau.  
 15 Mas ai kin ariri Ieowa ansau karos, pwe a pan kotin lapwada nä i kat sang nan insar.  
 16 Kom kotin masan dong ia o maki ong ia, pwe ngai sapoupou o luet.  
 17 Masak en mongiong i lalaudalar; kotin kalua ia sang nan ai apwal akan!  
 18 Kom kotin mangi ai luet o ai kankangeranger, o kotin maki ong ia dip ai kan karos!  
 19 Kom kotin mangi duen ai imwintiti kan, pwe re me toto, o re kin kailong kin ia ni ar aklapalap.  
 20 Kom kotin sinsila ai maur o dore ia la, kom kotin apwali ia, pwe i der namenokala, pwe i kin liki komui.  
 21 Melel o pung en sinsila ia, pwe i auiaui komui.  
 22 Maing Kot, kom kotin dorela Israel sang nan ar apwal akan karos!

## 26

- 1 IEOWA kom kotin sauasa ia, pwe i kekeit wei ni melel. I kin liki Ieowa, i sota pan luetala.  
 2 Maing kom kotin kasau ia da o kasongesong ia, o kamakelekele mudilik i kan o mongiong i.  
 3 Pwe i asa duen omui kalangan, o i kin weweid ni omui melel.  
 4 I sota kin mondi ren aramas aklapalap akan, o i sota kin waroki ong me morsued akan.  
 5 I kin tataki pokon en mesued akan, o i sota kin mondi ren me sapung kan.  
 6 I omiomi ki makelekel o i kin pok ong sapwilim omui pei sarau, Maing, Ieowa,  
 7 Wasa i pan kapikapinga, ngil laudeta o padak duen omui manaman akan karos.  
 8 Maing Ieowa, i kin pok ong wasan tanpas omui, o wasan ar lingan.  
 9 Kom der kotin kasapoke ia la iangaki me dipan akan, de maur i iangaki me kamela aramas akan.  
 10 Pwe pa arail me dir en morsued o re ki men ale kisakis.  
 11 A ngai kin weweid ni makelekel. Dore ia la o kotin maki ong ia!  
 12 Nä i kin aluwei pung. I pan kapinga Ieowa nan momodisou kan.

## 27

- 1 IEOWA kamarain pa i o kamaur pa i, is me i en masak? Ieowa kel pan maur i, is me i en lomwinki?

- 2 Ma mesued akan pan tanga dong ia, pwen kawela uduk ai o ai imwintiti kan, re pan dipikelekel o pupedi.  
 3 Ma pwin saunpei pan kapil ia pena, i sota pan masapwekada, o ma mauin pan wiaui ong ia, i pan liki i.  
 4 Iet eta, me i inong ong o men poeki ren Ieowa, i en mimieta nan tanpas en Ieowa arain ai maur, pwen kilekilang sarau kaselel en Ieowa kan, o ududial sapwilim a im en kaudok.  
 5 Pwe ni ansau apwal a kotin sinsila ia nan tanpas a im pwal. A pan kotin karuk ia la nan tanpas a im likau, o kotin kau ia da pon paip eu.  
 6 A pan kotin kasapwil ia dang pon ai imwintiti kan, me kapil ia pena; i ap pan wiada mairong en kaping nan tanpas a im pwal, i pan kaul o kaping ong Ieowa.  
 7 Maing, kom kotin ereki ngil ai, ma i pan likwir ong komui, kom kotin maki ong ia o mangi ia.  
 8 Mongiong i kin kataman kin komui omui masan: Komail rapa kin ia! I me i pil kin rapaki silang omui. Maing Ieowa!  
 9 Der karir sang silang omui mo i, o der kasapokela sapwilim omui ladu ni omui ongiong; pwe komui me sauas pa i. Kom der kotin kase ia la, o ender muei sang i, Kot ai saunkamaur.  
 10 Pwe sam ai in ai likidmalie ia la; a Ieowa kotin sapwilim anekin ia la.  
 11 Maing, kom kotin kasale ong ia sapwilim omui al o kalua ia nani al pung pweki ai imwintiti kan.  
 12 Kom der kotin mueid ong ai imwintiti kan en kaloe ia di; pwe saunkadede likam palian ia, o re wia sapung ong ia so masak.  
 13 Ari so, i asa, me i pan ududial kalangan en Ieowa nan sap en me memaur akan.  
 14 Auiaui Ieowa! Der masak, o mongiong om ender masak, o auiaui Ieowa!

## 28

- 1 MAING, ai paipalap, i lao likwir wong komui, kom der kotin sapaimokid, pwe ma re pan sapaimokid, i pan dueta ir, me pan lokidokila nan por o.  
 2 Kom kotin mangi ngil en ai ngidingid, i lao likwir wong komui, i lao kapa wong pa i kat mol omui sarau.  
 3 Re der kotin kasapoke ia la iangaki me sapung kan, iangaki me wia sued, me kin lokaia kaselel ong men impa, ap lamelame sued nan mongiong arail.  
 4 Kotin depuk ong ir duen ar dodok o duen ar tiak sued; kotiki ong ir duen dodok en pa arail; katingi ong ir duen ar wiawia.

- <sup>5</sup> Pwe re sota insenoki dodok en Ieowa de wiawia en lim a kan; i me a pan kotin kawe ir ala, a sota kauada.
- <sup>6</sup> Kaping ong Ieowa, pwe a kotin erekier ngil en ai ngidingid.
- <sup>7</sup> Ieowa kel pa i o pere pa i, mongiong i kin liki i, o sauas pa i mia. Mongiong i liki i o i pan danke i ki ai kaul.
- <sup>8</sup> Ieowa kele parail; i me manaman ong sausa sapwilim a me keidier.
- <sup>9</sup> Kotin sausa sapwilim omui aramas akan o kotin kamauiala sapwilim omui soso, o kotin kamanga ir o apwali irail ada kokolata!

## 29

- <sup>1</sup> KOMAIL lapalap akan, wa dong Ieowa, wa dong Ieowa wau o manaman!
- <sup>2</sup> Wa dong Ieowa wau en mar a, pongi Ieowa ni omail kapwat sarau!
- <sup>3</sup> Kapiti en Ieowa mi pon pil akan; Kot en ligan kin wiada nansapwe, iei Ieowa en pil kalaimun akan.
- <sup>4</sup> Kapiti en Ieowa me manaman, kapiti en Ieowa me ligan.
- <sup>5</sup> Kapiti en Ieowa kin katip pasang seder akan; Ieowa kin kotin katip pasang seder akan en Lipanon.
- <sup>6</sup> A kin kotin kalukalus irail dueta kau pul amen, Lipanon o Sirion dueta kau pul ol amen.
- <sup>7</sup> Kapiti en Ieowa kin luswei dueta umpul en kisiniai.
- <sup>8</sup> Kapiti en Ieowa kin kamokidada sap tan; Ieowa kotin kamokidada sap tan en Kades.
- <sup>9</sup> Kapiti en Ieowa kin kamokidada tia kan o kakilesauiaada nana kan, o nan tampa a im en kaudok karos kin kapinga i.
- <sup>10</sup> Ieowa kotikot pon pil akan o Ieowa pan Nanmarki kokolata.
- <sup>11</sup> Ieowa pan kamanada sapwilim a aramas akan; Ieowa pan kotin kamaui sapwilim a aramas akan ki popol.

## 30

- <sup>1</sup> I kapinga komui Maing, pwe komui me kotin kasapwil ia dar, o sota mueid ong ai imwintiti kan ren peren kin ia da.
- <sup>2</sup> Ieowa, ai Kot, i likwir wong komui, komui ap kotin kakel ia dar.
- <sup>3</sup> Maing, kom kotin kalua ngen i sang nan wasan mela. Kom kotin dore ia lar ni ansau me irail lokidokila nan pweleko.
- <sup>4</sup> Komail lelapok kan en kapinga Ieowa, o kapinga mar a ligan!
- <sup>5</sup> Pwe a ongiang kin marep ta ieu, a a mak arain maur en aramas amen;

nin sautik re kin sangesang, a ni mansang ngisingis.

- <sup>6</sup> A ngai inda ni ai ansau mau: I sota pan lodi kokolata.
- <sup>7</sup> Maing, ni omui kalangan, kom kotin katengedi ai dol, a ni ansau me re karuki sang mo i silang omui, i masapwekadar.
- <sup>8</sup> I likwir wong komui Maing, o i ngidingideki ong Kaun.
- <sup>9</sup> Da kadepa en nt' ai, i lao kodila nan por o? Pwel par pan kak kapinga komui, o kapakaparok duen omui kalangan?
- <sup>10</sup> Maing Ieowa, re kotin mangi ia o kotin maki ong ia; Ieowa sauas pa i.
- <sup>11</sup> Kom kotin kawukila ai insensued ong ngisingis; kom koti ki sanger ai tuken likau, ap id kalikauwi ia dar popol.
- <sup>12</sup> Pwe ngen i en kauli ong komui, a ender nenenla. Maing ai Kot, i pan kapinga komui kokolata.

## 31

- <sup>1</sup> MAING, i liki komui, kom kotin ieiang ia, pwe i ender namenokala kokolata; dore kin ia la duen omui pung.
- <sup>2</sup> Kapaikidi dong ia karong ar akan, madang sausa ia! Kom kotin wiala ai paipalap roson, o kele pa i, pwen sausa ia!
- <sup>3</sup> Pwe komui ai paip, o ai kel. Kom kotin kalua ia pweki mar omui.
- <sup>4</sup> Kom kotin api ia sang nan insar, me re wi ai ong ia, pwe komui kele pa i.
- <sup>5</sup> I kakaliki ong komui ngen i; kom kotin dore ia la, komui Maing Kot melel.
- <sup>6</sup> I suedeki me kin kaporoporeki dikedik en ani mal akan, a i liki Ieowa.
- <sup>7</sup> I pan pereperen o polauleki omui kalangan, pwe komui me kotin mangi ai luet, o kotin kupura ngen i ni ansau apwal.
- <sup>8</sup> O re der mueid ong ai imwintiti, ren kaloe ia di. Kom kotin kasone na i kat nan wasa salatok.
- <sup>9</sup> Ieowa, kom kotin maki ong ia, pwe i masak; mas ai suedelar ki ai mauk, pil dueta ngen i o pali war ai.
- <sup>10</sup> Pwe maur i luet kilar ai insensued, o ai par akan malaulaular ki ai sangesang, ai kelail tikitikelar pweki dip ai, o kokon ai kan lueta lar.
- <sup>11</sup> Ai imwintiti kan karos lalau ia, o i wialar kanamenok pan men imp ai kan, o kamasak pan sau i kan; me kilang ia nani al o, kin tangwei sang ia.
- <sup>12</sup> Aramas monoke ia lar dueta me melar amen; ngai rasong dal eu, me mor pasang.
- <sup>13</sup> Pwe i ronger duen me toto kin puserokiong ia; men kamasak kapil

- ia pena; re kin kapung pena duen ngai, pwen kame ia la.
- 14 A i kin kaporoporeki komui Maing, i ap inda: Komui ta ai Kot!
- 15 Ai ansau mi nan lim omui, dore ia sang nan pa en ai imwintiti kan o sang me kin pakipaki ia.
- 16 Kamarainiki sapwilim omui ladu silang omui, dore ia ki omui, dore ia ki omui kalangan.
- 17 Maing, kom der kotin mueid ong, i en soreidi; pwe i likwiri wong komui. Me sapung kan en soreidi, pwe irail en nenenla nan wasan mela.
- 18 Kil en au en me likam akan en nenenla, irail, me lalaue me pung kan ni laumaum, o aklapalap, o kaurur.
- 19 Meid laud omui kalangan, me kom kotin nekinekid ong me lan komui kan, o me kom kin kasale ong ir, me liki komui sansal mon aramas akan.
- 20 Kom kin kotin karir ir ala re omui sang karos, me kailong kin ir; kom kin kadupal ir edi sang mon lo akamai.
- 21 Kapinga ong Ieowa, me kotin kalangan laud ong ia nan kanim tengeteng eu.
- 22 Pwe ni ai peikasal i indindar: I lokidokilar sang mon silang ar. Ari so, kom kotin ereki ngil en ai ngidingid, ni ai potoan werwiwer ong komui.
- 23 Komail sapwilim a sarau kan karos, pok ong Ieowa! Ieowa kin kotin sinsila me poson akan, ap depuk ong ir melel, me aklapalap akan.
- 24 Komail karos me kaporoporeki Ieowa, en kelail o der masak!

### 32

- 1 MEID pai, me dip arail lapwadar, o me ar sapung pwaipwaidier!
- 2 Aramas meid pai, me Ieowa solar pan kapokoki ong dip ar, me sota likam nan mongiong ar.
- 3 Pwe ni ai men okila, kokon ai kan ap susueda kilar ai sangesang ran karos.
- 4 Pwe lim omui katoutou ia nin ran o ni pong, o ai kelail mongedier, dueta ni ansau en karakar. Sela.
- 5 I me i weokadang komui dip ai kan, o sota okila ai sapung kan. Ngai indinda: I pan weokadang Ieowa ai katiwo kan; komui ap kotin maki ong ia sued en dip ai. Sela.
- 6 I me sarau kan karos pan potoan kapakap ong komui arain ansau me komui kak diarokada. Lapake kalaimun pan wiaui, a a sota pan lel ong ir.
- 7 Komui me pere pa i, kom pan kotin perawei sang ia men kamasak, i ap pan dorela o kapinga ni peren. Sela.

- 8 I pan padaki ong uk o kasale ong uk al o, me koe en weweid ia; I pan kalua kin uk por en mas ai.
- 9 Komail der dueta os de as amen me sota ar madamadaua, me mau ong, kisin mata en ko ong au arail, a ma so, re sota pan duki ong uk.
- 10 Me sapung o kin lodi ong song en madak toto, a me kaporoporeki Ieowa, kalangan en Ieowa pan kapil pena i.
- 11 Polauleki Ieowa, o pereperen komail me pung kan, o kapikapinga komail karos me lelapok melel akan.

### 33

- 1 KOMAIL me pung kan polauleki Ieowa, me lelapok kan en kapinga i.
- 2 Danke Ieowa o kapikapinga ki men kasang o kaule ki ong i sal en arp eisok.
- 3 Kauleki ong i kaul kap pot, komail kanai ong arp o ngil!
- 4 Pwe masan en Ieowa me inen o a wiawia kan karos melel.
- 5 A kin kotin pok ong me pung o melel, sappa direki kalangan en Ieowa.
- 6 Nanlang wiaui kida masan en Ieowa o audepan a karos ki ngen en silang i.
- 7 A kotin kolekol pena pil en madau dueta nan dal eu, o a kotin nekidala ad akan nan wasa rir.
- 8 Sappa karos en lan Ieowa o karos me kaukauson nan sappa en wauneki i.
- 9 Pwe ma a kotin masanta, ap pan wiaui, o ma a kotin pangokada, ap pan miela.
- 10 Ieowa kin kotin kawela kapung en men liki kan, o a kin kawukila madamadaua en wei kan.
- 11 A me Ieowa kileledier, pan duedueta, o me a kotin kupurada, pan kokolata.
- 12 Meid pai wei o, me Ieowa ar Kot, o wei, me a kotin piladang a soso.
- 13 Ieowa kin kotin irerong aramas akan karos sang nanlang.
- 14 A kotin irerong karos, me kauson sappa sang mol a tengeteng.
- 15 A kotin wiadar mongiong arail karos, o a kotin mangi ar wiawia kan karos.
- 16 Nanmarki amen sota pan pwai kida a karis toto, o ol komad amen sota pan dore kila a kelail.
- 17 Os akan pil sota kak sauasa ekis o a kelail melel sota kadepa.
- 18 Kilang, silang en Ieowa kin irerong ong me lan i, o me kaporoporeki a kalangan.
- 19 Pwen kapit ir ala sang ni mela o katekatungole ni ansau en lek.
- 20 Ngen atail kin auiaui Ieowa, i me sauas patail o pere patail.
- 21 Pwe mongiong atail kin peren kida i, pwe kitaail kin liki mar a sarau.

<sup>22</sup> Maing, Ieowa, omui kalangan en mi po at duen at kaporoporeki komui.

### 34

<sup>1</sup> I PAN kapinga Ieowa ansau karos; au ai pan kapinga i kokolata.

<sup>2</sup> Ngen i en suaiki Ieowa, me luet akan pan rong, ap peren kida.

<sup>3</sup> Komaail iang ia kapinga Ieowa, pwe kitail en wiaki eu, kalangada mar a.

<sup>4</sup> Ni ai rapaki Ieowa, a kotin sapeng ia, o dore ia la sang nan ai masak karos.

<sup>5</sup> Me kin ariri i, pan kakelada, o mas arail sota pan namenokala.

<sup>6</sup> Ol luet men et lao likwir, Ieowa ap kotin erekier o dorela i sang nan a apwal akan karos.

<sup>7</sup> Toulang en Ieowa kotikot ren me lan i o kotin sauasa ir.

<sup>8</sup> Komaail song o kilang duen kalangan en Ieowa! Meid pai, me liki i!

<sup>9</sup> Lan Ieowa sapwilim a sarau kan! Pwe me kin lan i, sota pan anane meakot.

<sup>10</sup> Laien pulepul akan lekila o men mangada, a me kin rapaki Ieowa, sota pan anane meakot.

<sup>11</sup> Sama ko, komaail kodo re i, rong ia, i pan padaki ong komaail duen lan Ieowa:

<sup>12</sup> Is me inong iong maur warai, o is me mauki ran kaselel akan?

<sup>13</sup> Pere sang mesued lo om o kilin au om, pwe re der kotaue.

<sup>14</sup> A muei sang mesued, ap wiada me mau, rapaki popul ap dadaurata.

<sup>15</sup> Silang en Ieowa mamangi me pung kan, o karonga ereki ar likwir;

<sup>16</sup> A silang en Ieowa kin palian ir, me kin wia mesued, pwen kawe ir ala sang nan sappa.

<sup>17</sup> Irail kin likwir, Ieowa ap kotin mangi ir o kotin sauasa ir sang ni ar apwal akan karos.

<sup>18</sup> Ieowa koren iong ir, me mongiong arail arail olar, o kotin sauasa ir, me ngen arail olar.

<sup>19</sup> Kalokolok toto lel ong me pung kan, a Ieowa kin kotin sauasa ir sang nan mepukat karos.

<sup>20</sup> A kotin sinsila kokon akan karos, pwe eu ender tip pasang.

<sup>21</sup> Me sued kot pan kamela mo doo sang Kot akan, o me kin kailonki me pung kan, pan kalokolok.

<sup>22</sup> Ieowa kin kotin dorela ngen en sapwilim a ladu kan, o karos me liki i sota pan kalokolok.

### 35

<sup>1</sup> MAING, kom kotin pei ong ir, me kin pei ong ia; o kotin palian ong ir, me kin u ong ia.

<sup>2</sup> Re kotin ale pere o tatan mauin ap kotida, pwen sauasa ia.

<sup>3</sup> Ngapekida katieu sauasa ia ong ai imwintiti kan. Kotin masan dong ngen i: Ngai sauas pam!

<sup>4</sup> Me men kame ia la, en namenokala o kankaururala; o me men wia sued ong ia, en pure wei o sarodi.

<sup>5</sup> Ren wiala dueta dip en kisin war akan mon kisininang, o tounlang en Ieowa sikin irail wei.

<sup>6</sup> Al arail en rotorotala o kitentel la, o tounlang en Ieowa en kotin pakipaki irail.

<sup>7</sup> Pwe re insensara ia, pwen kame ia la, ap sota karepa, o re wia por ong ia, a sota karepa.

<sup>8</sup> A en seseinlek lodi ong kalokolok; o insar me a wiadar, pein i en lodi ong; o mela en lel ong i wasa o.

<sup>9</sup> A ngen i en perenki Ieowa o polauleki a kotin sauasa ia.

<sup>10</sup> Kokon ai kan karos pan inda: Maing, is me rasong komui? Pwe kom kotin sauasa me luet o ong me a sota itar ong, o kom kotin sauasa me luet o samama ong me lolap akan.

<sup>11</sup> Saunkadede likam kai u ong ia, kalelapok re i, me i sota asa due.

<sup>12</sup> Re kin depukki me mau me sued, pwen kainsensuede kin ia.

<sup>13</sup> A ngai, ni ar somau, i puri ong nan tuk en likau, o kaloke pein ngai ni ai kaisesol, o kapakap sang mongion i.

<sup>14</sup> Ngai wiai ong ir dueta ong kompoke pa i o udan ri ai; ngai insensued dueta amen, me kin loleitki in a.

<sup>15</sup> A irail peren kida ai sikilikel o pokon pena. Men lalaue pokon penang ia o song en aramas, me i sasa, kin lalaue ia ansau karos.

<sup>16</sup> Re ngi tete ong ia, irail, me kin sansalmau o lalaue pweki kisin manga.

<sup>17</sup> Maing, arai da, me kom pan kotin masani mepukat? Dorela ngen i sang arail mesued, o maur ta ieu sang laien pulepul akan.

<sup>18</sup> I pan kapinga komui nan momodisou laud, o nan pung en aramas toto i pan danke komui.

<sup>19</sup> Der mueid ong ai imwintiti nin sokarepa, ren peren kin ia, o me kin kailong kin ia nin sokarepa, ren der lalaue ia ki mas arail.

<sup>20</sup> Pwe ar lokaia sota kin kareda popul, o re kin madamadaua, en dipi ong me lelapok kan nan sap o.

<sup>21</sup> O re sar pasang au arail ong ia indada: Io io, pein kit kilanger.

<sup>22</sup> Maing, kom kotin mangi mepukat, kom der kotin nenenla, Maing, kom der doo sang ia!

- 23 Kotin opala wasa o kipada, pwen kapung ia la o ai dodok, ai Kot o ai Kaun.
- 24 Maing, ai Kot, kotin kapung ia la duen omui pung, pwe ren der peren kin ia.
- 25 Der mueid ong, ren inda nan mongiong arail: Io, io, i me se men! Der mueid ong, ren inda: Kitail katalalar i.
- 26 Irail karos, me peren kida ai apwal akan, en namenokala o kankaurura la, ir me poponmaso ong ia, en likau kida namenok o kankaurur.
- 27 Irail me kin peren kida ai pung en ngsingis o pereperen, o ren inda ansau karos: Meid kapinga ong Ieowa, me kin perenki sauasa sapwilim a ladu o,
- 28 O lo i en kapakaparok duen omui pung, o kapinga komui ran karos.

### 36

- 1 IET me i men inda sang lol en mongiong i duen tiak en me sapung o: Sota lan Kot mi mon mas a.
- 2 A kin kotaue o lingkaping, pwen pein i dadaurata a dodok sued, ap tatakime tei kan.
- 3 A lokaia karos me sued o likam; a pil sota kin duki ong padak, pwen wiada me mau.
- 4 A kin madamadaua pon a los. A kin weweid nani al me sota mau o sota kin suedeki me sapung.
- 5 Maing, omui kalangan me ideda wong lang, o omui melel pil lel ong tapok kan.
- 6 Omui pung rasong nana en Kot akan, o omui kadeik kan me rasong iluk ileile kalank; Maing, komui me kotin dorela aramas o man akan.
- 7 Meid kasampwal omui kalangan Maing Kot, pwe aramas akan kin diar wasan kamaio pan mot en lim omui!
- 8 Re pan saliel kila dipisou toto nan tanpas omui, o kom kotin kanim pil kin irail peren laud rasong pilap pot.
- 9 Pwe parer ong maur mi re omui, o ni omui marain, se kin kilang marain.
- 10 Kom kotin dadaurata omui kalangan ong me asa komui, o omui pung ong me melel sang ni mongiong arail.
- 11 Kom der mueid ong, i en tiatidi pan me aklapalap akan, o pa en me sapung kan ender kapup ia di.
- 12 A mesued akan en pupedi wasa o, pwe ren lokidokila o solar memaureda.

### 37

- 1 KOE der makaraki me sued akan; o der peirinki me kin wia sapung.
- 2 Pwe re pan sorala madang dueta rä, o re pan mongedi dueta tan tuka kan.

- 3 Kaporoporeki Ieowa o wiada me mau, kaukausonta nan sap o, o wiawia me pung.
- 4 Polauleki Ieowa, a pan kotiki ong uk, me mongion om inong iong.
- 5 Mueid ong Ieowa om wiawia kan o kaporoporeki i, a pan kotin wia mau.
- 6 A pan kapwareda om wiawia me pung dueta marain, o om tiak pung dueta nin sauas.
- 7 Kaporoporeki Ieowa ap nenenla o auiaui, o koe der makar kida pan me kin pwaida ni a wiawia kan, ol o, me kin kapwaiada me sued.
- 8 Muei sang makar o pwilikidi om linggarangar; koe der makar, pwe koe der pil wia me sued.
- 9 Pwe me sued akan pan kokoka sang, a me liki Ieowa, pan sapaneki sap o.
- 10 Ansau takis, ap solar me sapung o, o ma koe men kilang deu a, a solar mia.
- 11 A me opampap akan pan sosoki sap o, o re pan pereperen ki ar kapwa toto.
- 12 Me sapung o kin kamasak me pung o, o ngi tete ong i.
- 13 A Ieowa kotin kiparamateki i, pwe a kotin mangi a ansau.
- 14 Me sapung kan kin ngape kida kodlas o kaonopada kasik katieu, pwen kasikiedi me luet o samama, o kamela me kekeit wei ni melel.
- 15 A ar kodlas pan dokodi pein mongiong arail, o ar kasik katieu pan tip pasang.
- 16 Me malaulau en me pung amen, me mau sang dipisou toto en me sapung kan.
- 17 Pwe pa en me sapung kan pan tip pasang, a Ieowa pan kotin kolekol me pung kan.
- 18 Ieowa kotin mangier ran en me lelapok kan, o ar dipisou pan duedueta.
- 19 Re sota pan namenokala ni ansau apwal, o ni ansaun lek a pan itar ong ir.
- 20 Pwe me sapung kan pan lokidokila, o imwintiti en Ieowa, ma re rasong sap kaselel eu, re pil pan mokonaidi dueta atiniaia.
- 21 Me sapung kan kin pwaipwand ap sota kapungala, a me pung o kin kadek o kin kisakisa wei.
- 22 Pwe me paie kin i, pan sosoki sap o, a me a kotin kariaalar akan pan kokoka sang.
- 23 Ieowa kin kotin katengeteng song en aramas due met ar kakakewei, o a kotin peren kida a wiawia kan.
- 24 Ma a pan pupedi, a sota pan lokidokila; pwe Ieowa kotin kolekidi i lim a.
- 25 Ngai pulepul ap malar, a i saikenta kilanger me pung amen likidmaliealar, de na kan poekipeoki prot.
- 26 A kin kadek ansau karos o kin men kisakis wei, o na kan pan paida.



- 27 Muei sang me sued ap wia me mau, koe ap pan mimieta nan sap o.
- 28 Pwe Ieowa kotin peren kida me pung, o a sota pan kotin likidmaliela sapwilim a sarau kan; re pan nekinek kokolata, a kadaudok en me sapung kan pan kokoka sang.
- 29 Me pung kan pan sosoki sap o, ap mimieta kokolata.
- 30 Au en me pung amen kin kida me lolekong, o lo a kaparokki me pung.
- 31 Masan en a Kot mi nan mongiong i, a sota pan krisedi.
- 32 Me sapung kin masamasan me pung, pwen kamela i.
- 33 A Ieowa sota pan kotin mueid ong, en mi nan pa a kan, o a sota pan kotin kasela i, a lao pan pakadeikada.
- 34 Auiuai Ieowa o weweid nan a al akan, a ap pan kotin kasapwil uk ada, pwe koe en sosoki sap o; koe pan kilang, me sapung kan pan kokoka sang.
- 35 I kilanger me doo sang Kot amen, me katiwo o pwaida o maurada dueta tuka mau pot.
- 36 A ni at dau li wasa o, kilang, a soer mia; i idok duen i, a a solar kak diarokada.
- 37 Dadaurata om lelapok, o wiawia me pung; pwe song due met pan pwaida mau ni imwi.
- 38 A me katiwo kan pan wiaki eu lokidokila, o me sapung kan pan koka sang ni imwi.
- 39 A Ieowa kotin sauasa me pung kan, i me kele parail ni ar apwal akan.
- 40 O Ieowa pan kotin ieiang ir o pan dore ir ala; A pan kotin dore ir ala sang me sapung kan, o a pan sauasa ir, pwe re kin liki i.

### 38

- 1 MAING, der kotin kaloke ia ni omui kupur sued, o der kame ia ni omui ongiong.
- 2 Pwe sapwilim omui kanangan kasik katieu lel dong ia, o lim omui katoutou ia.
- 3 Sota mau kot ni pali war ai pweki omui ongiong, o sota moleilei nan kokon ai kan pweki dip ai
- 4 Pwe dip ai kin kadupaledi mong ai, re kin katoutou ia dueta meakot me toutou melel.
- 5 Ai ola kan posuedela o nanan pweki ai pweipwei.
- 6 I kin kos pena o pairok wei alialu, i kin insensued ansau karos,
- 7 Pwe longelong ai mongedier melel, o sota mau kot ni pali war ai.
- 8 Ngai luetalar melel o i wokiwok pasanger. I kin sangesang, pweki mongiong i sota kak moleilei.

- 9 Maing, kom kotin mangi ai inong karos, o ai sangesang sota rir sang komui.
- 10 Mongiong i rerer, ai kelail ko sanger re i, o marain en mas ai pil rotorotala.
- 11 Kompoke pai o ai warok kan kin doowei sang ia, o suedeki ai kalokolok, o sau i kan kin doo sang ia.
- 12 O me kin inong iong kame ia la, kin masamasan ia, o me men wia sued ong ia, kin indinda duen ar pan wiada dodok sued, o re kin widiwding ansau karos.
- 13 A ngai dueta me salongepon amen, me sota rong wasa, o dueta me lotong, me sota kak sar pasang au a.
- 14 Ngai dueta ol amen me solar rong wasa, o sota depuk en lokaia mi nan au ai.
- 15 A i kin auiuai komui, Maing. Komui Maing ai Kot pan kotin sapeng ia.
- 16 Pwe i men, ren der peren kin ia. Ma nã i pan krisedi, re pan peren kida melel.
- 17 Pwe i koren iong pupedi, o ai kalokolok kin koren iong ia ansau karos.
- 18 Pwe i weokada dip ai kan o suedeki dip ai.
- 19 A ai imwintiti kan memaureta o irail me kelail; me kailong kin ia ni sota karepa me toto.
- 20 O me kin depukki ai me mau me sued, kin palian ia, pweki ai dadaurata me mau.
- 21 Ieowa ai Kot, kom der muei sang ia o der doowei sang ia!
- 22 Kom kotin madang dong ia, Maing sauas pa i.

### 39

- 1 NGAi inda: I pan kanai ong ai ai kan, pwe i ender wia dip ki lo i. I pan sali pena au ai arain en me sapung o mi re i.
- 2 I kadukiedier ai lokaia o nenenlar o solar inda duen peren, a ai kalokolok lalau-dalar.
- 3 Mongiong i karakaradar nan kapedi, o ma i pan tamanda mepukat, a rasong kisinia i lulada; i ap lokaia kida lo i.
- 4 Maing, kotin padaki ong ia, me maur i pan imwisokela, o imwi pan ai ran akan, me i pan samoer.
- 5 Mangi, ai ran akan dueta tãlap en pa en aramas re omui; o maur i likamata sota meakot mo 'mui. Melel aramas, me kin keleki pein i, kin dueta adinia i. Sela.
- 6 Re kin alialu sili rasong mota, o re kin katoutouki pein irail dodok mal. Re kin nanak pena ap sasa, is me pan naineki.
- 7 Ari Maing, is me i en auiuai? I kaporoporeki komui.
- 8 Dore ia la sang dip ai karos, o kom der mueid ong, me pweipwei kan en kaurur kin ia.

- <sup>9</sup> I pan nenenla o sota sar pasang au ai, pwe kom kotin wiadar.
- <sup>10</sup> Kotin katukiedi omui kaloke ia; pwe ngai dupok kilar ai kalokolok pan lim omui.
- <sup>11</sup> Ma kom pan kaloke amen pweki dip a, mom a kaselel ap pan suedala lika-mada man en mot kangala. O meid mal aramas karos! Sela.
- <sup>12</sup> Maing kom kotin ereki ai kapakap, o mangi ai likwir, o der sapaimokid ni ai sangesang, pwe ngai sapwilim omui men kairu o pweledan omui wei men dueta sam ai kan karos.
- <sup>13</sup> Kom kotin muei sang ia, pwe i en ke-lailada, mon ai pan kokowei o solar mia.

## 40

- <sup>1</sup> I AUIAUIER Ieowa, o a kotin iroir dong ia o kotin erekier ai likelikwir.
- <sup>2</sup> A kotin api ia da sang nan por sued o sang wasa lususur, o kotin kasonedier na i kat pon paip eu, pwen kak alu mau;
- <sup>3</sup> O a kotiki ong nan au ai kaul kap pot, pwen kapinga atail Kot; i me aramas toto pan udial ap lan Ieowa o kaporoporeki i.
- <sup>4</sup> Meid pai ol o me kaporoporeki Ieowa o sota waroki ong me aklapalap akan, de me weweid nin tiak likam!
- <sup>5</sup> Maing ai Kot, meid kapuriamui sapwilim omui dodok kan o omui madamadaua, me komui kotin kasale ong kit. Sota me rasong komui. I men kaparok o kasokasoi duen, a re sota mau ong wadok.
- <sup>6</sup> Kom sota kotin kupura mairong man de mairong wan tuka kan; a kom kotin kawasak pasang salong ai; kom sota kotin mauki mairong isis de mairong en dip.
- <sup>7</sup> Ngai ap inda: Kilang, I kokodo; nan puk o me intingidier duen ngai.
- <sup>8</sup> I men kapwaiada kupur omui, ai Kot; o sapwilim omui kapung o mi nan lol en mongiong i.
- <sup>9</sup> I pan padaki ong momodisou laud duen me pung. Kilang, i sota pan nenenla, Maing kom kotin mangi.
- <sup>10</sup> I sota okila omui pung nan mongiong i. I kin kapakaparok duen omui melel o mau; i sota kin okila omui kalangan o melel mon momodisou laud.
- <sup>11</sup> A komui Maing der kotiki sang ia omui kalangan, omui kalangan o melel en sinsila ia ansau karos.
- <sup>12</sup> Pwe ai kalokolok kapil ia pena, o re sota mau ong wadok; dip ai katoutou ia, i ap solar kilang wasa; ir me toto sang pit en mong ai, ap solar angiang.

- <sup>13</sup> Kom kotin kupura ia Maing, o kotin dore ia la; Maing kom kotin sauasa madang!
- <sup>14</sup> Me kin masamasan ia, pwen kame ia la, en namenokala o lisela; me men wia sued ong ia, en purewei o lisela.
- <sup>15</sup> Ir me kin likelikwirki due ai: "Io, io!" en masak o lisela.
- <sup>16</sup> Karos me idok komui, en pereperen o popol. O me pok ong omui mau; ansau karos ren inda: Meid kapingan Ieowa!
- <sup>17</sup> Pwe ngai samama o luet; a Ieowa kin kotin apwali ia. Komui sauas pa i o ai saundur; ai Kot, kom der kotin pwand!

## 41

- <sup>1</sup> MEID pai me kin apwali me samama o. Ieowa pan kotin dorela i ni ran apwal.
- <sup>2</sup> Ieowa pan kotin apwali i o sinsila a mau; o a pan pwaida nin sappa, o a sota pan muedalada i nan pa en a imwintiti kan.
- <sup>3</sup> Ieowa pan kotin kakelada i ni a pan mela; kom kin kotin sauasa i ni a somau karos.
- <sup>4</sup> Ngai inda: Maing, kom kotin maki ong ia; kakelada ngen i, pwe ngai wiadar dip ong komui.
- <sup>5</sup> Ai imwintiti kan kin lokaia sued duen ngai. Iad a pan mela o mar a pan ririla?
- <sup>6</sup> A kin kodon kilang ia, a kin lokelokaia, a mongiong a me toror; pwe a kin rapaki karepan a lalaue, ap kokowei lokelokaia due.
- <sup>7</sup> Karos me kailong kin ia, kin lidilidumon-gin kin ia, o re madamadaua sued duen ngai.
- <sup>8</sup> Me suedkot mi re a; a pupedier o solar pan uda.
- <sup>9</sup> Pil kompoke pa i, me i liki, o me iang ia mangamanga, kin tiaki ia di.
- <sup>10</sup> A komui Maing kotin maki ong ia, o kau ia da, i ap pan depuk ong ir.
- <sup>11</sup> I me i pan asaki, me kom kotin kupura ia, pwe ai inwintiti ender ngisingis kin ia.
- <sup>12</sup> A kom kin kolekol ia pweki ia lelapok, o kom pan kotin kasone ia di mon silang omui kokolata.
- <sup>13</sup> Kapinga ong Ieowa, Kot en Israel sang met o kokolata! Amen. Amen.

## 42

- <sup>1</sup> DUEN tia amen inong iong pil, iduen ngen i kin inong iong komui o Kot.
- <sup>2</sup> Ngen i inong iong Kot, ong Kot ieias. Iad i pan lel wasa o, me i pan ariri silang en Kot.
- <sup>3</sup> Pil en mas ai, iei kan ai manga ni ran o ni pong, pwe irail kin indang ia ran karos: Ia om Kot?

- <sup>4</sup>Ma i madamadaua duen mepukat, i ap wudokila audepan mongiong i ong pein ngai, pwe i inong iong iang pokon o kokodalang tanpas en Kot, o i men iang pokon, me kin wiada a ran, peperen o kapikapinga.
- <sup>5</sup>Ngen i, da me koe insensuedeki o sota moleileiki? Auiaui Kot! I pan purong kapinga i. Pwe a kotin sauasa kin ia silang i.
- <sup>6</sup>Ai Kot, ngen i me insensued; i ap madamadaua duen komui nan sap en kailan Iordan o Ermonin, pon dol Misar.
- <sup>7</sup>Sapwilim omui pil akan ngiringirsok, pil laud akan ngiringirsok; sapwilim omui iluk kan karos kadupal ia di.
- <sup>8</sup>Ieowa kotin inaukidar a kalangan ni ran, a ni pong i kin kauli ong i, o i kapakap ong Kot en maur i.
- <sup>9</sup>I kin indang Kot ai paip: Da me kom kotin likidmalie kin ia la? Da me i en weweideki ni insensued pweki ai imwintiti kelail ong ia?
- <sup>10</sup>Likamata kokon ai kan mut pasanger, ni ai imwintiti lalaue ia. Pwe re kin indang ia ran karos: Ia om Kot?
- <sup>11</sup>Ngen i, da me koe insensuedeki o sota moleileiki? Auiaui Kot! Pwe i pan danke i, pwe i sauas pan mas ai o ai Kot.

### 43

- <sup>1</sup>MAING Kot! Kotin sauasa ai pung, o kotin ieiang ia nan kapung ong aramas sued pukat, o kotin dore ia la sang aramas likam o morsued akan.
- <sup>2</sup>Pwe komui Kot en ai kel; da me kom kotin kase kin ia la? Da me kom kotin mueid ong, i en weweidwei ni ai insensued, ma ai imwintiti kelail ong ia?
- <sup>3</sup>Kom kotin kadarado omui marain o melel, pwe ira en kalua ia, o wa ia lang ni omui dol sarau i o tanpas omui.
- <sup>4</sup>Pwe i en pedelong ong nan pei sarau i en Kot, iei Kot me kaperen pa i o kapol pa i, o i en danke komui Kot ki arp, ai Kot.
- <sup>5</sup>Ngen i, da me koe insensuedeki o sota moleileiki? Auiaui Kot! Pwe i pan danke i, pwe i sauas pan mas ai o ai Kot.

### 44

- <sup>1</sup>MAING Kot, se ronger ki salong at, sam at oko kasokaso i ong kit er, me kom kotin wiadar ni ar ansau mas.
- <sup>2</sup>Kom kotin pakiweier men liki kan ki lim omui, ap wilian ir di; kom kotin koko sang wei kan, ap id katotoe ir ala.

- <sup>3</sup>Pwe re sota kaloedier sap o ki ar kodlas, o pa arail sota katempa ong ir; pwe pali maun omui o lim omui, o marain en silang omui; pweki kom kotin kupura irail er.
- <sup>4</sup>Pwe komui Kot ai Nanmarki, me inauki ong Iakop, en sauasa i.
- <sup>5</sup>Komui, me se pan kawekila at imwintiti kan; ni mar omui me se pan tiakekidi me kin palian kit.
- <sup>6</sup>Pwe i sota kin kaporoporeki ai kasik katieu, o ai kodlas sota kak dore ia la.
- <sup>7</sup>Pwe komui me kin sauasa kit sang at imwintiti kan, o kom kin kananmenokala, me kailong kin kit.
- <sup>8</sup>Ran karos se pan kapinga Kot, o se pan danke ong mar omui kokolata. Sela.
- <sup>9</sup>Ari so, kom kotin likidmalie kin kit ala, pwe sen lisela, o komui sota iang at karis akan.
- <sup>10</sup>Kom kotin mueid ong at imwintiti, ren paki kit wei, o me kailong kin kit, kin kulia sang at kapwa.
- <sup>11</sup>Kom kotin mueid ong ir, ren kawe kit ala dueta sip oko, o kom kotin kamueit kit pasang nan pung en men liki kan.
- <sup>12</sup>Kom netikila sapwilim omui kan ni pwai sued, a komui ap sota kapwapwa kilar.
- <sup>13</sup>Kom kin kotin wia i ong kit, sen kankaurer ren men imp at, o lalaue o sarodi ren me kapil kit pena.
- <sup>14</sup>Kom kotin wia kin kit karasepa eu ren men liki kan o aramas akan kin due-duälök kin kit.
- <sup>15</sup>I kin saro nin ran karos o mas ai me dir en namenok,
- <sup>16</sup>Ni ai rongerong aramas morsued o lalaue, o ni ai kilekilang ai imwintiti o me kin akdepuk kan.
- <sup>17</sup>Mepukat karos lel dong kit er, ari so, se sota kak monokela komui, de wia dip ong sapwilim omui inau.
- <sup>18</sup>Mongiong at sota pupwei sang komui, o se sota wuki wei sang al omui.
- <sup>19</sup>A komui kawe kit alar ni wasan man sued, o kom kadupale kidi mot en mela.
- <sup>20</sup>Ma se monokela mar en at Kol, o pokada pa at ong amen kot,
- <sup>21</sup>Kot sota pan kotin diarada? Pwe a kotin mangi lol en mongiong at.
- <sup>22</sup>Pwe kit kin kalokoloke kin komui ni ran karos, o kit rasong sip me pan kamela.
- <sup>23</sup>Maing, kom kotida! Da me kom kotin saimokela? Kotin opada wasa, o der kasapoke kit ala kokolata!
- <sup>24</sup>Da me kom kotin karirila silang omui, o kotin maliela at luet o at kalokolok?
- <sup>25</sup>Pwe ngen it poridier ni pwel par; kaped it pas ong pwel.

26 Kom kotida, sauasa kit, o dore kit ala pweki omui kalangan.

## 45

- 1 MONGIONG i kin wiada kaul kaselel apot; i pan kaule ki duen Nanmarki amen, lo i rasong pensil en sauninting koiok amen.
- 2 Komui ta me kaselel sang aramas karos; meid kaselel silang omui; i me Kot kapai kin komui ta kokolata.
- 3 Pira wong omui kodlas ni longelong omui, komui ol komad, o kapwata kin komui!
- 4 Komui en pwaida ni omui kapwat. Kom kotiwei, pwen sauasa me melel, o me luet akan, pwen kolekol ong ir me pung. Lim omui maun ap pan wia dodok kapuriamui.
- 5 Kanangan omui kasik katieu me kong — wei kan kin lodi ong komui —; re kin lel ong nan mongiong en inwintiti en nanmarki.
- 6 Maing Kot, mol omui pan duedueta kokolata; o sokon en wei omui me sokon en pung apot.
- 7 Kom kin pok ong me pung ap tataki tiak sued; i me Kot, omui Kot, keie kin komui le en kaperen mon omui warok kan.
- 8 Omui likau kan kin pomauki mire, aloe, o kasia ni omui pedoi sang tanpas omui im elpenpain, komui kin polauleki kaul o arp.
- 9 Sapwilim en Nanmarki seripein ko mi nan pung en toun tanpas omui; li Nanmarki a kotikot ni pali maun omui kapwateki kold en opir.
- 10 Nai seripein koe rong, o kilang, o kapaikedi salong om, o monokela sap om o sau om akan.
- 11 Nanmarki ap pan peren kida mom om kaselel; pwe i om Kaun, a koe en kaudoki ong i.
- 12 Nain Tirus, me kapwapa re 'rail pan wado kisakis; o ngidingid re om.
- 13 Sapwilim en Nanmarki seripein, me mi lole, meid kaselel ni mongiong i, a kapwateki likau kold.
- 14 A pan pakaluala ren Nanmarki ni a likau lingan o a warok peinekap akan, me idauen i, kompoke pa, pan kalua dong komui.
- 15 Re pan kalua irail ki peren o ngisingis, o re kin pedelong ong nan tanpas en Nanmarki.
- 16 Noumui manakap akan pan wiliandi sam omui kan; i me kom pan kasapwiladang saupeidi en sap akan karos.
- 17 I pan tamanda mar omui ni di kan karos; i me wei kan karos pan kapinga komui kokolata.

## 46

- 1 KOT atail kaporopor o kele patail, o sauas patail ni atail apwal akan, me lel dong kitail.
- 2 I me se sota pan masak, menda ma sappa pan sorela, o nana kan pan kirila nan warong en madau.
- 3 Menda ma a iluk kan pan ongiogida o pudopudeda, o ma a kelail ong kawela nana kan. Sela.
- 4 Pwe kanim en Kot pan pereperen a due-dueta iangaki utun pil, me mi lole, wasa me tanpas sarau en me Lapalap o mia ia.
- 5 Kot kotikot lole, i me a pan tengetengki kokolata; Kot pan kotin sauasa i nin soran.
- 6 Men liki kan kin lingararang o wei kan pan ola, sappa pan soreli, ma a pan kotin masani.
- 7 Ieowa Sepaot kotin ieiang kitail; Kot en Iakop i pere patail. Sela.
- 8 Komail kodo, kilang dodok lapalap en Ieowa, me kotin dodok kelail nin sappa,
- 9 Me kotin kadukiedi mauin lel ni imwin sap karos o katip pasang kasik katieu, o kawela katieu, o karonga kila kisiniai war en mauin akan.
- 10 Komail nenenla o asada, me Ngai ta Kot. I pan kawauwi pein Ngai ren men liki kan, I pan kalinganada nin sappa.
- 11 Ieowa Sepaot kotin ieiang kitail; Kot en Iakop i pere patail. Sela.

## 47

- 1 KOMAIL kainok karos lolopop o kapinga Kot ki ngil kaperen!
- 2 Pwe Ieowa me lapalap kaulap, a meid kalank; i Nanmarki lapalap nin sap akan karos.
- 3 A kotin kaloedi ong kitail wei kan o aramas akan pan na atail.
- 4 A kotin piladang kitail atail soso, lingan en Iakop, me a kotin pok ong. Sela.
- 5 Kot kotida ngisingis, o Ieowa ki ngil en koronete kelail.
- 6 Kauli ong Kot psalm ko! Kaulki psalm ko! Kauli ong atail Nanmarki! Kakaul!
- 7 Pwe Kot Nanmarki nan sap karos; komail kaul ki psalm ni lolelong.
- 8 Kot Nanmarki en men liki kan; Kot kotikot pon mol a sarau.
- 9 Saupeidi en wei kan pokon pena wiala wein Kot en Apraam; pwe pere en mauin nin sappa me sapwilim en Kot. A kotin lapalap melel.

## 48

- 1 IEOWA meid lapalap, o a indand mau melel nan kanim en atail Kot, pon sapwilim a dol sarau!

- 2 Meid kaselel en dol Sion a uda, me sap karos kin peren kida; ni pali apong kanim en nanamarki lapalap mimi ia.
- 3 Toun im kalaimun akan asa Kot, me i pere parail.
- 4 Pwe kilang, nanmarki kan pokon pena, ap daulul wei.
- 5 Irail puriamui kila ni ar kilanger mepukat; irail masapwekadar o tanger.
- 6 Irail rerer, o re masak dueta li pan naitik amen.
- 7 Kom kin kotin kawela sop en Tarsis ki ang en mas en lang.
- 8 Duen atail rongadar, iduen kitail kin kilangada nan kanim en Ieowa Sepaot, nan kanim en atail Kot; Kot kin kolekol i kokolata. Sela.
- 9 Maing Kot se kin tamatamanda omui kalangan nan sapwilim ar tanpas im en kaudok.
- 10 Maing Kot duen mar omui iduen wau omui lel ni imwin sappa; pali maun omui me dir en pung.
- 11 Dol en Sion en pereperen, o nain Iuda seripein ko en insenemauki omui kadeik kan.
- 12 Komail kaidong kapil pena Sion, wadok im teng kan;
- 13 Kilekilang mau a kel takai kan, o kasakasau i im kalaimun akan, pwe komail en kak kasoia ong men mur akan,
- 14 Me Kot men et, pan atail Kot ansau karos kokolata. A pan kotin kalua kitail kokolata.

## 49

- 1 Komail kainok kan karos rong o dedeki, komail toun sap karos,
- 2 Ir karos, aramas o saupeidi, ir karos me kapwapwa o samama kan!
- 3 Au ai pan kaparok duen lolekong, o mongiong i duen lamalam pung.
- 4 I pan kapaik dong salong ai lepen masan, o i pan kasaleda me rir akan ni ngil en arp.
- 5 Da me i en masak ni ran apwal akan, ma me sapung kan kapil ia pena,
- 6 Me kin kaporoporeki ar dipisou o suaiki ar kapwa toto?
- 7 Pwe sota me kak dorela ri a, de tome ki i ren Kot,
- 8 (Pwe meid apwal, en dorela ngen ar; a sota pan pwaida kokolata).
- 9 Pwen maur potopot o sota kilang sousou o.
- 10 Pwe a kin kilang, me lolekong kan kin mela dueta me pweipwei o iakalar akan, o re pan mueid ong amen ar dipisou kan.

- 11 I me re kin peren kida, ma im arail pan duedueta, o deu 'rail pan mimieta kokolata; o re konekon meel nin sappa.
- 12 Ari so, aramas me konekon sota kak mimieta ni mepukat, pwe a pan kokowei dueta man amen.
- 13 Iet ar wiawia pukat meid pweipwei; ari so, kadaudok ar kin kapinga ki au arail. Sela.
- 14 Re wonon nan wasan mela dueta pwin sip; mela kin kamanga ir; a me lelapok kan pan kaun irail da madang, o mom ar pan sorede, o re pan doo sang deu 'rail, mimieta nan pweleko.
- 15 A Kot pan kotin dorela ngen i sang nan mana en wasan mela, pwe a pan kotin sapwilimane kin ia. Sela!
- 16 Koe der puriamuiki, ma amen pan kapwapwala, o ma lingan en im a pan laudala.
- 17 Pwe a sota pan wala meakot ni a pan mela, o a lingan sota pan idauenla i.
- 18 A kin insenemau kila peren en maur kaselel wet, o aramas kin kapinga ir, me kin apapwali pein ir eta ni maur et.
- 19 A pan idauen la sam a kan, ap solar kilang marain kokolata.
- 20 Ari, ma aramas amen indand mau, ap sota a lamalam, a pan kokowei dueta man amen.

## 50

- 1 KOT Ieowa manaman masanier o molipedo sappa sang ni tapin katipin lel ni a kiridi.
- 2 Lingan en Kot tapida sang Sion.
- 3 Atail Kot kotido, o a sota kin kotin sapaimokit. Kisiniai kelail kin tiong mo a, o melimel laud kin mi impa.
- 4 A kotin molipe lang o sappa, pwen kapungala sapwilim a aramas akan!
- 5 Komail kapokon pena nai lelapok kan, me wiadar ar inau ong ia ni ansau en mairong!
- 6 Nanlang pan kasaleda a pung; pwe Kot kin kotin kadeikada. Sela.
- 7 Komail nai aramas akan rong, I pan padaki ong komail. Israel, I pan kaparoki ong komail: Ngai Kot, om Kot.
- 8 I sota pan kaloke uk pweki om mairong, pwe om mairong isis kin wiaui ong ia ansau karos.
- 9 Ari so, I sota pan ale sang komail kau ol de kut o sip ol sang nan im omail.
- 10 Pwe man en nan wel karos me ai o pil man akan, me mimi pon nana kid pak toto.
- 11 I asa manpir en nana karos o song en man karos, me mi nan sap, kin mi re i.

- 12 Ma I men mangadar, I sota pan indang uk, pwe sappa me ai o audepa karos.
- 13 Da, koe lamelame, me I kin inong iong uduk en kau ol, de I men nim ntan kut ol?
- 14 Mairongki danke ong Kot o kapungalang me Lapalap o om inau.
- 15 Likwir dong ia ni om insensued, I ap pan dore uk ala, a koe pan kapinga ia.
- 16 A Kot kotin masani ong me sapung o: Da me koe kaparok duen ai kusoned akan, o lokaia kida au om duen ai inau,
- 17 Pwe koe kin tateki tiak pung o mamaleki ai kusoned akan?
- 18 Ma koe pan kilang lipirap amen, koe kin iang i, o koe kin waroki ong me kamal akan.
- 19 Au om kin lokaia kiwei me sued o lo om me likam.
- 20 Koe kin wonon o lokaia likam duen ri om; o nain in om putak koe kin karaune mal.
- 21 Koe wiada mepukat, a ngai kin nenenla; koe ap kiki ong, me ngai dueta koe. A I pan kapung ong uk o kasaleda mon mas om.
- 22 Komail me mamaleki Kot, en asa, I pan kasor komail la o sota sauas pamail pan mia.
- 23 Me kin mairongki danke, kin kapinga ia; o i al o, me I pan kasale ong i duen maur en Kot.

## 51

- 1 MAING Kot, kom kotin maki ong ia duen omui kalangan, o kotin lapwada dip ai duen ar kalangan lapalap.
- 2 Kom kotin widen ia sang ai wiawia sapung, o kotin kamakel ia da sang ni dip ai.
- 3 Pwe i asa duen ai wiadar me sued, o dip ai me sansal ong ia ansau karos.
- 4 Ong komui eta me i wiadi dip ong, o wiadar sapung mon silang omui, pwe komui me pung eta ni omui masan akan, o komui makelekel eta ni omui pan kadeikada.
- 5 Kotin masani, me i ipwidier ni sapung, o in ai ape kin ia dar ni mang en dip.
- 6 Kotin masani, kom kin kotin mauki melel, me mi wasa rir; kom kin kasale ong ia lolekong rir.
- 7 Kom kotin kamakele kin ia isop, pwe i en minla, widen ia, pwe i en puetepueteta sno.
- 8 Kom kotiki ong ia peren o popol, pwe kokon ai kan, me kom kotin kawelar, en insenemaula.
- 9 Kom kotin sopwei sang dip ai kan, o kotin lapwada ai sapung karos.

- 10 Maing Kot, kom kotin wiadi ong ia mon-giong makelekel, o kotin kawiliakapada ngen i.
- 11 Kom der kase ia la sang mon silang omui o der kotiki sang ia ar Ngen sarau.
- 12 Kom kotin pur ong kamait ia la ki omui sauasa ia, o kotiki ong ia ngen en kaperen.
- 13 I pan padaki ong me katiwo kan duen al omui kan, pwe me dipan akan en wuki ong komui.
- 14 Maing Kot, kom kotin dore ia la sang dip en nta, pwe komui Kot ai saunkamaur, pwe lo i en kapinga omui pung.
- 15 Maing Ieowa, kom kotin kasar pasang kilen au ai, pwe au ai en kapikapinga komui.
- 16 Pwe kom sota kotin mauki mairong kamela — a ma iei, i pan wiada — o mairong isis kom sota kotin kupura.
- 17 A iet mairong, me Kot kin kotin kupura: Ngen olar, o mongiong insensuedalar, o karakarak, iei me komui Maing Kot sota pan kotin mamaleki.
- 18 Kom kotin sauasa Sion ki omui kalangan, kotin kauada kel en Jerusalem.
- 19 Komui ap pan kupura mairong pung, mairong isis o mairong unsok. I ansau me kau ol pan iseda pon sapwilim omui pei sarau.

## 52

- 1 KOE ol weit, da me koe suaikeki me sued, pwe kalangan en Ieowa kin duedueta ni ran karos.
- 2 Lo om inong iong me sued, o kin rasong naip kong pot, ni a wia likam.
- 3 Koe kin mauki lokaia sued sang me mau, o lokaia likam sang me pung. Sela.
- 4 Koe kin men lokaiaiki me sued lo om likam.
- 5 I me Kot pil pan kawe uk ala, o lepuk uk pasang, o waik uk sang nan im om, o koko uk sang nan sap en me maur akan. Sela.
- 6 A me pung kan pan kilang o masapwekada, o re pan kaurureki i:
- 7 Kilang, iei ol o, me sota kaporoporeki Ieowa, pwe a keleki a dipisou toto o a kelail ong a wiada me sued.
- 8 A ngai dueta tuka oliwe pot nan tanpas en Kot, i kaporoporeki kalangan en Kot kokolata.
- 9 I pan kapinga komui kokolata, pwe kom kak kotin wiada; i pan kapinga mar omui, pwe a ringan ren sapwilim omui lelapok kan.

## 53

- 1 ME pweipwei kan kin indinda nan mon-giong arail: Sota Kot. Arail tiak meid

- sued. Arail sapung kan sakanekan. Sota amen mia, me kin wia me mau.
- <sup>2</sup> Ieowa kin irerong aramas akan sang nanlang, pwen masani, ma amen mia, me lolekong o rapaki Kot.
- <sup>3</sup> A ir karos suedalar, o karos sapungalar, sota me kin wiada me mau, sota amen.
- <sup>4</sup> Ir karos me kin wiada me sued, sota arail lolekong, irail, me kin namala nai aramas akan rasong prot, a re sota kin likwir ong Kot.
- <sup>5</sup> Rap masak ni sota karepa, pwe Kot kotin kamueit pasanger kokon en ir, me kin kapil uk pena. Kom kotin kanamenok ir alar, pwe Kot kotin kase ir ala.
- <sup>6</sup> O i men, sauas pan Israel en kodo sang nan Sion, o Kot en kotin lapwada sapwilim a salidi kan! I me Iakop pan insen mauki o Israel pan pereperenki.

## 54

- <sup>1</sup> MAING Kot, kom kotin sauasa ia ki mar omui, o kotin kasansaleda ai pung ki omui manaman.
- <sup>2</sup> Maing Kot, kom kotin ereki ai kapakap, o kotin mangi lokaia en au i.
- <sup>3</sup> Pwe men wai kai palian ia, o me weit akan masamasan maur i, o re sota weweid mon Kot. Sela.
- <sup>4</sup> Kilang, Kot sauas pa i, Ieowa kin kolekol ngen i.
- <sup>5</sup> A pan kotin depuk ong ai imwintiti kan ar me sued. Kom kotin kawe ir ala ki omui melel.
- <sup>6</sup> I ap pan wiai ong komui mairong kaperen, o kapinga mar omui, pwe a me mau.
- <sup>7</sup> Pwe a kotin dore ia la sang nan ai apwal akan karos, o mas ai peren kidar ai imwintiti kan.

## 55

- <sup>1</sup> MAING Kot, kom kotin ereki ai kapakap, o kom der rirwei sang mon ai ngidingid.
- <sup>2</sup> Kom kotin mangi ia o kotin sapeng ia. Pwe i kin sansalong sili o sangesangki,
- <sup>3</sup> Pwe ngil en ai imwintiti kin kainsensued ia o me doo sang Kot akan kin pakipaki ia; pwe re kin men wia sued ong ia, o re kin kailong kin ia.
- <sup>4</sup> Mongiong i masapwekada nan kaped i, o masak en mela lel ong ia.
- <sup>5</sup> Masak o rerer lel dong ia; wapon kadupal ia di.
- <sup>6</sup> I ap indada: O ma pa i kat dueta pa en muroi, pwen pirwei o mi ekis wasa.
- <sup>7</sup> I ap pan pirla wasa doo, o kaukauson sap tan. Sela.
- <sup>8</sup> I pan madanglang wasan moleilei mon melimel o katau.

- <sup>9</sup> Maing Ieowa, kom kotin kawuk pasang lo arail, o kotin kasore ir ala, pwe i kilekilang, me toun kanim o kin weit o akamai pena.
- <sup>10</sup> Mepukat kin wiaui ni ran o ni pong pon arail kel takai, o a dir en apwal o dodok kan.
- <sup>11</sup> Me sued akan kin kaunda kanim o; o tou a kan sota kin muei sang likam o kotaue.
- <sup>12</sup> Ma ai imwintiti pan wia sued ong ia, i sota pan insenoki, o ma me kailong kin ia pan pei ong ia, i pan ruki sang mo a.
- <sup>13</sup> A koe, ai warok, o kompole pa i o kis ai.
- <sup>14</sup> Pwe kitail minimin penaer nan pung atail. Kitail wiaki eu nan pung en pokon nan tanpas en Kot.
- <sup>15</sup> Mela en madang lel wong irail, pwe ren lokidokila nan wasan mela ni ar memaur; pwe im arail o lol arail me dir en morsued.
- <sup>16</sup> A i pan likwir ong Kot, o Ieowa pan kotin sauasa ia.
- <sup>17</sup> Nin sautik, o ni mansang, o nin sauas i pan sangesang o weriwer, a ap pan kotin mangi ngil ai.
- <sup>18</sup> A pan kotin dorela ngen i sang ren me men palian ia, o pan kotin kamoleilei ia; pwe ir me toto, me u ong ia.
- <sup>19</sup> Kot pan kotin ereki o kanamenok ir ala, pwe a kotikot eta sang tapin kaua. Sela. Pwe re sota pan wukila, o re sota masak Kot.
- <sup>20</sup> A saikidi sapwilim a popol akan, o a kawela a inau.
- <sup>21</sup> Au a me kitentel sang wi, ap lamelame duen mauin, a lokaia me muterok sang le, ap rasong kodlas kong, me onopa dang pei.

- <sup>22</sup> Mueid ong Ieowa, me koe inong iong, a pan apwali uk ada, a sota pan kotin mueid ong me pung kan en wukiwuk sili.
- <sup>23</sup> Maing Kot, kom pan kotin kase ir long ong nan por lol en me sued o; me inong iong nta o likam kan sota pan lel ong apali en maur arail. A i pan kaporoporeki komui.

## 56

- <sup>1</sup> MAING Kot, kom kotin maki ong ia, pwe aramas akan ngiringir ong ia; re kin peipei o kamasak ia ni ran karos.
- <sup>2</sup> Ai imwintiti kan kin ngiringir nin ran karos, pwe me toto pei ong ia ni ar aklapalap.
- <sup>3</sup> Ni ai masak i kin kaporoporeki komui.
- <sup>4</sup> I pan kapinga masan en Kot, i pan kaporoporeki Kot o pan sota masak, da me aramas kak wiai ong ia?

- <sup>5</sup> Ran karos re kin kawukila ai lokaia, re kin madamadauata, duen ar pan kawe ia la.
- <sup>6</sup> Re pokon pena, o masamasan, o kakanakai ong kaimwin nä i kat, duen ar pan kak kame ia la.
- <sup>7</sup> Iaduen, re pan kak pitila ni ar morsuet? Maing Kot, kom kotin kasapokala song en aramas due met,
- <sup>8</sup> Kom kotin wadok pena al en ai pitilar akan, o kotin kolekol pena pil en mas ai nan sapwilim omui dal o. Pwe kaidin karos kileledier nan sapwilim omui puk o?
- <sup>9</sup> Ai imwintiti kan ap pan sapale wei ni ran o me i pan likelikwir; let me i asa, me Kot sauas pa i.
- <sup>10</sup> I pan kapinga masan en Kot; i pan kapinga masan en Ieowa.
- <sup>11</sup> I kaporoporeki Kot, ap sota masak, pwe da me aramas akan pan kak wiai ong ia?
- <sup>12</sup> Maing Kot, i inauki ong komui, me i pan mairongki danke ong komui;
- <sup>13</sup> Pwe kom kotin dorelar ngen i sang mela o nä, i kat sang ai krisidi, pwe i en weweid mon silang en Kot nan marain en me maur akan.

## 57

- <sup>1</sup> MAING Kot, kom kotin maki ong ia, maki ong ia! Pwe ngen i kin kaporoporeki komui, o pan mot en lim omui i wasan ai maur, lao ansau apwal dauhier.
- <sup>2</sup> I likwir ong Kot, me lapalapia, ong Kot, me kotin kaimwisokala ai kankangeranger.
- <sup>3</sup> A kotin poroneda sang nanlang sauas pa i ong me kanamenok ia, o me kin ngiringir ong ia. Sela. Kot pan kotin kadarado a kalangan o mehel.
- <sup>4</sup> Ngen i mi nan pung en laien akan, aramas rasong umpul en kisiniai; ngi arail rasong katieu o kanangan kasik katieu, o lo arail rasong kodlas kong o.
- <sup>5</sup> Maing Kot, kom kotida ileila sang lang, o wau omui nan sappa karos.
- <sup>6</sup> Irail insarai ia nan al ai kan; re kin katoutoui ngen i; re weirada mo i por eu, ap pein pupedi ong lole. Sela.
- <sup>7</sup> Mongiong i insenemaular, Maing Kot, ngen i onoper ong kaul o kaping.
- <sup>8</sup> Ngen i pirida! Kaul o arp pirida! I pan pirida nin soran.
- <sup>9</sup> Ieowa, i men danke ong komui nan wei kan; i pan kauli ong komui nan pung en aramas akan.
- <sup>10</sup> Pwe omui kalangan me laud dueta nanlang, o omui mehel dueta tapok kan.
- <sup>11</sup> Maing Kot, kom kotida ileila sang lang, o wau omui lingan nan sappa karos.

## 58

- <sup>1</sup> IADUEN komail lotong, pwe komail sota men lokaia me pung, o komail sota men kapung nin tiak inen, komail aramas akan?
- <sup>2</sup> Mehel, komail kin wia me sapung nan mongiong o, o nan sap o komail kin kelail ong wiada me sued.
- <sup>3</sup> Me doo sang Kot akan me sapung sang pon kapan in ar akan; me likam kan kin sansalong sili sang nan kaped en in ar akan.
- <sup>4</sup> Ar lingararang rasong lingararang en serpent amen, rasong serpent salongepon, me penala salong a,
- <sup>5</sup> Pwen der rong ngil en saunwun ani o kati ani men, me kadek wunani.
- <sup>6</sup> Maing Kot, kom kotin katip pasang ngi nan au arail; Maing Ieowa, kom kotin kawela ngi en laien pulepul akan.
- <sup>7</sup> Kom kotin kawe ir ala dueta pil me kin pwilipwili wei. Ma a kaonopada a kanangan kasik katieu, re kin tip pasang.
- <sup>8</sup> Re pan sorede dueta kamadel amen kin mong pena; re sota pan kilang katipin dueta seri amen, me sota dar pungi.
- <sup>9</sup> Mon omail ainpot pan pam tui, a pan kotin sipet wei ni a ongiong.
- <sup>10</sup> Me pung o pan peren kida a lao kilang depuk ong ir, o a pan widen nä a nan ntan me doo sang Kot o.
- <sup>11</sup> Aramas akan ap pan inda: Me pung kan pan tungole kating; pwe Kot eta saunkadeik nin sappa.

## 59

- <sup>1</sup> AI Kot, kom kotin dore ia la sang ai imwintiti kan, o kotin pera sang ia mon me palian ia.
- <sup>2</sup> Dore ia la sang me morsued akan, o kotin sauasa ia sang me inong iong nta.
- <sup>3</sup> Irail kin masamasan maur i, me kelail akan pokon pena ong ia, a sota dip ai, o sota me sued kot, me i wiadar, Maing Ieowa.
- <sup>4</sup> Irail tang pena o kaonopada, a sota dip ai. Kom kotin opada wasa, o kotin ieiang ia, o irerong mepukat.
- <sup>5</sup> Maing Ieowa, Kot Sepaot, Kot en Israel, kotin opada wasa, o kotin kadeikada men liki kan karos. Kom der maki ong amen ir, me kin wia dip ni ar aklapalap. Sela.
- <sup>6</sup> Nin sautik re kin puredo ngungung dueta kidi kan, o re kin tangatang sili nan kanim o.
- <sup>7</sup> Kom kotin mangi, re kin lidelidu mongin; kodlas kan mi pan kilin au arail: Is me pan rong?



- 8 A komui, Maing Ieowa, pan kotin kiparamat kin irail, o kom pan kotin kalis irail la.
- 9 Kele pa i, i pan rukila re omui. Pwe Kot pere pa i.
- 10 Kot kin kotin kasale ong ia melel a kalangan; Kot kin kotin wiai ong ia, i en peren kida ai imwintiti.
- 11 Kom der kotin kame ir ala, pwe nai aramas akan pan monokela, a kotin kamueit ir pasang ki omui mana, Ieowa pere pat, kasapoke ir ala.
- 12 Dip eta lokaia en kilin au arail; i me re pan lokidi ni ar akpalap; pwe re kin lokaia lalaue o likam eta.
- 13 Kom kotin kawe ir ala o der maki ong ir; kawe ir ala, pwe ren solar meakot, ap asa, me Kot kotin kaunda kadaudok en Iakop o sap karos. Sela.
- 14 Nin sautik re kin purodo ngungung dueta kidi kan, o re kin tangatang sili nan kanim o.
- 15 Re kin tangatang sili rapaki kan ar manga, ap lipaned, ma re sota pan medila.
- 16 A i pan kauleki duen omui manaman, o ni mansang i pan kapinga omui kalangan, pwe komui pere pa i o ai paip ni ran en ai apwal.
- 17 I pan kauli ong komui ai paip, pwe Kot pere pa i o ai Kot kalangan.

## 60

- 1 MAING Kot, kom kotin kase kit alar, o kamueit kit pasanger ni omui ongiong, kom kotin pur ong kamait kit ala.
- 2 Kom kotin kamokitadar sap o, o kawelar i, kom kotin kamauala wasa ola kan, pwe a kin mokimokid.
- 3 Pwe kom kotiki onger sapwilim omui kan katoutou parail. Kom kotiki ong kit er wain men kapweipwei kit alar.
- 4 A kilel eu, me kom kotiki ong irail er, me masak komui, i me irail kauadar, ap kelail kidar. Sela.
- 5 Pwe kompoke pamui kan en saladokala; kom kotin sauasa ki pali maun ar o kotin ereki kit.
- 6 Kot kotin masanier nan sapwilim a mol sarau, i me i peren kida; i pan nek pasang Sikem o sosong sap Sukot.
- 7 Kilead o Manase iei sap we; ngai kin kaunda Epraim; a Iuda iei ai sokon;
- 8 Moap iei ai dal en dudu; i kin tiakedi Edom; Pilista kin ngisingis ong ia.
- 9 Is me pan kalua ia nan kanim tengeteng eu? Is me pan iang ia lel Edom?
- 10 Kaidin komui ai Kot? Komui me kase kit alar o sota iang at karis akan.
- 11 Kom kotin sauasa kit ni at apwal akan, pwe en aramas ar sauase sota katepa.

- 12 Iangaki at Kot kit pan kapwaiada dodok apwal akan. A pan kotin tiakedi at imwintiti kan.

## 61

- 1 MAING Kot, kom kotin ereki ai likelikwir o kotin mangi ai kapapak!
- 2 Sang ni imwin sappa i pan likwir wong komui, ma mongiong i masakada, kom pan kotin kalua ia pon paip ileile eu.
- 3 Pwe komui kapore pa i o imateng kelail ong ai imwintiti kan.
- 4 Kom kotin mueid ong ia, i en mimieta nan sapwilim tanpas omui kokolata, o diar wasan kamaur pan lim omui kan. Sela.
- 5 Pwe komui Kot mangi duen ai inau; kom kin kotiki ong ia er soso en ir, me masak mar omui.
- 6 Komui en kotiki ong nanmarki maur warai, pwe a saunpar akan en totola kokolata,
- 7 Pwe a en mimieta mon Kot kokolata; kom kotin kasale ong i kalangan o melel, me pan sinsila i.
- 8 I ap pan kauli ong mar omui kokolata, pwe i en kapwaiada ai inau kan ni ran karos.

## 62

- 1 NGEN i moleileilar ren Kot, me kotin sauasa ia.
- 2 Pwe i eta ai paip, o sauas pa i, o pere pa i, pwe i en sota luetala kokolata.
- 3 Arai da komail kin masamasan ol ta men, pwen kamela, me rasong did pangpangla o kel me pual pasanger?
- 4 Re kin madamadaua duen ar pan kak kapupedi i, re kadek likam, re kin lokaia kaselel, a nan mongiong arail re kin lalaue. Sela.
- 5 Ngen i, kaporoporeki Kot, pwe i kapore pa i.
- 6 I eta ai paip o sauas pa i, o pere pa i, pwe i ender pupedi.
- 7 Ai maur mi ren Kot, o ai lingan, o ai paip, o ai kel; i kaporoporeki Kot.
- 8 Komail aramas akan karos kaporoporeki i ansau karos; kasansale ong i mongiong omail, Kot kapore patail. Sela.
- 9 A aramas akan sota meakot, o me lapalap akan pil kin sapungala. Ni men tenok re kin kokoda, menda ma irail me toto.
- 10 Komail der keleki omail dipisou sapung o der kaporoporeki me komail kuliadar. Ma komail pan kapwapwala, komail der kasampwaleki!
- 11 Kot kotikidar masan eu, me i ronger akai ansau, iet: Kot eta me manaman.

12 Komui Maing me kalangan o komui kin pwain ong amen amen duen a wiawia kan.

### 63

- 1 Kot komui ai Kot, nin soran i kin piridang komui. Ngen i kin inong iong komui. Pali war ai kin inong iong komui nan sap madekong o mongedi, wasa me sota pil mi ia.
- 2 I wasa i kin tamanda komui nan sapwilim omui tanpas im sarau, pwe i men kilang omui manaman o lingan.
- 3 Pwe omui kalangan mau sang maur; kil en au ai kin kapinga komui.
- 4 I wasa i inong iong kapinga komui arain ai maur, o men pokada pa i kat ni mar omui.
- 5 I me pan kaperen pan ngen i o ai popol, ma i pan kak kapinga komui ki au ai kaperen.
- 6 Ni ai kin wendi pon los, i kin madamadaua duen komui, o ni ai pirida, i kin lokelokaia duen komui.
- 7 Pwe komui sauas pa i, o pan mot en lim omui kan i kin ngisingis.
- 8 Ngen i kin tengidi ong komui; lim omui pali maun kin apapwali ia.
- 9 A irail me masamasan ia, pwen saik ia di, pan lokidokila pan sappa.
- 10 Re pan pupedi ong nan kodlas, o kidi en wel pan kang ir ala;
- 11 A nanmarki pan peren kida Kot. Me kin kaula ong i, pan pwaida, pwe au en me likam akan pan pena pinla.

### 64

- 1 MAING Kot, kotin ereki ngil ai ni ai insensued. Kom kotin sinsila maur i mon ai imwintiti weit.
- 2 Kom kotin karuki ia la sang mon pokon en me sued akan, mon pwin en me wia sapung kan.
- 3 Me kin ada lo 'rail dueta kodlas pot, o me kaonopada ar kasik katieu, iei ar lokaia sued,
- 4 Pwen rir kasikiedi me lelapok o; madang re pan kasikiedi i, o sota insenoki.
- 5 Irail me weit ni ar tiak sued, o re kin inda, duen ar pan insar, o re kin inda: Is me pan kak kilang?
- 6 Irail kin madamadaua duen me sued. Kitail kapwaiada, karos kileledier. Mongiong en aramas me widing o meid koiok ni morsued.
- 7 A Kot pan kotin kasik ir edi madang, pwen kamadak ong ir.
- 8 Pein lo arail pan kapup ir edi, o karos, me pan kilang, pan kaurureki.
- 9 O aramas karos pan masak o inda: Mepukat Kot kotin wiadar. O re pan asa, me i sapwilim a dodok.

10 Me pung o pan perenki Ieowa, o pan liki i, o me lelapok kan karos pan pereperen.

### 65

- 1 MAING Kot, se kin auiaui o kapinga komui nan Sion, o se kin kapwaiada at inau ong komui.
- 2 Komui kotin ereki at kapakap, pwe i me aramas karos pan pwara wong komui.
- 3 Dip at kin katoutoui kit kaualap. Kom kotin maki ong kit dip at akan.
- 4 Meid pai, me kom kotin pilada o mueid ong, en pwarala re omui, pwen kauson nan sapwilim omui kel; kit pan tungetungole o medikila dipisou en tanpas omui, sapwilim omui im en kaudok sarau.
- 5 Kom kotin mangi kit duen omui pung kapuriamui, Kot, at saunkamaur, komui me kapore pan meakros nin sappa, o me mi wasa doo ni kailan madau;
- 6 Me kotin pasonedier nana kan, pwen tengeteng ni a kelail, i me audeki manaman.
- 7 Komui katukiedi ngirsok en madau, ngirsok en a iluk kan, o morongarong en aramas akan.
- 8 Me kauson ni imwin sappa, kin masakada omui kilel akan; komui kin kaperenda me kauson ni pali mas o ni pali apong.
- 9 Kom kin kotin kupura sappa o kawusokesok o kakepwapwala i melel. Parer en Kot me dir en pil kaualap. Kom kin kotin sauasa ar wantuka kan, iduen omui kotin kapaiaada sap o.
- 10 Kom kin kotin kapileda ar sap akan o kawusokesok ar mad akan o kamuterok kila katau o kapaiaada ar tuka kan.
- 11 Kom kotin kapwada kidar saunpar omui kalangan; o lip en aluwilu ar me dir en kamau kan.
- 12 Mos en nan sap tan pil pwaida mau, o dol akan kin pereperen.
- 13 O mal akan me dir en pwin sip, o sap me rokeki korn, me mau ong ngisingis o kakaul.

### 66

- 1 NGISINGIS ong Ieowa nan sap karos!
- 2 Kauleki lingan en mar a; kapikapinga i melel!
- 3 Komail potoan ong Kot: Meid kapuriamui sapwilim omui dodok kan! Sapwilim omui imwintiti kapinga komui pweki omui manaman.
- 4 Sap karos en kaudok ong komui o kapinga komui o kauleki ong mar omui. Sela.

- <sup>5</sup> Komaail kodo, kilang dodok en Kot, pwe a wiawia kan me kapuriamui ren aramas akan.
- <sup>6</sup> A kotin kawukila madau ong sap madakong, pwe aramas en kak alu pon pil o, i wasa se peren kidar kaulalap.
- <sup>7</sup> A kotin kakaunda ni a manaman kokolata; silang i kin irerong wei kan. Me kangudi kan sota kak pwaida. Sela.
- <sup>8</sup> Komaail wei kan kapinga atail Kot, o komaail kalaudela ngil omail, pwen lel ong wasa doo.
- <sup>9</sup> Me kotin kolekol ong kitail maur atail, o sota mueid ong, na atail en krisedi.
- <sup>10</sup> Pwe komui Kot me kotin kasongesong kit o kamakelekel kit er, dueta silper kin kamakelekelada.
- <sup>11</sup> Kom kotin mueid ong, sen lodi ni insar o, kom katoutou kin kit men katoutou eu.
- <sup>12</sup> Kom kotin mueid ong aramas kai, en tiakedi pon mong at; kit lel ong kisiniaia o pil; a kom kotin kapiti sang kit o kakele kit adar.
- <sup>13</sup> I me i pan pedekilong ong nan tanpas omui, pwen mairong isis, o i pan kapwaiada ai inau ong komui,
- <sup>14</sup> Duen kil en au ai inaukidar, o duen au ai inda ni ai ansau apwal:
- <sup>15</sup> I pan mairong isis ong komui sip wi kan iangaki adiniaia en sip ol, i pan mairongki kau iangaki sip o kut ol akan. Sela.
- <sup>16</sup> Komaail karos, me masak Kot, kodo re i, i pan kasoi ong komaail, duen me a kotin wiaia ong ngen i.
- <sup>17</sup> I likwirki ong i au ai o i kapingaki i lo i.
- <sup>18</sup> Ma i pan lamelame nan mongiong i, me i pan wiada me sued, Ieowa ap sota pan mangi ia;
- <sup>19</sup> A Kot kotin ereki ai kapakap, o a kotin mangier ai ngidingid.
- <sup>20</sup> Kapinga ong Kot, me sota kotin mamaleki ai kapakap, o a sota kotiki wei sang ia a kalangan.

## 67

- <sup>1</sup> KOT en kotin maki ong kit, o kotin kapaia kin kit. A kotin kamaraine kin kit, silang i. Sela.
- <sup>2</sup> Pwe sapwilim a al akan me sansaleda nin sappa o ren men liki kan a maur.
- <sup>3</sup> Maing Kot, wei kan pan kapinga komui, wei kan karos pan kapinga komui.
- <sup>4</sup> Wei kan pan peren kida o ngisingis, pwe kom kin kotin kapung ong wei kan ni tiak pung, o kom kotin kaunda aramas akan nin sappa. Sela.
- <sup>5</sup> Maing Kot, wei kan pan kapinga komui, wei kan karos pan kapinga komui.

- <sup>6</sup> Sap o kin kapwaiada a tuka kan. Kot pan kotin kapai kit ada, at Kot.
- <sup>7</sup> Kot pan kotin kapai kit ada, o toun sappa karos pan masak i!

## 68

- <sup>1</sup> KOT en kotida, pwe a imwintiti en kamueit pasang, o me kailongki i, en tang wei.
- <sup>2</sup> Kom kotin paki irail wei dueta adiniaia, dueta kris kin pei pasang nan kisiniaia, iduen me doo sang Kot akan en sore di.
- <sup>3</sup> A me pung kan en pereperen o popol mon silang en Kot o ren pereperen melel.
- <sup>4</sup> Kauli ong Kot, kauli ong mar a! Kaonopada al o ong i, me kotiwei nan sap tan, a maraneki Ieowa — komaail perenki i!
- <sup>5</sup> Pwe i Sam en me sapoupou kan o saunkapung en li odi kan. I Kot nan sapwilim a tanpas sarau i.
- <sup>6</sup> Kot me kotin kadire kila seri ko im en me kin kelep, me kin lapwada me salidi kan, pwen pwaida o pereperen a me katiwo kan pan mimieta nan wasan lek.
- <sup>7</sup> Maing Kot, ni ansau kom kotiwei mon sapwilim omui aramas akan, ni omui kotiwei nan sap tan! Sela.
- <sup>8</sup> I ansau sap o rerer, o audepan lang kan moredier mon silang en Kot, nana Sinai mon silang en Kot en Israel.
- <sup>9</sup> Maing Kot, kom kotin kamoredier katau mau, o kom kotin kamauradar sapwilim omui soso, me mongedier,
- <sup>10</sup> Pwe sapwilim omui pwin diar wasa, me a kak kotikot ia. Maing Kot, kom kotin apwalilar me luet akan duen omui kalangan.
- <sup>11</sup> Ieowa kotikidier a masan ki pwin en wanporon kalaimun akan.
- <sup>12</sup> Nanmarki en karis toto tang wei madang, o waun im akan nek pasanger, me re atia sang ar imwintiti kan.
- <sup>13</sup> Ni omail kairu nan pung en noumail pwin man akan, komaail rasong pa en muroi men, me lingan dueta silper o pa a kan dueta kold lingan.
- <sup>14</sup> Ma me Manaman o lao kotin kamueit pasang nanmarki kan, nana Salmon rotorot ap pan marainla.
- <sup>15</sup> Nana Pasan iei nana en Kot; Pasan nana kalaimun eu.
- <sup>16</sup> Menda komaail nana kalaimun akan kin kilekilang ap peirin ong nana, me Kot kotin piladar en kotikot ia? O Ieowa pan kotikot wasa o kokolata.
- <sup>17</sup> War en Kot me kid toto pan pak kid; Ieowa kotikot re 'rail ni nana Sinai.
- <sup>18</sup> Komui kotidalang poa o saliedier me salidi kan, o kom kotin ale ong aramas pai kan, pil ong ir me katiwo kan, pwe Ieowa en kotikot wasa o.

- 19 Kapinga Ieowa nin ran akan karos; Kot kin kotiki ong kitail katoutou patail, ap pil kotin sauasa kitail. Sela.
- 20 Atail Kot iei sauas patail, o Ieowa Kaun kin kotin dorela sang mela.
- 21 Melel, Kot pan kotin kawela mongan a imwintiti kan, o a pan kotin Leser pasang takain mongan ir, me dadaurata ar katiwo.
- 22 Ieowa kotin masanier: I pan kapure dong ir sang nan Pasan, I pan wa ir do sang nan kapin madau;
- 23 Pwe koe en tiakedi ong nan ntan imwintiti kan, o noum kidi kan en tamotamo.
- 24 Maing Kot, a sansal duen omui kotikot sili, duen omui kotikot sili nan mol omui sarau, ai Kot o ai Nanmarki.
- 25 Pwin en kaul kin tiang, ap pwin en saunkasang nan pung en peinakap akan, me wiadar aip.
- 26 Kapinga Kot Ieowa nan momodisou kan, komail me kisan parer en Israel.
- 27 Peniamin tititik kin kakaun nan pung ar, saupeidi en Iuda iangaki sapwilim ar akan toto, saupeidi en Sepulon, o saupeidi en Naptali.
- 28 Omail Kot kotin kauadar omail wei; Maing Kot, i me komui en kotin katengetengedi, pwe sapwilim omui dodok.
- 29 Nanmarki kan pan wa dong uk ar kisakis pweki omail im en kaudok nan Ierusalem.
- 30 Kom kotin lipor ong man en nan rau, o pwin kau ol iangaki na kan, o wei kan, me kin pepeki pweki kisin moni. Kotin kamueit pasang wek kan, me kin men mauin.
- 31 Saupedi en Akipten pan pwarado; men Moren pan pokadang Kot pa 'rail.
- 32 Komail wei kan nin sappa kauli ong Kot, kakaul o kapinga Ieowa. Sela.
- 33 I, me kin kotikot sili nanlang, nanlang en masia! Kilang, a kin kotiki ong sapwilim a nansapwe manaman.
- 34 Komail kamelele mana en Kot! A ligan mi ren Israel, o a mana mi nan tapok kan.
- 35 Kot meid kapuriamui nan mole sarau. I Kot en Israel. A pan kotiki ong aramas akan mana o kelail. Kapinga Kot!
- 3 I panga kila ai sangesang, kapin wor ai kirkilar, mas ai suedalar, pwe a warailar ai auiaui Kot.
- 4 Me kin tata kin ia nin sokarepa me toto sang pit en mong ai. Me imwintiti ong ia, o me kin kawe ia la, ap sota karepa, kin kelail. I en pwain, me i sota kulia sang.
- 5 Maing Kot, kom kotin mangi ai pweipwei, o ai sapung kan me sota rir sang komui.
- 6 Kom der mueid ong irail, me auiaui komui, en sarodi pweki ngai, Maing Ieowa Sepaot; kom der mueid ong irail, me rapaki komui, en namenokala pweki ngai, Kot en Israel.
- 7 Pwe i kin kankaururla pweki komui, mas ai me dir en namenok.
- 8 I wialar men wai amen ren ri ai kan, o nain in ai sasa ia lar.
- 9 Pwe limpok ong tanpas omui kasor ia dier, o lalau en ir, me kin lalau komui id ko dong ia.
- 10 I kin sangesang melel o kaisesol, ari so, re kin lalau ia.
- 11 I likau kidar ed eu, a re kin lalau ia.
- 12 O me mondi pan wanim, kin kasekasenda ia, o wasan kang sakau, re kin kakaul kin ia.
- 13 A i kin kapakap ong komui Maing Ieowa ni ansau me kon ong; Maing Kot, kom kotin mangi ia pweki omui kalangan lapalap o kotin sauasa ia.
- 14 Kotin dore ia la sang nan pwel, pwe i ender kirila; pwe i en piti sang, me kailong kin ia o sang nan pil lol;
- 15 Pwe lapake ender kamop ia la, o wasa lol ender kadala ia la, o au en por o ender pur pena ong po i.
- 16 Mangi ia, Maing Ieowa, pwe omui kalangan meid mau, kom kotin masan dong ia, pweki omui kalangan lapalap.
- 17 O kom der karirela sang sapwilim omui ladu silang omui, pwe i masak; kom kotin madang mangi ia!
- 18 Kom kotido ren ngen i o dorela i, kotin dore ia la pweki ai imwintiti kan.
- 19 Komui mangier duen ai sarodier, o ai lisela, o ai namenok, me palian ia, kin sansal ong komui.
- 20 Ai sarodier kin kawela nan mongiong i, o i luetalar melel. I auiaui, ma sota me pan insensuedeki mepukat, a sota man amen; o ma sota, me pan kamait ia la, a sota me i kak diar.
- 21 Irail kin kamanga kin ia ede, o kanim pil kin ia pinika ni ai men nim piladar kaulap:
- 22 Arail tepel en wiala insar arail, o lidip arail, o kapup arail.

### 69

- 1 MAING Kot, kotin sauasa ia, pwe pil itida lel ong maur i.
- 2 I pan kirila nan wasa lurusur lol, wasa me sota kakaluak; i mi nan pil lol, o ad pan kamop ia la.

- 23 Mas arail en rotorotala, pwe ren der kilang wasa, o irail en kos pena kokolata.
- 24 Wudokidi ong po 'rail omui ongiong, o omui ongiong melel en lel ong irail.
- 25 Deu 'rail en liselipingda, o sota me pan kauson nan im arail.
- 26 Pwe re kin pakipaki, me kom kotin kaloker, o re kin indinda, me dene komui kin kaloke mal sapwilim omui kan.
- 27 Kom kotin kaloedi ong ir ni sapung toto, pwe ren der konodi omui pung.
- 28 Iris sang ir nan puk en kamaur, pwe ren der iang me pung kan kileledi.
- 29 A ngai me luet, o i kin waiwairok. Maing Kot, omui sauasa ia en sinsila ia.
- 30 I pan kapinga mar en Kot ki kaul pot, o i pan wauneki i melel ki danke.
- 31 I me Ieowa kotin kupura sang kau ol, me ose o pat en nã pualapual mia.
- 32 Me luet akan kin kilang, o peren kida, o me kin rapaki Kot, mongiong arail pan maurada.
- 33 Pwe Ieowa kotin mangi me samama kan, o a sota kotin mamaleki sapwilim a salidi kan.
- 34 Nanlang en kapinga i, pil sappa, o madau, o karos me kin mokimokid lole.
- 35 Pwe Kot pan kotin sauasa Sion, o a pan kauada kanim en Iuda kan, pwe aramas en kauson wasa o, o aneki.
- 36 O wan a ladu kan pan sosoki irail, o me kin pok ong mar a, pan kauson wasa o.

## 70

- 1 MAING Kot kom kotin madangdo, dore ia la, Maing Ieowa, pwen sauasa ia!
- 2 Me kin masamasan ia, en namenokala o sarodi, o me kin peren kida ai apwal akan, en ponseker wei o lesila.
- 3 Pwe irail me kin indinda due ai: Io ol o! Ren namenokala.
- 4 A me kin idok komui, en pereperen o popolki komui, o me kin pok ong omui maur, en indinda ansau karos: Kot meid kapingan!
- 5 A ngai me luet o samama. Maing Kot, kom kotin madang dong ia, pwe komui ta sauas pa i o ai saundur; Maing Ieowa, kom der kotin pwand!

## 71

- 1 MAING Ieowa, i liki komui, kom der mueid ong, i en sarodi kokolata.
- 2 Kom kotin dore ia la pweki omui pung, o kotin sauasa ia, o kotin kapaikae dong ia karong omui kan o sauasa ia.
- 3 Komui en kotin wiala ai paipalap, wasa i pan kak pitila ia ansau karos, pwe kom kotin inauki ong ia er, me kom

pan dore ia la, pwe komui ai paip o ai kel.

- 4 Ai Kot, sauasa ia sang nan pa en me doo sang Kot, o sang nan pa en me sapung o weit.
- 5 Pwe komui kapore pa i, Maing Ieowa, komui ai kel sang ni ai pulepul.
- 6 I liki komui sang ni ai ipwidier, o komui me kaipwi ia sang nan kaped en in ai, i pan kapinga komui kokolata.
- 7 Ngai dueta meakot me kapuriamui ong me toto; a komui kel pa i manaman.
- 8 Kom kotin kadireki au ai kaping o danke ong komui.
- 9 Kom der kotin kase ia la ni ai mala, o der muei sang ia ni ai pan luetala.
- 10 Pwe ai imwintiti kin palian ia ni ar lokaia, o me kin masamasan ia, kin kapakapung pena,
- 11 O indinda: Kot muei sanger i, komail paki o koleledi i, pwe sota sauas pa a.
- 12 Maing Kot, kom der kotin doo wei sang ia, Maing Kot! Kom kotin madangdo o sauasa ia.
- 13 A me palian ia en namenokala o sarodi; o me rapa kin ia, pwen kame ia la, ren kadupale kidi namenok o lalaue.
- 14 A i pan auiauita, o i pan kadulada ai kaping ong komui kokolata.
- 15 Au ai en kaloki sili omui pung, o omui kamau pan ran karos, me sota kak wadawad pena.
- 16 I kin weweid sili ni mana en Ieowa Kaun; i pan kapinga omui pung eta.
- 17 Maing Kot, kom kotin padaki ong ia er sang ni ai pulepul, o i kaloki sili omui manaman akan sang mas kokodo lel met.
- 18 Maing Kot, kom der kotin muei sang ia ni ai mala, pit en mong ai lao puetepuetala, lao i pan padaki ong seri en seri kan omui wiawia o ong me pan kokodo omui manaman.
- 19 Maing Kot, omui pung meid ileile, kom kin wiada dodok lalalap. Maing Kot, is me rasong komui?
- 20 Pwe komui kotiki ong kit er kamasak laud o toto, o kom kotin pur ong kamau kit ada o wai ia dado sang nan wasa lol.
- 21 Komui pan kotin kaileile ia da, o kom pan kotin pur ong kamait ia la.
- 22 I ap pan kapingaki komui kasang, pweki omui melel, ai Kot, i pan kauleki ong komui arp, ong komui, me Sarau en Israel.
- 23 Kil in au ai o ngen i, me re kotin dorelar, pan pereperen o kauli ong komui.
- 24 Pil lo i pan indinda duen omui pung sang mansang lel sautik. Pwe irail, me men kawe ia la, namenokala o sarodier.

**72**

- <sup>1</sup> MAING Kot, kom kotiki ong nanmarki en kapung, o kotiki ong nain nanmarki ol omui pung.
- <sup>2</sup> Pwen kaunda sapwilim omui aramas akan nin tiak pung, o dorela sapwilim omui me luet akan.
- <sup>3</sup> Nana kan en kare dong aramas akan popol o dol akan me pung.
- <sup>4</sup> A pan sauasa pung en me luet ren aramas akan; a pan dorela nain me samama kan, o pan tiakedi me morsued o.
- <sup>5</sup> Aramas pan masak komui sang eu kainok lel eu kainok, arain katipin o saunipong mia.
- <sup>6</sup> A pan kotidi dueta katau ong mat kap, dueta katau me kawusokesok sap o.
- <sup>7</sup> Me pung o pan memaurata ni a ran akan, o muei mau pan pwaida, lao saunipong solar mia.
- <sup>8</sup> A pan kotin kaunda sang eu madau lel wong eu, o sang pilap o lel ni imwin sappa.
- <sup>9</sup> Me kaukauson nan sap tan, pan dairukedi ong mo a, o a imwintiti kan pan kangala pwel par.
- <sup>10</sup> Nanmarki en Tarsis o me mi nan dake kan, pan wa dong i ar kisakis; nanmarki en Arapia o Sepa pan wia nopwei.
- <sup>11</sup> Nanmarki kan karos pan kaudoki ong i, men liki kan karos pan upa ong i.
- <sup>12</sup> Pwe a pan dorela me samama o, me kin weriwer, o me luet, me sota sauas pa.
- <sup>13</sup> A pan kupura me tikitik o samama, o pan kotin sauasa ngen en me samama kan.
- <sup>14</sup> A pan kotin dorela ngen arail sang ren me morsued o weit, o nt' arail me kasampwal mon silang i.
- <sup>15</sup> A pan ieiasata o kold sang wein Arapia pan wisik wong i, o aramas akan pan kapakapaki i ansau karos, a pan kapaida ni ansau karos.
- <sup>16</sup> Wantuka kan pan pwaida mau nin sappa o pon nana kan, korn pan momand dueta Lipanon; o aramas akan pan wosada nan kanim akan dueta ra nan sap o.
- <sup>17</sup> Mar a pan duedueta kokolata; arain katipin a pan mimieta, iduen warai en mar a, o re pan kapaikida i; men liki kan karos pan kapinga i.
- <sup>18</sup> Kaping ong Kot Ieowa, Kot en Israel, i eta, me kin wiada manaman akan.
- <sup>19</sup> O kaping ong mar a lingan kokolata, o sap karos en direka a wau! Amen, amen!
- <sup>20</sup> Iet imwilan kapakap en Dawid nain Isai.
- <sup>2</sup> A ngai, ekis ta, a na i kat pan lodi, o i koren iong krisedi ni ai kakakawei.
- <sup>3</sup> Pwe i suedeki me aklapalap akan, ni ai kilanger en me sapung kan ar pwaidar.
- <sup>4</sup> Pwe sota apwal kot lel ong irail ni ar pan mela, re kin kelail o war arail wilar melel.
- <sup>5</sup> Sota ar apwal kot dueta aramas tei kan, o re sota pan kalokokol dueta aramas tei kan.
- <sup>6</sup> Ari aklapalap, iei kapwat en tapin wor arail, o arail likau, iei arail tiak weit.
- <sup>7</sup> Por en mas arail tikitik o sued kilar ar wilar, o re kin wiada, me re inong iong.
- <sup>8</sup> Re kin mamaleki meakaros, o re kin lokelokaia me sued, o re kin lalaue o lokaia ni ar aklapalap.
- <sup>9</sup> Dene arail lokaia tapi sang nanlang, o me irail indinda, dene i eta me pung nin sappa.
- <sup>10</sup> I me aramas akan lokidi ong irail; o pil totoia re kin nimala.
- <sup>11</sup> Re kin inda: Iaduen, Kot pan kotin insenoki irail? O menda ren me lapalap irail?
- <sup>12</sup> Kilang, iduen me doo sang Kot akan; irail meid pai nin sappa, o re pan kapwapwala.
- <sup>13</sup> Iaduen, likamata sota katempa ai kamakekkeladar mongiong i o kaminela pa i kat ni me pung?
- <sup>14</sup> Pwe ran karos i pan kalokokol, o ni mansang karos ai kamekam mia.
- <sup>15</sup> Koren iong i pil pan indinda dueta irail, a so, pwe i de pan suedeki sapwilim omui seri kan karos sang mas kokodo lel met.
- <sup>16</sup> I ap madamadaua duen mepukat, pwen dedeki, a i sota kak ong.
- <sup>17</sup> Ngai lao pedeleng ong mon mol en Kot sarau o kilanger imwin me doo sang Kot akan.
- <sup>18</sup> Melel kom kotin pwili kin irail edi wasa likakeris; kom kotin kapup irail edi ong nani pwel.
- <sup>19</sup> Iaduen arail madang soredier. Irail lokidokila, o imwila 'rail meid kamasapwek.
- <sup>20</sup> Maing Ieowa, kom kin kotin kawela mom arail nan kanim o dueta auramen.
- <sup>21</sup> Ni ai madak nan mongiong i, o waiwairok nan ai mudilik kan,
- <sup>22</sup> I ap diadarar, me ngai ol pweipwei men, me sota asa meakot; dueta man amen mo omui.
- <sup>23</sup> Ari so, i pan mimieta re omui kokolata, pwe komui kotin kolekol eta pa i pali maun.
- <sup>24</sup> Komui kin kalua ia duen kupur omui, o kom pan kotin kasamo ia nan lingan omui.

**73**

- <sup>1</sup> MELEL, Kot kompoke pan men Israel, irail me makelekel nan mongiong arail.

- 25 Ma komui ta ai Kot, i sota pan anane meakot nanlang de sappa.  
 26 Ma pali war ai o ngen i pan dupokala, pil menda, pwe komui Maing Kot kamait pa i o pwais ai kokolata.  
 27 Pwe kom kotin mangi irail, me muei sang komui pan lokidokila; Kom pan kotin kasapokela karos, me wuki wei sang komui.  
 28 A iet ai peren, i en tengeteng ong Kot, o i en kaporoporeki Kot Ieowa, pwen kalok sili omui wiawia kan karos.

## 74

- 1 MAING Kot, da me kom kotin kase kin kit ala, o da me re ongiogiki sapwilim omui sip akan?  
 2 Kom kotin kupura sapwilim omui momodisou, me kom kotin pwaindar mas o, o me komui dorelar, pwen wiala sapwilim omui, kotin kupura dol Sion, wasa me kom kotikot ia.  
 3 Kom koti dong wasa me liseliping ansau warai; imwintiti me kawelar meakaros nan im sarau.  
 4 Me palian komui, kin weriwer nan tanpas omui o pwilikidi arail dikedik en ani mal akan lele.  
 5 Irail pwaradar dueta ir, me wia palapal nan wel.  
 6 Re kin kawela did kaselel akan ki sile laud o tikitik.  
 7 Irail karongala tanpas omui; irail kasaminela o tiakedi wasa me mar omui kotikot ia.  
 8 Irail kin inda nan mongiong arail: Na, kitail pan kawela! Irail karongalar wasan kaudok karos nan sap o.  
 9 Solar manaman akai sansal ong kitail, o solar saukop amen mia, o sota amen re atail me pan asa imwilan mepukat.  
 10 O Maing Kot, arai da me morsued o pan lalaue, o imwintiti o pan mamaleki mar omui?  
 11 Da me komui kotiki wei sang lim omui? Kotikida pali maun omui o kaimwisokala.  
 12 Pwe Kot ai Nanmarki sang mas o. I me sauas pan meakaros, me kin wiaui nin sappa.  
 13 Kom kotin kamueit pasanger madau ki omui manaman, o kom kotin kawelar mongan drake nan pil.  
 14 Kom kotin kawelar mongan walros, ap kotiki ong aramas nan sap tan, pwen kangala.  
 15 Komui kotin kapwardar parer o pilap akan, o pilap kalaimun akan me kom kotin kangalagaladi.  
 16 Ran o pong me sapwilim omui; komui kotin wiadar saunipong o katipin.

- 17 Komui wiadar irair en sap akan; komui me kin wia ansau karakar o kapou.  
 18 Kom kotin kupura mepukat: Imwintiti o lalaue komui Maing, o aramas pweipwei kan mamaleki mar omui.  
 19 Kom der kotiki ong man laualo ngen en sapwilim omui muroi, o kom der likidmaliela pwin en sapwilim omui luet akan.  
 20 Kom kotin tamanda inau o, pwe sap olar wasa karos o im akan pual pasanger.  
 21 Re der kotin mueid ong me luet o, en namenok purela, me samama o luet akan en kapinga mar omui.  
 22 Maing Kot, kom kotida o kotin kaimwisokala sapwilim omui dodok; kom kotin tamanda kankaurur, me kin wiaui ong komui sang ren me pweipwei kan.  
 23 Kom kotin der maliela weriwer en sapwilim omui imwintiti, morongorong en me palian komui kan, me kin lalaudalar ansau karos.

## 75

- 1 Se kapinga komui, Maing Kot, se kapinga komui, pwe mar omui me koren, o omui manaman akan kaloki sili due.  
 2 Pwe ni a ansau I pan wiada kapung pung.  
 3 Sap o tou a kan kin rerer; a I kin kolekol a ur akan. Sela.  
 4 I indang me aklapalap akan: Komail der aklapalap! O ong me doo sang Kot akan: Komail der keleki omail manaman!  
 5 Komail der kailleilada mong omail, komail der lokaia sued ni omail aklapalap.  
 6 Pwe sota sauaspa sang ni mas en lang de kapin lang, de sang nana en sap tan.  
 7 Pwe Kot, me kin kadeikada, o me kin kasapwilidi amen, o kasapwilada amen.  
 8 Pwe dal eu mi nan lim en Ieowa, me dir en wain kelail, me a kotin kodidodie; a me doo sang Kot akan karos nan sappa pan nim sang, o re pan nimala moroke.  
 9 A i pan padapadak kokolata, o kauli ong Kot en Iakop.  
 10 I pan kawela mana en me doo sang Kot akan karos, a mana en me pung kan pan kakairida.

## 76

- 1 KOT me indand mau ren Iuda, o mar a me lingan ren men Israel.  
 2 Tanpas a im pwal mi nan Salem, o tanpas a mi Sion.  
 3 I wasa a kotin katip pasang ia kanangan kasik katieu, o pere, o kodlas, o tatan mauin. Sela.  
 4 Komui me lingan o manaman sang dol en mauin kan.

- 5 Me akpalapal akan lodier ong men kul akan o mela, o saunpei komad karos en kidi pa arail.
- 6 Maing Kot en Iakop os o war kin pupekidi omui masan akan.
- 7 Komui meid kamasapwek. Is me kak u mo 'mui ni omui ongiong?
- 8 Ni omui kotin kasaledar omui kadeik sang nanlang, sappa ap masapwekadar o nenenlar;
- 9 Ni en Kot a kotidar, pwen kadeik, o sauasa me luet akan karos nin sappa. Sela.
- 10 Pwe makar en aramas kin kalinganada komui, o ma re pan pur ong moromorong, luan omui ongiong pan itar ong irail.
- 11 Komail inau ong Ieowa omail Kot o kapwaiada. Komail karos, me mi impa, wa dong ren me kalom omail kisakis akan.
- 12 I me pan atia sang saupeidi kan ar komad, a meid kalom ong nanmarki en sappa kan.

## 77

- 1 I KIN likwirki ngil ai ong Kot, ong Kot, me i pan likwir ong, o i me kotin mangi ia.
- 2 Ni ai ansau apwal, i kin rapaki Ieowa; ni pong pa i kin u wei o sota kin dukedi, pwe ngen i sota kak insenemaula.
- 3 Ni ai tamanda Kot, i kin asengokida, ni ai madamadaua, ngen i kin luetala. Sela.
- 4 Kom kin kotin kolekol por en mas ai, pwe ira en papat; ngai inen en luet, solar itar ong lokaia.
- 5 I kin lamelame duen ran en mas akan, duen par akan me samalar.
- 6 Ni pong i kin lamelame duen ai kasang arp, o mongiong i kin madamadaua; ngen i kin raparapaki.
- 7 Kalelapok, Ieowa pan kotin ongiong kokolata, o a sota pan kotin maki ong?
- 8 A kalangan roselar melel, o a inau imwisokalar kokolata?
- 9 Kot kotin malielar a mak ong kit, o a karirikilar ongiong a kalangan? Sela.
- 10 Ari so, i indadar: Mepukat me mau ong ia; pali maun en lim en me Lalapal pan kak dorela mekaros.
- 11 I me i kin taman kida wiawian Ieowa; melel i kin tamanda omui manaman akan sang mas o,
- 12 O madamadaua duen omui wiawia kan karos, o kilekilang duen omui dodok.
- 13 Maing Kot, al omui me pung. Ia wasa amen Kot manaman mia dueta Kaun o?
- 14 Komui ta Kot me kin wia manaman akan. Komui kotin kasansaledar omui manaman nan pung en wei kan.

- 15 Komui kotin dore kila sapwilim omui kan omui manaman, iei seri en Iakop o Iosep akan. Sela.
- 16 Pil akan ariri komui, Maing Kot, pil akan ariri komui, rap masapwekadar, o wasa lol rererdar.
- 17 Tapok kalaimun akan kamoredier pil, tapok kan wiadar nansapwe, o liol piri-piri sili.
- 18 Nansapwe wiauiet nanlang; sapwilim omui liol akan kamaraini sappa; sappa mokieda o rerer.
- 19 Al omui mi nan madau, al omui tätik nan pil kalaimun akan, o sota me kaan aluwilu omui.
- 20 Kom kotin kalua sapwilim omui kan dueta pwin eu ren Moses o Aron.

## 78

- 1 KOMAIL nai aramas akan, rong ai kusoned; komail kapaikae dong salong omail padak en au ai!
- 2 I pan ki pasang au ai, pwen padak, o pan kida kasoi en mas o,
- 3 Me kitail rongadar o asaer, o sam atail kasoi ong kitail er,
- 4 Pwe kitail ender karirila sang kadaudok arail, me pan pwarado mur, o kaparokki wau en Ieowa, o a manaman o a dodok kapuriamui kan.
- 5 Pwe a kotin kauada men kataman eu ren Iakop, o kotikida kapung eu ren men Israel, me a kotin kakaliki ong sam atail akan, pwe ren uselang nair seri kan,
- 6 Pwe di en mur en asa due, o seri ko, me pan ipwidi; o ni ar kokoda, ren pil kasoi ong nair seri kan,
- 7 Pwe irail en kaporoporeki Kot, o ren der monokela en Kot a wiawia kan, o ren kapwaiada a kusoned akan,
- 8 O ren der dueta sam arail akan, me kainok kangudi o katiwo eu, me mongiong arail sota tengeteng, o ngen arail sota melel ong Kot;
- 9 Dueta kainok Epraim, me wa tatan mauin, ap purela sang nan pei.
- 10 Irail sota dadaurana inau en Kot, o re sota men weweideki duen a kusoned akan;
- 11 O re monokelar a wiawia kan o a manaman akan, me a kotin kasansale ong irail er.
- 12 A kotin wiadar manaman akai sansal mon sam arail akan nan Akipten, nan sap Soan.
- 13 A kotin palang pasang madau o kotin mueid ong ir, en kotela, o wiadar pil dueta kel takai eu.
- 14 A kotin kalua kin irail tapok ni ran o, a ni pong umpul en kisiniai.



- 15 A kotin palang pasang paip nan sap tan o kanim pile kin irail pil toto.
- 16 O a kotin kapkapwile wei pilap kai sang nan paip, pwe ren pwile wei dueta pilap laud akan.
- 17 Ari so, re dadaurata ni arail dipi ong i, o re kaongiong me Lalapal o nan sap tan.
- 18 O re kasongesong Kot nan mongiong arail, ni ar inong iong kan arail manga.
- 19 O re palian Kot ni ar inda: Melel Kot pan kak wiada tepel eu nan sap tan?
- 20 Kilang, a poki paip o, pwe pil en pwarado o pilap akan pwilepwile wei, a iaduen, a pan kak kida prot o uduk ong na aramas akan?
- 21 Ieowa lao mangier mepukat, ap kotin ongiongadar, o kisiniai wiauier ren lakop, o ongiong lel ong Israel,
- 22 Pweki ar so kamelele Kot, o sota kaporoporeki a sauas.
- 23 A ap kotin masani ong tapok en poa kan, o ritingida wanim en lang akan.
- 24 O kotin kamoredi ong ir manga, pwe ren manga, o a kotiki ong ir prot en lang.
- 25 Irail kangalar prot en tounlang kan; a kotin kadar ong ir kisin manga toto.
- 26 A kotin kapwaredar pan lang ang en mas en lang, o ni a manaman a kotin kamokidada ang en pali air.
- 27 O a kotin kamoredi ong ir uduk dueta pwel par, o manpir dueta pik en oror.
- 28 O a kotin kapup irail di wasa karos, me irail kauson ia.
- 29 Rap mangamanga o medilar kaulap, o a kotin mueid ong ir ar inong.
- 30 A ni ar kapwaiadar ar inong, o ni ar mangamanga,
- 31 Ongiong en Kot ap lel ong irail er, o kame-lar ol lalapal re 'rail, o kotin wokiedi manakap en Israel kasampwal akan.
- 32 A re kalaudelar arail dip, o re sota kamelele a manaman akan.
- 33 I me a kotin mueideki ren mela, re sota paida, o ar apwal akan me toto arain ar maur.
- 34 Ni a kotin kame irail la, rap idok i, o wukila, o rapaki Kot.
- 35 O re tamandar, me Kot kele parail o Kot lalapal ar saundur.
- 36 O re lik sansal mau ong i ni au arail o re likam ong i ni lo ar.
- 37 A mongiong arail sota tengeteng ong i, o re sota dadaurata melel a inau.
- 38 Ari so, a kotin kalangan ong ir, o kotin makeki ong ir dip arail, o sota kame irail la, o katukiedi a ongiong pan pak toto, o sota ongiong melel.
- 39 Pwe a kotin kupura, me irail pali uduk, dueta kisinian, me pir wei o solar puredo.
- 40 Pan pak toto re kangudi ong i nan sap tan, o kakupur suedi i nan mal.
- 41 Irail pur ong ansau karos kasongesong Kot, o re akapungi ong me Saraui ren men Israel.
- 42 Re solar tamanda lim a manaman, me dore ir ala sang ar imwintiti kan ni ran o.
- 43 Duen a kotin wiadar a manaman akan nan Akipten o a dodok kapuriamui nan Soan.
- 44 A kotin kawuki ong nta ar pil akan, rap solar kak nima sang ar pilap akan.
- 45 Ni a kotin kapwaredar man sued akan nan pung arail, me kang ir ala, o pros akan, me kawe ir ala.
- 46 A kotiki ong muedi ar tuka kan, o ar wantuka ong man siek.
- 47 A kotin kawekilar akel ar wain o tuka kan ki akel tikitik.
- 48 A kotin kamekila ar man akel akan o ar pwin man akan liol.
- 49 A kotin ongiong melel o porone wong ir tounlang sued kai, o mueid ong ir, ren lingaragar, o morsued, o kain-sensued.
- 50 A kotin kaonopa dang ongiong al apot, o sota dorelar maur arail sang mela, o kotin mueid ong kilitop ni maur arail.
- 51 A kotin kamelar meseni karos nan Akipten, meseni en ar kelail nan im en Am akan.
- 52 A kotin kalua sapwilim a kan dueta pwin sip eu nan sap tan.
- 53 A kotin kalua irail ni pung, pwe ren der masak meakot, a madau kadupaledi ar imwintiti kan.
- 54 A kotin wa ir ala lel ni irair en sap saraui, lel nana wet, me lim a pali maun kileledier.
- 55 O kotin pakipaki men liki kan mo 'rail, o kotin nek ong ir sap arail, pwen sosoki, o a kotiki ong kainok en Israel akan, en kaukauson nan im arail.
- 56 A re songsong? o kaongiong Kot lalapal, o sota peiki ong i, o sota duki ong a masan akan.
- 57 O re muei sang o mamaleki mekaros, dueta sam arail akan, o re sota tengeteng, dueta kasik katieu luet eu.
- 58 O re kaongiong i ni ar kaudok pon dol akan, o re kupur suedeki i ki arail dikedik en ani kan.
- 59 A Kot lao kotin mangi mepukat, ap kotin ongiongada o kasapok ir ala melel.
- 60 A kotin muei sang tanpas a nan Silo, im pwal o, wasa a kotikot ia ren aramas akan.
- 61 A kotiki wei sapwilim akan nan imateng, o a lingan nan pa en imwintiti kan.

- 62 A kotiki wei sapwilim a aramas akan ni kodlas, o kotin ongiongi sapwilim a soso.
- 63 Kisiniai kangala ar manakap akan, o ar peinekap akan solar kak papaud.
- 64 Arail samero kan mekilar kodlas, a solar li odi kan, me kin maiei.
- 65 Ieowa ap kotin opala wasa dueta amen me mairelar, dueta ol komad amen kin ngisingis ni a kang wain.
- 66 A kotin kaloedier a imwintiti kan o kana-menok ir ala kokolata.
- 67 A kotin kaselar im en Iosep, o sota piladar kainok en Epraim.
- 68 Pwe a kotin piladar kainok en Iuda, dol Sion, me a kotin kupura.
- 69 O a kotin kauadar tanpas a im sarau wasa ileile, dueta sappa me pan tengeteng eta kokolata.
- 70 Ap kotin piladar sapwilim a ladu Dawid, o a kotin ale i sang nan deun sip akan.
- 71 A kotin kalua i sang ren sip en kadidi kan, pwen kamanga sapwilim a kainok en Iakop o a soso men Israel.
- 72 O a kotin apapwali ir ni tiak en mongiong melel o pung, o kakaun irail ada ni koioik en lim a kan.

## 79

- 1 MAING Kot, men liki kan tang dong sapwilim omui soso; irail kasaminela sapwilim omui im sarau, o re wiaki Ierusalem kantakai eu.
- 2 Re ki onger manpir en pan lang akan kalep en sapwilim omui ladu kan, o uduk en sapwilim omui sarau kan ong man en nan sap akan.
- 3 Impan Ierusalem irail wudokila nt' ar dueta pil, o sota, me pan sarepedi.
- 4 Kit wialar kanamenok eu ong men imp at, o me kapil kit pena, kin lalau e o kaurur kin kit.
- 5 Maing Ieowa, arai da kom pan kotin ongiong, o inong en kupur omui pan lulada dueta kisiniai?
- 6 Kom kotin wudokidi ong men liki kan, me sasa komui, omui ongiong, o ong wei kan, me sota kin likwir ong mar omui.
- 7 Pwe re kawelar Iakop o im ar akan.
- 8 Kom der kotin tamanda dip en sam at akan; a kom kotin madang sauasa kit, pwe kit me malaulaular.
- 9 Maing Kot, sauas pat, kom kotin sauasa kit, pweki wau en mar omui. Kom kotin dore kit ala o kotin maki ong kit dip at akan, pweki mar omui!
- 10 Da me kom kotin muedid ong men liki kan en inda: Ari, ia arail Kot? Kom kotin kasale ong men liki kan depuk en ntan sapwilim omui ladu kan, me wudokilar, en pil sansal mo at!

- 11 Kotin mangi sangesang en me salidi o; kom kotin kolekol kidi lim omui man-aman me kileledier ong kamela.
- 12 Kom kotin depukki ong men imp at pan pak isu ar lalau e, me re lalau e kin komui.
- 13 A kit, sapwilim omui aramas akan, o sip en sapwilim omui mos, pan danke komui kokolata, kapakaparok duen omui lingan ansau karos.

## 80

- 1 KOMUI sile pan Israel, kotin mangi; komui me kin apapwali Iosep dueta sip akan. Kom kotido, me kaipokedi pon angin Kerup.
- 2 Kom kotin kasaleda omui manaman mon Epraim, o Peniamin, o Manase, o kotido, pwen sauasa kit!
- 3 Maing Kot Sepaot, kom kotin kamait kit ala o kotin kasaleda silang omui, kit ap pan kelail kida.
- 4 Ieowa Kot Sepaot, arai da, kom pan kotin ongiongiki kapakap en sapwilim omui aramas akan?
- 5 Kom kin kotin kamanga kin ir prot en pil en mas, o kom kin kanim pile kin irail pil en mas toto.
- 6 Kom kotin wiai ong kit, me men imp at kin akamaiki ong kit, o imwintiti pat kin lalau e kit.
- 7 Kot Sepaot, kom kotin kamait kit ala o kotin kasaleda silang omui, kit ap pan kelail kida.
- 8 Kom kotin wado sanger Äkipten tuka wain pot, o kom kokosang men liki kan, ap id padukedi i
- 9 Kom kotin kokoi ong i al a o kawosada i, pwen kadirela sap o.
- 10 Nana kan mi pan mot a, o ra kan kadupaledi sedern en Kot.
- 11 Kom kotin kalaudelar i lel ong madau o ra kan lel ni pilap o.
- 12 Da me kom kotin kawe kilar a kel, pwe karos me dau li kin kawela?
- 13 Pwik laualo dekadar, o man en nan sap kawelar.
- 14 Maing Kot Sepaot, kom kotin wukedoke dong kit, o ireredo sang nanlang, o masani, o kotin sauasa tukan wain pot et,
- 15 O kotin apapwali i, me lim omui padukedier, o me kom kotin apapwalier.
- 16 A rong kilar kisiniai, a paledier, re okilar masan en silang omui.
- 17 Lim omui apwali ol en pali maun omui, o irail, me kom kotin apapwalier.
- 18 Kit ap sota pan wuki wei sang komui. Kom kotin kamaur kit da, kit ap pan kapanga mar omui.

<sup>19</sup> Ieowa Kot Sepaot, kom kotin kamait kit ala o kotin kasaleda silang omui, kit ap pan kelail kida.

## 81

<sup>1</sup> KOMAIL pereperen kauli ong Kot, me kel patail; ngisingis ong Kot en Iakop!  
<sup>2</sup> Tapia kida kaul en kaping, o wiada tam-purin, o laute kaselel iangaki arp!  
<sup>3</sup> Ni saunipong kap komail peuk koronete, ni maram, ni ran en im tantuka!  
<sup>4</sup> Pwe iduen tiak en Israel o kusoned en Kot en Iakop eu.  
<sup>5</sup> A kotin wiadar kusoned wet ong Iosep, ni a lipa sang Äkipten. I ronger masan pot, me i saikenta asa:  
<sup>6</sup> I kisanger katoutou kan pon apar a, o pa a saladokalar sang kopu kan.  
<sup>7</sup> Ni om likwirki dong ia om apwal. I ap sauasa uk; I kasaledok uk alar, ni ansau me koe lel ong nansapwe, o I sosong uk ni pil en akamai. Sela.  
<sup>8</sup> Komail nai aramas akan rong ia, I pan padaki ong komail! O Israel, ma koe pan peiki ong ia!  
<sup>9</sup> Sota amen Kot en mi re om, o koe der kaudoki ong kot en men wai amen.  
<sup>10</sup> Ngai Ieowa om Kot, me kalua uk sang nan Äkipten. Ki pasang au om, i pan kadirela.  
<sup>11</sup> A nai aramas akan sota kin peiki ong ngil ai, o Israel sota duki ong ia.  
<sup>12</sup> I ari muedi ong irail er insen arail ni ar aklapalap, pwe ren kekeid wei ni pein arail lamelam.  
<sup>13</sup> O ma nai aramas akan pan peiki ong ia, o Israel pan weweid nan al ai kan,  
<sup>14</sup> I ap pan kaloedi ar imwintiti kan madang, o pa i pan u ong me pali ong irail akan,  
<sup>15</sup> O irail me kailongki Ieowa, sota pan kak ong irail; o ansau arail pakadeik pan duedeuta kokolata;  
<sup>16</sup> O I pan kamanga kin irail korn kaselelia, o I pan katungole kin i onik sang nan paip o.

## 82

<sup>1</sup> KOT kotikot nan momodisou en Kot, o i saunkapung en kaun akan.  
<sup>2</sup> Arai da komail pan kadeik sapung o kasampwaleki me doo sang Kot akan? Sela.  
<sup>3</sup> Sauasa pung en samama o sapoupou kan, o sauasa me luet o samama kan ni ar pung!  
<sup>4</sup> Komail dorela me tikitik o samama o, o kamaioda sang nan pa en me doo sang Kot akan.  
<sup>5</sup> A re sota kin duki ong, o sota ar lokekong; re kin weweid nan rotorot; pason en sappa kan karos mokimokideda.

<sup>6</sup> Ngai indada: Komail rasong kot akan, o nain me lapalap;  
<sup>7</sup> Ari so, komail pan mela dueta aramas akan, o komail pan lokidokila dueta me weit amen.  
<sup>8</sup> Maing Kot, kom kotida o kotin kadeikada sappa, pwe komui pan sosoki men liki kan karos.

## 83

<sup>1</sup> MAING Kot, kom der so masan dong, o der sapaimokid, Maing Kot, kom der kotin nenela!  
<sup>2</sup> Pwe kom kotin mangi, sapwilim omui imwintiti kan kin lingaranga; o me kailong kin komui, me aklapalap.  
<sup>3</sup> Irail kin widing ni ar kapakapung ki sapwilim omui kan, o re kin raparapaki duen ar pan kawela sapwilim omui me nekinekilar akan.  
<sup>4</sup> Re kin inda: Na kitail, kitail kokosang irail, pwe ren solar wei eu, o solar me pan inda duen wein Israel!  
<sup>5</sup> Pwe irail wiaki eu o re inauki pena, ren palian komui,  
<sup>6</sup> Im pwal en Edom, o Ismael, Moap, o Akar,  
<sup>7</sup> O Kepal, o Amon, o Amalek, men Pilista iangaki men Tirus.  
<sup>8</sup> Asor pil waroki ong ir; re kin sauasa kadaudok en Lot. Sela.  
<sup>9</sup> Kom kotin wiai ong ir dueta ong men Midian, o Sisera, o Iapin ni pilap Kison.  
<sup>10</sup> Me kamelar impan Endor, rap wia pwel la nan pwel.  
<sup>11</sup> Kom kotin wiala ar saupeidi kan dueta Orep o Seep, o ar monsap akan karos dueta Sepa o Salmuna,  
<sup>12</sup> Pwe re indinda: Kitail pan kaloedi im en Kot akan!  
<sup>13</sup> Maing Kot kom en kotin wia kin irail la älepip en kisiniani, dueta dip en rä mon kisiniani.  
<sup>14</sup> Duen kisiniai kin karongala tuka en wel o duen umpul en kisiniai kin isikedana nan wel,  
<sup>15</sup> Iduen kom kotin paki kin irail sapwilim omui liol ape, o kamasak kin irail omui melimel.  
<sup>16</sup> Kadire kila mas arail namenok, pwe ren rapaki mar omui, Maing Ieowa.  
<sup>17</sup> Ren namenokala o masapwekada kokolata, o ren soredi o mela.  
<sup>18</sup> Rap pan asaki, me komui ta maraneki Kaun o me komui ta lapalap nan sap karos.

## 84

<sup>1</sup> MEID kaselel tanpas omui kan, Maing Ieowa Sepaot!  
<sup>2</sup> Ngen i kin inong iong o anane pera en tanpas en Ieowa kan; pali war ai o ngen i kin polauleki Kot ieias.

- <sup>3</sup> Pwe manpir diaradar deu a, o swalpe pas a, wasa a kin naitik ia: Sapwilim omui pei sarau kan, Maing Ieowa Sepaot, ai Nanmarki o ai Kot.
- <sup>4</sup> Meid pai ir, me kin kauson nan tanpas omui! Re kin kapinga komui ansau karos. Sela.
- <sup>5</sup> Meid pai karos, me kin keleki komui, o idedauen komui melel!
- <sup>6</sup> Me kin weweid nan sap en mamaiei, wasa re kin weirada parer ia; pil katau kin pwain kidi i pai kan.
- <sup>7</sup> Re kin kakairida ni ar manaman akan, lao re pan sansalada mon Kot nan Sion.
- <sup>8</sup> Maing Ieowa, Kot Sepaot, kom kotin ereki ai kapakap: Maing Kot en Iakop kotin mangi ia! Sela.
- <sup>9</sup> Kot pere pat, kom kotin masan dong kit; kom kotin irerong mas en sapwilim omui keidier men.
- <sup>10</sup> Pwe ran ta ieu mon sapwilim omui pera sarau kan me mau sang ran kid; i mauki mimi pan wanim en tanpas en Kot, sang kauson nan im en me doo sang Kot akan.
- <sup>11</sup> Pwe Kot Ieowa rasong katipin o pere, Ieowa kin kotikida mak o wau, a sota pan kotin mueid ong me lelapok kan, en anane me mau kot.
- <sup>12</sup> Maing Ieowa Sepaot, meid pai aramas amen, me kin liki komui!

## 85

- <sup>1</sup> MAING Ieowa, kom kotin maki onger sapwilim omui sap mas o, o kom kotin dorelar salidi en Iakop akan.
- <sup>2</sup> Re kotin lapwadar me sued en sapwilim omui aramas akan, o kom kotin pwaidier dip arail karos. Sela.
- <sup>3</sup> Komui kotin kadukiedi omui ongiong karos, o kotin wukidoki wei sanger omui ongiong melel.
- <sup>4</sup> Kom kotin purong kamait kit ala, komui Kot at saunkamaur, o kotin katukiedi omui sokalangan ong kit.
- <sup>5</sup> Kom pan kotin ongiong kit kokolata? Omui ongiong pan duedueta sang en kainok lel eu?
- <sup>6</sup> Kom sota pan kotin purong kamaur kit da, pwe sapwilim omui aramas kan en peren kin komui da?
- <sup>7</sup> Maing Ieowa, kom kotin kasansaleda ar kalangan ong kit, o sauasa kit!
- <sup>8</sup> I men rong, da me Kot Ieowa pan kotin masani; pwe a pan mamasani duen muei mau ong sapwilim a aramas o me lelapok kan, pwe ren der lodi ong me pweipwei.
- <sup>9</sup> Melel, a sauas me koren iong ir, me masak i, pwe a ringan en mi nan sap atail.
- <sup>10</sup> Kalangan o melel pan tu pena, pung o muei mau en metik pena.

- <sup>11</sup> Melel pan wosada sang nan sap o, o pung pan ireredo sang nanlang.
- <sup>12</sup> Ieowa pil pan kotikido me mau, pwe sap atail en kida wa kan.
- <sup>13</sup> Pwe pung pan ti ong mo a, o a kak akan pan wiala al arail.

## 86

- <sup>1</sup> MAING Ieowa, kom kotin kapaikie dong ia karong omui kan o mangi ia, pwe ngai me luet o samama.
- <sup>2</sup> Kom kotin apwali maur i, pwe ngai me lelapok. Maing Kot, kom kotin sauasa ia, sapwilim omui ladu men et, me liki komui.
- <sup>3</sup> Maing, kom kotin maki ong ia, pwe i kin likwir ong komui ni ansau karos.
- <sup>4</sup> Kom kotin kaperenda mongiong en sapwilim omui ladu, pwe mongiong i kin anane komui Maing.
- <sup>5</sup> Pwe komui Maing me mau o kalangan, o kom kotin kalangan ong ir karos, me kin likwir ong komui.
- <sup>6</sup> Maing Ieowa, kom kotin ereki ai kapakap, o kotin mangi ngil en ai ngidingid.
- <sup>7</sup> Ni ai apwal akan i kin likwir ong komui, pwe kom, kotin mangi ia!
- <sup>8</sup> Maing, sota me dueta komui nan pung en kot akan; o sota me kak wiawia dueta komui.
- <sup>9</sup> Men liki kan karos pan pwarado, pwen kaudoki ong komui Maing, o wauneki mar omui.
- <sup>10</sup> Pwe komui me lapalap, me kin wiada manaman, o komui ta me Kot.
- <sup>11</sup> Maing Ieowa, re kotin kasale ong ia al omui, pwe i en weweid ni omui melel, kom kotin kolekol mongiong i ong iet eta: Masak mar omui.
- <sup>12</sup> I men kapinga komui Maing, ai Kot, sang nan mongiong i, o wauneki mar omui kokolata.
- <sup>13</sup> Pwe omui kalangan me laud ong ia; komui dore maur i sang nan wasan mela.
- <sup>14</sup> Maing Kot, me aklapalap akan kin palian ia, o pwin en me weit akan kin masamasan maur i, o re sota kin weweid mon silang omui.
- <sup>15</sup> A komui Maing Kot, me dir en kalangan, o mak, o kanongama, o omui kapunglol o melel me lapalap.
- <sup>16</sup> Kom kotin wukidoki dong ia, o maki ong ia, o kamaui kida sapwilim omui ladu omui manaman, o kotin sauasa nain sapwilim omui lidu!
- <sup>17</sup> Kom kotiki ong ia kilel eu, me i pan paie kida, pwe ai imwintiti kan en kilang, rap namenok kila omui kotin sauasa ia, Maing Ieowa, o kom kotin kamait ia la.

**87**

- 1 A kakaudar mau pon dol sarau kan.  
 2 Ieowa kotin kupura wanim en Sion sang wasan kauson en Iakop karos.  
 3 Kasoi kaselel mia duen koe kanim en Kot. Sela.  
 4 I pan kasokasoi duen Raap o Papel, me asa ia. Kilang, Pilista o Tirus, o pil men Atiopia: Mepukat ipwidier wasa o.  
 5 A kasokasoi duen Sion indinda, me song en aramas karos ipwidi wasa o, o me Lapalap o pan kotin kamanada i.  
 6 Ieowa pan kotin wadok, ni a pan kotin kileledi aramas akan: Mepukat ipwidier wasa o. Sela.  
 7 O ni ar madomadong re pan kauleki: Ai parer karos mi re om!

**88**

- 1 MAING Ieowa, Kot ai saunkamaur, i kin likwir nin ran o ni pong mo 'mui.  
 2 Kom kotin mueid ong, ai kapakap en lelda wong komui. Kom kotin kapaik dong karong omui kan ai likelikwir.  
 3 Pwe ngen i me dir en mamauk, o maur i koren iong mela.  
 4 Ngai kin wadok ong ir me melar, ngai dueta ol amen, me solar angiangi.  
 5 I wonon nan pung en me melar akan, me wonon nan sousou, me kom solar kotin kupura, pwe re lokidokilar sang nan lim omui.  
 6 Kom kotin kase ia lar nan sousou, wasa rotorot o lol.  
 7 Omui ongiong kin katoutou ia, o kom kotin idan kin ia di omui iluk kan. Sela.  
 8 Kom kotiki wonger kompoke pa i kan wasa doo, kom kotin wia kin ia la me sued kot ong ir, i salidier o so kak pitila.  
 9 Mas ai suede kilar ai luet, nin ran karos i potoan ong komui, Maing Ieowa, o i kapa wong komui pa i kat.  
 10 Kom pan kotin kasaleda omui manaman ren me melar akan? De me melar akan pan maurada danke komui? Sela.  
 11 Re pan kosoia duen omui kalangan nan sousou kan? O wasan mela duen omui melel?  
 12 Omui manaman akan pan sansaleda wasa rotorot, o omui pung nan sap en me re solar kin lamelame?  
 13 A i kin potoan likwir ong komui, Maing Ieowa nin mansang, ai kapakap pan lel wong komui.  
 14 Maing Ieowa, da me kom kotin kase ia kila, o da me kom okila ki silang ar mo i?  
 15 Ngai me luet o saliel sang ni ai pulepul; i kin kamekamki omui kalom, i koren iong solar kaporopor.

- 16 Omui ongiong kin kadupal ia di, omui kalom kawe ia lar.  
 17 Re kapil ia pena dueta pil akan sang ni mansang lel sautik, ir karos kapil ia pena.  
 18 Kom kotiki wonger kompoke pa i o ai warok kan wasa doo, rotorot eta ai warok.

**89**

- 1 I PAN kauleki duen kalangan en Ieowa kokolata, o i pan kaparokki au ai omui melel sang eu kainok lel eu.  
 2 Pwe i indinda: Mak soutuk eu pan pwarado, o kom pan kotin kolekol ar melel nanlang.  
 3 I inauki onger, ai pilipildar akan; I kauki onger Dawid nai ladu:  
 4 Kadaudok om pan mimieta kokolata, o I pan kauada mol om sang eu kainok lel eu. Sela.  
 5 Nanlang ap kapinga omui manaman akan, Maing Ieowa, o omui melel nan pokon en sapwilim omui sarau kan.  
 6 Pwe is nan tapok kan me rasong Ieowa? De is me rasong Ieowa nan pung en me lapalap akan?  
 7 Kot meid manaman nan pokon en me sarau kan, o meid kapuriamui ong me kaukausion re a.  
 8 Maing Ieowa, Kot Sepaot, is me rasong komui. Omui melel kin kapil komui pena.  
 9 Komui me kotin kaunda madau angiang. Komui kin kamoleilei iluk kan ni ar pan kokoda.  
 10 Komui me kotin tiakedi Raap dueta kamelar amen. Kom kotin kamueit pasanger imwintiti kan ki lim omui manaman.  
 11 Lang o sappa me sapwilim omui, sappa o audepa. Komui me kotin pasonedier.  
 12 Komui me kotin wiadar pali apong o pali air, Tapor o Ermon kin ngisingiski mar omui.  
 13 Lim omui me mananan o kumut en lim omui me roson, lim omui pali maun me ileile.  
 14 Melel o pung iei pason en mol omui; kalangan o melel kin tiong mo omui.  
 15 Meid pai aramas kan, me asa ngisingis! Ieowa, re pan weweid ni marain en silang omui.  
 16 Re kin polauleki mar omui sang ni mansang lel sautik, o re kin pwai kida omui pung.  
 17 Pwe ligan en ar kelail komui, o komui pan pokada os at.  
 18 Pwe Ieowa pere patail o me Sarau en Israel, i atail Nanmarki.  
 19 Mas o kom kotin masanier ki kasansal kai ong me lelapok kan: I kamanadar me

Lapalap amen, I kasapwiladar pilip-  
ildar amen sang ren aramas akan.  
 20 I diardar ai ladu Dawid, I keiekidier i ai  
le sarau.  
 21 Pa i pan kolekol i, o pa i pan kamanada i  
ansau karos.  
 22 Imwintiti kan sota pan kak widing ong i, o  
me sapung kan sota pan kak kaloedi.  
 23 I pan kamela me palian i mo a, o I pan  
kaloke ir, me kailongki i.  
 24 A ai melel o kalangan pan mi re a, o ni mar  
ai os a pan pokapokada.  
 25 I pan ki ong pa a, en kaunda madau, o pa  
a maun, en kaunda pil akan.  
 26 A pan likwir dong ia: Komui Sam ai, ai  
Kot, o paip en maur i.  
 27 O I pan wia kila i nai meseni, ileila sang  
nanmarki en sappa kan.  
 28 I pan kalangan ong i kokolata, o ai inau  
ong i pan duedueta.  
 29 I pan ki ong i kadaudok a kokolata, o mol  
a pan warai dueta lang.  
 30 A ma na kan pan mui sang ai kapung,  
o re sota pan weweid ni ai kusoned  
akan,  
 31 Ma re pan kasaminela ai tiak kan, o sota  
peiki ong ai kusoned akan,  
 32 I ap pan kaloke kin ir ar katiwo ki sokon  
pot, o pan woki ir, pweki ar sapung.  
 33 A I sota pan kiwei sang i ai mak, o ai melel  
pan mimieta re a.  
 34 I sota pan kawela ai inau, o I sota pan  
kawukila, me kowe sang nan au ai.  
 35 I kaukilar ai sarau pan me pak, me I sota  
pan likam ong Dawid:  
 36 Kadaudok a pan soutuk, o mol a dueta  
katipin mo i.  
 37 A pan duedueta dueta saunipong; o  
saunkadede nan tapok kan me melel.  
Sela.  
 38 A met komui kasapokela o ongiong sap-  
wilim omui me keidier.  
 39 Kom kotin kasela inau en omui ladu, o  
kom kotin kasaminela mar a.  
 40 Kom kotin karongk pasang a kel akan  
karos, o kawelar a im tengeteng kan.  
 41 Karos me daulier wasa o kulia sanger;  
a wialar kankaurur ong men imp a  
kan.  
 42 Kom kotin pokada pali maun en me  
palian i, o kaperendar a imwintiti  
kan karos.  
 43 Kom pil kotiki sanger mana en a kodlas  
kong, o sota kapwaiada i ni pei.  
 44 Kom kotin kaimwisokalar a lingan, o  
kasedi ong nan pwe mol a.  
 45 Kom kamotomotala ran en a manakap, o  
kadupalekidi i namenok. Sela.  
 46 Arai da, Maing Ieowa, me kom pan kotin  
karirela pein komui; arai da omui  
ongiong pan lulada dueta kisiniai?

47 Kom kotin tamanda duen motomot en  
maur i; de me mal kot omui kotin  
wiadar aramas akan?  
 48 Is ol o, me maur ap sota pan lel ong mela?  
A pan kak dorela pein i sang mana en  
wasan mela? Sela.  
 49 Maing, ia omui kalangan en mas o, me  
kom kotin inauki ong Dawid ni omui  
melel?  
 50 Maing, kotin tamanda kankaurur en sap-  
wilim omui ladu kan sang ni wei toto,  
me kin katoutoui mongiong i.  
 51 Maing Ieowa, iaduen lalau en omui  
imwintiti kan, iduen ar lalau lip en  
sapwilim omui me keidier.  
 52 Kaping ong Ieowa kokolata! Amen, iei  
Amen!

## 90

1 MAING, kom me kotin nekid pat sang eu  
kainok ong eu.  
 2 Mon nana kan o sappa, o aude pan sappa  
a wiuiada, Kot kotin mia, sang mas  
kokodo o pil kokolata soutuk, Maing  
Kot.  
 3 Kom kin kotin kapurelang pwe par ara-  
mas akan o kotin mamasani: Puredo  
komaail aramas akan!  
 4 Pwe par kid dueta aio me samalar mon  
silang omui o rasong masamasan eu  
ni pong.  
 5 Kom kin kotin kapwil irail wei, re ra-  
song mair, dueta rä, me kin mongedi  
madang.  
 6 Me kin masel pasang ni mansang, a nin  
sautik a pan palepaledi o mongedi.  
 7 Omui ongiong me se kin sosore kidi, o  
omui ongiong melel, me se kin mek-  
ila madang.  
 8 Pwe kom kotin kasansale ong pein komui  
dip at akan, o dip at rir akan nan  
marain en silang omui.  
 9 I me at ran akan karos kin tang weiki omui  
ongiong, at par akan rasong kasoi  
pot.  
 10 Warain at maur me saunpar iseisok, a  
ma re toto, a pan waleisok, a ma me  
kasampwal, a pan apwal o dodok.  
Pwe a kin tang wei madang, dueta kit  
kin pir wei.  
 11 A is me kak dedeki mana en omui on-  
giong, o is me kin masak ongiong  
wet?  
 12 Kom kotin padaki ong kit, me kit pan  
mela, pwe sen lolekong kila.  
 13 Maing Ieowa, kom kotin purong wuke-  
doke dong kit; arai da omui ongiong?  
Kom kotin maki ong sapwilim omui  
ladu kan!  
 14 Kom kotin kadire kin kit ala ar kalan-  
gan ni mansang, kit ap pan kaping o  
pereperen arain at maur.

- 15 Kom kotin kaperen kit da murin at kalokoloker, o murin at kamekam warai.
- 16 Kom kotin kasale ong sapwilim omui ladu kan omui wiawia kan, o omui wau ong na seri kan.
- 17 Ieowa at Kot, en kalangan dong kit o kotin kapwaiada dodok en pa at akan re at; ei kom kotin kapwaiada dodok en pa at akan!

## 91

- 1 ME kin momod pan lim en me lapalap, o me pan mimieta pan mot en me manaman o.
- 2 Iei me kin indang Ieowa: Ai paip, o ai kel, ai Kot, me i liki.
- 3 Pwe a pan kotin dore uk sang insar en sauninsar, o sang ni kilitop sued.
- 4 A pan kotin kadupal kin uk edi lim a, o koe pan moleilei pan lim a kan; a melel rasong kadauk o pere eu.
- 5 Koe sota pan masak kalom en ni pong, de kanangan kasik katieu, me kin tang wei nin ran,
- 6 De kilitop, me kin wawai sili pong, de eu song en kilitop me kin kaukawela nin sauas.
- 7 Kid pan mela imp om, o nen ni pali maun om, ap sota pan lel ong uk.
- 8 Koe pan kilangki mas om kan, o koe pan kilang duen a pan depuk ong me doo sang Kot akan.
- 9 Pwe komui Maing Ieowa, kapore pa i. Koe piladar me lapalap o, pwen om kel.
- 10 Sota me sued kot pan lel ong uk, o sota kalokolok pan lel ong im om.
- 11 Pwe a kotin kakaliki ong sapwilim a tounlang kan, en apapwali uk o sinsila uk nan al omui kan karos.
- 12 Re pan wa kin uk ala lim ar akan, pwe nä om ender dipikelekel nin takai eu;
- 13 Koe pan tiakedi laien o oter kai, laien pulepul o serpent, me koe pan sok poa.
- 14 A kin peren kin ia, I ap pan sauasa i, a asa mar ai, I ap pan sinsila i.
- 15 A pan likwir dong ia, I ap pan sapeng i, I pan iang i ni wasa apwal, I pan kapitila i o kalinganada i.
- 16 I pan kamedid kin i maur warai, o I pan kasale ong i ai sauas.

## 92

- 1 IET me kasampwal: Danke Ieowa, o kauleki psalm akan ong mar omui, ir me kotin lapaplap.
- 2 Ni mansang omui kalangan o ni pong omui melel en lolok sili.
- 3 Sang kasang sal eisok o arp o laute.

- 4 Pwe kom kotin kaperen kin ia, Maing Ieowa ki ar wiawia; i pan ngisingiski dodok en lim ar akan.
- 5 Meid laud ar wiawia kan, Maing Ieowa! O meid lol kupur omui!
- 6 Aramas pweipwei men sota kak dedeki mepukat, o me rotorot amen sota kin insenoki.
- 7 Me doo sang Kot akan kin wosada dueta rä, o me katiwo kan karos kin masal pasang, lao re pan lokidokila kokolata.
- 8 A komui ta Maing Ieowa, me lapalapia, o komui pan duedueta.
- 9 Pwe kom kotin mangi duen ar imwintiti kan, Maing Ieowa, kom kotin mangi, ar imwintiti kan pan soredi, o me morsued akan en kamueit pasang.
- 10 A ai ose pan pwaida dueta os en man ose tapot, o i pan keikidier le kap.
- 11 O por en mas ai pan perenki ai imwintiti kan, o salong ai pan polauleki me morsued akan, me kin palian ia.
- 12 Me pung o pan pwaida mau dueta ni pot, a pan kakairida dueta seder en Lipanon.
- 13 Me patidier nan tanpas en Ieowa, pan pwaida mon pera sarau en atail Kot.
- 14 Menda ma re pan mala, pwe re pan pil masal pasang, o wa, o kelail.
- 15 Pwe re pan kasaleda, me Kot me pung, i ai paip o sota sapung mi re a.

## 93

- 1 IEOWA kotin kaunda, a kotin kapwateki pein i manaman, Ieowa kotin kalikauwiada pein i, a kotin piraki pein i manaman; pil sappa me tengeteng o sota pan mokimokid.
- 2 Sang mas lel met mol omui me tengeteng; komui me soutuk.
- 3 Maing Ieowa pil akan lalaudala, pil akan ngiringirsok, pil akan pil pan kokodo o ngiringirsok.
- 4 Ieowa kotikot wasa ileile. A manaman sang ngil en pil kalaimun akan o iluk en madau kalaimun akan.
- 5 Omui masan akan meid pung. Tanpas omui me linganaki saraui kokolata, Maing Ieowa.

## 94

- 1 MAING Kot, komui saundepuk, Ieowa Kot saundepuk, kom kotin sansaleda!
- 2 Kom kotida, komui saunkapung en sappa, kom kotin depuk ong wiawia en me aklapalap akan.
- 3 Maing Ieowa, arai da me doo sang Kot akan, arai da me doo sang Kot akan pan poponmasu,

- 4 O pudupudada lokaia sued o arai da, me sapung kan karos en suaiki ar morsued?
- 5 Re kin tiakedi sapwilim omui aramas akan, o re kame omui soso;
- 6 Re kin kamela li odi o men wai, o patik takain wor en me sapoupou kan,
- 7 Rap inda: Ieowa sota kak kilang, o Kot en Iakop sota pan asa due.
- 8 Komail me pweipwei nan pung en aramas akan, en dedeki! O komail lolepon akan, iad me komail pan lolekon-gala?
- 9 Me kotin wiadar salong, o a sota pan ereki? Me kotin wiadar por en mas o, a sota pan kak masani?
- 10 Me kin kotin kaunda wei kan, a sota pan kaloke? Pwe i me kotin kalolekongi aramas.
- 11 Ieowa kotin mangi lamelam en aramas akan, me re aklapalap.
- 12 Meid pai ol o, me kom kotin kaloke, Maing, Ieowa, o me kom kotin padaki ong sang nan ar masan akan.
- 13 Pwen kanongama ni a apwal akan, lao sousou en me doo sang Kot akan pan weweida.
- 14 Pwe Ieowa sota pan kotin kasela sapwilim a aramas akan, o a sota pan mui sang a soso.
- 15 Pwe me pung, pan pungpungeta, i me lelapok kan karos pan weweideki.
- 16 Is me pan sauasa ia ong me morsued akan? O is me pan sauasa ia ong me dipan akan?
- 17 Ma Ieowa sota kotin sauasa ia, metar ekis ngen i pan kolang wasan kapormen.
- 18 Ni ai indada: Nä i pan krisedi, omui kalangan, Maing Ieowa, pan kolekol ia.
- 19 Ai insensued laud nan mongiong i, a omui kotin kamait ia la kaperenda ngen i.
- 20 Kom sota man paroki ong mol o, me kin kasapungala sapwilim omui masan.
- 21 Re kin onop ong kamela me pung amen, o re kin kadeikada nta makelekel.
- 22 A Ieowa ai paip lapalap, o Kot iei paip, me i pan rukila ia.
- 23 A pan kotin depuk ong ir ar me sued, o a pan kotin kame ir ala, pweki ar katiwo, Ieowa atail Kot pan kame ir ala.

## 95

- 1 KOMAIL kodo, pwe kitail pan kapinga Ieowa o ngisingis ong paip en maur atail.
- 2 Kitail pan kola tuki ong i kaping. Kitail en ngisingiski ong i psalm!
- 3 Pwe Ieowa Kot lapalap amen, o Nanmarki lapalap amen pon angin kot akan karos.

- 4 Pan sappa mi ni lim a, o pon komon nana me sapwilim a.
- 5 Madau me sapwilim a, pwe i me kotin wiadar, o lim a kan wiadar wasa madekong.
- 6 Komail kodo, kitail pan kaudok, o dairukedi, o kelepuki mon Ieowa, me kotin wia kitail dar.
- 7 Pwe i atail Kot, a kitail aramas en sapwilim a wasan kamanga o pwin en lim a. Ran wet, ma komail pan rong kapitie,
- 8 Komail der kapitakaila mongiong omail, duen a wiaui Meripa o ni ran en Masa nan sap tan,
- 9 Ni sam omail akan songesong ia o kasau ia da, pwe re kilanger ai dodok kan.
- 10 Par paeisok I suede kilar di wet, o I indada: Mongiong en song en aramas duen met kin wukiwuk sili, o re sota men asa duen al ai kan.
- 11 I ap kaula ni ai makar: Irail sota pan konodi ai kaul.

## 96

- 1 KAKAULEKI ong Ieowa kaul kap pot, sap karos en kakauli ong Ieowa!
- 2 Kakaul ong Ieowa o kapinga mar a; padapadak sang eu ran lel eu duen a maur!
- 3 Kasokasoi ong men liki kan wau i, o ong wei kan a manaman akan!
- 4 Pwe Ieowa meid lapalap o meid kapingan, o meid kalom mon kot akan karos.
- 5 Pwe Kot en aramas akan me mal a Ieowa kotin kapikadar lang akan.
- 6 Wau o lingan mi mon silang i, manaman o lingan kin kadirela nan tanpas a im sarau.
- 7 Komail men liki kan, ki ong Ieowa, ki ong Ieowa lingan o manaman.
- 8 Komail ki ong Ieowa lingan en mar a; komail ko dong mon sapwilim a pera sarau iangaki kisakis.
- 9 Komail kaudoki ong Ieowa ni omail kawat sarau, toun sappa karos en masak i.
- 10 Komail kaireki ong men liki kan: Ieowa ta Nanmarki! Pil sappa me tengeteng o sota pan mokimokid. A pan kotin kaunda kainok kan ni tiak pung.
- 11 Lang en peren kida, o sappa en popol; madau en ngirngirsok o audepa!
- 12 Sap en pereperen o audepa karos, o tuka en nan wel karos en ngisingis.
- 13 Ong Ieowa, ni a kotido, ni a kotido, en kadeikada sappa. A pan kotin kaunda sappa ni tiak pung, o kainok kan ni a melel.

## 97

- 1 IEOWA ta Nanmarki, i me sappa en polaule kida o dake kan karos en pereperen!



- 2 Tapok o rotorot mi imp a, pung o melei iei pason en mol a.
- 3 Kisinia i kin tiong mo a, o isiked a sapwilim a imwintiti kan karos.
- 4 Sapwilim a liol akan kin kamaraini sappa, toun sappa kin kilang ap masapwekadar.
- 5 Nana kan pei pasang dueta kris mon Ieowa, Kaun en sap karos.
- 6 Lang akan kaparokki a pung, o kainok karos kin kilang a lingan.
- 7 Me kaudoki ong dikedik en ani kan en sarodi, o me kin suaiki ani kan; kot akan karos dairukedi ong mo a!
- 8 Sion kin rong mepukat ap peren kida, o peinekap en Iuda kan kin polauleki omui kapung kan, Maing Ieowa.
- 9 Pwe komui ta Maing Ieowa me lapalap nan sappa karos, komui meid ileila sang Kot akan karos.
- 10 Komail me kin pok ong Ieowa en tatak me sued. A kin kotin apwali ngen en sapwilim a lelapok kan. A pan kotin dore ir ala sang nan pa en me doo sang Kot akan.
- 11 Marain pan dakadang me pung kan, o peren ong me lelapok melei.
- 12 Komail me pung kan perenki Ieowa o kapinga mar a sarau!

## 98

- 1 KAKAULEKI ong Ieowa kaul kap pot; pwe a kotin wiadar dodok kapuriamui. A kotin kaloe kidi lim a pali maun o lim a sarau.
- 2 Ieowa kotin kasaledar a kamaur, o mon mas en kainok kan a kotin kasansaledar a pung.
- 3 A kotin kolekol ong men Israel a kalangan o melei; imwin sap karos kin kilang pai en atail Kot.
- 4 Sap karos en ngisingis ong Ieowa! Popol o kauleki psalm!
- 5 Kauleki ong Ieowa psalm iangaki laute, wiada laute o kaul!
- 6 Iang trompete o ngil en koronete, komail ngisingis ong Nanmarki Ieowa!
- 7 Madau en ngiringirsok o audepa, sappa o tou a kan;
- 8 Pilap akan en lolopolepi pa arail; o nana kan en pereperenki.
- 9 Ieowa, ni a kotidon kadeikada sappa. A pan kotin kadeikada sappa nin tiak pung o kainok kan nin tiak inen.

## 99

- 1 IEOWA ta kotin kakaunda; kainok kan kin rerer; a kotikot nan pung en Kerup akan, sappa kin mokimokid.
- 2 Ieowa me lapalap nan Sion, o lapalap melei sang wei kan karos.

- 3 Ren kapinga mar omui, me lapalap o kalom, i me sarau.
- 4 O manaman en Nanmarki me kin pok ong me pung. Kom kotin katengedier tiak pung. Komui me kotin wiadar me pung o inen nan kadaudok en Iakop.
- 5 Kapinga Ieowa atail Kot o poridier ong ni utipa, pwe i me sarau!
- 6 Moses o Aron kisan sapwilim a samero kan o Samuel nan pung en ir, me kin likwir ong mar a, re likwir wonger Ieowa, i ap kotin mangi ir.
- 7 A kotin masan ong irail sang nan ur en tapok; irail peiki ong a masan o kusioned akan, me a kotiki ong irail er.
- 8 Ieowa at Kot, kom kotin sapeng irail er. Maing Kot kom kotin maki ong irail er, o kotin depuk ong ir ar sapung kan.
- 9 Kapinga Ieowa atail Kot, o poridier ni sapwilim a nana sarau, pwe Ieowa atail Kot me sarau.

## 100

- 1 NGISINGIS ong Ieowa sap karos!
- 2 Papang Ieowa ki peren; koki dong mon silang i nisinis!
- 3 Komail en asa, me Ieowa Kot. I me kotin wia kitail dar — a kaidin pein kitail — pwen sapwilim a aramas o sip en sapwilim a pwin.
- 4 Pedelong ong nan sapwilim a wanim laud ki danke, o kaul en kaping mon sapwilim a pera sarau. Danke i o kapinga mar a!
- 5 Pwe Ieowa me mau, a kalangan soutuk, o a melei pan due lueta kokolata.

## 101

- 1 I pan kauleki duen kalangan o pung; i pan kauleki psalm akan ong komui. Maing Ieowa.
- 2 I men inen eweita ni al pung — iad kom pan koti dong ia? — i men weweid ni melei ren toun im ai.
- 3 I sota men wia morsued; i tataki wiawian me dipan akan, a sota pan pat ong ia.
- 4 Mongiong sapung pan mui sang ia; i sota men asa duen me sued.
- 5 Me kin rir karaunemali men impa, i pan kamela; i suedeki me akplalap ni mas ar o mongiong arail.
- 6 Mas ai pan apawali me melei akan nan sap o, pwe ren kauson re i; me kin weweid ni al pung, pan papa ia.
- 7 Me kin kotaue, sota pan kauson nan im ai, me kin likam, sota pan pwaida mon mas ai.
- 8 Ni mansang karos i pan kawela me katiwo nan sap o, pwen kokosang kanim en Ieowa karos, me kin wia sapung.

**102**

- 1 IEOWA, kom kotin ereki ai kapakap, o ai weriwer en lel ong komui!
- 2 Kom der kotin karirala silang ir mo i ni ran en ai apwal; kom kotin kapaikae dong ia karong omui kan; ni ran o, me i likelikwir, kom kotin mangi ia madang!
- 3 Pwe ai ran akan kin tangwei dueta adinia, o kokon ai kan rongalar dueta nan kisiniai.
- 4 Kapedi mongedier dueta rä, i me i monoke kila ai mangamanga.
- 5 Kokon o uduk ai mong penaer pweki ai weriwer o sangesang.
- 6 Ngai rasong pelikan nan sap tan, o rasong däap nan wasa liseliping.
- 7 I kin papad o rasong manpir kelep amen, me mondi pon os en im o.
- 8 Ai imwintiti kin lalaue ia sang ni mansang lel ni sautik, o me palian ia, kin kaula kin ia.
- 9 Pwe i kin kangkang pas dueta prot, o lim ai pil kin doloki pil en mas ai.
- 10 Pweki omui ongiong o ongiong melel; pwe kom kotin pok ia da, ap kase ia di.
- 11 Ai ran akan tangwei dueta mota, o i mongedier dueta rä.
- 12 A komui Maing Ieowa pan kotikoteta kokolata, o kupur omui pan sang eu kainok lel eu potopoteta.
- 13 Kom pan kotida o kupurela Sion, pwe ansau leler, me kom pan kotin mak ong i, a auer leler.
- 14 Pwe sapwilim omui ladu kan kin pok ong takai (en Sion), o re insensuedeki moan im akan;
- 15 O men liki kan pan masak mar en Ieowa, o Nanmarki en sap akan karos omui ligan.
- 16 Pwe Ieowa kotin kauadar Sion. A kotin pwarada ni a ligan.
- 17 A kotin wukedoke dong kapakap en me samama o, o a sota kotin mamaleki a kapakap.
- 18 Mepukat pan kileledi ong kainok en mur akan; o wei eu, me pan wiaui, pan kapinga Ieowa.
- 19 Pwe a kotin irerong sang mol a sarau ileile; Ieowa kotin irerong sappa sang nanlang.
- 20 Pwen ereki sangesang en me salidi kan, pwen lapwada, me kileledi onger kamela.
- 21 Pwe mar en Ieowa en lolok sili nan Sion, o a kapingapa nan Ierusalem.
- 22 Kainok kan lao pokon pena o wei kan, pwen papa ong Ieowa.
- 23 A kotiki sanger ai kelail pon al o, a kamotemotelar ai ran akan.

- 24 I potoan ong: Ai Kot, kom der kotikiwei sang ia ni apali en ai ran akan. Omui par akan kin sang eu kainok lel eu kokolata.
- 25 Kom kotin kasonedier sappa mas o, o lang pokon me dodok en lim omui.
- 26 Irail pan sorela, a kom pan kotikot eta. Irail pan maringala rasong tuk en likau eu. Kom pan kotin kawuk ir ala likamata likau eu, irail ap pan wukila.
- 27 A kom pan deudueta o ansaun omui roson sota pan tukedi.
- 28 Nain sapwilim omui ladu kan pan mimieta, o kadaudok a pan pwaida re omui.

**103**

- 1 Ngen i kapinga Ieowa o lol i mar a sarau!
- 2 Ngen i kapinga Ieowa, o der monokela a kotin wiawia mau ong uk!
- 3 Me kotin makeki ong uk dip om karos, ap kotin kamauijala om somau kan.
- 4 Me kotin dore uk ala sang ni wasa apwal, me kotin ninie kin uk mak o kalangan;
- 5 Me kotin kapai uk adar ni om malar, o kotin kapulpul uk ala dueta adler.
- 6 En Ieowa a wiawia me pung, o a kotin kapungala, me mi ni kalokolok sapung.
- 7 A kotin kasale ong Moses al en a mekaros, o ong men Israil a wiawia kan.
- 8 Ieowa me dir en kalangan o mak, a kin kotin kanongama, o a kalangan me lapalap.
- 9 A sota kin kotin kaloke aramas ansau karos, o pil sota ongiong kokolata.
- 10 A sota kotin pwain ong kitail duen dip atail, o sota depuk ong kitail duen atail sapung kan.
- 11 A duen ileile en lang sang sappa, iduen a mak lapalap ong ir, me kin masak i.
- 12 Duen mas en lang o kapin lang ara doo pasang, iduen a kotin kadooana wei sang kitail dip atail.
- 13 Duen sam amen pokepoke na seri, iduen Kot kotin kupukupura irail, me lan i.
- 14 Pwe a kotin mangi, da me kitail wiaui kida, a kotin mangi, me kitail me pwel par.
- 15 Aramas amen kin rasong rä, a kin masal pasang dueta wantuka nan sap o.
- 16 Ma kisiniang pan leler, a soer mia, o a solar asa deu a.
- 17 A kalangan en Ieowa pan duedueta kokolata ong ir, me lan i, o a melel ong seri en seri kan,
- 18 Ong ir, me kin kolekol a inau, o madamadaua duen a masan kan, pwen kapwaiada.
- 19 Ieowa kotin kauada mol a nanlang, o a kotin kaunda meakan karos.

- 20 Kapikapinga Ieowa, komail sapwilim a tounlang kan, komail me lapalap akan ni manaman, me kin kapwaiada a masan kan, o peiki ong moat en a masan!
- 21 Kapikapinga Ieowa sapwilim a pokon akan karos, o sapwilim a ladu kan, me kin kapwaiada kupur a!
- 22 Kapikapinga Ieowa sapwilim a dipisou kan ni wasa karos, me a kotin kakaun, ngen i kapinga Ieowa!

## 104

- 1 NGEN i kapinga Ieowa! Ieowa ai Kot, komui meid lapalap, komui me kapwateki lingan o manaman.
- 2 Sapwilim ar likau iei marain, me komui kot lole; kom kotin pak pasang nannang dueta likau eu.
- 3 Kom kin kotin wia kida pil pali poa en ponepon, a tapok kan wiala tan war omui, me kom kin kotikot sili ki pa en ang.
- 4 Kom me kotin wia kila sapwilim omui tounlang kan kisiniang o sapwilim ar ladu kan umpul en kisiniai.
- 5 A kotin kasonedier sappa pon a pason, a sota pan mokid kokolata.
- 6 Kom kotin kadupale kidi i dueta likau eu, pil akan ileilada sang nana kan.
- 7 Re tang wei mon ar masan, re madang wei mon ngil en omui nansapwe.
- 8 Nana kan kokodar, a wau kan kokodier ong wasa, me kom kotin kileledier ong ir.
- 9 Kom kotiki ong ir irair eu, me re sota pan dauli wei; re solar pan pur ong kadupaledi sappa.
- 10 Kom kin kotin wiada, parer en kusukusda nan wau kan; re kin pwilipwil wei nan pung en nana kan.
- 11 Re kotin kanim pileda man en nan sap akan o man en nan wel.
- 12 Manpir en pan lang kin kaukason ni kaila, re kin kakaul nin tuka kan.
- 13 Komui me kin kotin kanim pileda nana kan sang sapwilim omui pera poa. Kom kin kotin kadire kila wa kan sappa, me kom kotin wiadar.
- 14 Komui me kotin kawosadang man akan rä, o wan tuka me mau ong aramas, pwen kapwareda sang nan pwel manga ong aramas akan.
- 15 O wain en kaperenda mongiong en aramas, o le en kalinganada mas en aramas, o prot en kakelada war en aramas.
- 16 Sapwilim en Ieowa tuka kan pan medila, seder en Lipanon akan, me a kotin padukedier.
- 17 Wasa manpir kin pas kin ia, o raiier kauson nan seder.

- 18 Nana ileile iei deun kemse, a paip akan deun repit en wel.
- 19 A kotin wiadar saunipong, pwen kilelekidi ansau kan, katipin asa wasa me a pan kirila ia.
- 20 Kom kin kotin wiada pong, man en nan wel rap mokidada.
- 21 Laien pulepul weriwerki kan arail manga, re kin idok ren Kot, me re pan kang.
- 22 Katipin lao dakada, re kin purela wonon nan por ar akan.
- 23 Aramas ap kolang ar dodok, wia sapasap lel nin sautik.
- 24 Maing Ieowa, ar wiawia kan me dodok melel! Kom kotin kasone irail di ki omui erpit o sappa me direki sapwilim omui dipisou kan.
- 25 Madau me kalaimun o dälap ni pali karos; i wasa me dir en mam, me sota kak wadawad, man tikitik o kalaimun.
- 26 I wasa me sop akan kin tangatang ia, o walros, me komui kotin wiadar, kin madomadong lole.
- 27 Ir karos kin auiaui komui, pwe komui en kotin katungole kin ir kan arail ni ar ansau.
- 28 Kom kin kotiki ong ir, rap nanak pena; komui kotiki pasang lim omui, rap pan medi kila me mau kan.
- 29 Ni omui pan karirila silang omui, rap pan masapwekada, kom kin kotiki sang ir angiang arail, rap pan mela o purelang ar pwel par.
- 30 Kom kin kotin kadarala ang omui, rap pan wiawia, o komui kin kawilikapada mas en sap o.
- 31 Lingan en Ieowa pan duedueta. Ieowa pan kotin peren kida sapwilim a wiawia kan.
- 32 A lao kotin irerong toun sappa, sappa ap rarer; a lao kotin sair nana kan, rap adida.
- 33 Arain ai maur i pan kakauli ong Ieowa, o arain ai mi sappa et, i pan kauleki psalm kan ong ai Kot.
- 34 I men, ai kasokasoi en kaparenda kupur a; i pan polauleki Ieowa.
- 35 Me dipan akan en niki sang sappa, o me doo sang Kot akan en sola mia. Ngen i kalingada Ieowa! Aleluia!

## 105

- 1 KAPINGA Ieowa, likwir wong mar a, kapakaroki ong kainok kan duen a wiawia kan.
- 2 Kauli ong i, kauliki ong i psalm akan, kasokasoi duen a manaman akan karos;
- 3 Peren kida mar a sarau; mongiong en me rapaki Ieowa, en popol.

- 4 Komail inong iong Ieowa o a manaman; rapaki silang i ansau karos.
- 5 Tamatamanda sapwilim a dodok kapuri-amui, me a kotin wiadar, o a manaman akan o masan en kadeik sang nan silang i.
- 6 Kadaudok en Apraam koe sapwilim a ladu, o nain Israel komail, me a kotin piladar!
- 7 I Ieowa atail Kot; a kotin kaunda nan sap karos.
- 8 A kin kotin tamanda sapwilim a inau kokolata, masan o me a kotin inauki onger di kid.
- 9 Inau me a kotin wiadang Apraam, o a kaula, me a kotin kauki ong Isaak.
- 10 O a kotiki ong Iakop kusoned eu, o ong Israel inau soutuk,
- 11 Ni a kotin masanier: I pan ki ong uk Kanaan, iei me I kileledier, en pwais omail soso;
- 12 I ansau, me irail pwin tikitik eu, o men kairu nan sap o.
- 13 Ni ar kokola sang eu kainok lel eu, o sang eu wei lel eu.
- 14 A sota kotin mueid ong amen aramas, en katoutou irail, o a kotin kaloke nanmarki kai pweki irail.
- 15 Komail der sair nai me keidier akan, o der wiai ong ai saukop akan me sued kot!
- 16 A lao kotiki ong sap o ansaun lek; o kotin kawelar wasan kaporopor en manga,
- 17 A kotin poronelar ol amen mo 'rail; Iosep, me netilar, pwen wiala ladu men.
- 18 Nä a kan kalokolokki sal mata, o pali war a wonon nan mata,
- 19 Lao ansau me sapwilim a masan pwarado; masan en Ieowa kamakelekelela i.
- 20 Nanmarki ap ilakila, pwen lapwada i, iei kaun en wei kan, me kotin kamaioda i.
- 21 A kasapwiladang i pein im a, o kaun en a dipisou karos.
- 22 Pwen saliedi a saupeidi kan duen me a mauki, o padaki ong sapwilim a lapalap akan lelkong.
- 23 O Israel lipalang Äkripten, o Iakop wiala men kairu nan sap en Am.
- 24 I ansau Kot kotin kapara irail ada madang, o kotin kakelail ir ada sang a imwintiti kan.
- 25 A kotin kawukila kupur a, pwen kailongki sapwilim a aramas akan, o widiwiding ong sapwilim a ladu kan.
- 26 A ap kotin poronela Moses, sapwilim a ladu, o Aron, me a kotin piladar.
- 27 Ira wiadar manaman akai nan pung ar, o dodok kapuriamui nan sap en Am.
- 28 A kotin kadarado rotorot, ap pong pena, o re sota insenoki a masan kan.
- 29 A kotin kawuk ong nta ar pil akan, o kamelar ar man akan.
- 30 Sap arail me direki pros lao lel ong nan pera en ar nanmarki kan.
- 31 A kotin masanier, long sued ap rokilar, o amuse nan sap karos.
- 32 A kotiki ong ir akel wiliandi katau, umpul en kisiniai nan sap ar.
- 33 A kotin kawelar ar tuka en wain akan o tuka en paiken, o kotin katip pasang tuka en sap ar akan.
- 34 A kotin masanier, mansiok o long ap pwarada, rap pwaradar o re sota kak wadawad.
- 35 Rap kangala tuka kan karos nan sap o, o kangala wantuka kan nan matuel o.
- 36 O a kotin kamelar meseni karos nan sap arail, meseni karos en ar kelail.
- 37 O a kotin kalua irail sang nan sap o iangaki silper o kold, o sota me luet nan pung en ar kainok kan.
- 38 Äkripten peren kida ar samalar, pwe re masapwekadar.
- 39 A kotin wiada tapok en kadupal irail edi, o kisiniai en sereda irail ni pong.
- 40 Irail poekipoeki, i ap kotin kadarado manpir akan; o a kotin kamanga kin ir prot en nanlang.
- 41 A kotin palang pasang paip o, pil akan ap kuskus wei sang, re pwilipwile wei nan sap tan dueta pilap pot.
- 42 Pwe a kotin tamanda a masan sarau, o sapwilim a ladu Apraam.
- 43 A kotin kaluaki peren sapwilim a aramas akan sang nan sap o, o ngisingis sapwilim a pilipildar akan!
- 44 A ap kotiki ong ir sap en men liki kan, o re aleer dipisou en kainok kan.
- 45 Pwe ren peiki ong sapwilim a masan kan o kolekol a kusoned akan. Aleluia!

## 106

- 1 KAPINGA Ieowa, pwe i me mau, pwe a kalangan pan potopot eta.
- 2 Is me kak inda duen dodok manaman en Ieowa, o is me kak kapinga sapwilim a dodok kasapwal?
- 3 Meid pai, me kolekol me pung, o me kin wiada me pung ansau karos!
- 4 Maing Ieowa, kom kotin taman ia da duen ar kalangan, me kom kotin inauki ong sapwilim omui aramas akan, kasansale dong kit omui sauas!
- 5 Pwe i en kilang pai en sapwilim omui pilipildar akan o peren kidar peren en sapwilim omui aramas akan, o kapinga iang omui soso.
- 6 Kit iang sam at oko wiadar dip, se wiadar sapung, se kawelar kusoned o kapwaiada tiak en me pung kan.
- 7 Sam at akan nan Äkripten sota insenoki sapwilim omui manaman akan, pwe

- re sota tamanda omui kalangan lapalap, o re katiwo ong me lapalap o ni kailan madau ni sed waitata.
- 8 Ari so, a kotin dore ir ala pweki mar a, pwen kasaleda a manaman.
- 9 A kotin masani ong sed waitata, ap ngalangedier; o a kotin kalua irail wasa lol dueta sap tan eu.
- 10 Iduen a kotin dore ir ala sang nan pa en me kailong kin ir, o a kotin sausa ir sang nan pa en imwintiti;
- 11 Pil kadupaledi arail imwintiti kan, sota amen pitila.
- 12 Irail ap kamelele a masan akan, o kaul en kaping ong i.
- 13 A re pil madang monokelar a wiawia kan, o re sota auiaui a masan.
- 14 Irail dire kila inong sued, ap kasongesong. Kot nan sap tan,
- 15 Ap kotin mueid ong insen arail, o kotiki ong ir; lol ar lao suedala.
- 16 Re ap kangudi ong Moses nan deu 'rail, ong Aron me sarau en Ieowa men.
- 17 Sap ap sar pasang katalala Datan, o pur penang pon pwin en Apiram.
- 18 O kisiniai eu kamasikada nan pung en arail pwin, umpul en kisiniai eu karongalar me doo sang Kot akan.
- 19 Re wiadar kau pul amen ni Orep, o dairukedi sang mon kilel kold eu.
- 20 O re kawilianeki arail lingan kilel en kau ol amen, me kin kangkang rä.
- 21 Re monokelar Kot, arail saunkamaur, me kotin wiadar dodok lapalap nan Äkipten.
- 22 O manaman akan nan sap en Am, o men kamasak ni sed waitata.
- 23 I ap kotin kupukupura, me a pan kame ir ala, ma Moses sapwilim a pilipildar amen sota pan pukoki dip arail, pwen kotiki wei sang sapwilim a ongiong, pwe ren der mela.
- 24 A re mamaleki sap kaselel, o sota kamelele a masan kan.
- 25 O re lipaned nan im arail, o sota peiki ong masan en Ieowa.
- 26 I ap kotin kaula ong ir, me a pan kame ir ala nan sap tan.
- 27 O kadaudok ar en wowokidi nan pung en men liki kan, o kamueit ir pasang nan sap akan.
- 28 O re wuki ong Pal-Peor, o kangala kisan mairong en ani mal.
- 29 O re kupur sued kin i ar wiawia kan, kalokolok eu ap lel ong ir.
- 30 Pineas ap kotida, kadeik irail ada, kalokolok ap imwisokalar.
- 31 Mepukat me a wadekida ni pung, sang eu kainok lel eu kokolata.
- 32 O re kupur suede kin i ni pil en Meripa, i me irail kareki ong Moses apwal laud.
- 33 Pwe re kapataui ngen i, ap kotin sapungala ekis ni a masan kan.
- 34 Re sota pil kanikiala wei kan, me Ieowa kotin masani ong ir.
- 35 O re dolola men liki kan, o padakki arail tiak kan.
- 36 O re kaudoki ong arail dikedik en ani kan, rap wialar insar arail.
- 37 O re mairongki ong tewil sued akan nairail putak o seripein kan.
- 38 O re kamelar mal aramas, iei udan nair putak o seripein oko, me re mairongki ong ani mal en Kanaan, a sap o kasamin kila nta.
- 39 O re kasamine kila pein irail ar wia kan, o nenekki ar dodok sued.
- 40 Ieowa ap kotin ongiong ong sapwilim a aramas akan o kotin suedeki sapwilim a soso.
- 41 A kotin mueid ong ir nan pa en men liki kan, o me kailong kin ir, wialar ar kaun.
- 42 O ar imwintiti katoutoui ir, o re namenokalar pan pa 'rail.
- 43 A kotin dore ir ala pan pak toto, a re duedueta ni ar inong sued o madamadaua, o re malaulau kilar ar sapung.
- 44 A a kotin irerong ar kan kangeranger, ni a kotin ereki ar weriwer.
- 45 O a kotin tamanda sapwilim a inau, o a kotin kalukila duen a kalangan lapalap.
- 46 O a kotin maki ong ir mon karos, me sali irail wei er.
- 47 Ieowa at Kot, kom kotin dore kit ala, sang ren men liki kan, pwe kit en danke mar omui sarau o sapwilim ar dodok mau kan.
- 48 Kaping ong Ieowa, Kot en Israel, sang mas kokodo o pil kokolata! O aramas karos en inda: Amen, Aleluia!

## 107

- 1 KAPINGA Ieowa, pwe i me mau, pwe a kalangan pan potopot eta.
- 2 Iduen me dorelar ren Ieowa kan pan indinda, irail me a kotin dorelar sang nan pa en arail imwintiti;
- 3 Me a kotin kapokon pena sang sap en mas en lang, o kapin lang, o pali apang, o sang madau.
- 4 Irail sansalong sili nan sap tan, pol al apwal, re sota diarada deu 'rail.
- 5 Re men mangadar o men nim piladar, o kaped arail luetalar.
- 6 Rap weriwer wong Ieowa ni ar kankangeranger, o a kotin dore ir sang nan ar apwal akan.

7 O a kotin kalua ir pon al pung, pwe ren lel ong wasan kaukauson.  
 8 Ren kapinga Ieowa, pweki a kalangan o pweki a dodok manaman ong aramas akan.  
 9 Pwe a kotin kamede kilar kaped en me men nim piladar, o kadir kila me mau kan kaped en me men mangadar.  
 10 Me mi ni wasa rotorot o mot en mela, me salikidi luet o mata.  
 11 Pweki ar katiwo ong masan en Kot, o ar mamaleki kusoned en ma lapalap o.  
 12 I ap kaloke kin ir apwal akan, re wonon, a sota sauas parail.  
 13 Rap weriwer wong Ieowa ni ar apwal akan, i ap kotin dore ir ala sang katoutou parail.  
 14 A kotin kalua ir sang nan rotorot, o mot en mela, o kotin kamueit pasang ar sal akan.  
 15 Ren kapinga Ieowa, pweki a kalangan o pweki a dodok manaman ong aramas akan.  
 16 Pwe a kotin kawela wanim mata, o a kotin suk pasang kateng mata pan wanim akan.  
 17 Me pweipwei kan pan kalokolokki al en ar katiwo o ar sapung kan.  
 18 Kaped arail kin suedeki song en manga karos, o re lel ong kailan mela.  
 19 Rap weriwer wong Ieowa ni ar apwal akan, i ap kotin dore ir ala sang katoutou parail.  
 20 A kotin kadarado sapwilim a masan, o kotin kamaur irail da, o kotin sauasa ir sang nan ar por akan.  
 21 Ren kapinga Ieowa pweki a kalangan o pweki a dodok mau ong aramas akan.  
 22 O ren mairongki mairong en kaping o kasokasoia duen a wiawia kan ki peren!  
 23 Me kin mi pon madau o dake sop akan, o me kin netinet pon pil kalaimun akan,  
 24 Irail pukat kin kilekilang wiawian Ieowa kan, o a manaman akan nan madau.  
 25 A kotin masan eta, melimel ap wiawai, me kin kalaudela iluk kan.  
 26 Re kin koda ileile o kodi loledi, likamata kaped arail pei pasan ni ar masak.  
 27 Re rarauk sili dueta me sakaular, o ar lolekong karos pan sorede.  
 28 Rap weriwer wong Ieowa ni ar apwal akan, i ap kotin dore ir ala sang katoutou parail.  
 29 A kotin kawuki ong mole melimel, iluk kan ap moledi.  
 30 Rap peren kida, ma re pan moledi, o a kotin kalua ir nan kapitau me re inong iong.

31 Ren kapinga Ieowa, pweki a kalangan, o pweki a dodok manaman ong aramas akan.  
 32 O ren kapinga i nan pokon en aramas, o ren kapinga i nan momod en saumas akan.  
 33 A kotin kawuki ong sap tan pilap akan, o utun pil akan ong sap madekong.  
 34 O sap kaselel eu wiala sap tan en sol, pweki dip en me kaukauson wasa o.  
 35 A kotin kawuki ong len pil sap tan, o sap sued ong utun pil.  
 36 O a kotin mueid ong me men mangadar akan, en kaukauson wasa o, o re wiadar deu arail.  
 37 O re kin wia sapesap o padukedi mat en wain, me kin wa ni a ansau.  
 38 O a kotin kamau irail la, rap kin totolar, o a kotin kangederela arail man akan.  
 39 O irail malaulaular o namenok kilar me sued, o sapai o luet akan.  
 40 A kotin wudokidi ong saupeidi kan namenok, o mueid ong ir, ren sansalong sili nan sap tan, wasa me sota al mia ia.  
 41 O a kotin pokada me samama o sang ni a luet, o katotolar kadaudok a dueta pwin akai.  
 42 Me melel akan pan kilang, ap peren kida, o sapung kan karos pan kaku pena au arail.  
 43 Me lolekong kan pan kasampwale ki mepukat, o re pan dedeki kalangan en Ieowa.

## 108

1 MAING Kot, mongiong i kin moleilei; i men kakaul o kakauleki psalm akan, o pil ngen i.  
 2 Koma arp o laute pirida! I pan paurida nin soran.  
 3 I pan kapinga komui nan pung en kainok kan, Maing Ieowa, o i pan kaule kin komui nan pung en aramas akan.  
 4 Pwe omui kalangan me laud, ileila sang nanlang, o omui melel lelada wong tapok kan.  
 5 Re kotida ponangin nanlang, Maing Kot, o omui lingan en kipadi sappa.  
 6 Pwe kompoke pamui kan en saladokala; kom kotin sauasaki pali maun ar, o kotin ereki kit.  
 7 Kot kotin masanier nan sapwilim a mol sarau, i me i peren kida; i pan nek pasang Sikem o sosong sap Sukot.  
 8 Kilead o Manase iei sap ai; ngai kin kaunda Epraim; a Iuda iei ai sokon.  
 9 Moap iei ai dal en dudu; i kin tiakedi Edom; i pan ngisingisiki men Pilista.  
 10 Is me pan kalua ia nan kanim tengeteng eu? Is me pan iang ia lel Edom?

- 11 Kaidin komui ai Kot? Komui me kase kit ala, o sota iang at karis akan. Maing Kot.  
 12 Kom kotin ieiang kit ni at apwal akan, pwe en aramas ar sauasa sota katepa.  
 13 Iangaki at Kot kit pan kapwaiada dodok manaman akan. A pan kotin tiakedi at imwintiti kan.

## 109

- 1 MAING Kot, me i kin kapikapinga, kom der kotin sapaimokid!  
 2 Pwe au en me doo sang Kot, o me kin kотаue sara dong ia, re lokelokaia ong ia ki lo likam;  
 3 Re lokaia sued ong ia wasa karos, o pei ong ia ni so karepa.  
 4 Ni ai pok ong ir, re kin imwintiti ong ia; a ngai kin poten kapakap.  
 5 Irail depukki ai me mau me sued, o re kin tata kin ia ni ai pok ong ir.  
 6 Kotin kasapwiladang i me doo sang Kot amen, pwen a saunkapung o me palian i, en mi ni pali maun a.  
 7 Ma a pan pakasau, a pan pakadeikada, o pil a kapakap en kadipala i.  
 8 A ran akan en malaulaula, o a koa en ko ong amen.  
 9 Na seri kan en sapoupou, o a paud en li odi amen.  
 10 Na seri kan en sansarwaru sili o wia pekipoek, o ren rapaki kan ar manga, doo sang nan moan im arail.  
 11 Me norok moni en pitia sang i a meakaros, o men wai en kulia sang i a dipisou kan.  
 12 O sota me pan kadek ong i, o sota me pan sauasa na sapoupou kan.  
 13 Kadaudok a en kokoka sang; o mar arail en niki sang nin di kaieu.  
 14 Sapung en sam a ko en sansal mon Ieowa, o dip en in a ender lapwada.  
 15 Ieowa en kotin masamasan irail ansau karos, o kataman parail en niki sang nin sappa.  
 16 Pweki a sota man kadek, pwe a pakipaki me luet o samama, o me insensued, pwen kamela i.  
 17 O a inong iong en riala; ari, en lel ong! O a sota insenoki kapai, ari, en doo sang i!  
 18 A kapwateki me sued dueta a likau, ari, me sued en kolong lole dueta pil o nan kokon akan dueta le.  
 19 Me sued en rasong a likau pup, me a kin likauwiada, o rasong men pirapir me a kin pirapireki.  
 20 Iduen Ieowa pan kotin pwain ong me palian ia, o me kin lokaia sued duen ngai. <sup>21</sup> A komui, Maing Ieowa ai Kot kotin wiawia ia, pweki mar

omui; pwe omui kalangan kasampwal, dore ia la!

- 22 Pwe ngai me luet o samama, o nan mongiong i olar.  
 23 Ikin tangwei dueta mota, o i pan kamasak wei dueta mansiek amen.  
 24 Nä i kat lueke kilar kaisesol, o uduk ai tikitikilar;  
 25 O i wialar men lalau re 'rail; ni ar kilang ia, re kin dueduälok!  
 26 Maing Ieowa, ai Kot, kom kotin dore ia la duen omui kalangan!  
 27 Pwe ren asa, mepukat tapi sang ni lim omui, me komui Ieowa kotin wiadar mepukat.  
 28 Menda, ma re lalau, kom kotin kapai ia da. Ma re palian ia, ren namenokala, pwe sapwilim omui ladu en pereperen.  
 29 Re kotin wi ai ong ai imwintiti, ren likau kida namenok, o ren puriong nan me sued dueta likau pup.  
 30 I pan danke Ieowa melen ni au ai, o i pan kapinga i nan pung en me toto.  
 31 Pwe a kotikot ni pali maun en me samama, pwen dorela i sang ir, me kadeikada i, en kamela.

## 110

- 1 IEOWA kotin masani ong ai Kaun, mondi ong ni pali maun i, lao I pan wia kida om imwintiti utipan nä om.  
 2 Ieowa pan kotin kadarado sokon en wei omui sang nan Sion; kakaun nan pung en omui imwintiti kan.  
 3 Murin omui poedier, sapwilim omui kan pan pereperen, wia mairong ong komui ni ar kapwat sarau. Sapwilim omui seri kan pan ipwidi ong komui dueta poik en ni mansang.  
 4 Ieowa kotin kaula, o a sota pan kalula: Komui samero soutuk amen, duen al en Melkisedek.  
 5 Kaun o kotikot ni pali maun om a pan kamela nanmarki kan ni ran en a ongiong.  
 6 A pan kotin kaunda nan pung en men liki kan, a pan kadir kila kalep akan wasa karos, a kotin palang pasang tapwi en wei lapalap.  
 7 A pan nima sang pil ni kailan al, i me a pan sara kida.

## 111

- 1 I PAN kapinga Ieowa sang nan mongiong i nan pung en me lelapok kan o nan momodisou.  
 2 Meid laud wiawian Ieowa kan, ir me insenoki, pan dedeki due.  
 3 A wiawia kan me pung o lingan, o a pung pan duedueta kokolata.

- 4 A manaman akan men kataman eu. Ieowa me dir en mak o kalangan.  
 5 A kotin kamanga ir, me masak i, a kin kolekol sapwilim a inau kokolata.  
 6 A kotin kasansale ong sapwilim a aramas akan mana en a wiawia kan, pwen kotiki ong ir soso en men liki kan.  
 7 Dodok en lim a kan me melel o pung; sapwilim a masan kan karos me melel.  
 8 Re pan duedueta kokolata, o re wiaui er ni melel o pung.  
 9 A kotiki ong sapwilim a kan saunkamaur, o a kupureda, me a inau pan duedueta kokolata; mar a me sarau i o kalom.  
 10 Masak Ieowa iei tapin pan lolekong; irail meid pai, me kin wia due met, pwe a pai pan potopot eta.

### 112

- 1 MEID pai ol o me masak Ieowa, me kin peren kida a kusoned akan.  
 2 Kadaudok a pan kelail nan sap o; kainok en me melel akan pan pwaida.  
 3 Im a pan dir en dipisou melel; o a pung pan potopot eta.  
 4 Marain kin daka dang me melel akan nan wasa rotorot; a kin dir en mak o kalangan o pung.  
 5 Meid pai ol o me kalangan, o kin kisakisa wei; a pan pwaida ni ansaun kadeik.  
 6 Pwe a sota pan luetala kokolata; me pung amen iei men kataman soutuk eu.  
 7 A sota pan masak rong sued; mongiong i me kelail ni a kaproporeki Ieowa.  
 8 Mongiong i me kelail, a sota kin masak, lao a pan peren kida a imwintiti kan.  
 9 A kin kamoredi o kisakis ong me samama kan; a pung pan potopot eta; os a pan kokoda o indand mau.  
 10 Me doo sang Kot pan kilang ap makara kida; a pan teterokki ngi a kan ap soredi; inong en me doo sang Kot akan pan nikila.

### 113

- 1 KOMAIL ladun Ieowa kapinga mar en Ieowa!  
 2 Mar en Ieowa en pakapingala sang met o kokolata!  
 3 Mar en Ieowa en pakapingala sang wasan katipin a dakada ia lel wong wasa me a kin kirila ia!  
 4 Ieowa me ileila sang men liki kan karos, a lingan mi ponangin nanlang.  
 5 Is me rasong Ieowa atail Kot, me kotikot pon mol a ileile melel?  
 6 Me kotin irerong me titikik kan nanlang o nin sappa?  
 7 Me kotin kasapwilada me titikik o sang nan pwel par; o sang nan pwel me samama o,

- 8 Pwen kamondi i ren me lapalap akan, ren me lapalap en sapwilim a aramas akan;  
 9 Me kotin sauasa li dapwan men, pwen wiala en ol oko ar nono peren amen. Aleluia!

### 114

- 1 Ni ansau men Israel lipa sang Äkipten, kadaudok en Iakop sang nan wai,  
 2 I ansau men Iuda wiala sapwilim a sarau i kan, o men Israel sapwilim a wei.  
 3 Madau kilanger, ap tangwei, o Iordan pal pasanger;  
 4 Nana kan lusilus dueta sip ol, o dol akan dueta sippul akan.  
 5 Madau, da me koe tangweier ki? Koe Iordan, da me koe palki pasanger?  
 6 Komail nana kan, da me komail lusiluski dueta sip ol, o komail dol akan dueta sippul akan?  
 7 Sappa, koe en rerer mon Ieowa, mon Kot en Iakop,  
 8 Me kotin kawuki ong len pil paip o, o kantakai ong utun pil.

### 115

- 1 Kaidin kit Ieowa, kaidin kit, pwe mar omui, kom kotiki ong wai, pweki omui kalangan o melel!  
 2 Menda men liki kan en inda: Ia arail Kot?  
 3 Atail Kot kotikot nanlang, a kak kotin wia karos, me a kupura.  
 4 Arail dikedik en ani kan, me wia kidar silper de kold, iei dodok en pa en aramas.  
 5 Au arail mia, ap sasa lokaia, por en mas arail mia, ap sota kak kilang wasa;  
 6 Salong arail mia, ap sota rong wasa; tum arail mia, ap sota ned wasa;  
 7 Pa arail mia, ap sota kak koledi meakot; nä arail mia, ap sota kak alu; re sota kak lokaia ki kaping wor arail.  
 8 Me kin wiada pukot, me dueta irail, o pil karos, me kin liki irail.  
 9 A koe Israel, liki Ieowa; i sauas o pere parail.  
 10 Komail, kadaudok en Aron, liki Ieowa, i sauas o pere parail.  
 11 Komail, me kin masak Ieowa, liki Ieowa, i sauas o pere parail.  
 12 Ieowa kotin kupura kitail er; o a pan kotin kapai kitail la; a pan kotin kapaida kadaudok en Israel, kapaida kadaudok en Aron;  
 13 A pan kotin kapaida, me masak Ieowa, me titikik o me laud akan.  
 14 Ieowa en kotin kapai komail da kokolata, pein komail o noumail seri kan!  
 15 Komail me kapaidar ren Ieowa, me kotin kapikadar lang o sappa.



- 16 Lang me sapwilim en Ieowa, a sappa me a kotiki onger aramas akan.  
 17 Me melar akan solar pan kapinga Ieowa, pil karos, me kodi wasan kaporemén;  
 18 A kitail pan kapinga Ieowa sang met o kokolata. Aleluia!

## 116

- 1 I KIN pok ong Ieowa, pwe a kotin ereki ngil ai o ai ngidingid.  
 2 Pwe a kotin kapaiké dong ia karong a, i me i pan likwir wong i arain maur i.  
 3 Sal en mela sali ia dier, o kamasak en pased lel ong ia, i lel onger kalokok o mamauk.  
 4 I ap likwir wong mar en Ieowa: Maing Ieowa, kom kotin dorela maur i!  
 5 Ieowa me dir en mak o pung, o atail Kot me dir en kalangan.  
 6 Ieowa kin kotin apapwali me opampap akan; ngai luetalar, i ap kotin dore ia lar.  
 7 Ngen i pur ong om moleilei, pwe Ieowa kotin sauasa uk mau.  
 8 Pwe kom me kotin dorelar maur i sang nan mela, o por en mas ai sang sangesang, o ná i sang a pan krisedi.  
 9 I pan weweid mon Ieowa nan sap en me maur akan.  
 10 I liki, o i karepen ai padapadak; a i kin kalokok laud.  
 11 I indinda ni ai insensued: Aramas karos me likam!  
 12 I aduen i pan kak depuk ong Ieowa a kapai ia kan?  
 13 I pan ale dal en kamaur, o likwir ong mar en Ieowa.  
 14 I pan kapwai ong Ieowa ai inau sansal mon sapwilim a aramas akan karos.  
 15 Meid kasampwal ren Ieowa melan sapwilim a lelapok kan.  
 16 O Maing Ieowa, ngai sapwilim omui ladu men, ngai sapwilim omui ladu, nain omui lidu; kom kotin kamueit pasang ai sal akan.  
 17 I pan mairongki ong komui danke, o likwir ong mar en Ieowa.  
 18 I pan kapwai ong Ieowa ai inau sansal mon sapwilim a aramas akan karos,  
 19 Mon pera en tanpas omui im sarau, nan warong en Ierusalem. Aleluia!

## 117

- 1 MEN liki kan karos kapinga Ieowa! O kainok karos kapinga i!  
 2 Pwe a kalangan me sansal melel ong kitail, o melel en Ieowa pan potopot eta. Aleluia!

## 118

- 1 DANKE Ieowa, pwe i me mau, pwe a kalangan pan potopot eta.

- 2 Israel en indinda: A kalangan pan potopot eta.  
 3 Kadaudok en Aron en indinda: A kalangan pan potopot eta.  
 4 Me masak Kot akan en inda: A kalangan pan potopot eta.  
 5 Ni ai apwal akan i likwir wong Ieowa; Ieowa kotin mangi ia er o kotin kasone ia dier wasa saledok.  
 6 Ieowa kin kotin ieiang ia, i sota pan masak, da me aramas akan kak wiai ong ia?  
 7 Ieowa kin kotin ieiang ia nan pung en me sauasa ia, o i pan peren kida, me kailong kin ia.  
 8 Me mau, en liki Ieowa, sang kaproporeki aramas akan.  
 9 Me mau en liki Ieowa, sang kaproporeki saupeidi kan.  
 10 Men liki kan karos kapil ia penaer; a ni mar en Ieowa i kaloe ir edier.  
 11 Re kapil ia penaer wasa karos, a ni mar en Ieowa i pan kaloe irail edier.  
 12 Re kapil ia penaer dueta longlap akan, a re kunlar dueta kinsiniai nan tuka; ni mar en Ieowa i kaloe irail edier.  
 13 Re woki ia, pwe i en pupedi, a Ieowa kotin sauasa iaer.  
 14 Ieowa iei ai kel o ai kaul, o i me kotin wiala ai saunkamaur.  
 15 Kaul en kaperen o kamaur kin wiaui nan im en me pung kan, lim en Ieowa pali maun kin kapwaiada dodok manaman.  
 16 Pali maun en Ieowa me ileile, pali maun en Ieowa kin kapwaiada dodok manaman.  
 17 I sota pan mela, pwe memaur eta o padaki duen wiawian Ieowa.  
 18 Ieowa kotin kaloke ia laud, ap sota mueid ong, i en mela.  
 19 Komail ritingadang ia wanim en pung, pwe i wasa me i pan pedelong ia, pwen danke Ieowa.  
 20 Iet wanim en Ieowa, wasa me pung kan pan pedelong ia.  
 21 I danke komui, pwe kom kotin erekier ai kapakap o sauasa ia.  
 22 Takai o me pwin sause kaselar, wialar takain pukakaim.  
 23 Mepukat wiauier sang ren Ieowa, meid kapuriamui ni mas at!  
 24 Iet ran o, me Ieowa kotin wiadar, kitail en popul o peren kida i.  
 25 O Maing Ieowa, kom kotin sauasa! O Maing Ieowa, kom kotin kapwaiada!  
 26 Meid kapingan me kotido ni mar en Ieowa! Kit kapai komail da, me kisan toun tanpas en Ieowa.  
 27 Ieowa iei Kot, o i me kotin kamarain kitail er; saliedi men mairong ni os en pei sarau!

- 28 Komui ai Kot, o i pan danke komui; ai Kot, i pan kalinganada komui.  
 29 Danke leowa, pwe i me mau, pwe a kalangan pan potopot eta.

### 119

- 1 RE meid pai, me sota kin sapung ni al arail, me kin weweid ni kapung en leowa!  
 2 Re meid pai, me kin kolekol a kadede akan, me kin rapaki i sang nan mongiong arail!  
 3 Me sota kin wia me sued, a weweid nan a al akan.  
 4 Pein komui kotikidar sapwilim omui kusoned akan, pwe sen porisok kapwaiada.  
 5 O ma al ai kan inen wei, pwen kapwaiada omui kusoned akan,  
 6 I ap sota pan sarodi, ni ai pan apapwali sapwilim omui kusoned akan karos.  
 7 I danke komui sang nan mongiong i melel, pwe kom kotin padaki dong ia duen omui masan pung.  
 8 I pan kanai ong sapwilim omui kusoned akan, kom der likidmaliela.  
 9 I aduen, manakap amen pan kak weweid ni makelekel? Ma a pan wiawia duen ar masan akan.  
 10 I raparapa kin komui sang nan mongiong i; kom der kotin mueid ong, i en pup wei sang ni omui kusoned akan.  
 11 I kolekol omui masan nan mongiong i, pwe i ender wia dip ong komui.  
 12 Kaping en ko ong komui, Maing leowa! Kom kotin padaki dong ia omui kusoned akan.  
 13 I kasokasoi ki au ai duen kusoned en silang omui karos.  
 14 I kin peren kita al en omui kadede kan, dueta dipisou toto.  
 15 I pan madamadaua duen omui kusoned akan, o kanai ong omui al akan.  
 16 I kin peren kida omui kusoned akan, i sota pan monokela omui masan akan.  
 17 Kom kotin kamauaiada sapwilim omui ladu, pwe i en memaur eta; i ap pan kapwaiada omui masan o.  
 18 Kom kotin kapad pasang mas ai, pwe i en kilang manaman akan nan sapwilim omui kapung o.  
 19 Ngai men kairu men nin sappa; kom der kotin karir sang mo i omui kusoned akan.  
 20 Ngen i okilar ai inong iong omui kusoned akan ansau karos.  
 21 Kom kotin ongiongi me aklapalap o, me pan wuki wei sang omui kusoned akan, en riala.  
 22 Kom kotin katoror sang ia namenok o me sued; pwe i kin apapwali ar kadede kan.

- 23 Pil saupeidi kan kin momod pena, kaokao ad ai; sapwilim omui ladu kin madamadaua duen omui kusoned akan.  
 24 Melel, i kin peren kida omui kadede kan, pwe ir me sauas pa i.  
 25 Ngen i onon nan pwel; kamanga ia duen omui masan.  
 26 I potoan ong komui duen al ai kan, komui ap kotin mangi ia er; kotin padaki ong ia omui kusoned akan.  
 27 Kom kotin padaki ong ia duen al en sapwilim omui kusoned akan, i ap pan madamadaua duen ar manaman akan.  
 28 Mongiong i luet kilar ai insensued; kom kotin kamanga ia da duen ar masan.  
 29 Re kotin pera wei sang ia al en likam, o kotiki ong ia ar masan.  
 30 I piladar al en melel; i kin madamadaua duen omui kusoned.  
 31 I kin tengeti ong omui kadede kan; Maing leowa, kom der mueid ong, i en namenokala.  
 32 Ma kom pan kotin kamaitala mongiong i, i pan tang wei nan al en omui kusoned akan.  
 33 Maing leowa, kom kotin kawewe ong ia al en omui kusoned akan, pwe i en apapwali lao lel imwi.  
 34 Kotin padaki ong ia, pwe i en kolekol omui kapung o peiki ong sang nan mongiong i.  
 35 Kalua ia nan al en omui kusoned akan, pwe i kin peren kin irail.  
 36 Kainongiong mongiong i omui kadede kan, a der norok moni.  
 37 Pিরer wei mas ai, pwen der kilang me sued kot; a re kotin kakel ia da pon al omui.  
 38 Kolekol omui inau ong sapwilim omui ladu, pwe i en masak komui.  
 39 Kotiki sang ia namenok, me i suedeki; pwe omui kusoned akan me mau.  
 40 Kotin mangi, i kin inong iong ar masan akan; kakele kin ia omui pung.  
 41 Maing leowa, kom kotin maki ong ia, o kotin sauasa ia duen omui inau.  
 42 Pwe i en asa, sapeng ir, me mamale kin ia, pwe i kin liki omui masan.  
 43 O kom der kotiki sang au ai masan en omui melel; pwe i kaporoporeki omui kusoned akan.  
 44 I pan kolekol omui kapung o ansau karos kokolata.  
 45 I pan weweid ni peren, pwe i raparapaki omui kusoned akan ansau karos.  
 46 O i pan kasokasoi ong nanmarki kan duen omui kadede kan, ap sota namenok.  
 47 Pwe i kin peren kida omui kusoned akan, o i kin pok ong ir.  
 48 I kin pokadang pa i kat omui kusoned akan, me i pok ong, o i pan

- madamadaua duen omui kusoned akan.
- 49 Kotin tamanda sapwilim omui ladu, duen omui masan, me i kin kaporoporeki.
- 50 I me kin kamait ia la ni ai luet; omui ianu kan kin kakel ia da.
- 51 Me aklapalap akan kin mamale kin ia; ari so, i sota kin muei sang omui kapung o.
- 52 Maing Ieowa, ma i lamelame duen omui kusoned akan sang nin tapin sappa, i ap insenemau kila.
- 53 I makar kila me doo sang Kot akan, me kin muei sang sapwilim omui kapung o.
- 54 Omui kusoned akan, iei ai kaul en kaping nan ai im en kairu.
- 55 Maing Ieowa, ni pong i kin madamadaua duen mar omui, o peiki ong omui kapung.
- 56 Mepukat wiaui ong ia er, pweki ai peiki ong omui kusoned akan.
- 57 Maing Ieowa, iet pwais ai, en kolekol omui masan kan.
- 58 I kin ngidingid ong komui sang nan mongiong i; kom kotin maki ong ia duen omui inau o.
- 59 I kin madamadaua duen al ai, ap kainen wong omui kadede kan nã i kat.
- 60 I kin nantiong o sota pwapwand kolekol omui kusoned akan.
- 61 Pwin en me doo sang Kot akan kapil ia pena, ari so, i sota monokela omui kapung kan.
- 62 Ni ailep en pong i kin paura, pwen danke komui, pweki omui kusoned pung.
- 63 I kin waroki ong ir karos, me masak komui o ir, me apapwali omui kusoned akan.
- 64 Maing Ieowa, sappa direki omui kalangan; padaki ong ia omui kusoned akan.
- 65 Maing Ieowa, komui me kotin wiai ong sapwilim omui ladu kamau kan duen omui inau o.
- 66 Padaki ong ia tiak mau o lolekong, pwe i kin liki omui kusoned akan.
- 67 Mon ai aktikitikala, i kin sapsapung, a met i kin apapwali omui masan.
- 68 Komui me mau o kapunglol, kotin padaki dong ia sapwilim omui kusoned akan.
- 69 Me aklapalap akan kin kalikama ia; a ngai kin apapwali omui kusoned akan sang nan mongiong i.
- 70 Mongiong arail masul kila wi; a i kin peren kida omui kapung.
- 71 Meid mau ong ia omui kaopampap ia la, pwe i en padakki omui kusoned akan.
- 72 Kapung sang nan silang omui mau ong ia, sang kold o silper kid toto.
- 73 Lim omui kan kapik o wia ia dar, padaki ong ia, pwe i en asa omui kusoned akan.
- 74 Me kin masak komui, pan kilang ia, ap peren kida, pwe i auiaui omui masan.
- 75 Maing Ieowa, i asa, me omui kadeik kan me pung, o kom kotin kaopampap ia la ni omui melel.
- 76 Omui mak pan kamait ia la, duen me kom kotin inauki ong sapwilim omui ladu.
- 77 Kom kotin kupura ia, i ap pan memaur eta, pwe i kin peren kida omui kapung.
- 78 Me aklapalap akan en sarodi, pwe re sapung ong ia ni sokarepa; a ngai madamadaua duen omui kusoned akan.
- 79 Me masak komui, ren waroki ong ia, o me asa duen omui kadede kan.
- 80 Mongiong i en pung ni omui kusoned akan, pwe i ender sarodi.
- 81 Ngen i kin inong iong omui dore ia la, i auiaui omui masan.
- 82 Por en mas ai kin anane omui inau, kalelapok: Iad me kom pan kotin kamait ia la?
- 83 Pwe i luetalar rasong deun pil eu nan adiniai, i sota monokela omui kusoned akan.
- 84 Arai da, sapwilim omui ladu pan memaurada? Iad me kom pan kotin kadeikada ai imwintiti kan?
- 85 Me aklapalap akan weiradang ia por akai, irail me sota kin duki ong sapwilim omui kapung o.
- 86 Sapwilim omui kusoned akan karos me melel. Irail raparapa kin ia ni sota karepa; kom kotin sauasa ia!
- 87 Me ekis, re pan kame ia la sang nin sappa, a ngai sota muei sang omui kusoned akan.
- 88 Kamaur ia da duen omui kalangan, a ngai pan kolekol kadede en silang omui.
- 89 Maing Ieowa, omui masan pan potopot eta nanlang.
- 90 Omui melel kin sang eu kainok lel eu; komui me kotin kasonedier sappa o a pan mimieta.
- 91 Irail karos mimieta lao lel ran wet, duen omui kusoned akan, pwe karos kin upa komui.
- 92 Ma omui kapung sota pan kaperen pa i, i pan mela ni ai luet.
- 93 I sota pan monokela omui kusoned akan kokolata, pwe ir me komui kakela kin ia da.
- 94 Ngai sapwilim omui, kom kotin sauasa ia! Pwe i inong iong sapwilim omui kusoned akan.
- 95 Me doo sang Kot akan masamasan ia, pwen kame ia la; i kin apwali omui kadede kan.

- 96 I kilanger imwin meakaros, a sapwilim omui kusoned pan mimieta.
- 97 Ia wan ai pok ong sapwilim omui kapung! Nin ran karos i kin kasokaso due.
- 98 Kom kin kalolekong kin ia omui kusoned akan sang ai imwintiti kan, pwe irail pan ieiang ia kokolata.
- 99 Ngai lolekong sang ai saunpadak kan karos, pwe i kin madamadaua duen omui kadede kan.
- 100 Ngai lolekong sang me ma kan, pwe i kin apapwali sapwilim omui kusoned akan.
- 101 I sota mueid ong nã i, en weweid pon al sapung, pwe i en kolekol omui masan.
- 102 I sota wuki wei sang omui kusoned akan, pwe kom kotin padaki ong ia er.
- 103 Omui masan me iau sang onik nan au ai.
- 104 Omui kusoned akan kin kalelekong ia, i me i kin tatak al sapung karos.
- 105 Sapwilim omui masan me ser pan nã i, o kamarain pan al ai.
- 106 I kaukilar, me i pan kolekol omui kusoned pung kan, o i pan kapwaiada.
- 107 I insued melel; Maing Ieowa, re kotin kamaur ia da duen omui inau.
- 108 Maing Ieowa, kom kotin kupura kisakis en au ai, o kotin padaki ong ia omui kusoned akan.
- 109 I kin wewa maur i nan pa i kat; i sota monokela omui kapung.
- 110 Me doo sang Kot akan insensare ia, a i sota wuki wei sang omui kusoned akan.
- 111 Omui kadede kan iei ai soso soutuk, pwe re kaperenda mongiong i.
- 112 Mongiong i kin inong iong kapwaiada omui kusoned akan ansau karos kokolata.
- 113 I kin kailongi me lol riapot, o i kin pok ong omui kapung.
- 114 Komui ai kadauk o pere pa i, i kaporoporeki omui masan.
- 115 Komail me sued akan en muei sang ia! I men apapwali kusoned en ai Kot akan.
- 116 Sauasa ia duen omui inau, i ap pan memaur eta; o kom der kotin mueid ong, i en namenokala ni ai kaporopor.
- 117 Kamanga ia da, i ap pan kelailada, i ap pan apapwali omui kusoned akan ansau karos.
- 118 Kom kin kotin tiakedi karos, me pan wuki wei sang omui kusoned akan; pwe arail sapung me dir en likam.
- 119 Kom kin kotin kase sang sappa me doo sang Kot akan karos dueta samit; i me i kin pok ong ki omui kadede kan.
- 120 I kin masak komui, i me i kin muserereki, o i kin masak omui kadeik kan.
- 121 I kin apapwali me inen o pung; kom der kotin pang ia lang ren me kin wia sued ong ia.
- 122 Sauasa sapwilim omui ladu o kamaitala i; me aklapalap akan ender sued ong ia.
- 123 Por en mas ai inong iong omui kamaur ia, o omui inau pung.
- 124 Wia ong sapwilim omui ladu duen omui kalangan, o kotin padaki ong ia omui kusoned akan.
- 125 Ngai sapwilim omui ladu; kotin padaki ong ia, pwe i en dedeki sapwilim omui kadede kan.
- 126 Ansau leler, me Ieowa pan kotin wiawia; pwe irail kawela sapwilim omui kapung.
- 127 I me i kin pok ki ong sapwilim omui kusoned akan, sang kold o kold lingan.
- 128 I me i kin kasampwaleki sapwilim omui kusoned akan karos, i tata ki al en likam karos.
- 129 Omui kadede kan meid kapuriamui, i me mongiong, i apapwali kin ir.
- 130 Ma omui masan pan sansalada, a pan kareda peren o lolekong ong me opampap akan.
- 131 Au ai kin sar pasang o inong iong sapwilim omui kusoned akan; pwe i kin anane ir.
- 132 Kom kotin wukedoke dong ia, o maki ong ia, duen me kom kin wiai ong ir, me pok ong mar omui.
- 133 Kotin kainenela al ai nan sapwilim omui masan, o der mueid ong, me sued kot en wiawia ia.
- 134 Kotin dore ia la sang mor sued en aramas akan, a i ap pan kolekol omui kusoned akan.
- 135 Kotin kamarainiki omui ladu silang omui, o kotin padaki ong ia duen omui kusoned akan.
- 136 Por en mas ai me dir en pil, pweki ar sota peiki ong omui kapung.
- 137 Maing Ieowa, komui me kotin pung, o omui kusoned akan me pung.
- 138 Komui me kotiki ong kit er kadede pan omui pung o melel, pwe i en nantiong kapwaiada.
- 139 I insensued melel, koren iong mela, pweki ai imwintiti kan monokela omui masan akan.
- 140 Omui masan meid makelekel, o sapwilim omui ladu kin pok ong.
- 141 Ngai me tikitik o me mal amen, a i sota kin monokela omui kusoned akan.
- 142 Omui pung me pung soutuk eu, o omui kapung me melel.
- 143 Masak o apwal lel dong ia; omui kusoned akan ai peren.

144 Pung en sapwilim omui kadede kan me soutuk, padaki ong ia, i ap pan memaur eta.

145 I ngidingid sang nan mongiong i; Ieowa kom kotin mangi ia! I pan apapwali omui kusoned akan.

146 I likwir wong komui, kom kotin sauasa ia, a i ap pan kolekol omui kadede kan.

147 Nin soran i kodo o ngidingid; i auiaui omui masan.

148 I kin pirida ni ailep en pong, pwen madamadaua duen omui masan.

149 Erek ngil ai duen ar kalangan; Maing Ieowa, kamaur ia da duen omui kusoned akan.

150 Ai imwintiti sued akan koren iong ia, a re doo sang sapwilim omui kapung;

151 Maing Ieowa, komui me koren iong ia, o omui kusoned akan karos me melel.

152 I asa sang mas o, me komui kasonedier sapwilim omui kadede kan, pwen potopot eta.

153 Kom kotin irerong ai luet, o kamaio ia da! Pwe i sota monokela omui kapung.

154 Kotin apapwali ia, o dore ia la, o kamaur ia da duen omui inau.

155 Me doo sang Kot akan kin doo sang maur, pwe re sota kin isenoki omui kusoned akan.

156 Omui kalangan meid laud, Maing Ieowa; kom kotin kamaur ia da duen omui kusoned akan.

157 Me pakipaki ia, o palian ia me toto; ari so, i sota wuk wei sang omui kadede kan.

158 I kin kilekilang me mor sued akan, ap pokela, o i kin suedeki, pwe re sota kin peiki ong omui kusoned o.

159 Kotin masando, me i kin pok ong sapwilim omui kusoned akan; Maing Ieowa, kotin kakel ia da, duen omui kalangan.

160 Omui masan me dir en melel, o masan en omui kapung pan duedueta.

161 Saupeidi kan kin masamasan ia ni sokarepa; a mongiong i kin masak omui masan akan.

162 I kin peren kida omui inau dueta amen, me diadarar pai kasampwal eu.

163 I kailongki likam o suede kin irail, a i kin pok ong sapwilim omui kapung.

164 Pan ise pak i kin kapinga komui ni ran ta ieu, pweki kusoned en omui kapung kan.

165 Me kin pok ong sapwilim omui kapung, kin popol melel, re sota pan salongala.

166 Maing Ieowa, i kin auiaui omui kamaur, o i kin peiki ong sapwilim omui kusoned akan.

167 Mongiong i kin kolekol sapwilim omui kadede kan, o kin pok ong irail melel.

168 I kin kolekol sapwilim omui kusoned o kadede kan, pwe al ai kan karos me sansal mo 'mui.

169 Maing Ieowa, kotin mangi ai ngidingid, o kotin padaki ong ia duen omui masan.

170 Re kotin mangi ai kapakap, o dore ia la duen omui inau.

171 Komui lao padaki ong ia omui kusoned akan, kil en au ai ap pan kapinga komui.

172 Lo i pan kauleki duen omui masan, pwe omui kusoned akan karos me pung.

173 Lim omui en sauasa ia, pwe i piladar omui kusoned akan.

174 Maing Ieowa, i kin inong iong omui kamaur, o i kin peren kida omui kapung.

175 Kom kotin ieiang ngen i, pwen memaur eta ap kapinga komui, o lim omui pali maun en sauasa ia.

176 Ngai ras ong sip amen me sansalong sili o salongala; kom kotin rapaki sapwilim omui ladu, pwe i sota monokela omui kusoned akan.

## 120

1 NI ai apwal akan i likwir wong Ieowa, a ap kotin mangi ia.

2 Maing Ieowa, kotin dore ia la, sang au en me kin likam, o lo en kotaue.

3 Da me lo likam kak wiai ong uk, o da me a kak kapwaiada?

4 A rasong kanangan kasik katieu kong kan ren me kelail amen, dueta kisiniai nan alek.

5 Meid apwal ong ia, ai kairu nan Mesek, o ai kauson impan im en men Kedar!

6 Meid warai ong ai kaukauson ren aramas akan me kin tataki mui mau.

7 I inong iong mui mau, a ni ai pan lokaia, re kin mauki mauin.

## 121

1 I SARADANG nana kan, wasa sauas pa i pan pwarado sang ia.

2 Sauas pa i pan pwarado sang ren Ieowa, me kotin kapikadar lang o sappa.

3 A sota pan kotin mui ong na om, en krisedi; o me kin sinsila uk, sota kin saimokala.

4 Kilang, sile pan Israel sota kin saimok de saimok kalik.

5 Ieowa iei sile pa om, Ieowa iei motan pa om pali maun.

6 Katipin sota pan dakar uk nin ran de maram ni pong.

7 Ieowa pan kotin pera wei sang uk song en sued karos, a pan kotin sinsila ngen om.

<sup>8</sup> Ieowa pan kotin sinsila uk ni om pedoi o pedelong, sang met o kokolata.

## 122

- <sup>1</sup> I PEREN kida ar indai ong ia: Kitail en kolang nan tanpas en Ieowa!  
<sup>2</sup> Nā at akan pan mi ni wanim en kel en Ierusalem.  
<sup>3</sup> Ierusalem kanim eu me kakaudar, pwen kanim kelaileu.  
<sup>4</sup> Wasa me kainok kan kin momaitala ia, kainok en Ieowa kan, saunkadede en Israel, pwen kapinga mar en Ieowa.  
<sup>5</sup> Pwe i wasa me mol en kadeik mi ia, mol en kadaudok en Dawid.  
<sup>6</sup> Poeki ong Ierusalem a pai kan! Me kin pok ong uk, en paida!  
<sup>7</sup> Muei mau en mi ni om kel, o pai nan om im akan!  
<sup>8</sup> I pan kapakapa kin uk pweki ri ai o kom-poke pai kan.  
<sup>9</sup> I pan rapaki ong uk me mau melel, pweki tanpas en Ieowa at Kot.

## 123

- <sup>1</sup> I KIN sarada wong komui, me kotikot nanlang.  
<sup>2</sup> Kilang, duen mas en ladu kan kin kilekilang lim en ar saumas akan, o duen mas en lidu kan kin kilekilang a saumas li, iduen mas at kin ariri Ieowa at Kot, a lao kotin maki ong kit.  
<sup>3</sup> Maing Ieowa, kom kotin maki ong, kotin maki ong kit! Pwe kit me dir en namenok.  
<sup>4</sup> Moniong i toutouki en me sued akan ar mamale kin kit o en me aklapalap akan ar kanamenok kin kit.

## 124

- <sup>1</sup> ISRAEL en inda: Ma Ieowa sota pan kotin ieiang kit,  
<sup>2</sup> Ma Ieowa sota pan kotin ieiang kit, ni en aramas akan ar palian kit,  
<sup>3</sup> Re pan katale kit ala ni at memaur, ni ar lingaranger kin kit.  
<sup>4</sup> Pil akan ap pan kamop kit ala, pilap akan kadupwaledi ngen it.  
<sup>5</sup> Pil akan itida melel lao kadupwaledi ngen it.  
<sup>6</sup> Kaping ong Ieowa, me sota mueid ong, ngi arail en ter kit pasang!  
<sup>7</sup> Ngen it piti sang insar en sauninsar dueta manpir amen; insar ola, a kit pitila.  
<sup>8</sup> Sauas pat iei mar en Ieowa, me kotin kapikadar lang o sappa.

## 125

- <sup>1</sup> Me liki Ieowa kin rasong dol Sion, me sota kin mokid, a pan potopot eta.

- <sup>2</sup> Duen dol akan kin kapil pena Ierusalem, iduen Ieowa kin kotikot ren sapwilim a aramas akan, sang met o kokolata.  
<sup>3</sup> Pwe sokon en me doo sang Kot akan sota pan mimieta ren kisin pwin en me pung kan, pwe me pung kan ender kapa wong pa ar kan nin sapung.  
<sup>4</sup> Maing Ieowa, kotin kasansaleda omui kalangan ong me mau kan o ong ir, me melel nan mongiong arail.  
<sup>5</sup> A me kin wuki wong ni al sapung, Ieowa pan kotin paki irail wei iangaki me sued akan. Israel en popol!

## 126

- <sup>1</sup> NI ansau Ieowa kotin kapuredor me salidi en Israel akan, kit rasong ir, me aurasmen.  
<sup>2</sup> I ansau au at me dir en kaurur, o lo at me dir en ngisingis. I ansau men iki kan ap inda: Meid laud dodok en Ieowa re 'rail!  
<sup>3</sup> Melel, dodok en Ieowa meid laud ong kit er, o i me se kin peren kida.  
<sup>4</sup> Maing Ieowa, re kotin kapuredo at salidi kan dueta pilap en sap en pali air akan.  
<sup>5</sup> Me kamore kidi pil en mas arail, pan dolung ni peren.  
<sup>6</sup> Re kin weweidki sangesang, o kin wewa wa kasampwal, a ni ar puredo, re pan peren, wado ar kap en wa kan.

## 127

- <sup>1</sup> MA Ieowa sota pan kauada im o, dodok en pwin sause sota pan katepa; ma Ieowa sota pan sinsila kanim o, saunmasamasan pan masamasan mal.  
<sup>2</sup> Sota katepa ong komail, ma komail pan paura nin soran, ap pil pward kamol ni pong, o toutouki okotme, ni omail mangamanga, pwe a kin kakepwapwala sapwilim a kompokepa kan ni ar mamair.  
<sup>3</sup> Kilang, seri ko iei kisakis eu sang ren Ieowa, o wan aramas pai eu.  
<sup>4</sup> Duen kanangan kasik katieu nan pa en ol komad amen, iduen putak ko ar pan pwaida.  
<sup>5</sup> Meid pai ol o, me a lepan me direki mepukat! Re sota pan sarodi, ni ar kapung pena ren ar imwintiti kan.

## 128

- <sup>1</sup> MEID pai karos, me kin masak Ieowa, me kin weweid nan sapwilim a al akan!  
<sup>2</sup> Pwe koe pan memaureki dodok en pa om akan, koe meid pai o pwaida mau.  
<sup>3</sup> Om paud pan rasong tuka en wain pot, me wa mau nan im om, o noum seri kan pan dueta paini, me kapwata om tepel.

- <sup>4</sup> Kilang, iduen ol o, me masak Ieowa, a pan pwaida.  
<sup>5</sup> Ieowa pan kapai uk ada sang nan Sion, pwe koe en kilang pai en Jerusalem arain om maur.  
<sup>6</sup> O koe pan kilang seri eu noum seri ko. Israel en popol!

### 129

- <sup>1</sup> ISRAEL en inda: Re katoutou ia melel sang ni ai tikitik lel met pak toto.  
<sup>2</sup> Pan pak toto re katoutou ia melel sang ni ai tikitik lel met; ari so, re sota kak kaloe ia di.  
<sup>3</sup> Men sapa sap weirada pon tinsau ai, wiadar warawar reirei.  
<sup>4</sup> A Ieowa me pung, a kotin lepuh pasangersal en me doo sang Kot akan.  
<sup>5</sup> Karos me kin tatakhi Sion, en sarodi o tangwei!  
<sup>6</sup> Ren rasong rä pon os en im o, me kin mong pena mon a pan ususda!  
<sup>7</sup> Me sota kin kadirela kumut en pa en saundolung, de pa en me kin pir pena kap akan.  
<sup>8</sup> Pwe me kin daulul wasa o, ren der inda: Kot en kotin kupura maui komail! Kit kapai komail da ni mar en Ieowa!

### 130

- <sup>1</sup> MAING Ieowa, i kin likwirda wong komui sang nan wasa lol.  
<sup>2</sup> Maing, kotin ereki ngil ai! Karong omui en mamangi ai ngidingid!  
<sup>3</sup> Ma komui Ieowa, pan kotin kapokonki ong aramas dip akan, Maing, is me ap pan kak kasinenda mo 'mui?  
<sup>4</sup> A komui kin kotin mak, pwe aramas en masak komui.  
<sup>5</sup> I kin auiaui Ieowa, ngen i kin auiaui, o i kin auiaui a inau.  
<sup>6</sup> Ngen i kin auiaui Kaun o, sang saunmasamasan kin auiaui mansang, saunmasamasan kin auiaui mansang.  
<sup>7</sup> Israel auiaui Ieowa, pwe Ieowa me kalan-gan, o wasa en kamaio mi re a;  
<sup>8</sup> A pan kotin dorela Israel sang dip a kan karos.

### 131

- <sup>1</sup> MAING Ieowa, mongiong i sota aklapalap, o por en mas ai sota aklapalap; i sota kin inong iong dodok, me i sota itar ong.  
<sup>2</sup> Melel, i kamoleileilar mongiong i dueta kisin seri me mui sang didi en a nono; duen seri me mui sang didi en a nono, iduen mongiong i moleileilar.  
<sup>3</sup> Israel, auiaui Ieowa sang met o kokolata!

### 132

- <sup>1</sup> MAING Ieowa, kom kotin tamanda Dawid o a apwal akan karos,  
<sup>2</sup> Me kauki ong Ieowa, o a inauki ong Kot manaman en Iakop:  
<sup>3</sup> I sota pan pedelong ong nan im ai, o i sota pan wendi pon los,  
<sup>4</sup> I sota pan mueid ong mas ai en mair, de por en mas ai, en mair pena,  
<sup>5</sup> Lao i pan diar ekis wasa ong Ieowa, wasan tanpas en Kot manaman en Iakop.  
<sup>6</sup> Melel, se ronger duen i nan Eprata; se diaradar i nan sap en Iaar.  
<sup>7</sup> Se pan pedelong ong nan tanpas a o kau-dok ni utipa.  
<sup>8</sup> Kotida, Maing Ieowa, koti dong omui kamol, komui o kopan omui manaman!  
<sup>9</sup> Sapwilim omui samero kan en likau kida pung, o sapwilim omui me sarau kan en pereperen.  
<sup>10</sup> Re der sopwei sang mas en sapwilim omui me keidier, pweki Dawid sapwilim omui ladu.  
<sup>11</sup> Ieowa kotin kaula ong Dawid kaula melel eu, o a sota pan kawukila: I pan kasapwiladang mol om kisan kadaudok om.  
<sup>12</sup> Ma noum seri ko pan kolekol ai inau, o ai kusoned akan, me I pan kawewe ong irail, nairail seri ko ap pil pan mondi pon mol om kokolata.  
<sup>13</sup> Melel Ieowa kotin pilada Sion, o a kotin men kotikot wasa o.  
<sup>14</sup> Iet wasan ai kamol kokolata; wata et, me I pan kaukauson ia, pwe wasa et I kin mauki.  
<sup>15</sup> I pan kapaiada kan a manga, o pan ki ong me samama re 'rail prot toto.  
<sup>16</sup> O I pan kalikauwi kida maur arail, samero kan, o me lelapok re 'rail pan ngisingis laud.  
<sup>17</sup> I wasa mana en Dawid pan pwaida mau, I kaonopadang nai, me keidier, marain eu.  
<sup>18</sup> I pan kalikauwi kida namenok a imwintiti kan a kapwat en nanmarki pan mi pon monga.

### 133

- <sup>1</sup> KILANG, meid kaselel, ma pirien eu kauson pena ni limpok!  
<sup>2</sup> A dueta le pon kadokenmai, me kin kerekereidi nan alis en Aron, me kin kerekereidi ni imwin a likau;  
<sup>3</sup> Dueta poik en Ermon, me kin moredi pon dol en Sion kan, pwe i wasa, me Ieowa pan kotin kapaiada o kamaurada kokolata.

**134**

- <sup>1</sup> KILANG, kapinga Ieowa komail ladun Ieowa karos, me kin mi nan tanpas en Ieowa ni pong kan!  
<sup>2</sup> Komail pokada pa omail nan pera sarau i kapinga Ieowa!  
<sup>3</sup> Ieowa kotin kapai uk ada sang nan Sion, i me kotin kapikadar lang o sappa.

**135**

- <sup>1</sup> KAPINGA mar en Ieowa, papan Ieowa, komail kapinga!  
<sup>2</sup> Komail me mi nan tanpas en Ieowa, nan pera moa en tanpas en atail Kot.  
<sup>3</sup> Kapinga Ieowa, pwe Ieowa me kalangan; kauleki mar a, pwe i me mau.  
<sup>4</sup> Pwe Ieowa kotin piladar Iakop, o Israel, pwen sapwilim a.  
<sup>5</sup> Pwe i asa, Ieowa meid lapalap, o atail Kot me lapa sang kot akan karos.  
<sup>6</sup> Karos me Ieowa kotin kupura, a kin wiada nanlang o pil ni sappa, nan madau o pased.  
<sup>7</sup> A kin kotin wiai ong tapok kan, ren dauda sang ni imwin sappa, me kin kotin wiada liol o pil katau, me kin kotin kadarala kisiniang sang nan a pera kan.  
<sup>8</sup> A kotin kamelar meseni kan nan Äkipten karos ren aramas o man akan.  
<sup>9</sup> O kotikidang uk, Äkipten, kilel o manaman akan, ong Parao o na ladu kan karos.  
<sup>10</sup> Me kotin kaloedi wein men liki kalaimun akan o kamelar nanmarki kelail akan.  
<sup>11</sup> Siion, nanmarki en Amon, o Ok, nanmarki en Pasan, o wei en Kanaan karos.  
<sup>12</sup> O kotiki ong sapwilim a men Israel sap arail, pwe ren sosoki.  
<sup>13</sup> Ieowa, mar omui pan potopot eta; Maing Ieowa, kataman pa omui pan sang eu kainok lel eu.  
<sup>14</sup> Pwe Ieowa pan kotin kapung sapwilim a aramas akan, o a pan kotin maki ong sapwilim a ladu kan.  
<sup>15</sup> Dikedik en ani mal en men liki kan wiaui kida silper o kold, me pa en aramas wiadar.  
<sup>16</sup> Au arail mia, ap sasa lokaia, por en mas arail mia, ap sota kak kilang wasa;  
<sup>17</sup> Salong arail mia, ap sota kak rong wasa, pil sota ang mi nan au ar.  
<sup>18</sup> Me kin wiada pukat me dueta irail, o pil karos, me kin liki irail.  
<sup>19</sup> Kadaudok en Israel en kapinga Ieowa! Kadaudok en Aron en kapinga Ieowa.  
<sup>20</sup> Kadaudok en Lewi en kapinga Ieowa! Komail me masak Ieowa, en kapinga Ieowa!

- <sup>21</sup> Kaping ong Ieowa sang nan Sion, me kotikot Jerusalem! Aleluia!

**136**

- <sup>1</sup> DANKE Ieowa, pwe i me mau, pwe a kalangan pan potopot eta.  
<sup>2</sup> Danke ong Kot en kot akan, pwe a kalangan pan potopot eta.  
<sup>3</sup> Danke ong Kaun en kaun akan, pwe a kalangan pan potopot eta,  
<sup>4</sup> Pwe i ta me kin wiada manaman akan, pwe a kalangan pan potopot eta,  
<sup>5</sup> Me kotin wiadar lang akan ni a erpit, pwe a kalangan pan potopot eta,  
<sup>6</sup> Me kotin pak pasanger sappa pon pil, pwe a kalangan pan potopot eta,  
<sup>7</sup> Me kotin wiadar marain laud akan, pwe a kalangan pan potopot eta,  
<sup>8</sup> Pwe katipin en kaunda ran, pwe a kalangan pan potopot eta;  
<sup>9</sup> Saunipong o usu kan en kaunda pong, pwe a kalangan pan potopot eta,  
<sup>10</sup> Me kotin kaloedi Äkipten, ni a kamelar ar meseni kan, pwe a kalangan pan potopot eta.  
<sup>11</sup> O kotin kalua Israel sang wasa o, pwe a kalangan pan potopot eta,  
<sup>12</sup> Ki lim a manaman o, ni a kotin kapa wei lim a, pwe a kalangan pan potopot eta,  
<sup>13</sup> Me palang pasang sed waitata, wia pali ria pali, pwe a kalangan pan potopot eta,  
<sup>14</sup> O mueid ong Israel, en kotela nan warong a, pwe a kalangan pan potopot eta,  
<sup>15</sup> Me kotin kasedi ong nan sed waitata Parao o na karis akan, pwe a kalangan pan potopot eta,  
<sup>16</sup> Me kotin kalua sapwilim a aramas akan nan sap tan, pwe a kalangan pan potopot eta,  
<sup>17</sup> Me kotin kamelar nanmarki lapalap akan, pwe a kalangan pan potopot eta.  
<sup>18</sup> O kotin kamelar nanmarki kelail kan, pwe a kalangan pan potopot eta,  
<sup>19</sup> Siion, nanmarki en Amon, pwe a kalangan pan potopot eta,  
<sup>20</sup> Ok, nanmarki en Pasan, pwe a kalangan pan potopot eta,  
<sup>21</sup> O wiakila sap arail men soso, pwe a kalangan pan potopot eta,  
<sup>22</sup> Soso en sapwilim a ladu Israel, pwe a kalangan pan potopot eta,  
<sup>23</sup> Pwe a kotin kupura kit ni at kankangeranger, pwe a kalangan pan potopot eta,  
<sup>24</sup> O kotin dore kitail la sang atail imwintiti kan, pwe a kalangan ngan pan potopot eta,  
<sup>25</sup> Me kotin kamanga me maur akan karos, pwe a kalangan pan potopot eta,



<sup>26</sup> Danke ong Kot en nanlang, pwe a kalangan pan potopot eta.

### 137

- <sup>1</sup> KIT momoder ni kailan pilap en Papel akan o sangesang, ni at tamanda Sion.
- <sup>2</sup> Kit langadar at arp akan nin tuka kan, me mi wasa o,
- <sup>3</sup> Pwe me sali kit edi inda, sen kaul, o sen pereperen ni at mamaiei: Komail wiaia ong kit kaul apot duen Sion.
- <sup>4</sup> Iaduen at pan kak wiada kaul ong Ieowa nan sap en men wai?
- <sup>5</sup> Ma i pan monoke uk ala Ierusalem, pa i pali maun ap pil pan monokinokla.
- <sup>6</sup> Lo i pan pas ong pan ngatang ai, ma i solar pan taman uk adar, ma i solar pan peren kida Ierusalem mon meakaros.
- <sup>7</sup> Maing Ieowa, kom kotin tamanda en men Edom ar lokolokaia ni ran apwal en Ierusalem: Kawela, kawela lao lel ong nan pwel!
- <sup>8</sup> Toun Papel, moursud koe, re meid pai, me pan wiaia ong uk duen me koe wiadar!
- <sup>9</sup> Meid pai ir, me pan koleli noum seri pwelel o kasuk pasang nin takai!

### 138

- <sup>1</sup> I KAPINGA komui sang nan mongiong i, i pan kakaule kin komui mon dikedik en ani kan.
- <sup>2</sup> I pan kakaudok inen wong sapwilim omui im en kaudok sarau, o kapinga mar omui, pweki omui kalangan o melel, pwe kom kotin kalinganada mar omui sang meakaros ki omui masan.
- <sup>3</sup> Ni ai likwir wong komui, komui ap kotin mangi ia, o kom kamanada mongiong i melel.
- <sup>4</sup> Maing Ieowa, nanmarki en sappa karos pan kapinga komui, ni ar pan rong masan en silang ir,
- <sup>5</sup> O re pan kauleki al en Ieowa kan, pwe lingan en Ieowa meid laud.
- <sup>6</sup> Pwe Ieowa me lapalap ap kotin irerong me titikit kan, o a kotin mangi me aklapalap, sang ni wasa doo.
- <sup>7</sup> Ni ai weweid nan kamasak melel, kom kin kotin kolekol ong ia maur i, o kom kin kapa wong lim omui pan makar en ai imwintiti kan, o kom sauasa ia da ki lim omui maun.
- <sup>8</sup> Ieowa pan kotin wiawia ia. Maing Ieowa, omui kalangan me pan potopot eta; Kom der kotin muei sang dodok en lim omui kan.

### 139

- <sup>1</sup> MAING, Ieowa, kom kotin kadiarokada lol i, ap kotin mangi ia.
- <sup>2</sup> Kom pil kotin mangi ma i momod de uda, ap kotin mangi ai lamelam ni ar kotin doo sang ia.
- <sup>3</sup> Ir me kotin kupura ia ni ai potopot sili, o ni ai wonon, ap kotin mangi ai tiak kan karos.
- <sup>4</sup> Melel Maing Ieowa, sota ai poto sang ni lo i, me kom sota kotin mangi.
- <sup>5</sup> Kom kin kotin ieiang ia wasa karos, o kom kin kapado lim omui po i.
- <sup>6</sup> Mepukat meid kapuriamui ong ia, meid apwal, i sota kak dedeki.
- <sup>7</sup> Ia wasa, i pan kak ko sang mon ngen ar ia? O ia wasa, i pan kak piti sang silang ar ia?
- <sup>8</sup> Ma i piridala nanlang, kom kotikot wasa o, o ma i onop ong wendi nan wasan mela, kom pil kotikot ia.
- <sup>9</sup> Ma i ale pan pir en umpul en katipin, ap mimieta ni kailan madau,
- <sup>10</sup> Lim ar pil pan kare ia wasa o, o lim ar maun pan kolekol ia.
- <sup>11</sup> Ma i pan inda: Rotorot en kadupwal ia di, pong ap pil pan marainla imp ai.
- <sup>12</sup> Pwe rotorot so kin rotorot mo omui, o pong kin marain dueta nin ran, rotorot kin dueta marain.
- <sup>13</sup> Pwe kom me kotin wiadar mudilik i, o kom kotin wia ia da nan kaped en in ai.
- <sup>14</sup> I danke komui, duen kapuriamui en ai wiaui ia da, meid kapuriamui sapwilim ar dodok kan, ngen i pil dedeki melel mepukat.
- <sup>15</sup> Kokon ai kan me sansal ong komui ni ai wiauier wasa rir, ni ai wiauier wasa lol en sappa.
- <sup>16</sup> Silang ir mangi ia ni ai saikenta wiauier, o ran karos me kokodo, ap saikenta mia, me kileledier nan sapwilim omui puk o.
- <sup>17</sup> Maing Kot, meid kasampwal ong ia duen meakan karos, me komui kin kupukupura!
- <sup>18</sup> Ma i pan wadok ir, i sota pan kak ong, pwe re me toto sang pik en oror, ni ai pirida, i kin mimieta re omui.
- <sup>19</sup> O Maing Kot, kom sota men kamela me doo sang Kot akan; o me kin inong iong nta, en muei sang ia!
- <sup>20</sup> Pwe re kin lokaia sued duen komui, o sapwilim omui imwintiti kan kin kangudi ni sokarepa.
- <sup>21</sup> I kin kailongki, Maing Ieowa, me kin kailongki komui, o i suedeki ar palian komui.
- <sup>22</sup> I kin kailong kin ir melel, re wialar ai imwintiti.

- 23 Maing Kot, kom kotin kasau ia, o mangi duen mongiong i, kotin rapaki duen me i kin lamelame.  
 24 O kom kotin masani, ma i mi pon al sued, o kotin kalua ia pon al soutuk.

### 140

- 1 MAING Ieowa kom kotin dore ia la sang aramas sued akan; pera sang ia aramas morsued akan.  
 2 Me lamelame sued nan mongiong arail, o kareda pei nin ran karos.  
 3 Irail kin ada lo arail dueta serpent; poisen en serpent ni pan lo arail. Sela.  
 4 Pera wei sang ia pa en me doo sang Kot akan, o aramas morsued akan, me kin madamadua duen ar pan kawe ia la.  
 5 Me aklapalap akan kin rir insare ia, o uk pot, me re wiai ong ia liman al o; o song, en men kol ia di, me re wiadar. Sela.  
 6 A ngai indang Ieowa: Komui ai Kot; kom kotin ereki ai ngidingid, Maing Ieowa!  
 7 Ieowa Kaun, iei sauas pa i kelail; ni ansau en pei komui peraer mong ai.  
 8 Maing Ieowa, kom der kotin mueid ong me doo sang Kot akan ar inong; o der kotin kapwaiada insen ar, pwe re de aklapalapala. Sela.  
 9 Me sued kot, me ai imwintiti kaonopadang ia en sapal wong pein irail.  
 10 Kisiniai en moredi ong po 'rail; A en kotin kase irail di nan kisiniai, nan lapake, pwe ren solar pitila.  
 11 Me lo a sued, ender pwaida nan sap o, ol morsued, me sued en pakipaki i, lao a pan pupedi.  
 12 I asa, me Ieowa pan kotin apapwali me luet akan, o sauas pung en me samama kan.  
 13 Melel, me pung kan pan kapinga mar omui, me melel akan pan mimieta mon silang ar.

### 141

- 1 MAING Ieowa, i kin likwir wong komui, kom kotin madang dong ia; kom kotin ereki ngil ai, ni ai pan likwir wong komui.  
 2 Kom kotin kasampwaleki ai kapakap dueta mairong isis; o pokadan pa i kat dueta mairong eu ni sautik.  
 3 Maing Ieowa, kom kotin sinsila au ai, o pera kil en au ai.  
 4 O der kotin kainong ong me sued kot mongiong i, pwe i ender iang me doo sang Kot akan wiada me sued, o i ender iang ir kangkang, me re kin iauki.  
 5 Me pung amen en kame ia ni a kadek, o kapung ia, pwe iei me pan mau ong

ia dueta le ong mong ai, mepukat i sota pan kang, o i kin kapakap ansau karos, pwe ren der wiai ong ia me sued.

- 6 Kalua parail en pisikendi sang pon paip; irail ap pan duki ong ai padak o asa, me ir me mau.  
 7 Duen amen pan wera pasang sap, iduen ti 't akan, me lokidokila ni kailan wasan mela.  
 8 Ari so, mas ai kin ariri komui, Maing ai Kot, i liki komui, kom der kotin kasapokela maur i.  
 9 Pera wei sang ia insar, me re kaonop ong ia, o song en men kol ia di ren me morsued akan.  
 10 Me doo sang Kot akan en pein lodi ong arail insar, a ngai en dauli.

### 142

- 1 I LIKWIRKI ngil laud ong Ieowa. Ki ngil ai i kin ngidingideki ong Ieowa.  
 2 I kin kasansale ong i ai apwal akan, o i padaki ong i katoutou pa i kan.  
 3 Ngen i lao luetala, kom ap pan kotin apapwali. Irail rir wiai ong ia insar eu liman al, me i kin weid ia.  
 4 I kilang ni pali maun i, ari sota, me men sauaa ia; i sota kak pitila, pwe sota me kin idok ia.  
 5 Maing Ieowa, i likwir wong komui, o po-toan: Komui me ai paip, o pwais ai nan sap en me maur akan.  
 6 Kom kotin mangi ai weriwer, pwe ngai meid luet; dore ia la sang me kin pakipaki ia; pwe ngai sota itar ong ir.  
 7 Kalua sang ngen i nan imateng, pwe i en kapinga mar omui. Me pung kan pan pokon dong ia, ma kom pan kotin sauaa ia.

### 143

- 1 MAING Ieowa, kom kotin ereki ai kapakap, o karong ar en mangi ai ngidingid; mangi ia ni ar melel o ar pung.  
 2 Kom der kotin kadekada sapwilim omui ladu, pwe mo 'mui sota me maur men me pung.  
 3 Pwe imwintiti kin masamasan ia, o kin tiakedi maur i; a kin kase ia di wasa rotorot dueta ir me melar mas o.  
 4 Ngen i kin luetala, o mongiong i ponla.  
 5 I kin tamanda ansau mas akan, o madamadua duen ar wiawia kan; i kin lamelame duen dodok en lim omui kan.  
 6 I kin kapa wong komui pa i kat, duen sap madekong eu, me kin inong iong katau, iduen ngen i kin inong iong ir. Sela.  
 7 Maing Ieowa, kom kotin mangi ia madang, ngen i kin dupokala. Kom der kotin

karirala silang omui sang mo i, pwe i ender dueta ir, me pan lokidokila.

<sup>8</sup> Nin soran omui kalangan en pwara dong ia, pwe i kin liki komui; kom kotin kasale ong ia al, me i en weid ia, pwe ngen i kin auiaui komui.

<sup>9</sup> Maing Ieowa, kom kotin dore ia la sang ai imwintiti kan, i kin kaporoporeki komui.

<sup>10</sup> Padaki ong ia, pwe i en dodok duen kupur omui; pwe komui ai Kot; ngen omui mau en kotin kalua ia pon al pung;

<sup>11</sup> Maing Ieowa, kom kotin kamau ia da pweki mar omui; kalua ia sang nan wasa apwal ni omui pung.

<sup>12</sup> O kotin kawela ai imwintiti kan, pweki omui kalangan; o kotin kamela karos me kin katoutoui ngen i, pwe ngai sapwilim omui ladu.

## 144

<sup>1</sup> KAPING ong Ieowa ai paip, me kin padaki ong pa i kat pei, o sondin pa i kat main.

<sup>2</sup> Komui ai mak, o ai kel, o ai imateng ileile, o ai saundor, o pere pa i, i me i kin liki, me kin kaloedi ong ia ngai aramas akan.

<sup>3</sup> Dakot aramas o, pwe komui kin kotin kupukupura i, de nain aramas, pwe komui kin kotin apapwali i?

<sup>4</sup> Aramas amen dueta sota meakot, a ansau kin tangwei dueta mota.

<sup>5</sup> Maing Ieowa, kotikidi sapwilim ar lang akan o kotidi dong kit, kotin sair nana kan, pwe adinia i en kusuda.

<sup>6</sup> O kotin kadarado liol, pwen kamueit ir pasang, kasiki wei sapwilim ar kanangan kasik kan, pwen kamasak ir wei.

<sup>7</sup> Kapawei lim ar akan sang ni mol omui wasa ileile o dore ia la, o kotin kamaur ia da sang nan pil kalaimun o sang nan pa en nain men wai,

<sup>8</sup> Me au arail kin lokaia likam o ar wiawia kan me sapung.

<sup>9</sup> Maing Kot, i pan kaule kin komui kaul kapot, i pan kasangi ong komui arp, psalter me sal eisok.

<sup>10</sup> Komui me kotiki ong nanmarki kan, ren poedi, o dorela sapwilim omui ladu Dawid sang ni kodlas en me sued.

<sup>11</sup> Re pil kotin dore ia la sang nan pa en nain men wai, me au arail kin lokaia likam o ar wiawia kan me sapung.

<sup>12</sup> Pwe nait putak kan en kakairida dueta tuka mau kan, o nait seripein dueta mas en did en nan kaim en im lingan eu.

<sup>13</sup> Pwe at pera en nak en dir en kisin manga, en itar ong kikiwei song karos, o at

sip akan en kaparapar mau, wiala kid o nen pon at mos o;

<sup>14</sup> O at kau ol en kak ong dodok toto, pwe sota me sued kot de men kuli, de sangesang en wiaui nan al at akan.

<sup>15</sup> Meid pai wei eu, me kin due met! Meid pai wei eu, me Ieowa arail Kot!

## 145

<sup>1</sup> I PAN kapinga komui, ai Kot o Nanmarki, o kapinga mar omui ansau karos kokolata.

<sup>2</sup> I pan kapinga komui ni ran akan karos, o kapinga mar omui ansau kan karos kokolata.

<sup>3</sup> Ieowa meid lapalap, o kapingapan, o sota me kak dedeki duen a lapalap.

<sup>4</sup> Seri en seri kan pan kapinga omui dodok kan, o kasokaso i duen omui manaman.

<sup>5</sup> I pan kasokasoia duen lingan en omui kapwat, o i pan kauleki duen omui manaman akan.

<sup>6</sup> O re pan kasokasoia duen manaman en omui dodok kan, o pan kapakaparok duen omui lapalap.

<sup>7</sup> Irail pan kasokasoia duen omui kalangan lapalap, o pereperen o kapinga duen omui pung.

<sup>8</sup> Ieowa me dir en mak o kapunglol, kanongama o limpok.

<sup>9</sup> Ieowa me kalangan ong karos o a kapunglol ong a wiawia kan karos.

<sup>10</sup> Sapwilim omui wiawia kan en kapinga komui. Maing Ieowa, o sapwilim omui lelapok kan en kapinga komui.

<sup>11</sup> O ren kasokasoia duen lingan en wei omui, o ren kapakaparokki duen omui manaman.

<sup>12</sup> Pwe aramas akan en dedeki duen omui manaman o lingan ong wei omui.

<sup>13</sup> Wei omui wei soutuk eu, o omui kakaun pan duedueta kokolata.

<sup>14</sup> Ieowa kin kotin kolekol karos, me pan pupedi, o kainsen maula karos, me mamauk.

<sup>15</sup> Por en mas karos kasikasik komui, o kom kotiki ong ir kan ar kisin manga ni ar ansau.

<sup>16</sup> Kom kotiki pasang lim omui o kadirela karos, me memaur, duen kupur omui.

<sup>17</sup> Ieowa me pung ni al a karos o sarau ni a wiawia kan karos.

<sup>18</sup> Ieowa kotikot ren karos, me likwir ong i, karos, me likwir melel.

<sup>19</sup> A kotin wia i ong, me masak i duen ar inong. A kotin mangi ar ngidingid, ap kotin sauasa ir.

<sup>20</sup> Ieowa kin kotin sinsila karos, me pok ong i, a pan kamela me doo sang Kot akan karos.

<sup>21</sup> Au ai pan kapinga Ieowa, o uduk karos kapinga mar a sarau i ansau kan karos kokolata.

## 146

<sup>1</sup> NGEN i kapinga Ieowa!

<sup>2</sup> I pan kapinga Ieowa arain ai maur, i pan kauleki psalm akan ong ai Kot arain maur i.

<sup>3</sup> Der kaporoporeki saupeidi kan, pwe irail aramas o sota kak sauasa.

<sup>4</sup> Pwe ngen en aramas udan a pan kokola, o a pan pur ong wiala pwel, i ran ota a solar kak madamadaua meakot.

<sup>5</sup> Meid pai me sauas parail Kot en Iakop, me kin kaporoporeki Ieowa a Kot,

<sup>6</sup> Me kotin kapikadar lang o sappa, o madau, o audepa rail karos, me kin melel potopot eta,

<sup>7</sup> Me kotin sauasa pung en me lodi ong kalokolok mal, me kamanga me men mangadar. Ieowa kin kotin lapwada me salidi kan.

<sup>8</sup> Ieowa kin kotin kapad pasang mas en me maskun akan. Ieowa kin kotin kainsenemaula me mauk; Ieowa kin kotin pok ong me pung kan.

<sup>9</sup> Ieowa kin kotin sinsila men wai kan, o sauasa me sapoupou o li odi kan, ap kotin kawela al en me doo sang Kot akan.

<sup>10</sup> Ieowa iei Nanmarki soutuk, om Kot Sion kokolata. Aleluia!

## 147

<sup>1</sup> KAPINGA Ieowa! Pwe meid kasampwal, en kapinga atail Kot; pwe mak eta en kauleki kaul en kaping.

<sup>2</sup> Ieowa kin kotin kauada Ierusalem, o a kin kapokon pena me salongala ren men Israel.

<sup>3</sup> A kotin kamauiala me lol olar akan, o kotin kitim pena ar olar akan.

<sup>4</sup> A kin kotin wadok pena usu kan, o kin kida ad arail karos.

<sup>5</sup> Atail Kaun me lapalap o meid manaman, o sota me kak dedeki duen a erpit.

<sup>6</sup> Ieowa kin kotin kamanada me luet akan, ap sikendi me doo sang Kot akan nan pwel.

<sup>7</sup> Komail kakaual ong Ieowa, en wia pwin pasang o danke o kapinga atail Kot iang arp,

<sup>8</sup> Me kin kotin pena kila lang tapok kan, o kotin kamoredi katau ong sappa; me kotin kawosada ra pon dol akan,

<sup>9</sup> Me kin kotiki ong man akan kan ar; rape pulepul akan, me kin likwir ong i.

<sup>10</sup> A sota kin kotin kupura kelail en os o, de na en ol amen.

<sup>11</sup> Ieowa kin kotin kupura, me masak i, me kin kaporoporeki a kalangan.

<sup>12</sup> Ierusalem, kapinga Ieowa! Sion, kapinga om Kot!

<sup>13</sup> Pwe i me kin kotin katengetengedi sal mata en om wanim akan, o kotin kapaiaada noum seri ko, me mimi lole.

<sup>14</sup> A kin kotiki ong irair en sap om muei mau, o kin kotin kamanga kin uk korn kasampwalia.

<sup>15</sup> A kin kotin kadardi ong sappa a masan akan, a kusoned kin lolok sili madang.

<sup>16</sup> A kin kotikidi sno dueta koten o kamoredi poik dueta pas.

<sup>17</sup> A kin kotin kasedi akel; is me kak insenemau ni a kapou?

<sup>18</sup> A kin masani, ap pan pei pasang, a kin kotin kadar wei ang, ap kin pwilewei.

<sup>19</sup> A kotin kasansale ong Iakop a masan o ong Israel a kusoned o pung.

<sup>20</sup> A sota kin kotin wia due ong eu wei, i me re sota kin asa ki a pung. Aleluia!

## 148

<sup>1</sup> KOMAIL kapinga Ieowa nanlang, kapinga i nan wasa ileile!

<sup>2</sup> Komail sapwilim a tounlang, karos kapinga i, komail sapwilim a men en kadar karos, kapinga i!

<sup>3</sup> Koma katipin o saunipong, kapinga i, o komail usu piripir karos, kapinga i!

<sup>4</sup> Komail lang pokon, o pil komail pil akan pon ira pan lang, kapinga i!

<sup>5</sup> Irail en kapinga mar en Ieowa, pwe a me kotin pangok, ap miala.

<sup>6</sup> Ap kotiki ong ir, ren mimieta kokolata, o kotiki ong ir kusoned eu, me re sota pan kawela.

<sup>7</sup> Toun sappa, kapinga Ieowa, walros o man akan karos, o pil en madau kan karos.

<sup>8</sup> O kisiniai, o akel, o sno, o tokoi, o melimel, me kin kaloki sili a kusoned akan,

<sup>9</sup> Komail nana o dol akan karos, tuka me wa mau o seder karos;

<sup>10</sup> Man laualo o mand akan karos, man koro-p o manpir akan,

<sup>11</sup> Komail nanmarki en sappa o wei kan karos, saupeidi o saunkadeik kan,

<sup>12</sup> Manakap o peinekap, me ma o seri kan,

<sup>13</sup> Irail karos en kapinga mar en Ieowa; pwe i eta mar, me lapalap, a manaman mi pon angin sappa o lang.

<sup>14</sup> A kotin sauasa os en sapwilim a kan. Sapwilim a lelapok kan en kapinga i, kadaudok en Israel, iei wei, me kin upa i. Aleluia!

## 149

<sup>1</sup> KAULEKI kaul kap pot ong Ieowa; pokon sarau en kapinga i.

<sup>2</sup> Israel en peren kida i, me kotin wia irail da; seri en Sion en peren kida arail Nanmarki.

- <sup>3</sup> Ren kapinga mar a ni pwin en pokol; ren wia aip o arp.
- <sup>4</sup> Pwe Ieowa kotin peren kida sapwilim a aramas akan; a kotin kapwate kin me luet akan lingan.
- <sup>5</sup> Lelapok kan en pereperen o kapinga, o ngisingis pon ki arail akan.
- <sup>6</sup> Au arail en kapinga Kot, o kodlas kong en mi nan pa arail.
- <sup>7</sup> Pwe ren depuk ong men liki kan, o kaloke wei kan,
- <sup>8</sup> Pwen salie kidi arail nanmarki kan sal, o me kasampwal re 'rail ki sal mata,
- <sup>9</sup> Pwe ren kapwaiada kalokolok, me kileledi ong irail er mas o. Iduen wau en sapwilim a lelapok kan. Aleluia!

## 150

- <sup>1</sup> KAPINGA Kot nan sapwilim a tanpas sarai; kapinga i duen a manaman akan.
- <sup>2</sup> Kapinga i duen a wiawia kan; kapinga i ni a lingan lapalap!
- <sup>3</sup> Kapinga i ki trompete; kapinga i ki arp o laute!
- <sup>4</sup> Kapinga i ki aip o pwin en pokol; kapinga i ki sal en kasang o pilote.
- <sup>5</sup> Kapinga i ki simpel; kapinga i ki simpel kaselel!
- <sup>6</sup> Karos, me kin memaur, en kapinga Ieowa! Aleluia!

## MANG EN PA EN WANPORON MATAÜS.

<sup>1</sup> PUK en di kan, me Iesus Kristus, me sapwilim en Dawid, me sapwilim en Apraam, tapi sang ia. <sup>2</sup> Apraam me wiadar Isaak, a Isaak me wiadar Iakop, a Iakop me wiadar Iuda o ri a ol akan; <sup>3</sup> A Iuda me wiadar Pares i Sara ren Tamar; a Pares me wiadar Esrom, a Esrom me wiadar Aram; <sup>4</sup> A Aram me wiadar Aminadap, a Aminadap me wiadar Naason, a Naason me wiadar Salmon; <sup>5</sup> A Salmon me wiadar Poas ren Raap, a Poas me wiadar Oped ren Rud, a Oped me wiadar Iese: <sup>6</sup> A Iese me wiadar nanmarki Dawid, a Dawid me wiadar Salomo ren li odi en Urias; <sup>7</sup> A Salomo me wiadar Reapeam, a Reapeam me wiadar Apia, a Apia me wiadar Asa; <sup>8</sup> A Asa me wiadar Iosapat, a Iosapat me wiadar Ioram, a Ioram me wiadar Usia; <sup>9</sup> A Usia me wiadar Iotam, a lotam me wiadar Aas, a Aas me wiadar Iskia; <sup>10</sup> A Iskia me wiadar Manase, a Manase me wiadar Amon, a Amon me wiadar Iosia; <sup>11</sup> A losia me wiadar Iekonia o ri a ol akan ni ansaun arail salilang Papilon. <sup>12</sup> Murin arail salidi nan Papilon Iekonia me wiadar Sealtiel, a Sealtiel me wiadar Serupapel; <sup>13</sup> A Serupapel me wiadar Apiud, a Apiud me wiadar Eliakim, a Eliakim me wiadar Asor; <sup>14</sup> A Asor me wiadar Sadok, a Sadok me wiadar Akim, a Akim me wiadar Eliud; <sup>15</sup> A Eliud me wiadar Eliaser, a Eliaser me wiadar Matan, a Matan me wiadar Iakop; <sup>16</sup> A Iakop me wiadar Iosep, me likondeki Maria, me kaipwiedi Iesus, me maraneki Kristus. <sup>17</sup> Di karos sang ren Apraam lei Dawid me eisokpaieü; a sang Dawid lei arail salidi nan Papilon di eisokpaieü; a sang arail salidi nan Papilon lei Kristus di eisokpaieü. <sup>18</sup> Nan iet duen Kristus a kotin ipwidier: Ni ansau me in a Maria kisin nin ong Iosep, a diarokadar, me a liseanekier Ngen sarau mon ara tu pena. <sup>19</sup> A a warok Iosep ol pung amen, ap sota men kanamenokala i, ap kupukupura, en rir mueli sang i. <sup>20</sup> A ni a kotin madamadaue duen mepukat, kilang, tounlang en Kaun o pwara dong i ni a aliman masani: Iosep nain Dawid koe, der masak, en ale om warok Maria, pwe Ngen sarau me a lisean kidar. <sup>21</sup> A pan kaipwiedi seri ol amen, me koe pan ki ong mar a Iesus, pwe a pan dorela sapwilim a aramas akan sang nin dip arail. <sup>22</sup> Mepukat karos wiauiet, pwen pwaida me lokido sang Kaun ren saukop o, me masani; <sup>23</sup> Kilang seripein makelekel o pan liseanda, ap kaipwiedi seri ol amen, irail ari pan ki ong mar a Imanuel; iet wewe: Kot me kotin ieiang kitail. <sup>24</sup> Iosep lao pirida

sang a saimok, ap kapwaiadar, me tounlang en Kaun o kotin kakalik ong i o apapwali a likond. <sup>25</sup> A ap sota pweidi re a, lao a kaipwiedier sapwilim a meseni ol, ap kotiki ong mar a Iesus.

## 2

<sup>1</sup> A IESUS lao ipwidier Petleem nan Iudäa ni muein nanmarki Erodes, kilang ol lolekong kai ap pwarado sang ni mas en Iang ko dong Ierusalem, kalelapok: <sup>2</sup> Ia Nanmarki en Sus akan, me apton ipwidier, kotikot ia? Pwe se kilanger a usu ni sap en mas en lang ap pwarado, pwen pongi i. <sup>3</sup> A nanmarki Erodes lao rongadar mepukat, ap landar o toun Ierusalem karos, <sup>4</sup> Ap kupokon pena samero lapalap karos o sounkawewe en aramas akan kainoma re 'rail, wasa Kristus pan ipwidi ia. <sup>5</sup> Irail ari potoan ong i: Nan Petleem en Iudäa; pwe iduen a intingidi ren saukop o: <sup>6</sup> A koe Petleem, sap en Iuda, kaidin me tikitik nan pung en saupeidi en Iuda kan; pwe Kaun amen pan tapi sang uk, me pan kaunda nai aramas en Israel akan. <sup>7</sup> Erodes ap kawai pena ol lolekong kan, kalelapok mau re 'rail ansau o, me usu o pwarado. <sup>8</sup> I ari porone iri alang Petleem masani: Komail kowei raparapaki mau seri o; a komail lao diaradar, en kaireki dong ia, pwe i en pil kola pongi i. <sup>9</sup> Irail lao ronger nanmarki o ap koeilla. A kilang usu o, me irail kilanger nan sap en mas en lang, ti ong mo 'rail, a lao udi ong wasa o, me seri pwelel kotikot ia. <sup>10</sup> Irail lao kilanger usu o, re ap peren kida kausalapia. <sup>11</sup> Irail lao pedelong ong nan im o, re ap masanier seri pwelel o in a Maria, re ap kaipokedi o pongi i, o kapwardar arail kapwa kan, ap mairongki ong i kold, o men pomau, o mire. <sup>12</sup> Kot ap kotin pangoki ong irail ni arail auramen, en der purelang Erodes, re ap weidwei ni apot al purelang sap arail. <sup>13</sup> Irail lao samalar, kilang tounlang en Kaun amen ap pwara dong ren Iosep ni a aliman masani: Paurida, ale seri pwelel en o in a tangwei lang Äkripten o kaukauson wasa o, I lao kaire kin uk, pwe Erodes pan rapaki seri pwelel o pwen kamatala. <sup>14</sup> I ari kipada, aleer seri pwelel o in a ni pong, kotilang Äkripten; <sup>15</sup> O kaukauson ia, lao en Erodes a matala, pwen pwaida, me lokido sang Kaun o, ren saukop o me masani: Sang nan Äkripten me I ekeredo nai ol o. <sup>16</sup> Erodes lao mangier, me a sarokidier ol lolekong kan, ap ongiong kidar kausalap o poronelan, kamela seri ol karos, me mi Petleem o nan sap salong karos, me saunpar riau o tikitik sang, duen ansau me a kalelapok mau ren me lolekong kan. <sup>17</sup> I dokan a pwaidar me lokido ren saukop Ieremia me masani:

<sup>18</sup> Ngil eu wiauier nan Rama, sangesang o maiei laud; Rael sangesangki na seri kan, a kang insenemaula, pwe irail soer mia. <sup>19</sup> A Erodes lao matalar, kilang tounlang en Kaun amen ap pwara dong ren Iosep nan Äkripten ni a aliman, <sup>20</sup> Masani: Paurida ale seri pwelel en o in a, ko wong nan sap en Israel, pwe irail melar, me rapaki, pwen kamela seri pwelel o. <sup>21</sup> I ari kipadar, ale seri pwelel o in a, pure dong sap en Israel. <sup>22</sup> A lao mangi, me Arkelaus kaunda Iudäa wiliandi sam a Erodes, ap lan kotilang wasa o. Kot ap kotin pangoki ong i ni a aliman, ap kotilang sap en Kaliläa kai. <sup>23</sup> O kotido kotikot nan kanim me me adaneki Nasaret, pwen pwaida, me lokido ren saukop akan: A pan maraneki men Nasaret.

### 3

<sup>1</sup> A NI ran pukat Ioanes saunpaptais pwarado, padapadak nan sap en Iudäa, <sup>2</sup> Masani: Komail kalula, pwe wein nanlang korendor. <sup>3</sup> Pwe iei i, me saukop Iesaia katitiki, masani: Ngil en saunkair amen nan sap tan: Komail kaonopada al en Kaun o, kainenela al a! <sup>4</sup> A i Ioanes me a likau wun en kamel o a pirapireki kil in man, a sak a mansiek o oni en nan wel. <sup>5</sup> Toun Ierusalem, o toun sap akan liman Iordan ap koeila re a; <sup>6</sup> O irail paptaisela re a nan Iordan, ni ar weokada dip arail akan. <sup>7</sup> A lao masanier Parisär o Sadusar me toto ko dong a paptais, ap masani ong irail: Dakot wan oter komail! Is me padaki ong komailer, en piti sang ni kamekam me kokodo? <sup>8</sup> Ari, komail kapwareda wan kalula mau! <sup>9</sup> A komail depa lamelame, me komail pan indang pein komail: Nan Apraam sam atail. Pwe i indai ong komail, me Kot kotin kak ong wiaki ong Apraam na seri kai takai pukat. <sup>10</sup> Sile o mier ni tapin tuka kan; a tuka karos me so wa mau, pan paledi o lokidokila nani iai. <sup>11</sup> Melel, i paptais kin komail pil ong kalula, a me kotido muri, nan me laude sang ia, ngai sowar ong, en wa sawilim a sut; i me pan paptais kin komail Ngen sarau o kisiniai. <sup>12</sup> Sapwilim a tanir mi ni lim a; a pan kotin koko melel sapwilim a pera, ap nekid pena sawilim a wan korn nan im en nak, a dip akan a pan kotin karong kila kisiniai soutuk. <sup>13</sup> Iesus ap kotido sang Kaliläa, koti dong Iordan ren Ioanes, pwen paptaisela re a. <sup>14</sup> A Ioanes kotin kang, ap potoang re: Mak eta i en paptaisela re ir, a iaduen ir me kotido re i? <sup>15</sup> A Iesus kotin sapeng masani ong i: Wiada mas, pwe me kon ong kita, en kapwuiada pung kan karos; a ap duki ong i. <sup>16</sup> Iesus lao paptaiselar, ap kotin madangada sang nan pil o. A kilang, nanlang ap ritidang i, i ari kotin masani Ngen en Kot kotidido ni mom en muroi men a kaipokedi po a. <sup>17</sup> O

kilang, ngil eu sang nanlang masani: Iet nai ol kompok, me i kin polaule kida!

### 4

<sup>1</sup> IESUS ap kotin kakaluadala ren Ngen nan sap tan, pwen songesong ren tewil. <sup>2</sup> A lao kotin kaisesolar ran pangaul o pon pangaul ap men sak. <sup>3</sup> Men kasongesong ap pwara dong i indada: Ma komui Sapwilim en Kot, en masani, takai pukat en wiala prot. <sup>4</sup> A kotin sapeng masani: A intingidier: Kaidin prot eta, me aramas kin memaureki, pwe masan akan karos, me kin pwili sang nin silang in Kot. <sup>5</sup> Tewil ap kalualang i nan kanim saraui o kauada i pon kongkong en kaudok, <sup>6</sup> Indang i: Ma komui Sapwilim en Kot, kasedi pein komui, pwe a intingidier: A pan kasilaki sapwilim a tounlang kan komui, o irail pan wa komui ni lim ar akan, pwe aluwilu omui ede dipikelekel ni takai eu. <sup>7</sup> Iesus kotin masani ong i: A pil intingidier: Koe der kasongesong Kot om Kaun. <sup>8</sup> Tewil ap pil kalualalang i pon nana ileile kaulapia eu o kasale ong i wein sappa karos o a lingan, <sup>9</sup> Indang i: Mepukat karos i pan ki ong komui, ma komui men poridi o pongi ong ia. <sup>10</sup> Iesus ap kotin masani ong i: Ko sang ia Satan, pwe a intingidier: Koe en pongi ong Kot om Kaun, i eta koe en papa. <sup>11</sup> Tewil ap mui sang i, a kilang, tounlang kan ap pwarado papa ong i. <sup>12</sup> A lao mangier, me Ioanes salidier, ap kotilang Kaliläa, <sup>13</sup> O a kotin mui sang Nasaret, kotido kaukausonla Kapernaum, me ni ni kailan sed impan sap Sepulon o Naptalim; <sup>14</sup> Pwen pwaida, me lokido ren saukop Iesaia me masani: <sup>15</sup> Sap Sepulon o sap Naptalim, me sal ong sed, palilan Iordan, o Kaliläa en men liki kan, <sup>16</sup> Aramas akan, me momod nan rotorot, kilanger marain lapalap eu, o irail me momod nan sap en mot en mela, marain eu dakar irail adar. <sup>17</sup> I dokaan Iesus kotin tapiadar padapadak o mamasani: Kalula, pwe wein nanlang korendor. <sup>18</sup> A lao kotikot sili pon oror en lein Kaliläa, ap masanier piri en eu, Simon, me adaneki Petrus, o ri a Andreas, me kadukaduedi ara uk nan sed, pwe ira me saused. <sup>19</sup> A ap kotin masani ong ira: Idauen ia do, I pan wia kin koma saused en aramas! <sup>20</sup> Ira madang mui sang uk akan o idauenla i. <sup>21</sup> A ni a kotila sang wasa o, ap pil masani eu piri en, Iakopus, nain Sepedäus o ri a Ioanes, me mi nin sop ren sam ara Sepedäus, wonewone ara uk akan. I ari kotin molipe ira do. <sup>22</sup> Ira madang mui sang sop o sam ara pan idauenla i. <sup>23</sup> Iesus ari kotin kakan sili nan Kaliläa kaukawewe nan arail sinakoke kan o padapadak rongamau en wei, o kotin kakelada song en somau o luet akan karos nan pung en aramas akan. <sup>24</sup> I ari indant sili nan Sirien pon. O irail wa

dong i me somau kan karos, me aneki song en somau o wairok kai, o me tewil ti poa kan, o me pwepwe kan, o me rerer akan, i ari kotin kakela ir ada. <sup>25</sup> Pokon kalaimun me idauenla i sang Kaliläa o Dekapolis, o Ierusalem, o Iudäa, o sang palilan Iordan.

## 5

<sup>1</sup> A LAO masani pokon o, ap kotida pong dol eu; a lao kaipokedi, sapwilim a toun-padak kan ap kai dong i. <sup>2</sup> I ari kotin dauasa pasang silang i kawewe ong irail masani: <sup>3</sup> Meid pai, me samama ni ngen ir; pwe nairail wein nanlang. <sup>4</sup> Meid pai, me mauk, pwe re pan kamaitala. <sup>5</sup> Meid pai, me opampap, pwe re pan sosoki sappa. <sup>6</sup> Meid pai, me kin men manga o men nim me pung, pwe re pan medila. <sup>7</sup> Meid pai, me kadek, pwe re pan diar kadek. <sup>8</sup> Meid pai, me nan mongiong arail makelekel, pwe re pan ariri Kot. <sup>9</sup> Meid pai, me kin tom pena, pwe re pan adaneki seri en Kot. <sup>10</sup> Meid pai, me kamekameki pung, pwe nairail wein nanlang. <sup>11</sup> Komail meid pai, ma irail lalau o paki komail o palian komail ni arail lokaia sued o likam pweki ngai. <sup>12</sup> Komail insen-ema o perenda kausalap; pweki katinge pamail me lapalap nanlang. Pwe iduen irail paki saukop oko, me mo 'mail. <sup>13</sup> Sol pan sappa komail. A ma sol sara sang, da me a pan soleki? Nan a pan me mal kot, men lokidokila, o aramas en tiak pasang. <sup>14</sup> Marain pan sappa komail, Kanim eu, me mi pon dol eu, sota kak rirla. <sup>15</sup> Aramas pil sota kin isikeda lamp eu, ap ki ong pan kasak, pwe pon deu a, o a kin kamaraini toun im karos. <sup>16</sup> Iduen omail marain en sansal mon aramas, pwe irail en udial omail wiawia man kan, ap kapikapinga Sam omail, me kotiluit nanlang. <sup>17</sup> Eder kikiong me I kodon, tiakedi kapung de saukop akan. I sota kodon tiakedi, a pwen kapwaiada. <sup>18</sup> Pwe melel, I indai ong komail, lao lang o sappa pan poula, sota iota eu de kisin muai en kapung eu pan lokidokila, lao karos pan pwaida. <sup>19</sup> Ari, meamen me tiakedi eu kisin kusoned tikitik pukat, ap pil padaki ong aramas, ren tiakedi, nan a pan tikitik nan wein nanlang. A meamen, me oke o padaki ong aramas, ren oke, i me pan lapalap nan wein nanlang. <sup>20</sup> Pwe I indai ong komail, ma omail pung so man sang pung en saunkawewe o Parisär, akan, komail sota pan kak pedelon ong nan wein nanlang. <sup>21</sup> Komail rongadar, me a loki, ong men kaua: Koe der kamela aramas! A me pan kamela aramas, pan pangalang kadeik o. <sup>22</sup> A I indai ong komail, meamen makarada mal pan ri a ol, pan pangalang kadeik. A me pan indang ri a ol: Raka, pan pangalang kapung. A me pan inda: Koe me pweipwei, pan lokidokila nan

le en pweleko. <sup>23</sup> Ari, ma koe wa dong pei sarau om mairong, ap tamanda wasa o, me ri om ol insensued pa om. <sup>24</sup> Pwilikidi mas om mairong impan pei sarau, ap kola kadeke ri om ol, ap kodo kapwaiada om mairong. <sup>25</sup> Madang materoki ong me palian ong uk ni om iang i pon al o, pwe me palian ong uk ender pangalang uk ren saunkapung, a saunkapung pangalang uk ren papa o, o koe pan lokidokila nan imateng. <sup>26</sup> Melel I indai ong uk, koe sota pan ko sang wasa o, koe lao kapungala lua karos. <sup>27</sup> Komail rongadar, me a lokido: Koe der kamal! <sup>28</sup> A I indai ong komail, meamen ngingar li amen, pwen norok, nan a kamal ong i nan mongiong i. <sup>29</sup> O ma pali maun en mas om kamakar uk, waikada sang o kase sang uk, pwe a mau ong uk, kisan war om en ola, sang war om pon en lokidokila nan pweleko. <sup>30</sup> O ma pali maun en pa om kamakar uk, waika sang o kase sang uk, pwe a mau ong uk, kisan war om en ola, sang war om pon en lokidokila nan pweleko. <sup>31</sup> A pil lokido: Meamen me pan kasela a paud, i en ki ong i kisin likau en kamueit. <sup>32</sup> A I indai ong komail, meamen me pan kasela a paud, me so nenek nan a kin kamal eki i; a meamen, me paudeki me lokido kilar, nan i me kamal. <sup>33</sup> Komail pil rongadar, me a loki ong men kaua: Koe der kaula likam; a koe kapwaiada om kaula ong Kaun o! <sup>34</sup> I indai ong komail, der man kaula! Der kaukila nanlang, pwe mol en Kot; <sup>35</sup> Pil der sappa, pwe utipa; pil der Ierusalem, pweki kanim en Nanmarki lapalap. <sup>36</sup> Koe pil der kaukila mong om, pwe koe sota kak ong wiada pit en monga eu, en pueteput de tontol. <sup>37</sup> Omail kaskaso'i pena en: Ei ei; so, so; pwe me dauli mepukat, kin tapi sang ni me sued. <sup>38</sup> Komail rongadar, me a lokido: Por en mas en depukki por en mas; o ngi pot en depukki ngi pot. <sup>39</sup> A I indai ong komail, komail der palian me sued. A meamen pikir uk ni pali maun en likin sap om, pil ki ong i pali teio. <sup>40</sup> O meamen, me men wa uk ala ni kapung, pwen adia sang om sakti, en pil ki ong i om likau pup. <sup>41</sup> O ma meamen ngidingid kin uk, en iang i mail eu, koe en iang mail riau. <sup>42</sup> Kisakisai ong me kin ngidingid re om, o koe der saupe'i sang me poekipoeki re om! <sup>43</sup> Komail rongadar, me a lokidor: Koe en pok ong men imp om ap kailongki om imwintiti! <sup>44</sup> A I indai ong komail, pok ong omail imwintiti kan. o kapapak kin irail, me paki komail; <sup>45</sup> Pwe komail en sapwilim en Sam omail, me kotikot nanlang. Pwe a kin kapwareda sapwilim a katipin pon me sued o me mau kan, o kotin kamoredi katau pon me pung o me sapung kan. <sup>46</sup> Pwe ma komail pok ong, me kin pok ong komail, da me pan kating pa 'mail? Saunopwei sota kin wia due met? <sup>47</sup> O ma komail ranamau ong



ri omail akan, da me komail sikiki sang me tei kan? Men liki kan sota kin wia due met?  
 48 Komail ari en unsokela dueta Sam omail, me kotikot nanlang, a unsok.

## 6

<sup>1</sup> KOMAIL kalaka, pwe komail der kisakis sansal mon aramas, pwe ren udial; pwe ede sota pwain omail ren Sam omail, me kotikot nanlang. <sup>2</sup> Ari, koe lao kisakis, ede peuk saui mo om, duen me malaun akan kin wia nan sinakoke kan o nani al akan, pwe ren indand ren aramas. Melel I indai ong komail, re aleer arail pwain. <sup>3</sup> A koe lao kisakis, der kasale ong pali maing om, me pali maun om kin wiada. <sup>4</sup> Pwe om kisakis en rir; a Sam om, me kin masani wasa rir, pan kotin katingi uk. <sup>5</sup> Koe lao wia kapakap, koe der ras ong me malaun akan, pwe re men kapakap nan sinakoke kan, o nani al akan, pwe ren sansal mon aramas. Melel I indai ong komail, re aleer arail pwain. <sup>6</sup> A koe lao wia kapakap, ko ong nan om pera, a koe lao ritingidier wanim o, ap kapakap ong Sam om, me kotikot wasa rir; a Sam om, me kin masani wasa rir, pan kotin katingi uk. <sup>7</sup> Komail lao kapakap, komail depa purepur ong lokaia mal, duen men liki kan, pwe re kiki ong, me re pan pwaikida ar lokaia toto. <sup>8</sup> Komail ari ender dueta irail, pwe Sam omail kotin mangi meakan, me mau ong komail, mon omail poeki re a. <sup>9</sup> A iet duen omail pan wia kapakap: Sam at, me kotikot nanlang. Mar omui en sarau. <sup>10</sup> Wei omui en pwaida. Kupur omui en wiaui sappa dueta nanlang. <sup>11</sup> Kotikido ran wet at tungol kaukaule. <sup>12</sup> Lapwa sang kit dip at, dueta kit me kin lapwada koros, me wia dipi ong kit. <sup>13</sup> Eder kaluang kit ren me katikatiamau kan, a nekid kit sang ni me sued akan, <sup>14</sup> Pwe ma komail pan makeki ong aramas dip ar akan, Sam omail nanlang pan pil makeki ong komail. <sup>15</sup> A ma komail sota pan makeki ong aramas dip ar akan, nan Sam omail sota pil pan makeki ong komail dip omail akan. <sup>16</sup> Komail lao kaisesol, eder mas en sang duen me malaun akan, pwe re kin kawukila mas arail, pwe aramas en kilang arail kaisesol. Melel I indai ong komail, re aleer arial pwain. <sup>17</sup> A koe lao kaisesol, usor mong om o opinok. <sup>18</sup> Pwe koe dor kasale ong aramas om kaisesol, a ong Sam om, mi kotikot wasa rir; a Sam om, me kin masani nan wasa rir, pan kotin katingi uk. <sup>19</sup> Komail der ki pena omail pai kan nin sappa, wasa man en mot o mir pan kawela ia, o men pirap kin weirada o pirapala. <sup>20</sup> A komail ki pena omail pai kan nanlang, wasa man en mot de mir sota pan kawela, o men pirap sota kin weirada de pirapala. <sup>21</sup> Pwe wasa om pai mia ia, iei wasa mongiong om kin pil mia ia. <sup>22</sup> Por en

mas iei marain en pali war. Ari, ma mas om makelekel, war om karos pan dir eng marain; <sup>23</sup> A ma mas om me sued, war om karos pan dir en rotorot. A ma marain, me mi lol om, pan rotorot, daduen wan rotorot! <sup>24</sup> Sota amen me pan kak papa saumas ri-amen, pwe a pan kailongki amen, ap pok ong me teio, de a pan kasampwaleki amen, ap mamaleki me teio. Komail sota pan kak papa Kot o mamon. <sup>25</sup> I me I indaiki ong komail: Eder ngongongki ong maur omail, me komail pan kang o me komail pan nim, pil sota ong war omail, me komail pan likau kida. Pwe maur so kasampwal sang kisin manga, o pali war sang likau? <sup>26</sup> Kalelapok ong manpir pan lang; re sote, kin kamoredi, re soin kin dolung, re sota kin nak pena; ari so, Sam omail nanlang kotin kamakamanga irail; a ia duen, komail so kasampwal sang irail? <sup>27</sup> A is nan pung omail, ni a ngongki, me pan kak use pasang pein i ki tipong en pa eu? <sup>28</sup> O menda komail ngongki likau? Kalelapok ong kiop akan, me mi nan sap, duen ar kakairida. Re sota kin dodok o sota monkol pena. <sup>29</sup> A I indai ong komail: Nan Salomo ni a lingan karos sota a likau dueta apot irail. <sup>30</sup> Ari, ma iduen Kot kotin kapwataki dip, me mi nan sap, me kin mi ran wet, a lakap pan lokidokila nan kisinia, dadue a sota pan kotin kalikauwi komail da, me poson tikitik? <sup>31</sup> I me komail der ngongongki moinda: Da me se pan kang? De da me se pan nim? De da me se pan likau kida? <sup>32</sup> Pwe mepukat men liki kan kin raparapaki; pwe Sam omail nanlang kotin mangi, me mepukat karos mau ong komail. <sup>33</sup> Rapaki mas wein Kot o a pung, a mepukat karos pan pouselang komail. <sup>34</sup> Eder ngongki ong lakap; pwe lakap pan ngongki ong pein i; a itar ong ran eu pein a sued.

## 7

<sup>1</sup> DER kadeikada, pwe komail der pakadeikada. <sup>2</sup> Pwe duen kadeik, me komail kadeikekida aramas, iduen komail pan pakadeikada, o duen men song, me komail kin songki, iduen a pil pan song ong komail, <sup>3</sup> A menda koe kilikilang diper ni mas en ri om ol, a sota kan ataut o ni mas om? <sup>4</sup> De iaduen koe pan indang ri om ol: Aui mas, i pan ki sang diper ni mas om. A kilang, ataut apot mi ni pein mas om? <sup>5</sup> Malaun amen koe, ki sang mas ataut ni mas om, koe ap pan kak kilang, duen om pan kak ki sang diper ni mas en ri om ol, <sup>6</sup> Komail der ki ong kidi me sarau kot! O omail pai kan der kasedi ong mon pwik kan, pwe ren de tiak pasang, ap saupeido ngalis komail pasang. <sup>7</sup> Poeki, a komail pan tungole; rapaki, a komail pan diarada; letelet, a a pan ritida mo omail.

<sup>8</sup> Pwe karos, me poekipoeki, kin tungole; o me kin raparapaki, kin diarada; o me kin letelet, nan a pan ritida mo a. <sup>9</sup> De is aramas nan pung omail, ma na putak pan poeki kisin prot, pan ki ong i takai eu? <sup>10</sup> De ma a poeki mam amen, pan ki ong i serpent amen? <sup>11</sup> Ari, ma komail me song sued, ap asa, ki ong noumail seri kan kisakis mau, melel kaualap Sam omail, me kotikot nanlang, pan kotiki ong, me poeki re a me mau kan. <sup>12</sup> Ari mekaros, me komail men, aramas en wiai ong komail, i me komail en wiai ong irail, pwe iei kapung o saukop akan, <sup>13</sup> Pedelong ong nan wanim tätik! Pwe wanim me walek o al me tälap, me kodilang mela, o irail me toto, me kin pedelong ong wasa o. <sup>14</sup> A wanim me watikitik, o al me tätik, me ko ong maur o irail me malaulau, me kin diarada. <sup>15</sup> Komail kalaka saukop likam akan, me kin pwara dong komail ni likau en sip, a lole irail song en kidi komad. <sup>16</sup> Komail pan asa kin irail ni arail wa. Pwe da, aramas pan kak dolung sang wain ni karer, de pik sang ni tuka kamadak? <sup>17</sup> Nan iduen tuka mau karos kin wa mau, a tuka sued kin wa sued. <sup>18</sup> Tuka mau sota kak wa sued, o tuka sued sota kak wa mau. <sup>19</sup> Ari tuka karos, me so wa mau pan paledi o lokidokila nuni iai. <sup>20</sup> Ari, komail pan asa kin irail ni arail wa. <sup>21</sup> Kaidin karos, me kin kasokasoi ong ia: Maing, Maing, pan pedelong ong nan wein nanlang, a me kin wiawia kupur en Sam ai, me kotikot nanlang. <sup>22</sup> Me toto pan kasoi ong ia ni ran o: Maing, Maing, kit so kokopadar ni mar omiu, o ni mar omui kausaki tewil akan, o ni mar omui wia kidar manaman toto? <sup>23</sup> I ap pan indai ong irail: I sota mail asa komail, kowe sang ia, komail me kin wiada me sued. <sup>24</sup> A meumen ronggada ai padak pukut ap peiki ong, I pan karasai ong i ol lolokong amen, me kauada im a pon paip, <sup>25</sup> Katau lao moredi, o lakape pwilipwiledo, o ang me iripoki dong im o, a sota rongki pasang, pweki a kakauda pon paip. <sup>26</sup> O meamen ronggada ai padak pukut, ap sota kapwaiada, nan a pan rasong ol pweipwei men, me kauada im a pon pik en oror. <sup>27</sup> Katau lao moredi o lapake pwilipwilido, o ang ma irepoki dong im o, a rongki pasang; o a rongk laud melel, <sup>28</sup> Kadekadeo Iesus lao kaimwisokela masan pukut, pokon o ap puriamuiki kaualap sapwilim a padak o. <sup>29</sup> Pwe a kotin kawewe ong irail ni manaman, a sota dueta arail saunkawewe kan.

## 8

<sup>1</sup> A LAO kotido sang nin dol o, pokon kalaimun idauendo i. <sup>2</sup> A kilang, ol tuketuk amen ap kodo pongi i indada: Maing, ma re kotin kupura, re pan kak ong kamakele

ia da. <sup>3</sup> I ari kotin kapawei lim a, sair i, masani: I men, koe en makelekel; ari, a tuketuk ap madang modi sang. <sup>4</sup> Iesus ap kotin masani ong i: Kalaka, koe de kaireki amen; a kola kasale ong samero pein uk, o kida mairong eu, me Moses masani, pwen kadede ong irail. <sup>5</sup> A lao kotilong ong nan Kapernaum, senturion amen apedong i poeki re a. <sup>6</sup> Indada: Maing, ai ladu wonon nan deu a somau kokon madak ap wairok kaualap. <sup>7</sup> Iesus ap kotin masani ong i: I pan kola kakelailada i. <sup>8</sup> Senturion sapeng potoan ong: Maing, i sowar ren kotilong ong nan im ai; a ren masani eta, ai ladu up pan kelailada, <sup>9</sup> Pwe aramas amen ngai, me mi pan mana en kaun akan, ap kaunda saunpei kai. A ma i pan indang amen: Kwei, a pan kola, o ong amen: Kodo, a pan kodo, o ong ai ladu: Wiada met, a pan wiada. <sup>10</sup> Iesus lao mangi mepukat, ap kotin puriamuiki, masani ong irail me idauendo: Melel I indai ong komail, song en poson wet I so diaradar, sota nan Israel. <sup>11</sup> A I indai ong komail, me toto pan kodo sang mas en lang, o kapin lang, iang Apraam, o Isaak, o Iakop ni tepel nan wein nanlang. <sup>12</sup> A me pweledan wei pan lokidokila nan rotorot liki, iei wasan maiei o teterok. <sup>13</sup> Iesus ap kotin masani ong Senturion o: U kwei, a pan wiaui ong uk duen om poson. A ladu o ap kelailadar ni auer ota. <sup>14</sup> Iesus lao kotilong ong nan im en Petrus, ap masani, me saulap a wonon somau karakar. <sup>15</sup> I ari kotin sair pa a, a karakar ap ko sang. I ari pauridar papa i. <sup>16</sup> A lao sautik penaer re wa dong i me toto, me tewil oko ti poa. I ari kotin kauseki sang ngen akan a masan o kakelada me somau kang karos. <sup>17</sup> Pwen pwaida, me lokido ren saukop Iesaia, me masani: A kotin ale ong pein i atail luet akan, o wa atail somau kan. <sup>18</sup> Iesus lao kotin masani aramas toto pokon dong i, ap kotin masani, ren kotela palio palilan sed o. <sup>19</sup> Saunkawewe men ap pwara do potoan ong i: Saunpadak i pan idedauen ir wasa karos re pan kotila ia. <sup>20</sup> Iesus kotin masani ong i: Poks akan por arail mia, o manpir en pan lang pas arail mia, a Nain aramas sota wasan kaulawei mong a. <sup>21</sup> O amen sang nan pung en sapwilim a tounpadak kan potoan ong i: Maing re kotin mueid ong ia en kola mas sarepedi ai papa. <sup>22</sup> A Iesus kotin masani ong i: Idauen ia do! Me melar akan en sarepedi pein ar melar akan. <sup>23</sup> A lao kotida pon sop o, sapwilim a tounpadak kan idauenla i. <sup>24</sup> A kilang, ap ongiongidar nan sed, iluk kan ari kadupaledi sop o, a i kotin saimokelar. <sup>25</sup> Sapwilim a tounpadak kan ap kai dong i, kaupada i, potoan ong: Maing, re kotin dore kit ala, kit pan mela! <sup>26</sup> A ap kotin masani ong irail: Komail me poson tikitik, da me komail masang ki? I

ari kotin kipadar masani ong ang o sed, ap molelar kaulalap. <sup>27</sup> Aramas akan puria-muiki indada: Daduen men et, me ang o sed kin peiki ong? <sup>28</sup> A lao kotin lei ong palio nan sap en men Kerkasin, ol riamen, me tewil oko ti poa, ap tu ong i; ira kodado sang nan sousou kai, me makar kaulalap, o sota me kak weid wasa o. <sup>29</sup> A kilang, ira weriwer indada: Iesus Sapwilim en Kot, da me kit en wia re omui? Kom kotido kame kit mon ansau o leler? <sup>30</sup> A pwin pwik kalaimun mi kaila wei mangamanga sili. <sup>31</sup> Tewil oko ap poeki re a indada: Ma kom pan kause kit ala, ap muede ong kit, en tilong nan pwin pwik o. <sup>32</sup> I ari kotin masani ong irail: U ko ong! Irail keredi sang, rap tilong nan pwin pwik o. A kilang, pwin pwik o tangdau, tangedi ong wasa ukedi nan sed, irail ari mopelar nan pil o. <sup>33</sup> Silepa kan ap tangdau tanglong ong kanim o kakaireki mekaros, duen me wiaui ong me tewil ti poa ko. <sup>34</sup> A kilang, toum kanim koiei sang pokon dong Iesus. Irail lao kilanger i, rap poeki, a en kotila sang sap arail.

## 9

<sup>1</sup> I ARI kotida pon sop o, kotela pur ong sapwilim a kanim. <sup>2</sup> A kilang, re wa dong i me somau kokon madak, me wonon pon pet. Iesus lao kotin masani ar poson, ap masani ong me somau kokon madak: Nai, kaporopor mau, dip om akan me lapwadar. <sup>3</sup> A kilang, saunkawewe kai mongemongeloleki: Lap o kin lalau. <sup>4</sup> A Iesus lao mangi arail lamelam, ap kotin, masani: Menda komail lamelam sued nan mongiong omail? <sup>5</sup> Pwe ia me mongai ren inda: Dip om akan lapwadar! De inda: Uda aluwei? <sup>6</sup> A pwe komail en asa, me Nain aramas me manaman ong lapwada dip nin sappa iei me a kotin masanieki ong me somau kokon madak: Uda, ale ki om ko ong deu om! <sup>7</sup> I ari udar, koieilar deu a. <sup>8</sup> Pokon lao kilanger mepukat, rap malamalauak kila kapinga Kot, me kotiki ong aramas manaman due met. <sup>9</sup> Iesus lao kotiwei sang wasa o, ap masani aramas amen, me ad a Matäus, me momod nan deun nopwei, ap kotin masani ong i: Idauen ia do! I ari uda idauenla i. <sup>10</sup> Kadekadeo a lao kaipokedi konot nan im o, kilang saunopwei o me dipan me toto iang Iesus o sapwilim a tounpadak kan konokonot. <sup>11</sup> Parisär akan lao kilanger met, ap indang sapwilim a tounpadak kan: Da me omail Saunpadak iangki saunopwei o me dipan akan konokonot? <sup>12</sup> Iesus lao mangi mepukat, ap kotin masani: Me kelail akan sota mau ong saunwini, pwe me somau eta. <sup>13</sup> A komail kola, padakki wewen kaso pot et: I kin polauleki kadek a kaidin mairong isis. I kodon eker dong kalula me dipan

akan, a kaidin me pung kan. <sup>14</sup> En Ioanes a tounpadak kan ap pwara dong re a potoan ong: Da me kit o Parisär akan kin kaisesol pan pak toto, a sapwilim omui tounpadak kang sota kin kaisesol? <sup>15</sup> Iesus ap kotin masani ong irail: Da, toum kamadip en kapapaud pan kak kamauk ni ansau ol kamot mi re 'rail? A kadekadeo eu ran ol kamod pan peukawei sang irail, re ap pan kaisesol. <sup>16</sup> Sota amen me kin deipinaki likau kap likau maring, pwe me depin a pan teirok sang likau o, a por o pan laudela. <sup>17</sup> Pil sota amen me kin kodie ong wain kap nan ed maring, a ma ei ed akan pan ola, a wain pan wudokela, o ed akan pan ola. A re kin kodie ong wain kap nan ed kap, ira karos ap nekinek mau. <sup>18</sup> Ni a kotin masani ong irail mepukat, kilang saupeidi amen ap pedelong, poridi ong i potoan ong: Nai seripein apton melar, a ren kotido, pwil po a lim ar, a ap pan maureda. <sup>19</sup> Iesus ari kotida idauenla i, o sapwilim a tounpadak kan pil iang. <sup>20</sup> A kilang, li amen, me nta pwilipwil par ngaulriau, a kai ong pon palikia o sair imwin sapwilim a likau. <sup>21</sup> Pwe a lamelame: Ma i doke sapwilim a likau, i pan kelailada. <sup>22</sup> A Iesus kotin saupeila; a lao masani i, ap kotin masani: Seripein kaporopor mau, om poson me kakelail uk ada. A li o kelailadar ni auer eta. <sup>23</sup> A Iesus lao kotilong ong nan im en saupeidi o, ap masani saunkasang o moromorong en aramas akan, <sup>24</sup> Ap kotin masani: Kowe sang, pwe seripein en sota melar, pwe a mamair. Irail ap kaurureki i. <sup>25</sup> Aramas akan lao kokok sang, i ap kotilong ong, ale pa a, seripein ap paura. <sup>26</sup> Mepukat ap lolok sili nan sap karos. <sup>27</sup> Iesus lao kotila sang wasa o, ol maskun riamen idauenla i, weriwer indada: Kupura kit, Komui sapwilim en Dawid! <sup>28</sup> A lao kotilong ong nan im o, me maskun ko ap ko dong i. Iesus ari masani ong ira: Koma kamelele, me I kak ong wiada met? Ira potoan ong: Ei Maing. <sup>29</sup> I ap kotin sair mas ara masani: Duen oma poson a pan wiaui ong koma. <sup>30</sup> Mas ara ari pad pasang. Iesus ap kotin kalik ira di masani: Kalaka, pwe meamen de asa! <sup>31</sup> A ira koieilar katiti sili ni sap karos. <sup>32</sup> Ira lao koieilar, kilang, irail ap wa dong i aramas amen, me lotong o tewil ti poa. <sup>33</sup> Tewil lao pakausa sang, me lotong o ap lokaia; pokon o ap malamalauak kila indada: Nan dueta met a saikenta wiauiwer nan Israel. <sup>34</sup> A Parisär indada: Nan saumas en tewil akan me a kausaki sang tewil akan. <sup>35</sup> Iesus ap kotin kakan sili nan kanim laud o me tikitik kan kawewe nan ar sinakoke kan o padapadaki rongamau en wei, o kotin kakelada song en somau o luet akan karos. <sup>36</sup> A lao masani pokon o, ap kotin kupuro kin irail, pwe irail soangiangular o dupokalar

dueta sip akan, me sota sile parail. <sup>37</sup> I ap kotin masani ong sapwilim a tounpadak kan: Nan melel rak me kalaimun, a men dodok me malaulau. <sup>38</sup> Komail ari poeki ren Kaun en rak, en kadarala toun dodok kan nan a rak.

## 10

<sup>1</sup> A LAO kotin molipe penaer sapwilim a tounpadak ekriamen ap kotiki ong irail manaman, en poedi ngen saut akan, pwen kaus ir wei o kamauijala song en somau o luet karos. <sup>2</sup> A iet mar en wanporon ekriamen: Men mas Simon, me maraneki Petrus, o ri a Andreas, o Iakopus nain Sepedäus, o ri a Ioanes; <sup>3</sup> Pilipus o Partolomäus, Tomas o Matäus saunopwei men, Iakopus nain Alpäus, Lepäus, me pil adaneki Tadäus; <sup>4</sup> Simon men Kana o Iudas Iskariot men pangala i. <sup>5</sup> Ekriamen pukat, me Iesus kotin poronela, kotiki ong irail kusoned eu masani: Komail der weweid nani al en men liki kan o der pedelong ong nan kanim en Samaria. <sup>6</sup> A kola ren sip akan en saun Israel, me salongalar. <sup>7</sup> A ni omail kokola komail padapadak indada: Wein nan lang korendor. <sup>8</sup> Kakeada me somau kan, o kamaureda, me melar akan, kamakelekelede, me tuketuk kan, o kause wei tewil akan; a duen komail aleer ni tiak en kisakis, iduen komail pan kisakis weita. <sup>9</sup> Komail der wewa kold, de silper, de mata nan omail ed akan. <sup>10</sup> Pil der ed en sailok, de sakit riau, de sut, de sokon, pwe toundodok me war ong kan a kisin manga. <sup>11</sup> A ma komail pan pedelong ong nan kanim laud de tikitik eu, raparapaki, ma meamen mi lole, me war ong; ari, komail pan mondi re a, lao komail pan ko wei sang. <sup>12</sup> A ma komail pan pedelong ong nan im o, komail pan ranamau ong tou a kan. <sup>13</sup> O ma re war ong, omail popol pan ko pure dong komail. <sup>14</sup> A wasa kis meamen sota pan kasamo komail, de sota men rong omail padak, komail ari pedoi sang nan im o de kanim, ap sepede sang pwel ni nä omail. <sup>15</sup> Melel I indai ong komail, nan a pan mongai ong sap en Sodom o Komora ni ran en kadeik o sang kanim o. <sup>16</sup> Kilang I kadar komail la duete sip akan nan pung en kidi en wel; komail ari lelekong dueta serpent, a tiak mau dueta muroi. <sup>17</sup> Perki aramas, pwe re pan pangalang komail kapung kan, o re pan kame komail nan ar sinakoke kan. <sup>18</sup> O Komail pan wisike wong kaun o nanmarki kai pweki ngai, pwen kadede ong irail, o ong men liki kan. <sup>19</sup> Irail lao pangala komail, ede madamadaua duen tiak en omail pan lokaia; pwe a pan ko ong komail, ni auer o me komail pan inda. <sup>20</sup> Pwe kaidin komail, me lokaia, a Ngen en Sam omail,

me pan kalokaia komail. <sup>21</sup> A pirien eu, amen pan pangala amen, pwen kamela, a sam na seri, a seri ko pan u ong ar papa o nono, o sauasa, pwe ira en kamela. <sup>22</sup> O komail pan tantat ren aramas karos pweki ad ai; a me pan dadaurata, lei imwi i me pan dorola. <sup>23</sup> A ma re pan kame komail nan eu kanim, komail ari tangala nan eu. Pwe melel I indai ong komail, komail sota pan kanikiala kanim en Israel karos, Nain aramas lao pwarador. <sup>24</sup> Tounpadak sota kin laude sang a saunpadak, de ladu laude sang a monsap. <sup>25</sup> A itar ong tounpadak, en paroki ong a saunpadak o ladu dueta a monsap. Ma re kaadaneki kaun en im o Peelsepup, nan melel kaulap, re pil pan wiai ong toun im akan dueta. <sup>26</sup> Komail ari der masak irail, pwe sota me rir kot, me so pan sansaleda, o me okiok, me so pan kadiarokad. <sup>27</sup> Me I indai ong komail nan rotorot, i me komail katiti nan marain; o me pan ko ong nan salong omail, i me komail pan kalok sili pon im akan. <sup>28</sup> Komail der masak irail, me kin kemela pali war, ap sota kak ong kamela pali ngen. A komail masak melel i, me kak ong kasopokela pali war o ngen nan pweleko. <sup>29</sup> Siok riamen sota kin netila ni denar eu? Ari so, sota amen ira pan pupedi nan pwel, ma sota pwilisang ren Sam omail. <sup>30</sup> Ari pit en mong' omail karos me wadawad penaer. <sup>31</sup> Komail ari der masak, pwe komail me mau sang siok toto. <sup>32</sup> Meamen pan ponasa ia mon aramas, nan i me I pan ponasa ren Sam ai, me kotikot, nanlang. <sup>33</sup> A meamen ponsasa ia mon aramas, nan i me I pil pan ponsasa ren Sam ai, me kotikot nanlang. <sup>34</sup> Eder kiki ong, me I kodon kamuei maula sappa; kaidin mui mau, me I kokido, a kodlas pot. <sup>35</sup> Pwe I kodon kaliak toror pasang aramas ong sam a, o seripein ong in a, a li o ong en a paud a nono. <sup>36</sup> O pein toun im en aramas amen pan a imwintiti. <sup>37</sup> Me pok ong sam de in a lapa sang a pok ong ia, nan a sowar ia. O me pok ong na putak de seripein lapa sang a pok ong ia, nan a sowar ia. <sup>38</sup> A me so ale a lopu o idauen ia do, nan a sowar ia. <sup>39</sup> Me pan diar maur, i me pan katia sang, a me kasela maur a pweki ngai, i me pan diarada. <sup>40</sup> Meamen kasamo komail, kin kasamo ia, a me kin kasamo ia, nan a kin kasamo i, me kadar ia do. <sup>41</sup> Meamen kasamo saukop amen ni mar en saukop, pan ale pwain en saukop amen. Me kasamo pung amen ni mar en me pung amen pan ale pwain en me pung amen. <sup>42</sup> O meamen pan ki ong dal en pil lamelamur eu, pwe amen tikitik pukat en nim, ni mar en tounpadak amen, melel I indai ong komail, a sota pan katia sang pwain a.

## 11

<sup>1</sup> KADEKADEO Iesus lao kaimwisokela a masan ong sapwilim a tounpadak ekriamen, ap kotila sang wasa o, pwen kaukawewe o padapadak nan ar kanim akan. <sup>2</sup> A Ioaneis lao ronger nan imateng wiawian Kristus, ap poronela a tounpadak kai. <sup>3</sup> Kalelapok re a: Ir me pan kotido, de sen auiaui amen? <sup>4</sup> Iesus kotin sapeng masani ong irail: Komail koweï kaireki Ioanes, me komail rong o kilang: <sup>5</sup> Me maskun akan kin kilang wasa, o me dangidang kan kin alu, o me tuketuk kan kin makeladar, o me salongepon kan kin rong wasa, o me melar akan kin maureda, o rongamau kin loloki ong me samama kan. <sup>6</sup> O meid pai, me sota pan makar kin ia. <sup>7</sup> Mepukat lao kokola, Iesus ap kotin tapiadar mamasani ong pokon o duen Ioanes: Da me komail koeïla en kilang nan sap tan? Alek pot, me kin dueduälökki ang? <sup>8</sup> De da me komail koeïla en kilang? Aramas amen nan likau muterok? Kilang, me kin likau kida likau muterok, kin mi nan im en nanmarki kan. <sup>9</sup> De da me komail koeïla en kilang? Saukop amen? Ei I indai ong komail a laude sang saukop amen. <sup>10</sup> Pwe ïe i, me intingidier: Kilang I kadarala mo 'mui ai men kadar, me pan koko al mo 'mui. <sup>11</sup> Melel I indai ong komail, sota me ipwidi sang ren li akan, me laude sang Ioanes saunpaptais. Ari so, me tikitik nan wein nanlang, ïe me laude sang i. <sup>12</sup> A sang ni muein Ioanes saunpaptais kokodo lel met wein nanlang kokido eta manaman, ari me manaman akan kin koledi ong irail. <sup>13</sup> Pwe saukop karos o kapung kokopadar lao lel Ioanes. <sup>14</sup> O ma komail men duki ong, nan ïe Elias, me pan kodo. <sup>15</sup> Me salong a mia, men rong, i en rong! <sup>16</sup> A da me I en karasai ong di wet? A ras ong seri kan, me kin momod nan wasan net akan o likelikwir ong kis arail, <sup>17</sup> Indada: Kit kasang ong komail, a komail, sota kakalek; kit kauleki ong komail kaul en mamauk, a komail sota sangesang. <sup>18</sup> Pwe Ioanes pwarado, ap sota kang o nim, a re kin inda: Nan tewil kin ti poa. <sup>19</sup> Nain aramas pwarado, mangamanga o nim, a re kin inda: Kilang, me kaped en nanga o kamom sakau, kompoke pan saunpöwei o me dipan akan, a lolekong o kin diarok kida na seri ko. <sup>20</sup> A kotin tapiada kidaueda kanim akan, me a wiai onger manaman to to, aki re sota kalula: <sup>21</sup> Suedi ong uk Korasin! Suedi ong uk Petsaida! Pwe ma manaman akan, me wiaui ong uk er, wiaui ong Tirus o Sidon, nan melele re pan pitipit kalula nan tuk en likau o nan pas. <sup>22</sup> A I indai ong komail, a pan mongai ong Tirus o Sidon ni ran en kadeik sang komail. <sup>23</sup> A koe Kapernaum, me paidar lel nanlang, pan

pisikindi nan pweleko; pwe ma manaman akan, me wiaui ong uk er, wiaui ong Sodom, nan a pan mimieta lao lel ran wet. <sup>24</sup> A I indai ong komail, a pan mongai ong sap en Sodom ni ran mi kadeik sang koe. <sup>25</sup> Ni ansau ota Iesus kotin tapiadar masani: I kapinga komui Sam, Kaun pan lang o sappa, me komui okila mepukat sang me lolekong o koiok kan, ap kasale ong seri pwelel akan. <sup>26</sup> Ei Sam ai, pwe iduen me komui kupukupura. <sup>27</sup> Meakaros muei ong ia er sang ren Sam ai, o sota amen, me asa sapwilim a Ol, pwe Sam eta, o sota amen, me asa Sam, pwe sapwilim a Ol eta, o me sapwilim a Ol pan kasale ong. <sup>28</sup> Komail karos, me pangadar o toutoular kodo re i I pan kamoleïlei komail la. <sup>29</sup> Ale ong komail ai iok, o padakki sang ia; pwe Ngai me opampap o karakarak melel, komail ari pan diarada kamol pan ngen omail. <sup>30</sup> Pwe ai iok me mangai, o katoutou pai me marara.

## 12

<sup>1</sup> I ANSAU o Iesus kotila nan mat en korn ni ran en sapat, a sapwelim a tounpadak kan men mangadar, rap dolunga sang wan korn o kangkang. <sup>2</sup> Parisär lau kilanger mepwukat, rap patoan ong i: Masani, sapwilim omui tounpadak kan kin wiada, me sota pung, en wiaui ni ran en sapat. <sup>3</sup> A kotin masani ong irail: Komail sota doropwe, me Dawid wiadar ni a o iang akan men mangadar? <sup>4</sup> Duen a pedelong ong nan im en Kot o kangkang prof en kasansal, me sota pung, i o iang akan en kang, pwe samero akan eta. <sup>5</sup> De komail sota wadoker nan kapung o, duen samero akan ar kin kaupali ran en sapat nan im en kaudok ni ran en sapat, ap sota dip arail? <sup>6</sup> A I indai ong komail, i, me laude sang im en kaudok, mi wasa kis et. <sup>7</sup> A ma komail pan asa wewen kasoi pot et: I kin polauleki kadek a kaidin mairong isis, komail sota pan kadeikada me makelekel akan. <sup>8</sup> Pwe nain aramas pil udan Kaun en sapat. <sup>9</sup> A kotila sang wasa o, ap kotilong ong nan ar sinakoke. <sup>10</sup> A kilang, aramas amen mia, me pa a motorlar. Irail idok re a indada: Me pung, en kakelailada ni ran en sapat? Pwe ren kadipa i. <sup>11</sup> I ari kotin masani ong irail: Is aramas nan pung omail, me na sip amen mia, ma a pupedi ong nan por ni ran en sapat, a so pan poridi ong, kida sang? <sup>12</sup> A iaduen aramas amen sota kasampwal kaulap sang sip amen? I me aramas amen kak wia kida me mau ni ran en sapat. <sup>13</sup> I ap kotin masani ong aramas o: Kapa wei pa om! I ari kapa wei, ap maular dueta pali teio. <sup>14</sup> Parisär ap pedoi sang o kapukapung pena, duen ar pan kamatala i. <sup>15</sup> Iesus lao mangi met, ap kotila sang wasa o, a pokon kalaimun idauenla i; i ari kakelailadar irail karos. <sup>16</sup> O masani ong irail, ren der kalok

sili i. <sup>17</sup> Pwen pwaida, me lokido ren saukop Iesaia, me masani: <sup>18</sup> Kilang, i ai ladu, me I piladar, o kompokepa i, me I kin polaule kida. I pan aude kin i Ngen i, o a pan kasale ong men liki kan duen kadeik o. <sup>19</sup> Nan a sota pan akamai de weriwer, o sota amen me pan rong ngil a pon al akan, <sup>20</sup> A sota pan katip pasang alek luet o, o a sota pan kakundi wik inkingkong o, lao a pan kaimwisokala kadeik o. <sup>21</sup> O men liki kan pan kaporoporeki mar a. <sup>22</sup> Me tewil ti poa men, me maskun o lotong ap wisike dong i; i ari kakelailada i, a me maskun o lotong ap lokaia o kilang wasa. <sup>23</sup> Aramas karos ap malamalauak kila indada: Kaidin i sapwilim en Dawid? <sup>24</sup> A Parisär akan lao rongadar, rap indada: Nan sota, me lap en kauseki wei tewil akan, Peelse pup eta, saumas en tewil akan. <sup>25</sup> I ari angi ar lamelam masani ong irail: Wei karos, ma tou a kan pan u pena nan pung ar, a pan ola, o ma toun kanim de toun im eu pan u pena nan pung ar, a sota pan pwaida. <sup>26</sup> O ma Satan pan kause wei Satan, a pan u ong pein i, a iaduen a wei pan kakpwaida? <sup>27</sup> Ma I kin kauseki wei Peelsepup tewil akan, a is me noumail seri kang kin kause kin irail? Irail ari pan omail saunkapung. <sup>28</sup> A ma I kausaki wei Ngen en Kot tewil akan, nan wein Kot lel ong komail er. <sup>29</sup> De iaduen, is me pan kak kolong ong nan im en me kelail amen, kulia sang a kapwa, ma a so saliedi mas me kelail o? A ap pan kak kulia sang a kapwa. <sup>30</sup> Meamen me sota iang ia, iei me palian ia; o me sota kin dolung penang ia, iei me kin kasapoka pasang. <sup>31</sup> I me Ngai indai ong komail, dip karos o lalau pan kak lapwa sang aramas, a lalau ong Ngen sota pan lapwa sang aramas. <sup>32</sup> O me pan lalau Nain aramas, a pan lapwa sang i; a me pan lalau Ngen sarau, a sota pan lapwa sang i, sota nan mui met pil sota nan mui kokodo. <sup>33</sup> Padukedi tuka mau pot, a wa pan mau; de padukedi tuka sued apot, a wa pan sued. Pwe tuka kin diarok kida wa. <sup>34</sup> Wan serpent komail, iaduen komail kak lokaia mau, pwe komail me sued? Pwe aua kin lokaia sang nan audepan mongiong o. <sup>35</sup> Aramas mau kin kida me mau sang nan pai mau en mongiong i, a aramas sued kin kida me sued sang nan pai sued en mongiong i. <sup>36</sup> A I indai ong komail, lokaia mal karos, me aramas inda, pan puk ong ir ni ran en kadeik o. <sup>37</sup> Pwe sang ni om kasokaso koe pan kapung kila, o sang ni om kasokaso koe pan pakadeikada. <sup>38</sup> Saunkawewe o Parisär kai ap sapeng i indada: Saunpadak, se men kilang kilel eu sang re omui <sup>39</sup> A i me kotin sapeng masani ong irail: Di sued o kamal o kin rapaki kilel eu, a sota kilel eu, me pan sansal ong irail, pwe kilel en saukop Iona eta. <sup>40</sup> Pwe duen

Iona a mimi nan kaped en mam kalaimun amen ran silu o pong sili pong, iduen Nain aramas pan mimi nan mongiong en sappa ran silu o pong sili pong. <sup>41</sup> Ol en Niniwe kan pan u ong di wet ni kadeik lapalap o pan kadeikada, pwe re kalua ni ar rongadar padak en Iona, a kilang, me laude sang Iona mi met. <sup>42</sup> Li nanmarki en pali air amen pan u ong di wet ni kadeik lapalap o pan kadeikada; pwe a pwurado sang ni imwin sappa, pwen rong lolekong en Salomo. A kilang me laude sang Salomo mi met. <sup>43</sup> Ngen saut lao kowe sang ren aramas o, a kin tangatang sili nan sap tan akan, rapaki wasan kamol, a sota, me a diarada. <sup>44</sup> I ap kin inda: I pan purelong nan im ai, me i pedoi sanger. A lao puredo, a diar me a tan, kokok, o kapwater. <sup>45</sup> I ari mi koeila, ale ong i ngen isimen, me sued sang pein i; irail lao pedelong ong lole, rap kaukason ia, a aramas pan sued sang mas. Iduen a pan wiaui ong di sued wet. <sup>46</sup> A ni a kotin masani ong pokon o mepukat, kilang, in a o ri a ol akan u liki, re men lokaia ong i. <sup>47</sup> Amen ap potoan ong i: Re kotin mangi, in ar o ri ar ol akan mimi liki o men lokaia ong ir. <sup>48</sup> A a kotin sapeng masani ong, me kaireki ong i: Is in ai o is ri ai ol akan? <sup>49</sup> Ap kotin kapawai lim a pon sapwilim a tounpadak kan masani: Kilang, in ai o ri ai ol pukat! <sup>50</sup> Pwe meamen, me kin wia kupur en Sam ai, me kotikot nanlang, nan i me ri ai ol, o ri ai li, o in ai.

### 13

<sup>1</sup> NI ran ota Iesus kotila sang nan im o, ap kaipokedi pon oror. <sup>2</sup> A pokon kalaimun pokon dong i, i ari kotidang pon sop pot, kaipokedi, a pokon o udar pon oror o. <sup>3</sup> I ari karasaseki ong me toto masani: Kilang, saunkamor o kolan kamorok. <sup>4</sup> Ni a kamokamorok, akai ap moredier ong pon kailan al, manpir ap pirido nam ir ala. <sup>5</sup> A akai moredier wasa takain, wasa pwel pedeped; ir ari pitipit wosadar pweki sota pwel lole. <sup>6</sup> A katipin lao dakadar, re motoredier o mongelar, pweki sota kaluar. <sup>7</sup> A akai moredier nan tuka tetetek; a tuka tetetek wosadar kasoka ir ala. <sup>8</sup> A akai moredier nan pwel mau o wadar: Akai pan me epuki, akai me woneisok, akai me sileisok. <sup>9</sup> Me salong a mia, men rong, i en rong! <sup>10</sup> Tounpadak kan ap pwarado potoan ong i: Da me re kotin kaukawewe ong irail ni karaseras akan? <sup>11</sup> A kotin sapeng masani ong irail: A mui ong komail er, en asa, me rir en wein nanlang, a ap sota mui ong mepukat. <sup>12</sup> Pwe me a mia, ekis pan ko ong, pwen aneki me laud; a me sota a mia, nan a pan katia sang, me mi re a. <sup>13</sup> I me I padaki ong irail ni karaseras. Pwe re kilang wasa, ap sota

kin kilang, o rong wasa, ap sota kin rong, pwe re sota kin dedeki. <sup>14</sup> Nan irail kapung pan kokop en Iesaia, me masanier: Komail pan rongki salong omail, ap sota dedeki, o kilangki mas omail, ap sota weweki. <sup>15</sup> Pwe mongiong en aramas pukat kapitakailar, o salong arail ponlar, o re kamair pena mas arail. Pwe kadekadeo re de kilangki mas arail, o rongki salong arail, o lolokongki mongiong arail, o wukila, a I de kakel irail ada. <sup>16</sup> A mas omail meid pai, pwe re kilang wasa, o salong omail, pwe re rong wasa. <sup>17</sup> Pwe melel I indai ong komail, saukop o me pung akan me toto, me anane en kilang, me komail kin kilekilang, ap sota kilanger, o en rong, me komail kin rongerong, a re sota rongadar. <sup>18</sup> Komail ari rong karasepa wet duen saunkamorok: <sup>19</sup> Meamen rong masan duen wei o ap sota dedeki, me sued ap pwarado, katia sang, me kamoremoredier nan mongiong i, a iei i, me ale war akan pon kaillan al o. <sup>20</sup> A me kamoremoredier wasa takain, iei i, me kin rongada masan o, ap pitipit peren kida ale; <sup>21</sup> A sota kalua a re a, pwe a lol masarang, pwe ansau apwal o kamekam lao pwaida pweki masan o, a ap madang makar kida. <sup>22</sup> A me kamoremoredi ong nan tuka teketek, iei i, me kin rongada masan o, a anan en pai en sappa o widing en dipisou kang kin kasokela masan o, ap so wa. <sup>23</sup> A me kamoremoredi nan pwel mau, iei i, me kin rongada masan o, ap dedeki o wada; akai kin pan me epuki, a akai me woneisok, a akai sileisok. <sup>24</sup> A kotiki ong irail er pil apot karaseras masani: Wein nanlang rasong aramas amen, me kamoredi war mau nan sap we. <sup>25</sup> A aramas lao mairelar, a imwintiti ap pwarado kamoredier dip nan pung en korn ap koieila. <sup>26</sup> A tuka lao wosadar o wadar, dip ap pil pwaradar. <sup>27</sup> Ladu en kaun pan im o kan ap pwaro dong i potoan ong i: Maing, kaidin war mau, me kom kotin kamoredier nan sap omui? A iaduen dip, a ko sang ia? <sup>28</sup> A masani ong irail: Aramas mor sued amen me wiadar. Ladu kan ap potoan ong i: Kom kotin mauki, sen kola matiada sang? <sup>29</sup> A masani: Iermen, pwe komail der matia sang dip iangki korn. <sup>30</sup> A karos pan mimieta lao ansaun rak; ni ansaun rak i pan indang men dolung kan: Ki pena mas dip akan, pira pena ni kap akan, pwe aramas en karongala, a korn ki pena nan ai im en nak. <sup>31</sup> A kotiki ong irail pil apot karaseras masani: Wein nanlang rasong wan tuka eu, me aramas amen ale, padukedi ong nan sap we, <sup>32</sup> Me titikitik sang war karos, a a lao wosada, a kalaaimun sang dip akan, o wiala tuka laud apot, manpir en pan lang akan ap pokon pena o mimi nan ra a kan. <sup>33</sup> A pilapot karaseras me a kotin masani ong irail: Wein nanlang rasong

kalep kis, me li amen ale okila nan kasak en plaua silu, karos lao mutala. <sup>34</sup> Mepukat karos Iesus kotin padapadaki ni karaseras ong pokon o, o sota, me a kotin padaki ong irail, ma sota ni karaseras. <sup>35</sup> Pwen pwaida me lokido ren saukop o, me masani: I pan ki pasang au ai, pwen karaseras o pan kasansaleda me rir akan sang ni tapin kaua. <sup>36</sup> A ap kotin kadar pasang pokon o, kotilong ong nan tanpas o. Sapwilim a tounpadak kan ap kai dong i potoan ong: Re kotin kawewe ong kit karasepan dip nan matual o. <sup>37</sup> A kotin sapeng masani: Me kamoredi war mau, iei Nain aramas. <sup>38</sup> Matuel iei sappa. War mau iei toun wei. Dip iei nain mesued. <sup>39</sup> Imwintiti, me kin kamar ir edi, iei tewil. Rak me kaimwisoke pan sappa. Saundolung pene iei tounlang kan. <sup>40</sup> A duen dip akan a kin usa sang rong kila kisiniai, iduen a pan wiaui ni imwin kaua. <sup>41</sup> Nain aramas pan kadarala na tounlang kan, o re pan ki sang nan wei men kamakar karos, o me kin wiawia me sued. <sup>42</sup> O re pan kasapok ir alang len kisiniai iei wasan mamaiei o teterok. <sup>43</sup> Me pung kan ap pan lingaling dueta katipin nan wein Sam arail. Me salong a mia, men rong, i en rong! <sup>44</sup> Wein nanlang rasong pai eu, me rir nan matuel, me aramas amen diaradar ap okila, o peren kida, koieila, netikilar karos, me a naineki, ap netiadar matuel o. <sup>45</sup> Wein nanlang pil rasong saunet amen, me raparapaki takai kasampwal kai. <sup>46</sup> A lao diaradar eu, me kasampwalia, ap koieila netikilar a dipisou karos, netiada i. <sup>47</sup> Wein nanlang pil rasong uk apot, me kin kadudi nan sed, pwen oro pena song karos. <sup>48</sup> A lao direla, re kin apiadado pon oror, ap mondi pena, deuk ong me mau akan nan dal akan, a me sued akan re kin kasela. <sup>49</sup> Nan iduen a pan wiaui ni imwin kaua: Tounlang kan pan koieila, katoror sang me sued akan me pung kan. <sup>50</sup> O kasapok ir alang len kisiniai, iei wasan maiei o teterok. <sup>51</sup> Iesus kotin masani ong irail: Komail weweki mepukat karos? Re potoan ong: Ei Maing. <sup>52</sup> A ap kotin masani ong irail: I me saunkawewe karos, me sukusukuleki wein nanlang me rasong kaun pan im eu, me kin kapwareda sang a pai me kap o me maring. <sup>53</sup> Kadekadeo Iesus lao kaimwisokela karaseras pukat, ap kotin koieila sang wasa o. <sup>54</sup> A koti dong udan sap we kawewe ong irail nan ar sinakoke. Irail ari puriamui kila indada: Lolekong en Ol men et o a manaman akan ko sang ia? <sup>55</sup> Kaidin i nain kapenta? In a sota adaneki Maria? O ri a ol akan Iakop, o Iosep, o Simon, o Iudas? <sup>56</sup> O ri a li akan, kaidin irail karos mi re atail? Ari, ia wasa mepukat ko sang ia? <sup>57</sup> O irail makar kin i. A Iesus kotin masani ong irail: Sota wasa me saukop so wau ia, nan sap

we ota o ren sau i ko. <sup>58</sup> I ari sota wiadar manaman toto wasa o pweki ar sopuson.

## 14

<sup>1</sup> I DOKAN nanmarki Erodes ronger duen wiawia en Iesus. <sup>2</sup> Ap masani ong sapwilim a ladu kan: Nan i Ioanes saunpaptais, a mauredar sang ren me melar akan, i me a wia kida manaman pukat. <sup>3</sup> Pwe Erodes koledier Ioanes o saliedier ong nan imateng pweki Erodias en ri a Pilip a paud. <sup>4</sup> Pwe Ioanes me masani ong i: A sota muei ong komui en ale i. <sup>5</sup> O a men kamela i, a a masak aramas akan, pwe re wiakin i saukop amen. <sup>6</sup> A en Erodes a ran en ipwidi wiauiet, nain Erodias seripein ap kakalek mo 'rail, i me Erodes peren kidar. <sup>7</sup> I ari inauki ong i, me a pan ki ong i, meakaros, me a pan poeki, ap kotin kaula, <sup>8</sup> A lao pwili sang in a, ap potoan ong: Kotiki dong ia mangan Ioanes saunpaptais pon dal wet. <sup>9</sup> Nanmarki ap kupur suedelar; a pweki a kaula o pweki irail, me iang i kot ni tepel o, a masani ren ki ong i. <sup>10</sup> I ari poronelar en lepuk sang mangan Ioanes nan imateng. <sup>11</sup> Monga ap wisikedor pon dal eu, ap pangalang seripein o, i ap wala ren in a. <sup>12</sup> A tounpadak kan ap pwarador, ale kalep a, sarepedier, rap kola kaireki Iesus. <sup>13</sup> Iesus lao mangi mepukat, ap kotin iangalar sop pot, kotilang sap tan eu. Pokon lao rongadar, rap idauenla i sapsapal sang nan kanim akan. <sup>14</sup> A lao kotila sang wasa o, ap kotin masani pokon kalaimun, ap kupuro kin ir ala, o kotin kakelada, me somau re 'rail. <sup>15</sup> A lao sautik penaer sapwilim a tounpadak kan kaidong i potoan ong: Sap tan eu met o ansau daulier; re kotin kadar pasang pokon o, pwe ren kola nan kanim akan, netiada kang ar manga. <sup>16</sup> A Iesus kotin masani ong irail: Sota kare pan ar kola, komail pan katungole irail. <sup>17</sup> A irail potoan ong i: Sota at tungol met, lupon en prot eta limau o mam eta riamen. <sup>18</sup> A a kotin masani: Wa dong ia! <sup>19</sup> A ap kotin masani, pokon en mondi nan ra, ap kotikida lupon en prot limau o mam riamen, ap kotin masanda nanlang, laolaoki pilitiki pasang o kotiki ong tounpadak kan lupon en prot oko a tounpadak kan ap nek ong pokon o. <sup>20</sup> Irail karos ari manga o medier; rap deuk pena kopou en maremor eisok riau luan kamadip o. <sup>21</sup> A irail, me mangaer, me ol limekid a li o seri kan sota iang wadawader. <sup>22</sup> A ap kotin pain tounpadak kan, ren keredi pon sop pot, pwe ren madangwei mo a lel palio, lao a pan kotin kadar pasang pokon o. <sup>23</sup> A lao kotin kadar pasang ponkon o, ap kotin kelepelar pon nana eu, pwen laolao. A lao, sautik penaer i eta, me kotikot wasa o. <sup>24</sup> A sop o mi ni ailepan sed o lusiluseki iluk kan pwe ang udo sang moa. <sup>25</sup> A kadekadeo nan

lukepan pong Iesus ap kotikot ko dong irail pon sed o. <sup>26</sup> A tounpadak kan lao kilanger i kotikot sili pon sed o, ap masapwekadar indada: Ani amen! Irail ap weriwer pweki ar masak. <sup>27</sup> A Iesus kotin madang kasoi ong irail masani: Kaporopor mau, pwe Ngai met, der masak! <sup>28</sup> A Petrus sapeng i patoan ong: Maing, ma ir, re kotin masan dong ia, i en kowe i re ir pon pil o. <sup>29</sup> A ap kotin masani: Ukedo! Petrus ap keredier sang nan sop o, weweid pon pil o, pwen kola ren Iesus. <sup>30</sup> A lau kilanger ang ma, ap masapwekadar, a ni a pan kirila, a weriwer indada: Maing kupwura ia! <sup>31</sup> Iesus kotin madang kapawei lim a koledi i, masani ong i: O koe meid poson titikit, da me koe so posonki? <sup>32</sup> Ira lao kotidar pon sop o ang ap moledier. <sup>33</sup> A toun sop o ap kaiong i, poridier potoan ong: Melel ir me Sapwilim en Kot! <sup>34</sup> Irail lao kotin kotela, rap kotilang sap Kenesaret. <sup>35</sup> Toun sap o lao asa i, rap kadar sili wasa karos, o re wa dong i me somau kan karos, <sup>36</sup> O poeki re a, ren potoan sair ta imwin sapwilim a likau. A karos, me sair i kelailadar melel.

## 15

<sup>1</sup> PARISÄR o saunkawewe kan ap ko dong i sang Ierusalem, kalelapok re a: <sup>2</sup> Menda sapwilim omui tounpadak kan tiakedi padok en kawa ko? Pwe re sota kin omiom ni ar pan kang prot. <sup>3</sup> A i kotin sapeng masani ong irail: Menda komail pil tiakedi kusoned en Kot pweki omail padok kan? <sup>4</sup> Pwe Kot kotin kusonedadar masanier: Kakaki sam om o in om, o meamen lalau sam a de in a, i en kamela. <sup>5</sup> A komail kin inda: Meamen indang sam a o in a: Korpan, iet wewe: Mairong eu, me koe men aneki sang ia; komail inda, dene sota dip a; i ari sota pan kakaki sam a o in a. <sup>6</sup> Iduen omail tiakedi kusoned en Kot pweki omail padok kan. <sup>7</sup> Malaun akan komail, nan melel, me Iesaia kokopadar iran komail, ni a masani: <sup>8</sup> Aramas pukat kin kaka kin ia au arail, a mongiong arail me doo sang ia; <sup>9</sup> Ari, me mal ar kaudok ia, pwe kusoned en aramas eta, me re kin kaukawewe. <sup>10</sup> I ari molipe pena aramas akan masani ong irail: Rong o weweki! <sup>11</sup> Kaidin me kin ko ong nan aua kin kasaminela aramas, a me kin ko sang nan aua, i me kin kasaminela aramas. <sup>12</sup> Tounpadak kan ap kodo, potoan ong i: Re kotin mangi, me Parisär akan makar kida ni ar rongadar masan o? <sup>13</sup> A kotin sapeng masani: Tuka karos, me kaidin Sam ai nanlang, padukedier, pan weiweida. <sup>14</sup> Puei sang irail; irail me maskun, ap kalua me maskun akan. A ma me maskun amen pan kalua me maskun, nan ira karos pan pupedi ong nan por o. <sup>15</sup> Petrus ap sapeng potoan ong i: Re kotin kawewe ong kit karaseras



pot et. <sup>16</sup> I ari kotin masani: Komail pil sota lolekong? <sup>17</sup> Komail saikenta weweki, meakaros, me kin ko ong nan aua kin kodilong ong nan kaped o ap kin kasapokela? <sup>18</sup> A me kin ko sang nan aua, kin tapida sang nan mongiong, o i me kin kasaminela aramas. <sup>19</sup> Pwe sang nan mongiong o lamelam sued kin tapi sang ia: Kamela aramas, o kamal, o nenek, o pirap, o kadede likam, o lalau. <sup>20</sup> Song pukat, me kin kasaminela aramas. A so omiom ap manga sota kin kasaminela aramas. <sup>21</sup> Iesus ap kotila sang wasa o, kotilang wein Tirus o Sidon. <sup>22</sup> A kilang, li en Kanaan amen, me kodo sang wasa o, likelikwir ong i, potoan ong: Kupura ia! Maing, ir me sapwilim en Dawid! Nai sereipein waiwairokki tewil. <sup>23</sup> A a sota kotin sapeng i meakot. Sapwilim a tounpadak kan ap kai dong i poeki re a potoan ong: Re kotin kadarala i, pwe a kin likelikwir dong kitail. <sup>24</sup> A kotin sapeng masani: Sota me I pakadara dong, pwin sip en saun Israel eta, me salongalar. <sup>25</sup> A a kodo, poridi ong i potoan ong: Maing, re kotin kupura ia! <sup>26</sup> A kotin sapeng masani: A sota mau, en ale en seri ar tungol prot ap kasedi ong ren kisin kidi kan. <sup>27</sup> A potoan ong: Melel Maing, ari so, kisin kidi kan kin namenam maremor akan, me kin pupedi sang ni tepel en ar saumas. <sup>28</sup> Iesus ap kotin sapeng masani ong i: O li, om poson mo laud! A pan wiaui ong uk duen me koe inong iong. Na seripein ap kelailadar ni auer ota. <sup>29</sup> Iesus ari kotila sang wasa o, koti dong liman sed en Kaliläa, a lao kotida pon dol eu ap kaipokedi wasa o. <sup>30</sup> O pokon kalaimun pokon dong i, me wado me dangidang kai, o me maskun, o me lotong, o me sikilikil, o song toto, ap pwilikidi ni aluwilua. A ap kotin kakelail ir ada. <sup>31</sup> Pokon o ap puriamuiki ni ar kilang, me lotong akan lokolokaia, o me sikilikil akan kelailadar, o me dangidang kan alialu, o me maskun akan kilang wasa; rap kapinga Kot en Israel. <sup>32</sup> Iesus lao molipe pena sapwilim a tounpadak kan a kotin masani: I ap pokela pokon en, pwe re mi re i ran silu ap sota kan ar manga, a I sota pan kadar ir ala ni ar sota mangaer, pwe ren der dupokala pon al o. <sup>33</sup> Sapwilim a tounpadak kan ap potoan ong i: Se pan kisang ia prot toto, men kamedela pokon et nan sap tan wet? <sup>34</sup> Iesus kotin masani ong irail: Lopon en prot me depa mi re omai? Irail potoan ong: Me isu o kisin mam kis. <sup>35</sup> I ari kotin masani ong pokon o, en mondi ong nan pwel o, <sup>36</sup> Ap kotikidar lopon en prot isu o kisin mam akai, laolaoki, pwilitiki pasang o kotiki ong sapwilim a tounpadak kan, a tounpadak kan ap nek ong pokon o. <sup>37</sup> Irail karos ari mangaer; o medier; irail ap deuk pena kopou isu luan kamadip o. <sup>38</sup> A irail,

me mangaer, me ol pakid, a li o seri kan sota iang wadawader. <sup>39</sup> A lao kotin kadar pasang pokon o, a kotilang pon sop pot, koti dong impan Maktala.

## 16

<sup>1</sup> PARISÄR o Sadusär akan ap ko do, kasongesong i o poeki i kilel eu sang nanlang. <sup>2</sup> A ap kotin sapeng masani ong irail: A lao sautiker komail kin inda: Lakap a pan ran kaselel eu, pwe lang me waitata. <sup>3</sup> A ni mansang: A pan katau, pwe lang me waitata o rotorot. Komail kak ong kasuiada mom en lang, a komail sota kak kasuiada kilel en ansau. <sup>4</sup> Di sued o kamal o kin ngongki kilel eu, a sota kilel eu, me pan sansal ong irail, pwe kilel en Iona eta. I ari kotin muei sang irail o koti wei. <sup>5</sup> Sapwilim a tounpadak kan lao kotela lel palio, ap sota arail prot, pwe re monokelar. <sup>6</sup> A Iesus kotin masani ong irail: Kalaka o pereki kalep en Parisär o Sadusär akan! <sup>7</sup> Irail ari kasokasoi nan pung arail indada: Nan pweki sota atail prot, me se wado. <sup>8</sup> Iesus lao mangi mepukat, ap kotin masani: Komail meid soposon, menda komail kasokasoi nan pung omai, iran omai sota wado prot oko? <sup>9</sup> Komail saikenta dedekila o komail sota tamanda lopon en prot limau ren aramas limekid o kopou depa, me komail deuk penaer? <sup>10</sup> Pil so lopon prot isu ren aramas pakid, o kopou depa, me komail deuk penaer? <sup>11</sup> Daduen, komail so lolekongki, me kaidin kisin manga, me i kasokasoi; pwe komail en pereki kalep en Parisär o Sadusär akan, <sup>12</sup> Irail ap weweki, me a kaidin masanier, me ren kalaka kalep en prot, pwe ren kalaka padak en Parisär o Sadusär. <sup>13</sup> Iesus lao koti dong wein Säsaarea Pilipi, ap kotin kainoma ren sapwilim a tounpadak kan masani: Da me aramas kin inda, is me ngai, Nain aramas? <sup>14</sup> Irail potoan ong: Akai: Ioanes saunpaptais, a akai: Elias, o pil akai: Ieremias de amen ren saukop oko. <sup>15</sup> Ap kotin masani ong irail: A komail, is me komail kin inda me nai? <sup>16</sup> Simon Petrus ap sapeng potoan ong: Ir me Kristus, Sapwilim en Kot ieias! <sup>17</sup> Iesus ap kotin sapeng masani ong i: Koe meid pai Simon nain Iona, pwe kaidin udok o nta, me kasale ong uk met, pwe Sam ai, me kotikot nanlang, <sup>18</sup> A I pil indai ong uk, koe Petrus, a I pan kauada pon paip wet ai momodisou a wanim en pweleko kan sota pan kak kawela i. <sup>19</sup> I pan ki ong uk kapiri pan wein nanlang kan. A meakot koe pan saliedi nin sappa, pan salidi nanlang; o meakot, koe pan lapwada nin sappa, pan lapwada nanlang. <sup>20</sup> A ap kotin masani ong sapwilim a tounpadak kan, me ren der indang meamen, me i me Kristus. <sup>21</sup> I ansau me Iesus kotin tapiadar kasale ong sapwilim a tounpadak kan, me

a pan kotilang Ierusalem o kalokolok laud ren saumas akan, o ren samero lapalap akan, o ren saunkawewe kan, o me a pan kalokolok toto o kamela o ni ran kasilu a pan maureda, <sup>22</sup> Petrus ap ukadar i, kapukapung i indada: Maing re kotin kupura pein ir, mepukat sota pan pwai ong ir! <sup>23</sup> A ap kotin saupeido masani ong Petrus: Kola muri Satan! Koe men kamakar ong ia, pwe om lamelam kaidin en Kot, a en aramas, <sup>24</sup> Iesus ap kotin masani ong sapwilim a tounpadak kan: Meamen pan idauen ia en tounmeteki pein i, ap wada a lopu, idauen ia. <sup>25</sup> Pwe meamen dorela maur a, pan pupe sang, a meamen kasela maur a pwreki ngai, i me pan diarada. <sup>26</sup> Pwe da kadepa ong aramas o, ma a aneki sappa pon, ap kasela maur a? De a me aramas pan kak kida, pwen kasapaledo maur a? <sup>27</sup> Pwe Nain aramas pan kokido lingan en Sam a, o sapwilim a tounlang kan pan iang i; i ari pan pwain ong aramas akan duen ar wiawia kan. <sup>28</sup> Melel I indai ong komail, akai me iang mimi met, me sota pan mela, irail lao kilang Nain aramas a kodo nan a wei.

## 17

<sup>1</sup> MURIN pong wonu pong Iesus ap kotin ukadar Petrus, o Iakopus, o ri a Ioanes kalua ir dalang pon nana ileila eu kalapuk. <sup>2</sup> I ari kotin linganla mo 'rail silang i lingaling dueta katipin, o sapwilim a likau o puetpuet eta marain eu. <sup>3</sup> A kilang, Moses o Elias pwara dong ir, kasokasoi ong i. <sup>4</sup> Petrus ap sapeng potoan ong Iesus: Maing, meid mau atail kotikot met. Ma re kotin mauki se pan kauada kisin im sili kis: Tanpas ar; o eu sapwilim en Moses, o eu sapwilim en Elias. <sup>5</sup> Ni a kasokasoidar, kilang, pali en dapok pali ap kadupal irail edi; o kilang, ngil eu peido sang nan dapok o, me masani: Iet nai Ol kompok, me I kin polaule kida! Komail ron i! <sup>6</sup> Tounpadak kan lao rongadar met, rapupedier pon mas arail, masapwekadar kaulap. <sup>7</sup> Iesus ap kotido, sair ir, masani: Uda, der masak! <sup>8</sup> Irail lao saradar, sota amen, me re kilanger, pwe Iesus eta. <sup>9</sup> Ari, ni arail kotikot kodido sang ni nana o, Iesus ap kotin masani ong irail masani: Komail depa indai ong meamen duen kasansal o, Nain aramas lao mauredar sang ren me melar akan. <sup>10</sup> Sapwilim a tounpadak kan kalelapok re a indada: Da me saunkawewe kan kin indinda, dene Elias pan kotido mas? <sup>11</sup> A kotin sapeng masani ong irail: Nan melel, Elias pan pwarado mas kapungala karos. <sup>12</sup> A ngai indai ong komail, Elias me pwaradoer, a re sasa i, pwe irail wiai ong i meakan, me re men wiada. Iduen Nain aramas pil pan kamekam re 'rail. <sup>13</sup> Tounpadak kan ap asadar, me a kotin masani ong irail

duen Ioanes saunpaptais o. <sup>14</sup> Irail lao lel dong pokon o, aramas amen poto dong i kelepuke mo a sakaradar: <sup>15</sup> Maing kupura nai ol o, pwe a pweipwei o madak kaulap, pwe pan pak toto a kin pupedi nan iai o nan pil, <sup>16</sup> Ngai ari wa dong i ren sapwilim ar tounpadak kan, a irail sota kak kakelada i. <sup>17</sup> Iesus ap kotin sapeng masani: Di wet meid soposon o katiwo. Ia arain ai pan mi re omail? Ia arain ai pan kokoa komail? Wa dong ia! <sup>18</sup> Iesus ap kotin kidaua i, tewil ari kodi sang lole; putak o ap kelailadar ni auer ota. <sup>19</sup> A tounpadak kan ap kelepo poto dong Iesus potoan ong: Da me kit so kak kauseki wei sang i? <sup>20</sup> A ap kotin masani ong irail: Aki omail soposon. Pwe melel I indai ong komail, ma omail poson pan laude ong wan katiring, komail pan kak indang nana wet: Koda sang wasa en, kola monen! I ap pan kola, sota me sota pan kak pa omail. <sup>21</sup> Song wet sota kin koki sang meakot, kapakap o kaisesol eta. <sup>22</sup> A ni ar kotikot sili nan wein Kaliläa, Iesus kotin masani ong irail: Nain aramas pan pangalang nan pa en aramas. <sup>23</sup> Irail pan kamela i, a ni ran kasilu a pan maureda. Irail ari mamauk kaulap. <sup>24</sup> Irail lao kotilon ong nan Kapernaum, saunopwei kai ap ko dong Petrus indang i: Omail Saunpadak sota kin iang nopwei? <sup>25</sup> A masanier: Ei. A lao pedelong ong nan im o, Iesus ap kotin madang masani: Simon, da me koe lamelame, nanmarki en sappa kin ale taksis de nopwei sang ren is? Sang ren nairail seri de sang men liki kan? <sup>26</sup> Petrus potoan ong i: Sang ren men liki kan. Iesus kotin masani ong i: Ari, seri kan me saladok. <sup>27</sup> Ari so, pwe kitail der kamakar irail ada, kola ni oror kasedi kas, a mam men mas, me pan lodi, apiada, kasara pasang au a, koe pan diar lepen moni lep; i me koe pan ale o kida ai o noum.

## 18

<sup>1</sup> NI auer ota tounpadak kan poto dong Iesus potoan ong: Iaduen is me pan lapalap nan wein nanlang? <sup>2</sup> Iesus lao kotin molipeido kisin seri amen, ap kotin kotiki ong nan pung arail. <sup>3</sup> Masani: Melel I indai ong komail, ma komail sota pan wukila, wiala song en kisin seri, komail sota pan kak ko ong nan wein nanlang. <sup>4</sup> Ari, meamen pan kasapwiledi pein i, dueta kisin seri men et, i me pan lapalap nan wein nanlang. <sup>5</sup> O ma amen apwali kisin seri men due met ni ad ai, i me kin apwali ia. <sup>6</sup> A meamen me pan kamakar amen ir; me tikitik, me poson ia, a mau ong, takai en plaua eu en sali ong tapin wor a, ap kamopela nan madau wasa me lol. <sup>7</sup> Suedi ong sappa pweki a men kamakar akan, Ari so, men kamakar akan udan mia; sued i ong aramas o, me men kamakar pan tapi sang ia. <sup>8</sup> A ma apali

en pa om de apali en nä om pan kamakar uk, lepuke sang, o kase sang uk, pwe a mau ong uk ko ong maur ni om dangidang de sikilikil, sang om pa de nä pokon mia, ap ko ong kisiniai soutuk. <sup>9</sup> O ma apali en mas om pan kamakar uk, waikada sang o kase sang uk, pwe a mau ong uk, ko ong maur ni om mas pali, sang mas om pokon mia ap loki-dokila nan iai en pweleko. <sup>10</sup> Kalaka, pwe komaail der mamaleki amen tikitik pukat; pwe I indai ong komaail, me arail tounlang kan, me mi nanlang, kin ariri Sam ai, me kotikot nanlang. <sup>11</sup> Pwe Nain aramas kodon dorela, me salongalar akan. <sup>12</sup> Da me komaail lamelame, ma aramas amen, naineki sip epuki, a amen irail pan salongala, a so pan pwilikidi duekduamen pon nana, ap kola raparapaki me salongala? <sup>13</sup> A ma a pan diar, melel I indai ong komaail, a pan peren kida, me men en sang duekduamen, me sota salongalar. <sup>14</sup> Iduen Sam omaail, me kotikot nanlang, sota kotin men, amen kisin seri pukat en salongala. <sup>15</sup> A ma ri om ol wia dip ong uk, en kelep kila i, kapung ong i dip a; ma a pan rong uk, nan koe kasapaledo ri om. <sup>16</sup> A ma a sota pan rong uk, ap ukada amen de riamen, pwe mekaros en mi ren saunkadede riamen de silimen. <sup>17</sup> A ma a kang rong irail, ap kaireki momodisou, a ma a pil kang rong momodisou, ap wia kin i men liki o saunopwei men. <sup>18</sup> Melel I indai ong komaail, me komaail pan saliedi nin sappa, pan salidi nanlang, o me komaail pan lapwada nin sappa, pan lapwada nanlang. <sup>19</sup> I pil indai ong komaail, ma riamen nin sappa pan minimin pene ni meakot, me re men poeki, a pan pwai ong ira sang Sam ai, me kotikot nanlang. <sup>20</sup> Pwe wasa kis, me riamen de silimen pokon pena ni ad ai, i wasa I kin mi nan pung arail. <sup>21</sup> Petrus ap kai dong i potoan ong: Maing, pan pak depa i en makeki ong ri ai ol o, me wia dip ong ia? A itar ma a pan me isepak? <sup>22</sup> Iesus kotin masani ong i: I indai ong uk, kaidin isepak eta, a pan pak isu wad iseisok. <sup>23</sup> I me wein nanlang rasong nanmarki amen, me pan kapukapung na ladu kan. <sup>24</sup> A ni a tapiada kapukapung, amen ap wisike dong i, me pwaipwandeki talent nen. <sup>25</sup> A ni sota a men pwain, a monsap ap masanier, me a pan netila, o a paud, o na seri kan, o karos, me a aneki, pwen pwaında. <sup>26</sup> A ladu o ap poridi mo a pongi, potoan ong: Maing kom kotin kanongama ong ia, i pan pwain ong komui karos. <sup>27</sup> A monsap en ladu o ap pokela, ap lapwada o makeki ong i a pwaipwand. <sup>28</sup> A ladu ota ap koeila, diaradar kis a ladu amen, me pwaipwand ong i denar epuki; i ari koleli i, padik pena tapin wor a indada: Kapungala, ma om pwaipwand mia. <sup>29</sup> Ladu ap poridi mo a, poeki indada: Kom kotin kanongama ong

ia, i pan pwain ong komui. <sup>30</sup> A a kang, ap koeila, kasedi ong nan imateng lao a kapungala a pwaipwand. <sup>31</sup> A kis a ladu kan lao kilanger me wiauier, rap mauk kaulap, koeila kaireki arail monsap karos, me wiauier. <sup>32</sup> A monsap ap ekere dong i, masani ong i: Koe meid ladu sued amen! I make ki ong uk er om pwaipwand karos pweki om poeki re i. <sup>33</sup> Menda koe sota kadek ong ri om ladu, duen i kin kadek ong uk er? <sup>34</sup> A monsap ap makar kidar o pangalang i ren saun kalokolok lao a kapungalar a pwaipwand karusia. <sup>35</sup> Iduen Sam ai nanlang, pan pil wia ong komaail, ma komaail sota pan makeki sang nan mongiong omaail ong ri omaail.

## 19

<sup>1</sup> KADEKADEO Iesus lao kaimwisokela padak pukat, ap kotila sang Kaliläa, koti dong wein Iudäa palilan Iordan. <sup>2</sup> O pokon kalaimun idauendo i. I ari kotin kakelail ir adar wasa o. <sup>3</sup> Parisär akai ap kodo kasongesong i indada: Me pung, ol en kasela a paud pweki okotme? <sup>4</sup> A ap kotin sapeng masani: Komaail sota doropwe, me i, me wia ir adar ni tapio, a kotin wiadar ol o li? <sup>5</sup> A ap kotin masani: I me aramas amen pan pweidedi sam a in a pat ong eta a paud; ira ari pan udukala eu; <sup>6</sup> Ira ari solar riamen pwe uduk eu. Ari, me Kot kotin kapad penaer, aramas depa kamueit pasang. <sup>7</sup> Irail ap indai ong i: A da me Moses masaniki, kisin likau en kamueit en koda, ol ap pan muei sang a paud? <sup>8</sup> A kotin masani ong irail: Moses mueid ong komaail er, en kasela omaail paud akan pweki mongiong omaail kapitakailar. A sang ni tapi o a sota kin due. <sup>9</sup> A ngai indai ong komaail: meamen kasela a paud, ma sota pweki nenek, ap paudekida amen; nan a kamal, o me pan paudeki, me lokidokilar o, a kin kamal. <sup>10</sup> Sapwilim a tounpadak kan ap potoan ong i: Ma iduen kusoned, me ol o en kapwaiadang a paud, a sota mau ong papaud. <sup>11</sup> A ap kotin masani ong ir: Kaidin karos, me pan kak weweki padak pot et, irail eta, me a muei ong er. <sup>12</sup> Pwe akai mia, me udan sota unsok, a akai, me aramas ki sanger, a pil akai, me wia kapwat pweki wein nanlang. Meamen kak ong weweki, i en weweki. <sup>13</sup> Kisin seri kai ap wisike dong i, pwen pwil po 'rail lim a kan o laolaoki, a tounpadak kan kapoui irail. <sup>14</sup> A Iesus kotin masani: Mueid ong kisin seri kan, en ko dong ia. Der kalik irail edi! Pwe iei song en me udan wein nanlang. <sup>15</sup> I ari kotikida po 'rail lim a kan, ap kotila sang wasa o. <sup>16</sup> O kilang, amen poto dong i potoan ong: Saunpadak da me mau kot, i en wiada, pwe i en aneki maur soutuk? <sup>17</sup> A ap kotin masani ong i: Menda koe idok re i duen me mau? Pwe amen ta me mau. A ma

koe men ko ong maur, dadaurata kusoned akan! <sup>18</sup> A ap potoan ong: Kusoned da? A Iesus kotin masani, iet akan: Koe der kamela aramas; Koe der kamal; Koe der pirap; Koe der kadede likam; <sup>19</sup> Kakaki sam om o in om; o pok ong men imp om dueta ong pein uk. <sup>20</sup> Manakap ap potoan ong i: Mepukat karos i kapwaiadar; a da me i en pil wia? <sup>21</sup> Iesus kotin masani ong i: Ma koe men unsokela, u koweji, netikila om dipisou, ap kisakisaki ong me samama kan, koe ap pan aneki om pai nanlang, o kodo idauen ia do. <sup>22</sup> Manakap lao ronger masan pot et, ap mamauk koeila, pwe a dipisou me toto. <sup>23</sup> Iesus ap kotin masani ong sapwilim a tounpadak kan: Melel I indai ong komail, meid apwal ong me kapwapwa kan, en pedelong ong nan wein nanlang. <sup>24</sup> I pil katitiki ong komail, me mangai, kamel en tilong nan au en dikok eu, sang me kapwapwa en ko ong nan wein Kot. <sup>25</sup> Sapwilim a tounpadak kan lao rongadar met, ap puri-amuiki kaulap indada: Ari, is me pan kak kamaurela? <sup>26</sup> Iesus ap kotin saupeiwong irail, ap kotin masani ong irail: A so kak pan aramas, a ren Kot mekaros me kak. <sup>27</sup> Petrus ap sapeng poto dong i: Masani, kit likidmaliela mekaros, ap idedauen komui, a da me pan katingi kit? <sup>28</sup> Iesus ap kotin masani ong irail: Melel I indai ong komail, komail me idedauen ia do ni ipwi sapal, Nain aramas lao mondi pon mole lingan, komail pil pan mondi pon deun kadeik, kakaunda kainok en Israel eisokriau. <sup>29</sup> O meamen kasela im a kan, de ri a ol o li akan, de sam a, de in a, de a paud, de seri, de sap pweki ad ai, nan a pan ale pan pak epuki o sosoki maur soutuk. <sup>30</sup> A me toto men moa, pan muri; a men muri pan moa.

## 20

<sup>1</sup> PWE wein nanlang rasong kaun pan im amen, me sangkonai ong raparapaki toundodok kai nan a mat en wain. <sup>2</sup> Irail lao inauki pena, me denar eu ni ran eu, ap kadar ir ala nan a mat en wain. <sup>3</sup> A pil kotila ni auer kasilu, ap masani akai, me momod mal nan deun saunet akan, <sup>4</sup> Ap masani ong irail: Komail pil kola nan mat en wain o, o meakat me pung, i pan pwain ong komail; irail ari kola. <sup>5</sup> A pil kola ni auer kawonu o kaduau o wiadar dueta. <sup>6</sup> A pil kotila ni auer eisokeu, ap diadar akai, me momod mal, ap masani ong irail: Da me komail momodeki mal ran pon? <sup>7</sup> Irail potoan ong: Aki sota amen, me kadokeki kit. Ap masani ong irail: Komail pil kola nan mat en wain o, komail pan ale me pung. <sup>8</sup> A lao sautik penaer monsap en mat en wain masani ong a saunkoa: Kapokon pena toundodok kan o pwain ong irail. Tapiada sang ren men pwand oko lao kokodo lel

men madang kan, <sup>9</sup> Me kadodokier ni klok eisokeu kan ap kodo, amen amen ap ale denar eu. <sup>10</sup> A men mas akan lao kodo, rap kiki ong, me re pan ale siki sang, a re pil aleer denar ta ieu. <sup>11</sup> Irail lao ale, rap lipaned ong monsap o. <sup>12</sup> Indada: Mepukat dodok auer ta ieu, a komui karasai kit pena; kit me dodokki apwal en ran o karakar en katipin. <sup>13</sup> A ap kotin sapeng masani ong amen re 'rail: Kompoke pai, kaidin me sapung, me i wiai ong uk. Kita sota inauki pena denar eu? <sup>14</sup> Ale me om, koweji, i men pwain ong me pwand pukar rasong uk. <sup>15</sup> De iaduen, a sota pung, i en wiaki me udan ai, me i mauki? De por en mas om me sued pweki ai kadek? <sup>16</sup> Ari, me pwand akan pan moa, a me moa kan pan pwand, pwe me toto paeker, a me malaulau me piladar. <sup>17</sup> Iesus lao kotin kodala Ierusalem, a kotin kelepe kila tounpadak ekriamen pon al a, masani ong irail: <sup>18</sup> Kilang, kitail kin kodalang Ierusalem o Nain aramas pan ko ong ren samero lapalap o saunkawewe kan, o irail pan kadeikada, en kamela i. <sup>19</sup> O re pan pangala i ren men liki kan, pwen kapikapiti i, o kaloke, o kalopuela, a ni ran kasilu a pan maureda. <sup>20</sup> In en nain Sepedäus ap poto dong i, a na putak riamen iang i, pongi i o poeki okotme re a. <sup>21</sup> A ap kotin masani ong i: Da me koe mauki? A potoan ong i: Re kotin mueid ong ai tungol putak riamen, en mondi re ir, amen ni pali maun omui, amen ni pali maing omui nan omui wei. <sup>22</sup> A Iesus kotin sapeng masani: Koma sota asa, me koma poeki. Koma kak nim dal me I pan nim? Ira potoan ong: Se kak. <sup>23</sup> A kotin masani ong ira: Melel, komail pan tungole ai dal, a momod ni pali maun o maing i, I sota kak mueid ong, pwe pwais en irail me a onop onger sang ren Sam ai. <sup>24</sup> Ni en ek oko ar rongadar, ap sude kidar priren o. <sup>25</sup> A Iesus kotin molipe ir do masani: Komail asa, duen saupeidi en wei pokon ar kin poe irail edi, o me lapalap akan kin manaman ong irail. <sup>26</sup> A duen met a sota pan wiaui nan pung omail. A me men laud nan pung omail, en papa komail. <sup>27</sup> O meamen re omail, me men saumas, i en lidui komail. <sup>28</sup> Dueta Nain aramas, me kaidin kodo, pwe aramas en papa, a pwe i en papa o kida maur a wiliandi me toto. <sup>29</sup> Ni arail kotila sang leriko, pokon kalaimun idauen la i. <sup>30</sup> A kilang, ol maskun riamen momod ni kailan al o. Ni ara rongadar, me Iesus kotin daulul, ira ap likelikwir indada: Maing kupura kit, ir me sapwilim en Dawid! <sup>31</sup> A pokon o kidau ira da, pwen nenenla. A ira kalaudela ara likelikwir indada: Maing, kupura kit, ir me sapwilim en Dawid! <sup>32</sup> Iesus ari kotin udi, molipe ira do masani: Da me koma mauki, I en wiai ong koma? <sup>33</sup> Ira potoan ong:

Maing, mas at en kapad pasang! <sup>34</sup> Iesus ari kupuro kin ira dar o kotin sair mas ara. Mas aru ari madang pad pasanger; ira ap idauenla i.

## 21

<sup>1</sup> NI arail koren iong Jerusalem o lel ong Petpake impan dol Oliwe, Iesus ap kotin poronela tounpadak riamen. <sup>2</sup> Masani ong ira: Koma ko ong nan kanim monen, a madang koma pan diar esel amen, me salidi, o na pul mi imp a, lapwa ira da, ap kare dong ia! <sup>3</sup> A ma meamen pan indang koma meakot, koma pan indada: Kaun o men dake, i ari pan madang kadar ira do. <sup>4</sup> A mepukat karos wiaui, pwen pwaida, me lokido ren saukop o me masani: <sup>5</sup> Kaireki nain Sion sripein: Kilang, om Namarki kotido re om. A kotin opampap o kaipokedi pon eselli amen. <sup>6</sup> A tounpadak ko lao kolar, o wiadar duen Iesus kotin masani ong ira, <sup>7</sup> Ira ap wado esel o na, ap irepadi po 'ra arail likau kan a ap kotin kaipokedi poa. <sup>8</sup> O pokon kalaimunia irepadi arail likau kan nani al o, a akai paledier ran tuka kan irepadi nani al o. <sup>9</sup> A pokon o, me tiong moa, o me idauen, ngisingis indada: Osiana ong sapwilim en Dawid! Meid iasanai me kotido ni mar en Kaun, osiana nanlang. <sup>10</sup> A lao kotilong ong nan Jerusalem, toun kanim ap mokimokid indada: Is i? <sup>11</sup> Pokon o katitiki: Nan i Iesus, saukop en Nasaret en Kaliläa. <sup>12</sup> Iesus ap kotilong ong nan im en kaudok en Kot, ap kotin kase sang karos, me kin netinet nan im en kaudok, o kotin wukededi tepel en saunkawilian moni ko, o deun men netin muroi. <sup>13</sup> O kotin masani ong irail: A intingidi: Im ai pan adaneki im en kapakap, a komail wia kilar deu en lipirap. <sup>14</sup> A me maskun o me sikil akan poto dong i nan im en kaudok o; i ari kotin kakel irail adar. <sup>15</sup> A samero lapalap o saunkawewe kan lao kilanger manaman akan, me a kotin wiadar, o seri kan nan im en kaudok, me ngisingis indada: Osiana ong sapwilim en Dawid! Irail ap makara kidar, <sup>16</sup> Indai ong i: Kom sota mangi, me mepukat katitiki? A Iesus kotin masani ong irail: Ei, komail saikenta doropwe: Sang nan au en seri o me kin kang didi, ir me kotin kapwaiadar kaping eu? <sup>17</sup> I ari kotin mui sang irail, kotila sang nan kanim o, koti dong Petanien o pweikidi wasa o. <sup>18</sup> A ni mangang ni a kotin purlang kanim o, ap men konotedar: <sup>19</sup> A kotin masani tuka pik pot ni kailan al o, ap kotilang i. A sota, me a kotin di- aradar; pwe ta eta, ap kotin masani ong i: Koe solar pan wa kokolata! A tuka pik ap madang mongedier. <sup>20</sup> Tounpadak kan lao kilanger, irail ap puriamui kidar indada: Daduen tuka pik o madang mongelar. <sup>21</sup> A Iesus kotin sapeng masani ong irail: Melel I

indai ong komail, ma komail poson, ap sota peikasal, kaidin met eta, me wiaui ong tuka pik en, me komail pan kak wiada, pwe ma komail pan indang nana wet: Mokid wei lokidokila nan madau, nan a pan pwaida. <sup>22</sup> O meakaros komail pan poeki ni omail kapakap, ap poson komail pan ale. <sup>23</sup> A lao kotilong ong nan im en kaudok o, samero lapalap akan o saumas en toun sap o ap ko dong i ni a kotin kaukawewe indada: Manaman en is, me komui wiaki mepukat? O is me ki ong komui manaman wet? <sup>24</sup> A Iesus kotin sapeng masani ong irail: I pan pil kalelapok meakot re omail, ma komail pan sapeng ia, I pil pan indang komail manaman en is, me I wiaki mepukat. <sup>25</sup> En Ioanes a paptais a tapi sang ia? Men nanlang de me ren aramas? Irail ap lamelame nan pung arail katiti, ma kitail pan inda men nanlang, a pan masani ong kitail: Da me komail so posonki i? <sup>26</sup> A ma kitail inda, me ren aramas, kitail masak pokon o, pwe karos kin wia saukopki Ioanes, <sup>27</sup> Irail ari sapeng Iesus potoan ong: Kit sota potoan. I ari pil masani ong irail: I sota pil pan indai ong komail, manaman en is, me I wiaki mepukat. <sup>28</sup> A iaduen omail lamelam? Aramas amen naineki ol riamen. A kola ren amen indang i: Lao, kola ran wet dodok nan ai mat en wain. <sup>29</sup> A sapeng indada: I sota mauki; a mur ekis a kalukila, ap koieila. <sup>30</sup> O a kola ren me teio indai ong pil dueta. I me sapeng indada: Ei maing; ap sota kola. <sup>31</sup> Ari, is re 'ra, me wiadar insen en sam a? Irail potoan ong i: Men mas o. Iesus kotin masani ong irail: Melel I indai ong komail, saunopwei o me nenek kan pan mo 'mail pedelong ong nan wein Kot. <sup>32</sup> Pwe Ioanes pwara dong komail, padapadak ong komail duen al pung, a komail sota kamelele i; a saunopwei o me nenek kan kamelele i. A komail lao kilanger; komail sota kalukila, pwen kamelele i. <sup>33</sup> Komail rong pil apot karaseras! Kaun pan im amen padukedier mat en wain eu o kele pene, ap weirdar deun men wungid wan wain, o kauada im en daulik eu, ap kasile kin i ong saumat akai, o momaitelar nan wai. <sup>34</sup> A lao ansau en rak, a kadaralang saumat akan a ladu kai, pwen ale a wan wain. <sup>35</sup> Saumat akan ap saikedi a ladu kan; re woki amen, kamela amen, a amen me re kate. <sup>36</sup> A pil kadarala ladu kai, toto sang men mas, Irail ari wiai ong irail pil dueta. <sup>37</sup> A ikmuri a kadara wong irail na ol masani: Nan re pan masak nai ol. <sup>38</sup> A saumat akan lao kilanger ol o, irail ap kasokasoi nan pung arail: I me pan ale soso, ukodo kitail en kamela i, a kitail pan id ale a soso. <sup>39</sup> Irail ari saikedi i o kasapoke sang i nan mat en wain o, o kamela i. <sup>40</sup> Ari, monsap en mat en wain lao pwarado, da me a pan wiai ong saumat

pukat? <sup>41</sup> Irail potoan ong i: A pan kamela aramas sued pukat, ap pan neki ong akai saumat a mat en wain o, me pan ki ong i wan wain ni ansau me kon ong. <sup>42</sup> Iesus ap kotin masani ong irail: Komail saikenta doropwer nan kisin likau kan: Takai o, me sause kan kasapokelar, ap id wialar takai en pukakaim. Mepukat wiauiet ren Kaun o, men kapuriamui patail? <sup>43</sup> I me I indai ong komail, wein Kot pan sapadoke sang komail, ap ko ong eu kainok, me pan kida wa. <sup>44</sup> O meamen pupedi ong pon takai wet, pan ola, a meamen me a pan pupedi ong poa, a pan pitaki pasang i. <sup>45</sup> A samero lapalap o Parisär akan lao rongadar a karaseras akan, re mulikiadar, me a kotin karaseras kin irail. <sup>46</sup> Irail ari masamasan sili en saikidi i, a re masak aramas akan, pwe re wia kin i saukop amen.

## 22

<sup>1</sup> A IESUS kotin sapeng o pil karaseras ong irail masani: <sup>2</sup> Wein nanlang rasong nanmarki amen, me kamadipe na ol ni ran en a kapapaud. <sup>3</sup> O a kadarala na ladu kan, pwen luke dong kamadip o, me kileledier akan; a re kang kodo. <sup>4</sup> A pil kadarala akai ladu masani: Kaireki me kileledier akan: Kilang, i kaonopadar ai kamadip o: nai kau ol o man wi kan me kamelar, o karos nikier, ko dong kamadip en kapapaud! <sup>5</sup> A irail sota insenoki, ap kowe, amen nan sap we, o amen ko ong dodok. <sup>6</sup> A me tei kan saikidi a ladu kan kaloke o kame ir ala. <sup>7</sup> Nanmarki ap makara kidar, kadarala a saunpei kan, kamela me lolap oko o isikedar ar kanim o. <sup>8</sup> A ap indang a ladu kan: Ari, kamadip onoper, a me kileledier akan sota war ong. <sup>9</sup> Komail ari kowe nan al akan, a karos me komail diar, en kalua dong kamadip o. <sup>10</sup> Ladu kan ap kola nani al akan, kapokon pena karos, me irail diadarar, me sued o me mau kan; kamadip ari tounlar. <sup>11</sup> A nanmarki lao pwarado, en kilang toun kamadip, ap diadarar aramas amen, me sota a kapwat, <sup>12</sup> A ap masani ong i: Kompoke pai, iaduen om kak pedelong, pwe sota om kapwat? I ari sapaimokid. <sup>13</sup> Nanmarki ap masani ong papa kan: Saliedi i pa o nä akan, ale o kasapokela nan rotorot liki iei wasan maiei o teterok. <sup>14</sup> Pwe me toto paekeredo, a me malaulau piladar. <sup>15</sup> Parisär ap pokon pena, kaparok pena duen ar pan kasapunga i sang a masan; <sup>16</sup> Irail ap kadaralang i nairail tounpadak kan iangaki ladun Erodes kan, potoan ong: Saunpadak, se asa, ir me kotin melel, o kotin kawewe melel duen al en Kot o re sota kotin kupuroki meamen, pwe re sota kotin kasampwaleki sansal en aramas. <sup>17</sup> Ari, re kotin masani ong kit kupur ar. Me pung, en nopwei ong nanmarki de so? <sup>18</sup> A Iesus lao kotin mangi

ar me suet, ap masani: Malaun komail, da me komail kasongesong kin ia? <sup>19</sup> Kasale dong ia moni en nopwei! Irail ap potoan ong i denar eu. <sup>20</sup> A kotin masani ong irail: Mom en is o inting wet? <sup>21</sup> Irail potoan ong i: En nanmarki, a i kotin masani ong irail: Ari, komail ki ong nanmarki, me nain nanmarki, o ong Kot, me sapwilim en Kot. <sup>22</sup> Irail lao rongadar met, rap puriamuiki o muei sang i, o koieilar. <sup>23</sup> Ran ota Kadusär akai ko dong i, me kin inda, me dene me melar akan solar pan maureda, ap kalelapok re a. <sup>24</sup> Indada: Saunpadak, Moses masani, ma meamen melar o sota na seri, ri a ol en id paudeki a paud, pwen kaipwi ong ri a kadaudok a. <sup>25</sup> Ari, pwin pirien eu mi re at, ol isimen. Meseni paudeki li amen, ap melar, a sota kadaudok a, ap kakaliki ong ri a ol a paud; <sup>26</sup> Pil dueta kariamen o kasilimen kokola lao kaisimen. <sup>27</sup> A ikmuri li o pil melar. <sup>28</sup> Ari; ni en me melar akan ar pan iasada, a pan en is a paud ren me isimen, pwe irail karos me paudekidar i? <sup>29</sup> A Iesus kotin sapeng masani ong irail: Komail meid sapung pwe komail so weweki kisin likau kan de mana en Kot. <sup>30</sup> Pwe me mauredar akan solar pan papaud de kapapaud, pwe irail dueta tounlang en Kot akan, me mimi nanlang. <sup>31</sup> Komail saik doropwe duen en melar akan ar pan maureda, me lolok ong komail sang ren Kot, me kotin masani: <sup>32</sup> Ngai Kot en Apraam o en Isaak o en Iakop? A kaidin Kot en me melar akan, pwe en me maur akan. <sup>33</sup> A pokon o lao rongadar met, irail ap puriamuiki a padak. <sup>34</sup> A Parisär akan lao rongadar, me a kotin kadukiedier Sadasär akan, ap pokon pena. <sup>35</sup> Amen irail, saunkawewe men, kasongesong i potoan ong: <sup>36</sup> Saunpadak, kusoned da me lapalap nan kapung o? <sup>37</sup> A Iesus kotin masani ong i: Koe en pokeki ong Kot om Kaun mongion om unsok, o ngen om unsok, o om lamelam unsok. <sup>38</sup> Iei met me moa en kusoned akan. <sup>39</sup> O me kariau me dueta: Koe en pok ong men imp om dueta ong pein koe. <sup>40</sup> Kusoned riau met me audepan kapung o saukop akan. <sup>41</sup> Ni en Parisär akan ar momod pena, Iesus ap kotin kainoma re 'rail. <sup>42</sup> Masani: Da me komail lamelame duen Kristus, nain is i? Re potoan ong: Sapwilim en Dawid. <sup>43</sup> A kotin masani ong irail: A iaduen da me Dawid kaadaneki i Kaun reng Ngen ni a masani: <sup>44</sup> Kaun o kotin masani ong ai Kaun, mondi ong ni pali maun i, lao I pan wia kida om imwintiti utipan nä om? <sup>45</sup> A iaduen, ma Dawid kaadaneki i Kaun, a pil pan kak na ol? <sup>46</sup> A sota amen, me kak sapengki i meakot, o solar me idok meakot re a kokolata.

## 23

<sup>1</sup> IESUS ap kotin kaparok ong pokon

o sapwilim a tounpadak kan, <sup>2</sup> Masani; Saunkawewe o Parisär akan kin mondi nan deun Moses. <sup>3</sup> Ari, karos me re indang komail, i me komail en wia o kapwaiada, a der ale sang ar wiawia kan; pwe irail kin indada, ap sota kapwaiada. <sup>4</sup> Re kin pira pena kapwa en wisik me toutou melel, ap kidang pon apar en aramas, a irail sota men sairki sondin pa arail. <sup>5</sup> O re kin kapwaiada ar wiawia kan karos, pwe aramas en udu-dial. Pwe irail kin kadälape ar kisin likau en kataman o kalaudela ni kailan ar likau. <sup>6</sup> Irail kin ngongki mondi ni tapin tepel ni kamadip o, o leppandam nan sinakoke kan. <sup>7</sup> O re kin mauki, aramas en ranamau ong irail nan deun net, o aramas en wia kin ir Rapi, Rapi, <sup>8</sup> A komail der ngongki, aramas en wia kin komail Rapi, pwe me ta men omail Saunpadak, a komail pirien pena. <sup>9</sup> O komail der kaadaneki meamen sam nan sappa, pwe amen Sam omail, me kotikot nanlang. <sup>10</sup> O komail der ngongki, aramas en wia kin komail saumas, pwe me ta men omail Saumas: Kristus. <sup>11</sup> A me lapalap re omail, en omail papa. <sup>12</sup> Pwe me pan kasapwilada pein i, pan sapwilidi, a me pan kasapwilidi pein i, pan kasapwilada. <sup>13</sup> Suedi ong komail saunkawewe o Parisär akan, malaun komail! Komail kin ritingidi wein nanlang mon aramas akan, pwe komail sota pan pedelong, a me men pedelong, komail sota kin mueid ong. <sup>14</sup> Suedi ong komail saunkawewe o Parisär akan, malaun komail! Komail me ngopur sang im en li odi kan ap liliasos kapakap reirei. Omail kalokolok pan laud melel. <sup>15</sup> Suedi ong komail saunkawewe o Parisär akan, malaun komail! Komail kin pidipidaki sed o sap, pwen wiada proselit amen, a lao wialar, komail ap pan wia kin i toun pweleko amen, me sued sang komail. <sup>16</sup> Suedi ong komail saunkalua maskun, komail me kin inda: Meamen kin kaukila im en kaudok, dene sota katempa, a me kin kaukila kold en im en kaudok, i me pung. <sup>17</sup> Komail pweipwei o maskun, pwe da me kasampwal ren kold de im en kaudok o, me kin kasarauiala kold? <sup>18</sup> O meamen kin kaukila pei sarau, dene sota katempa, a me kaukila mairong, me mi poa dene i me pung, <sup>19</sup> Komail pweipwei o maskun, pwe da me kasampwal ren mairong de pei sarau, me kin kasarauiala mairong? <sup>20</sup> Ari, meamen kaukila pei sarau, kin kaukila i o meakan, me mi poa. <sup>21</sup> O meamen kaukila im en kaudok, king kaukila i iangaki i me kotikot lole. <sup>22</sup> O me kaukila nanlang, kin kaukila mol en Kot o me kin kaipokedi ong poa. <sup>23</sup> Suedi ong komail saunkawewe o Parisär akan, malaun komail! Komail kin mairongki eisokkis eu en minse, o til, o kimel, ap sota isenoki ku-soned en kapung kasampwal akan: Pung,

o kadek, o poson. Komail wiada mepukat, ap pil kapwaiada me tei kan! <sup>24</sup> Saunkalua maskun komail, me kin isenoki kisin am en wel, ap katalala kamel! <sup>25</sup> Suedi ong komail saunkawewe o Parisär akan, malaun komail! Pwe komail kin kamakelekel kasak o dal liki, a lol me dir en me re kuliada o me sued. <sup>26</sup> Parisär maskun koe, kamakelelele mas lol en kasak o dal akan, pwe pali liki en pil makelelele! <sup>27</sup> Suedi ong komail saunkawewe o Parisär akan, malaun komail! Komail rasong sousou kan, me se-menten, me kin sansal kaselel, a lole me dir en ti en me melar akan o song en saut karos. <sup>28</sup> I duen komail, me sansal pung mon aramas, a lole komail me dir en malaun o sapung. <sup>29</sup> Suedi ong komail saunkawewe o Parisär akan, malaun komail! Pwe komail kin apapwali sousou en saukop akan o kapwataki sousou en me pung kan. <sup>30</sup> Ap inda: Ma kit mia ni muein sam atail akan, kit sota pan iang irail kamela saukop akan. <sup>31</sup> Ari, pein komail kin kadede, me komail nain me kamelar saukop akan. <sup>32</sup> A komail kaunsokala wiawia en sam omail akan! <sup>33</sup> Komail serpent o wan oter akan! Pala komail pan piti sang kadeik en nan pweleko? <sup>34</sup> Kilang, i me I kadara dong komail saukop akai, o me lolekong kai, o saunkawewe kai; a akai irail, me komail pan kamela, o kalopuela, o akai komail pan kaloke nan omail sinakoke kan, o komail pan paki irail sang nan eu kanim ong nan eu. <sup>35</sup> Pwen kapokon ong komail nta makelekel karos, me kapwilipwilidier nan sappa sang ntan Apel pung kokodo lel ntan Sakarias, nain Parakias, me komail kamelar nan pung en im en kaudok o pei sarau. <sup>36</sup> Melel I indai ong komail, mepukat pan pwai ong di wet. <sup>37</sup> O Ierusalem, Ierusalem, me kin kamela saukop akan o kate me pakadara dong uk kan; pan pak toto, me I pan kapokon pena noumail akan, duen litok kin kompwal pena na purok kan pan pa a, a komail kang. <sup>38</sup> Kilang, im omail pan tanla. <sup>39</sup> Pwe I indai ong komail, komail solar pan kilang ia sang ni ansau wet, lao komail pan inda: Meid iasanai, me kotido ni mar en Kaun o!

## 24

<sup>1</sup> IESUS ap kotila kotiwei sang nan im en kaudok o, sapwilim a tounpadak kan ari poto dong i, pwen kasansale ong i im en kaudok o. <sup>2</sup> Iesus ari kotin sapeng masani ong irail: Komail so udu-dial mepukat karos? Melel I indai ong komail, sota eu takai pan mimi pon eu, me sota pan karongk pasang. <sup>3</sup> Ni a kotin kaipokedi pon dol Oliwe, tounpadak kan kelep poto dong i potoan ong: Re kotin masan dong kit ansau da, me mepukat pan pwaida o da kilel pan ar pan kotin puredo, o imwin

kaua? <sup>4</sup> Iesus ari kotin sapeng masani ong irail: Kalaka, pwe sota amen en kotaue komail. <sup>5</sup> Pwe me toto pan kodo ni ad ai katiti: Ngai me Kristus o kotaue me toto. <sup>6</sup> Komail pan rongada duen mauin o kasokaso pan mauin; Komail kalake, der masak; pwe mepukat pan wiaui mas, a imwi saikenta mia. <sup>7</sup> Pwe eu sap pan u ong eu, o eu wei ong eu; o ansaun lek, o kilitop, o rerer en sap akai pan wiaui. <sup>8</sup> Mepukat karos tapin kalokolok. <sup>9</sup> Irail ap pan pang komail lang kamakam o kame komail la; o komail pan tantat pan kainok karos pweki ad ai. <sup>10</sup> Me toto ap pan makarada, o amen pan pangala amen, o re pan tataki nan pung arail. <sup>11</sup> O saukop likam toto pan pwarada o kotaue me toto. <sup>12</sup> A limpok en me toto pan laula, aki sapung, me pan pwaida kaulalap. <sup>13</sup> A me pan dadaurata lel imwi, i pan dorela. <sup>14</sup> A rongamau en wei o pan kalok sili nan sappa karos, pwen kadede ong wei karos, iei ansau, me imwi korendo. <sup>15</sup> A komail lao kilang saut akan, o ola laud mi nan wasa sarau, duen me saukop Daniel kopadar, meamen doropwe, i en weweki. <sup>16</sup> Me kin mi nan sap en Iudäa, ap tangala pon nana; <sup>17</sup> O me mi pon im, ender ko ong lole, pwen ale a kapwa sang; <sup>18</sup> O me mimi nan sap, ender purong ale a likau. <sup>19</sup> O me suedi ong irail me lisean o me kin kadidi ni ran oko! <sup>20</sup> Komail ari kapakap, pwe komail depa pitila ni ansaun kapau, o pil der ni ran en sapat. <sup>21</sup> Pwe i ansaun kamakam kaulalap, sota me dueta sang ni tapin kau kokodo lel met, pil sota pan wiaui kokolata. <sup>22</sup> O ma ran oko so kamalaulau la, sota uduk eu me pan dorela; a pweki me piladar akan ran oko pan kamalaulau. <sup>23</sup> O ma meamen pan indang komail: Kilang iet Kristus de monen, komail der kamelele. <sup>24</sup> Pwe Kristus likam kai o saukop likam kai pan pwarada, o kapwareda kilel o manaman akan, pwen pil kotaueda me piladar akan, ma re kak ong. <sup>25</sup> Kilang, ngai me kop ong komail er. <sup>26</sup> Ari, ma re pan katiti ong komail: Kilang, a kotikot nan sap tan o, der koeiila; kilang, a kotikot wasa rir o, der kamelele. <sup>27</sup> Pwe duen liol a tapida sang ni mas en lang lingnla lel kapin lang, iduen en Nain aramas a pan pwarado. <sup>28</sup> Pwe wasa man melar mia ia, i wasa ikel pan pokon pena ia. <sup>29</sup> A murin kamakam o katipin pan madang rotorotala o maram pan solar lingan, o usu kan pan moredi sang nanlang, o kateng pan nanlang pan mokidada. <sup>30</sup> Kadapakilene pan Nain aramas ap pan pwarada nanlang, o kainok karos en sappa ap pan mamaiei, o irail pan kilang Nain aramas a kokido dapok en lang akan, me manaman o lingan kaulalap. <sup>31</sup> O a pan kadarala na tounlang kan peuk posaune lapalap, re pan kapokon pena na me piladar akan sang pali paieu, sang ni

mas en lang lel ong kapi. <sup>32</sup> Sang ni tuka pik o komail padakki karaseras en: Ra kan lao pilen o ta pwarada, komail asaki, me rak korendor. <sup>33</sup> Pil dueta komail, komail lao diar mepukat, en asa, me a korendor; a leler liman wanim. <sup>34</sup> Melel I indai ong komail, di wet sota pan mela, lao mepukat karos pan pwaida. <sup>35</sup> Lang o sappa pan poula, a ai padak sota pan poula. <sup>36</sup> A duen ran o auer sota amen, me asa, pil tounlang kan sasa. Sam ai ta me mangi. <sup>37</sup> A duen ni muein Noa iduen en Nain aramas a pan pwarado. <sup>38</sup> Pwe duen ni ran akan mon nolik lapalap re manga o nim, re papaud o kapapaud, lao lel ran en Noa a pedelong ong nan warim o. <sup>39</sup> O re sota dedeki lao lel nolik pwaida o kamop ir ala karos, iduen en Nain aramas a pan pwarado. <sup>40</sup> I ran o riamen pan mi nan sap; amen pan peuka sang o amen luadi. <sup>41</sup> Riamen pan iris nan im en plaua, amen pan peuka sang a amen luadi. <sup>42</sup> Komail ari masamasan, pwe komail sasa auer, me omail Kaun pan pwarado. <sup>43</sup> A met komail en asa, ma saumas en im o asaer auer en men lipirap pan kodo, a pan masamasan, a sota pan mueid ong kawela im a. <sup>44</sup> Komail ari pil masamasan, pwe Nain aramas pan kodo ni auer, me komail sota lamelame. <sup>45</sup> Ari, is ladu lelapok o lolekong o, me a monsap kasapwilada pon im a, pwen nene ong irail ni ansau me kon ong. <sup>46</sup> Ladu o meid pai, me a monsap pwara diarada i a wiawia due met! <sup>47</sup> Melel I indai ong komail, a pan kasapwilada i pon a dipisou karos. <sup>48</sup> A ma ladu sued o pan lamelame nan mongiong i: Ai monsap pwapwand kodo; <sup>49</sup> Ap kame a warok kan o nam o nim nan pung en me kamom sakau; <sup>50</sup> Monsap en ladu o ap pan pwarado ni ran eu, me a sota lamelame o ni klok, me a sasa. <sup>51</sup> O a pan palang pasang i o katororalang i ren me malaun akan, iei wasan maiei o teterok.

## 25

<sup>1</sup> I ANSAU o wein nanlang me rasong li ek, me ale ar lamp akan, ap koeiilang ol kamod. <sup>2</sup> Me limen me lolekong a me limen me lolepon. <sup>3</sup> Me lolepon oko wa ar lamp akan ap sota iangaki kadirepa. <sup>4</sup> A me lolekong ko wa ar lamp akan iangaki kadirepa. <sup>5</sup> A ni en ol kamod a pwapwand ir karos men mair ap mairelar. <sup>6</sup> A lao nan lukepan pong a lok sili: Kilang, ol kamod kotido, komail koeiilang i! <sup>7</sup> Li karos ap pauridar kaonopadar ar lamp akan. <sup>8</sup> Me lolopon ap indang me lolekong kan: Komail ki dong kit kisan omail le, pwe nait lamp akan pan kunla. <sup>9</sup> A me lolekong kang sapeng indada: O iermen, pwe ede sola itar ong kit o komail, komail kola ren saunet netiada pein omail. <sup>10</sup> Ni arail kokolan net, ol kamod ap samador.



Irail me onoper iang i pedelong ong nan kamadip o, wanim ap ritidier. <sup>11</sup> Murin ansau kis li tei ko ap pwarado indada: Maing, maing, re kotin ritingadang kit! <sup>12</sup> A ap sapeng indada: Melei i indang komail, i sasa komail. <sup>13</sup> Komail ari masamasan, pwe komail sasa ran de auer. <sup>14</sup> Pwe a rasong aramas amen, me pan momaitela nan wai. Ap kapokon pena nan ladu kan o nek ong irail a dipisou kan. <sup>15</sup> A ki ong amen talent limau, a ong amen riau, a ong amen eu, duen me re itar ong, a ap madang samalar. <sup>16</sup> Me aleer talent limau, ap koeila dodokki o diardar pil talent limau. <sup>17</sup> A me aleer riau, pil dueta, a diardar pil riau. <sup>18</sup> A me aleer eu, ap koeilar sarepedier nani pwel, okilar moni en monsap o. <sup>19</sup> A kadekadeo a warailar monsap en ladu pukat ap puredo o kainene irail adar. <sup>20</sup> Me aleer talent limau ap potodo wado pil talent limau indada: Maing komui kotiki ong ia er talent limau, kom kotin masani, iet pil talent limau, me i netia kidar. <sup>21</sup> A monsap ap indang i: Meid mau, me koe wiadar, ladu lelapok o melel amen koe. Koe apapwali mau me tikitik o, i ap pan kasapwiladang uk pon dipisou toto, ko ong nan peren en om monsap! <sup>22</sup> A me aleer talent riau ap pil potodo indada: Maing komui kotiki dong ia er talent riau, kom kotin masani, iet pil talent riau, me i netia kidar. <sup>23</sup> A monsap ap indant i: Meid mau, me koe wiadar, ladu lelapok o melel amen koe. Koe apapwali mau me tikitik o, i ap pan kasapwiladang uk pon dipisou toto ko ong nan peren en om monsap! <sup>24</sup> A me aleer talent eu ap pil potodo indada: Maing, i aser komui, me komui ol padik amen, me kin dolung sang wasa, me kaidin komui padukedier ia, o nak pena, wasa me kaidin komui kamorok ia; <sup>25</sup> Ngai ari masak, o koeila o okilar sapwilim omui talent nani pwel, masani, iet sapwilim omui. <sup>26</sup> A monsap ap sapeng indang i: Ladu sued o ponkake men koe, ma koe asaer, me i kin dolung wasa, me kaidin ngai padukedier, o nak pena wasa, me kaidin ngai kamorokier. <sup>27</sup> Menda koe sota ki ong saun kawilian moni nai moni, a ngai lao puredo, i ap pan ale me udan ai iangaki moni me a naitikadar. <sup>28</sup> Komail ari ki sang re a a talent, ap ki ong, me a talent eisok. <sup>29</sup> Pwe me a mia, ekis pan ko ong, pwen aneki me laud; a me sota a mia, nan a pan katia sang me mi re a. <sup>30</sup> A ladu me sota katapa, komail kasela nan rotorot liki, iei wasan maiei o teterok. <sup>31</sup> A Nain aramas lao kodo ni a lingan, o tounlang sarau kan iang i, a pan mondi pon mol en a lingan; <sup>32</sup> O toun sappa karos pan kapokon pena mo a. A ap pan katoror irail pasang dueta silepa o kin katorore sip ol ren li akan. <sup>33</sup> A pan kila na sip li akan ni pali maun, o na sip ol akan ni

pali maing. <sup>34</sup> Nanmarki ap pan masani ong toun pali maun: Ukodo, komail kompeke pan Sam ai, sosoki wei o, me onop ong komail er sang ni tapin kau! <sup>35</sup> Pwe ngai men mangadar, a komail ap kamanga ia; ngai men nim piladar, a komail ap kanim pil ia; ngai men kairu men, a komail ap kasamo ia. <sup>36</sup> Killiso, a komail ap kalikauwi ia dar, ngai somaudar, a komail ap pwara dong ia; ngai salidier, a komail ap pwara dong ia. <sup>37</sup> Me pung kan ap pan sapeng i potoan ong: Maing, iad me se potoan ir men konot, ap potoan dong ir konot, de men konot pil, ap id konote dong ir? <sup>38</sup> Iad kit potoan ir men kairu, ap kasamo ir? De kiliso, ap kalikauwi ir adar? <sup>39</sup> Iad kit potoan ir lomum, de salidi, ap poto dong ir? <sup>40</sup> Nanmarki ap pan sapeng masani ong irail: Melei i indai ong komail, meakot komail wiai ong amen, ri ai ol tikitik pukat, i me komail wiai ong ia er. <sup>41</sup> A ap pil pan indang irail toun pali maing: Komail me riala, koweii sang ia, ko ong nan kisiniai soutuk, me onoper ong tewil o nal kan. <sup>42</sup> Pwe ngai men mangadar, a komail sota kamanga ia, o men nim piladar, a komail sota kanim pil ia, <sup>43</sup> Ngai men kairu men, a komail sota kasamo ia, kiliso, a komail sota kalikauwi ia dar, o somau, o salidi, a komail sota pwara dong ia. <sup>44</sup> Irail ap pil pan potoan ong: Maing, iad me se potoan ir men konot, de men konot pil, de men kairu men, de kiliso, de lomum, de salidi, ap sota papa ong ir? <sup>45</sup> A ap pan sapeng irail masani: Melei i indai ong komail, meakot komail sota wiai ong amen tikitik pukat, i me komail sota wiai ong ia. <sup>46</sup> Mepukat ap pan kolang kalokolok soutuk, a me pung kan pan maur soutuk.

## 26

<sup>1</sup> KADEKADEO Iesus lao kaimwisokela padak pukat karos, ap kotin masani ong sapwilim a tounpadak kan: <sup>2</sup> Komail asa, pong ria pong pasa pan wiaui o Nain aramas pan pangala, en kalopula. <sup>3</sup> Samero lapalap akan o saumas akan en toun sap o ap pokon pena nan im eng samero lapalap, me maraneki Kaipas. <sup>4</sup> O kapukapung pena duen ar pan wideningadi Iesus en kamatala. <sup>5</sup> A irail inda: Iermen ni ran en kamadip, pwe aramas ede moromorongada. <sup>6</sup> Iesus lao kotikot Petaniem nan im en Simon tuketuk, <sup>7</sup> Li amen ap poto dong i, wa kisin potel alapasta audaud en men kei kasapwalia ap kieldier ong pon kadokenmai, ni a kotin konot. <sup>8</sup> A tounpadak kan lao kilanger, ap suede kidar indada: Menda kei wet olar mal? <sup>9</sup> Pwe a pan netila, kareda pwai laud ap nek ong samama kan. <sup>10</sup> Iesus lao mangi met, ap kotin masani ong irail: Da me komail kainsensuedeki li o? Pwe me mau, me a wiai ong ia er. <sup>11</sup> Pwe me samama

kan kin mi re omail ansau karos, a ngai sota ansau karos. <sup>12</sup> Pwe ni a wudok kidi pil wet pon war ai, a kaonopadar ai saredi. <sup>13</sup> Melel I indai ong komail, wasa karos, me rongamau wet pan kalok ia, pangada sappa pon, me a wiaer et, pil pan kaloki, pwen katamanpa. <sup>14</sup> Amen ekriamen, me adaneki Iudas Iskariot, ap koieila ren samero lapalap akan, <sup>15</sup> Indada: Da me komail pan ki dong ia, i pan panga dong komail i? Irail ari inauki ong i sip en moni sileisok. <sup>16</sup> A sang ni ansau o a sosong duen a pan mangai ong en pangala i. <sup>17</sup> Ni ran kaieu en prot somut tounpadak kan poto dong Iesus patoan ong: Ia wasa re kotin kupura, sen kaonopadang ir kamadip en pasa? <sup>18</sup> A kotin masani: Kola nan kanim ren ol amen indai ong i: Saunpadak o masani: Ai ansau korendor, I pan wiada kamadip en pasa re om, o ai tounpadak kan pan iang ia. <sup>19</sup> Tounpadak kan ap wiadar duen masan en Iesus, kaonopadang pasa. <sup>20</sup> A lao sautik penaer, a kaipokedi ni tepel, a ekriamen akan iang i. <sup>21</sup> Ni arail konokonot, a kotin masani: Melel I indai ong komail, amen komail pan pang ia la. <sup>22</sup> Irail ap insensued o amen amen potoan ong i indada: Maing ngai i? <sup>23</sup> A kotin sapeng masani: Me ian ia kaduedi nan dal o, i me pan pang ia la. <sup>24</sup> Pwe Nain aramas pan kokola duen a intingidier. A suedi ong aramas o, me Nain aramas pangala re a, me mau ong aramas o, ma a sota ipwidier. <sup>25</sup> A Iudas, me pangala i ap sapeng potoan ong indada: Rapi, ngai i? A kotin masani ong i: Koe me indada. <sup>26</sup> Ni arail wiadar konot. Iesus kotin limadar prot laolaoki, o pilitiki pasang, kotiki ong toupadak kan masani: Ale tungole, war ai metet. <sup>27</sup> A pil kotikida dal o laolaoki kotiki ong irail masani: Komail karos nim sang; <sup>28</sup> Pwe nt' ai metet, udan inau kap, me pan kapwilipwididi ong me toto, men lapwada dip. <sup>29</sup> A I indai ong komail, me I solar pan nim sang wan wain sang ansau wet lao lei ni ran o, me I pan pil nim nan wein Sam ai iangaki komail! <sup>30</sup> Irail lao melkaka melkaka en kaping, rap kotila pon dol Oliwe. <sup>31</sup> Iesus ap kotin masani ong irail: Komail karos pan makar kin ia pongpong wet, pwe a intingidier: I pan kame silepa o, a pwin sip o pan more pasang. <sup>32</sup> A murin ai maureda, I pan ti ong mo 'mail kola Kaliläa. <sup>33</sup> A Petrus sapeng potoan ong i: Ma karos pan makar kin ir a ngai sota pan makar. <sup>34</sup> Iesus kotin masani ong i: Melel I indai ong uk, pongpong wet mon malek a kakorot, koe pan kamam kin ia pan silepak. <sup>35</sup> Petrus potoan ong i: Ma i iang ir matala, i sota pan man kamam kin ir; iduen en tounpadak kan karos ar indinda. <sup>36</sup> Iesus ap kotilang wasa o me adaneki Ketsemane, a irail iang i, ap kotin masani ong tounpadak kan: Komail

mondi met, lao I pan kola kapapak monen. <sup>37</sup> O a kotin ukadar Petrus o nain Sepedäus ol riamen, ap kotin tapiadar kupur olar o patau kausalap. <sup>38</sup> Iesus ap kotin masani ong irail: Ngen i ap insensuedelar kausalap ong mela. Komail pan mimieta met, iang ia masamasan. <sup>39</sup> O a kotila ekis wasa, ap kotin pupekidi silang i laolaoki masani: Sam ai, ma a kak, kom kotiki sang ia dal wet; ari so, kaidin ngai, komui ta en wiawia. <sup>40</sup> I ari kotin pure dong tounpadak kan, diar ir adar mamair, ap kotin masani ong Petrus: Komail so kak iang ia masamasan auer ta ieu? <sup>41</sup> Masamasan o kapapak, pwe komail de ko ong nan songesong. Nen me peik, a uduk me luet. <sup>42</sup> A pil kotila kariapak laolaoki masani: Sam ai, omui kupur eta, me dal wet sota kak kowe sang ia, ari I pan tungole. <sup>43</sup> A lao kotin puredo diar ir adar pil mamair, pwe mas arail me toutou. <sup>44</sup> A a kotin muei sang irail, pil kotilar laolaoki kasilepak ni masan ota. <sup>45</sup> Ap kotin pure dong tounpadak kan masani ong irail: Komail ari mamair o kamol. Kilang, auer leler, me Nain aramas pan pangalang pa en me dipan akan. <sup>46</sup> Paurida, kitail en kola, kilang, a samador, me pan pang ia la. <sup>47</sup> Ni a kotin mamasandar, kilang, Iudas, amen ir ekriamen oko, pwarador, pokon lapalap iang i, me wa kodlas o sokon sang ren samero lapalap akan o saumas akan en toun sap o. <sup>48</sup> Men pangala i ki ong ir kilele eu indada: Me I pan metik, iei I komail pan koleidi. <sup>49</sup> I ap madang dong Iesu indada: Pong mau Rapi ap metik i. <sup>50</sup> A Iesus kotin masani ong i: Kompoke pai, menda koe pwarador? Irail ap por ong Iesus, saikidi i. <sup>51</sup> A kilang, amen irail, me iang Iesus, kapawei pa a, usadar na kodlas, pale sang salong en ladu en samero lapalap o. <sup>52</sup> Iesus ap kotin masani ong i: Kapure iong om kodlas nan deu a! Pwe karos, me ale kodlas, pan kamekila kodlas. <sup>53</sup> De koe lamelame, me I sota kak poeki ren Sam ai en kadara dong ia tounlang toto sang lekion eisokriau sama; <sup>54</sup> A iaduen kisin likau kak pwaida? A udan a pan wiaui duen met. <sup>55</sup> Ni auer ota Iesus kotin masani ong pokon o: Da, ngai lolap amen, me komail kodon aleki kodlas o sokon akan? Ni ran akan karos I mier re omail, kauwewe nan im en kaudok, a komail sota kol ia diier. <sup>56</sup> A mepukat karos wiaui, pwe kisin likau en saukop akan en pwaida. Tounpadak kan karos ap muei sang i tangdau. <sup>57</sup> A me saikidier Iesus, ap kaluang i ren samero lapalap Kaipas, wasa saunkawewe o saumas akan pokon pena ia. <sup>58</sup> A Petrus idauendo i doowei sang lel tanpas en samero lapalap o pedelong ong mondi ren papa kan, pwen kilang imwin mepukat. <sup>59</sup> A samero lapalap akan, o saumas akan, o pwin en kapung o roporop

kadede likam ong Iesus, pwen kamatala; <sup>60</sup> Ari, sota me irail diar. Saunkadede likam me toto, me pwarado, ari so, sota me irail diar. Ikmuri saunkadede riamen pwarado, <sup>61</sup> Indada: Lap en me inda: I kak ong kawela im en kaudok en Kot ap id kauada ni pong sili pong. <sup>62</sup> Samero lapalap ap kasinenda masani ong i: Kom sota sapengki meakot, me mepukat kin kadede ong komui? <sup>63</sup> A Iesus kotin nenenlata. Samero lapalap ap masani ong i: I kakau kin komui la ren Kot ieias, komui en indang kit, ma komui Kristus Sapwilim en Kot. <sup>64</sup> Iesus ap kotin masani ong i: Komui me inda. A I pil men kaire kin komail, sang ni ansau wet, komail pan kilang Nain aramas a pan kaipokedi ni pali maun en manaman o kokido dapok en lang akan. <sup>65</sup> Samero lapalap ap ter pasang, a likau kan indada: A lalau. Menda pil akai saunkadede? Kilang, komail apton rong-gadar a lalau, <sup>66</sup> Da me komail lamelame? Irail sapeng potoan ong: A mau ong kamela. <sup>67</sup> Irail ap kondipi ong silang i o pakir i, o akai pikir i ni silang i, <sup>68</sup> Indada: Kristus, kokop ong kit, is me pikir uk? <sup>69</sup> Petrus momod liki panakepir; lidu men ap ko dong i indada: Koe me pil iang Iesus en Kaliläa. <sup>70</sup> A i me kamamaki mo 'rail karos indada: I poneponeki me koe inda. <sup>71</sup> A ni a pedoi wei sang nan wanim, amen lidu ap kilang i indang irail, me mi wasa o: Lap men et me pil iang Iesus en Nasaret. <sup>72</sup> A pil kamamki ap kaula: I sasa aramas en. <sup>73</sup> Mur ekis irail me u impa pil kaido indang Petrus: Melel koe amen irail, pwe ngil om kadiarok kin uk ada. <sup>74</sup> I ap lalau o kaula indada: I sasa aramas en. Malek ap kakorot. <sup>75</sup> Petrus ap tamanda masan en Iesus, me kotin masani ong i: Mon malek a kakorot, koe pan kamam kin ia pan silepak. A ap koeila sangesang laud.

## 27

<sup>1</sup> A LAO ran pasanger, samero lapalap akan o saumas akan en toun sap o kapukapungada duen Iesus pwen kamatala. <sup>2</sup> Irail lao saliedi i, ap wawei, ki ong ren kopina Pontius Pilatus. <sup>3</sup> A Iudas, me pangala i lao kilanger me a pakadeikadar, en kamatala, ap kalukila o purekido moni sileisok ren samero lapalap akan o saumas akan. <sup>4</sup> Indada: Ngai me wiadar dip, ni ai pangalar nta makelekel. A irail inda: Menda re at? Koe en pein wia. <sup>5</sup> I ari kasedi moni ko nan im en kaudok, ap koeilar lusiamalar. <sup>6</sup> A samero lapalap akan ale moni ko indada; A sota pung kitail en ki ong nan deun mairong, pwe pwain pan nta. <sup>7</sup> Irail ari kapukapung, ap netiadar sap en saun wia dal, wasa me men liki pan seredi ia, <sup>8</sup> I me wasa o adaneki sap en nta kokodo lel ran wet. <sup>9</sup> I doka n pwardair, me lokidor ren

saukop Ieremia, me masani: Irail ari aleer moni sileisok i pwaine pan i, me re netiadar ren men Israel. <sup>10</sup> O pwaine kida sap en saun wia dal, duen me Kaun o kotin masani ong ia. <sup>11</sup> Iesus ari kotikot mon kopina; kopina ap kainoma re a masani: Nanmarki en Sus akan komui? A Iesus kotin masani ong i: Komui me masani. <sup>12</sup> Samero lapalap akan o saumas akan lao karaune kin i, a sota kotin sapeng. <sup>13</sup> Pilatus ap masani ong i: Komui sota rong duen ar karakarauni komui kaulalap? <sup>14</sup> I ari sota kotin masani ong i meakot. Kopina ap poneponeki kaulalap. <sup>15</sup> Ari, ni kamadip o kopina kin lapwa ong irail amen me salidi, meamen, me re mauki, <sup>16</sup> A i ansau o ol amen, ad a Parapas, me salidi re 'rail. <sup>17</sup> Irail lao pokon penaer, Pilatus ap masani ong irail: Is me komail mauki, i en lapwa dang komail, Parapas de Iesus, me maraneki Kristus? <sup>18</sup> Pwe a asaer, ar peirin, me re pang kilar i. <sup>19</sup> A lao kaipokedi pon deun kadeik, a paud ilokilang i indada: Komui der wia meakot ong ol pung men et, pwe i auramandar duen i, me i lokelokeki laud ran wet. <sup>20</sup> A samero lapalap akan o saumas akan sairen kila pokon o, ar poekipoeki Parapas o kamatala Iesus. <sup>21</sup> A kopina sapeng masani ong irail: Is re 'ra, me komail mauki, i en lapwadang komail? Irail potoan ong: Parapas. <sup>22</sup> Pilatus ap masani ong irail: Da me i en wiaki Iesus, me maraneki Kristus? Irail karos potoan ong: A en kalopuela! <sup>23</sup> A kopina masani: Pwe sued da, me a wiadar? A re kalaudela ar weriwer: A pan kalopuela! <sup>24</sup> Pilatus lao kilang, me a sota kak wiada meakot, pwe momorong pan wiau, ap ale pil, omiom mo 'rail masani: Ngai makelekel sang ntan ol pung men et, komail pan wia. <sup>25</sup> Aramas karos ap wiaki eu sapeng indada: Nta en kapokon ong kit o nait seri kan! <sup>26</sup> A ap lapwa dong irail Parapas, a Iesus me a woki ap mueid ong irail, en kalopuela i. <sup>27</sup> Nain kopina saunpei kan ap ale Iesus kalualong ong nan im en kadeik o, ap kapokon pena saunpei karos; <sup>28</sup> Irail ap ki sang i sapwilim a likau kan, ap id kalikauwie kida i likau waitata; <sup>29</sup> Ap pada al en tek eu, ap kida pon kadokenmai, o ki ong sokon apot ni lim a maun, o kelepukeki mo a o kapikapidi i indada: Tong Nanmarki en Sus akan! <sup>30</sup> Irail kondipe ong i, o re ale sokon o, o pokieki kadokenmai. <sup>31</sup> Irail lao kapiti i, ap kisang likau waitata, ap kapure ong i udan sapwilim a likau o kaluawei, pwen kalopuela. <sup>32</sup> Ni arail kotikot kokola, rap diarada aramas en Kirene men, me ad a Simon, i me re iton ong, en wadala sapwelim a lopu. <sup>33</sup> Irail lao lel ong wasa o, me ad a Kolkata, iet wewe: Wasa en pondal en monga. <sup>34</sup> Irail ki ong i pinika, me doleki edi. A lao kotin song kis, a sota urak. <sup>35</sup> Irail

lao kalopuelar i, ap nek pasang sapwilim a likau kadoropwe kidar. <sup>36</sup> Irail ari mondi ong wasa o masamasan i. <sup>37</sup> O ponangin kadokenmai re pasuredier inting o, me a pukoki: Iet Nanmarki en Sus akan. <sup>38</sup> Lolap riamen iang i lopuelar, amen mi ni pali maun, a amen ni pali maing. <sup>39</sup> Me dadaulul akan lalaue i, dueduälök. <sup>40</sup> Katiti: Koe me kin kawela im en kaudok ap id kauada pong sili pong, en pein dore uk ala; ma Sapwilim en Kot koe, en keredi sang nin lopu en! <sup>41</sup> A samero lapalap, o saunkawewe, o saumas akan pil dueta kapikapiti i indada: <sup>42</sup> A dorelar akai, ap sota kak dorela pein i; ma i Nanmarki en Israel, i en keredi sang ni lopu en, a kitail pan kamelele i. <sup>43</sup> A liki Kot, i en kotin dorela, ma a kotin kupura i, pwe a indada: Ngai Sapwilim en Kot. <sup>44</sup> Lolap oko, me iang i lopuelar, pil lalaue i. <sup>45</sup> Sang ni auer kawonu lel auer kaduau rotorot kipadi sap o. <sup>46</sup> Ni auer kaduau Iesus ap kotin ngil laud masani: Eli, eli lama asaptani! Iet wewe: Ai Kot, ai Kot, da me komui likitmalia kin ia la? <sup>47</sup> Akai me u wasa o, rongadar me, ap indada: A eker Elias. <sup>48</sup> A amen irail pitipit tang ale lim eu, kaduedi ong nan pinika kauong ni alek apot, kidang i en urak, <sup>49</sup> A akai me inda: Iermen, kitail en kilang mas, ma Elias pan pwarado dorela i. <sup>50</sup> Iesus pil kotin ngil laud, ap kadarala ngen e. <sup>51</sup> A kilang, perepa likau en im en kaudok o ap dei pasang, sang pali poa lel pa, o sap rereda, o paip akai rongkilar; <sup>52</sup> O sousou kai sara pasang, o war en me sarau kan toto, me mamair, ap iasadar. <sup>53</sup> O murin ar iasadar, irail koda sang nan sousou kan, kolang kanim sarau, pwara dong me toto. <sup>54</sup> Senturion o me iang i sinsila Iesus, kilanger sap a rereda, o meakan, me wiaui, rap masakadar kaulap, katiti: Melel i, me Sapwilim en Kot! <sup>55</sup> O li toto mi kailewe, kilekilang me wiaui, iei irail, me idauendo Iesus sang Kaliläa papa i. <sup>56</sup> Maria men Makdala, o Maria in en Iakopus i Ioses, o in en nain Sepedäus akan mi nan pung arail. <sup>57</sup> A lao sautik penaer, ol kapwapwa men pwarado, men Arimatia, me ad a Iosep, me pil tounpadak en Iesus amen. <sup>58</sup> I ari potu dong Pilatus poeki kalep en Iesus. Pilatus ap masani, a en pangalang i. <sup>59</sup> Iosep ari ale kalep o, kidimiki pena likau makelekel o kaselel; <sup>60</sup> Ap nekidedi nan pein a sousou kap, me a weiradar nan paip; i ap kadapure ong takai kalaimun eu nan au en sousou o, ap kotila sang. <sup>61</sup> A Maria men Makdala, o Maria teio momod sal ong sousou o. <sup>62</sup> A mandan ran o, ran en kaonop, samero lapalap o Parisär akan pokon pena ren Pilatus. <sup>63</sup> Indada: Maing, kit tamandar, me ol sued men et katitiki ni a memaur: I pan maureda murin ran silu. <sup>64</sup> Komui ari masani, me ren sinsila sousou o lel ran

kasilu, pwe a tounpadak kan de kodo pirapela, ap indang aramas: A kotin iasadar sang ren me melar akan, pwe pakotau wet pan sued sang men mas, <sup>65</sup> Pilatus masani ong irail: let silepa ko, komail kowe i sinsila sousou o duen komail kak ong. <sup>66</sup> Irail ari koeila, kileledier takai o, o kasilaki sousou o saunpei kai.

## 28

<sup>1</sup> RAN en sapat lao daulier, ni mansang en at en wik, Maria men Makdala, o Maria teio ap kodon udialul sousou o. <sup>2</sup> A kilang, sap rereda kaulap, pwe tounlang en Kaun amen, pwaradido sang nanlang o katapur sang takai o, ap kaipokedi ong poa, <sup>3</sup> Mom a dueta liol o a likau pueteputeta sno. <sup>4</sup> Silepa ko ap masapwekadar, o re likamata mela. <sup>5</sup> A tounlang o kotin sapeng masani ong li oko: Komail der masak pwe i asa, me koma rapaki Iesus, me lopuelar. <sup>6</sup> A soer met, pwe a iasadar, duen a kotin masanier. Kodo udial wasa, me Kaun nekinekidi mas o, <sup>7</sup> O tangwei kaireki sapwilim a tounpadak kan, me a kotin iasadar sang ren me melar akan. A kilang a pan kotin tiom mo 'mail kotilang Kaliläa. I wasa komail pan diarada i. Kilang, i kop ong komail er. <sup>8</sup> Ira ari madang sang ni sousou o masak o peren kaulap, o tangwei kaireki ong sapwilim a tounpadak kan. <sup>9</sup> A ni ara kola, kaireki sapwilim a tounpadak kan, kilang, Iesus ap tu ong ira masani: Ran mau! Ira ap kai ong poridi ni aluwilu a o pongi i. <sup>10</sup> Iesus ap kotin masani ong ira: Der masak, kowe i kaireki ri ai ol akan, pwe re en koeilang Kaliläa. I wasa re pan diar ia. <sup>11</sup> Ni ara kokola, kilang silepa kai ko dong kanim o kaireki samero lapalap akan karos me wiaui. <sup>12</sup> Irail ari pokon pena iangaki saumas akan o kapukapung, ap ki ong saunpei moni toto. <sup>13</sup> Indai ong irail: Komail pan inda: A tounpadak kan pwarador pong pirapela i ni at mamair. <sup>14</sup> A ma kopina pan rongada duen mepukat, kit ap pan sauasa komail re a. <sup>15</sup> Irail ari aleer moni kan o wiadar duen me re katiti ong irail. A kasoi pot et lolok sili ren Sus akan kokodo lel ran wet. <sup>16</sup> A tounpadak ekamen kowe i ong Kaliläa, pon nana eu, me Iesus kotin kakalik ong irail er. <sup>17</sup> Irail lao diaradar i, re pongi ong i, a akai me peikasal. <sup>18</sup> Iesus ap kotido masani ong irail: Manaman en nanlang o sappa karos muei ong ia er. <sup>19</sup> Komail ari kola o padaki ong toun sappa karos o paptais ir ala ni mar en Sam o Na o Ngen sarau. <sup>20</sup> Padaki ong irail, me ren dadaurata meakan, me I kakalik ong komail er. O kilang, I pan daudaulole komail sili kokolata, lao lel sappa imwisokela.

## MANG EN PA EN WANPORON MARKUS.

<sup>1</sup> TAPIN rongamau en Iesus Kristus, Sapwilim en Kot. <sup>2</sup> Duen a intingidi ren saukop Iesaia: Kilang, i kadarala mo 'mui ai men kadar me pan kaonopada al omui! <sup>3</sup> Ngil eu likelikwir sili nan sap tan: Komail kaonopada al en Kaun o kaineda al a! <sup>4</sup> Ioanes kotido wia paptais nin sap tan o padapadak duen paptais en kalula ong lapwa dip akan. <sup>5</sup> Toun sap en Sus akan o toun Ierusalem karos pokon dong re a; irail paptaisela re a nan pilap Iordan, weokada dip arail akan. <sup>6</sup> Ioanes kin likauwi wun en kamel, o perapirki kil en man, o kin kangkang mansiek o oni en nan wel. <sup>7</sup> O padapadak masani: Meamen laud sang ia kotido mur i. Sal en a sut i sota war ong idiokidi lapwada. <sup>8</sup> I paptais kilar komail pil. A a pan paptais kin komail Ngen sarau! <sup>9</sup> Kadekadeo ni ran oko Iesus ap kotido sang Nasaret en Kaliläa ap paptaisela ren Ioanes nan Iordan. <sup>10</sup> A madang kotida sang nan pil o, ap kotin masani nanlang kan ar ritida, o Ngen mom en muroi piridi dong po a. <sup>11</sup> Ngil eu ap peidido sang nanlang kan: Nai kompok komui, me I perenki! <sup>12</sup> A madang Ngen kalua wong i sap tan. <sup>13</sup> A ap kotikoteki sap tan ran pangaul wia songesong pan Satan, ieiang man lalualo; a tounlang kan me papa ong i. <sup>14</sup> Murin en Ioanes a pangalar, Iesus ap koti dong Kaliläa, padapadak rongamau en wein Kot. <sup>15</sup> Masani: Ansau o leler wein Kot mier! Komail kalula! Kamelele rongamau! <sup>16</sup> Ni a kotikot sili liman sed en Kaliläa, a ap masani Simon o ri a ol Andreas ara lalaid sili, pwe ira saused. <sup>17</sup> Iesus ap kotin masani ong ira: Koma idauen ia do! Pwe I pan wia kin koma la saused en aramas! <sup>18</sup> Ira ari madang kasedi ara uk eko, ap idauenla i. <sup>19</sup> Ari, ni a kotila sang wasa o, a ap kotin masani Iakopus, nain Sepedäus o ri a ol Ioanes mimi pon sop pot wonewone ara uk oko. <sup>20</sup> I ari kotin molipe ira madang, ira ari pededi sam ara Sepedäus nin sop o ren toun dodok ko o idauen la i. <sup>21</sup> Irail ap koti dong Kapernaum. A madang kotilong ong nan sinakoke ni ran en sapat o kawewe. <sup>22</sup> Re ap puriamui ki a padak, pwe a kotin kawewe ong irail ni manaman sota dueta saunkawewe kan. <sup>23</sup> Aramas amen iang mi nan sinakoke o, me ngen saut mi lole, ap weriwer; <sup>24</sup> Indada: Ko sang kit! Menda re omui kit, Iesus en Nasaret? Komui kotido en kawe kit ala? I asa komui, Sarau en Kot. <sup>25</sup> Iesus ari ongiogida, masani: Nenenla o kowe sang i! <sup>26</sup> Ngen saut lao kapururada ap weriwer laudedda, a ap koiei sang i. <sup>27</sup> Irail karos puriamui, pepeidok nan

pung arail indada: Dakot met? Padak kap, dakot met? Pwe ni manaman a masani ong ngen saut akan, irail ari peiki ong i. <sup>28</sup> I ari madang indand sili nin sap karos impan Kaliläa. <sup>29</sup> Irail ari madang koti sang nan sinakoke, ap iang Iakopus o Ioanes kotilong ong nan im en Simon o Andreas, <sup>30</sup> Saulap en Simon wononeki somau karakar. Irail ap kaireki i madang duen i. <sup>31</sup> I ari koti wong ale pa a, kauada. Somau karakar ap madang ko sang; i ari papa irail. <sup>32</sup> A lao sautik penaer, ni katipin kirila, re ap wa pena ong i karos me somau o me tewil ti po arail. <sup>33</sup> O toun kanim o pokon dong ni im o. <sup>34</sup> A ap kotin kakelailada me toto me somauki song en somau toto, kausa sang tewil toto, ap kulikedi tewil akan, ren der lokaia, pwe re asa i. <sup>35</sup> A kotin kipada nin soran, kotilang sap tan, pwen laolao wasa o. <sup>36</sup> Simon o me iang ko ap idauenla i. <sup>37</sup> Ni arail diar i, re ap potoan ong i: Irail karos raparapa kin komui. <sup>38</sup> A ap kotin masani ong irail: Kitail daulul wong sap tei ko, pwe I en pil padak wasa o, pwe i me I kokido. <sup>39</sup> A ap kotin padapadak sili nan arail sinakoke kan nan sap en Kaliläa karos o kakaus tewil akan. <sup>40</sup> Ol tuketuk amen ap poto dong i kelepukei poeki potoan ong i: Ma re kotin kupura, re kotin kamakeke ia da! <sup>41</sup> Iesus ari kupuro kila, kapawe lim a, sair i masani ong i: I pan, makelekelada! <sup>42</sup> A ni a masani eta, ari a tuketuk ko sang madang, a ap makelekel lar. <sup>43</sup> I ari kalikedi i, ap madang kadarala. <sup>44</sup> Masani ong i: Kalaka! Koe depa indai ong meamen; a kowe kasale ong koe samero o, o kida, pweki om makelekelada, me Moses masani, pwen kadee ong irail. <sup>45</sup> Ari, a kolata kalokisili, suaiki sili o ari, kareda en Iesus a sola sansal koti dong kanim o, kotikot eta liki nan sap tan, irail ap pokon dong re a sang pali karos.

## 2

<sup>1</sup> MURIN ran akai a ap pil kotilong ong Kapernaum, ap loki sili me a kotikot nan im o. <sup>2</sup> Me toto ap madanga pena, im o lao koidala o pil likin im o. A ap kotin kawewe ong ir masan o. <sup>3</sup> Irail ari poto dong re a, wa kodo me somau rerer men, roan pa men. <sup>4</sup> Irail sota kak kai dong impa pweki pokon o. Re ap palang pasang pon im o, wasa a kotikot ia; irail lao palang pasang ap kakedi ro o, me somau o mi poa. <sup>5</sup> Iesus lao mangi ar poson, ap masani ong me somau rerer o: Nai, dip om akan lapwa sang uk er! <sup>6</sup> Ari, saunkawewe kai momod wasa o, mongemongleki: <sup>7</sup> Da me men et lokelokaia? A lalau. Is me kak lapwada dip akan, pwe amen ta, Kot? <sup>8</sup> Iesus ari madang angiaada nan kupur a duen ar mongemongleki, ap kotin masani ong irail: Da me komail mongemongleki?

<sup>9</sup> Ia me mangai ren indai ong me somau rerer: Dip om akan lapwa sang uk er, de inda: Uda, ale ki om, kowe? <sup>10</sup> A pwe komail en asa, me Nain aramas me manaman ong lapwada dip akan nin sappa, iei me a kotin masanieki ong me somau rerer: <sup>11</sup> I indai ong uk: Uda! Al eki om! U ko ong ni im om! <sup>12</sup> I ari madang uda, ale ki, aluwei mo 'rail karos. Irail karos ari malamalaua kila, kapinga Kot inda: Se saikenta man kilang meakot et! <sup>13</sup> I ari pil kotila liman sed o. Irail karos ap pokon dong i, i ari kotin kawewe ong irail. <sup>14</sup> A lao kotin daulul wasa o, ap masani Lewi, nain Alpäus, a momod ni wasan nopwei, ap masani ong i: I dauen ia do! I ari uda idauenla i. <sup>15</sup> Kadekadeo a lao kaipokedi konot nan im a, saunopwei o me dipan akan me toto iang Iesus o sapwilim a tounpadak kan konokonot; pwe irail me toto, me idauen i. <sup>16</sup> Ari, ni en saunkawewe o Parisär akan ar kilang a kotin iang me dipan o saunopwei kan konokonot, irail ap indai ong sapwilim a tounpadak kan: Da me a iangki saunopwei o me dipan akan konot o kaker eki? <sup>17</sup> Ni en Iesus angiada, ap kotin masangi ong irail: Me kelail akan sota mau ong saunwini pwe me somau ta. I sota kodon ekeredo me pung kan, a me dipan akan. <sup>18</sup> En Ioanes a tounpadak kan o Parisär akan kin kaisesol. Irail ari kodo potoa ong i: Da me en Ioanes a tounpadak kan kin kaisesol, o en Parisär ar tounpadak kan, a sapwilim omui tounpadak kan sota kin kaisesol? <sup>19</sup> Iesus ap kotin masani ong irail: Da, toun kamadip en kapapaud pan kak kaisesol ni en ol kamod a iang irail? Ni en ol kamod a iang irail, re sota pan kak kaisesol. <sup>20</sup> A ansau kokodo, me ol kamod pan wisike sang irail, iei ran o, me re pan kaisesol. <sup>21</sup> Sota amen me pan deik ong likau kap ni likau maring, pwe likau kap pan dei sang likau maring, por o ap pan laudela. <sup>22</sup> Pil sota amen me kin deuke kida ed maring wain kap, pwe wain o de ter pasang ed o, wain o ari wudokila, ed o ola. A wain kap mau ong nan ed kap. <sup>23</sup> Kadekadeo a kotin weid nan mat en korn ni ran en sapat. Sapwilim a tounpadak kan ap dondolung kowe wan korn. <sup>24</sup> Parisär oko ap indai ong i: Kilang, da me irail wia ni sapat me sota pung, en wiaui? <sup>25</sup> A kotin masani ong irail: Komail sota wadoker, me Dawid wiadar, ni a men kualap, o a men manga, i o me iang i? <sup>26</sup> Duen a pedelong ong nan tanpas en Kot ni muein Apiatar samero lalapa, o kangala prot mairong o nek ong irail, me iang i, me sota pung aramas en tungole, samero kan eta? <sup>27</sup> A ap kotin masani ong irail: Sapat me wiaui ong aramas a kaidik aramas ong sapat. <sup>28</sup> I me Nain aramas pil udan kaun en sapat.

### 3

<sup>1</sup> KADEKADEO a pil kotin pur ong nan sinakoke. Ari, aramas amen mia, me pa a motor. <sup>2</sup> Irail ari masamasaneke, ma a pan kakelada i ni ran en sapat, pwe irail en karaun i. <sup>3</sup> I ari kotin masani ong aramas o, me pa a motor: Uda kodo met! <sup>4</sup> A ap kotin masani ong irail: Me pung, wia mau ni ran en sapat de wia sued? Kamaur de kamela? Ir ari nenenla. <sup>5</sup> I ari angiang aupwili sili po 'rail, kupurokila ar kapitakai, ap kotin masani ong aramas o: Kapawei pa om! I ari kapawei. Pa a ap kelailada. <sup>6</sup> Parisär oko ap madangalang ren iang en Erodes. Re ap kapakaparok duen ar pan kamatala i. <sup>7</sup> A Iesus kotin kapitawei sang pein i o sapwilim a tounpadak kan, koti wong liman sed. Pokon kalaimun ap idauen i sang Kaliläa, o Iudäa. <sup>8</sup> O sang Ierusalem, o sang Idumäa, o sang palilan Iordan, o toun liman Tirus o Sidon, pokon kalaimun, re rongada duen a kotin wiada manaman kaualap, re ap pokon dong re a. <sup>9</sup> A kotin masani ong sapwilim a tounpadak kan, kisin sop kis en kaonop ong i, pweki pokon o, pwe re de ki dong i. <sup>10</sup> Pwe a kotin kakelada me toto, irail ari pakoideda, pwe me somau ko me sair i. <sup>11</sup> O ni en ngen saut akan ngar i, re pupedi mo i, weriwer, indada: Sapwilim en Kot komui! <sup>12</sup> I ari kotin kalik irail edi, ren der kaireki i. <sup>13</sup> I ari kotidala nan nana o, ap molipei dong i, me a kotin kupura, re ap pota dong re a. <sup>14</sup> I ari kotin kileledi ekriamen, pwe re en ieiang i, pwen poroporone ir sili padapadak. <sup>15</sup> O manamanla kakelada me somau kan o kakaus tewil akan; <sup>16</sup> Simon a kotiki ong ad a Petrus. <sup>17</sup> O Iakopus nain Iepedäus, o Ioanes ri en Iakopus, a kotiki ong ad ara Poanerkes. Iet wewe: Nain nansapwe. <sup>18</sup> O Andreas, o Pilipus, o Partolomäus, o Matäus, o Tomas, o Iakopus, nain Alpäus, o Tadäus, o Simon men Kana, <sup>19</sup> O Iudas Iskariot, me pangala i. <sup>20</sup> Irail ari ko dong nan im eu. Pil pokon eu pokon pena. Irail ari sola kak manga. <sup>21</sup> Ni kompokepa ko rongada, re kodo, pwen wala sang i; pwe re inda, me a iakala. <sup>22</sup> A saunkawewe ko, me kodido sang Ierusalem inda: A katia Peelsepuk o saumas en tewil akan; iei me a kakauseki tewil akan. <sup>23</sup> I ari molipe ir do, masani ong irail ni karaseras akan: Ia pan duen Satan a kausawei Satan? <sup>24</sup> O ma toun wei eu u pena nan pung ar, wei o sota pan kak pwaida. <sup>25</sup> O ma penainai eu u pena nan pung ar, penainai o sota pan kak pwaida. <sup>26</sup> O ma Satan u ong pein i, a sota pan kak pwaida, a pan imwisokela. <sup>27</sup> Sota amen me pan kak ko ong nan im en kelail amen kulia a kapwa, ma a so saliedi mas me kelail o. A ap pan kak kawela im a. <sup>28</sup> Melel I indai ong komail: Dip akan karos pan lapwa sang nain aramas akan, o laue,

me re lalaueki. <sup>29</sup> A meamen lalau Ngen sarau sota pan lapwada, a pan puk ong kamekam soutuk. <sup>30</sup> Pweki ar inda: A katia ngen saut. <sup>31</sup> Ari in a, o ri a ol akan ap kodo, mi liki o iloke dong. <sup>32</sup> A pokon me momod impa o ap potoan ong i: Re mangi, in ar o ri ar ol akan mimi liki kainoma komui. <sup>33</sup> A ap kotin sapeng irail masani: Is in ai de ri ai kan? <sup>34</sup> A ap kotin aupwil sili po 'rail, me mod impa ko, masani: Kilang, in ai o ri ai ol akan! <sup>35</sup> Pwe meamen wiawia kupur en Kot, iei me ri ai ol o ri ai li o in ai.

## 4

<sup>1</sup>KADEKADEO a pil kotin tapiada kawewe liman sed o. Pokon kalaimun eu ap ko pena re a. A ap kotidang pon sop pot kotikot pon sed o. A pokon o mi nan sap pon oror. <sup>2</sup> A kotin kawewe ong irail me toto ni i karaseras akan, masani ong irail ni a padak: <sup>3</sup> Rong! Kilang, saunkamor o kolan kamorok. <sup>4</sup> Ni a kamokamorok akai ap moridi ong pon kailan al, manpir ap pirido nam ir ala. <sup>5</sup> A akai moredi ong wasa takain, wasa pwel petepet; irail ari madang wosada, pweki sota pwel lole. <sup>6</sup> Ni en katipin dakarada, re ap mongela o mela pweki sota kalau ar. <sup>7</sup> A akai moredi nan tuka teketek; o tuka teketek wosada, kasokiala, re ap sota wa. <sup>8</sup> A akai moredi nan pwel mau o pwaida wa; akai pan me sileisok; a akai me woneisok, a akai me epuki. <sup>9</sup> A kotin masani: Me salong a mia men rong, i en rong! <sup>10</sup> A lao kotin kalapukela, men imp a iangaki ekriamen ap kalelapok re a duen karaseras pukut. <sup>11</sup> A ap kotin masani ong irail: A mui ong komail, en asa duen me rir en wein Kot. A men liki re pan asa meakaros sang ni karaseras akan. <sup>12</sup> Pwe re kilang, ari sota kilang, o rongrong, ap sota dedeki; pwe re de pan wukila o dip ar lapwa sang irail. <sup>13</sup> A ap kotin masani ong irail: Komail sota dedeki karaseras pot et? A iaduen, omail pan asa karaseras tei ko? <sup>14</sup> Saunkamor me kamorok sili masan. <sup>15</sup> A mepukat me mi pon kailan al, wasa masan moredi ong, a re lao rongadar, Satan ap madangado, ki sang masan, me kamoremoredi ong nan mongiong arail. <sup>16</sup> O mepukat me moredi ong wasan takain, re lao rongadar masan o ap madang peren kida ale. <sup>17</sup> A sota kalau re 'rail ap dadaur eta ekis, lao songesong o kamekam wiauwi pweki masan o, re ap madang makar kida. <sup>18</sup> A mepukat me moredi ong nan tuka teketek, me rongada masan. <sup>19</sup> A anan en pai en sappa o in-ong kapwa, o norok en okotme pwaida, kasokela masan, ap sota wa. <sup>20</sup> A mepukat irail, me moredi ong nan pwel mau, me rongada masan o, ale o wa, akai pan me sileisok, a akai me woneisok, a akai me

epuki. <sup>21</sup> A kotin masani ong irail: Kandel pan wisikedo, pwen ko ong pan kasak de pan men wendi? A sote koda wong nin deun kandel? <sup>22</sup> Pwe sota me rir kot, me so pan sansalada, pil sota me okiok kot, me so pan lok sili. <sup>23</sup> Meamen me salong a mia men rong, i en rong! <sup>24</sup> A ap kotin masani ong irail: Komail kalaka, me komail rong! Pwe men song, me komail songki iduen a pil pan song, ong komail. O omail tungol pan laud. <sup>25</sup> Pwe me a mia, ekis pan ko ong; a me sota a mia, me ekis mi re a, pan katia sang. <sup>26</sup> A kotin masani: Iet duen wein Kot, ras ong aramas amen, me kamoredi ong nan pwel war en tuka. <sup>27</sup> Ap mairela, pirida, pong ran; a war o wosada ap kakairida a ap sota asa due. <sup>28</sup> Pwe pwel kin pein kawosada tuka. Mas katoka, mur mpok, mur war en korn nan mpok ap pwarada. <sup>29</sup> A ni wa ma, a ap madang ki ong men lepukedi, pwe rak mier. <sup>30</sup> A pil kotin masani: Da me kitail en karasai ong wein Kot? De da me kitail en kasonong ong? <sup>31</sup> A rasong wan tuka, me pan kamoremoredi ong nan pwel, me tititik sang war karos, me mi nan sap. <sup>32</sup> A lao kamoredi, ap wosada laude sang dip karos, ap kasang pasang laud; manpir en pan lang ap kin wendi pan mot a. <sup>33</sup> I song en karaseras akan toto a kotiki ong irail ni a kawewe ong irail masan o duen ar weweki. <sup>34</sup> Sota a masan, ma so karaseras. Ni arail kelepala, a ap kotin kadede ong sapwilim a tounpadak kan meakan. <sup>35</sup> Ni ran ota, lao sautik penaer, a kotin masani ong irail: Kitail daulul wong palio! <sup>36</sup> Ari, ni ar kadar pasang pokon o, re kamasalada nin sop o. Pil akai kisin sop mi re a. <sup>37</sup> Melimel ap koda, iluk ap pungedi ong nan sop o kadirela. <sup>38</sup> A a kotikot nan murin sop o, saisaimok pon ulunga. Irail ap kaopada potoan ong i: Saunpadak, kom sota kupurai kit, pweki at pan mela? <sup>39</sup> I ari kotin kirada, angiangida melimel, o kotin masani ong sed o: Moledi! Ang ap dukedi o molela kaulap. <sup>40</sup> A ap kotin masani ong irail: Da me komail masapwekeki? Iadue, sota omail poson? <sup>41</sup> Irail masapwekada kaulap, ap indada nan pung arail: Iaduen ol men et, me ang o sed peiki ong?

## 5

<sup>1</sup>IRAIL ari kotela sed o koti dong nan wein Katara; <sup>2</sup> A lao kotidi sang nin sop, aramas me ngen saut ti poa, madang ap tang dong i sang nin sousou kan. <sup>3</sup> Pwe a kin kaukauson nin sousou kan, sota amen, me kak saliedi i, sal mata sota pil kak. <sup>4</sup> Pwe pan toto a salikidi sal en nä o sal mata, ari a kin kamueit pasang sal mata o sal en nä; sota amen me kak kamandala i. <sup>5</sup> Ansau karos, pong o ran, a kin mimi nan sousou ko o nana, weriwer o pein lokeki i takai. <sup>6</sup> A ni a kilang

Iesus wasa doo, a ap tangalang dairukedi.  
<sup>7</sup> Weriwer laudeda indada: Menda re omui  
 ngai Iesus, Sapwilim en Kot lapalap? I kauk-  
 ilang komui Kot, komui ender kawairok ia!  
<sup>8</sup> Pwe a kotin masani ong i: Koti sang ara-  
 mas en, ngen saut koe! <sup>9</sup> I ari kotin kainoma  
 re a: Is ad om? A ap sapeng potoan ong  
 i: Iet ad ai lekion, pwe kit me toto. <sup>10</sup> A  
 ap poeki, ender kotin kaus ir ala nin sap  
 o. <sup>11</sup> Ari, pwin pwik kalaimun eu mimi  
 impan nana o, mangamanga sili. <sup>12</sup> Irail ap  
 poekipoeki potoan ong: Re kotin kadar kit  
 ala, pwe sen til ong nan pwik oko. <sup>13</sup> Iesus  
 ari kotin mued ong. Ngen saut akan ap  
 koiei sang, ko ong nan pwik oko. Pwik oko  
 ap tangedi wei ni aul ong nan sed ap mopila  
 nan sed. Irail impan riakid. <sup>14</sup> Silepa kan ap  
 tangdau, kaireki sili nan kanim o nan sap;  
 re ap koieila pwen kilang duen me wiaui;  
<sup>15</sup> Irail ari poto dong ren Iesus, kilang, me  
 tanwar en tewil o a momod, o likauer, o  
 lolekonglar; iei i me lekion mier re a. Re ap  
 masapwekada, <sup>16</sup> Irail me kilanger ap indai  
 ong irail duen me wiaui ong me tanwar  
 en tewil o, o duen pwik akan. <sup>17</sup> Re ap  
 poekipoeki, a en kotiwei sang sap arail. <sup>18</sup> Ni  
 a koti dong nin sop o, me tanwar en tewil o  
 poeki re a en iang i. <sup>19</sup> A i sota mued ong i,  
 ap masani ong i: Ko ong ni im om ren sau  
 om, kaire kin ir duen manaman lapalap,  
 me Kaun o wiai ong uk er o poke uk alar.  
<sup>20</sup> I ari kola, kaloki sili nan Dekapolis duen  
 manaman lapalap, me Iesus kotin wiai ong  
 i; irail karos ap puriamui kila. <sup>21</sup> Iesus lao  
 pil kotela sed o ong palio, pokon kalaimun  
 eu ap ko pena re a. A kotikot pon oror.  
<sup>22</sup> Ari, saumas en sinako ke amen, me ad a  
 Iairus kotido. Ni a tu ong i, ap dairukedi  
 sang. <sup>23</sup> Poekipoeki kausalap, potoan ong:  
 Nai kisin seripein kis koren iong mela; i  
 poeki, komui en kotido en pwil lim omui  
 poa, pwen lelalada, ap pan maurela. <sup>24</sup> I  
 ap kotin iangala, aramas toto ap idauenla,  
 koi dong pena. <sup>25</sup> Li amen, me nta pwilipwil  
 par ngaulriau. <sup>26</sup> O lolokolki me toto ren  
 saunwini toto o kida a kapwa karos, ap sota  
 katepe, pwe a totorela eta. <sup>27</sup> Ni a rongada  
 duen Iesus, a ap dilongedo muri nan pokon  
 o, o sair sapwilim a likau. <sup>28</sup> Pwe a inda: Ma  
 i sair sapwilim a likau eta, i pan kelalada.  
<sup>29</sup> Ari, pwilipwil en nta madang matata. I  
 ari pamada nan war a, me a kelada sanger  
 somau o. <sup>30</sup> Iesus ap madang kotin kaanda,  
 me roson kis ko sanger. A ap saupeli dong  
 pokon o masani: Is me sair ai likau? <sup>31</sup> A  
 sapwilim a tounpadak kan potoan ong: Ko-  
 muui masani, pokon et koi dong komui pe-  
 naer; a komui masani: Is me sair ia? <sup>32</sup> I  
 ari kotin aupwil sili, pwe a men masani, me  
 wia me o. <sup>33</sup> Li o ari masapwekada, rerer,  
 aser me wiaui ong i ap potodo, dairukedi  
 mo a, potoan ong duen melel en me wiaui

o. <sup>34</sup> A ap kotin masani ong i: Nai om  
 poson me kakelail uk adar. Ukowei popol,  
 o kelada sang om somau! <sup>35</sup> Ni a kotin  
 mamasan, irail kodo sang ren saumas en  
 sinako ke indada: Noun serepein o melar.  
 Menda kom kangiri saunpadak en? <sup>36</sup> Ni en  
 Iesus a angai kair o, ap masani ong saumas  
 en sinoko ke o: Kom der masak poson eta!  
<sup>37</sup> A ap sota kotin mued ong meamen  
 en idauenla i, Petrus eta, o Iakopus o Ioanes  
 ri en Iakopus. <sup>38</sup> Irail koti dong ni im en  
 saumas en sinako ke o, ap masani arail mo-  
 romorong o mamaiei kausalap. <sup>39</sup> A ni a  
 kotilong, a masani ong irail: Da me komail  
 moromorongki o mamaukeki? Seri en sota  
 melar, a mamair eta. <sup>40</sup> Re ap kakaurureki  
 i. I ari kotikiiei sang irail karos, ap kotin  
 ukada sam o in en seri o me iang i ko; a  
 ap pedelong ong wasa, me seri o wonon ia;  
<sup>41</sup> I ari kotin ale pa en seri o masani ong  
 i: Talita kumi! Iet wewe: Seripein i indai  
 ong uk, paurida! <sup>42</sup> Seripein ap madang  
 paurida, alu; pwe a saunpar eisokriau; irail  
 ap malamalaua kila kausalap. <sup>43</sup> I ari kotin  
 kalik irail edi, pwe meamen de asada, ap  
 masani, kisin manga en ko ong.

## 6

<sup>1</sup> A AP kotila sang wasa o, ap koti dong ni  
 udan sap we, o sapwilim a tounpadak kan  
 idauenla i. <sup>2</sup> Lao lel ran en sapat a kotin  
 tapiada kawewe nan sinako ke; me toto, me  
 rong puriamui kila, inda: Ia me lap en ale  
 mepukat? <sup>3</sup> O lolekong da eu, me mi re a,  
 me a kak wiaki manaman pukut? <sup>4</sup> Kaidin  
 i kapenta o, nain Maria, o ri en Iakopus, o  
 Ioses, o Iudas, o Simon? A kaidin ri a li akan  
 kin mi re atail? Re ap makar kida i. <sup>5</sup> Iesus  
 ap kotin masani ong irail: Sota wasa, me  
 saukop sota wau ia; nan sap we ta o ren  
 sau i ko o toun im a. <sup>6</sup> A ap sota kak wia  
 manaman eu wasa o, me somau kai ta, me  
 a kotin pwil po ar lim a ko o kakelail ir ada.  
<sup>7</sup> I ari pone kida ar soposon, ap kotin paang  
 sili kanim akan, kaukawewe. <sup>8</sup> A ap kotin  
 molipe dong re a ekriamen oko, o kotin  
 kadar ir pasang riamen me eu o kotiki ong  
 irail manaman, en poedi ngen saut akan.  
<sup>9</sup> Ap masani ong irail, re depa wa meakot  
 ni ar koko sili, sokon eta pot; iermen ed, de  
 prot, pil sota moni nan ed. <sup>10</sup> A re ko ong  
 eta nan sut, o der mi nan sakit riau. <sup>11</sup> A ap  
 kotin masani ong irail: Wasa kis, me komail  
 pedelong onger ni im eu, komail mimieta,  
 komail lao kowei sang wasa o. <sup>12</sup> A wasa  
 eu, me kang kasamo o rong komail, komail  
 sipede sang pwel ni na omail, ni omail ko  
 sang, pwen kadede ong irail. <sup>13</sup> Irail ap kola  
 o padapadaki me ren kalula. <sup>14</sup> Re pil kause  
 sang tewil toto o keie me somau toto, kakela  
 ir ada. <sup>15</sup> Eroses nanmarki mangiada pwe  
 mar a indandsili, a ap masani: Iei Ioanes



saunpaptais o, me mauredar sang ren me melar akan; iei i me a wia manaman pukat. <sup>15</sup> Akai inda, me i Elias; a akai, me i saukop amen de amen me due saukop akan. <sup>16</sup> Ni en Erodos mangiada, a ap masani: Ioanes, me i lepuke sang mong a; ari, a mauredar. <sup>17</sup> Pwe pein Erodos me poron wong, saikidi Ioanes, o saliedi ong nan imateng pweki Erodias, en ri a ol Pilip a paud, pwe a id paude kida i. <sup>18</sup> Pwe Ioanes me kapung ong Erodos: Me sota pung omui atia sang en ri omui ol a paud! <sup>19</sup> Iei, me Erodias kailong kila i, ap men kamela i; ari, a sota kak. <sup>20</sup> Pwe Erodos laan Ioanes, pwe a asa, me i ol pung o saraui amen, i ari tataakata i, ap peiki ong o mamangi perenek. <sup>21</sup> Ari ran mau eu, ran en Erodos a ipwidi, a ap kotin kamadipa a saupedi ko, o a saumas oko, o na me lapalap en wein Kaliläa kan. <sup>22</sup> Ari, nain Erodias seripein ap kodo kakalek, kamakamait Erodos o me momod re a ko ni tepel. Nanmarki ap masani ong seripein o: Poeki re i meakot, me koe mauki; i pan ki ong uk. <sup>23</sup> I ari kotin kaula: Meakot koe poeki re i, i pan ki ong uk, lao lel apali en ai wei. <sup>24</sup> A ap pedoi wei indang in a: Da me i pan poeki? I ari inda: Monga en Ioanes saunpaptais o. <sup>25</sup> I ari puredo, madang dong ren nanmarki o, poeki, inda: I men, komui en madang kotikido monga en Ioanes saunpaptais nan eu dal en! <sup>26</sup> Nanmarki ap topwaila kaualap, a pweki a kotin kaula o pweki ir, me iang i ni tepel ko a sota men kapapalawei. <sup>27</sup> Nanmarki o ap madang poronela saunpei amen, masani, monga en wisikedo. <sup>28</sup> A ap kola, lepuke sang monga nan imateng, ap wa kodo monga o nan dal eu ap ki ong seripein o; seripein o ap kiong in a. <sup>29</sup> A tounpadak kan lao rongadar, re ap kodo ale kalep a, nekidala nan sousou o. <sup>30</sup> Wanporon oko kapokon irail pena ren Iesus, potoan ong i mekaros, me re wia o me re kawewedar. <sup>31</sup> A ap kotin masani ong irail: Komail kelepe dong sap tan; kamol mas. Pwe me toto purepure ir; irail ari sota pisokki ong manga. <sup>32</sup> Re ap takeda sop kelepe kolang sap tan. <sup>33</sup> A me toto kilang ar masalwei; me toto asa irail. Ir ari sapal sang kanim karos audi mo a ap pokon pena re a. <sup>34</sup> A Iesus lao keredi sang nan sop o, ap masani aramas toto, ap kupura ir ala; pwe likamata irail sip, me sota sile parail. A ap kotin tapiada kawewe ong irail me toto. <sup>35</sup> Wasa lao sautik penaer, sapwilim a tounpadak kan ap poto dong re a, potoan ong: Sap tan eu met, ap wasa sautiker; <sup>36</sup> Re kotin kadar ir pasang; pwe re en paangewei sap koren kan o kisin kanim akan o pein netiada kan ar prot, pwe sota man ar tungole meakot. <sup>37</sup> A ap kotin sapeng masani ong irail: Komail katungole ir! Re ap potoan ong i: Se en kola en netiada prot me

denar riepuki, ap ki ong irail ren tungole? <sup>38</sup> A ap kotin masani ong irail: Lopon en prot depa mi re omail? Kowe kalelapok! Re lao kalelepok, rap potoan: Me limau o mam riamen. <sup>39</sup> A masani ong irail, re en wia pwini ir pasang, kamodang ir di ong nan rä. <sup>40</sup> Re ap mondi ni pwini akai; wad epuki o limek ni pwini ko. <sup>41</sup> A ap kotikidar lopon en prot limau o mam riamen masandang nanlang laolaoki pwilitiki pasang o ari, kotiki ong sapwilim a tounpadak kan, pwe re en nek ong irail. O mam riamen oko pil nene ong irail karos. <sup>42</sup> Irail karos ari mangara o medier. <sup>43</sup> Rap deuk pena kopou eisokriau maremor en kamadip o luan mam oko. <sup>44</sup> Irail me tungoler prot oko me ol limekid. <sup>45</sup> I ari kotin madang pain sapwilim a tounpadak kan, irail en ko ong nin sop o, tiang wong Petsaida palio, pwe a pan kotin kadar pasang pokon o. <sup>46</sup> A lao kotin kadar ir pasang, a ap kotidalang nan nana eu, pwen laolao. <sup>47</sup> A lao sautik penaer, sop o mi nan ailep en sed. A a kotin kalakalapuk nan sap. <sup>48</sup> I ari masani arail wiawia roro, pwe me ang matong irail. A nin soran a koti dong irail, weid pon sed, a pan dauli ir wei. <sup>49</sup> Ari, ni arail kilang a kotin weweid pon sed, re kiki ong, me ani amen. Re ap weriwer. <sup>50</sup> Pwe irail karos kilang i, ap masapwekida i ari madang masani ong irail, masani: Komail perenda! Ngai met! Der masak! <sup>51</sup> I ari keredang pon sop o, ap moleidi. Re ap puriamui kila kaualap o ponepone kida. <sup>52</sup> Pwe re sota lamelame prot oko; pwe mongiong arail kakaluakalar. <sup>53</sup> Irail lao kotido, re ap inen dong wein Kenesaret, ap kai ong liman sap o. <sup>54</sup> Irail lao keredi sang nan sop o, re ap madang asada i. <sup>55</sup> Re ap tang pasang wasa karos tapiada wa dong i me somau pon ro 'rail wasa re rong, me a kot ia. <sup>56</sup> O wasa, me a kot ia, kisin kanim laud akan de sap, re kin pwilikidi nani al akan me somau kan, ap poekipoeki, pwe re en sair kailan sapwilim a likau ta. Ari, me doke ko karos ap kelailada.

## 7

<sup>1</sup> PARISÄR akan o saunkawewe kai ap pokon dong re a, me kodo sang Ierusalem. <sup>2</sup> Ni ar kilang sapwilim a tounpadak kai kang proteki pa samin, so omiom, <sup>3</sup> Pwe Parisär o Sus akan sota kin manga, ma re so omiom mas; pwe re wiawia padok en men kaua ko. <sup>4</sup> O ni ar kin puredo sang wasan net, re sota kin manga, ma re so omiom mas o tiak toto, me re aledi, re kin wiawia: Widen dal tikitik, dal laud, dal pras, o men momod. <sup>5</sup> Parisär o saunkawewe ko ap kalelapok re a: Da me sapwilim omui tounpadak kan sota wiaki padok en men kaua kan? A re mangata prot so omiom? <sup>6</sup> A

kotin sapeng masani ong irail: Melel eta en Iesaias a kopadar, me komail malaun akan, iduen a intingidi: Aramas pukat kin kaka kin ia au arail a mongiong arail me doo sang ia. <sup>7</sup> Ari, me mal ar kaudok ia, pwe kusoned en aramas eta, me re kin kaukawewe. <sup>8</sup> Pwe komail kin kasela kusoned en Kot, ap id wiawia padok en aramas; iet widen dal laud o tikitik ape; o pil akai, me komail kin wiawia. <sup>9</sup> A ap kotin masani ong ir, melel me komail kasela kusoned en Kot, pwe komail en apwaliela pein omail padok. <sup>10</sup> Pwe Moses masani: Kakaki sam om o in om; o meamen me lalau sam a de in a en kamela! <sup>11</sup> A komail kin inda, ma aramas amen indai ong sam de in a: Korpan (iet wewe: Mairong eu), me koe men aneki sang ia, komail inda, me sota dip a. <sup>12</sup> Komail ari sola mueid ong i, en wiai ong sam a de in a meakot. <sup>13</sup> Ap kawe kila masan en Kot omail padok, me komail pein wiada. O pil me toto me due met, me komail kin wiawia. <sup>14</sup> Ni a kotin molipe pena pokon o re a, a kotin masani ong irail: Komail karos rong ia o weweki! <sup>15</sup> Sota meakot men likin aramas, me pan ko ong lole, kasaminela i. A meakan, me koda sang lole, iei eta, me kin kasaminela aramas. <sup>16</sup> Meamen me salong a mia men rong, i en rong! <sup>17</sup> Ni a kotilong ong nan im eu sang ren aramas oko, sapwilim a tounpadak kan ap kalelapok re a duen karaseras o. <sup>18</sup> A ap kotin masani ong irail: Da, komail me pil so lolekong? Komail sota dedeki, me meakot men likin aramas kin ko ong lole, sota kak kasaminela? <sup>19</sup> Pwe a sota ko ong nan mongiong; pwe nan kaped eta, ap pidok wei sang, koko sang mekaros? <sup>20</sup> A ap kotin masani: Meakan me koda sang lol en aramas, iei me kin kasaminela aramas. <sup>21</sup> Pwe sang lol en aramas, sang nan mongiong, lamelam sued kin tapida sang ia: Kamal, nenek, kamela aramas. <sup>22</sup> Pirap, norok, sarsued, wideng, sengo, poosued, lalaue, lemai, soukoti. <sup>23</sup> Mesued pukat karos tapida sang lole, ap kasaminela aramas. <sup>24</sup> I ari kotila sang wasa o, kotilang wein Tirus o Sidon, a lao kotilong ong nan im eu, ap sota men, aramas en asa i. Ari, a sota kak rirala. <sup>25</sup> Pwe li amen, me na seripein ngen saut ti poa, madang rongada i, ap kodo dairukedi ong ni aluwilu a. <sup>26</sup> Li en Krik amen, kisan sap en Siro-Penisia, potoan ong, poekipoeki re a, en kausa sang na seripein tewil o. <sup>27</sup> Iesus ap kotin masani ong i: Seri ko pan med mas. Pwe a sota mau, ale en seri ar tungol prot, ap kasedi ong ren kiti. <sup>28</sup> A ap sapeng potoan ong i: Melel Maing! Ari, kiti kin tungole maremor en seri ar tungol prot pan tepel. <sup>29</sup> A ap kotin masani ong i: Pweki om lokaia en, koweil! Tewil o ko sanger ren noum serepein o! <sup>30</sup> Ari, a kolang im a, a ap diarada, me tewil o ko sanger,

o na seripein wonon nan deu a. <sup>31</sup> A lao pil kotin purela sang wein Tirus o Sidon ap koti dong ni le en Kaliläa, weidedo nan wein Dekapolis. <sup>32</sup> Re ap wa dong i salongepon amen, me lotong; irail ari poeki re a, en kotin pwil poa lim a. <sup>33</sup> I ari kotin ukala sang i ni pokon o, ap kilong ong sondin lim a nan salong a o likidi sair lo a. <sup>34</sup> A ap masandang nanlang, asmamarada, masani ong i: Epata! (iet wewe: Wasok pasang). <sup>35</sup> Salong a ap madang wasok pasang o sal en lo a lapwada. A ap lokaia mau. <sup>36</sup> I ari kalik irail edi re depa indai ong meamen. A kainapwi irail; ari, re ap kalaudela ar kaloki sili. <sup>37</sup> Re puriamui kila kaulap, inda: Me mau, me a wia dar kan! Pwe a kakarongada me salongepon, ap kalokaiada, me lotong.

## 8

<sup>1</sup> NI ran oko pil pokon kalaimunia mia, ap sota me re tungole; a ap kotin molipedo sapwilim a tounpadak kan, masani ong irail: <sup>2</sup> I pokela pokon et, pwe re ieiang ia ran silu, ap sota ar tungol. <sup>3</sup> O ma I kadar ir wong ni im ar dupok, re pan lipongmas nani al, pwe akai ir kodo sang wasa doo. <sup>4</sup> A sapwilim a tounpadak kan ap sapeng potoan ong i: Ia wasa, me amen pan kak ki sang ia prot, men kamedela pokon et nan sap tan et? <sup>5</sup> A ap kotin kainoma re irail: Prot depa mi re omail? Re ap sapeng potoan ong: Me isu. <sup>6</sup> I ari kotin masani ong pokon o, en mondi ong nan pwel, ap kotikida lopon en prot isu, laolaoki, pilitiki pasang o ari, ap kotiki ong sapwilim a tounpadak kan, pwe ren nek. Irail ari nek ong pokon o. <sup>7</sup> Kisin mam kai pil mia, i ari laolaoki o masani, ren pil neki ong irail. <sup>8</sup> Irail ari manga o medier. Irail ap deuk pena kopou en maremor isu luan kamadip, <sup>9</sup> Me mangaer me koren iong pakid. A ap kotin kadar ir pasang. <sup>10</sup> I sapwilim a tounpadak kan ap madang kotidang pon sop pot, kotelang nan wein Dalmanuta. <sup>11</sup> Parisär akai ap kodo, tapiada akamai ong i, men kilang re a kilel sang nanlang, pwe re kasongesong i. <sup>12</sup> A ap kotin kaangangala nan ngen i, masani: Menda di wet ngongki kilel eu? Melel I indai ong komail: Sota kilel eu pan ko ong di wet. <sup>13</sup> I ari kotila sang irail, pil pur ong nin sop o, kotilang palio. <sup>14</sup> Irail ap monokela prot oko, men kapinwar arail, lopon prot ta ieu mimi re rail nin sop o. <sup>15</sup> I ari kapung ong irail masani: Kalaka en Parisär ko ar kalap o en Erodes a kalap. <sup>16</sup> Irail ap lamelame nan pung arail: Sota atail prot oko. <sup>17</sup> Ni en Iesus a kotin mangiada, a masani ong irail: Da me komail toutouki a sota kan omail prot? Komail saikenta dedekila o weweki? Mongiong omail kapikapitakaita? <sup>18</sup> Mas omail mia, ap sota kilang; salong omail mia, ap sota rong. O komail sota tamataman, <sup>19</sup> Ni

ai pilingong me limekid lopon en prot li-mau o, kopou en maremor depa, me komail deukada? Re ap potoan ong i: Me eisokriau. <sup>20</sup> O isu nan pung en me pakid, kopou en maremor depa, me komail deukada? Re ap potoan: Me isu. <sup>21</sup> A ap kotin kainoma re 'rail: A da me komail sota dedeki? <sup>22</sup> A ap koti dong Petsaida. Re ap wa dong i maskun amen, poekipoeki en sair i. <sup>23</sup> A ap kotin ale pa en me maskun o kaluala sang ni kisin kanim o; A ap likidi ong ni mas a o pwil poa lim a ko ap kainoma re a, ma a kilangada wasa de so? <sup>24</sup> I ari sarada potoan: I kilang aramas akan likamada tuka kai, me alialu sili. <sup>25</sup> A pil pwil pon mas a lim a ko, ap kasaradakeda. I ari kelailada ap kilangada mau. <sup>26</sup> A ap kotin kadaralang nin im a masani: Koe depa pur wong ni kisin kanim o, o pil depa indai ong meamen nin kanim o! <sup>27</sup> Iesus i sapwilim a tounpadak kan ap kotieila nan kanim en Säsarea Pilipi ko. Ari, ni a kotikot kowei, ap kotin kainoma ren sapwilim a tounpadak kan masani ong irail: Is me aramas inda me ngai? <sup>28</sup> Irail sapeng i potoan ong: Ioanes saunpaptais; a akai inda, me Elias; a akai, me amen sang ren saukop akan. <sup>29</sup> A ap kotin kainoma re irail: A komail, is me komail kin inda me ngai? Petrus ap sapeng potoan ong i: Komui Kristus! <sup>30</sup> I ari kotin kalik irail edi, re depa indai ong meamen i. <sup>31</sup> A ap kotin tapiada kawewe kin irail, me Nain aramas en kalokolok toto o sokonekonla pan saumas akan, o samero lapalap akan, o saunkawewe kan, o pan kamela, ap pan maureda murin ran silu. <sup>32</sup> Masan wet a kotin masani sansal. Petrus ap ukada i tapiada kapung ong i. <sup>33</sup> Iesus ap kotin saupeido aupwil sili pon sapwilim a tounpadak kan, kapung ong Petrus masani: Kola muri, Satan! Pwe om lamelam kaidin en Kot, a en aramas. <sup>34</sup> A kotin molipedo pokon o sapwilim a tounpadak kan, a masani ong irail: Meamen pan idauen ia, en tounmeteki pein i, ap wada a lopu, idauen ia. <sup>35</sup> Pwe meamen kanakanai maur i, pan pupe sang. A meamen kasela maur i pweki ngai o rongamau, pan dorela i. <sup>36</sup> Pwe da me katepan aramas a aneki sappa u, ap kasela maur? <sup>37</sup> O da me aramas pan wiliankida maur i? <sup>38</sup> Pwe meamen namenok kin ia o ai padak kan nan pung en di en kamal o sued wed, i me Nain aramas pil pan ailaki, ni a pan kodo ni lingan en Sam a iang toulrang sarau kan.

## 9

<sup>1</sup> A AP kotin masani ong irail: Melel I indai ong komail: Akai me iang mi met, sota pan mela, lao kilang wein Kot a kokido manaman. <sup>2</sup> Murin pong wonu pong Iesus ap kotin ukada Petrus o Iakopus o Ioanes kalua ir dalang pon nana ileile eu, ir kalapuk. I ari

kotin wukila mo 'rail. <sup>3</sup> Sapwilim a likau ko lingalingala, pueteputeteta sno. Sota saun-lopolog nan sappa kak kapueteputetetala dueta. <sup>4</sup> Elias i Moses ap pwara dong ir, ari, ira o Iesus ap mamasan pena. <sup>5</sup> Petrus ap sapeng potoan ong Iesus: Rapi, me mau ong kitail en kotikot met. Kitail en kauada kisin im silikis: Tanpas ar; o en Moses o en Elias. <sup>6</sup> Pwe a sasa, da me a pan inda, pwe re masapwekada. <sup>7</sup> Pali en dapok pali ap kadupwal irail edi; o ngil eu peidido sang nan dapok o: I met nai. Ol kompok! Komail rong i! <sup>8</sup> Ari, re salioakeda, solar amen me re kilang, Iesus ta, me kotikot re 'rail. <sup>9</sup> Ari, ni arail kotikot kotido sang nin nana o, a kotin kalik irail edi, re depa indai ong meamen, me re kilang ko, lao Nain aramas mauredar sang ren me melar akan. <sup>10</sup> Re ap edie pena masan pot et nan pung ar, ap peipeidokki pena, da wewe en maureda sang ren me melar akan? <sup>11</sup> Irail ap peidok re a potoan ong: Da me saunkawewe kan indaki, Elias pan pwarado mas? <sup>12</sup> I ari kotin sapeng, masani ong irail: Melel Elias kodo mas, kamauiada meakan. O iaduen intingidi duen Nain aramas? Me pan kolokolok toto o sokonekon. <sup>13</sup> A I indai ong komail, Elias pwarer; o re wiai ong i, me re mauki duen a intingidi due. <sup>14</sup> A lao koti dong tounpadak kan, a masani pokon kalaimunia eu kapil ir pena o saunkawewe kan peipeidok re irail. <sup>15</sup> Ni ar kilangadar i, pokon o ap puriamuiki la tangado ranamau ong i. <sup>16</sup> A ap kotin kainoma re irail: Peidok da kai, me komail idedok re 'rail? <sup>17</sup> Amen toun pokon o sapeng i potoan ong: Saunpadak, i potoan dong komui nai putak o, me ngen lotong mi poa. <sup>18</sup> Ari, wasa karos me a kin tiada poa, a kin kapururada; a ap kin pudopud o katekatete ngi o tongetongela. I potoan ong sapwilim omui tounpadak kan, pwe re en kausa sang i, ari, re sota kak. <sup>19</sup> A ap kotin sapeng irail masani: Di wet meid soposon. Ia arain ai pan mimi re omail, ia arain ai pan kokoa komail? Wa dong ia i! <sup>20</sup> Irail ap potong i. Ni a kotin masani i, ngen o ap madang kupururada i; a ap pupedi ong nan pwel, wia pudopud taputapur sili. <sup>21</sup> A ap kainoma ren sam a: Ia arain me kot et a lel? A ap potoan ong: Sang ni a seri. <sup>22</sup> Pan me toto a kin kasedi ong i nan iai o nan pil, pwen kamela i. Ari, ma re kotin kak ong, re kotin kupura kit ala sauasa kit! <sup>23</sup> Iesus ap kotin masani ong i: Ma koe me poson; meakaros me kak ren me poson. <sup>24</sup> Madang sam en kisin seri ap weriwer, sangesang, potoan: Maing, i poson. Kom kotin katinaiaada sang ai soposon. <sup>25</sup> Ni en Iesus a kotin masani ar tangetang pena, a ap angiangiada ngen saut o kotin masani ong ngen lotong o salongepon: I indai ong uk, koieido sang lole! Koe depa pure wong

i! <sup>26</sup> A ap weriwer, kapururada kaualap, ap koiei sang. I ari likamata a melar. Akai ap inda, a melar. <sup>27</sup> Iesus ap kotin ale pa a kauada, i ari uda. <sup>28</sup> Ni a koti dong ni im o, sapwilim a tounpadak kan ap okiok peidok re a potoan ong: Da me se sota kak kauseki sang? <sup>29</sup> A ap kotin masani ong irail: Song wet sota kin koki sang meakot kapakap o kaisesol eta. <sup>30</sup> Re ap kotila sang wasa o, weidala nan Kaliläa. A sota men, meamen en asa. <sup>31</sup> Pwe a men kotin kawewe ong sapwilim a tounpadak kan ap masani ong irail: Nain aramas pan pangalang ni pa en aramas. Irail pan kamela i a murin a kamela a pan maureda murin ran kasilu. <sup>32</sup> A irail sota dedeki masan o; a re masak kalelapok re a. <sup>33</sup> A ap koti dong Kapernaum; ni a kotikot nan im o a ap kotin kainoma re 'rail: Da me komail akakamaiki nani al o? <sup>34</sup> Irail ari nenenla, pwe re akamaiki nani al o, is me pan laud re 'rail. <sup>35</sup> I ari kotidi, molipedo ekriamen oko, ap masani ong irail: Meamen men moa, a en mi muri o papa ong karos. <sup>36</sup> I ari kotin ale kisin seri amen, kotikidi ong nan pung arail: A lau palodi i ap masani ong irail. <sup>37</sup> Meamen me apwali amen sang ren kisin seri pukat ni ad ai, a pil apwali ia. A me apwali ia, kaidik ngai, me a apwali, a me kadar ia do. <sup>38</sup> Ioanes ap sapeng i, potoang ong: Saunpadak, se kilang amen, me kakaus tewil akan ni mar omui, a ap sota kin iang kit. Kit ari inapwiedi, pweki a kaidin kis at. <sup>39</sup> Iesus ap kotin masani: Der inapwiedi! Pwe meamen me wia manaman ni ad ai, sota pan kak en lalau ia. <sup>40</sup> Pwe meamen sota u ong kitail, i kisan atail pali. <sup>41</sup> Pwe meamen, me pan ki ong komail dal en pil eu ni ad ai, pweki omail kisan Kristus, melé I indai ong komail, kating i sota pan salonga sang. <sup>42</sup> O meamen, me kamakar amen ir me tikitik, me poson ia, a mau ong takai en ir plaua eu en paudoki ong ni tapin wor a; a ap lokidokila nan madau. <sup>43</sup> Ma apali en pa om kamakar uk, lepuke sang! A mau ong uk, ko ong maur, ni om dangidang sang om pa pokon mia, ap ko ong nan pweleko, nan kisiniai sokun. <sup>44</sup> Wasa ar muas sota kin mela o kisiniei sota kin kunla. <sup>45</sup> O ma apali en nä om kamakar uk, lepuka sang! A mau ong uk, ko ong maur ni om sikilikil sang om pat en nä pokon mia, ap lokidokila nan pweleko, nan kisiniai sokun. <sup>46</sup> Wasa ar muas sota kin mela o kisiniai sota kin kunla. <sup>47</sup> Ma apali mas om kamakar uk, kapida sang! Me mau ong uk, mas pali pedelong ong nan wein Kot sang mas unsok lokidokila nan kisiniai en pweleko. <sup>48</sup> Wasa ar muas sota kin mela, o kisiniai sota kin kunla. <sup>49</sup> Pwe amen amen pan soleki kisiniai, dueta mairong karos kin soleki sol. <sup>50</sup> Me mau sol. A ma sola nam en

sol, nam a pan ko sang ia? Sol en mi re omail o komail popol pena!

## 10

<sup>1</sup> IESUS ap kotila sang wasa o, koti dong wein Iudäa, palila sang Iordan. Aramas ap pil pokon dong re a. A ap pil pur ong padak kin ir, due me a kin wiawia. <sup>2</sup> Parisär kai ap kodo peipeidok re a: Me pung, ol en muei sang a paud? Irail ari kasongesong i. <sup>3</sup> A ap kotin sapeng masani ong irail: Da me Moses masani ong komail? <sup>4</sup> Re ap sapeng: Moses mueideda kisin likau en kamueit en wiaui, ap muei sang. <sup>5</sup> Iesus ap kotin sapeng masani ong irail: Pweki omail kapitakai, me a intingie kida kusoned wet. <sup>6</sup> A nin tapin sappa a wiauiata: Kot a kotin wia ira da ol o li. <sup>7</sup> I me aramas amen pan pededi sam a in a, pat ong eta a paud. <sup>8</sup> Ira ari pan uduk eta eu, ira soer riamen, a uduk eta eu. <sup>9</sup> Ari, meakot Kot kapad penaer, aramas der kamueit pasang! <sup>10</sup> Nan im o sapwilim a tounpadak kan pur ong kalelapok re a due. <sup>11</sup> I ari kotin masani ong irail: Meamen, me muei sang a paud li, ap ale amen, a kamal i. <sup>12</sup> O ma li amen muei sang a paud, ap ale amen, a kin kamal. <sup>13</sup> Re ap poto dong re a kisin seri kai, pwen kotin sair ir. Tounpadak kan ap kapoui irail me wado ko. <sup>14</sup> Ni en Iesus a kotin masani, a ap kotin suede kida, ap masani ong irail: Mueid ong kisin seri akan, en ko dong re i. Der kalik irail edi! Pwe jei song en, me udan wein Kot. <sup>15</sup> Melel I indai ong komail, meamen, me sota ale wein Kot rasong kisin seri men, a sota pan pedelong ong lole. <sup>16</sup> A kotin palo irail edi, pwil po 'rail lim a ko, kapai irail ada. <sup>17</sup> Ni a kotiieilang nani al o, meamen ap tang dong i, kelepukeidi, kalelapok re a: Saunpadak mau, da me i en wia, pwe i en soki maur soutuk? <sup>18</sup> Iesus ap kotin masani ong i: Da me koe indaki, me I mau? Sota meamen me mau, Kot eta. <sup>19</sup> Koe kin asa kusoned akan: Koe der kamal! Koe der kamela! Koe der pipar! Koe der kinakine mal! Koe der morsued! Wauneki sam om o in om! <sup>20</sup> A ap sapeng potoan ong i: Saunpadak, mepukat i kin wiawiada sang ni ai tikitik kokodo. <sup>21</sup> Iesus ap kotin mamasani i o kupura, ap masani ong i: Me takis me lua, kowei, netikila meakaros, me koe aneki, ki ong me samama kan; om pai ap pan mi nanlang; ap kodo, ale om lopu idauen ia! <sup>22</sup> I ari patau kila masan pot et, kokola insensued, pwe a kapwa me toto. <sup>23</sup> Iesus ap kotin aupwili sili, ap masani ong sapwilim a tounpadak kan: Meid apwal ong me kapwapwa, en pedelong ong nan wein Kot. <sup>24</sup> Tounpadak kan ap puriamui kila a masan oko. Iesus ap pil kotin sapeng masani ong irail: Seri ko! Meid apwal ong irail, me keleki kapwa, en pedelong ong nan wein Kot. <sup>25</sup> Me mangai

ong kamel en tilong nan por en dikok, sang me kapwapwa en ko ong nan wein Kot. <sup>26</sup> Irail ari waponda kausalap, indinda nan pung arail: A is me kak kamaurela? <sup>27</sup> Yesus ap kotin mamasani wong irail masani: A so kak pan aramas, a kaidin pan Kot; pwe ren Kot meakaros me kak. <sup>28</sup> Petrus ap tapiada potoan ong: Re masani, se likidmaliela meakaros, ap idedauen komui sili. <sup>29</sup> Yesus ap kotin sapeng masani! Melel I indai ong komail: Sota meamen, me likidmaliela im, de ri a ol, de li akan, de sam, de in, de a paud, de seri ko, de sap pweki ngai o rongamau, <sup>30</sup> Me so pan id aneki pan me epuki ansau wet im, o ri a ol, o li akan, o nono, o seriko, o sap, iangaki kamekam, o maur soutuk nan muei kokodo. <sup>31</sup> A me toto men moa, pan men murla, o men mur pan moala. <sup>32</sup> Ni arail kotikot kodalang Ierusalem, Iesus me kotin tiong mo 'rail; a irail puriamui kila, idedauen wapon. A ap kotin ale ekriamen oko, ap kotin tapiada masani ong irail, me pan wiaui ong i ko: <sup>33</sup> Kilang, kitail kodalang Ierusalem. Nain aramas pan pangalang samero lalalap o saunkawewe kan; re ap pan kadeikada, en kamela, ap id kilang ren me kisan men liki kan. <sup>34</sup> Re ap pan kapikapit i, o woki, o kondipi, o kamela. A ap pan maureda murin ran silu. <sup>35</sup> Iakopus i Ioanes nain Sepedäus akan potodo, potoan ong i: Saunpadak, se men, komui en kotin wiai ong kit meakot, me se mauki. <sup>36</sup> A ap kotin masani ong ira: Da me koma mauki, I en wiai ong koma? <sup>37</sup> Ira ap potoan ong i: Re kotin mueid ong kit, amen kit en mod pali maun omui, a amen pali maing nan omui lingan. <sup>38</sup> A Iesus kotin masani ong ira: Koma sasa, me koma poekipoeki en. Koma pan kak nim dal, me I nim, de paptaiseki paptais me I paptaiseki? <sup>39</sup> Ira ap potoan ong i: Se kak. Iesus ap kotin masani ong ira: Ei, koma pan nim dal me I nim, o paptaiseki paptais, me I paptaiseki. <sup>40</sup> A mod pali maun i o pali maing i, I sota kak mueid ong; pwe ong irail eta, me a onop ong. <sup>41</sup> Ni en ek oko ar rongada, re ap suedekida Iakopus i Ioanes. <sup>42</sup> Iesus lao molipe ir do, ap kotin masani ong irail: Komail asa duen saupeidi en wei pokon ar kin poe irail edi o ar saumas akan kin manaman ong ir. <sup>43</sup> Ari, due met sota pan wiaui nan pung omail. A me men laud nan pung omail, a en omail papa. <sup>44</sup> Meamen re omail, me men saumas, en ladu en karusia. <sup>45</sup> Pwe pil Nain aramas sota kotido, pwe en papa i, a pwen papa ong irail, kida maur i wiliandi me toto. <sup>46</sup> Irail ap ko dong leriko. Ari, ni i o sapwilim a tounpadak kan o pokon kalaimun kotiiie sang Ieriko, Partimäus maskun, nain Timäus, momod liman al o, wia poekipoek. <sup>47</sup> A ni a rongada, me iei Iesus en Nasaret, a ap weriwer indada:

Iesus, sapwilim en Dawid, kupura ia! <sup>48</sup> Me toto ap kidaue, pwen nenenla. Ari, a ap kalaudela a weriwer: Sapwilim en Dawid kupura ia! <sup>49</sup> Iesus ari kotin udi, masani en peekek kodo. Ir ari ekeredo ol maskun en indai ong i: Insenemau, uda! A kotin molipe uk! <sup>50</sup> I ari kasela a likau madang uda ap poto dong Iesus. <sup>51</sup> Iesus ap kotin sapeng masani ong i: Da me koe mauki, I en wiai ong uk? Me maskun o ap potoan ong: Rapuni, i men potoan kilang wasa. <sup>52</sup> Iesus ap kotin masani ong i: Ukewe! Om poson me kakelail uk ada. I ari madang kilangada wasa, ap idauen la Iesus.

## 11

<sup>1</sup> NI arail koren iong Ierusalem, kokolang Petpake o Petanien impan dol Oliwe, a ap kotin poronela sapwilim a tounpadak riamen. <sup>2</sup> Masani ong ira: Koma ko ong nan kisin kanim en, me palilan komail. Ari, ni oma pedelong ong lole, koma pan madang diar esel pul amen a sansal, me aramas amen kaikenta dake. Lapwada i o kaluado met! <sup>3</sup> A ma meamen indai ong koma: Da me koma wiaki met? A koma sapenga: Kaun o men en upa. Ari, a pan madangada kadarado. <sup>4</sup> Ira ari kola, diar esel pul o, a sansal likin im o nan au en al riau; ira ap lapwada. <sup>5</sup> Akai ir u wasa o indai ong ira: Da me koma lapwakida esel pul en? <sup>6</sup> Ira ari sapeng kin irail, me Iesus masani ong ira. Irail ari kadar ong ira. <sup>7</sup> Ira ari potoan dong esel pul o ren Iesus, pwilidi ong ar likau ko poa. I ari kaipokedi ong poa, <sup>8</sup> Me toto perokida sang ar likau nani al, akai paledi ran tuka, irepakidi nani al o. <sup>9</sup> Irail me tiong o me idauen ap ngisingis, inda: Osiana! Meid iasunai me kotikido ni mar en Kaun! <sup>10</sup> Meid pai wei kokodo, en sam atail Dawid! Osiana nanlang! <sup>11</sup> A ap kotilong ong Ierusalem o im en kaudok. A lao kotin mamasani sili meakan, a ap kotilang Petanien pwe a wasa pongier, iangaki eikriamen. <sup>12</sup> Pweidi songada, irail ap kotin puredo sang Petanien. A ap kotin men konotada. <sup>13</sup> A lao kotin masani tuka pik apot sang wasa doo, ta mia. A ap koti dong, ma a so pan diar meakot ia. Ni a lel dong, a ap kotin diarada ta eta, pwe saikenta ansau en pik. <sup>14</sup> I ap kotin sapeng masani ong i: Sota meamen pan kang sang uk wan tuka kokolata. A sapwilim a tounpadak kan rong. <sup>15</sup> Irail ap koti dong Ierusalem. Iesus lao kotilong ong nan im en kaudok, a ap kotin tapiada kase sang irail, me netinet nan im en kaudok, ap wukidedi en saun kawil moni ko ar tepel o en men netin muroi ko ar men momod. <sup>16</sup> Ap sola mueid ong meamen, en wala dal eu nan im en kaudok. <sup>17</sup> I ari kotin kawewe masani ong irail: A so intingidi, me im ai adaneki, im en kapakap

ong toun sappa karos? A komail wia kila deun men pirap! <sup>18</sup> Samero laplap akan o saunkawewe kan rongada, ap lamelame duen ar pan kamela i, pwe re masak i, pwe aramas karos puriamuiki a padak. <sup>19</sup> Ni a sautik pena, a ap kotiiela sang kanim o. <sup>20</sup> Ni mansang, ni arail kotikot kowe, re ap masaniada tuka pik o a mongedar sang nin tapi. <sup>21</sup> Petrus ap katamaneki potoan ong i: Rapi, re kotin masani tuka, me re kotin kariala o a mongelar. <sup>22</sup> Iesus ap kotin sapeng masani ong irail: Komail poson Kot! <sup>23</sup> Pwe melel, I indai ong komail, ma meamen pan indai ong nana wet: Mokidewei lokidokila nan madau! Ap sota peikasal nan mongiong i, a poson me meako, me a inda, pan pwaida, a pan wiaui ong, me a inda. <sup>24</sup> Iei me I indaki ong komail: Meakaros, me komail inong iong ni omail kapakap, kamelele, me komail pan ale, a ap pan pwai dong komail. <sup>25</sup> Ari, ni omail kapakap maki ong, ma kasuede kai mi re omail ong amen, pwe Sam omail, me kotikot nanlang, en pil makeki omail sapung kan. <sup>26</sup> A ma komail sota mak, Sam omail, me kotikot nanlang, sota pil pan makeki ong komail omail sapung kan. <sup>27</sup> Re ap pil pure dong Ierusalem. Ni a kotikot sili nan im en kaudok o, samero laplap akan, o saunkawewe kan, o saumas akan ko dong re a. <sup>28</sup> Ap potoan ong: Manaman en is, me komui wiawiaki mepukat? O is me kiwei manaman om, en wiawia mepukat? <sup>29</sup> Iesus ap kotin sapeng masani ong irail: I pan pil idok peidok eu re omail. Komail sapeng ia, I ap pan id indai ong komail, manaman en is, me I wiaki mepukat. <sup>30</sup> En Ioanes a paptais, men nanlang de me ren aramas? Sapeng ia! <sup>31</sup> Irail ap lamelame nan pung arail inda: Ma kitail inda, men nanlang, a pan masani: Da me komail so kameleleki? <sup>32</sup> A ma kitail inda, me ren aramas irail masak pokon o, pwe irail karos lamelame, me Ioanes saukop melel amen. <sup>33</sup> Re ap sapeng potoan ong Iesus: Se sasa. Iesus ap kotin masani ong irail: I sota pil pan indai ong komail, man en is me I wiaki mepukat.

## 12

<sup>1</sup> A AP kotin tapiada padaki irail ni karaseras akan: Aramas amen me padukedi mat en krep eu o kele pena, ap weirada deun wungit krep eu, o kauada im en silasil eu, ap mueidalang saumat akai, ap momaitelang nan wai. <sup>2</sup> Kadekadeo ansaun rak, a ap kadaralang saumat oko ladu amen, pwen ale ren saumat oko kisan wan matuel o. <sup>3</sup> Re ap saikidi, kame o ari, kadarala kaip. <sup>4</sup> A ap pil kadaralang irail amen ladu, re ap kate, pwalang ong monga, ap kadarala i kasaroela. <sup>5</sup> A ap pil kadarala amen; re ap kamela; pil me toto re woki

akai, a re kamela akai. <sup>6</sup> Ari, na ieros eu, me a pokepoke, i me a kadarala ikmuri, a masani: Re pan wauneki nai ol. <sup>7</sup> A saumat pukat inda pena nan pung arail: Seri en soso met; na, kitail en kamela! Ari, kitail ap pan id aneki soso o; <sup>8</sup> Re ap ale, kamela, kasewei sang nan mat en krep. <sup>9</sup> Ari, da me saumas en mat o pan wia? A pan kodo, kamela saumat oko; a ap pan muedig ong akai matuel o. <sup>10</sup> Komail sota wadoker kisin likau et: Takai, me sause kan kasapokelar ap id wialar takai en pukakaim? <sup>11</sup> Mepukat wiauier ren Kaun o, men kapuriamui patail. <sup>12</sup> Irail ari sosong pwen saikidi i, a re masak aramas akan, pwe re asa, me a karaserase kin irail. Irail ari kokola sang re a. <sup>13</sup> Irail ap kadaralang re a Parisär o iang en Eroses akai, pwen kasapunge i sang ni a masan. <sup>14</sup> Ari, ni ar kodo, re potoan ong i: Saunpadak, se asa, me komui me melel o sota insenoki meamen. Pwe komui sota lipilpil mas en aramas, a kom kaukawewe al en Kot ni me pung. Me pung, en nopweiki moni ong nanmarki de so? Se en kida, de se ender kida? <sup>15</sup> A a kotin mangi ar malaun masani ong irail: Menda komail songsong ia? Wa dong ia eu denar en, pwe I en kilang. <sup>16</sup> Irail ap wado. A ap kotin masani ong irail: Mom o inting en is met akan? Irail potoan ong i: En nanmarki. <sup>17</sup> Iesus ap kotin sapeng, masani ong irail: Ari, komail ki ong nanmarki me nain nanmarki, o ong Kot me sapwilim en Kot. Re ap puriamui kila i. <sup>18</sup> Sadusär akai ap ko dong re a, me kin inda me dene sota me pan maureda sang mela. Re ap peidok re a indada: <sup>19</sup> Saunpadak, Moses intinge dong kit er, ma ri en ol amen mela, kidi a paud, sota na seri ko, a ri a ol ap pan id ale a paud, pwen wiada kadaudok a ong ri a ol o. <sup>20</sup> Ari pirien, ol isimen mia. Men mas re 'rail paude kida li amen ap melar, sota kadaudok a. <sup>21</sup> Men muri ap id ale, ap melar, pil sota kadaudok a. A kasilimen pil dueta. <sup>22</sup> A irail isimen oko paude kida i, sota kadaudok a. Ari, murin karos li o ari pil melar. <sup>23</sup> Ran en iasada ni ar pan maureda, is me pan paudeki i re 'rail, pwe irail isimen oko paudekier i? <sup>24</sup> Iesus ap kotin sapeng, masani ong irail: Omail sota lelapokki kisin likau kan o roson en Kot, kaidikiei me kareda omail sas kida? <sup>25</sup> Pwe irail pan lao maureda sang ren me melar akan, re sola pan papaud de kapapaud. A re pan duela tounlang kan me mimi nanlang. <sup>26</sup> Ari, duen me melar akan ar pan maureda, komail sota wadoker nan puk en Moses, duen Kot a kotin masani ong i nan wel en tuka o: Ngai Kot en Apraain, o Kot en Isaak, o Kot en Iakop! <sup>27</sup> Kaidin i Kot en me melar akan, pwe Kot en memaureta! Iei, me komail sas kida kaulap. <sup>28</sup> Ari, amen ren saunkawewe kan ap potodo, me ronger

duen ar kapakaparok pena, ap kasauiaada, me a pasapeng me inen, ap idok re a: Ia mo en kusoned karos? <sup>29</sup> Iesus ari masani ong i: Iet mo en kusoned akan: Rong Israel! Kaun patail Kot me Kaun me ta men. <sup>30</sup> Ari, koe en poke ki ong Kaun, om Kot, mongiong om unsok, o ngen om unsok, o om lamelam unsok, o om kel unsok! Iei met me mo en kusoned akan. <sup>31</sup> A kariau me dueta. Iet et: Koe en pok ong men imp om due pein koe! Sota eu kusoned me lapasang mepukat. <sup>32</sup> Saunkawewe ap potoan ong i: Me mau Saunpadak! Melel me kom masani en! Pwe i me ta men, a sota pil amen, pwe i eta! <sup>33</sup> O poke ki ong i mongiong unsok, o lamelam unsok, o ngen unsok, o kel unsok, o pok, ong men impa due pein i, mau sang mairong isis o mairong tei kan. <sup>34</sup> Ni en Iesus a kotin masani a pasapeng a inen, a ap masani ong i: Kom sota doo sang wein Kot. Ari, ap solar, me men pil idok re a meakot. <sup>35</sup> Iesus ap pil kotin sapeng masani ni a kotin kaukawewe nan im en kaudok o: Da me saunkawewe kan indaki, me Kristus nain Dawid? <sup>36</sup> Pwe pein Dawid masaniki ren Ngen sarau: Kaun o kotin masani ong ai Kaun: Kom kotidi ong pali maun i, I lao wia kida wutipan aluwilu omui om imwintiti kan! <sup>37</sup> Ari, Dawid pein kaadaneki i Kaun; a daduen a wia na? Aramas akan ap mauki a padak. <sup>38</sup> A ap kotin masani ong irail ni a padak: Kalaka saunkawewe kan, me mauki ni nan likau reirei o men, re en ranmaui ir nan wasan net. <sup>39</sup> O men mod leppantam nan sinakoke kan o kamadip. <sup>40</sup> O ngoper sang li odi im ar, ap lillasos kapakap reirei. Irail pan lodi ong kadekil lapalap. <sup>41</sup> Iesus ap kotikot sal ong deun moni en mairong, ap mamasani, en aramas ar kasedi ong moni nan deu o. A me toto, me kapwapwa, kasedi ong me toto. <sup>42</sup> Li odi samama ap kodo o kasedi ong kisin moni riakis, me wiada kwadrans eu. <sup>43</sup> A ap kotin molipedo sapwilim a tounpadak kan, masani ong ir: Melel I indai ong komail, me li odi samama men et kasedi ong me laude sang irail karos, me pil kasedi ong nan deun moni o. <sup>44</sup> Pwe karos kasedi ong sang ni ar pai. A i me kasedi ong sang ni a samama, karos me a, i eta a manga.

### 13

<sup>1</sup> NI a kotieila sang ni im en kaudok, amen sapwilim a tounpadak kan potoan ong i: Saunpadak, kom kotin masani takai o im pukat! <sup>2</sup> A Iesus kotin sapeng, masani ong i: Koe kilekilang im kalaimun pukat? Sota takai eu pan mi pon eu, me so pan lokidoki sang. <sup>3</sup> Ari, ni a kotikot pon dol Oliwe sal dong im en kaudok, Petrus, o Iakopus, o Ioanes, o Andreas, re ap kelep potoan ong i: <sup>4</sup> Re kotin masani ong kit, iad mepukat pan

wiaui o da pan kadapakilene en mepukat karos a pan pwaida? <sup>5</sup> Iesus ap kotin sapeng irail masani: Kalaka, pwe meamen de kottaue komail! <sup>6</sup> Pwe me toto pan kodo ni ad ai, inda: Ngai i. Re ap pan kottauea me toto. <sup>7</sup> O ni omail pan rong mauin o rong en mauin, komail depa masak! Pwe mepukat udan wiaui; a saikenta imwi. <sup>8</sup> Pwe wei eu pan u ong eu wei o pil wei en nanmarki ko, o saprerer pan wiaui sili, o lek, o insensued, mepukat kamoe en patau. <sup>9</sup> A komail kalaka pein komail! Pwe re pan pang komail la ong kapung o sinakoke kan; o komail pan kamekame o wisike dong mon monsap o nanmarki kan pweki ngai, pwen kadede ong irail. <sup>10</sup> O rongamau en kaloki ong mas nan sap karos. <sup>11</sup> A ni arail wa komail la o pangla komail, der lamelame mas, me komail pan inda, pil der madamadaua mas. A iei me o, me pan ko ong komail ni klok ota, i me komail en inda! Pwe kaidin komail me lokaia a Ngen sarau. <sup>12</sup> Pwe ol pan pangala ri a ol, pwen kamela; o sam na seri, o seri ko pan u ong sam, in, o pan kare ong ir, en kamela. <sup>13</sup> Komail ap pan kalingaringarla pan aramas karos pweki ad ai. A me dadaurata lao imwi lel, a pan dorela. <sup>14</sup> Ni omail kilang wiawi sued en kao lapalap, me a pan wiaui wasa, me a so kon ong meamen wudok a en dedeki me mimi Iudaa, re en sopo wong nan nana ko. <sup>15</sup> O me mi pon im, depa kodido nan im; a depa pil pedelong ong lole, pwen ki sang meakot. <sup>16</sup> O me mi nan sap, depa sapaledo ale a likau. <sup>17</sup> A pan non suede ong me lisean o ong ir, me kadidi ni ran oko. <sup>18</sup> Komail kapakapeki, pwe omail sapola de wiaui ni ansau en pou. <sup>19</sup> Pwe ni ran oko kainsensued pan wiaui, me sota due sang ni tapin sappa, ni en Kot a kotin wiada kokodo kokolata. <sup>20</sup> Ma Kaun o sota kotin kamotola ran oko, sota uduk, me pan dorela. A pweki me pilipildar akan, me a kotin piladar, iei me a kotin kamoto kaila ran oko. <sup>21</sup> Ma meamen indai ong komail ni ansau o: Kilang, iet et Kristus! De ionen! Der kamelele. <sup>22</sup> Pwe Kristus likam o saukop likam akai pan koda o re pan kasaleda kilel o man-aman, pwen pil kottaue ir, me pilipildar akan ma re kak ong. <sup>23</sup> Komail ari kalaka! Pwe I kop ong komail er meakoros! <sup>24</sup> Ari, ni ran oko murin kainsensued katipin pan rotala, o maram pan solar luingan. <sup>25</sup> O usu en lang pan pupedi o kelai en lang akan pan mokimokid. <sup>26</sup> Ari, re ap pan kilang Nain aramas pan kotikot kodo nan dapok ni a roson melel o ni a lingan. <sup>27</sup> A ap pan kadar pasang na tounlang kan, kapokon pena sang pali en lang paieu sapwilim a pilipildar akan, sang imwin sappa lel imwin lang. <sup>28</sup> Komail en asa karaseras en tuka pik. Ni ra kan ar pons o pepe pwarado, komail

kin asa, me rak korenier. <sup>29</sup> O pil komail; ni omail kilang wiawia pukat a pan pwaida, komail en asa, me a korendor, a mier pan wanim. <sup>30</sup> Melel, I indai ong komail: Di wet sota pan imwisokela, lao wiawia pukat pwaida. <sup>31</sup> Lang o sappa pan soreidi, a ai masan sota pan soreidi. <sup>32</sup> A duen ran o klok sota amen me asa. Tounlang kan, me mi lang, pil sota asa; Na pil so, Sam eta. <sup>33</sup> Komail kalaka! Masamasan o kapakap! Pwe komail sasa ansau o! <sup>34</sup> Due aramas amen, me wia sailok doo, me kidi im a, ap ki ong manaman ren a ladu kan, pil ki ong karos ar dodok, ap pil masani ong silepan wanim o, en masamasan. <sup>35</sup> Iei me komail en masamasanekei, pwe komail sasa ansau, saumas en im o a purodo, ma sautik, de ailep en pong, de ni malek kakorot, de ni mansang. <sup>36</sup> Pwe a depa madangedo, diarada omail mamair. <sup>37</sup> O me I indai ong komail, I pil indai ong karos, masamasan!

## 14

<sup>1</sup> KADEKADEO pong ria pong mon pasa o kamadip en prot somut, Samero lapalap akan o saunkawewe kan sosome duen widingadi i kamatala. <sup>2</sup> Pwe irail inda: Iermen ni ran en kamadip, pwe de kamorongada aramas akan. <sup>3</sup> Ari, ni a kotikot Petanien nan im en Simon tuketuk, ni a kotin kaipokedi ni tepel, li amen ap potodo, wa kisin kopa alapasta audaud en men kei, inen en pil en narde, me kasampwal. A ap kawela kopa o keiedi ong tapwi. <sup>4</sup> Akai re irail ap suedeki, mongemongeloleki: Menda men kei wet ola mal? <sup>5</sup> Pwe a pan netila kareda laude sang denar silipuki, ap pan ko ong me samama. Re ap lipelipaneke li o. <sup>6</sup> Iesus ap kotin masani: Komail ko sang! Menda komail kainsensued i? Dok mau ong ia, me a wiada et. <sup>7</sup> Pwe samama kin mi re omail ansau karos. Ari, ansau me komail mauki, komail kak kadek ong. A ngai sota kin ieiang komail ansau karos. <sup>8</sup> A wiaer me a kak ong. A kaonopedier a keie war ai ni sareidi. <sup>9</sup> Melel I indai ong komail: Wasa karos me rongamau wet pan kalok ia pangada sappa u, re pil pan lokolokaia duen me a wiadar, pwen katamanpa. <sup>10</sup> Iudas Iskariot, amen ekriamen oko, ap kolang ren samero lapalap akan, pwen pang ong irail i. <sup>11</sup> Irail lao rong, re ap peren kida, ap inauki, me re pan ki ong moni. I ari song duen a pan mongai ong en pangala i, <sup>12</sup> Ni kaieu en ran en prot somut, ni ar kin kamela sippul en pasa, sapwilim a tounpadak kan ap potoan ong i: Ia wasa re kotin men, sen potolang kaonopada, pwe re en kotin konot pasa? <sup>13</sup> A ap kotin poronela sapwilim a tounpadak riamen masani ong ira: Koma ko ong nan kanim o; aramas amen ap pan

tu ong komail, wa men deun pil eu. Iduen i! <sup>14</sup> Wasa a pan pedelong ong, koma indai ong kaun en im: Saunpadak o masani, ia pera en men kairu kan, wasa me I pan tungole pasa ia iang ai tounpadak kan? <sup>15</sup> A ap pan kasale ong koma pera laud poa kasongsonger o onoper. Iei wasa koma onop ong kitail. <sup>16</sup> Sapwilim a tounpadak kan ap kola, lel dong kanim o, o diardar duen me a kotin masani ong ira ko; ira ari kaonopada pasa. <sup>17</sup> A lao sautik penaer, a ap kotido iang ekriamen ko. <sup>18</sup> A ni arail kotidi ni tepel konokonot, Iesus ap kotin masani: Melel I indai ong komail, amen komail me iang ia mangamanga et, pan pang ia la. <sup>19</sup> Re ap tapiada insenola ap potoan ong i amen amen: Ngai i? A pil amen inda: Ngai i? <sup>20</sup> A ap kotin sapeng masani ong irail: Amen ekriamen oko me iang ia kadukadu nan dal et. <sup>21</sup> Ari so, Nain aramas kokola duen a intingidi ong er; o non suede ong aramas o, me Nain aramas pangpangala re a. Me mau ong, ma aramas men et sota ipwidi. <sup>22</sup> Ari, ni arail konokonot, Iesus ap kotikida prot o laolaoki, ap pilitiki pasang kotiki ong irail masani: Ale, tungole! War ai metet, <sup>23</sup> A ap kotikida dal o murin a kotin laolaoki; a ap kotiki ong irail; irail karos ap nim. <sup>24</sup> A ap kotin masani ong irail: Nt' ai metet, ntan inau kap, me kapwilipwilikidi me toto. <sup>25</sup> Melel I indai ong komail, I solar pan nim sang wan wain, lao ran en ai pil pan nim nan wein Kot. <sup>26</sup> Murin arail kauleki kaul pot, re ap kotilang dol Oliwe. <sup>27</sup> Iesus ap kotin masani ong irail: Komail karos pan makarada; pwe a intingidi: I pan kame silepa, ari pwin sip ap pan mui pasang. <sup>28</sup> A murin ai pan maureda, I pan tiang wei mo 'mail ong Kalilaa. <sup>29</sup> A Petrus potoan ong i: Karusia pan makar kila, a ngai so. <sup>30</sup> Iesus ap kotin masani ong i: Melel I indai ong uk, ran wet, pongpong wet, mon malek a pan kakorot pan riapak, koe pan kamam kin ia pan silipak. <sup>31</sup> I ari kalaudela a sapeng: Ma i iang komui matala i sota pan man kamam kin komui. Irail karos pil inda dueta. <sup>32</sup> Irail ap kotilang wasa, me ad a Ketsemene, a ap kotin masani ong sapwilim a tounpadak kan: Komail mondi ong met, ni ai pan wia kapakap. <sup>33</sup> A ap kotin ukada Petrus, o Iakopus, o Ioanes, ap kotin laualoda kaulap o pataula. <sup>34</sup> A ap kotin masani ong irail: Ngen i ap insensuedela kaulap ong mela. Komail mimi met o masamasan. <sup>35</sup> A ap kotila ekis, ap pupedi ong nan pwel, ap laolaoki, ma a kak auer en dauliela. <sup>36</sup> A ap kotin masani: Apa Saer ai, meakaros me kak pa omui! Kotikiwei sang ia dal wet! Ari so, kaidik me I men, a me komui men. <sup>37</sup> I ari kotido diar ir ar mamair, ap kotin masani ong Petrus: Simon koe men mair, koe sota kak masamasan auer eu? <sup>38</sup> Komail



masamasan o kapakap, pwe komail de ko ong nan songesong. Ngen me okok, a uduk me luet. <sup>39</sup> A ap pil kotila o laolao pil masani masan ko ota. <sup>40</sup> A ni a kotin sapaledo, pil diar ar mamair, pwe mas arail me toutou; irail sasa, me re en sapengki. <sup>41</sup> A ap kotido ni kasilepak, masani ong irail: Komail kanangata omail mair en o kamola? Arier, auer leler! Kilang, Nain aramas pangapangalanger ni pa en me dipan akan! <sup>42</sup> Paurida! Kitail kokola! Kilang, me pang ia la me korendor. <sup>43</sup> Madang ni a kotin mamasan, ari, Iudas kodo, amen ekriamen oko; pokon kalaimunia eu iang, wado kodlas o sokon, kodo sang ren samero lapalap akan o saunkawewe kan o saumas akan. <sup>44</sup> A me pangala i, ki ong irail kilel eu inda: Meamen i metik, iei i. Ale, kaluawei, kanai ong! <sup>45</sup> A pwarado eta ap madang inen dong Iesus inda: Rapi, Rapi, ap metik i. <sup>46</sup> Irail ari por pena ong ale. <sup>47</sup> Amen ir, me u wasa o, usada na kodlas, ap pale ladu en samero lapalap amen, ap lepuka sang salong a. <sup>48</sup> Iesus ap kotin sapeng masani ong irail: Komail ko dong ia due lipirap amen, wado kodlas o sokon, pwen koledi ia. <sup>49</sup> I kin ieiang komail ta ran karos nan im en kaudok o kaukawewe. A komail sota ale ia. A pwe kisin likau kan en pungala. <sup>50</sup> Irail karos ap pededi, tanga sang. <sup>51</sup> Manakap amen ap idauen i, pineki pena war a likau linen kaselel eu. Manakap akai ap parokidi. <sup>52</sup> I ari kaselel a likau linen kaselel o, ap sopola kiliso. <sup>53</sup> Re ap kalualang Iesus ren samero lapalap o. Samero lapalap akan, o saumas akan, o saunkawewe kan, karos pokon dong re a. <sup>54</sup> Petrus idauendo i doowei sang lao lel nan tanpas en samero lapalap. A ap mondi ong ren ladu ko, wia rangerang. <sup>55</sup> Samero lapalap akan o pwin en kadeik roporop kadeke, pwen kine ong Iesus, pwen kamela. Ari, sota me re diar. <sup>56</sup> Pwe me toto me kine ong i mal. Ari, ar kinakin sota dupeneta. <sup>57</sup> Akai uda, kine ong i mal inda: <sup>58</sup> Se rong, a inda: I pan kawela im en kaudok wet, me pa wiadar, ap id kauada eu ni ran silu, me sota pa wiada. <sup>59</sup> Ari, ar kinakin sota pil kon pena. <sup>60</sup> Samero lapalap ap kasinenda nan pung ar ap idok ren Iesus, masani: Kom sota sapengki meakot, me mepukat kine ong komui? <sup>61</sup> A a kotin nenenlata, sota sapeng. Samero lapalap ap pil idok masani ong i: Komui Kristus sawilim en men Kaping kaulap? <sup>62</sup> Iesus ap kotin masani: Ngai! Komail pan kilang Nain aramas a kaipokedi ni pali maun en me roson o kokido dapok en lang. <sup>63</sup> Samero lapalap ap ter pasang a likau ap inda: Menda re atail pil eu kinakin? <sup>64</sup> Komail ronger a lalau. Da me komail lamelame? A irail karos ap kadeikada, me a war ong kamela. <sup>65</sup> Akai tapi ong kondipi

ong i o pwaindi silang i, ap pikir, ap indai ong i: Kopada! Papa ko pil pikir i. <sup>66</sup> Ni en Petrus a mimi panakepir en tanpas, lidu en samero lapalap amen ap kodo. <sup>67</sup> Ni a kilang Petrus a wiawia rangerang, a ap kangkakil i o ari, inda: Koe me pil iang Iesus, men Nasaret! <sup>68</sup> A a kamama kida inda: I sasa. I pil sota dedeki, me koe indinda en! I ari koiailang nan katipar; malek ap kakorot. <sup>69</sup> A lidu lao kilang i, ap pil indang irail, me mimi wasa o: Amen irail met et. <sup>70</sup> A ap pil kamama kida. Mur ekis irail me u impa ko; pil indang Petrus: Melel me amen irail koe, pwe koe pil men Kalilaa amen. <sup>71</sup> I ari lalau o kaula: I sasa aramas men et, me komail indinda en! <sup>72</sup> Ap kariapak en malek a kakorot. Petrus ap tamanda en Iesus a kotin masani ong i: Mon malek a pan kakorot pan riapak, koe pan kamam kin ia pan silipak; ni a lamelamela a ap sangesang.

## 15

<sup>1</sup> MADANG sangkonai samero lapalap akan, iangaki saumas akan, o saunkawewe kan, o pil saunkapung karos kapungada ap saliedi Iesus, ap wawei pangalang Pilatus. <sup>2</sup> Pilatus ap idok re a: Komui Nanmarki en Sus akan? A kotin sapeng masani ong i: Komui me masani. <sup>3</sup> Samero lapalap akan karauneki i me toto. <sup>4</sup> Pilatus ap pil idok re a masani: Komui sota sapeng? Kom masani, me re kinakine ong komui me toto. <sup>5</sup> Iesus pil sota kotin sapeng Pilatus ap ponepone kida. <sup>6</sup> Ari, ni kamadip o a kin lapwa ong ir me sensal amen, me re mauki. <sup>7</sup> Ol amen, ad a Parapas, me iang sansal ren me iang i kamela aramas ni ar kauadar moromor eu. <sup>8</sup> Pokon ap morongada, ngidi ngideki, en wiai ong irail, me a kin wiai ong irail mas. <sup>9</sup> Pilatus ap sapeng irail masani: Komail men, i en lapwadang komail Nanmarki en Sus akan? <sup>10</sup> Pwe a asa, me samero lapalap akan wakido i ar peirin. <sup>11</sup> A samero lapalap akan kapururada pokon o, pwe en mauki lapwa ong irail Parapas. <sup>12</sup> Pilatus ap sapeng pil masani ong irail: Da me komail mauki i en wiai ong me komail kaadaneki Nanmarki en Sus akan? <sup>13</sup> Irail ap wer laudeda: Kalopuela i! <sup>14</sup> Pilatus ap masani ong irail: Pwe sued da, me a wiadar? Re ap kalaudela ar wer: Kalopuela i! <sup>15</sup> Ari, Pilatus men kainsenemaui aramas oko, ap lapwa dong irail Parapas, ap kida Iesus murin a woki, pwen kalopuela. <sup>16</sup> Saunpei ko ap kalualang i nan pera eu me ad a pretorium. Re ap eker pena ar pwin. <sup>17</sup> Re ap kalikauwie kida i purpur o pidada al en tek, ap langelangie kida. <sup>18</sup> Ap tapi ong kepwene: Iong Nanmarki en Sus akan! <sup>19</sup> Re ap wokieki tapwi alek, o kondipe i, ap kelepuki, poridi sang. <sup>20</sup> A lao nek ar

kapailok, re ap ki sang i purpur, ap kapur ong udan sapwilim a likau, kaluaieila, pwe ren kalopuela i. <sup>21</sup> Re ap iton ong Simon, men Kirene amen, me sam en Aleksander o Rupus, me dauli irail ni a kodo sang nan sap, pwen wada a lopu. <sup>22</sup> Re ap walang i Kolkata. Iet wewe: Wasa en pontal en mong. <sup>23</sup> Re ap ki ong i, en kakere wain dol mir. Ari, a sota kotin urak. <sup>24</sup> Ni arail kalopuedar i, re ap ter pasang sapwilim a likau ko. Re ap kadoropwe, da me amen amen pan aneki. <sup>25</sup> Ari, ni auer kasilu, me re kalopuela i. <sup>26</sup> O inting en poa me a pukoki due met: Nanmarki en Sus akan. <sup>27</sup> Lolap en pirap riamen iang i kalopuela; amen pali maun i, amen pali maing i. <sup>28</sup> Iei me kisin likau pung kila, me inda: A wadawad ong ren me dipan. <sup>29</sup> Ir me kin dauli, kin lalaue, dueduälok inda: Ei, koe me pan kawela im en kaudok, ap id kawa kida ran silu. <sup>30</sup> Pein dore uk ala, o kodido sang nin lopu en! <sup>31</sup> Samero lapalap akan pil dueta, kapailoke, inda nan pung ar iang saunkawewe kan: A dorelar akai, a pein i a sota kak ong. <sup>32</sup> Kristus Nanmarki en Israel, kodido sang nin lopu en, pwe se en kilang o poson. O ira, me iang i lopu la ko, pil lalaue. <sup>33</sup> Ari, auer kawonu lel, rotorot ap kipadi sap lao lel auer kaduau. <sup>34</sup> Ni auer kaduau Iesus ap kotin weriwer laudeda masani: Eloï, Eloï, lama sapaktani! Iet wewe: Ai Kot, ai Kot! Da me re kotin kase kin ia la! <sup>35</sup> Akai me u impa, ni arail rong inda: Kilang, a ekeker Elias. <sup>36</sup> Amen ap tangala, ale lim en pinika eu, ki ong ni alek apot, ap kida ong en kakere, ap inda: Udi mas! Kitail kilang, ma Elias pan kodo en kidi sang. <sup>37</sup> Iesus ap kotin weriwer laudeda kadarala Ngen e. <sup>38</sup> Pera likau nan im en kaudok ap dei pasang, sangeda pali poa lel pa. <sup>39</sup> O ni en senturion o, me u saledong, a kilang a wer laudeda due mo, ap kadarala Ngen e, a ap inda: Nan melel Sapwilim en Kot aramas men et. <sup>40</sup> Li akai pil mimi wasa doo, kilekilangedo; Maria men Magdala, me mi nan pung ar, o pil Maria, in en Iakopus, me tik, o en Ioses, o Salome. <sup>41</sup> Me pil kin idauen papa i mas o, ni a kotikot Kaliläa; o pil me toto, me iang i kotida dong Ierusalem. <sup>42</sup> Ari, ni a sautik penaer, pweki kaonop iei ran mon sapat. <sup>43</sup> Iosep, men Arimatia amen, ap kodo, me saunkapung isou amen, me kin pil auiaui wein Kot, me so masak koti dong Pilatus, poeki kalep en Iesus. <sup>44</sup> Pilatus ap puriamuiki, me a matalar, ap molipe dong i senturion o, ap kainoma re a, ma a matalar warai. <sup>45</sup> A lao mangi sang ren senturion o, a ap ki ong kalep a ren Iosep. <sup>46</sup> A ap netiada likau linen mau, ap lapwadi i, kidimeki pena likau o, nekidedi i nan sousou eu, me weiweida nan paip, ap kadapuri ong takai eu ni au en sousou o. <sup>47</sup> O Maria men Magdala o Maria

in en Ioses kilang wasa, re nekidedi i.

## 16

<sup>1</sup> SAPAT lao daulul, Maria men Magdala o Maria in en Iakopuso Salome netiada men kei pomau kai, pwe re en kodon keieki i. <sup>2</sup> Nin soran nin tapin wik, re ap ko dong nin sousou o, ni katipin a pwarada, <sup>3</sup> Irail ap indinda nan pung arail: Is me pan kadapure sang au en sousou o takai o re atail? <sup>4</sup> Ari, ni ar kilang, re ap kilangada, me takai o tapure sanger, pwe me kalaimun kauwalap. <sup>5</sup> Ni ar pedelng ong sousou o, re ap kilang manakap amen momod pali maun, likauki likau pueteputet. Re ap masakada. <sup>6</sup> A ap indang irail: Komail der masak! Iesus, men Nasaret me komail roporop, me kalopular, a iasadar. A solar kot met. Kilang wasa, re nekidedi ia. <sup>7</sup> Komail kowei, kaireki a tounpadak kan o Petrus, me a pan tiang mo omail koti wong Kaliläa. I wasa, komail ap pan kilang i, duen a kotin masani ong komail. <sup>8</sup> Re ap madangiei sang o tang sang nin sousou o, pwe re masapwekada rerer, re pil sota indai ong meakot meamen, pwe re masapwekada. <sup>9</sup> Ari, murin a iasada sangkonai nin tapin wik a ap kotin pwar ong mas Maria men Magdala, me a kotin kause sang tewil isimen. <sup>10</sup> A ap kola indai ong irail me iang i ko mas, ni ar mamaiei o sangesang. <sup>11</sup> Ni arail ronger, me a iasadar, o me a kotin pwar onger i, re sota kamelele. <sup>12</sup> Muri a kotin pwar ong riamen irail ni eu mom, ni ara kokolang nan sap. <sup>13</sup> Re ap kola indai ong me tei kan. A re sota pil kamelele ira. <sup>14</sup> Mur a pil kotin pwar ong ir ekamen oko ni ar momod tungotungol, ap kotin kapung ong irail ar saposon o kapitakai, pweki ar sota kamelele ir me kilang i murin a iasadar. <sup>15</sup> A ap kotin masani ong irail: Komail ko ong sappa u, padaki ong aramas karos rongamau! <sup>16</sup> Meamen me poson o paptaisola, pan dorela. A me so poson pan kariala. <sup>17</sup> A kilel pukat pan idauen ir, me poson: Ni ad ai re pan kausaki sang tewil akan, re pan lokaia toror. <sup>18</sup> Re pan kawela serpent; ma re nimala men kamela kot, a sota pan kawer ir ala; irail pan pwil pa ar pon me somau, re ap nan kelailada. <sup>19</sup> Ari, Kaun o lao kotin masani ong irail mepukat, a ap peukadala nanlang o kotido ong pali maun en Kot. <sup>20</sup> Irail ap kola, padapadak sili wasa karos. A Kaun o kotin iang dong, kameleleki masan manaman me iang.

## MANG EN PA EN WANPORON LUKAS.

<sup>1</sup> MURIN me toto ar intingiedier kasoi pan meakan, me kitail kin kamelele, <sup>2</sup> Duen ir, me kasokasoi ong kit, me saunkakede o papa pan masan sang ni tapi o, <sup>3</sup> I ap pil lamedar, me mau, i en inting wong komui, Maing Tiopilus, pwe i lelepokki karos sang ni tapi o kokodo. <sup>4</sup> Pwe komui en asa duen meakan me komui aleer, me pung melel. <sup>5</sup> Ni muein Eroses nanmarki en ludäa, samero amen mia, kisan pwin ong Apia, me mar a Sakarias, o a paud amen sang nain Aron seripein oko, me mar a Elisapet. <sup>6</sup> Ira karos me pung mon Kot, o ira ineneweita ni en Kaun a kusoned o tiak kan karos. <sup>7</sup> A sota naira seri, pwe Elisapet li dapwan amen, o ira karos likailapalar. <sup>8</sup> A kadekadeo ni a kapwaiada a dodok en samero mon Kot ni ansau o, me a pwin pwaisaneke, <sup>9</sup> Duen a kin wiaui ren samero kan, o ansau en isik mairong lao leler, a kotilong ong nan im en kaudok en Kaun o. <sup>10</sup> A pokon kalaimun mi liki, wiawia kapakap ni klok en isis. <sup>11</sup> A tounlang en Kaun amen pwara dong i, kotikot ni pali maun en pei sarau en potik. <sup>12</sup> Sakarias lao masani, ap lusikida o masapwekada. <sup>13</sup> A tounlang o masani ong i: Sakarias, der masak, pwe om kapakap pwaidar, om paud Elisapet pan naitikeda seri ol amen, a koe pan ki ong mar a Ioanes. <sup>14</sup> O a pan kare ong uk peren o popol, o me toto pan perenki a ipwidi. <sup>15</sup> Pwe a pan lapalap ren Kaun o, a sota pan nim wain, pil so eu song en soko; a pan dir en Ngen sarau nan kupur en in a. <sup>16</sup> A me toto ren nain Israel akan, me a pan kawuki ong Kaun ar Kot. <sup>17</sup> A pan tiong mo a ni ngen o roson en Elias, pwen kawuki ong seri kan mongiong en sam arail akan o me sopeik kan ong lamalam en me pung kan, pwen kaonopadang Kaun o pwin aramas lelapok eu. <sup>18</sup> A Sakarias masani ong tounlang o: Da me i en asaki me wet? Pwe i ol laudalar amen, o ai paud pil likailapalar. <sup>19</sup> A tounlang sapeng masani ong i: Ngai Kapriel, me kin ariri Kot, o me pakadarado, en lokaia ong uk, o wa dong uk rongamau pukat. <sup>20</sup> Kilang, koe pan lotong la, o sasa lokaia lao lel ran o, me mepukat pan pwaida, pweki om sota kamelele ai kasoi, me pan pwaida ni a ansau. <sup>21</sup> A pokon o auiaui Sakarias, puriamuiki a pwapwand nan im en kaudok. <sup>22</sup> A lao pedoi sang, a solar kak masan ong irail. Irail ap dedeki, me a udial manaman eu nan im en kaudok o. A lol ong irail o lotonglar. <sup>23</sup> Kadekadeo ran akan en a dodok lao nikier, a kotin purelang sap we koieilang im a. <sup>24</sup> Murin ran

pukat a paud Elisapet liseanda o mimieta nan deu a saunipong limau indada: <sup>25</sup> Iduen Kaun o kotin wiai ong ia ni ran oko, ni a kotin masan dong ia, pwen kotiki sang ia kanamenok pai ren aramas. <sup>26</sup> Ni kawonu en saunipong tounlang Kapriel pakadarala sang ren Kot ong nan kanim en Kaliläa eu, me ad a Nasaret, <sup>27</sup> Ren seripein makelekel amen, me kisin nin ong ol amen, me mar a Iosep, kisan kadaudok en Dawid; seripein makelekel o adaneke Maria. <sup>28</sup> Tounlang o kotilong ong nan deu a masani ong i: Kaselelia Maing, kom meid pai, Kaun o kotikot re omui! Kom meid pai nan pung en li akan! <sup>29</sup> A lao kilanger i, o rongadar a masan, ap masapwekadar madamadaua: Duen song en ranamau o. <sup>30</sup> A tounlang masani ong i: Maria, ender masak, pwe komui me konekonelar ren Kot. <sup>31</sup> A kilang, komui pan liseanda o naitikeda seri ol amen, a komui pan ki ong mar a Iesus. <sup>32</sup> Nan i me pan lapalap, o a pan maraneke Sapwilim en Kaun lapalap, o Kaun Kot pan kotiki ong i mol en sam a Dawid. <sup>33</sup> O a pan kakaunda kadaudok en Iakop kokolata, o sapwilim a wei sota pan inwila. <sup>34</sup> Maria ap masani ong tounlang o: Daduen mepukat pan kak wiaui, aki i sasa ol amen? <sup>35</sup> Tounlang o kotin sapeng masani ong i: Ngen sarau pan kotin ti po omui o roson en Kaun lapalap pan kipa komui di, i me sarau o, me pan ipwi sang komui, pan maraneke: Sapwilim en Kot. <sup>36</sup> O masani, ri om Elisapet pil liseandar ni a likailapala, a pan naitikeda seri ol amen, a kawonu en saunipong ansau wet; iei i me dapwan, <sup>37</sup> Pwe sota meakot, me Kot sota kak ong. <sup>38</sup> A Maria potoan ong: Masani, ngai lidu en Kaun o; en wiaui ong ia duen omui masan. Tounlang o ap kotila sang re a. <sup>39</sup> I ran oko Maria madang kotila pon nana o nan kanim en Iuda eu, <sup>40</sup> Ap pedelong ong nan im en Sakarias o ranamau ong Elisapet. <sup>41</sup> Kadekadeo Elisapet lao ronger en Maria a ranamau ong i, seri o ap mokideda nan kaped a; a Elisapet ap direkila Ngen sarau, <sup>42</sup> O ngil laudeda masani: Komui meid pai ren li akan, o meid iasanai ipwin kupur omui! <sup>43</sup> A iaduen pai wet a ko sang ia, pwe in en ai Kaun koti dong ia? <sup>44</sup> Masani, ni ai ronger omui ranamau, seri o ap mokideda nan kaped i aki a peren. <sup>45</sup> O komui meid pai, pweki komui poson! Pwe a pan pwaida, me Kaun o kotin masani ong komui. <sup>46</sup> Maria ap masani: Lol ai kapinga Kaun o, <sup>47</sup> O ngen i perenki Kot ai Saunkamaur. <sup>48</sup> Pwe a kotin kupurala sapwilim a lidu titikot o. Kilang, sang met o kokolata di karos pan kapai kin ia, <sup>49</sup> Pwe a kotin wiaer song en manaman ong ia, me lapalap o mar a me sarau. <sup>50</sup> A kotin kalangan ong di karos kokolata, ong irail me kin lan i. <sup>51</sup> O a kotin wia kida

lim a manaman akan. O a kotin karawan pasang, me kin lem ai nan mongiong arail.<sup>52</sup> A kotin sikin wei saupeidi kan sang mol ar, ap id kasapwilada me tikitik kan.<sup>53</sup> A kotin kamede kida kapwa me men mangadar akan, ap kotin kadarala kaip me kapwapwa kan.<sup>54</sup> A kotin upor kin sapwilim a ladu Israel, o kotin tamataman a kalangan,<sup>55</sup> Duen a kotin masani ong sam atail akan, ong Apraam o kadaudok a kokolata.<sup>56</sup> A Maria kotikot re a saunipong silu, ap purelang im a.<sup>57</sup> Ari, ansaun Elisapet leler pwen naitik, a naitikeda seri ol amen.<sup>58</sup> O men imp a kan o sau i rongadar, me Kaun o kotin kupura i, rap iang i peren kida.<sup>59</sup> Kadekadeo auel en ran o re pwara dong sirkomsais seri o; ir ari ki ong mar en sam a Sakarias.<sup>60</sup> A in a sapeng indada: O kaidin, pwe a pan marane ki Ioanes.<sup>61</sup> Irail ap indang i: Nan sota sau om men me marane ki met.<sup>62</sup> Irail ap olol ong sam a, duen me a mauki, seri en adane ki.<sup>63</sup> I ari poeki slet eu, ap intingiedier o masani: A pan adane ki Ioanes. Irail karos ap puriamuiki.<sup>64</sup> A madang silang i wasok pasang o tenap a sapadokada; i ari masani o kapinga Kot.<sup>65</sup> A masak kipadi karos, me kaukauson imp ar, o wiawia pukut lolok sili pon nana en Iudaa karos.<sup>66</sup> A karos me rongadar, kin nekinekid nan mongiong arail, indada: Da me seri men et pan wiala? Pwe lim en Kaun o kotin iang i.<sup>67</sup> A sam a Sakarias direkila Ngen sarau ai kokopada masani:<sup>68</sup> Kapinga ong Kaun Kot en Israel, pwe a kotidier ren sapwilim a aramas akan dore ir ala.<sup>69</sup> O kotin wiadang kitail kamaur patail sang nan kadaudok en sapwilim a ladu Dawid.<sup>70</sup> Duen a kotin masanier ren sapwilim a saukop sarau kan, sang tapin kaua kokodo,<sup>71</sup> Me a pan kotin dore kitail la sang ren atail imwintiti o sang nan pa en me kailong kin kitail,<sup>72</sup> O kotin kalangan ong sam atail akan, o kotin kupureda a inau sarau,<sup>73</sup> O kaula eu, me a kotin kauki ong sam atail Apraam, en kotiki ong kitail.<sup>74</sup> Pwe sen dore sang nan pa en atail imwintiti, ap papa i so masak,<sup>75</sup> Nin tiak lelapok o pung mon silang i ran karos kokolata.<sup>76</sup> A koe nai seri pan adane ki: Saukop en me lalalap o, pwe koe pan tiang mon silang en Kaun o, pwen kaonopada sapwilim a al akan.<sup>77</sup> Pwen kawewe ong sapwilim a aramas kamaur, iei lapwa pan dip ar akan;<sup>78</sup> Pweki en atail Kot a kalangan melel, me marain dakaraki dong kitail sang poa.<sup>79</sup> Pwen kamaraini toun pali rotorot o mot en mela, o kainen ong na atail nan al en popul.<sup>80</sup> A seri o kakairida, o kelail ni ngen e, o a kin mimi nan sap tan, lao a pan sansal ong Israel.

## 2

<sup>1</sup> A KADEKADEO ni ran oko nanmarki

Aukustus masani, toun sap akan pan wadawad pena.<sup>2</sup> I wadawad kaieu, me wiaui er ni muein Kirenius kopina en Sirien.<sup>3</sup> Amen amen koeilang udan sap we, pwen iang wadawad.<sup>4</sup> Iosep ari pil kotila sang Nasaret nan Kalilaa, kotilang Iudaa nan kanim Petleem, me udan kanim en Dawid, pwe i kisan kadaudok en Dawid,<sup>5</sup> Pwen wadawad iangaki Maria, me kisin nin ong i o me lisean.<sup>6</sup> Kadekadeo ira lao kot wasa o, a ansau ap leler pwen naitik.<sup>7</sup> I ari naitikeda na meseni men, ap kitimki pena likau en seri kai, o pwilikidi ong nan deun kamanga man, aki im en kairu a koitalar.<sup>8</sup> Silepan sip kai mi nan sap o sinsila ar pwin sip ni pong.<sup>9</sup> A kilang, tounlang en Kaun amen pwara dong ir, o lingan en Kaun dakar irail ada, ir ari masapwekadar kaulap.<sup>10</sup> A tounlang o masani ong irail: Komail der masak, kilang, i wa dong komail rongamau, me pan kaperenda aramas karos.<sup>11</sup> Pwe Saunkamaur ipwidi ong komail ran wet nan kanim en Dawid iei Kaun Kristus.<sup>12</sup> A iet kilel ong komail: Komail pan diar seri o a kidikidiki pena likau en seri o wonon nan deun kamanga man.<sup>13</sup> A madang pwin en tounlang ngederenia mi ren tounlang o, me kapinga Kot masani:<sup>14</sup> Kapinga ong Kot wasa ileile o sappa en popul; o aramas konekone lar!<sup>15</sup> Kadekadeo tounlang kan lao kotila sang ir, kotidala nanlang, silepan sip akan ap inda nan pung arail: Kitail pan kola Petleem pwen kilang me wiaui er wasa o, me Kaun o kotin kasale ong kitail er.<sup>16</sup> Irail ari madangedo, ap diardar Maria i Iosep o seri o, a wonon nan deun kamanga man.<sup>17</sup> Irail lao kilanger, rap kalok sili me re kasokasoi ong ir duen kisin seri o.<sup>18</sup> A karos, me rongadar, puriamuiki en silepan sip oko ar kasokasoi ong irail.<sup>19</sup> A Maria nekinekid masan pukut karos o madamadauaki nan mongiong i.<sup>20</sup> O silepa ko puredo kalinganada o kapinga Kot duen karos, me irail rongadar o kilanger, duen a loloke dong irail er.<sup>21</sup> Kadekadeo murin pong walu pong, ran en a sirkomsais, re ki ong mar a Iesus, duen me tounlang kotiki ong mon a kotin ipwidi er.<sup>22</sup> Ran akan en a kamakelekel lao daulier duen kapung en Moses, ira ap wa dong i Ierusalem, pwen muedi ong Kaun o.<sup>23</sup> Duen a intingidier nan kapung en Kaun o: Meseni ol karos me sarau ong Kaun o.<sup>24</sup> O pwen kida mairong eu, duen me intingidier nan kapung en Kaun: Turtel muroi ri amen de muroi pulepul ri amen.<sup>25</sup> A kilang, aramas amen mi Ierusalem, mar a Simeon, iei aramas o me pung o masak Kot, o auiaui kapol pan Israel, o Ngen sarau kotikot re a.<sup>26</sup> A Ngen sarau kotin kasale ong i, me a sota pan mela, mon a pan kilang sapwilim en

Kaun Kristus. <sup>27</sup> O Ngen sarau kotiki ong i, en kolang im en kaudok. A sam o in a lao walong ong nan im en kaudok seri o, pwen kapwaiada duen tiak en kapung o, <sup>28</sup> I ap koleli i kapinga Kot indada: <sup>29</sup> Maing, re kotin kasamo sapwilim omui ladu popol duen omui masan, <sup>30</sup> Pwe mas ai udialer omui kamaur, <sup>31</sup> Me re kotin kauada sansal mon aramas karos. <sup>32</sup> Pwen marain eu, me kamaraineki men liki kan, o kalinganada sapwilim omui men Israel. <sup>33</sup> A sam a o in a puriamuiki meakan, me re indinda duen i. <sup>34</sup> Simeon ari kapai ir ada indang Maria in a: Kom kotin mangi, men et me sapwile dong kapupedi o kamaureda me toto ren men Israel, kil el eu, me re pan kaundenkoma. <sup>35</sup> Nan kodlas pan dokodi ngen omui, pwe mongiong en me toto en mulekiada. <sup>36</sup> O li saukop amen mia, mar a Ana, nain Panuel kisan kadaudok en Aser, me likailapalar, me papaud saunpar isu sang ni ansaun a makelekel. <sup>37</sup> I ari li odi men saunpar waleisok paieu tauer poa, ap sota kin pedoi sang nan im en kaudok, papa Kot kaisesol o kapapak ni ran o ni pong. <sup>38</sup> I me pil pwarado ni klok ota, kapinga Kaun o kasokasoi duen i ong toun Jerusalem karos, me auiaui saunkamaur. <sup>39</sup> Irail kanikiela karos duen kapung en Kaun o, re ap purelang Kalilaa nan kanim Nasaret. <sup>40</sup> A seri o kakairida, o ngenin, o dire kila erpit, o kalangan en Kot kotin ieiang i. <sup>41</sup> Ni par karos sam a o in a kotilang Jerusalem iang kamadip en pasa. <sup>42</sup> A lao saunpar eisokriau, irail ap kotilang Jerusalem, duen re kin wia, pwen iang kamadip en pasa. <sup>43</sup> Ran oko lao daulier, irail purelang sap arail, a seri Iesus kotikot eta Jerusalem, a sam o in a sota mangi. <sup>44</sup> A ira kiki ong, me a kotin iang kapar o tiong mo 'ra. Ira kokola ran eu, ap rapaki i nan pung en sau 'ra o ren men imp arail akan. <sup>45</sup> Ni ara sota diaradar i, ira ap purelang Jerusalem rapaki i. <sup>46</sup> Kadekadeo murin pong sili pong ira diaradar i nan im en kaudok, kaipokedi nan pung en snunpadak kan, kotin mamangi ir o kaikainoma irail. <sup>47</sup> A karos me rongadar a puriamuiki a kupurokong o a sapasapeng. <sup>48</sup> Ira lao diaradar i, ap puriamuiki. In a ap masani ong i: Nai seri, da me kom wiaki ong kit met? Mangi, sam omui o ngai raparapa kin komui sangesang. <sup>49</sup> A kotin masani ong ira: Menda koma rapa kin ia? Koma sota asa, me I en mimieta nan me Sam ai? <sup>50</sup> Ira ari sota weweki a masan ong ira. <sup>51</sup> A ap kotin iang ira kotidilang Nasaret papa ira, a in a nekinekid masan pukat karos nan mongiong i. <sup>52</sup> Iesus ari kupurokong, kokoda, lalaudela, o masamas ren Kot o aramas akan.

### 3

<sup>1</sup> PAR eisoklimau murin nanmarki Tiperius a sapwileda ni muein Pontius Pilatus kopina en Judaa, o Erodes nanmarki en Kalilaa, o ri a ol Pilipus nanmarki en Ituraa o Trakonitis, o Lisianas nanmarki en Apilene, <sup>2</sup> Ni muein Anas o Kaipas samero lapalap, masan en Kot ap pwara dong Ioanes nain Sakarias nan sap tan. <sup>3</sup> I ari kotikot sili nan sap karos ni kail en Jordan, padapadak duen paptais en kalula ong lapwada dip akan, <sup>4</sup> Duen a intingidier nan puk en masan akan en saukop Iesaia, me masani: Ngil eu likelikwir sili nan sap tan: Komail kaonopada al en Kaun o, kaineneda al a! <sup>5</sup> Wau karos pan audaud o nana o dol karos pan patapatadi, o me pirok, pan inenla, o me ululen, pan patapatela. <sup>6</sup> Uduk karos pan udial kamaur en Kot. <sup>7</sup> A ap masani ong aramas akan, me koeila, pwen paptaisla re a: Dakot, wan oter komail; is me padaki ong komail, en piti sang ni kamekam, me kokodo? <sup>8</sup> Ari komail kapareda wan kalula mau. A komail depa lamelame, me komail pan indang pein komail: Nan Apraam sam atail. Pwe i indai ong komail, me Kot kotin kak ong wiaki ong Apraam na seri kai takai pukat. <sup>9</sup> Sile o mier ni tapin tuka kan. Ari, tuka karos, me so wa mau, pan palepaledi o lokidokila nan iai. <sup>10</sup> Pokon o ap idok re a indada: A da me kit en wia? <sup>11</sup> A kotin sapeng masani ong irail: Meamen, me a sakit riau, i en ki ong, me sota a. O me kan a kisin manga mia, i en wia dueta. <sup>12</sup> A saunopwei kan pil pwara dong i pwen paptais, irail potoan ong i: Saunpadak, a da me kit en wia? <sup>13</sup> A masani ong irail: Komail der ale laude sang me kileledier. <sup>14</sup> Saunpei kan ap pil kalelapok re a indada: A da me kit en wia? A masani ong irail: Komail der kaloke mal meamen, o der wia sapung en meamen, a komail ale pwain omail o insenemau kila. <sup>15</sup> Aramas akan lao kiki ong o mongemongeloleki, me Ioanes me Kristus, <sup>16</sup> Ioanes ap sapeng masani ong irail karos: I paptais kin komail pil, a me laude sang ia kotido muri, me i sowar ong, en lapwada sal en sapwilim a sut, i me pan paptais kin komail Ngen sarau o kisiniai. <sup>17</sup> Tanir mi nan lim a, a pan kotin koko melel sapwilim a pera, ap nekid pena wan korn nan sapwilim a im en nak, a dip a pan kotin karong kila kisiniai sokun. <sup>18</sup> O song toto, me a kotin panau aramas akan o padaki ong pokon o rongamau. <sup>19</sup> A nanmarki Erodes, me Ioanes kapung pweki Erodi as en ri a ol a paud, o pweki sued karos, me Erodes wiadar, <sup>20</sup> Kalaudela dip a ni a saliedi Ioanes nan imateng. <sup>21</sup> A kadekadeo aramas karos lao paptaiselar, o Iesus pil paptaiselar o kotin laolaoki, nanlang ap ritida, <sup>22</sup> O Ngen sarau kotidi

dong i ni mom en muroi men, o ngil eu sang nanlang masani: Koe nai Ol kompok, me I kin peren kida. <sup>23</sup> Iesus impan saunpar sileisok ni a kotin tapiada saunpadak, o re kikiang me i nain Iosep, me nain Eli, <sup>24</sup> Me nain Matat, me nain Lewi, me nain Melki, me nain Ianes, me nain Iosep, <sup>25</sup> Me nain Matatia, me nain Amos, me nain Naum, me nain Esli, me nain Nakai, <sup>26</sup> Me nain Maat, me nain Matatia, me nain Sime, me nain Iosep, me nain Iuda, <sup>27</sup> Me nain Ioanan, me nain Resa, me nain Serupapel, me nain Salatiel, me nain Neri, <sup>28</sup> Me nain Melki, me nain Adi, me nain Kosam, me nain Elmodam, me nain Er, <sup>29</sup> Me nain Ioses, me nain Elieser, me nain Iorim, me nain Matat, me nain Lewi, <sup>30</sup> Me nain Simeon, me nain Iuda, me nain Sosep, me nain Ionam, me nain Eliakim, <sup>31</sup> Me nain Melia, me nain Mena, me nain Matatan, me nain Natan. Me nain Dawid, <sup>32</sup> Me nain Iese, me nain Oped, me nain Poas, me nain Sala, me nain Naasan, <sup>33</sup> Me nain Aminadap, me nain Aram, me nain Esron, me nain Peres, me nain Iuda, <sup>34</sup> Me nain Iakop, me nain Isaak, me nain Apraam, me nain Tara, me nain Naor, <sup>35</sup> Me nain Seruk, me nain Reku, me nain Palek, me nain Eper, me nain Sala, <sup>36</sup> Me nain Kainan, me nain Arpaksad, me nain Sem, me nain Noa, me nain Lamek, <sup>37</sup> Me nain Metusala, me nain Enok, me nain Jared, me nain Maalaleel, me nain Kainan, <sup>38</sup> Me nain Enos, me nain Set, me nain Adam, me sapwilim en Kot.

#### 4

<sup>1</sup> A IESUS, me dir en Ngen sarau, puredo sang Jordan, o Ngen kotin kalualang i nan sap tan. <sup>2</sup> O wia songesong pan tewil ran pangaul. A sota kotin konot ni ran oko. Ran akan lao imwisokela ap men konot. <sup>3</sup> Tewil ap indai ong i: Ma komui sapwilim en Kot, en masani ong takai wet, a en wiala prot. <sup>4</sup> A Iesus kotin sapeng i masani: A intingidier: Kaidin prot eta, me aramas en memaureki, pwe masan en Kot akan. <sup>5</sup> Tewil ap kalu- adalang i pon nana ileile eu o kasala ong i wein sappa karos ni marep taieu. <sup>6</sup> Tewil indang i: I pan ki ong komui manaman pukat karos o a lingan, pwe a muei ong ia er, a i pan ki ong, me i mauki. <sup>7</sup> Ari, ma komui pan pongi ia, karos ap pan sapwilim omui la. <sup>8</sup> Iesus kotin sapeng i masani: A intingidier: Koe en pongi ong Kaun om Kot; i eta, koe en papa. <sup>9</sup> I ap kalualang i Ierusalem o kauada i pon kongkong en im en kaudok o indai ong i: Ma komui sapwilim en Kot, kasedi pein komui, <sup>10</sup> Pwe a intingidier: A pan kasi- laki sapwilim a tounlang kai komui, pwen apapwali komui. <sup>11</sup> O wa komui nan lim ar akan, pwe aluwilu omui der dipikekel ni takai eu. <sup>12</sup> Iesus kotin sapeng masani ong

i: A lolokido, koe ender kasongesong Kaun om Kot! <sup>13</sup> Tewil lao kanikiela songesong karos, ap muei sang i ansau kis. <sup>14</sup> Iesus ap kotin pure dong Kalilaa ni roson en Ngen, ap indand sili nan sap karos me mi imp a. <sup>15</sup> A kotin kaukawewe nan ar sinakoke kan, o karos kapinga i. <sup>16</sup> A kotin lel Nasaret, wasa a kotin kakairida ia, ap kotilong song nan sinakoke duen a kin wiada ni ran en sapat o kotida, pwen wadok. <sup>17</sup> Puk en saukop Iesaia ap wisike dong i a lao lim pasang puk o ap diarada wasa o me intingidier: <sup>18</sup> Ngen en Kaun kotikot re i, i me a keie kin ia da, pwen padaki ong me samama kan ronga- mau. A kadar ia do, pwen kaloki ong me salidi kan, me ren saladokela, o me maskun akan pan kilang wasa, o me patau kan pan maioda, <sup>19</sup> O kaloki saunpar mau en Kaun o. <sup>20</sup> A kotin lim pena puk o ap kupure ong me papa men o kotidi. Mas en karos nan sinakoke kangkaki i. <sup>21</sup> I ari tapiada masani ong irail: Kisin likau wet pwardar mo 'mail ran wet. <sup>22</sup> Ir karos ap kadede o puriamuiki masan kompok kan, me pwili sang silang i, ap indada: Kaidin i nain Iosep? <sup>23</sup> A ap kotin masani ong irail: Nan melé, komail pan indang ia karaseras wet: Saunwini, sauasa pein uk! Pwe se rongadar duen song kapuriamui, me wiauiet nan Kapernaum; ari kom pil wiada dueta wasa et nan sap omui. <sup>24</sup> A kotin masani: Melel I indai ong komail, sota saukop amen me konekon nan sap we. <sup>25</sup> A melel I indai ong komail, li odi toto mi nan Israel ni muein Elias, ni ansau nanlang matata par silu o saunipong wonu, ni lek lapalap kipadi sap karos; <sup>26</sup> A sota amen, me Elias pakadar wong, pwe ren li odi men nan Sarepta nan sap Sidon. <sup>27</sup> O me tuketuk kan me toto nan Israel ni muein saukop Elias, a sota amen re 'rail, me kelailadar, pwe Naeman eta men Sirien. <sup>28</sup> Karos, me mi nan sinakoke ni ar rongadar mepukat, ap makar kida kaulap, <sup>29</sup> Re udar sikonlar i sang kanim o, o kalualang i pon kailan dol o, wasa ar kanim kakaudar ia, pwen kasedi sang ia, <sup>30</sup> A i kotin weid nan pung ar, kotila sang irail. <sup>31</sup> I ari kotilang Kapernaum kanim en Kalilaa, o kotin kawewe ong irail ni ran en sapat akan. <sup>32</sup> Irail ari puriamuiki a padak, pwe a masan me manaman. <sup>33</sup> A aramas amen mi nan sinakoke, me ngen en tewil saut amen ti po a, me weriwer laud, <sup>34</sup> Inda: Ko sang kit, menda re omui kit Iesus en Nasaret! Kom kotido, en kawé kit ala. I asa, me komui nain Kot sarau. <sup>35</sup> Iesus ap kidaue i masani: Nenenla o ko sang re a. Tewil lao kasedi i nan pung arail, ap koie i sang re a, sota me sued kot a wiai ong i. <sup>36</sup> Irail karos ap puriamui kila, kasokaso i nan pung arail indada: Dakot masan pot et? Pwe a masan manaman o roson ong ngen saut akan, irail ap kin ko wei sang. <sup>37</sup> I ari

indand sili nin sap karos wasa o. <sup>38</sup> I ap kotida sang nan sinako ke, ap kotilong ong nan im en Simon. A saulap en Simon me somau karakar. Irail ari poekipoeki i re a. <sup>39</sup> I ari koti dong i masani ong somau o, ap madang ko sang, i ari madang paurida papa irail. <sup>40</sup> Katipin lao kirilar, rap wa dong i ar luet akan karos. I ari kotikidang amen amen lim a kan, kakelail ir ada. <sup>41</sup> O tewil akan pil kowe i sang ren me toto, me weriwer indada: Komui sapwilim en Kot. I ari kotin kidau ir ada, o sota mueid ong irail, en lokaia, pwe re asa, me i Kristus. <sup>42</sup> A lao wasa ran a kotilang wasa ri, a pokon o raparapaki i, re pokon dong i o kolekol i pwen der koti wei sang irail. <sup>43</sup> A i kotin masani ong ir: I pil pan padaki rongamau en wein Kot nan kanim tei ko, pwe i me I pakadar kidor. <sup>44</sup> A i kotin padapadak nan sinako ke en Kaliläa kan.

## 5

<sup>1</sup> A KADEKADEO ni en aramas toto ar tanga dong imp a, pwen rongerong masan en Kot, a kotikot pon kailan le en Kaliläa, <sup>2</sup> Ap masani kisin sop riapot, me peipei nan le o, a saused akai keredi sanger widen ar uk kai. <sup>3</sup> I ari kotida pon apot ren sop oko, war en Simon, kotin poeki re a, en kaiieila ekis sang ni sap o. I ari kaipokedi, kawewe ong aramas sang nan sop o. <sup>4</sup> I lao kaimwisokela a masan, ap masani ong Simon: Seisei kowe i wasa lol, ap kaduedi oma uk kan, pwe koma en saikidi. <sup>5</sup> A Simon sapeng potoan ong i: Maing, se laiter pong lao lel wasa ran, ap sota saik at, ari so ar masan, me i pan kaduekidi uk en. <sup>6</sup> Irail lao wiadar met, rap oro pena mam toto; ara uk ari ola. <sup>7</sup> Irail ari olole kis arail oko, me mi nin apot sop, pwe re en kodo sauasa irail. Irail ari kodo, kadirela sop riapot, ira ari pan mauidi. <sup>8</sup> Simon Petrus lao kilanger mepukat, ap poridi sang Iesus, potoan ong: Maing, re kotiwei sang ia, pwe aramas sued amen ngai. <sup>9</sup> Pwe a puriamuiki o ir karos, me iang i, pweki saik ar, me re saikidi. <sup>10</sup> A pil dueta Iakopus o Ioanes nain Sepedäus ol oko, me iang Simon. Iesus ap kotin masani ong Simon: Koe der masak, pwe sang ansau wet kokola koe pan saikidi aramas. <sup>11</sup> Irail kaikilong ong liman sap ar sop oko, re ap kasela karos, idauendo i. <sup>12</sup> Kadekadeo ni a kotikot nan eu kanim, kilang, ol amen mia, me dir en tuketuk. A lao kilanger Iesus, ap pupekidi mas a, poeki re a potoan ong: Maing, ma re kotin kupura, re pan kak ong kamakel ia da. <sup>13</sup> I ari kotin kapawei lim a sair i masani: I men, koe en makelekel. Ari, a tuketuk madang modi sang. <sup>14</sup> I ari kotin inapwiedi i, en der indang meamen; a kola kasale ong pein uk samero ko, o kida mairong, pweki

om makelekeladar, me Moses masanier, pwen kadede ong irail. <sup>15</sup> A a madang indand sili o pokon kalaimun pokon pena, pwen rong i o kelailada sang ar somau kan. <sup>16</sup> I ari kotin kelepele nan sap tan, pwen laolao. <sup>17</sup> Kadekadeo eu ran ni a kotin kaukaweweda, Parisär o saunkawewe kan, me mod imp a, irail pwarado sang kanim en Kaliläa o Iudäa karos o sang Ierusalem; a roson en Kaun o pwili wei sang i, kakelada amen amen. <sup>18</sup> A kilang, ol akai roado aramas amen me kokon madak, rap raparapaki duen ar pan kak walang lole, pwilikidi mo a. <sup>19</sup> A ni ar sota kak diar wasa, me re pan kai dong impa pweki pokon o, rap dauda pon im o, kakiridi i nan os iangaki pet, lao nan pung arail mon Iesus. <sup>20</sup> A lao mangi arail poson, ap kotin masani: Aramas o, dip om akan lapwa sang uk er. <sup>21</sup> A saunkawewe o Parisär akan ap mongemongeloleki indada: Is men et, me kin lalau? Is me kak lapwada dip akan, pwe Kot eta? <sup>22</sup> A Iesus lao mangi ar mongemongelol, ap kotin sapeng masani ong irail: Da me komail kin mongemongeloleki lol omai? <sup>23</sup> Da me mongai ren inda, dip om akan lapwa sang uk er, de inda, uda, aluwei? <sup>24</sup> A pwe komail en asa, me Nain aramas manaman ong lapwada dip akan nin sappa, iei me a kotin masanieki ong me kokon madak: I indai ong uk, uda, ale ki om kola deu om! <sup>25</sup> A madang uda mo 'rail, kida a pet, me a wonon poa, koieilang im a kapikapinga Kot. <sup>26</sup> Ir karos ap puriamui kida o kapikapinga Kot, o dire kila masak indada: Ran wet kitail kilanger me kapwuriamui melel. <sup>27</sup> Murin mepukat a kotila sang wasa o, ap masani saunopwei amen, ad a Lewi momod nan wasan nopwei, ap masan ong i: Idauen ia do! <sup>28</sup> I ari kasela a meakaros, uda, idauenla i. <sup>29</sup> Lewi ari wiada kamadip lapalap ong i nan im a; a saunopwei ape me toto, me iang i ni tepel. <sup>30</sup> A Parisär o arail saunkawewe kan lipanod ong sapwilim a tounpadak kan indada: Da me komail iangaki saunopwei o me dipan akan manga o nim. <sup>31</sup> Iesus ap kotin sapeng masani ong irail: Me kelail sota mau ong saunwini, pwe me somau kan. <sup>32</sup> I kodon ekeker dong kalua me dipan akan a kaidin me pung kan. <sup>33</sup> Irail ap potoan ong i: Da me tounpadak en Ioanes akan kaisesol pan pak toto o re kapapak toto, o pil dueta en Parisär akan, a sapwilim omui kan kin tungole o nim? <sup>34</sup> A Iesus kotin masani ong irail: O komail sota kak ki ong toun kapar en kamadip en kapapad en kaisesol arain ol kamod mi re 'rail! <sup>35</sup> A eu ran ol kamod pan peuka wei sang irail, i ran oko re ap pan kaisesol. <sup>36</sup> A kotin masani ong irail karaseras eu: Sota me kin deik ong likau kap ni likau maring; a ma ei, a pan ter pasang likau kap; a kisan likau kap pil

sota pan paroki ong likau maring. <sup>37</sup> A sota me kin kodie ong wain kap nan ed maring; a ma ei, wain kap pan ter pasang ed akan, ap wudokila o ed akan pan ola. <sup>38</sup> A re kin kodie ong wain kap nan ed kap, ira karos ap nekinek mau. <sup>39</sup> O sota, me kin nim sang wain maring, pan mauki wain kap, pwe a kin inda: Me maring o me mau sang.

## 6

<sup>1</sup> KADEKADEO ni ran en sapat kariau a kotin weid nan mat en korn o sapwilim a tounpadak kan ap dolung wan korn o irrisis nan pa arail, ap kangkang. <sup>2</sup> A Parisär akai indang irail: Menda komail kin wiada, me sota pung, en wiaui ni ran en sapat? <sup>3</sup> Iesus ari kotin sapeng masani ong irail: Komail sota wadoker, me Dawid wiadar ni a men mangadar, i o me iang i? <sup>4</sup> Duen a pedelong ong nan tanpas en Kot, o ale prot en kasansal, o kangkang o pil ki ong me iang i, me sota pung, aramas en tungole, samero kan eta? <sup>5</sup> O masani ong irail: Nain aramas pil kaun en sapat. <sup>6</sup> A kadekadeo ni eu sapat a kotilong ong nan sinakoke kaweweda. A aramas amen mia, me pa a pali maun motorla. <sup>7</sup> A saunkawewe o Parisär akan masamasan i, ma a pan kakelada i ni ran en sapat, pwe re en kadipa i. <sup>8</sup> A kotin angi ar lamelam ap masani ong aramas o, me pa a motorla: Uda kodo met! A ap uda ko ong wasa o. <sup>9</sup> Iesus ap kotin masani ong irail: I men idok re omail, da me pung en wiada ni ran en sapat ren me mau de me sued? En kolekol de kawela maur en aramas? <sup>10</sup> I ari kotin aupwil sili po 'rail masani ong i: Kapawei pa om! A ap wiada, pa a ap kelailada, a maula dueta me teio. <sup>11</sup> Irail ap makaradar kaulap o kapukapung pena, da me re pan wiai ong Iesus. <sup>12</sup> Kadekadeo ni ran oko, a kotidala pon nana pwen laolao. I ari kotin laolao ong Kot lao wasa ran. <sup>13</sup> A lao ran pasang, ap kotin molipei pena sapwilim a tounpadak kan. A kotin piladar ekriamen, me a kamareki wanporon. <sup>14</sup> Simon me a kotin kaadaneki Petrus, o ri a Andreas, o Iakopus, o Ioanes, o Pilipus, o Partolomäus, <sup>15</sup> O Matäus, o Tomas, o Iakopus nain Alpäus, o Simon, me adaneki Selotes, <sup>16</sup> O Iudas nain Iakopus, o Iudas Iskariot, me pangala i. <sup>17</sup> A lao kotin iang ir kotidi dong wasa kis nan sap patapat o, sapwilim a tounpadak kan toto o aramas ngederenia pokon dong i sang nan Iudäa, o Ierusalem, o Tirus, o Sidon, re mi pon oror, pwen rong i o kakelailada sang ar somau kan; <sup>18</sup> O me kalokolok ren ngen saut akan ap kelailadar. <sup>19</sup> A aramas karos men doke i, pwe roson kin pwiliwei sang i, kakel irail karos. <sup>20</sup> A ap kotin aupwil sili pon sapwilim a tounpadak kan masani: Meid pai komail, me samama, pwe noumail wein

nanlang. <sup>21</sup> Meid pai komail, me men mangadar ansau wet, pwe komail pan medila. Meid pai komail, me kin sangesang ansau wet, pwe komail pan kaurur. <sup>22</sup> Komail meid pai, ma aramas akan kailong kin komail, o kase komail la, o kidaue komail, o kawela ad omail, pwe dene me sued, pweki Nain aramas. <sup>23</sup> Komail en peren ni ran o, o lusilus, pwe kilang, pwain omail me lapalap nanlang, pwe iduen me sam arail akan wiai ong saukop akan. <sup>24</sup> A me sued i ong komail kapwapwa kan, pwe komail anekier omail peren. <sup>25</sup> Suedi ong komail, me medier, pwe komail pan dupokala. Suedi ong komail, me kin peren ansau wet, pwe komail pan mauk o sangesang. <sup>26</sup> Suedi ong komail, ma aramas akan karos pan lokaia mau kin komail; pwe iduen me sam arail akan wiai ong saukop likam akan. <sup>27</sup> A I indai ong komail, me kin rongerong, pok ong omail imwintiti, wiawia mau ong me kin kailong kin komail. <sup>28</sup> Kapaiada, me kin karia komail la, kapakapa kin ir, me kainsensuede kin komail; <sup>29</sup> O me pikir uk ni apali en likin sap om, pil ki ong i pali teio, o me pan ki sang om likau pup, pil mueid ong i noum sakit. <sup>30</sup> Ki ong karos, me kin poeki re om, o me pan atia sang om kapwa, koe der poeki re a, a kapuredo. <sup>31</sup> A duen me komail men, aramas en wiai ong komail, iduen me komail en wiai ong irail. <sup>32</sup> Pwe ma komail pok ong, me kin pokepoke komail, da me pan kating pamail? Pwe me dipan akan pil kin pok ong kompeke paraal. <sup>33</sup> A ma komail wiawia mau ong, me wia mau ong komail, da me pan kating pamail? Pwe me dipan akan kin wia pil dueta. <sup>34</sup> A ma komail pan ki ong irail, me komail akpwainongki, da me pan kating pamail? Pwe me dipan akan pil kin wiai ong me dipan, pwen ale me dueta. <sup>35</sup> A pok ong omail imwintiti, o wiawia mau, o ki ong so akapwainok, a pwain omail pan lapalap, o komail pan seri en me lapalap o. Pwe a kupura, me so danke o me sued akan. <sup>36</sup> Komail ari kadek rasong Sam omail me kalangan. <sup>37</sup> Ender kadeikada a komail sota pan pakadeikada. Ender kariaala, a komail sota pan kariaala. Lapwada, a komail pan lapwada. <sup>38</sup> Kisakisa wei, a a pan depuk ong komail dal mau eu, me idang pena, o itik pena, o dir kaulap, me pan ko ong komail. Pwe men song ota, me komail kin songki, iduen a pil pan song ong komail. <sup>39</sup> A kotin pil masani ong irail karaseras eu: Da, me maskun pan kak kare me maskun? Ira karos sota pan pupedi nan por o? <sup>40</sup> Tounpadak sota kin laude sang a saunpadak. Ma tounpadak paroki ong a saunpadak, nan a unsokala. <sup>41</sup> A menda koe kilekilang pul ni mas en ri om ol, ap sota kan ataut o ni pein mas om? <sup>42</sup> De iaduen, koe pan indang ri om: Ri ai, aui mas,



i pan ki sang pul ni mas om, ap sota kilang ataut o ni mas om? Malaun amen koe, ki sang mas ataut o ni mas om, a koe ap pan kak kilang, duen om pan kak kisang pul, me mi ni mas en ri om. <sup>43</sup> Pwe tuka mau sota pan wa sued. Pil sota tuka sued pan wa mau. <sup>44</sup> Tuka karos kin diarok kida a wa. Pwe aramas sota kak dolung sang pik ni tuka kamadak, aramas pil sota kin dolung sang wan wain ni tuka mal. <sup>45</sup> Aramas mau amen kin kapwareda me mau sang nan a pai mau en mongiong i, a me sued amen kin kapwareda me sued sang nan a sued, pwe aua kin kida sang nan audepan mongiong o. <sup>46</sup> A iaduen, komail kin indang ia: Maing, Maing, ap sota kin wiada, me I kin inda? <sup>47</sup> Meamen ko dong ia o rongerong ai masan kan, o kapwaiada, nan I pan kasale ong komail, me a rasong. <sup>48</sup> Nan i me rasong aramas amen, me kauada im eu o weirada lol, o pasonedi pon paip. A lapake lao pwilido, ad ap maimai ong im o, ap so kak kamokidedala, pwe a kakau pon paip o. <sup>49</sup> A meamen rongerong, ap sota kapwaiada, nan a rasong aramas amen, me kauada im eu nan pwel so pasonedi. A lapake pwil maiai ong, a ap madang rongk pasang, o ola en im o me laud.

## 7

<sup>1</sup> A LAO kotin erela a masan akan karos ong pokon o, a ap kotilang Kapernaum. <sup>2</sup> Ladun senturion amen mia, me kasampwal re a, me somau, a pan mela. <sup>3</sup> A lao rongada duen Iesus, ap poronelang i saumas en Sus akan, poeki re a, en kotido kakelailada a ladu. <sup>4</sup> Irail lao pwara dong Iesus, ap ngidingideki i potoan ong: A war ong, ren kotin wi ai ong i mepukat. <sup>5</sup> Pwe a kin pok ong toun sap atail o kauadang kit sinakoke o. <sup>6</sup> Iesus ap kotin iang ir ala. A ni solar non doo sang im o, senturion ap poronelang i kompok kai, potoan ong: Maing re der kangere ir kotido, pwe i sowar, ren ketlong ong nan im ai. <sup>7</sup> Ngai ari sota kin aka, me i war ong potong dong ir. A re kotin masaniata; a ai ladu pan kelailada. <sup>8</sup> Pwe ngai pil aramas amen, me mi pan manaman akan, ap kaunda saunpei kai. A ma i pan, indang amen: Kowei! A pan kola; o ong amen: Kodo! A pan kodo; o ong ai ladu: Wiada met! A pan wiada. <sup>9</sup> Iesus lao mangi mepukat, ap kotin puriamui kila, saupe dong pokon o, me idaundo i, masani: I indai ong komail, me I saik diar poson lapalap duen met, sota ren men Israel. <sup>10</sup> A me pakadarala kan lao purelong ong nan im o, re ap diarada, me ladu o kelailada. <sup>11</sup> Kadekadeo murin mepukat a kotilang kanim eu ad a Nain; sapwilim a tounpadak kan toto iang i; o aramas pil me toto. <sup>12</sup> A lao koren iong wanim en kanim o, kilang,

me lar amen, me re wawei, ieros en in a, a iei li odi amen; a toun kanim me toto iang i. <sup>13</sup> Kaun o lao masani i, ap kotin kupurela, masani ong i: Eder sangesang. <sup>14</sup> I ari koti ong, doke kopa o, a me roa kan ap udi. I ap kotin masani: Manakap, I indai ong uk, paurida! <sup>15</sup> A me melar o ap modada, pikekidi lokaia. Iesus ap kotiki ong i ren in a, <sup>16</sup> Masak ap kipa ir edi, o kapikapinga Kot indada: Nan saukop lapalap amen, me pwarado re atail, o Kot me kotier ren sapwilim a aramas akan. <sup>17</sup> A kasoi pot et duen i lolok sili nan Iudaa o sap karos, me mi imp a. <sup>18</sup> En Ioanes a tounpadak kan kaire kin i mepukat karos. <sup>19</sup> Ioanes ap molipeido sapwilim a tounpadak kan ri amen, porone ira lang Iesus, masanlang i: Ir me pan kotido, de sen auiaui amen? <sup>20</sup> Ol oko lao potong i, ap potoan ong: Ioanes saunpaptais kadar kit dong ir potoan kalelapok: Ir me pan kotido, de sen auiaui amen? <sup>21</sup> A ni auer ota a kotin kakelada me toto sang ar somau, o luet, o ngen sued akan, o kotin kapad pasang mas en me maskun toto. <sup>22</sup> Iesus ap kotin sapeng masani ong irail: Koma u kowei, kaireki Ioanes, meakan komail kilanger o ronger: Me maskun akan kilangada wasa, o me luet akan kin alialu, o me tuketuk kan makelekeleda, o me salongepon kin rong wasa, o me melar akan kin maureda, o rongamau me lolok ong me samama kan. <sup>23</sup> O meid pai, me sota pan makar kin ia! <sup>24</sup> A men kadar en Ioanes lao purela, Iesus ap kotin tapiada masani ong pokon o duen Ioanes: Da me komail koieila en kilang nan sap tan? Komail men kilang alek pot, me kin dueduälökki ang? <sup>25</sup> De da me komail koieila en kilang? Komail men kilang aramas amen, me likau kida likau muterok? Kilang, me kin likau kida likau lingan, o kaped en manga, kin mi nan im en nanmarki kan. <sup>26</sup> De da me komail koieila en kilang? Saukop amen? Ei, I indai ong komail, a laude sang saukop amen. <sup>27</sup> Pwe iei i me intingidier due: Kilang, I kadarala mo mui nai men kadar amen, me pan koki al mo 'mui. <sup>28</sup> Pwe I indai ong komail, sota saukop amen me ipwi sang ren li akan, me laude sang Ioanes saunpaptais, ari so, me tikitik nan wein Kot, iei me laude sang i. <sup>29</sup> A aramas karos, me rongerong i, o saunopwei kan kapinga Kot ni ar iang paptaiseki paptais en Ioanes. <sup>30</sup> A Parisär o saunkawewe kan sapai ong pein irail ni ar mamaleki kupur en Kot, ap sota iang paptais re a. <sup>31</sup> A da me I en karasai ong aramas en di wet? O da me irail rasong? <sup>32</sup> Irail me rasong seri kai, me kin momod nan wasan net akan o likelikwir nan pung arail indinda: Kit kasakasang, a komail sota kakalek; kit kamamaue kin komail, a komail sota sangesang. <sup>33</sup> Pwe Ioanes

saunpaptais pwarado, ap sota kang prot, o sota nim wain, a komail kin inda: Nan tewil kin di poa. <sup>34</sup>Nain aramas pwarado, manga o nim, a komail kin inda: Kilang, me kaped en manga o kamom sakau, kompoke pan saunpwei o me dipan akan! <sup>35</sup>A lolekong kin diarok kida na seri kan karos. <sup>36</sup>A Parisär amen poeki i, en konot re a. I ari kotilong ong nan im en Parisär o kaipokedi ni tepel. <sup>37</sup>A kilang, li amen mi nan kanim o, me dipan amen, a lao asa, me Iesus kotikot konot nan im en Parisär o, ap wado kokon en alapasta, <sup>38</sup>O poridi mur i ni aluwilu a sangesang o pikekidi widenki pil en mas a aluwilu a, o limwieki a pwilipepei, o metik aluwilu a kan o keieki alapasta. <sup>39</sup>A Parisär o, me lukedo i lao kilanger, ap mongemongeloleki indada: Ma ol men et saukop amen, a pan asa, is li o, me sair i, pwe me dipan amen. <sup>40</sup>Iesus ap kotin sapeng masani ong i: Simon, I men indai ong uk meakot. I ari indada: Saunpadak, masania do! <sup>41</sup>Ol amen mia, me aramas riamen pwaipwand ong. Amen ira pwaipwandeki denar limepuki, a amen limesok, <sup>42</sup>A ni ara sota men kapungala, a kisakisa kin ira la karos. Indang ia, is re 'ra, me pan pok ong i laud? <sup>43</sup>Simon sapeng potoan ong: I lamelame i, me a kisakisa laud ong. A kotin masani ong i: Koe meid pung kasauada. <sup>44</sup>I ari saupei dong li o masani ong Simon: Koe kilang li men et, I pedeleng ong nan im om, a koe sota ki ong ia pil men widen na i kat, a i me widenki pil en mas a na i kat, o limwieki a pwilipepei. <sup>45</sup>Koe sota metik ia, a i sota tukedi sang metik na i kat, sang ni a pedeleng lao lel met. <sup>46</sup>Koe sota usore kin ia le, a met keiekier na i kat alapasta. <sup>47</sup>Nan i me I indaki ong uk: Dip a kan me toto me lapwadar, pwe a kin limpok laud; a me dip a sota non lapwada, nan a kin limpok tikitik. <sup>48</sup>I ari masani ong li o: Dip om akan me lapwadar. <sup>49</sup>A me iang mod ni tepel o ap tapiada inda nang pung ar: Is men et, me pil kin lapwada dip akan? <sup>50</sup>I ap kotin masani ong li o: Om poson me dore duk ala, koweï popol!

## 8

<sup>1</sup>KADEKADEO murin mepukat a kotin kakan sili nan kanim laud o me tikitik kan, padapadak o kaloki rongamau en wein Kot, o ekriamen iang i. <sup>2</sup>O pil li akai, me a kotin kakelailada sang ngen sued o somau kan, iet akan: Maria, me pil adaneki men Makedala, me tewil isimen koiei sang. <sup>3</sup>O Ioana iei likond en Kusas en Erodes a saunkoa men, o Susana, o me toto, me papaki i ar kapwa kan. <sup>4</sup>A aramas totoaia lao pokon dong i sang nan kanim akan, karos, ap kotin karaseras masani: <sup>5</sup>Saunkamor kolan kamor a war akan. Ni a kamokamorok akai ap moredi ong pon kailan al ap tiatidi o

manpir en pan lang nam ir ala. <sup>6</sup>A akai moredi ong pon paip. A lao wosada, a mongedi, pweki a sota lamelamur. <sup>7</sup>Akai moredi nan tuka teketek, a tuka teketek wosada, kasokä ir ala. <sup>8</sup>A akai moredi nan pwel mau, ap wosada o wada pan me epuki. Ni a kotin masanier mepukat, ap masan laudeda: Me salong a mia, men rong, i en rong! <sup>9</sup>A sapwilim a tounpadak kan ap kalelapok re a: Ia wewe en karaseras wet? <sup>10</sup>I ari kotin masani: A muei ong komail er, en asa me rir en wein Kot, a met akan en asa ni karaseras akan pwe ren kilang, ap sota kilang, o rong, ap sota weweki. <sup>11</sup>A iet wewe en karaseras o: Masan en Kot iei war akan. <sup>12</sup>A me mi pon kailan al o, iei ir, me rongadar, a muri tewil pwarada katia sang masan en Kot nan mongiong arail, pwe ren der poson, rap maurela. <sup>13</sup>A me mi pon paip, iei ir, me kin rong masan o ap pereperen ale, a sota kalau re 'rail. Ansau kis re kin poson, a ni ansau songesong, irail kin pupe sang. <sup>14</sup>A me moredi nan tuka teketek, iei irail me kin rong, ap koieila tiropeki anan o pai, o inong sued en maur et, rap sokekila, ap sota wa. <sup>15</sup>A nan sap mau, iei irail, me kin rong masan o, ap nekinek nan mongiong ar inen o mau, o wada nin tiak en kanongama. <sup>16</sup>Sota me kin isikeda lamp, ap pwainekidi kopa eu, de ki ong pan men wendi a pon deu a, pwe me pan pedeleng ong en kilang marain o. <sup>17</sup>Pwe sota me rir kot, me so pan sansalet, pil sota me okiok kot, me so pan kalok sili. <sup>18</sup>Komail ari kalaka duen omail kin rongerong, pwe me a mia, ekis pan ko ong; a me sota a mia, i, me a kiki ong, me a, pan katia sang. <sup>19</sup>In a o ri a kan ap ko dong i, a re sota kak kaiong impa pweki pokon o. <sup>20</sup>A ap loki ong i: In ar o ri ar akan poto liki, re men udial ir. <sup>21</sup>A kotin sapeng masani ong irail: In ai o ri ai mepukat, me kin rongerong masan en Kot o apapwali. <sup>22</sup>Kadekadeo ni eu ran a kotilang pon apot sop, a sapwilim a tounpadak kan iang i. A kotin masani ong irail: Kitail en kotela le en: Irail ari tangetang koieila. <sup>23</sup>O ni ar tange-tang kokoweï, a kotin saimokela; melimel ap koda nan sed. A sop o pwilipwil, a pan mauidi. <sup>24</sup>Irail ap kai dong i, kaopada i, potoan ong: Maing, Maing, kit pan mela! I ari kipada masani ong ang o iluk en sed akan, rap tikitikala o molelar. <sup>25</sup>I ap kotin masani ong irail: Ia omail poson? A irail masakada inda nan pung ar: Daduen, is men et, pwe a kin masani ong ang o sed, ir ari duki ong. <sup>26</sup>Irail ap lele dong sap en Kadara, me sal ong Kallläa. <sup>27</sup>I lao kotidi sang, ol amen tu ong i, me kodo sang kanim o, me tanwar en tewil sang mas kokodo, o me kiliso, o a sota kin kauson nan im, pwe a kin mimi nan sousou kan. <sup>28</sup>I lao kilang Iesus, ap werida,

poridi sang mo a indaki ngil laud: Menda re omui ngai, Iesus Sapwilim en Kot lapalap? I men poeki re omui, kom der kalok ia la! <sup>29</sup> Pwe a kotin masani ong ngen saut o, en koiei sang ren aramas o, pwe pan pak toto a saikidi i; i ari kin sali kidi sal mata o sal en nã kai. A i kamueit ir pasang, o tewil paki i lang sap tan. <sup>30</sup> Iesus kotin kainoma re a masani: Ia ad om? A potoan ong: Lekion; pwe tewil toto mi re a. <sup>31</sup> Ir ari poeki re a, ender masani ong irail, me ren kodilang pweleko. <sup>32</sup> Ari, pwin pwik kalaimun mi wasa o mangamanga sili nin nana o. Irail ari poeki i, en kotin mueid ong irail re en til ong irail. I ari kotin mueid ong irail. <sup>33</sup> Tewil oko ap kodi sang ren aramas o, ap tilong nan pwin pwik o. Pwin pwik o ap tangedi wei ni aul ong nan se ap mopila. <sup>34</sup> Silepa ko lao kilanger me wiauier, rap tangdaui, kolang kanim laud o tikitik kan, kaireki sili. <sup>35</sup> Irail ap koieila, kilang me wiauier, re ap kola ren Iesus, diarada aramas o, me tewil oko keredi sang lole, momod ni aluwilu en Iesus, likauda o lolekonglar; irail karos masakadar. <sup>36</sup> Me iang udialer, ap kaire kin irail duen tanwar en tewil a kakeladar. <sup>37</sup> Men Kadara karos ap poekipoeki i, en koti wei sang re `rail, pwe re masakadar kaulalap. I ari kotida pon sop o, ap kotin purelar. <sup>38</sup> A ol o, me tewil oko kodi sanger, poeki re a, en iang i; a Iesus sota kotin mueid ong i masani: <sup>39</sup> Purelang deu om, kalok sili duen manaman lapalap, me Kot wiai ong uk er! I ari kola, kalok sili nan kanim o duen manaman lapalap, me Iesus kotin wiai ong i. <sup>40</sup> Kadekadeo Iesus lao kotin puredo, aramas akan ap kasamo i, pwe irail karos auiaui i. <sup>41</sup> A kilang, ol amen, ad a Iairus, saumas en sinakoke, kotido poridi ni aluwilu en Iesus o poeki i, en kotilong ong nan im a. <sup>42</sup> Pwe na ieros seripein amen, me a par ngaulriau, me koren iang mela. A ni a kotikot kokodo, pokon o koi dong i. <sup>43</sup> A li amen, me nta pwilipwil par ngaulriau, me pwaineki ong saunwini kan a dipisou karos. A sota me kak kakelailada i. <sup>44</sup> I me apedo mur i, doke ni kailan sapwilim a likau. A pwilipwil en nta madang madada. <sup>45</sup> Iesus ap kotin masani: Is i me sair ia? A karos lao inda me sota, Petrus o me iang i ap potoan ong: Maing, pokon o kin kapil pena o koi dong ir, a iaduen, re kotin masani: Is i me sair ia? <sup>46</sup> A Iesus kotin masani: Nan meamen sair ia, pwe I pam, me kel eu ko sang ia er. <sup>47</sup> A li o lao asaer, me a so kak rirala, ap masapwekada, apedi poridi sang mo a, ap katitiki mon aramas karos, karepan a sair i, o duen a kelailada madang. <sup>48</sup> A ap kotin masani ong i: Seripein popoleta, om poson me kakel uk ada, koweit popol. <sup>49</sup> A ni a kotin masaniata, amen potodo sang ren saumas en sinakoke o katitiki ong

i: Sapwilim omui seripein melar. Menda kom kangiriek saunpadak o. <sup>50</sup> A Iesus lao mangi mepukat, ap kotin sapeng i masani: Koe der masak, koe poson ta, a ap pan maureda. <sup>51</sup> A lao kotilong ong nan im o, a sota kotin mueid ong amen en iang pedelong ong nan pera, Petrus, o Ioanes, o Iakupus eta, o sam en seripein o in a. <sup>52</sup> A irail karos sangesang o mamaukeki i. A i kotin masani: Komail der sangesang! Pwe a sota melar, a mamair eta. <sup>53</sup> Rap kaururki, pwe re asa, me a melar. <sup>54</sup> I ari kotikiiei sang ir nan pera o, a ap kotin ale pa a warong ong i masani: Seripein, pauida! <sup>55</sup> Ngen en seripein ap pure dong i, i ari madang uda. I ap kotin masani, kisin manga en ko ong. <sup>56</sup> A sam a in a puriamui kila. I ari kotin inapwiedi irail ren der indang meamen me wiauier.

## 9

<sup>1</sup> A LAO kotin molipe pena ekriamen oko, ap kotiki ong irail kel o manaman, en kaloedi tewil akan karos o kakelada me somau kan. <sup>2</sup> I ari kotin porone ir ala, pwen padapadak duen wein Kot o kakelada me somau kan. <sup>3</sup> O a kotin masani ong irail: Komail der wala meakot pon al o: Sota sokon, de ed, de prot, de moni, amen pil so pan wa sakit riau. <sup>4</sup> O wasa kis me komail pan pedelong ong nan im eu, komail pan mimieta wasa o, komail lao koweit sang ia. <sup>5</sup> O meamen kang kasamo komail, komail sapalewei sang kanim o, o sipede sang pwel ni nã omail, pwen kadede ong irail. <sup>6</sup> Irail ari kokola, kakan sili nan kisin kanim akan, padaki rongamau o kakelada me somau kan wasa karos. <sup>7</sup> A nanmarki Eroses lao mangi duen meakan, me wiauiki i, ap pingidar, pweki akai katitiki, me dene Ioanes iasadar sang ren me melar akan. <sup>8</sup> A akai indada, me dene Elias pwarado, o akai me inda, me dene saukop en kau men iasadar, <sup>9</sup> A Eroses masani: Ioanes, i me i lepuke sang mong a, a is men et, me i kin rongerong due? A ap men udial i. <sup>10</sup> A wanporon akan lao pure doer, ap kaireki i karos, me re wiadar. I ari kotin uk irail ada, kotilang wasa rir, nan kanim eu, me ad a Petsaida. <sup>11</sup> Toun sap o lao asaer, rap idauenla i, i ari kotin kasamo irail, o kotin padaki ong irail duen wein Kot, o kotin kakelada me mau ong. <sup>12</sup> A lao pan wasa pongier, ekriamen potodo potoan ong i: Re kotin kadar pasang pokon en, pwen kola nan kisin kanim akan o nan sap, en rapaki wasan pweidi o kan ar kisin manga, pwe kitail kotikot nan sap tan wet, <sup>13</sup> A a kotin masani ong irail: Komail pan ki ong irail kan ar manga! Re potoan ong: Lopon prot eta limau o mam eta riamen mi re at. De se pan kola netie dong pokon kalaimun wet manga? <sup>14</sup> Pwe irail me ol impan limekid. A

a kotin masani ong sapwilim a tounpadak kan: Komail pwini ir pasang wad limek o limek! <sup>15</sup> Irail ari wiada o kamod irail edi. <sup>16</sup> A kotin limada lopon prot limau o mam riamen, masanda nanlang, laolaoki, pilitiki pena, kotiki ong sapwilim a tounpadak kan, pwe ren nene ong pokon o. <sup>17</sup> Irail sak, o karos medier, ap rikada dodo eisokriau luan kamadip o. <sup>18</sup> Kadekadeo ni a kotin laolao kelep, sapwilim a tounpadak kan iang i. A kotin kainoma re 'rail masani: Is me aramas kin inda me ngai? <sup>19</sup> Irail sapeng potoan ong: Ioanes saunpaptais, a akai me inda Elias, o pil akai kin inda, me dene saukop en kaula men iasadar. <sup>20</sup> A kotin masani ong irail: A da me komail kin inda is ngai? Petrus ap sapeng potoan ong: Ir me Kristus sapwilim en Kot. <sup>21</sup> A i me kotin padik inapwiedi irail, ren der indang meamen mepukat. <sup>22</sup> Masani: Nain aramas pan kalokolok laud, o lokidokila ren saumas, o samero lapalap, o saunkawewe kan, o a pan kamela, o ni ran kasilu a pan maureda, <sup>23</sup> Ap kotin masani ong irail karos: Meamen men idauen ia i en tonmeteki pein i o ale a lopu ni ran karos, o idedauen ia do. <sup>24</sup> Pwe meamen kakananai ong maur a, pan pupe sang. A meamen kasela maur a pweki ngai, pan diarda. <sup>25</sup> Pwe da me pan mau ong aramas amen, me aneki pena sappa karos, ap kasela pein i o kasapokela pein i? <sup>26</sup> Pwe me kin namenok kin ia o ai padak kan, i me Nain aramas pil pan namenokki, a lao kodo ni a lingo, o lingo en Sam a, o na tounlang sarau kan. <sup>27</sup> A melei I indai ong komail, akai irail, me mi met, sota pan mela, irail lao udial wein Kot. <sup>28</sup> A kadekadeo murin pong walu pong murin masan pukat i ap ukada Petrus, o Ioanes, o Iakopus kotidala pon nana o pwen laolao. <sup>29</sup> A ni a kotin laolao mom en silang i ap wukila o sapwilim a likau puetepuetela o lingaling. <sup>30</sup> A kilang, ol riamen iang i masan pena! Ira me Moses o Elias. <sup>31</sup> Ira pwarado ni ara lingo o mamasani duen a pan kamatala nan Jerusalem. <sup>32</sup> A Petrus o me iang i me toutouki mair. Ira lao pirida, re ap udial a lingo o ol riamen kotikot impa. <sup>33</sup> Kadekadeo ira lao kotiwei sang re a, Petrus ap indang Iesus: Maing, meid mau atail kotikot met. Kit en kauada kisin im siliikis: Tanpas ar, o en Moses, o en Elias; a sasa me a kasokasoi. <sup>34</sup> Ni a kasokasoi mepukat, pali en dapok kadupal irail edi, irail ari masakadar ni ar tilong nan dapok o. <sup>35</sup> O ngil eu peidido sang nan dapok o masani: Iet nai ol kompok, komail en rong i! <sup>36</sup> A ngil wet lao wiawier, re ap diardar Iesus ta. Ir ari nenenlata; o ni ran oko re sota kaireki meamen duen me re kilanger. <sup>37</sup> A kadekadeo manda en ran o irail lao kotidido sang nana o, pokon kalaimun ap

poto dong i, <sup>38</sup> A kilang, ol amen nan pokon o ngil laudeda potoan ong: Saunpadak, i poeki re ir, re kotin masani dong ai tungol putak o, pwe iei ai ieros. <sup>39</sup> Re kotin mangi, ngen o lao koleidi i, a kin madang weriwer, a kin senseroki sili, a ap kin pudopud o meid apwal ni a kin koiei sang i. <sup>40</sup> Ngai ari poeki ren sapwilim ar tounpadak kan, ren kause wei sang i, a re sota kak. <sup>41</sup> A Iesus kotin sapeng masani: O di wet meid soposon o sapung, ia arain ai pan mimi re omail? Ia arain ai pan kokoa komail? Wa dong ia noum putak! <sup>42</sup> A ni a kokoda, tewil ap kapururada o seroki sili i, a Iesus kotin kidaueda ngen saut o, o kakelada putak o, ap kapure ong i ren sam a. <sup>43</sup> A irail karos puriamuiki manaman en Kot. A ni ar puriamuiki en Iesus a wiawia kan ap kotin masani ong sapwilim a tounpadak kan: <sup>44</sup> Masan pukat en kaledidi nan salong omail: Nain aramas pan pangala ni pa en aramas. <sup>45</sup> A irail sota weweki masan wet, pwe a rir sang irail, i me irail sasaki. Irail ari masak kalelapok re a duen masan pot et. <sup>46</sup> Irail ap pil lamelame, is me pan lapalap re 'rail? <sup>47</sup> A Iesus lao kotin mangi ar lamelam nan mongiong arail, ap ale seri men, kida impa a, <sup>48</sup> O masani ong irail: Meamen pan apwali kisin seri men et ni ad ai, nan a kin apwali ia, a meamen pan apwali ia, nan a kin apwali, me kadar ia do; a me tikitik re omail, nan i me pan lapalapala. <sup>49</sup> Ioanes ap sapeng potoan ong: Maing, se kilanger amen, me kausewei tewil akan ni mar ar. Kit ari inapwiedi, pwe a sota kin iang kit idedauen ir. <sup>50</sup> A Iesus kotin masani ong i: Eder inapiedi, pwe me so kin palian komail, nan a kin iang komail. <sup>51</sup> A kadekadeo a lao ansau, me a pan peukadala, a ap kotin saupeilang kotilang inen wong Jerusalem. <sup>52</sup> A kotin poronela men kadar akan, me pan tiang mo a. Irail ari kokola lele dong kisin kanim en Samaria eu, pwen rapaki wasa, me a pan pweioikidi ia. <sup>53</sup> A re sota kasamo i aki a kotin saupeila kotilang inen wong Jerusalem. <sup>54</sup> Sapwilim a tounpadak kan Iakopus o Ioanes lao kilanger mepukat, ap potoan ong: Maing, ma re kotin kupura, se pan poeki, kisiniai en moredi sang nanlang, kang irail la, duen Elias wiadar. <sup>55</sup> A i kotin saupeido, kapung ong ira masani: Koma sota asa is Ngen, me naina kin koma? <sup>56</sup> Irail ap daulul wei nan eu kisin kanim. <sup>57</sup> Kadekadeo ni arail kotikot kokoda amen ap potoan ong i: Maing i pan idedauen ir wasa karos me re pan kotila ia. <sup>58</sup> Iesus kotin masani ong i: Poks akan por ar mia, o manpir en pan lang pas ar mia, a Nain aramas sota wasa en kaula wei mong a. <sup>59</sup> A kotin masani ong amen: Idauen ia do! A i indada: Maing, komui kotin muedi ong ia mas, i en purela sarepedi sam ai. <sup>60</sup> A

Jesus kotin masani ong i: Me melar akan en sarepedi ar melar akan, a koe kowe kalok sili wein Kot! <sup>61</sup> Pil amen potoan: Maing, i pan idedauen ir sili, a re kotin mueid ong ia mas, i en kamurimuri ong toun im ai. <sup>62</sup> A Jesus kotin masani ong i: Sota me pan koleidi men weirada pwel, ap kilang muri, a sota koiok ong wein Kot.

## 10

<sup>1</sup> MURIN mepukat Kaun o pil kotin piladar isiakan o porone irail wei mo a ni wad riamen, en kakan sili nan kanim laud o tik-itik kan, wasa me a pein pan kotilang ia. <sup>2</sup> A kotin masani ong irail: Rak me kalaimun, a toun dodok me malaulau; poeki ren Kaun en rak, en kadarala toun dodok nan a rak. <sup>3</sup> Komail kola; kilang, I kadar komail la dueta sippul akan nan pung en kidi en wei akan. <sup>4</sup> Komail der wewa ed en moni, de ed en sailok, de sut, o der ranamau ong meamen nani al o. <sup>5</sup> A ma komail pan pedelong ong nan im eu, komail pan inda mas: Popol en mimi nan im wet! <sup>6</sup> A ma popol amen mi wasa o, omail popol pan mimieta re a, a ma so, omail popol pan pure dong komail. <sup>7</sup> A komail pan mimieta nan im ota, o manga o nim, me mi re 'rail pwe toun dodok me warong pwain a. Komail der pedoi sang nan eu im ap kolong ong nan eu. <sup>8</sup> A ma komail pan pedelong nan eu kanim, o re pan kasamo komail, i wasa komail pan tungole, me pan wisike dong komail. <sup>9</sup> O kakelada me somau kan, me mi wasa o, o kaire kin irail: Wein Kot koren dong komail. <sup>10</sup> A ma komail pan pedelong nan eu kanim, o re sota pan kasamo komail, i wasa komail pan pedoi nani al indada: <sup>11</sup> Pil pwel par, me ko dong kit nan omail kanim, sipede dong komail; ari so, komail en asa, me wein Kot koren dong komail. <sup>12</sup> I indai ong komail, nan a pan mangai ong Sodom ni ran o sang kanim o. <sup>13</sup> Suedi ong uk Korasim! Suedi ong Petsaida! Pwe ma manaman akan, me wiaui ong uk er, wiaui ong Tirus o Sidon, nan melel, re pan kalula nan tuk en likau o nan pas. <sup>14</sup> A a pan mangai ong Tirus o Sidon ni kadeik o sang komail. <sup>15</sup> A koe Kapernaum, me paidar nanlang, pan psikondi ong nan pweleko. <sup>16</sup> Me rongerong komail, nan a kin rongerong ia; o me mamaleki komail, nan a kin mamaleki ia. O me mamaleki, ia, nan a kin mamaleki, me kadar ia do. <sup>17</sup> Me isiakan ap puredo, pereperen potoan ong: Maing, pil tewil akan udi ong kit ni mar omui. <sup>18</sup> A kotin masani ong irail: I kilanger Satan likamata liol a pupedi sang nanlang. <sup>19</sup> Kilang, I ki ong komail manaman, en tiakedi serpent o skorpion, o en poedi kel en imwintiti karos. O sota meakot pan kasuedi ong komail, <sup>20</sup> Ari so, komail der peren kida, me ngen akan kin

udi ong komail, a komail peren kida me ad omail intingidier nanlang. <sup>21</sup> Ni auer ota Jesus kotin perenda ni ngen e masani: I kapinga komui, Sam ai, kaun pan lang o sappa, me komui okila mepukat sang me lolekong o koiok kan, ap kasale ong seri pwelel akan! Ei Sam ai, pwe iduen me komui kupukupura. <sup>22</sup> Meakoros muei ong ia er sang ren Sam ai, o sota me asa sapwilim a Ol, pwe Sam eta. O sota me asa Sam, pwe sapwilim a Ol eta, o me sapwilim a Ol pan kasale ong. <sup>23</sup> I ap kotin saupei dong tounpadak kan, masani ong irail eta: Meid pai por en mas akan me udial, me komail udialer. <sup>24</sup> Pwe I indai ong komail, saukop o nanmarki kan toto anane udial, me komail kin ududial, a re sota kilanger; a re men rongada, me komail kin rongerong, ap sota rongadar. <sup>25</sup> A kilang, saunkawewe men ap uda, kasongesong i potoan ong: Saunpadak, da me i en wiada, pwen sosoki maur soutuk? <sup>26</sup> A kotin masani ong i: Da me intingidier nan kapung o? Daduen om dondoropwe? <sup>27</sup> A sapeng indada: Koe en pok ong Kaun om Kot mongiong om unsok, o ngen om unsok, o kel om unsok, o om lamelam unsok, o men imp om dueta pein koe. <sup>28</sup> A kotin masani ong i: Koe meid sapeng inen, wiada mepukat, a koe pan maurela. <sup>29</sup> A ap men ak kapungki pein i indang Yesus: A is men imp ai? <sup>30</sup> A Yesus kotin sapeng masani: Aramas amen momait sang Ierusalem kodila Ieriko ap lodi ong lolap akai, me ter sang a likau kan, o kame i, rap koieila; i ari pan mela. <sup>31</sup> A samero amen momaitela nani al ota. A ni a kilang i, ap daulul wei sang. <sup>32</sup> A leap amen pil dueta. Ni a leler wasa o, kilang i, ap daulul wei sang. <sup>33</sup> A ol en Samaria amen sailok sili ap pil weid wasa o. Ni a kilanger i ap pokela, <sup>34</sup> Kola re a, o kidim pena a pwal akan, ap ki ong le o wain lole o kamondi i pon dake pa man o, wala nan im en kairu eu, apapwali i. <sup>35</sup> Manda a pan samala, ap ki ong kaun en im o denar riâu indang i: Apapwali i! A ma mekis pan dauili, i pan kapungala, ni ai pan puredo. <sup>36</sup> A is ren ir silimen, me koe wiaki men impan ol o, me lodi ong lolap oko? <sup>37</sup> A sapeng: Me wiadar dodok kadek ong i. Yesus ap kotin masani ong i: Ari, koweila sang! <sup>38</sup> A kadekadeo ni ar kotin sailokela, a kotilong ong nan kisin kanim eu. Li amen mi wasa o, ad a Marta, me kasamo i long ong nan im a. <sup>39</sup> Ri a li amen mia, me ad a Maria, me momod ni aluwilu en Yesus, rongerong a masan. <sup>40</sup> A Marta kasopisokki pein i a papa i. I ari potodo potoan ong: Maing, re sota kotin kupuroki ri ai li, me sota kin iang ia dodok? Re kotin padaki ong i, en sauasa ia. <sup>41</sup> A Yesus kotin sapeng masani ong i: Marta, Marta, koe meid nongki o sopisokki okotme. <sup>42</sup> A me ta kot me kasampwal. Maria piladar

pwais mau, me sota pan katia sang.

## 11

<sup>1</sup>KADEKADEO ni a kotikot wasa kis pwen laolao, a lao kotin erelar, amen sapwilim a tounpadak kan ap potoan ong i: Maing re kotin padaki ong kit kapakap, dueta loanes kin padaki ong a tounpadak kan. <sup>2</sup>A ap kotin masani ong irail: Komail lao wia kapakap, ap inda: Sam at, mar omui en sarui, wei 'mui en pwaida, <sup>3</sup>Kotikido ran wet at tungol kaukaule. <sup>4</sup>Lapwa sang kit dip at, dueta kit, me kin lapwada karos, me wia dipi ong kit, eder kaluang kit ren me katika-tiamau kan. <sup>5</sup>I ap kotin masani ong irail: Is re omail, me a kompok amen mia o me pan kola re a ni ailep en pong indang i: Kompoke pai, ki ong ia lopon prot silu, <sup>6</sup>Pwe kompoke pai men pwarado sang a sailok o, ap sota, me i pan kak ki ong i. <sup>7</sup>A me mi nan im o pan sapeng inda: Koe der kadiropa ia, pwe wanim ritidier, o nai seri ko iang ia nan wasan mair; i so kak paurida o ki ong uk meakot. <sup>8</sup>I indai ong komail, ma a sota pan paurida o ki ong i aki kompokepa a, nan a pan paurida o ki ong, me itar ong i aki a ngidingid. <sup>9</sup>I indai ong komail, poeki, a komail pan tungole; rapaki, a komail pan diarada; letelet, a a pan ritida mo 'mail. <sup>10</sup>Pwe karos me poekipoeki, kin tungole; o me kin rapaki, kin diarada; o me kin letelet, nan a pan ritida mo a. <sup>11</sup>De is sam amen nan pung omail, ma na putak pan poeki na kisin prot, pan ki ong i takai eu? De ma a poeki mam, pan ki ong i serpent amen? <sup>12</sup>De ma a pan poeki kitor eu, pan ki ong i skorpion amen? <sup>13</sup>Ma komail, me song sued, asa duen kisakis mau ong noumail seri kan, nan melel kaualap. Sam omail nanlang pan ki ong Ngen sarui ren me poeki re a. <sup>14</sup>A ap kotin kause wei tewil amen, me lotong. A kadekadeo tewil lao koei sanger, me lotong o ap lokelokaia, a aramas puriamuiki. <sup>15</sup>A akai ir katitiki: Nan Peelsepup, saumas en tewil akan, me a kauseki sang tewil akan. <sup>16</sup>A akai kasongesong i, poekipoeki kilel eu sang nanlang. <sup>17</sup>A ap kotin angi ar lamelam, masani ong irail: Wei karos ma a pan u pena nan pung a, a pan ola; o ma toun im eu pan u pena nan pung a, a sota pan pwaida. <sup>18</sup>A iaduen, ma Satan u ong pein i, a wei pan kak pwaida? Aki komail indinda me dene ngai kause wei tewil akan ki Peelsepup. <sup>19</sup>Ma I kin kauseki wei Peelsepup tewil akan, a is me noumail ol akan kin kause kin irail? Irail ari pan omail saunkapung. <sup>20</sup>A ma I kauseki wei lim en Kot tewil akan, nan wein Kot lel ong komail er. <sup>21</sup>Ma me kelail o, me audeki kapwa en pei, pan sinsila im a, nan a kapwa nekinekid mau. <sup>22</sup>A ma amen, me kelail sang i, pan palian i o kaloedi i, ap pan atia sang a kapwa

en pei, me a kelekie, o nek pasang kapwa en kul. <sup>23</sup>Meamen, me sota iang ia, iei me palian ia, o me sota kin dolung penang ia, iei me kin kasapoka pasang. <sup>24</sup>Ngen saut lao kowe sang ren aramas, a kin tangatang sili nan sap tan akan, rapaki wasan kamol, a sota, me a diarada, i ap kin inda: I ap pan purelong ong nan im ai, me i pedoi sanger. <sup>25</sup>A lao puredo, a diar, me a kokok o kapwate, <sup>26</sup>I ari koeila, ale ong i ngen isimen, me sued sang pein i. Irail ap pedelong ong lole, rap kakauson ia; a aramas pan sued sang mas. <sup>27</sup>A kadekadeo ni a kotin mamasani mepukat, li amen, kausang pokon o, ap potoan ong i: Meid pai kupur o, me wia ir adar, o didi kan, me re kotiki! <sup>28</sup>A i kotin masani: Ei, meid pai, me kin rong masan en Kot ap kapwaiada. <sup>29</sup>A pokon o lao tengeteng pena, a kotin masani: Di wet meid sued! Re kin rapaki kilel eu, a sota kilel pan sansal ong ir, pwe kilel en Iona eta. <sup>30</sup>Pwe duen Iona kilel eu ong men Niniwe, iduen Nain aramas ong di wet. <sup>31</sup>Li nanmarki en pali air amen pan u ong ol akan en di wet ni kadeik o pan kari ir ala, pwe a pwarado sang ni imwin sappa, pwen rong lolekong en Salomo. A kilang, me laude sang Salomo mi met. <sup>32</sup>Ol en Niniwe kan pan u ong di wet ni kadeik, o pan kariaia i, pwe re kalula ni ar rongadar padak en Iona. A kilang, me laude sang Iona mi met. <sup>33</sup>Sota me kin isikeda lamp, ap kila wasa rir, pil so pan kopa, a pon deu a, pwe me pan pedelong ong, en kilang marain o. <sup>34</sup>Por en mas marain en pali war. Ma mas om makelekel, war om karos pan dir en marain. A ma mas om me sued, war om karos me pil dir en rotorot. <sup>35</sup>En kalaka, pwe marain mi lol om, der rotorot! <sup>36</sup>Ma war om dir en marain kaualap, o sota kisan rotorot mia, karos pan dir en marain dueta lingan en lamp, me kin sensere uk ada. <sup>37</sup>A ni a kotin kaparok, Parisär amen luke i, en konot re a. I ari kotilong kotidi nin tepel. <sup>38</sup>A Parisär lao udial, ap puriamuiki, me a sota kotin omiom mon konot. <sup>39</sup>A Kaun o kotin masani ong i: Nan komail Parisär akan kin widen likin dal o plet, a lol omail me dir en me re kuliada o me sued. <sup>40</sup>Nan pweipwei komail, kaidin i me wiadar pali liki, pil wiadar pali lole? <sup>41</sup>A kisakis weita duen komail kak ong! A kilang, karos pan makelekel ong komail. <sup>42</sup>Suedi ong komail Parisär akan, pwe komail, kin mairongki eisokkis eu en minse, o raute o song en kisin tan tuka kai, ap sota insenoki kadeik o limpok en Kot! Wiada mepukat ap pil kapwaiada me tei kan. <sup>43</sup>Suedi ong komail Parisär akan, pwe komail men mondi leppantam nan sinakoke kan o mauki, ren ranamau ong komail nan wasa en netinet akan. <sup>44</sup>Suedi ong komail, pwe komail rasong sousou kan, me so sansal, o ara-

mas alialu poa, ap sasa ir!<sup>45</sup> Saunkawewe men ap sapeng potoan ong i: Saunpadak, komui pil kin suede kin kit masan pukat.<sup>46</sup> A i kotin masani: Pil suedi ong komail saunkawewe! Pwe komail kin katoutou kila kapwa en wisik toutou aramas akan, ap sota sairki sondin pa omail.<sup>47</sup> Suedi ong komail! Pwe komail kin apapwali sousou en saukop akan, a sam omail akan kame ir ala.<sup>48</sup> Komail ari kin kadede o peren kida wiawia en sam omail akan. Pwe re kame ir ala, a komail apapwali ar sousou kan.<sup>49</sup> I me erpit en Kot indada: I pan kadar wong irail saukop o wanporon akan, a akai irail re pan kamela o pwaki irail sili.<sup>50</sup> Pwe ntan saukop akan, me kapwilip-wili weier sang ni tapin kaua kokodo, en kapokon ong di wet.<sup>51</sup> Sang ntan Apel lel ntan Sakarias, me kamelar nan pung en pei sarau i im en kaudok, ei I indai ong komail, a pan kapokon ong di wet.<sup>52</sup> Suedi ong komail saunkawewe! Pwe komail atia sang men kapir pan lolekong. Komail sota pan pedelong, ap inapwiedi, me men pedelon ong.<sup>53</sup> A ni a kotin mamasani ong irail mepukat, saunkawewe o Parisär akan ap tapiada palian i kaulap, kalekalelapok re a song toto,<sup>54</sup> O re masamasan i, o raparapaki, ma re sota kak diar meakot sang ni a masan akan, pwe ren kadipa i.

## 12

<sup>1</sup> ARAMAS toto ap pokon pena lao kidalar, irail lao it pena, i ap kotin tapiada masani ong sapwilim a tounpadak kan: Komail kalaka kalep en Parisär akan, me malaun.<sup>2</sup> Pwe sota me rir kot, me sota pan sansalada. Pil sota me okiok kot, me so pan kalok sili.<sup>3</sup> Ari, me komail pan indada ni wasa rotorot, i me pan sansal nan marain. O me komail pan monginingin nan pera kan, i me pan kalok sili pon im akan.<sup>4</sup> A I indai ong komail, kompok pai kan, komail der masak irail, me kin kamela pali war, ap solar kak wia meakot.<sup>5</sup> A I pan kaasa kin komail, me komail en masak: Masak i, me manaman ong kamela aramas ap kak kasela nan pweleko. Melel I indai ong komail, i me komail en masak.<sup>6</sup> Siok limen sota kin netila ni denar riau? Ari so, sota amen irail me Kot kin maliela.<sup>7</sup> Ari, pil pit en mong omail karos me wadawad penaer. Komail ari der masak, pwe komail me mau sang siok toto.<sup>8</sup> A I indai ong komail, meamen ponasa ia mon aramas, i me Nain aramas pan ponasa ren tounlang en Kot akan.<sup>9</sup> A meamen kamam kin ia mon aramas, i me pan kamamaki mon tounlang en Kot akan.<sup>10</sup> O meamen me pan lokaia sued duen Nain aramas, a pan kak lapwada. A me lalau Ngen sarau i, a sota pan lapwada.<sup>11</sup> A ma re pan wa komail la nan ar sinakoke kan mon

kapung o ren me manaman akan, komail depa lamelame, da me komail pan sapengki de me komail en inda.<sup>12</sup> Pwe Ngen sarau i pan kapame kin komail ni klok ota, me komail en inda.<sup>13</sup> A amen toun pokon potoan ong i: Saunpadak, kom kotin masani ong ri ai ol o, en nek pasang at soso.<sup>14</sup> A kotin masani ong i: Aramas o, is me kasapwil ia da, en saunkapungla o saunnene re oma?<sup>15</sup> O kotin masani ong irail: Kalaka norok sued, pwe kaidin kapwa toto, me aramas amen kin memaur kida!<sup>16</sup> A kotin masani ong irail karaseras eu: Ol kapwapwa amen mia, me sap we kaparapar kaulap.<sup>17</sup> I ari lamelame indada: Da me i en wiada? Pwe solar wasa en nekinek ia ai kapwa kan.<sup>18</sup> I ari indada: Nan iet me i pan wiada: I pan palang pasang ai im en nak kan, ap kauada me laude sang kai; i wasa me i pan nekidala me wosadang ia o ai dipisou karos;<sup>19</sup> A i pan indang ngen i: Ngen i, dipisou toto ong par toto, me nekineki ong uk er. En moleilei, o manga, o nim o perenta!<sup>20</sup> A Kot ap masani ong i: Pweipwei men koe, pwe pongpong wet ngen om pan ilakido. A is me pan aneki kapwa pukat, me koe nanak penaer?<sup>21</sup> Nan iduen me kin roporop pena dipisou ong pein i, ap sota kapwapwa ren Kot.<sup>22</sup> A a kotin masani ong sapwilim a tounpadak kan: I me I indai ong komail, eder lamelame maur omail, me komail pan tungole, pil iermen pali war, me komail pan likauki!<sup>23</sup> Maur me kasampwal sang manga, o war me mau sang likau.<sup>24</sup> Kalelapok ong rape kan! Re sota kin kamorok, re pil sota kin nak pena, pil sota arail pera de im en nak, a Kot kin kotin katungole ir. A komail so kasampwal sang manpir kaulap?<sup>25</sup> A is nan pung omail, ni a ngongki, me pan kak use pasang pein i ki tipong en pa eu?<sup>26</sup> Ari, ma komail sota kak ong wiada me mangai, a da me komail kin ngongki okotme?<sup>27</sup> Kalelapok ong kiop akan, me mi nan sap, duen ar kakairida! Re sota kin dodok, o re sota kin monkol pena. A I indai ong komail, pil Salomo ni a lingan karos sota a likau dueta apot irail.<sup>28</sup> Ari, ma iduen Kot kotin kapwataki dip, me mi nan sap ran wet, a lakap pan lokidokila nan stop, i aduen a sota pan madang kalikauwiada komail, me poson tikitik?<sup>29</sup> A komail, ender ngongki, me komail pan manga o nim, o komail der insensued!<sup>30</sup> Pwe mepukat men liki kan kin ngongongki. Pwe Sam omail, me kotikot nanlang, mangi, me mepukat karos mau ong komail.<sup>31</sup> A rapaki sapwilim a wei, a mepukat pan pousalang komail.<sup>32</sup> Der masak pwin tikitik koe, pwe iet kupur en Sam omail: En ki ong komail wei o.<sup>33</sup> Netikila omail kapwa kan, ap kisakisa wei, wi ai ong komail ed ko, me sota pan maringala, o pai nanlang, me so pan pan ola,

wasa me lipirap men so kak ong, o man en mot so kak kawela ia. <sup>34</sup> Pwe wasa omai pai mi ia, iei wasa mongiong omai pil kin mia, <sup>35</sup> Nan luke pamail en katengteng pena o omai ser en isis <sup>36</sup> O komail en dueta aramas akan, me auiaui ar monsap ni a pan kodo sang kamadip en papaud, pwe i lao kodo letelet, re en madang ritingada mo a. <sup>37</sup> Ladu ko meid pai, me monsap o ni a pan pwarado, diar ar masamasan. Melel I indai ong komail, a pan kaiada a likau o kamod irail edi ong manga, ap pan apapwali irail. <sup>38</sup> O ma a pwarado ni auer kariau, de kasilu, ap diar ir masamasan, nan meid pai ladu pukat. <sup>39</sup> A komail en asa, ma kaun pan im o asaer ansaun lolap o pan pwarado, a pan masamasan o so pan muede ong, im a en kulia sang. <sup>40</sup> Komail ari pil ononop, pwe Nain aramas pan pwarado niansau me komail sasa. <sup>41</sup> Petrus ap potoan ong i: Maing, re kotin masani dong kit karaseras wet, de ong irail karos? <sup>42</sup> A Kaun o kotin masani: Ari is saunkoa lelapok o lolekong, me a monsap kasapwilada, en kaunda a ladu kan, pwen nek ong irail kan ar manga ni ansau me kon on? <sup>43</sup> Meid pai ladu o, me a monsap pan diarada wiawia duen met ni a pan pwarado! <sup>44</sup> Melel I indai ong komail, a pan kasapwiladang i pon a dipisou karos. <sup>45</sup> A ma ladu o pan lamelame nan mongiong i: Ai monsap pwapwand, o a pan tapiada kame ladu o lidu kan, o manga o nim, o kamom sakau, <sup>46</sup> Monsap en ladu o ap pan pwarada do ni ran o, me a so auiaui i, o ni auer, me a sasa, o a pan lepuk pasang i, o kasapokalang nan pung en me soposon akan. <sup>47</sup> A ladu o, me asa kupur en a monsap, a sota kaonopada pein i, pil sota wiada kupur a, nan i me pan kamekam kaulap. <sup>48</sup> A me sasa, ap wiadar me mau ong kalokolok, nan i me pan kalokolok tikitik. Pwe me aleer me toto, i me pan kida me toto; o me koaki me toto, pan purokido me toto. <sup>49</sup> I kodon saundi kisiniai sappa, a da me I en wiada, ma a saundier? <sup>50</sup> A mas I pan paptaise kila paptais eu; I ap patau kila melel, a lao daulier. <sup>51</sup> Komail lamelame, me I kodon ki ong sappa popol? I indai ong komail: So! A pwen kumuei suedala. <sup>52</sup> Pwe sang met kokola limen toun im eu pan liak toror pasang; silimen pan palian riamen, o riamen pan palian silimen. <sup>53</sup> Sam pan palian na putak, a putak o pan palian sam a; in pan palian na seripein, a seripein pan palian in a; a li amen pan palian na ol a paud, o en na ol a paud pan palian li o. <sup>54</sup> A kotin masani ong pokon o: Komail lao udial dapok sang kapin lang, komail kin inda: A pan katau; o a pan pwaida <sup>55</sup> O ma komail kin kilang ang a usang ni pali air, komail kin inda: A pan karakar; o a pan wiaui. <sup>56</sup> Malaun komail! Komail asa kasau mas en sappa o

lang, a da me komail sasaki kasauida ansau wet? <sup>57</sup> A da me pein komail sota kasauia kida me pung? <sup>58</sup> A ma koe pan iang me palian uk kolang kapung o, en nantiong pon al o, en kapungala re a, pwe a de pang uk alang saunkapung, a saunkapung pang uk ala ren silepan imateng, a silepan imateng pan kase uk ala nan imateng. <sup>59</sup> I indai ong uk: Koe sota pan koda sang wasa o, koe lao kapungala lua karos.

### 13

<sup>1</sup> NI ansau o akai mia, me potoan ong i duen men Kalilaa kai, me Pilatus doleki nt' arail ar mairong. <sup>2</sup> A kotin sapeng masani ong irail: Komail kiki ong, me men Kalilaa pukat me dipan akan mon men Kalilaa tei kan, pweki ar kalokolok o? <sup>3</sup> Ngai, me indai ong komail: So! A ma komail sota pan kalula, komail karos pan mela dueta. <sup>4</sup> De irail ekwalemen ko, me im en ruk en Siloa pupedi ong poa, kame ir ala, komail kiki ong, me irail me sued sang aramas akan, me kaukauson Jerusalem? <sup>5</sup> Ngai me indai ong komail: So! A ma komail sota pan kalula, komail karos pan mela dueta. <sup>6</sup> A kotin karaseras ong irail masani: Aramas amen mia, me a tuka pik apot padedi nan a mat en wain, ap kodon rapaki wa, a sota me a diarada. <sup>7</sup> A ap indai ong saumat en wain: Kilang, par silu i kodon rapaki wan pik pot et, a sota, me i diarada; paledi, da me a pinaki mal wasa o! <sup>8</sup> A a sapeng indang i: Maing, pui sang pil par wet, pwe i en weirada ni tapi, o ki ong pwel mau. <sup>9</sup> A ma a pan wa, ari me mau, a ma so, komui ap pan paledi sang. <sup>10</sup> A kotin padapadak nan sinakoke eu ni ran en sapat. <sup>11</sup> A kilang, li amen mia, me ngen en somau ti poa par ngaulwalu, a kos pena o sota man kak uda. <sup>12</sup> Iesus lao kotin masani i, ap molipei wong i masani ong i: Li, koe en maioda sang om somau! <sup>13</sup> I ap kotin pwil po a lim a kan, i ari madang kasinenda, kapikapinga Kot. <sup>14</sup> A saumas en sinakoke o makara kida pan Iesus a kakekada i ni ran en sapat, ap sapeng indang pokon o: Ran wonu, aramas en dodok, i ansau me komail kodon kakekada, a iermen ni ran en sapat! <sup>15</sup> Kaun o ap kotin sapeng i masani: Malaun koe, kaidin komail karos kin lapwada kau o esel sang deu a kalualang nim pil ni ran en sapat? <sup>16</sup> A li men et, me nain Apraam seripein, me Satan saliedi par ngaulwalu, me so mau, en lapwada ni ran en sapat? <sup>17</sup> Ni a kotin masani mepukat, karos me palian i, ap namenokala o aramas karos peren kida wiawia mau kan karos, me wiaui pa a. <sup>18</sup> A a kotin masani: Wein Kot rasong da? O da me I en karasai ong i? <sup>19</sup> A rasong wantuka eu, me aramas amen kasela nan matuel ap wosada, wiala tuka kalaimun pot, o manpir



en pan lang kaukausion nan ra kan. <sup>20</sup> A pil kotin masani: Da me I en karasai ong wein Kot? <sup>21</sup> A rasong kalep kis, me li amen ale, okila nan kasak en plaua silu, karos lao mutala. <sup>22</sup> Ni a kotilang Ierusalem, a kotin padapadak sili nan kanim laud o tikitik kan. <sup>23</sup> Amen ap potoan ong i: Maing, me malaulau pan maurela? A kotin masani ong irail: <sup>24</sup> Ngiangi en pedelong ong nan wanim tätik, pwe I indai ong komail, me toto pan sosong pedelong ong, a sota pan kak. <sup>25</sup> A kaun pan im o lao udar ritingidier wanim o, komail ap pan pikikidi letelet ni wanim o indada: Maing, ritingida sang kit! A ap pan sapeng indang komail: I sasa komail, o wasa me komail ko sang ia. <sup>26</sup> Komail ap pan pikikidi indada: Kit me manga o nim imp omui, o komui pil kaukawewe nan atail al akan. <sup>27</sup> A i me pan inda: I indai ong komail, I sasa komail o wasa komail ko sang ia, ko wei sang ia, komail karos me wiawia sued. <sup>28</sup> Sangesang o teterok ap pan wiaui, komail lao kilang Apraam, o Isaak, o Iakop, o saukop akan karos nan wein Kot, a komail pisikonla sang. <sup>29</sup> Nan re pan kodo sang nan mas en lang, o sang nan kapin lang, o sang nan apang, o sang air en lang, o re pan mondi ni tepel nan wein Kot. <sup>30</sup> A kilang, me pwand akai mia, me pan madang, o me madang kai mia, me pan pwand. <sup>31</sup> Ni auer ota Parisär akai kodo indai ong i: Koti wei sang met, pwe Erod pan kame komui la. <sup>32</sup> A kotin masani ong irail: Komail u kowei, indai ong poks ota: Kilang I kin kause wei tewil oko o kamakamaureda ran wet o lakap, a ni kasilu en ran I pan imwisokela. <sup>33</sup> I en kokola ran wet, pil lakap, pil pali, pwe sota saukop amen me pan kamela likin Ierusalem. <sup>34</sup> Ierusalem, Ierusalem, me kin kamela saukop akan o kasuk, me pakadara dong uk, pan pak toto I men kapokon pena noum seri kan dueta lituk amen kin kompwal pena na kan pan pa a, a komail kanger, <sup>35</sup> Kilang, im omail pan tanla, pwe I indai ong komail, komail solar pan kilang ia, lao a pan pwaida omail pan inda: Kapinga ong me kotido ni mar en Kaun!

## 14

<sup>1</sup> KADEKADEO ni a kotilong ong nan im en kaun pan Parisär amen, pwen konot ni ran en sapat; a irail masamasan i. <sup>2</sup> A kilang, aramas amen mia wasa o, me lisongepo. <sup>3</sup> Iesus ap kotin sapeng masani ong saunkawewe o Parisär akan: Me pung, en kaketada ni ran en sapat? <sup>4</sup> Irail nenenla. I ap kotin sair i, kaketada o kadara wei. <sup>5</sup> Ap kotin sapeng masani ong irail: Is re omail, me na as de kau pupedi ong nan por o, me so pan madang apiada sang ni ran en sapat? <sup>6</sup> A irail sota kak sapengki i meakot.

<sup>7</sup> A kotin masani ong toun kapar karaseras eu, ni a kotin mangi, me re inong iong en mondi ni tapin tepel, masani ong irail: <sup>8</sup> Koe lao pan luke dong kamadip en kapapaud ren meamen, ender mondi ong leppantam, pwe ele amen, me lapa sang koe lukedor. <sup>9</sup> O me luk uk edo o pil i, pan kodo indai ong uk: Ki ong ol men et deu om! A koe pan namenok kodido ong nan roulap. <sup>10</sup> A koe lao paluke, kola mondi ong nan roulap, pwe me luke uk lao pwarado, en indai ong uk: Kompoke pai, kotidato! Koe ari pan kaindand nan pung en ir, me iang uk ni tepel. <sup>11</sup> Pwe karos me kin kasapwilada pein i, pan kasapwilidi, o me kin kasapwilidi pein i, pan kasapwilada. <sup>12</sup> Ap pil kotin masani ong me lukedo i: Kom lao wiada konot en ni saus de nin sautik, eder lukedo kompokepa om ko, de ri om akan, de sau om, de men imp om kapwapwa kan, pwe re de pil luke uk, o depuk ong uk. <sup>13</sup> A ma koe pan wia kamadip, en lukedo me samama o me pali duk kai, o me sikilikil, o me maskun akan. <sup>14</sup> Koe ari pan meid pai, pwe irail sota pan kak depuk ong uk, a a pan depuk ong uk ni ran o, me pung kan pan maureda. <sup>15</sup> A amen ir, me iang ni tepel o lao rongadar mepukat, ap potoan ong i: Meid pai, me pan sak prot nan wein Kot. <sup>16</sup> A a kotin masani ong i: Aramas amen mia, me wiadar kamadip lapalap o luke pena me toto. <sup>17</sup> O kadarala na ladu o ni dokan kamadip, pwen kaire kin irail, me pan toun kapar: Komail ukedo, pwe meakoros onoper. <sup>18</sup> Irail ap wiaki eu ikidiki okotme. Men mas indai ong i: I netiada sap eu, i pan kola kilang; i poeki re om, koe en kadar ia la. <sup>19</sup> A amen inda: I pwainda kau ol ek, a met i pan kola kilang ir; i poeki re om, koe en kadar ia la. <sup>20</sup> A amen inda: I paudeki li amen, i me i sota kak kokila. <sup>21</sup> Ladu o ari purodo, kaireki a monsap meakan. Monsap o ap makara kidar indai ong a ladu: Tange wei nani al laud o al tikitik en kanim o wado me samama kan, o me pali duk, o me sikilikil, o me maskun akan. <sup>22</sup> A ladu o indada: Maing, a wiauier duen omui masan, a deun akai pil mia. <sup>23</sup> Monsap o ap indai ong a ladu: Kakan sili nani al o ni kailan kel akan, papain ir do, pwe im ai en tounla! <sup>24</sup> A i indai ong komail, nan sota amen ren ol oko, me paluke, pan song ai kamadip. <sup>25</sup> A pokon kalaimun idauenla i. I ari saupei ong irail masani: <sup>26</sup> Meamen kodo re i, ap so maliela sam a, o in a, o a paud, o na seri kan, o ri a ol, o li akan, o pil pein maur a, nan a sota pan kak ai tounpadak. <sup>27</sup> A meamen so kida a lopu o idauen ia do, a sota pan kak ai tounpadak. <sup>28</sup> Pwe is re omail, me pan kauada im en taulik eu, me sota pan mondi mas ap lamelame duen pwain a, ma a pan kak ong de so? <sup>29</sup> Pwe a de pasonedi,

ap sota kak kanikiela; a karos, me udial, pan kaurureki i, <sup>30</sup> Indada: Aramas men et pikikidi kauada im, ap sota kak kanikiela. <sup>31</sup> De is nanmarki o, me pan mauin ong amen nanmarki, me sota pan mondi mas ap lamelame, ma a pan kak kaloekidi aramas nen aramas rianen? <sup>32</sup> A ma so, a pan kadarala men kadarakai, poekipoeki muei mau ni ara non doo pasang. <sup>33</sup> Nan iduen amen amen komail, me so muei sang meakaros, nan a sota pan kak ai tounpadak. <sup>34</sup> Sol me mau, a ma sol sarasang, da me a pan kanomanom mau kida? <sup>35</sup> A solar mau ong nan sap, pil so nan pwel, pwe aramas kin kasela. Me salong a mia men rong, i en rong!

## 15

<sup>1</sup> A SAUNOPWEI o me dipan akan karos ap kai dong i pwen rong i. <sup>2</sup> A Parisar o saunkawewe kan lipaned indada: Ol men et kin kompokeki me dipan akan o iang irail sakasak. <sup>3</sup> A a kotin masani ong irail karaseras wet: <sup>4</sup> Is aramas re omail me na sip epuki, a ma amen irail salongalar me so pan pwilikidi ir duekduemen nan wel ap raparapaki me salongalar, lao a pan diarada i? <sup>5</sup> A lao diarada i, a kidang pon pop a pereperen. <sup>6</sup> A lao pure dong deu a, a kin eker pena kompokepa kan o men imp a kan indai ong irail: Komail iang ia perenda, pwe i diadarar nai sip me salongalar. <sup>7</sup> I indai ong komail, nan iduen peren pil pan mi nanlang pweki me dipan me ta men, me kalula, sang duekduemen me pung ap sota mau ong kalula. <sup>8</sup> O is li o me na denar eisok, eu ap salongala sang, me so pan isikada lamp o koke im o, o raparapaki mau, lao a pan diarada? <sup>9</sup> A lao diadarar i, a kin eker pena kompokepa kan o men imp a kan indai ong irail: Komail iang ia perenda, pwe i diarada ai denar o, me salongalar. <sup>10</sup> Nan I indai ong komail, iduen peren mi ren tounlang en Kot akan, pweki me dipan me ta men, me kalula. <sup>11</sup> A kotin masani: Aramas amen mia, me na ol riamen. <sup>12</sup> A me tikitik re 'ra indai ong sam a: Sam ai, kotiki dong ia pwais ai en soso, me udan ai. I ari nene ong ira ara dipisou kan. <sup>13</sup> A murin ran akai me tikitik ren ol oko ki pena a dipisou karos, ap sailokalang sap doo, wasa a kasela mal a kapwa kan nin tiak sued. <sup>14</sup> A lao kamuse weita a kapwa karos, lek lapalap ap pwaida sap o, i ari dupokalar. <sup>15</sup> I ap koieila dodok ren me pweledan sap o men. I ap kadarala i, pwen kamanga na pwik kan. <sup>16</sup> I ari inong iong, kangkang wantuka kai, me pwik kin namenam, a sota me mueid ong i. <sup>17</sup> A kadekadeo i lao lolekongalar, ap indada: Ladu me depa mi ren sam ai, me kan ar manga me rak, a ngai pan mekila so kan ai manga. <sup>18</sup> I pan uda purela ren

sam ai indai ong i: Sam ai, i wiadar dip ong nanlang o ong komui. <sup>19</sup> I solar warong adaneki noumui putak, komui ari wia kin ia ladu 'mui men. <sup>20</sup> I ari uda purela ren sam a. A ni a mi wasa doo, sam a kilangada i, ap pokela, pitipiti dong i o polodi i, metik i. <sup>21</sup> A putak o indai ong i: Sam ai, i wiadar dip ong nanlang o ong komui, i solar war ong adaneki noumui putak. <sup>22</sup> A sam masani ong na ladu kan: Wado likau kasampwal o kalikauwia kida i, o ki ong ring ni sondin pa a, o sut ni na a kan. <sup>23</sup> O wado kau pul wi o kamela, pwe kitail en kang o pereperen. <sup>24</sup> Pwe nai putak men et melar ap mauredar, a salongalar ap diarokadar. Irail ari perendar. <sup>25</sup> A na putak laud mi nan sap o. Ni a pure dong koren iong im o, ap rongadar kakaul o kakalek, <sup>26</sup> Ap kalelapok ren ladu men duen ar wiawia. <sup>27</sup> A indang i: Ri omui ol puredo, sam omui ap kamela kau pul wi o, pwe a diadarar i memaur o kelail. <sup>28</sup> A ap makara kida o sota men pedelong, sam a ap pedoi dong re a poekipoeki. <sup>29</sup> A a sapeng indang sam a: Kom mangi, par toto me i papa komui, o i saikenta kawela eu omui masan akan, a kom sota kotiki ong ia kisin kut amen, i en kamadipeki kompoke pai kan. <sup>30</sup> A noumui putak men et lao kodo, murin a kamuse wei a dipisou ren me sued akan, komui ap isik ong i kau pul wi o. <sup>31</sup> Sam a ap masani ong i: Nai seri, koe kin mimieta re i ansau karos, o ai meakaros me om. <sup>32</sup> Me mau, koe en peren o insenemau. Pwe ri om ol men et melar, ap mauredar, a salongalar ap diarokadar.

## 16

<sup>1</sup> A PIL kotin masani ong tounpadak kan: Ol kapwapwa men mia, me a saunkoa men indandeki, a peitlakit a koa kapwa kan. <sup>2</sup> I ari eker dong i indang i: Iaduen ai rongadar duen koe? Kaineneta noum kisin likau duen om dodok! Pwe koe solar kak saunkoa. <sup>3</sup> Saunkoa ap madamadaua indada: Da me i en wia, pwe ai monsap pan ki sang ia ai koa, nan i sota kak weweir, a poekipoeki me i namenokki. <sup>4</sup> I ap asada, me i pan wia, i lao sapwilidi sang ai koa, pwe irail en kasamo ia long ong nan im ar akan. <sup>5</sup> I ari ekeredo me pwaipwand ong a monsap, ap idok ren men mas: Da me om pwaipwand ong ai monsap? <sup>6</sup> A anda: Potel en le epuki. A indai ong i: Ale noum puk mondi pitipit intingiedi me limeisok! <sup>7</sup> Ap pil indai ong amen: A koe, da me om pwaipwand? A anda: Kopa en wan korn epuki. A indang i: Ale noum puk intingiedi me waleisok! <sup>8</sup> Monsap ap kapinga saunkoa sapung, pweki a dodok lolekong. Pwe seri en sappa kan me lolekong ni song ar sang seri en marain akan. <sup>9</sup> I ap indai ong komail, komail wia kompoke pamail

ki mamon sapung pwe komail lao samamalar, ren kasamolong ong nan deu potopot. <sup>10</sup> Meamen apwali mau me tikitik o, nan i me pil kin apwali mau me lapalap. A me kin sapung ni me tikitik o, nan i me pil sapung ni me toto. <sup>11</sup> Ma komail sota apwali mau pai pali pa, is me pan liki ong komail pai pali poa? <sup>12</sup> O ma komail sota apwali mau en amen a kapwa, is me pan liki ong komail me udan omail? <sup>13</sup> Sota ladu men me pan kak papa saumas riamen; pwe a pan kailongki amen o pok ong me teio. De kasampwaleki amen o mamaleki me teio. Komail sota pan kak pariai pena Kot o mamon. <sup>14</sup> Parisär akan, me kin pok ong moni, pil rongadar mepukat, ap kaurureki i. <sup>15</sup> A kotin masani ong irail: Nan komail me kin akapungki pein komail ren aramas, a Kot kin mangi nan mongiong omail. Pwe me kasampwal ren aramas, kin me mal ren Kot. <sup>16</sup> Kapung o saukop akan kokoper lel ni muein Ioanes. A sang ni ansau o rongamau en wein Kot kin lolok sili, a karos kin pedelongki manaman. <sup>17</sup> Nan me mongai, lang o sappa pan sorela, sang ekis kisan kapung en lokidokila. <sup>18</sup> Meamen kasela a paud, ap paudeki amen li, nan i me kamal, o meamen me paudekida me lokidokila sang ren ol amen, nan i me kamal. <sup>19</sup> Ol kapwapwa men mia, me a likau waitata o materok o a kin kamadip o peren ni ran karos. <sup>20</sup> O pil amen ol me samama, ad a Lasarus, me kin wonon pan wanin en ol kapwapwa o; a kensela kili karos. <sup>21</sup> Ap men tungole maremor akan, me kin pupedi ni tepel en me kapwapwa; a kidi kan kin tamotamo a kens akan. <sup>22</sup> A kadekadeo me samama o mela o tounlang kai ap wadala pon kapa en Apraam. A me kapwapwa o pil mela o saredier. <sup>23</sup> Ni a mi nan pweleko, wasan waiwairok, ap sarada, udial Apraam ni wasa doo o Lasarus mondi pon kapa, <sup>24</sup> Ap likwirda indada: Sam (ai) Apraam, kom kotin kupura ia, poronedo Lasarus en kaduedi sondin pa a nan pil, ki ong pon lo i, pwe i kin waiwairok nani iai wet. <sup>25</sup> A Apraam kotin masani: Nai, tamanda, me koe tungoler om mau kan karos ni maur om, a Lasarus a me sued akan; ari a pan pereperenta, a koe pan kalokolok. <sup>26</sup> A pil eu me kawela, wau kalaimun eu mi nan pung atail, pwe ma amen kit men sapale wong re omail, a sota pan kak, pil sota amen komail pan kakedo. <sup>27</sup> A ap inda: I ap men poeki, sam ai, komui en kotin poronelang Lasarus nan im en sam ai. <sup>28</sup> Pwe ri ai ol me limen, me a pan kaasaki irail; pwe ren de lel ong wasa apwal wet! <sup>29</sup> A Apraam masani ong i: Moses o saukop akan mi re 'rail, ren nok rong irail. <sup>30</sup> A ol o potoan ong: Kaidin sam (ai) Apraam, a ma amen sang ren me melar akan pan pwara dong irail, rap pan

kalula. <sup>31</sup> A ap masani ong i: Ma re sota pan rong Moses o saukop akan, re pil sota pan poson la, ma amen pan maureda sang ren me melar akan.

## 17

<sup>1</sup> A KOTIN masani ong sapwilim a tounpadak kan: Nan a sota kak, men kamakar kan en so pwaida, a suedi ong me kokido. <sup>2</sup> A mau ong, takai en ir plaua eu en paudoki ong ni tapin wor a, ap lokidokila nan madau, sang a kamakar amen tikitik pukat. <sup>3</sup> Kalaka pein komail! Ma ri om ol wia dipi ong uk, en kapung ong i, a ma a pan kalukila, maki ong i. <sup>4</sup> A ma a wia dipi ong uk pan isepak ni ran eu o pure dong uk pan isepak indada: I kalula, koe en maki ong i! <sup>5</sup> A wanporon akan potoan ong Kaun o: Re kotin kalaudela at poson! <sup>6</sup> A Kaun o kotin masani: Ma omail poson laudi ong wan katiring, komail pan kak indai ong tuka pik pot et: Kaisang, kasau ong nan madau, a pan oke komail. <sup>7</sup> A is re omail, me a ladu men, me kin matimat o kamakamanga man akan, pan indang i ni a puredo sang matuel o: Madang kodo mondi o manga? <sup>8</sup> A sota pan indang i: Kaonopada me i pan manga nin sautik o, kaiada om likau, papa ia, lao i mangaer o nim, a muri koe pan manga o nim. <sup>9</sup> De a pan danke ladu pweki a wiada, me a masani ong i? I lamelam so. <sup>10</sup> Pil dueta komail, komail, lao wiadar meakan me kakaliki ong komail er, komail ap pan inda: Kit ladu mal, pwe i eta, me se wiadar, me kakalik ong kit er. <sup>11</sup> Kadekadeo ni a kotilang Ierusalem, a kotin weid nan wein Samaria o Kaliläa. <sup>12</sup> O ni a kotin kotilang ong nan kisin kanim eu, ol tuketuk ek tu ong i, me udi ong kaila wei. <sup>13</sup> Irail ngil laudeda indada: Maing Iesus, kupurai kit! <sup>14</sup> A lao kotin masanier, ap masani ong irail: Komail koieila kasansale ong pein komail ong samero kan. Kadekadeo ni arail kokola irail kelailada. <sup>15</sup> A amen irail ni a kilanger me a kelailadar, ap puredo ngil laudeda, kapikapinga Kot. <sup>16</sup> O poridi sang aluwilu a, danke i; ari, i men Samaria men. <sup>17</sup> Iesus kotin sapeng masani: Kaidin me ek, me kelailadar, a ia me duemen oko? <sup>18</sup> Sota me pure dong kapinga Kot, ol en liki men et eta? <sup>19</sup> A masani ong i: Uda ko wei, om poson me kakel uk ada! <sup>20</sup> Parisär akai lao kalelapok re a: Dokan da me wein Kot pan pwaida? A kotin sapeng masani: Nan wein Kot sota kin sansal kokodo. <sup>21</sup> Irail sota pan indada: Kilang met, de kilang monen, pwe kilang, wein Kot mi lol omail. <sup>22</sup> A kotin masani ong sapwilim a tounpadak kan: Ran oko pan kodo, me komail pan men kilangada ran eu en Nain aramas, a komail sota pan kak kilang. <sup>23</sup> Irail pan indai ong komail: Kilang monen, de kilang met! A der kola

o der idauen ir ala! <sup>24</sup> Pwe duen liol kin lingaling sang apali en lang lel pali teio en lang, iduen Nain aramas ni a ran o. <sup>25</sup> A mas a pan kalokolok toto o lokidokila ren di wet. <sup>26</sup> O duen a wiawi ni muein Noa, iduen a pan wiawi ni ran oko en Nain aramas: <sup>27</sup> Irail manga, irail nim, irail papaud, irail kapapaud, lao lel ran en Noa a pedelong ong nan war im o, o nolik pwaida kamom ir ala karos. <sup>28</sup> Pil dueta ni muein Lot: Irail manga, irail nim, irail netinet, irail sapisap, irail kauadar im, <sup>29</sup> A ni ran o, me Lot koiei sang Sodom, kisiniai o swepel ap moredi sang nanlang, kame ir ala karos. <sup>30</sup> Nan iduen a pan wiawi ni ran, me Nain aramas pan sansaledo. <sup>31</sup> Ni ran o meamen mi pon im, o a kapwa mi nan im, a ender kodi ong ale. O pil dueta me mimi nan sap, i ender puredo. <sup>32</sup> Tamatamanda en Lot a paud! <sup>33</sup> Pwe meamen kakanai ong maur a, pan pupe sang, a me pan kasela, nan i me pan maureta. <sup>34</sup> I indai ong komail, ni pong ota ol riamen pan wonon pon pet eu, amen pan peuka sang, a me teio pan mimieta. <sup>35</sup> Li riamen pan iris pena plaua, amen pan peuka sang, a me teio pan mimieta. <sup>36</sup> Ol riamen pan mi nan sap, amen pan peuka sang, a me teio pan mimieta. <sup>37</sup> Irail sapeng potoan ong i: Ia Maing? A kotin masani ong irail: Wasa me man mat mi ia, nan i wasa pwin ikel pan pil pokon pena ia.

## 18

<sup>1</sup> A PIL kotin masani ong irail karaseras eu, me ren poden kapapak o der pangada. <sup>2</sup> A kotin masani: Saunkapung amen mi nan kanim eu, me sota lan Kot, o sota insenoki aramas amen. <sup>3</sup> A li odi men mi nan kanim ota, me poto dong i potoan ong: Kom kotin sauasa ia ong me kailong kin ia! <sup>4</sup> A a kang mas o, a kadekadeo a mongemongeloleki: Nan i sota lan Kot, o pil sota insenoki aramas, <sup>5</sup> A pweki li odi men et a kadiropa ia, i pan sauasa i, pwen der purodo kadiropa ia. <sup>6</sup> Kaun o ap kotin masani: Komail rong, me saunkapung sapung indada! <sup>7</sup> A iaduen Kot, a sota pan kotin sauasa sapwilim a pilpildar akan, me kin likelikwir ong i ni ran o ni pong? Pala a pan kotin pwapwand? <sup>8</sup> I indai ong komail: Nan a pan madang sauasa ir. Ari so, Nain aramas lao pwarado, da, a pan diar poson ni sappa? <sup>9</sup> A pil kotin karasai ong irail me kin akapungki pein irail, ap akasapungki me tei kan: <sup>10</sup> Aramas riamen kodala ong nan im en kaudok pwen kapakap. Amen ira Parisär, a amen saunopwei men. <sup>11</sup> Parisär o kasinenda kelepela ekis wasa kapapak due met: Maing Kot, i danke ir, me i sota dueta aramas tei kan: Lolap, sapung, kamal, de dueta saunopwei men et. <sup>12</sup> I kin kaikaisole pan riapak ni wik eu o koleireki eisokkis eu en ai kapwa

karos. <sup>13</sup> A saunopwei u doo sang ekis wasa, ap sota men sarada nanlang, a a pikir maramar a indada: Maing Kot, re kotin kupura ia me dipan! <sup>14</sup> I indai ong komail, ol men et kodila deu a pungala mon me teio. Pwe me kin kasapwilada pein i, pan kasapwilidi, a me kin kasapwilidi pein i pan kasapwilada, <sup>15</sup> Irail ap wa dong i kisin seri kai, pwen kotin sair ir. A sapwilim a tounpadak kan lao kilanger, re ap kapoui irail. <sup>16</sup> A Iesus kotin molipe ir masani: Mueid ong kisin seri kan, en kodo re i! Der kalik irail edi! Pwe irail me udan wein Kot. <sup>17</sup> Melel I indai ong komail, meamen, me sota ale wein Kot rasong kisin seri men, a sota pan pedelong ong lole. <sup>18</sup> A monsap amen idok re a masani: Saunpadak mau, da me i en wiada, pwen sosoki maur soutuk? <sup>19</sup> Iesus ari kotin masani ong i: Da me koe indaki, me I me mau? Sota me mau men, Kot eta. <sup>20</sup> Koe kin asa kusoned akan: Koe der kamal; koe der kamela aramas; koe der pirap, koe der kinekine mal, kakaki sam om o in om! <sup>21</sup> I ari indada: Nan mepukat karos i kin wiawia sang ni ai tikitik kokodo. <sup>22</sup> Iesus lao mangi mepukat, ap masani ong i: Me ta kis me lua, netikila om kapwa karos, o nene ong me samama kan, a om pai pan mi nanlang, ap kodo idauen ia do. <sup>23</sup> A lao rongadar met, ap insensuede kila melel, pwe a kapwapwa kaulap. <sup>24</sup> A Iesus lao kotin masani, me a insensuedela, ap masani: Nan me apwal ong me kapwapwa kan, en pedelong ong nan wein Kot. <sup>25</sup> Pwe me mangai, kamel en tilong nan por en dikok, sang ol kapwapwa men pedelong ong nan wein Kot. <sup>26</sup> Irail me rongerong indada: Ari, is me kak ong maur? <sup>27</sup> A kotin masani: Me aramas akan so kak ong, Kot me pan kak ong. <sup>28</sup> Petrus ap potoan ong: Re kotin mangi, kit me likid maliela mekaros ap idauen la ir. <sup>29</sup> A kotin masani ong irail: Melel I indai ong komail, nan sota me likid maliela im a, de sam, de in a, de ri a ol akan, de a paud, de na seri kan pweki wein Kot, <sup>30</sup> Me so pan id aneki me lapalap ni ansau wet o ni muei kokodo maur soutuk. <sup>31</sup> A kotin ukala ekriamen ko masani ong irail: Kilang, kitail kin kodalang Ierusalem, o karos pan pwaida, me intingidier ren saukop akan duen Nain aramas. <sup>32</sup> Pwe a pan pangala ren men liki kan, pwe re pan kapikapiti i o ki sang wau i, o kondipi ong i. <sup>33</sup> O re pan woki i o kamela, a ni kasilu en ran a pan maureda. <sup>34</sup> Irail iri sota man weweki mepukat, O masan pot et me rir sang irail. Re pil sasa, me a kotin masani. <sup>35</sup> A kadekadeo ni a koren iong Ieriko, ol maskun amen momod pon kailan al, poekipoeki. <sup>36</sup> I lao rongadar pokon o me daudaulul, ap idok due. <sup>37</sup> Irail ari indang i, me Iesus men Nasaret kotin daulul. <sup>38</sup> I ari ngil laudeda potoan ong: Iesus, sapwilim en

Dawid, kotin kupura ia! <sup>39</sup> A me tióng moa kidekidaue i, en nenenla: A i ap kalaudela a poekipoeki: Sapwilim en Dawid, kotin kupura ia! <sup>40</sup> Iesus ap kotin udi ong wasa o, masani, ol o en wisike dong i. A lao koren ióng imp a, ap kotin kainoma re a. <sup>41</sup> Masani: Da me koe men, I en wiái ong uk? A potoan ong: Maing, i men potoan ngarada wasa. <sup>42</sup> A Iesus kotin masani ong i: Kilang wasa, om poson me kakel uk ada! <sup>43</sup> Ap pitipit kilangada wasa, o idauenla i, o kapinga Kot, o aramas karos, me udial met, ap kapikapinga Kot.

## 19

<sup>1</sup> I ARI kotilong ong nan kanim Ieriko, ap kotin daulula. <sup>2</sup> A kilang, ol kapwapwa men mia, ad a Sakäus, me saumas en saunopwei kan. <sup>3</sup> A men kilang Iesus, pwen asa, is i, ap sota kak, pweki pokon o, o a sakakair. <sup>4</sup> I ari tióng mo `rail, dauda nin tuka pot, pwen kak kilang i, pwe a pan kotin daulul wasa o. <sup>5</sup> A lao lel wasa o Iesus ap kotin masanda diar i, masani ong i: Sakäus, madang daudi, pwe I pan pedelong ong nan im om ran wet. <sup>6</sup> I ari madang daudi kasamo i pereperen. <sup>7</sup> Irail lao kilanger met, karos ap lipanedeki inda: A pedelonger, pwen kairu ren ol dipan amen. <sup>8</sup> A Sakäus potodo potoan ong Kaun o: Maing re kotin mangi, apali en ai kapwa i pan kisakisaki me samama kan, o ma i kotaue amen, i kin kasapal wong i pan pa pak laude sang. <sup>9</sup> Iesus kotin masani ong i: Maur me pwaro dong nan im wet ran wet, pwe a pil nain Apraam amen. <sup>10</sup> Pwe Nain aramas pwaro don rapaki o kamaureda me salongalar. <sup>11</sup> A ni ar rongadar mepukat, a pil kotin masani kareras eu, aki koren ióng Ierusalem, o re kiki ong, me wein Kot pan madang sansaleda. <sup>12</sup> A kotin masani: Ol lapalap amen kolang sap doo eu, pwen nine mar a, ap pan puredo. <sup>13</sup> I me eker pena na ladu ek, o ki ong irail paun eisok, indang irail: Komail dodokki, i lao puredo. <sup>14</sup> A na aramas akan kailongki i, kadarala mur i kaireki lang i: Se sota mauki, ol men et en kaun kit. <sup>15</sup> Kadekadeo a lao puredo, murin a aleer wei o, ap ilakelang ladu kan, me a ki ong na moni, pwen asa duen en amen amen ar kalaudelar na moni. <sup>16</sup> Men mas ap pwarado indada: Maing, omui paun kareda paun eisok. <sup>17</sup> A indang i: Meid pai ladu mau koe, aki om apapwali mau me tikitik, koe pan id kaunda kanim eisok. <sup>18</sup> O kariamen ap pwarado indada: Maing, omui paun me kareda paun limau. <sup>19</sup> A pil indang i: Koe pan kaunda kanim limau. <sup>20</sup> O pil amen pwarado indada: Maing, mangi, ietet sapwilim omui paun, me i nekidala nan lim en pudo. <sup>21</sup> Pwe i masak komui, pwe ol petik amen komui. Komui kin aleda, me kaidin komui kidier, o dolung sang, me

kaidin komui padukedier. <sup>22</sup> A indang i: Sang nan au om i pan kadeik kin uk ada ladu sued koe. Koe asaer, me ol petik amen ngai, me kin ale, me kaidin ngai kidier o dolung sang, me kaidin ngai padukidier. <sup>23</sup> Menda koe sota wala nai moni wasa kanaitik, o i lao puredo, i pan ale me udan ai iangaki moni naitik. <sup>24</sup> A indang i irail me u impa: Ale sang i paun o, ki ong ren me a paun eisok! <sup>25</sup> Irail indang i: Maing, nan a nainekier paun eisok. <sup>26</sup> Pwe I indang i ong komail, meamen, me a mia, ekis pan ko ong, a me sota a mia, nan a pwitikatik pil pan katia sang. <sup>27</sup> A ir, ai imwintiti, me kang, i en kakaun ir, wa ir do, o kame ir ala mo i! <sup>28</sup> A lao kotin kaimwisokala a masan pukat, ap kotiwei kotidala Ierusalem. <sup>29</sup> Kadekadeo a lao koti dong Petpake o Petanien impan dol me ad a Oliwe, ap kotin poronela sapwilim a tounpadak riamen, <sup>30</sup> Masani: Koma ko ong nan kanim monen, koma lao pedelong, koma pan diarada esel pul amen salidi, me aramas amen saik mondi poa. Lapwada i, ap karedo! <sup>31</sup> A ma meamen pan idok re oma: Da me koma lapwa kida i? Koma ap pan inda: Kaun o men dake. <sup>32</sup> A ira me pakadara wei, ap kola o diarada, duen a kotin masani ong ira. <sup>33</sup> A ni ara lawada esel pul o, ol oko, me naineki, ap indang ira: Da me koma lawa kida esel pul en? <sup>34</sup> Ira ap indada: Kaun o men dake. <sup>35</sup> Ira ari wado ren Iesus, ap irepadi pon esel pul arail likau kan ap potoan dang Iesus poa. <sup>36</sup> Ni a kotikot kokowei, irail ap irepakidi arail likau kan nani al. <sup>37</sup> A lao kotin korendor kotidila dol Oliwe tounpadak kan karos ap wiaki eu ngil laudeda kapinga Kot, pweki manaman akan karos, me re kilanger, <sup>38</sup> Indada: Kapinga ong Nanmarki, me kotido ni mar en Kaun! Nanlang en popol o lingan wasa ileile! <sup>39</sup> A Parisär kai kisan pokon o indai ong i: Saunpadak, kotin kidaue sapwilim omui tounpadak kan. <sup>40</sup> I ari kotin sapeng masani ong irail: I indang i ong komail, ma mepukat pan nenenla, takai pan id kadededa. <sup>41</sup> A lao kotin korendor, ap masani kanim o, ap tontonireki, <sup>42</sup> Masani: O i men, koe en dedeki om ran mau wet, me pan kare ong uk popol: Ari, a rir sanger mon mas om. <sup>43</sup> Pwe ran apwal ko pan lel ong uk, me om imwintiti pan kele kin uk pena o it pena sang ni pali karos; <sup>44</sup> O irail pan kase uk ala iangaki noum seri kan, o re pan karong uk ala; sota eu takai pan mimieta pon eu, pweki om sota dedeki ansaun om kasonong. <sup>45</sup> I ari kotilong ong nan im en kaudok, ap sikon sang me netinet lole, <sup>46</sup> Masani ong ir: Nan a intingidier: Im ai im en kapakap, a komail wiaki deun lolap akan. <sup>47</sup> I ari kotin kaukawewe nan im en kaudok ran karos. A samero lapalap, o saunkawewe, o me lapalap akan ren aramas raparapaki,

en kamatala i. <sup>48</sup> A re sota kak diar, me ren wiada, pwe aramas karos apwali i kaulalap o men rong i.

## 20

<sup>1</sup> KADEKADEO eu ran ni a kotin kawewe ong aramas akan nan im en kaudok o, o padaki rongamau, samero lapalap, o saunkawewe, iangaki saumas akan ap ko dong i. <sup>2</sup> Potoan ong i indada: Masani ong kit, manaman en is, me komui wiaki mepukat? De is me ki ong komui manaman wet? <sup>3</sup> A kotin sapeng masani ong irail: I pil pan kalelapok meakot re omail, komail en sapeng ia! <sup>4</sup> En Ioanes a paptais men nanlang, de me ren aramas? <sup>5</sup> Irail ap lamelame nan pung arail indada: Ma kitail pan inda, men nanlang, a pan masani ong kitail: Da me komail so posonki i? <sup>6</sup> A ma kitail inda, me ren aramas, aramas karos ap pan kate kit, pwe re kin wia saukopki Ioanes. <sup>7</sup> Irail ari sapeng, me re sasa, wasa me a kosang ia. <sup>8</sup> Iesus ap kotin masani ong irail: Ari, I pil sota pan indai ong komail, manaman en is, me I wiaki mepukat. <sup>9</sup> A ap kotin tapiada masani ong pokon o karaseras wet: Aramas amen padukedier mat en wain eu, ap liki ong saumat akai, o kokola nan wai ansau warai. <sup>10</sup> A lao ansau, a kadaralang saumat akan ladu men, pwe ren ki ong kisan wan wain. A saumat akan woki i, o kadarala i kaip. <sup>11</sup> A murin met a pil kadarala amen ladu, a re pil woki i, o wia suedi ong, o kadarala i kaip. <sup>12</sup> A murin met a kadarala kasilimen. A re pil kame i o siken wei sang. <sup>13</sup> Monsap en mat en wain o ap masani: Da me i en wiada? I pan kadarala nai ol kompok, ele re pan masak, ni ar pan kilang i. <sup>14</sup> A saumat akan lao kilanger i, rap lamelame nan pung ar indada: Iei i, me pan ale soso, kitail pan kamela, pwen id aneki a soso. <sup>15</sup> Irail lao kasapoka sang i nan matuel o, ap kamela i. Da me monsap en mat en wain pan wiai ong irail? <sup>16</sup> A pan kodo kamela saumat pukat, ap liki ong akai a mat en wain. Irail lao ronger mepukat, rap indada: O mepukat sota pan wiaui! <sup>17</sup> A kotin saupe i wong irail ap kotin masani: Iaduen wewe en inting wet: Takai o, me sause kasapokela, id wiala takai en pukakaim? <sup>18</sup> Meamen, me pupedi pon takai wet pan ola. A me a pupedi ong poa, a pan kapitaka pasang i. <sup>19</sup> I doka n o saunkawewe o samero lapalap akan raparapaki en saikidi i. A re masak aramas akan, pwe re mui-likiada, me a karaseras kin irail. <sup>20</sup> Irail ari masamasan i o kadarala liparok kai, me pan wia kin pein irail aramas pung, pwe ren saikikidi i a masan akan ap pangalang saunkapung o manaman en kopina. <sup>21</sup> Irail ari kalelapok re a potoan ong: Saunpadak, kit potoan asa, me ar masan o padak kan

me pung, o re sota kotin kupuroki sansal en aramas. Pwe re kin kotin kaukaweweda melel duen al en Kot. <sup>22</sup> Me pung kit en nopwei ong nanmarki, de so? <sup>23</sup> A i kotin mangi ar widening, ap masani ong ir: Da me komail kasongesong kin ia? <sup>24</sup> Kasale dong ia denar eu! Mom en is o inting wet? Re sapeng potoan ong: En nanmarki. <sup>25</sup> A i kotin masani ong irail: Ari komail ki ong nanmarki, me nain nanmarki, o ong Kot, me sapwilim en Kot! <sup>26</sup> Irail ari sota kak saikikidi i a masan akan mon pokon o. Irail puriamuiki me a kotin sapeng, o nenenlata. <sup>27</sup> Sadusär akai, me kin inda, me dene melar akan solar pan maureda, ap kai dong i kalelapok re a, <sup>28</sup> Potoan ong: Saunpadak, Moses intingie dong kit, ma ri ol en amen pan mela, me a paud li dapwan men, ri a ol ap pan paudekida i, pwen kaipwi ong ri a ol na seri kai. <sup>29</sup> Ari, pwin piri en, ol isimen mia, men mas paudeki li amen, ap mela, a sota na seri ko. <sup>30</sup> A kariamen paude kida li o ap mela a sota na seri ko. <sup>31</sup> A kasilimen paude kida i, iduen ir isimen karos, re mela, ap sota nairail seri ko. <sup>32</sup> A ikmuri li o pil mela. <sup>33</sup> Ari, ni en me melar akan ar iasada, a pan en is a paud? Pwe ir isimen karos paude kida i. <sup>34</sup> Iesus kotin masani ong irail: Seri en sappa et kin papaud o kapapaud. <sup>35</sup> A me war ong ale eu sap o konodi maureda sang ren me melar akan, re sota kin papaud de kapapaud. <sup>36</sup> Pwe re pil solar kak mela. Pwe re paroki ong tounlang kan, o re seri en Kot akan, pwe re seri en kamaur. <sup>37</sup> A duen en me melar akan ar pan maureda, Moses pil kadededa, ni a udial tuka o, ni a kaadaneki Kaun o: Kot en Apraam, o Kot en Isaak, o Kot en Iakop. <sup>38</sup> Pwe Kot kaidin Kot en me melar akan, a en me maur akan, pwe karos memaur ong i. <sup>39</sup> A Saunkawewe kai sapeng indada: Saunpadak, ar masan me pung. <sup>40</sup> Irail ap solar kak peidok re a okotme, <sup>41</sup> I ari kotin masani ong irail: Iaduen ar indinda, me Kristus nain Dawid? <sup>42</sup> A pein Dawid katitiki nan puk en Psalm: Kaun o kotin masani ong ai Kaun: Mond i ong ni pali maun i. <sup>43</sup> Lao I pan wia kida om imwintiti utepan nä om. <sup>44</sup> Dawid ari wia kin i a Kaun, a iaduen a pan kak na ol? <sup>45</sup> A ni aramas karos rongadar, a kotin masani ong sapwilim a tounpadak kan: <sup>46</sup> Kalaka saunkawewe kan, me kin mauki momait sili nan likau rei rei o mauki, aramas en ranamau ong irail nan wasa en netinet akan, o men mondi leppantam nan sinako ke kan o ni tapin tepel. <sup>47</sup> Me kin ngopur im en li odi kan, liasoski kapapak rei rei, mepukat pan pangalang kadeik apwal.

## 21

<sup>1</sup> A KOTIN aupwil sili ap masani, me

kapwapwa kan kasedi ong ar mairong nan deun mairong. <sup>2</sup> A pil kotin masani, me li odi samama men kasedi ong lepta riau. <sup>3</sup> A kotin masani: Melel I indai ong komail, li odi samama men et kasedi ong laude sang irail karos. <sup>4</sup> Pwe mepukat karos kasedi ong mairong en Kot sang ni ar pai, a li men et kasedi sang ni a samama, a dipisou karos, me a naineki. <sup>5</sup> Akai lao kaskasoiadar duen im en kaudok, me kapwata kida takai kasampwal akan o kapwa en mairong kai, ap kotin masani: <sup>6</sup> Ran oko kokodo, karos, me komail ududial, pan karangk pasang, sota eu takai pan mi pon eu. <sup>7</sup> Irail kalelapok re a potoan ong: Saunpadak iad mepukat pan pwaida? O da pan kilel en mepukat pan wiaui? <sup>8</sup> A kotin masani: Komail kalaka, pwe meamen de kotaue komail! Pwe me toto pan kodo ni ad ai o pan inda: Ngai i o ansau korendor! A komail der idauen ir ala. <sup>9</sup> A komail lao rong duen mauin o mui sued, ender masak, pwe mepukat pan wiaui mas, a saikenta imwi. <sup>10</sup> A kotin masani ong irail: Toun sap eu pan u ong eu sap, o wei eu pan u ong eu wei. <sup>11</sup> O rerer laud en sap akan pan wiaui, o lek, o song en somau pan pwaida, o pil sansal kamasapwek kai, o kilel lapalap akan pan pwarada sang nanlang. <sup>12</sup> A mon mepukat re pan saik komail edi, o kame komail, o panga komail la nan sinakoke kan o imateng pwen kalualang ren nanmarki o saumas akan pweki ad ai. <sup>13</sup> A mepukat pan wiaui ong komail, pwen kadede kin ia. <sup>14</sup> Komail ari inauki ong pein komail nan mongiong omail, me komail sota pan patauki, me komail pan sapengki. <sup>15</sup> Pwe ngai me pan kalokaia komail, o kalolekongla, pwe me kailong kin komail, en sota kak kalikama, o so palian. <sup>16</sup> A sam o in omail, o ri ol akan, o sau omail, o kompokepa kan pan panga komail la, o akai komail me re pan kamela. <sup>17</sup> O aramas karos pan kailong kin komail pweki ad ai. <sup>18</sup> A sota pit en mong omail pit pan lokidikila. <sup>19</sup> Dore kila kanongama maur omail: <sup>20</sup> A komail lao udial, me saunpei kan kapili pena Ierusalem, komail ap asaki, me a ola korendor. <sup>21</sup> A me mimi Iudaa, ni ansau o, en tangdala nan nana; o me mi nan warong a, en pitila sang; o me mimi nan sap, ender purelang i. <sup>22</sup> Pwe i ansaun depuk, pwe karos, me intingidier, en pwaida. <sup>23</sup> Suedi ong me lisean o me kadidi seri ni ran oko! Pwe kalokolok pan lapalapia nan sap et o ongiong ong aramas pukat. <sup>24</sup> O re pan kame kila kodlas, o salilang wei karos, o Ierusalem pan tiak pasang ren men liki kan, lao ansau en men liki kan, pan lel. <sup>25</sup> O kilel akan pan wiaui ni katipin, o saunipong, o usu kan, o aramas nan sappa pan masak o pan pingidar, o

madau o iluk kan pan angiang ngil lauded; <sup>26</sup> O aramas akan pan okila ar masak o auiaui me pan wiaui nan sappa; pwe kel en lang akan pan mokideda. <sup>27</sup> Irail ap pan kilangada Nain aramas a kodido ni dapok ki roson o lingan kaulap. <sup>28</sup> Mepukat lao pikikidi wiaui, komail ap sarada o kasi-nenda, pwe a leler omail kamaioda. <sup>29</sup> A kotin masani karaseras eu ong irail: Kilang tuka pik o tuka karos! <sup>30</sup> Ni omail kilang me irail wiliada, komail kin asaki, me rak o me korendor. <sup>31</sup> Iduen komail, komail lao kilang mepukat lao wiaui, komail asaki, me wein Kot korendor. <sup>32</sup> Melel I indai ong komail, di wet sota pan imwila mon mepukat karos pan pwaida. <sup>33</sup> Lan o sappa pan sorela, a ai masan akan sota pan poula. <sup>34</sup> Komail ari kalaka pein komail, pwe mongiong omail de toutouki kaped en manga, o kamom sakau, o ngongongki maur et, o ran o ap madang lel dong komail. <sup>35</sup> Pwe likamata insar eu, a pan ko dong karos, me kin kakauson sappa. <sup>36</sup> Komail ari masamasan o poden kapapak, pwe komail en war ong en piti sang mepukat karos, me pan wiaui, o en pat ong Nain aramas. <sup>37</sup> Ni ran o a kotin kaukawewe nan im en kaudok o, a ni pong a kotieila kotikot pon dol o me adaneki Oliwe. <sup>38</sup> O aramas karos sangkonai pokon dong i nan im en kaudok o, pwen rong i.

## 22

<sup>1</sup> A KAMADIP en prot somut korendor, me adaneki pasa. <sup>2</sup> Samero lapalap o saunkawewe kan raparapaki, pwen kamatala i, pwe irail masak aramas akan. <sup>3</sup> A Satan tilong ong Iudas me adaneki Iskariot, me kisan ekriamen ko. <sup>4</sup> I ari koeila ren samero lapalap o saumas akan, kalelapok duen a pan pangalang ir i. <sup>5</sup> Irail ari peren kida, wiaki eu en ki ong i moni. <sup>6</sup> I ari inauki ong irail, o raparapaki, duen a pan pangalang ir i so moromorong. <sup>7</sup> Ran en prot somut ap leler, ansaun kamela pasa. <sup>8</sup> I ari poronela Petrus o Ioanes masani: U kowe, kaonopadang kitail pasa, pwe kitail en manga. <sup>9</sup> Irail idok re a: Ia wasa, re kotin kupura, sen kaonopada? <sup>10</sup> A kotin masani ong irail: Kilang, koma lao pedelong kanim o, aramas amen pan tu ong koma, me wa pakit en pil eu, idauen i nan im o, me a pedelong ong lole! <sup>11</sup> Koma ap indang kaun pan im o: Saunpadak o masanie dong komui: Ia pera en kairu, wasa I pan manga pasa ia iangaki ai tounpadak kan? <sup>12</sup> I ari pan kasale ong koma weip poa eu, me audeki men momod, i wasa koma pan kaonopada! <sup>13</sup> Ira lao koeila, ap diarada, duen a kotin masani ong ira; ira ap kaonopada pasa. <sup>14</sup> Auer lao leler, i ap kaipokedi ni tepel o wanporon ekriamen iang i. <sup>15</sup> I ap kotin masani ong irail. I anane

melel iang komail manga pasa wet mon ai pan kalokolok. <sup>16</sup> Pwe I indai ong komail, I solar pan kang sang met kokolata, a lao kapungala nan wein Kot. <sup>17</sup> I ari kotikida dal o laolaoki ap masani: Ale met, nek nan pung omail! <sup>18</sup> Pwe I indai ong komail, I solar pan nim sang kisan wan wain, wein Kot lao pwaidar. <sup>19</sup> A kotin limada prot, laolaoki o pilitiki pena, ap kotiki ong irail masani: War ai metet, me pangalang komail! Komail en wia me wet, men kataman kin ia. <sup>20</sup> O pil dal en nim murin kasipong masani: Dal wet kadede kap ni mom en nt' ai, me kapwilepilidi ong komail. <sup>21</sup> A kilang, pa en me pan pang ia la, me iang ia ni tepel o. <sup>22</sup> Nan melel, Nain aramas pan kokola duen a kileledier, a suedi ong aramas o, me a pan pangkila! <sup>23</sup> Irail ari pikikidi idok nan pung arail, is re irail, me pan wiada met? <sup>24</sup> Irail pil akamaiki nan pung arail, duen is me pan lapalap re irail. <sup>25</sup> A kotin masani ong irail: Nanmarki en wei pokon akan kin poe irail edi o me manaman akan kin adaneki monsap kalangan. <sup>26</sup> A komail sota pan dueta, a me lapalap re omail, i en dueta me tikitik, o me kin kaunda, en dueta me kin papa. <sup>27</sup> Pwe is me lapalap ren me mondi ni tepel de me kin papa? Kaidin i, me mondi ni tepel? A ngai dueta ladu pamail. <sup>28</sup> Nan komail me iang ia ni ai songesong. <sup>29</sup> Ngai ari kileledi ong komail wei eu, duen Sam ai kileledi ong ia er; <sup>30</sup> Pwe komail en manga o nim ni ai tepel nan ai wei o mondi pon men mondi ko, kakaun kainok en Israel eisokriau. <sup>31</sup> Kaun ap kotin masani: Simon, Simon, kilang, Satan ngongkin komail, pwen koko komail dueta wan prot. <sup>32</sup> A ngai me kapakapa kin uk, pwe om poson de nikila. A koe lao sapaledo kakelada ri om ol akan! <sup>33</sup> A a potoaan ong i: Maing, i pan idauen ir lel nan imateng o matala. <sup>34</sup> A kotin masani: Petrus, I indai ong uk, nan malek sota pan kakorot ran wet, koe lao kamamki pan silepak, me koe asa ia. <sup>35</sup> A kotin masani ong irail: Ni ai kadar komail wei so ed en moni, o so ed en sailok, o so sut, meakot komail lekekilar? Re ap potoaan ong: Sota. <sup>36</sup> I ari kotin masani ong irail: A met, me a ed en moni mia, en ale o pil ed en sailok, o me so a, i en netekila a likau, ap id netiada kodlas pot. <sup>37</sup> Pwe I indai ong komail, me intingidier, pil pan pwai ong ia: A wadawad ong me dipan akan, pwe me intingidier duen ngai, pan kaimwisokala. <sup>38</sup> Irail indada: Maing, kotin masani, iet kodlas riapat. A kotin masani ong irail. Ari, i eta. <sup>39</sup> I ari kotilang dol Oliwe, duen a kin wia; tounpadak kan idauenla i. <sup>40</sup> I lao lel ong wasa o, ap kotin masani ong irail: Komail kapakap pwe komail de ko ong nan songesong. <sup>41</sup> I ari tororela sang irail doo weita kapir won

takai eu, ap kelepuke laolao. <sup>42</sup> Masani: Sam (ai), ma komui mauki, koti ki wei sang ia dal wet, ari so, kaidin insen ai, pwe kupur omui ta en wiaui. <sup>43</sup> Nan tounlang amen pwarado sang nanlang katinada i. <sup>44</sup> A ni a kotin pador ong mela, ap ngiangiang a laolao, lao pudo a likamata nta, me dingedingedi ong nan pwel. <sup>45</sup> A kotida sang a laolao o kotin pur ong tounpadak kan, ir mamair aki ar mamauk. <sup>46</sup> Masani ong irail: Da me komail mamairki? Paurida o kapakap, pwe komail de ko ong nan songesong! <sup>47</sup> A ni a kotin masani mepukat, kilang, pokon o, o me adaneki Iudas, amen ir ekriamen, tiong mo 'rail, kaikai dong Iesus, pwen metik i. <sup>48</sup> A Iesus kotin masani ong i: Iudas, koe pan pang kila metik eu Nain aramas? <sup>49</sup> Irail me iang i lao kilanger me pan wiaui, rar indai ong i: Maing, se so pan wokieki ir kodlas? <sup>50</sup> Amen ir pala ladun samero lapalap amen o sara sang salong a pali maun. <sup>51</sup> Iesus ap kotin sapeng masani: Arier! I ap kotin sair salong a, kakelada i. <sup>52</sup> Iesus ap kotin masani ong samero lapalap akan, o kaun pan im en kaudok, o saumas akan, me ko dong i: Dueta lolap amen, me komail koko dong, wa kodlas o katiu kai? <sup>53</sup> Ni ran karos ngai iang komail nan im en kaudok, a komail sota man sair ia, pwe ansau wet omail ansau o manaman en rotorot. <sup>54</sup> Re ap saikidi i o kalualong ong nan im en samero lapalap o, a Petrus idauenla doowe sang. <sup>55</sup> Irail ap saunda kisiniai eu nan warong en kel o mod pena, a Petrus mondi nan pung arail. <sup>56</sup> A lidu men kilang i a momod impan kisiniai o kangkakil i indada: <sup>57</sup> Iet et pil iang i. I ari kamam kin i indada: Li, i sasa i. <sup>58</sup> A mur kis amen kilang i indada: Koe pil amen irail. A Petrus indada: O kaidin ngai! <sup>59</sup> Kadekadeo murin auer eu amen katitiki indada: Melel i men et iang i, pwe i kisan men Kalilaa. <sup>60</sup> A Petrus indada: O i poneponeki om kasokaso! A pitipit ni a lokelokaia malek ap kakoroteda. <sup>61</sup> Kaun ap kotin saupuido masani Petrus. Petrus ap tamanda masan en Kaun, duen a kotin masani ong i: Mon malek kakorot, koe pan kamam kin ia pan silepak. <sup>62</sup> Petrus ari koieila sangesang kaulap. <sup>63</sup> A ol oko, me kolekol i, lalau o woki i. <sup>64</sup> Irail lao perala silang i, ap idedok re a indada: Kopada, is i, me pikir uk ada? <sup>65</sup> O song en lalau toto, me re ki ong i. <sup>66</sup> A lao ran pasang saumas akan o samero lapalap o saunkawewe kan ap pokon pena o kalua i dong nan arail kapung. <sup>67</sup> Indada: Ma koe Kristus, ap katiti ong kit! A kotin masani ong irail: Ma I pan indai ong komail, komail sota pan kamelele; <sup>68</sup> A ma I pan idok, komail sota pan sapeng, o pil sota lapwa ia da. <sup>69</sup> Ari, sang met Nain aramas pan mondi ni pali maun en roson en Kot. <sup>70</sup> Ir karos ap idok: Ari, sapwilim en



Kot koe? A a kotin masani ong irail: Komail me indada, pwe ngai i. <sup>71</sup> Irail indada: Ari, menda apot kadede? Pwe pein kitail rongasang nan au a.

## 23

<sup>1</sup> TOUN pokon karos ap kasinenda kalualang i ren Pilatus. <sup>2</sup> Irail ari pikikidi impimpa i indada: Se diarada lap men et, me a kin kaweid sapung aramas akan o inapwiedi, ender nopwei ong nanmarki, ap inda, me dene pein i Kristus o nanmarki. <sup>3</sup> Pilatus ari idok re a masani: Nanmarki en Sus akan komui? A kotin sapeng i masani: Komui me inda. <sup>4</sup> Pilatus ap masani ong samero lapalap akan o pokon o: Sota dip, me i diar ren aramas men et. <sup>5</sup> A irail ngidingideki i indada: A kin kapeida aramas ni a kaukawewe sili nan Iudaa, tapiada Kalilaa kokodo lel sap wet. <sup>6</sup> Pilatus lao rongadar Kalilaa, ap idok, ma i aramas en Kalilaa men. <sup>7</sup> A i lao rongadar, me kisan toun wein Eroses, ap kadarala i ren Eroses, me pil kotikot Ierusalem ni ran oko. <sup>8</sup> Eroses lao masani Iesus, ap perenda kaulap, pwe me warai a kin anane udial i, pweki me toto a rongadar iran i, o a pil kaporoporeki, me a pan udial kilel eu sang re a. <sup>9</sup> I ari kalelapok re a ni masan toto. A i sota kotin man sapeng i. <sup>10</sup> A samero lapalap o saunkawewe kan kasinenda o impimpa i kaulap. <sup>11</sup> A Eroses o na saunpei kan mamaleki i o likauki i likau pueteputet o kapure wong i ren Pilatus. <sup>12</sup> A ni ran ota Pilatus o Eroses insenemau pena, pwe mas o ira imwintiti pena. <sup>13</sup> A Pilatus kapokon pena samero lapalap, o monsap, o aramas akan, <sup>14</sup> Ap masani ong irail: Komail wa dong ia aramas men et, dene kaweid sapung aramas akan. A kilang, i kalekalelapok re a mo' mail, ap sota dip, me i diar ren aramas men et, duen me komail katikatipiaki i. <sup>15</sup> Eroses pil so, pwe i kadar wong i komail. A kilang, sota me a wiadar pwen kame kila i. <sup>16</sup> Ari, i pan woki i ap lapwada. <sup>17</sup> Pwe a pan udan lapwa dang irail meamen nin kamadip o. <sup>18</sup> Irail karos ap likelikwir indada: Kasapokela men et o lapwa dong kit Parapas! <sup>19</sup> Me lokidokilar nan imateng aki moromorong eu o kamela en aramas amen, me wiauier nan kanim o. <sup>20</sup> Pilatus ari men lapwada Iesus, ap pil masani ong irail. <sup>21</sup> A irail likelikwir indada: Kalopuela, kalopuela i! <sup>22</sup> A masani ong irail kasilepak: Pwe me sued da, me a wiadar? Sota me i diadarar re a, me i en kamata kila. Ari, i pan woki i ap lapwada. <sup>23</sup> A irail nantiong weriwereda ngidingidiki i, me a en lopuela; o ar weriwer o en samero lapalap akan lalaunder. <sup>24</sup> Pilatus ap inda, me ar poekipoek en pwaida, <sup>25</sup> Ap lapwada

i, me lokidokilar nan imateng aki moromorong eu o kamela en aramas amen, me irail poeki, ap mueid ong irail Iesus, en wiai ong i duen insen arail. <sup>26</sup> O ni arail kalua wei i, re ap saikidi Simon men Kirene, me kodo sang nan sap o. Ir ari kidang po a lopu, pwen wala murin Iesus. <sup>27</sup> O pokon kalaimun idauenla i, o li kai me sangesang o mamaukeki i. <sup>28</sup> Iesus kotin saunpei dong irail masani: Li en Ierusalem akan, ender sangesang kin ia, a sangesang kin pein komail o noumail seri kan. <sup>29</sup> Pwe kilang, ni ran oko kokodo aramas pan indada: Meid pai li dapwan o irail me sota naitik, o didi kan, me sota kadidi! <sup>30</sup> Re ap pan pikikidi ekeker ong nana kan: Pupedi ong po at! O ong dol akan: Kadupal kit edi! <sup>31</sup> Pwe ma re wiadar meputat ong tuka maur, da me re pan wia ong tuka mongedi? <sup>32</sup> A pil lolap riamen iang i kalua wei kamela. <sup>33</sup> Irail lao lei wasa, me adaneki pondal en mong, ap kalopuela i o me lolap oko, amen ni pali maun o amen ni pali maing. <sup>34</sup> Iesus ap kotin masani: Sam (ai), Kom kotin maki ong irail, pwe irail sasa, me re wiawia. Irail ari nene pasang sapwilim a likau kan o kadoropwa kida. <sup>35</sup> Aramas me u kangkakil o monsap akan iang irail kapikapiti i indada: A kamaureda akai, i en kamaureda pein i, ma i Kristus sapwilim en Kot. <sup>36</sup> A saunpei kan pil kapikapiti i, kai ong i, ki ong i pinika, <sup>37</sup> Indada: Ma koe Nanmarki en Sus akan, en kapitila pein uk. <sup>38</sup> A pil inting eu, me intingidier ponangen i ni lokaia en Krik, o Latain, o Ipru: Iet Nanmarki en Sus akan. <sup>39</sup> A amen ren lolap oko, me langadar, lalauie i indada: Kaidin koe Kristus Kapiti sang pein uk o kit! <sup>40</sup> Me teio ap sapeng, kapung ong i indada: Koe pil sota masak Kot ni om iang kadeik wet? <sup>41</sup> Pwe ata kalokolok me pung, pwe iduen ata wiawia kan, a ol men et sota wiadar meakot me sued. <sup>42</sup> Ap potoaan ong Iesus: Maing, re kotin kupura ia, lao re kotida nan wei ar. <sup>43</sup> Iesus ap kotin masani ong i: Melel I indai ong uk, ran wet koe pan iang ia mi nan paradisi. <sup>44</sup> Ni auer kawonu ap rotorotala nan sap karos lao lel auer kaduau, <sup>45</sup> O katipin rotorotala, o likau en pera en im en kaudok o dei pasang sang poa lel pa. <sup>46</sup> Iesus ap kotin kapitie laudeda masani: Sam (ai), i mueidalang ngen i nan lim omui kan. A lao kotin masanier met, ap kotin poular. <sup>47</sup> A saumas en saunpei o, ni a kilanger me wiauier, ap kapikapinga Kot indada: Melel, aramas men et me pung. <sup>48</sup> O aramas karos me pokon penaer pwen iang kilang, lao kilanger me wiauier, ap pikir maramar arail o pure pasang. <sup>49</sup> A kompokepa kan karos o li akan, me idauenla i sang Kalilaa, u kailawe, kilekilang meputat. <sup>50</sup> O kilang ol amen, me mar a Iosep, saunkapung

amen, ol mau o pung amen, <sup>51</sup> Me sota apali ong irail ni ar kapukapung o wiawia kan, men Arimatia, kanim eu en Iudäa, me pil auiaui wein Kot, <sup>52</sup> I me potodong Pilatus poekipoeki kalep en Iesus. <sup>53</sup> I ari kidi sang i o kidimki pena likau linen kaselel o kidi ong nan sousou, me weiweida nan paip, wasa me saikenta amen sarede ia. <sup>54</sup> A ran o ran en kaonop o sapat korendor. <sup>55</sup> A li akan, me iang i kodido sang Kaliläa, pil iang udial sousou o, wasa me kalep a nekinekid ia. <sup>56</sup> Irail ap purer o kaonopada potik kai o men usor, re ap kamol ni ran en sapat duen kusoned o.

## 24

<sup>1</sup> A NIN tapin wik, nin soran kaulap re pwara dong sousou o, wado potik kai me re kaonopadar; <sup>2</sup> Irail ari diaradar, me takai o kadapura sang sousou o, <sup>3</sup> O irail lao pedelong ong lola, ap sota diarada kalep en Kaun Iesus. <sup>4</sup> Kadekadeo irail lao insensued kidar, kilang, ol riamen, me likau kida likau linang, ap pwara dong irail. <sup>5</sup> Irail lao masapwekadar o ikiokidi nan pwel, ira ap masani ong irail: Da me komail raparapaki me maur amen ren me melar akan? <sup>6</sup> A soer kotikot met, a iasadar. Tamanda, me a kotin masani ong komail ni a kotikoteta Kaliläa, <sup>7</sup> Mamasani: Nain aramas pan pangalang ni pa en me dipan akan, o lopuela, o ni ran kasilu a pan iasada. <sup>8</sup> Ir ari tamanda a masan akan. <sup>9</sup> O purodo sang nin sousou o, ap kaireki mepukat ong ekamen ko o ong me tei kan karos. <sup>10</sup> Maria men Makdala, o Ioana, o Maria in en Iokopus, o me tei ko me iang irail, me kaireki mepukat ong wanporon akan. <sup>11</sup> A arail kasoi likamata kasoi likam pot re 'rail, ap sota kamelele. <sup>12</sup> Petrus ap uda tangalang sousou o, rukedi ong lola, ap diarada, me likau linen akan ta wonon wasa kis, ap purodo sang o puriamui kida me wiauier. <sup>13</sup> A kilang ni ran ota riamen re 'rail momaitelang kisin kanim eu ad a Emaus; a doo sang Ierusalem mail wonu de isu. <sup>14</sup> Ira ari kasokasoi penaer duen mepukat karos. <sup>15</sup> Kadekadeo ni ara kasokasoi o idedok pena, pein Iesus ap kotin pwara dong ira o iang ira kotila. <sup>16</sup> A mas ara me atiat, pwe re de asa i. <sup>17</sup> I ari kotin masani ong ira: Da me koma kasokasoi pena ni oma alialu, o da me koma insensued kila? <sup>18</sup> Amen ira, me ad a Kleopas, ap sapeng indang i: Koe men wai ta men nan Ierusalem, me sasa, me wiauier wasa o ni ran pukot? <sup>19</sup> A kotin masani ong ira: Pwe dakot? Ira ap indang i: Duen Iesus en Nasaret, me saukop manaman amen ni a wiawia o masan akan mon Kot o aramas karos. <sup>20</sup> O duen samero lapalap o atail saumas akan ar pangala i pwen pakadeikada ong matala o kalopuela

i. <sup>21</sup> A se kiki ong, me a pan kotin kamaioda wein Israel. Ari ran wet pong sili pong murin mepukat wiauier. <sup>22</sup> O pil kis at li akai kamasak kin kit ar pwaralang sousou o sangkonai. <sup>23</sup> Ni ar sota diar kalep a, rap puredo indada, me re diaradar sansal en tounlang kai, me katitiki, me a iasadar, <sup>24</sup> O kis at kai kolang sousou o, ap diaradar, duen li oko kasokasoida, a i me re sota diarada. <sup>25</sup> A kotin masani ong ira: O koma meid lolepon o pwand nan mongiong omail, en kamelele meakan, me saukop akan kopadar. <sup>26</sup> Kaidin i, me udan Kristus en kalokolok ap kodalang a lingan? <sup>27</sup> A ap kotin kawewe ong ira kisin likau kan duen pein i, tapiada ni Moses kokodo lel saukop akan. <sup>28</sup> Irail ap koren iong kanim, me irail koko ong. I ari kasongesong ira, dene a pan kotin daulul. <sup>29</sup> Ira ap ngidingidiki i potoan ong: Kom kotikoteta re at, pwe a pan wasa pongier o ran wet koren iong imwisokela. A ap kotilong ong nan im o, pwen mimieta re ra. <sup>30</sup> Kadekadeo ni a kotin iang ira ni tepel o, a kotin limada prot, laolaoki, a lao pilitiki pena, a kotiki ong ira. <sup>31</sup> Mas ara ap pad pasanger, ira ap asa i. A ap kotin sorede sang mo 'ra. <sup>32</sup> Ira ap inda nan pung ara: Mongiong ata sota mokimokid ni a kotin mamasani ong kita pon al o, ni a kotin kawewe ong kita kisin likau kan? <sup>33</sup> Ira ari uda ni auer ota o purelang Ierusalem, o diarada ekamen ko, o me iang ir, kot pena wasa takis, <sup>34</sup> Katitiki: Nan megel Kaun o kotin iasadar o pwara dong Simon, <sup>35</sup> Ira ap kasokasoi, me wiauier nani al o, o duen ara asaki i a pilitiki pasang prot. <sup>36</sup> A ni ar masan pena mepukat, pein Iesus ap kotin pwara dong nan pung arail masani ong ir: Komail popol! <sup>37</sup> Irail ari masapwekadar o wapondar, o re kiki ong, me ani men, me re udial. <sup>38</sup> A kotin masani ong irail: Da me komail masak ki? O menda lamelam pukot mi nan mongiong omail? <sup>39</sup> Komail kilang pa i kat o na i kat, pwe pein ngai ta. Doke ia o kilang, pwe ani sota kin udok o ti, duen omail kilang ia. <sup>40</sup> A lao masani mepukat, ap kasale ong irail lim a o aluwilu a kan. <sup>41</sup> A ni ar sota non kamelele pweki ar peren o puriamuiki, ap kotin masani ong irail: Sota kan omail met? <sup>42</sup> Rap ki ong i kisan mam inin o onik. <sup>43</sup> I ari konot mo 'rail. <sup>44</sup> A kotin masani ong irail: I masan akan, me I ki ong komail er, ni ai mimieta re omail, pwe karos en pwaida, me intingidier duen ngai nan kapung en Moses, o saukop akan, o psalm akan. <sup>45</sup> I ap kotin kalolikongi irail, pwe ren dedeki kisin likau kai. <sup>46</sup> O kotin masani ong irail iduen a intingidier, o iduen udan kalokolok en Kristus, ap maureda sang ren me melar akan ni ran kasilu, <sup>47</sup> O padapadaki ong wei karos ni mar a, ren kalula, pwe dip akan en

lapwada, a pan tapida nan Ierusalem. <sup>48</sup> A komail me saunkadede en mepukat. <sup>49</sup> A kilang, I pan kadara dong komail, me Sam ai inaukidar. A komail pan mimieta nan kanim o, komail lao audaudekier manaman sang poa. <sup>50</sup> A kotin kalua ir alang Petanien, kotikida lim a, kapai irail ada. <sup>51</sup> Kadekadeo ni a kotin kapal ir ada, a kotiwei sang irail, kotidala nanlang. <sup>52</sup> Irail ari kaudok ong i, ap pure dong Ierusalem perenda kaulap; <sup>53</sup> O re potopot nan im en kaudok kapinga o kaudok ong Kot.

## MANG EN PA EN WANPORON IOANES.

1 MASN kotier ni tapi o, a masan kotier ren Kot, a masan me udan Kot. 2 I me kotikot ren Kot ni tapi o. 3 I me dipisou karos tapi kidar, o sota man meakot mia, me kaidin i kotin wiadar. 4 Maur mi re a; o iei maur o marain en aramas. 5 A marain o me dakarada rotorot, a rotorot sota lingan kila. 6 Aramas amen me pakadarador sang ren Kot ad a Ioanes! 7 I me pwara dong kadede, pwen kadede marain o pwe karos en poson pweki i. 8 Kaidin i me marain o, a a kin kadede marain o. 9 Iei marain melel, me pwara dong sappa, ap kamaraini aramas karos. 10 I me kotier sappa, o i me sappa tapi kidar, a sappa sasa i. 11 A koti dong udan sapwilim a, a sapwilim a kan me san i. 12 Karos, me kasamo i, a kotiki ong ir manaman, en wiala seri en Kot, ir, me poson mar a, 13 Me kaidin ipwidi sang nta, de inong en uduk, de inong en ol o, pwe ipwidier sang ren Kot. 14 Masan me wia udak ala o kotikot re atail, o kitail kilanger a lingan, lingan dueta lingan en Ieros eu sang ren Sam o, me dir en mak melel. 15 Ioanes me kadede i ngil laudedda indada: Iei i, me i padaki wei: Me pan kotido mur i, iei me mier mo i, pwe a kotikotier mo i. 16 Pwe kitail karos ale sang nan audepa a mak sapan potopot. 17 Pwe kapung me kokido sang Moses, a mak o melel sang Iesus Kristus. 18 Sota me kilanger Kot kokodo, Ol ieros ta, me kin kotikot pan kupur en Sam o, i me kotin kasaledar i. 19 A met en Ioanes a kadede, ni men Sus kadarala sang Ierusalem samero o lepit oko, pwen idok re a: Is koe? 20 I ari kotin kadede; a sota likam; a kotin kadede: Kaidin Kristus ngai. 21 Irail idok re a: A is? Elias komui? A masani: Kaidin ngai i. Komui saukop o? A sapeng: Kaidin. 22 Irail ap indang i: A is komui? Pwe sen sapeng irail me kadar kit dor. Da me komui kadedeki pein komui? 23 A masani: Ngai ngil eu, me likelikwir sili nan sap tan: Kaineneda al en Kaun o, duen saukop Iesaia masanier! 24 A irail pakadaradoer sang ren Parisär akan. 25 Irail ap idok re a indada: Da me komui wia paptaisiki, ma komui kaidin Kristus, o kaidin Elias, o pil kaidin saukop o? 26 Ioanes sapeng irail masani: Ngai me paptaisiki pil, a amen kin kotikot nan pung omail, me komail sasa. 27 Iei i me kotido mur i, me ngai sowar ong, en lapwada sal en sapwilim a sut. 28 Mepukat wiauiet Petapara palilan Iordan, wasa Ioanes kin wia paptais ia. 29 Mandan ran o a masani Iesus a koti dong i ap masani: Kilang Sippul en Kot, me kin wawei dip en sappa! 30 Iei i, me i padaki wei:

Ol amen pan kotido mur i iei, me mier mo i, pwe a kotikotier mo i. 31 A ngai so asa i, a pwe i en sansal dong Israel, iei me i kokido paptaisiki pil. 32 A Ioanes kadede masani: I kilanger Ngen o kotidido sang nanlang ni mom en muroi kotikot re a. 33 A ngai so asa i, a me porone ia don wia paptaisiki pil, iei me kotin masani ong ia: Me koe pan kilang. Ngen piridi sok poa, o kotikoteta re a, iei i, me kin wia paptaisiki Ngen sarau. 34 A i kilangadar ap kadedeki, me iei Sapwilim en Kot. 35 Mandan ran o Ioanes pil kotida wasa o, o na tounpadak riamen iang i. 36 A ni a udial Iesus kotikot kokodo, ap masani: Kilang Sippul en Kot! 37 A tounpadak riamen rongadar a masan, ap idauen wei Iesus. 38 Iesus ap kotin saupaido masani ara idedauen, ap kotin masani ong ira: Da me koma rapaki? Ira potoan ong: Rapi (iet wewe: Saunpadak), ia wasa re kin kotikot ia? 39 A kotin masani ong ira: Kodo kilang! Ira ap poto dong kilanger wasa, me a kotikot ia, ap mimieta re a ni ran o. Mepukat wiauiet impan auer kaeisok. 40 Andreas, ri en Simon Petrus amen re ra, me rongadar sang ren Ioanes ap idedauen i. 41 I me diaradar mas udan ri a Simon, indai ong i: Se diaradar Mesias (iet wewe: Kristus). 42 I ap kalualang i ren Iesus. A Iesus lao masani i, ap masani: Simon, koe me nain Iona, koe nok adaneki Kepas (iet wewe: Paip). 43 Mandan ran o a pan kotilang Kaliläa, Iesus ap kotin diaradar Pilipus, masani ong i: Idauen ia do! 44 Pilipus men Petsaida, kanim en Andreas o Petrus. 45 Pilipus diaradar Natanael, ap indang i: Se diaradar i, duen me Moses intingiedier nan puk en kapung o saukop akan: Iesus men Nasaret, sapwilim en Iosep. 46 A Natanael indai ong i: Pala maukot pan kak pwarada sang Nasaret? Pilipus indang i: Kodo kilang! 47 Iesus kotin masani Natanael koko dong i, ap masani duen i: Kilang, ol melel en Israel amen, me sota kin widang. 48 Natanael potoan ong i: Re kotin mangi ia sang ia? Iesus kotin sapeng masani ong i: Mon Pilipus a eker uk edo, ni om mod pan tuka pik o, I kilang uk ada. 49 Natanael sapeng potoan ong i: Rapi, ir me Sapwilim en Kot, ir me Nanmarki en Israel. 50 Iesus kotin sapeng masani ong i: Pweki I indai ong uk, me I kilang uk ada pan tuka pik o, iei me koe posonki, a koe nok kilang me lapa sang mepukat. 51 A kotin masani ong i: Melel, melel I indai ong komail, sang met komail pan kilang nanlang a ritida o tounlang en Kot akan dauda o daudi pwarado ren Nain aramas.

## 2

1 A NI kasilu en ran kamadip en kapapaud wiaui Kana nan Kaliläa; a in en Iesus kot

waso o. <sup>2</sup> Iesus o sapwilim a tounpadak kan me pil luke dong kamadip o. <sup>3</sup> Arail wain lao roselar, in en Iesus ap masani ong i: Solar arail wain. <sup>4</sup> Iesus kotin masani ong i: Li, menda re om? Ai ansau saikenta leler. <sup>5</sup> In a ap masani ong papa kan: Komail wiada meakaros, me a pan kotin masani ong komail. <sup>6</sup> Ari, potel takai wonu mi waso o, en Sus akan ar men dopedop lole. Eu me laude ong metreten riau de silu. <sup>7</sup> Iesus kotin masani ong irail: Komail idip ong pil en potel akan! Irail ari kodiada lel au ar. <sup>8</sup> A ap kotin masani ong irail: Deukada, wala ren me kaun en konot: Irail ap wain. <sup>9</sup> Kaun en konot lao song kis pil, me wia wain la, o so asa, a idipi sang ia, a papa kan, me idip pil da, asa. Kaun en konot ap ekeredo ol kamod o, <sup>10</sup> Indang i: Aramas karos kin kida mas wain mau, toun kamadip lao medilar, re kin kida, me sota non mau. A komui kin nekinekid wain mau lel met. <sup>11</sup> I met tapidan kilel akan, me Iesus kotin wiadar Kana nan Kaliläa, o kotin kasaleda a lingan, o sapwilim a tounpadak kan posonla i. <sup>12</sup> A murin met a kotidilang Kapernaum, i o in a, o ri a ol akan, o sapwilim a tounpadak kan, ari, sota non ran toto, me re kotikot waso o. <sup>13</sup> A pasa en Sus akan me korendor, a Iesus kotidalang Ierusalem. <sup>14</sup> A kotin masani nan im en kaudok men netinet en kau, o sip, o muroi, o men wiliandi moni me momod ia. <sup>15</sup> Ap kotin wiakida men wokiwook sal akai, ap woki ir sang nan im en kaudok iangaki sip o kau akan, o moni en saunwiliandi a kotin kasapokela o kotin wukedidi tepel akan. <sup>16</sup> Ap kotin masani ong men netinet en muroi kan: Wawei sang met met akan, o der wiakidar tanpas en Sam ai im en net eu! <sup>17</sup> A sapwilim a tounpadak kan tamanda me intingidier: Limpok ong tanpas omui me kasor ia dier. <sup>18</sup> Sus oko ap sapeng indang i: Kilel da, me kom kadedeki ong kit, me komui manaman ong, en wiada mepukat? <sup>19</sup> Iesus kotin sapeng masani ong irail: Palanga pasang im en kaudok wet, a pong sili pong I pan kauada. <sup>20</sup> Sus oko ap indada: Par ngaulwonu me im en kaudok wet wiaui kidar, a pong sili pong komui pan kaua kida? <sup>21</sup> Ari, tanpas en pali war a, me a kotin masanie kida. <sup>22</sup> A lao iasadar sang a matalar, sapwilim a tounpadak kan ap tamandar, me a kotin masanier mepukat. Irail ari poson kisin likau kan o masan, me Iesus kotin masaniadar. <sup>23</sup> Ni a kotikot Ierusalem ni pasa, ni kamadip o, me toto posonla mar a, ni ar kilanger kilel akan, me a kotin wiadar. <sup>24</sup> A Iesus sota kotin liki ong ir pein i, pwe a kotin mangi irail karos. <sup>25</sup> O a sota mau ong, meamen en kadede ong i aramas amen, pwe pein i kotin mangi lol en aramas.

### 3

<sup>1</sup> ARAMAS amen mia, kisan Parsär akan, me mar a Nikodemus, me saumas amen ren Sus akan, <sup>2</sup> Me poto dong i ni pong o, katiti ong i: Rapi, se asa, me komui saunpadak amen, me tapido sang ren Kot, pwe sota, me kak wia kilel akan due me komui kotin wiada, ma Kot so iang. <sup>3</sup> Iesus kotin sapeng masani ong i: Melel, melel I indai ong uk, meamen so ipwi sapa, sota pan kak kilang wein Kot. <sup>4</sup> Nikodemus potoan ong i: Iaduen aramas laud pan kak ipwidi? A pan kak pur ong nan kaped en in a, ipwidi sang? <sup>5</sup> Iesus kotin sapeng: Melel, melel I indai ong uk, meamen so ipwiki pil o ngen, a sota kak pedelong ong nan wein Kot! <sup>6</sup> Me ipwiki uduk, iei uduk, a me ipwiki Ngen, iei ngen. <sup>7</sup> Koe der puriamuiki, me I katitiki ong uk: Komail en ipwi sapa. <sup>8</sup> Ang kin pein ipip sili, o koe kin rong ngil a, a koe sasa, wasa a tapi sang ia o wasa a ko ong ia; iduen amen amen, me ipwiki Ngen. <sup>9</sup> Nikodemus sapeng indai ong i: Iaduen mepukat kak wiaui? <sup>10</sup> Iesus kotin sapeng masani ong i: Saunpadak en Israel amen koe, a koe sasa duen mepukat? <sup>11</sup> Melel, melel I indai ong uk, me se asadar, iei me se kin indada, o me se kilanger, iei me se katitiki, a komail sota kin kamelele at kadede. <sup>12</sup> Ma I katitiki ong komail men pa, a komail ap sota kamelele, a iaduen, komail pan kamelele, ma I katitiki ong komail men nanlang? <sup>13</sup> Sota meamen, me kodala nanlang, i eta, me kodido sang nanlang, Nain aramas, me kin mimieta nanlang. <sup>14</sup> Duen Moses me kauadar serpent amen nan sap tan, iduen Nain aramas pan kakauda. <sup>15</sup> Pwe meamen posonla i, sota pan lokidokila, a en aneki maur soutuk. <sup>16</sup> Pwe iet duen Kot kotin kupura sappa, me a kotikidoki sapwilim a Ieros, pwe karos, me posonla i, ender salongala, a en aneki maur soutuk. <sup>17</sup> Pwe Kot me kotin porone dong sappa sapwilim a Ol, kaidin en kadeikada sappa, a pwe sappa en kamauri kila i. <sup>18</sup> Me poson i, sota pan pakadeikada, a me so poson i, iei pakadeikadar, pweki a sota poson mar en sapwilim en Kot ieros. <sup>19</sup> A iet kadeik o, marain pwaro dong sappa, a aramas pok ong rotorot mon marain, pweki ar wiawia kan me sued. <sup>20</sup> Pwe amen amen, me wiawia sued, kin kailongki marain, o sota kin pwaro dong marain, pwe a wiawia kan de sansaleda. <sup>21</sup> A me wiawia melel, kin ko dong marain, pwe a wiawia kan en sansaleda, me re tapi sang ren Kot. <sup>22</sup> Murin mepukat Iesus o sapwilim a tounpadak kan kotilang sap en Iudäa ap kotikot ia wia paptais. <sup>23</sup> A Ioanes pil wia paptais Enon koren iong Salim, aki pil toto mi wasa o, irail ari koeila paptaisela. <sup>24</sup> Pwe Ioanes saikenta lokidokilar nan imateng. <sup>25</sup> En Ioanes a tounpadak kan o ol en Sus amen ap

akamaiki pena duen kamakelekel. <sup>26</sup> Irail ari ko dong ren Ioanes indang i: Rapi, me kot re omui palilan Iordan, me komui kin kadede, masani, a kin wia paptais o karos kin pwarala re a. <sup>27</sup> Ioanes sapeng masani: Aramas amen sota kak aneki meakot, ma a so aneki sang nanlang. <sup>28</sup> Komail pein kadede kin ia, me i indada: Kaidin Kristus ngai, pwe ngai me pakatarador mo a. <sup>29</sup> Me li amen kisin nin ong, iei ol kamod. A kompoke pan ol kamod kin u rongerong perenki ngil en ol kamod; ari, iei ai peren unsokala. <sup>30</sup> I en kakairida, a ngai en kakairidi. <sup>31</sup> Me kotido sang poa, i me poedi karos, a me kisan sappa, iei men sappa, o a kin kasokasoia duen sappa. A me kotido sang nanlang, me poedi karos, <sup>32</sup> O me a kilangada o rongada, iei me a kin kadede, a sota me kamelele a kadede. <sup>33</sup> A me kamelele a kadede, kin kadede, me Kot me melel. <sup>34</sup> Pwe i, me Kot kotin poronedor, kin kida en Kot a masan, pwe Kot sota kotikida Ngen ki men song. <sup>35</sup> Sam me kotin kupura sapwilim a Ol o kotiki onger ni lim a mekaros. <sup>36</sup> Me poson sapwilim a Ol, aneki maur soutu. A me sota poson sapwilim a Ol, sota pan kilang maur, a ongiong en Kot pan mimieta re a.

#### 4

<sup>1</sup> KAUN lao kotin mangi, me Parisär akan rongadar, me Yesus kin wiada tounpadak kan o paptais toto sang Ioanes, <sup>2</sup> Ari, pwe sota me pein Yesus kotin paptais, sapwilim a tounpadak kan ta, <sup>3</sup> Ap kotila sang Iudäa, kotin purelang Kaliläa. <sup>4</sup> A a kotin weid nan wein Samaria. <sup>5</sup> I ap kotilang kanim en Samaria eu, me adaneki Sikar, koren iong sap, me Iakop ki ong na ol Iosep. <sup>6</sup> Iei wasa en Iakop a parer eu mia. Yesus ari ngirekila a sapasapal, ap kaipokedi pon parer o, ari mepukat wiauer impan auer kawonu. <sup>7</sup> A li en Samaria amen ap kodon idip pil ia. Yesus kotin masani ong i: Kido lim ai kis pil en! <sup>8</sup> Pwe sapwilim a tounpadak kan ko ong nan kanim, pan netiada sak arail. <sup>9</sup> Li en Samaria ap indang i: Iaduen, komui kisan men Sus, ap poeki pil re i? Pwe ngai li en Samaria amen, pwe Sus akan sota kin waroki ong men Samaria. <sup>10</sup> Yesus kotin sapeng masani ong i: Ma koe asa duen kisakis sang ren Kot o is i, me indang uk: Kido lim ai kis pil en, koe pan poeki re a, a ap pan ki ong uk pil memaur. <sup>11</sup> Li o indang i: Maing, sota sapwilim omui men idip pil, a parer me lol, a ia wasa, kom pan idip sang ia pil memaur? <sup>12</sup> De komui lapa sang sam at Iakop, me kotiki ong kit er parer en, o pein nima sang, o na kan, o na man akan? <sup>13</sup> Yesus kotin sapeng masani ong i: Karos, me nima sang pil wet, pan pur ong men nim pilada. <sup>14</sup> A meamen, me nima sang

pil, me I ki ong i, pan solar men nim pilada kokolata, pwe pil, me I kin ki ong, pan pot loli kusukusudang maur soutu. <sup>15</sup> Li o ap indai ong i: Maing, kom kotiki ong ia kisan pil o, pwe i en solar men nim pil, o solar kodo o idipa sang met! <sup>16</sup> Yesus kotin masani ong i: Kowe i ukedo om paud! <sup>17</sup> Li o sapeng indada: Sota ai paud. Yesus kotin masani ong i: Melel om lokaia: Sota ai paud. <sup>18</sup> Pwe om paud me limen mas kokodo, a kaidik om paud, me koe paudeki met; iei melel, me koe indada. <sup>19</sup> Li o indang i: Maing, i ap asaer, me saukop amen komui. <sup>20</sup> Sam at akan kaukaudok pon nana wet, a komail kin inda dene Ierusalem eta wasa me aramas en kaudok ia. <sup>21</sup> Yesus kotin masani ong i: Li, kamelele ia, a korendor ansaun omail pan solar kaukaudok ong Sam pon nana wet, pil sota Ierusalem. <sup>22</sup> Komail kin sasa, me komail kin kaukaudok ong. A kit asa, me se kaukaudok ong, pwe kamaur pwarado sang ren men Sus akan. <sup>23</sup> A ansau korendor, ari a leler, me toun kaudok melel akan pan kaudok ong Sam ni Ngen o melel, pwe iei ta song en toun kaudok kan, me Sam pil kotin kupura. <sup>24</sup> Ngen eu Kot, a me kaudok ong i, ren kaudokki Ngen o melel. <sup>25</sup> Li indai ong i: I asa, me Mesias pan kotido, me maraneki Kristus. I lao kotido, a pan katiti ong kit mekaros. <sup>26</sup> Yesus kotin masani ong i: Ngai i, me lokelokaia ong uk. <sup>27</sup> A sapwilim a tounpadak kan ap purodo, puriamui a masan ong li amen. Ari so, sota me indada: Da me re kotin kainoma, de da me re kotin mamasani ong i? <sup>28</sup> Li o ap pwilikidi potel en pil o, ap koieilang kanim o kasoi ong aramas akan: <sup>29</sup> Kodo, kilang aramas amen, me kasale ong ia karos, me i wiadar, ma i kaidin Kristus? <sup>30</sup> Rap koieila sang nan kanim o potodo re a. <sup>31</sup> Ni ansau ota sapwilim a tounpadak kan poeki re a, potoaan ong: Rapi, re kotin konot! <sup>32</sup> A kotin masani ong irail: Kan ai kisin manga mia, me komail sasa. <sup>33</sup> Tounpadak kan ap kasokasoi nan pung arail: Muein amen wa dong i sak. <sup>34</sup> Yesus kotin masani ong irail: Wiawia kupur en me kadar ia do, o kapwaiada sapwilim a dodok, iei kan ai, <sup>35</sup> Komail sota kin indada: Saunipong paieu mi mon rak? Kilan, I indai ong komail, sarada, kilang matuel o pwe a malar. <sup>36</sup> Me dolung kin pwaipwai o nanak ong maur soutu, pwe ira karos, me kamorok o me dolung en peren pena. <sup>37</sup> Pwe ni mepukat kasoi o pwaidar: Amen me kin kamokamorok, a amen me kin dolung. <sup>38</sup> I kadar komail wei, en dolung pena, me komail so doke, Akai me dodoker, a komail me id aneki arail rak. <sup>39</sup> Men Samaria toto kisan kanim o posonla i pweki kasoi en li o, me kadede: A kotin kasale ong ia karos, me i wiadar. <sup>40</sup> Men Samaria kan lao pokon dong i, rap poeki re

a, en kotikot re 'rail. I ari kotikot ia pong ria pong. <sup>41</sup> A me toto me posonlar pweki a masan, <sup>42</sup> Ap indang li o: Se poson kila kaidin om kasoi, pwe se pein rongadar o weweki, me i melel Saunkamaur pan sappa. <sup>43</sup> Murin ran riau Iesus kotila sang wasa o, kotilang Kaliläa. <sup>44</sup> Pwe pein Iesus kotin kadedeki, me saukop amen sota kin mau nan udan sap we. <sup>45</sup> A lao kotilang Kaliläa, men Kaliläa me kasamo i, pwe re iang kилanger me a kotin wiadar Ierusalem ni kamadip o, pwe re toun iang kamadip. <sup>46</sup> Iesus ari kotin pure dong Kana nan Kaliläa, wasa a kotin kapikila pil wain. A monsap amen mia, me na ol somau nan Kapernaum. <sup>47</sup> A lao rongadar, me Iesus koti dong Kaliläa sang Iudäa, ap poto dong re a, poeki i en kotidi, kakelada na ol, pwe a koren iong mela. <sup>48</sup> Iesus ap kotin masani ong i: Ma komail so kilang kilel o manaman akan komail sota pan poson. <sup>49</sup> Monsap potoan ong i: Maing kotidi mon nai seri mela! <sup>50</sup> Iesus kotin masani ong i: U kowe, noum ol memaur. Ari aramas o poson masan o, me Iesus kotin masani ong i ap koieila. <sup>51</sup> A ni a kodila, a ladu kan me tu ong i, kasoi ong i, me na putak mauredar. <sup>52</sup> I ap kalelapok re 'rail: Ansau da me a pikikidi maur? Irail indang i: Aio ni auer kaisu karakar ko sanger. <sup>53</sup> Sam o ap asadar, me i ansau, me Iesus kotin masani ong i: Noum ol memaur. I ari o na kan me posonla i. <sup>54</sup> Iet kilel kariau, me Iesus kotin wiadar ni a koti dong Kaliläa sang Iudäa.

## 5

<sup>1</sup> MURIN mepukat ran lapalap eu en Sus oko pwaida; Iesus ap kotilang Ierusalem. <sup>2</sup> Len pil eu mi Ierusalem impan im en sip, me ad a Petesda ni lokaia en Ipru; im limau mi impa, <sup>3</sup> Me somau toto mi lole: Me maskun, o me dangidang, o me motor mia, auiaui lao pil o pan mokimokid. <sup>4</sup> Pwe akai ansau tounlang amen kin koti dong le o kamokideda pil o, a meamen me madang tiong mas nan pil o ni a mokimokid, iei me kin maureda sang a somau kan karos, me mi re a. <sup>5</sup> A aramas amen mia, me somauki par sileisokwalu. <sup>6</sup> Iesus lao kotin masani men et a wonon, ap kotin mangi, me a wonon ansau warai, ap kotin masani ong i: Koe so men kelailada? <sup>7</sup> Ol somau potoan ong i: Maing, sota nai aramas, me pan wa ia di wong ni pil o ansau a mokideda. Pwe ni ai kokodi, amen kin madang mo i. <sup>8</sup> Iesus ap kotin masani ong i: Uda, ale ki om, kokowe! <sup>9</sup> Aramas o ap madang kelailadar, kida ki e, alu wei, a ran o ran en sapat. <sup>10</sup> Sus oko ap indai ong me kelailadar: Ran wet ran en sapat. A sota pung koe en wewa sili ki om. <sup>11</sup> A sapeng irail: Me kakela ia da, masani ong ia: Ale ki om koko wei! <sup>12</sup> Irail ap

kalelapok re a: Is aramas o me indai ong uk: Ale ki om kokowe! <sup>13</sup> A me kelailadar wasa i, pwe Iesus kotila sanger, pwe pokon mi wasa o. <sup>14</sup> Kadekadeo Iesus kotin diadar i nan im en kaudok o ap kotin masani ong i: Kilang, koe kelailadar, koe der pil wia dip, pwe me sued kot sang mas de ko dong uk! <sup>15</sup> Aramas o ap koieila, kaireki Sus oko, me Iesus kakeladar i. <sup>16</sup> I me Sus oko ap raparapaki Iesus, o masamasan, pwen kamela i, pweki a kotin wiadar meakan ni ran en sapat. <sup>17</sup> Iesus kotin sapeng irail: Sam ai kin dodok kokodo, a ngai pil iang dodok. <sup>18</sup> I me Sus oko ap masamasan melel, en kamatala i, pweki a kotin kawela ran en sapat o pil masani, me dene Kot Sam a, o a kaparoki ong pein i Kot. <sup>19</sup> Iesus ap kotin sapeng masani ong irail: Melel melel I indai ong komail, a sota kak, Na en pein wia meakot, pwe i eta, me a kilang ren Sam, me a wiada. Pwe me a kin wiada, iei me Na pil kin wiada. <sup>20</sup> Pwe sam pok ong Na o kasansale ong i karos, me pein i kin wiada. O a pan kasale ong i wiawia kan, me lapa sang met akan, pwe komail en puriamui kila. <sup>21</sup> Pwe duen Sam kin kapikapirida me melar akan, kamaur ir ada, iduen Na pil kamaureda me a mauki. <sup>22</sup> Pwe sota me Sam kin kadeikada, pwe a kotiki ong Na kadeik o. <sup>23</sup> Pwe karos en wauneki Na, dueta ar wauneki Sam. Me sota wauneki Na, sota kin wauneki Sam, me kadar i dor. <sup>24</sup> Melel, melel I indai ong komail, meamen rong ai padak o poson, me kadar ia do, a aneki maur soutuk. A a sota pan pangalang kadeik o, pwe a sapale sang mela sapal ong maur. <sup>25</sup> Melel, melel I indai ong komail, ansau kokodo, iei a leler, me melar akan pan rongada ngil en Nain Kot, a me rongadar pan maureda. <sup>26</sup> Pwe duen Sam a udan maur, iduen a ki ong Na, en pil udan maur. <sup>27</sup> O a kotiki ong i manaman, en kaunda kadeik o, pweki Nain aramas i. <sup>28</sup> Der puriamuiki met, pwe ansau kokodo me irail, me mi nan sousou kan, pan rong ngil a. <sup>29</sup> Irail ap pan pwarada: Me wiadar me mau, en maureda, pwen memaur, a me wiadar mesued, en maureda, pwen pangalang kadeik o. <sup>30</sup> Sota me I kak wiada sang pein ngai, duen me I kin rong, iduen I kin kadeikada, o ai kadeik me pung, pwe I sota kin rapaki insen ai, pwe kupur en i, me kadar ia do. <sup>31</sup> Ma I kadede pein ngai, ai kadede sota melel. <sup>32</sup> Amen me kadede ia, a I asa melel, me a kadede ia me melel. <sup>33</sup> Komail me ilakilang Ioanes, i ari me kadede melel. <sup>34</sup> A I sota kin ale kadede ren aramas, a iet me I indawei, pwe komail en dorola. <sup>35</sup> I me ser umpul o marain eu, a komail men perenki a marain ansau kis. <sup>36</sup> A ai kadede me lapa sang en Ioanes. Pwe dodok kan, me Sam o kotiki ong ia, I en kapwaiada, iei dodok kan, me I kin wiawia, me kadede

ia, me Sam kadar ia dor. <sup>37</sup> A Sam, me kadar ia dor, pein i kadede ia. Komail sota rongadar ngil a, o sota kilang mom a. <sup>38</sup> O a masan sota kin kot re omail, pwe komail sota poson, me a kadarador. <sup>39</sup> Komail kin kalelapok nan kisin likau kan, pwe komail lamelame, me maur soutuk mi lole. Ari, iei irail, me kin kadede ia. <sup>40</sup> A komail kang ko dong ia, pwe komail en aneki maur. <sup>41</sup> I sota kin mauki ale wau ren aramas akan. <sup>42</sup> I asa komail, limpok en Kot sota kin mi re omail. <sup>43</sup> I kodo ni mar en Sam ai, a komail sota kin kasamo ia. A ma amen pan kokido pein ad a, komail pan kasamo i. <sup>44</sup> Pala komail kak poson ni omail ngongongki wau ren aramas, ap sota rapaki wau sang ren Kot. <sup>45</sup> Der kiki ong, me I pan mpäkin komail ren Sam, amen me kin mpäkin komail: Moses, me komail kin kaporoporeki. <sup>46</sup> Pwe ma komail posonla Moses, komail pan poson ia, pwe i me intingiedier duen ngai. <sup>47</sup> A ma komail so kamelele a inting kan, pala komail pan kamelele ai padak kan?

## 6

<sup>1</sup> MURIN mepukat Iesus kotin kotela le en Tiperias nan Kaliläa. <sup>2</sup> A pokon kalaimun me idedauen i pweki ar kilanger kilel akan, me a kotin wiאי ong me somau kan. <sup>3</sup> Iesus ap kotidala pon dol o, kaipokedi wasa o ren sapwilim a tounpadak kan. <sup>4</sup> A pasa o, ran lapalap en Sus oko me korendor. <sup>5</sup> Iesus lao kotin masanda masani pokon kalaimun koko dong i, ap kotin masani ong Pilipus: Ia wasa, sen neti sang ia kisin manga, pwe mepukat en manga? <sup>6</sup> A kotin masani mepukat, pwen kasongesong i. Pwe pein i mangi, me a pan wiada. <sup>7</sup> Pilipus potoan ong i: Prot me denar riepuki sota pan itar ong irail, pwe amen amen en tungole ekis. <sup>8</sup> Andreas, sapwilim a tounpadak amen, i en Simon Petrus potoan ong i: <sup>9</sup> Kisin putak amen mia, me a lopon en prot limau o mam riamen, a sota katepa ren me toto. <sup>10</sup> Iesus kotin masani: Kamod ong irail edi! Ari, wasa o me reen. Impan ol limekid ap mondi. <sup>11</sup> Iesus ap kotikida lo-pon ko, a lao laolaoki, ap kotin nek ong irail me mondier, pil dueta mam oko, irail lao metilar. <sup>12</sup> Irail lao metier, a kotin masani ong sapwilim a tounpadak kan: Ki pena me lua, pwe ekis der lokidokila! <sup>13</sup> Irail ap ki pena kopou eisokriaui kisan lopon ko, me luadi murin arail manga. <sup>14</sup> Aramas akan lao kilanger kilel o, me Iesus kotin wiadar, re ap indada: Melel i Saukop o, me pan pware dong sappa. <sup>15</sup> Iesus lao kotin mangi, me re pan poto dong i, pwen kasapwiladang i Nanmarki, ap pil kotidalang nin dol o, kotin kelepala. <sup>16</sup> A lao sautik pena, sapwilim a tounpadak kan ap kotilang ni oror, <sup>17</sup> Kereda pon sop pot, kotela

kokolang Kapernaum. A lao wasa pongier, Iesus saikenta iang irail. <sup>18</sup> A sed me iluken, pwe ang me ma. <sup>19</sup> Irail seisei kila mail eisoklimadu de rieisok, rap kilangada Iesus a kotikotido pon sed koren iong sop, irail ap masapwekadar. <sup>20</sup> A kotin masani ong irail: Ngai i komail der masak! <sup>21</sup> Irail ap men kasamo i pon sop o, a sop o madang milar ni sap o, me re ko ong ia. <sup>22</sup> A mandan ran o pokon o, me mi palilan le, lao kilanger, me sota apot sop mi wasa o, pwe i eta, me sapwilim a tounpadak kan keredang poa, o me Iesus sota iang sapwilim a tounpadak kan kotidang pon sop o, pwe a tounpadak kan kola kelep. <sup>23</sup> A pil akai kisin sop me pwarado sang Tiperias, tanga dong wasa o, me re mangamanga ia, murin Kaun o kotin laolao. <sup>24</sup> Aramas akan lao kilanger, me Iesus solar kotikot ia, o sapwilim a tounpadak kan pil so, rap dake sop pot kolang Kapernaum, raparapaki Iesus. <sup>25</sup> Irail lao diadarai i palilan le, ap potoan ong: Rapi iad me re kotido? <sup>26</sup> Iesus kotin sapeng irail masani: Melel, melel I indai ong komail, komail kin rapakin ia kaidin pweki kilel akan, me komail kilang, a pweki komail kangala kisin prot ap metier. <sup>27</sup> Komail der dokki manga, me kin ola, a dokki manga me kin mimieta ong maur soutuk, me Nain aramas pan ki ong komail, pwe i me Kot Sam kileledier. <sup>28</sup> Irail ap potoan ong i: Da me sen wiada, pwen kapwaiada en Kot a dodok kan? <sup>29</sup> Iesus kotin sapeng masani ong irail: Iet en Kot a dodok: Komail en poson i, me a kadarado. <sup>30</sup> Irail ari potoan ong i: Kilel da, me re kotikida, pwe sen kilang o poson ir? Da me re kotin wiada? <sup>31</sup> Sam at akan me kangala mana nan sap tan o, duen a intingidier: A kotiki ong irail prot sang nanlang, en kangala. <sup>32</sup> Iesus ap kotin masani ong irail: Melel, melel I indai ong komail, kaidin Moses, me ki ong komail prot sang nanlang, a Sam ai kin ki ong komail prot melel sang nanlang. <sup>33</sup> Pwe me kodido sang nanlang, o ki ong sappa maur, iei prot en Kot. <sup>34</sup> Irail ap indang i: Maing, kotiki dong kit prot wet kaukaule! <sup>35</sup> Iesus kotin masani ong irail: Prot en kamaur ngai, me ko dong ia solar pan men mangadar, o me poson ia, solar men nim piladar. <sup>36</sup> A I indai ong komail er, komail kilang ia er, ap so poson ia. <sup>37</sup> Karos me Sam ki ong ia, pan ko dong ia, a me ko dong ia, I sota pan kasela. <sup>38</sup> Pwe ngai kodido sang nanlang, kaidin pwen wiada insen ai, pwe kupur en i, me kadar ia do. <sup>39</sup> Pwe iet kupur en me kadar ia do, karos me a ki ong ia er, I ender kasela amen, pwe I en kamaureda ni ran nik o. <sup>40</sup> A iet kupur en Sam ai, amen amen, me kin kilang Na o poson i, en aneki maur soutuk, a I pan kamaureda i ni ran nik o. <sup>41</sup> Sus oko ap lipanedeki i, pweki



a kotin masani: Ngai prot, me kodi sang nanlang. <sup>42</sup> Irail indada: Kaidin i Iesus nain Iosep? A sam a o in a se asa. Ari, daduen a indada: I kodido sang nanlang? <sup>43</sup> Iesus kotin sapeng masani ong irail: Komail der lipaned nan pung omail! <sup>44</sup> Sota me pan kak ko dong ia, ma Sam, me kadar ia dor, sota kainongido i. A I pan kamaureda i ni ran nik o. <sup>45</sup> A intingidier nan saukop akan: Irail karos pan ale padak sang ren Kot. Amen amen me rongadar o padakki ren Sam, kin ko dong ia. <sup>46</sup> Ari, kaidin pweki meamen kilang Sam; i eta, me kodo sang ren Kot, i me kilanger Sam. <sup>47</sup> Melel, melel I indai ong komail, me poson ia, iei me aneki maur soutuk. <sup>48</sup> Prot en maur ngai. <sup>49</sup> Sam omail oko, me kangala mana nan sap tan o, ir ari melar. <sup>50</sup> Met prot, me kodido sang nanlang, meamen kin kang sang i, sota pan mela. <sup>51</sup> Ngai prot maur, me kodido sang nanlang, meamen kang sang prot wet, pan memaur kokolata. Prot, me I pan kida, iei uduk ai, me i pan kida en kamaur kida sappa. <sup>52</sup> Sus oko ari akamaiki pena indada: Iaduen men et pan kak ki ong kit uduk a sen kang? <sup>53</sup> Iesus ap kotin masani ong irail: Melel, melel I indai ong komail, ma komail sota pan kang uduk en Nain aramas o nim nta, sota maur omail. <sup>54</sup> Me kin kang uduk ai o nim nt' ai, iei me aneki maur soutuk, a I pan kamaureda i ni ran nik o. <sup>55</sup> Pwe manga melel uduk ai, o pil melel nt' ai. <sup>56</sup> Me kin kang uduk ai o nim nt' ai, iei me podidi ong ia o ngai podidi ong i. <sup>57</sup> Duen Sam ieias kadar ia do, o ngai memaureki Sam, iduen me kang uduk o nt' ai, pan meaureki ngai. <sup>58</sup> Iet prot, me kodido sang nanlang, kaidin duen sam omail akan, me kangala mana ap mela, a meamen kin kang prot wet, pan memaur kokolata. <sup>59</sup> Mepukat a kotin masani wei nan sinakoke, ni a kotin kawewe nan Kapernaum. <sup>60</sup> Ari, me toto ren sapwilim a tounpadak kan, me rongadar mepukat indada: Padak pot et meid apwal! Is me kak rong? <sup>61</sup> Iesus lao kotin angni nan kupur a, me sapwilim a tounpadak kan lipanedeki mepukat, ap kotin masani ong irail: Komail makaraki mepukat? <sup>62</sup> A ma komail pan kilang Nain aramas kodala wasa, me a kauson ia mas o? <sup>63</sup> Ngen me kin kamaureda, a uduk sota katempa. Padak kan, me I kin padapadaki ong komail, iei Ngen o maur. <sup>64</sup> A akai mi re omail, me so poson. Pwe Iesus kotin mangi, me so poson o me pan pangala i. <sup>65</sup> A kotin masani: I me I indaki ong komail, sota me kak ko dong ia, ma Sam sota kainongido. <sup>66</sup> Sang ni ansau o sapwilim a tounpadak kan toto mueiwei sang o solar idauen i. <sup>67</sup> Iesus ap kotin kainoma ren ekriamen oko: Komail pil pan kola? <sup>68</sup> A Simon Petrus ap sapeng i: Maing, is me se en ko ong? Pwe ar masan

akan iei maur soutuk. <sup>69</sup> A kit posonar o asaer, me ir me Sarau en Kot. <sup>70</sup> Iesus kotin sapeng irail: Kaidek komail ekriamen, me I piladar, a amen komail me tewil amen. <sup>71</sup> A kotin masaniada duen Iudas Iskariot nain Simon, pwe i amen ren ekriamen oko, me pan pangala i.

## 7

<sup>1</sup> MURIN mepukat Iesus kotin kakan sili Kalilaa, pwe a solar men kakan sili Iudaa, pweki Sus oko masamasan kamatala i. <sup>2</sup> A ran lapalap en Sus oko; iei ran en im en tan tuka korendor. <sup>3</sup> Ri a ol akan ap indai ong i: Kom kotiwei kotilang Iudaa, pwe omui tounpadak kan en pil udial omui wiawia kan, me kom kin wiawia. <sup>4</sup> Pwe sota me kin wiada meakot wasa rir, ma a men indand sili. Ma komui wia mepukat, en kasansale ong sappa. <sup>5</sup> Pwe ri a ol akan pil sota poson i. <sup>6</sup> Iesus ap kotin masani ong irail: Ai ansau saikenta leler, a omail ansau mia ansau karos. <sup>7</sup> Sappa sota kak kailongki komail, a ngai me a kin kailongki, aki I kin kadede, me a wiawia kan me sued. <sup>8</sup> Komail kodalang kamadip et, I sota pan kodalang kamadip et, pwe ai ansau saikenta leler. <sup>9</sup> A kotin masani ong irail mepukat, ap kotikotita Kalilaa. <sup>10</sup> A ri a ol akan lao samalar, i ap pil kotidalang kamadip, ap so sansal a duen me rir. <sup>11</sup> Sus akan ari rapaki i ni kamadip o indada: Ari, ia wasa a kotikot ia? <sup>12</sup> A aramas akan lokolokaia toto duen i, pwe akai indada: Me mau men. A akai me indada: Kaidin, pwe a kin kaweid sapung aramas. <sup>13</sup> Sota me lokaia sansal duen i, pweki ar masak Sus oko. <sup>14</sup> Lao lel ailepan kamadip o, Iesus ap kotin kodalang im en kaudok o kaukaweweda. <sup>15</sup> A Sus akan ap puriamui kila indada: Da duen men et asa wewe en kisin likau, pwe a sota iang padakki. <sup>16</sup> Iesus ap kotin sapeng irail masani: Kaidin ai padak, me I kin kida a en me kadar ia do. <sup>17</sup> Meamen wiawia kupur a, pan weweki ai padak, ma a ren Kot, de sang ren pein ngai. <sup>18</sup> Me kin padapadak sang ni pein i, kin rapaki pein wau i, a me kin rapaki wau en me kadarala i, iei me melel o sota man sued kot pit. <sup>19</sup> Kaidin Moses, me ki ong komail kapung o, a sota amen komail kin kapwaiada kapung o? A da me komail rapakiki kame ia la? <sup>20</sup> Aramas oko sapeng indada: Koe me tanwar en tewil, is me rapaki kame uk ala? <sup>21</sup> Iesus kotin sapeng masani ong irail: Dok taieu, me I wiadar, a komail puriamui kila. <sup>22</sup> Moses ki ong komail er sirkomsais, a kaidin tapi sang ren Moses, pwe sang ren sam akan, a komail kin sirkomsais aramas ni ran en sapat. <sup>23</sup> Ari ma aramas amen ale sirkomsais ni ran en sapat, pwe kapung en Moses ender sapungala, a komail kin sued kin

ia, pweki ai kakelailada aramas pon ni ran en sapat? <sup>24</sup> Der kadeikada duen pali liki, a komail kasau ni tiak en kadeik pung. <sup>25</sup> Men Jerusalem kai ap inda: Kaidin i, me re raparapaki en kamela? <sup>26</sup> A kilang, a padapadak sansal, a re sota man lokaia ong i, de muein saumas akan asaer mau, me i Kristus? <sup>27</sup> Ari, se asaer, wasa men et ko sang ia, a Kristus lao kotido sota me pan asa wasa, me a pwarado sang ia. <sup>28</sup> Iesus ap kotin kapitie laudedada kawewe nan im en kaudok masani: Komail asa ia o wasa I ko sang ia. Ari, kaidin pein ngai, me I kokido, a me kadar ia dor, me melel, me komail sasa. <sup>29</sup> A I asa i, pwe I kodo sang re a, o i me kadar ia dor. <sup>30</sup> Irail ap song saikidi i, a sota me sair i, pwe a ansau kaikenta leler, <sup>31</sup> Aramas toto sang nan pokon o posonla i indada: Iaduen, Kristus lao pwarado, a pan wia kilel toto sang mepukat, me men et wiadar? <sup>32</sup> Parisär akan rongadar, me aramas akan lokelokaia mepukat duen i. Samero lapalap o Parisär akan ap kadarala papa kan, en saikidi i. <sup>33</sup> Iesus ap kotin masani: I pan mi re omail ansau motomot. I ap pan kola ren me kadar ia do. <sup>34</sup> Komail pan rapakin ia, ap sota diar, a wasa, me I pan mi ia, komail sota pan kak ong. <sup>35</sup> Sus oko ap inda nan pung arail: A pan kola ia, pwe sen solar diar i? A pan kola ren me salongalar ren men Krik kan, kaukawewe ong men Krik? <sup>36</sup> Iaduen masan en, me a indada: Komail pan rapakin ia, ap sota diar, a wasa, me I pan mi ia, komail sota pan kak ong? <sup>37</sup> Ni ran en kamadip a nikilar, ni ran lapalap o, Iesus kotida, kapitie laudedada masani: Meamen men nim piladar, i en ko dong ia nim. <sup>38</sup> Me poson ia, duen kisin likau kan indada, sang nan war a pil memaur pan pwilipwili sang ia. <sup>39</sup> Mepukat a kotin masani duen Ngen, me irail, me poson i, en tungole; pwe Ngen saikenta pakadarado, aki Iesus saikenta linganlar. <sup>40</sup> Ari, akai sang nan pokon o ni ar rongadar masan pukat ap indada: Melel Saukop o. <sup>41</sup> A akai indada: Kristus men et! A akai indada: Da, Kristus pan pwarado sang Kaliläa? <sup>42</sup> Kaidin kisin likau me inda, me Kristus pan wan Dawid o kisan men Petleem, kanim o, me Dawid kotikot ia? <sup>43</sup> Irail ap liai toror pasang pweki i. <sup>44</sup> A akai men saikidi i, a sota me sair i. <sup>45</sup> A papa ko ap pure dong ren samero lapalap o Parisär akan. Irail ari idok re irail: Da me komail sota wakido? <sup>46</sup> A papa ko sapeng: Sota man aramas amen padapadak duen men et. <sup>47</sup> Parisär oko ap sapeng irail: Komail pil pakodaular? <sup>48</sup> Iaduen saumas de Parisär amen posonla i? <sup>49</sup> A aramas pukat, me so asa kapung o, re rialar. <sup>50</sup> Nikodemus kis arail ap indang irail: <sup>51</sup> Iaduen, atail kapung pil kin kadeikada aramas amen mon a rong o asa sang pein i duen a wiawia?

<sup>52</sup> Irail sapeng indang i: Iaduen, komui pil kisan men Kaliläa? Rapaki o kilang, me sota saukop amen ko sang Kaliläa. <sup>53</sup> Amen amen ap purelang deu a.

## 8

<sup>1</sup> IESUS ap kotidala pon dol Oliwe. <sup>2</sup> A nin soran a kotin pure dong ong nan im en kaudok. Aramas karos ap pokon dong i. I ari kaipokedi kaukawewe ong irail. <sup>3</sup> A saunkawewe o Parisär akan wa dong i li amen, me diarokadar ni a kamal. Irail kidang i nan pung arail. <sup>4</sup> Ap indang i: Saunpadak, li men et diarokadar ni a kamal. <sup>5</sup> A Moses masani ong kitail nan kapung o, sen kate song en. A komui, da me komui masani? <sup>6</sup> A mepukat re indang i, pwen kasongesong i, pwe ren kak impimpaiki i meakot. A Iesus kotin idiokidi, intingiekidi ong nani pwel sondin lim a. <sup>7</sup> A ni ar poden kalekalelapok re a, a ap kotin dengida masani ong irail: Ari, me sota dip a nan pung omail, a pan tapiada kate i. <sup>8</sup> A pil kotin idiokidi intingiedi ong nan pwel. <sup>9</sup> Irail lao rongadar mel, rap mulikidar tentelwei, me laud mas lel me tikitik o. A Iesus kelepela, li eta, me mi re a. <sup>10</sup> Iesus lao kotin dengida o sota masani meamen, li eta, ap masani ong i: Ia me karaun uk edi kan? Sota me kadeik uk ada? <sup>11</sup> A potoon ong: Sota Maing. Iesus ap kotin masani ong i: I sota pil pan kadeik uk ada. Kowe, koe der pil wiada dip! <sup>12</sup> Iesus ap pil kotin padaki ong irail masani: Ngai marain en sappa. A me kin idauen ia, sota pan weid ni rotorot, pwe marain en maur pan mi re a. <sup>13</sup> Parisär oko ap indai ong i: Komui kadede pein komui; ari, omui kadede sota melel. <sup>14</sup> Iesus kotin sapeng masani ong irail: Ma I kadede pein ngai, ari melel ai kadede, pwe I asa, wasa I kodo sang ia o wasa I koko ong ia, a komail sasa, wasa I ko sang ia o wasa I koko ong ia. <sup>15</sup> Komail kin kadeikada duen pali uduk, a sota meamen, me I kin kadeikada. <sup>16</sup> Ari so ma I kadeikada, ai kadeik pan melel, pwe I sota kin kelep, pwe ngai o Sam, me kadar ia dor. <sup>17</sup> A pil intingidier nan omail kapung, me kadede en aramas riamen me melel. <sup>18</sup> Ngai me kin kadede pein ngai o Sam, me kadar ia dor, kin kadede ia. <sup>19</sup> Irail ap indai ong i: Ia Sam omui? Iesus kotin sapeng: Komail sota asa ngai, pil sota Sam ai. Ma komail asa ia, komail pil pan asa Sam ai. <sup>20</sup> Masan pukat Iesus kotikida nan pera en moni, ni a kotin kaukawewedar nan im en kaudok o. A sota me koleli i, pwe a ansau saikenta leler. <sup>21</sup> Iesus pil kotin masani ong irail: I kokola, a komail pan rapakin ia o mela ni omail dip akan, a wasa, me I pan kola ia, komail sota pan kak ong. <sup>22</sup> Sus oko ap indada: A pan kamela pein i, pweki a inda: A wasa, me I pan kola ia, komail sota

pan kak ong? <sup>23</sup> A kotin masani ong irail: Komail kisan men pa, a ngai kisan men poa. Komail kisan sappa et, a ngai kaidin kisan sappa et. <sup>24</sup> Tei me I indaki ong komail, komail pan mela ni omail dip akan, pwe ma komail sota kamelele ia, komail pan mela ni omail dip akan. <sup>25</sup> Irail ap indai ong i: Is koe? Iesus kotin masani ong irail: Me I indawei mas o, i eta. <sup>26</sup> Me toto I men padaki ong komail o kadeikada, ari so, me kadar ia do me melel. A I kin kasoia ong komail, me I rongadar re a. <sup>27</sup> Irail ari sasa, me a kotin kasoia ong irail duen Sam a. <sup>28</sup> Iesus ap kotin masani ong irail: Komail lao kauadar Nain aramas, komail ap pan asa, me ngai i, o me I sota wia meakot sang pein ngai. A duen Sam, me padaki ong ia er, iduen I kin kasoia wei. <sup>29</sup> Me kadar ia do, kin ieiang ia, a sota lokit ia la, pwe I kin potin wia, me a kupura mauki. <sup>30</sup> Ni a kotin masani mepukat, me toto ap posonla i. <sup>31</sup> Iesus ap kotin masani ong Sus oko, me poson i: Ma komail pan podidi ong ai padak, nan ai tounpadak melel komail. <sup>32</sup> O komail pan asala melel, o melel pan kamaio komail da. <sup>33</sup> Irail sapeng i: Wan Apraam kit, sota me se lidui sang mas kokodo. A iaduen, komui indada: Komail pan maioda? <sup>34</sup> Iesus kotin sapeng irail masani: Melel, melel I indai ong komail, meamen; me wiawia dip, i me ladun dip. <sup>35</sup> A ladu o sota pan mimieta nan im o, na eta pan mimieta. <sup>36</sup> Ari, ma Na pan kamaio komail da, komail pan maioda melel. <sup>37</sup> I asa, me wan Apraam komail, a komail kin rapaki, en kame ia la, pwe ai padak sota kin podidi ong komail. <sup>38</sup> Me I kilang ren Sam ai, iei me I inda wei, a komail kin wiawia, me komail rongada ren sam omail. <sup>39</sup> Irail sapeng indang i: Sam at Apraam. Iesus kotin masani ong irail: Ma komail nain Apraam, seri kan, komail pan wia duen en Apraam a wiawia kan. <sup>40</sup> Ari, met komail kin rapaki kame ia la, aramas amen, me kasoi ong komail melel, me I rongadar ren Kot, i me Apraam sota wiadar. <sup>41</sup> Komail kin kapwaiada wiawia kan en sam omail. Irail ap indang i: Kaidik kit ipwin nenek. Sam at me ta men Kot. <sup>42</sup> Iesus kotin masani ong irail: Ma Kot Sam omail, komail pan pok ong ia, pwe I kodo sang ren Kot, kaidik sang pein ngai, me I kokido, pwe i me kadar ia do. <sup>43</sup> Da me komail sota weweki ai padak? Pweki omail sota kak rong ai padak. <sup>44</sup> Komail tapi sang ren sam omail tewil, o inong en sam omail, me komail men wiada. Nan i men kamela men sang ni tapi o, o a sota dadaurata melel, pwe sota man melel mi re a, ni a lalal likam, a kin kida sang pein audepa, pwe i me likam men o sam en likam o. <sup>45</sup> A komail sota kamelele ia, pweki I padaki ong komail melel. <sup>46</sup> Is re omail, me kak indang ia, me dip ai mia? A

ma I kasoi melel, menda komail so poson? <sup>47</sup> Men ren Kot kin rong en Kot a masan akan. Komail ari sota rong, pwe kaidin me ren Kot komail. <sup>48</sup> Sus oko sapeng indang i: Kaidik meid melel, koe men Samaria amen o tanwar en tewil. <sup>49</sup> Iesus kotin masani: Kaidik tanwar en tewil ngai, pwe I wauneki Sam ai, a komail kin kisang ia wau i. <sup>50</sup> I sota kin rapaki pein wau i, amen mia, me kin raparapaki o kadeikada. <sup>51</sup> Melel, melel I indai ong komail, meamen kapwaiada ai padak, sota pan mela kokolata. <sup>52</sup> Sus oko ap indai ong i: Se ap asaer, me koe tanwar en tewil. Apraam melar, pil saukop akan, a koe me inda: Meamen kapwaiada ai padak, sota pan mela kokolata, <sup>53</sup> Da, komui me lapa sang sam at Apraam, me matalar, pil saukop akan, me matalar? Is me komui pein wia kin uk? <sup>54</sup> Iesus kotin sapeng: Ma I pein kaka kin ia, ai kaka me mal. A Sam ai, me kaka kin ia, me komail kin inda: I atail Kot. <sup>55</sup> Komail ari kaikenta asa i, a I asa i, a ma I inda, me I sasa i, I pan me likam amen dueta komail. A I asa i o kapwaiada a masan akan. <sup>56</sup> Sam omail Apraam peren kida, me a pan kilang ai ran. I ari kilanger ap peren kidar, <sup>57</sup> Sus oko ap indang i: Par limeisok kaik dau po 'mui, a kom kilanger Apraam? <sup>58</sup> Iesus kotin masani ong irail: Melel, melel I indai ong komail, I mier mon Apraam. <sup>59</sup> Irail ap rik takai, pwen kasuk i, i ap kotin oki sang irail pein i, kotila sang nan im en kaudok o.

## 9

<sup>1</sup> IESUS lao kotin daulul, ap masani aramas amen me maskun sang a ipwidi. <sup>2</sup> Sapwilim a tounpadak kan ap idok re a potoan ong: Rapi, is me wiadar dip, i de sam a in a, pweki a ipwidi maskun? <sup>3</sup> Iesus kotin sapeng: Kaidik i me wiadar dip, pil kaidik in a de sam a, a pwe en Kot a wiawia kan en kasansal kida i. <sup>4</sup> I en kapwaiada wiawia kan en me kadar ia do arain ansaun ran, pwe pong pan kodo, i ansau solar amen kak dodok. <sup>5</sup> Arain ai mi sappa, ngai marain en sappa. <sup>6</sup> A lao kotin masanier met, ap likidi nani pwel, wiakida pwel madak iriski mas a. <sup>7</sup> Masani ong i: Kolang pil en Siloa (iet wewe: Pakadarado), opinok ia! I ari kola opinok, ap puredo kilangada wasa. <sup>8</sup> A men imp a kan, o me iang kilangadar, me a men poekipoek amen mas o, rap indada: Kaidik i, me wonon poekipoeki? <sup>9</sup> Akai me inda: I met; a akai me inda: Likamata i, a pein i indada: Ngai i. <sup>10</sup> Irail ari indang i: Iaduen por en mas om akan a kapad pasang? <sup>11</sup> A sapeng indada: Aramas amen me adaneki Iesus, me wiadar pwel madak, iriski mas ai, masani ong ia: Kolang pil en Siloa, opinok ia! I ari kola opinok, ap kilangada wasa. <sup>12</sup> Irail ap idok re a: Ia i? A sapeng: I sasa.

<sup>13</sup> Irail ap kalualang ren Parisär akan me maskun mas. <sup>14</sup> Ari, ni ran en sapat, me Iesus kotin wiadar pwel, kapad pasang por en mas a kan. <sup>15</sup> Parisär akan pil idok duen me a kilang kida wasa. A sapeng irail: A ki ong pwel ni por en mas ai, i ap opinok, ngai ari kilangada wasa. <sup>16</sup> Parisär kai ap inda: Aramas men et kaidik men ren Kot, aki a sota apwali ran en sapat. Akai indada: Daduen, aramas dipan amen kak wia kilel pukat? Irail ari liak toror pasang. <sup>17</sup> Irail pil kalelapok ren me maskun o: Da me koe lamelame duen i? Pwe a kapad pasang mas om? A sapeng: Saukop amen i. <sup>18</sup> Men Sus oko ap sota kamelele, me a ipwiki wei maskun, ap kilangada wasa. Irail lao ekeredo sam o in en me kilangada wasa. <sup>19</sup> Irail idok re 'ra: Nouma ol men et, me komail indinda, me a ipwiki wei maskun? Iaduen a ngarada wasa ansau wet? <sup>20</sup> Sam a in a sapeng ir indada: Se asa, me nait ol et, me ipwiki wei maskun. <sup>21</sup> A se sasa duen a ngarada wasa o me kapad pasang por en mas a. A malar, kainoma re a, a pan pein sakaraki i. <sup>22</sup> Sam o in a inda mepukat, pweki ar masak Sus oko. Pwe Sus oko inauki pena, ma meamen pan kadede me i Kristus a pan lokidokila sang nan sinako. <sup>23</sup> I me sam o in a indada kida: A malar, kainoma re a. <sup>24</sup> Irail ap eker aramas maskun kariapak indai ong i: Wauneki Kot, se asa, me aramas men et me dipan amen, <sup>25</sup> A sapeng ir indada: I sasa, ma i me dipan amen de so. I eta me i asa, me ngai me maskun mas o, i ap potoan ngaradar wasa. <sup>26</sup> Irail ap pil idok re a: Da me a wiai ong uk? Iaduen a kapad pasang mas om? <sup>27</sup> A sapeng irail: I indai ong komail er, a komail sota rong? Da me komail pil men rongki? Komail pil pan a tounpadak ala? <sup>28</sup> Irail kaurureki indada: A tounpadak amen koe, a kit tounpadak en Moses akan. <sup>29</sup> Kit asa, me Kot masani ong Moses. A lap o se sasa, wasa a ko sang ia. <sup>30</sup> Aramas o sapeng indang irail: Meid kapuriamui! I me kapad pasang mas ai kat, a komail sasa, wasa a koti sang ia. <sup>31</sup> Kitail asa, me Kot sota kin mangi me dipan akan. A meamen, me lan Kot, o dadaurata kupur a, iei me a kin kotin mangi. <sup>32</sup> Sang mas kokodo sota me rongadar, me meamen kapad pasang mas en me ipwiki wei maskun. <sup>33</sup> Ma men et sota me ren Kot, a sota pan kak wia meakot. <sup>34</sup> Irail sapeng indang i: Koe me ipwiki wei dip akan a koe ap padaki ong kit? Irail ari kasela i. <sup>35</sup> Iesus lao kotin mangidar, me re kasela i, a lao masani i, ap kotin masani ong i: Koe kin poson Nain Kot? <sup>36</sup> A sapeng potoan ong: Maing, is i pwe i en poson i? <sup>37</sup> Iesus kotin masani ong i: Koe me kilang i. A iet i, me kasakasoi ong uk. <sup>38</sup> A sapeng i: Maing, i posonlar, i ari kaudok

ong i. <sup>39</sup> Iesus kotin masani: I kodon kadeik nan sappa et, pwe me so kilang wasa, en kilangada, a me kilang wasa, en maskunla. <sup>40</sup> A Parisär akan, me mi re a, rongadar a masan pukat, re ap peidok re a: Da, kit me pil maskun? <sup>41</sup> Iesus kotin masani ong irail: Ma komail maskun, sota pan dip omail. A komail indada: Se kilekilang wasa, iei me omail dip pan mimietaki.

## 10

<sup>1</sup> MELEL, melel I indai ong komail, me so weid nan wanim, pedelong ong nan deun sip, a dauda wasa toror, iei men lipirap o men kuli. <sup>2</sup> A me kin pedelong pan wanim, iei silepan sip o. <sup>3</sup> Iei me silepan wanim o kin ritingada mo a; a sip akan kin rong ngil a; i me ekereki na sip akan ad arail, kare irail wei. <sup>4</sup> A kin kapedoi na sip akan, ap tong mo 'rail, o sip akan kin idedauen i, pwe re anlar ngil a. <sup>5</sup> A re sota pan idauen, me re san, pwe re pan tang sang, pwe re san ngil arail. <sup>6</sup> Iesus kotin masani ong irail karaseras pot et, a irail sota weweki mepukat, a me kotin masani ong irail. <sup>7</sup> Iesus pil kotin masani ong irail: Melel, melel I indai ong komail: Ngai wanim en sip akan. <sup>8</sup> Karos, me pwarador mo i, iei lipirap o men kuli, o sip akan sota kin rong irail. <sup>9</sup> Ngai wanim o, a meamen pedelong re i, pan kamaurela o diar manga purepure. <sup>10</sup> Lipirap kin kodon pirapela, o kamela, o kaokaoe, a ngai kodo, pwe irail en ale maur, kakairida kokolata. <sup>11</sup> Ngai silepa mau; a silepa mau kin tonmeteki ong na sip akan maur i. <sup>12</sup> A me kin pwaipwai o me sota udan silepa, o me kaidin udan na sip oko, iei me ngingar kidi en wel kokodo, ap kasela sip oko, tangdau, a kidi en wel saikidi sip oko, kamueit ir pasang. <sup>13</sup> Me pwaipwai o kin tangdau, aki a pwaipwai, o sota insenoki sip oko. <sup>14</sup> Ngai silepa mau, o I asa nai kan, o nai kan pil asa ia. <sup>15</sup> Duen Sam o asa ia, iduen I asa Sam, o I tonmeteki ong sip akan maur i. <sup>16</sup> A pil akai nai sip, me so kisan nan kel wet, mepuko I pil pan wado, o re pan rong ngil ai, o a pan pwin taieu o silepa me ta men, <sup>17</sup> Iei me Sam pok ong ia, pwe I kidi maur i, pwe I en pur ong ale. <sup>18</sup> Sota me ki sang ia, pwe pein ngai kidi. I manaman ong kidi maur i, I pil manaman ong kapure dong ia. Kusoned pot et I aleer sang ren Sam ai. <sup>19</sup> Iei me Sus oko ap pil liak toror pasang pweiki masan pukat. <sup>20</sup> Me toto re 'rail indada: A tanwar en tewil o iakalar. Menda komail rong i? <sup>21</sup> Akai me indada: Kaidik padak en tanwar en tewil pukat, da, tewil pan kak kapad pasang mas en me maskun amen? <sup>22</sup> A ran en isimas en im en kaudok wiaui nan Ierusalem, i ansaun kapau. <sup>23</sup> A Iesus kotikot sili nan im en kaudok, nan palang en Salomo. <sup>24</sup> Sus

oko kapili pena i indang i: Arai da komui pan okioki sang kit? Ma komui Kristus, en kadede ong kit sansal! <sup>25</sup> Iesus kotin masani ong irail: I indai ong komail er, a komail sota poson dodok kan, me I wiadar ni mar en Sam ai, iei me kin kadede ia. <sup>26</sup> A komail sota poson, pwe komail kaidik kisan nai sip, duen me I indai ong komail er. <sup>27</sup> Nai sip oko kin rong ngil ai, a I asa irail a re kin idauen ia. <sup>28</sup> A I ki ong irail maur soutuk, a re sota pan salongala kokolata, o sota, me pan ki sang irail nan pa i. <sup>29</sup> Sam ai, me ki ong ia irail, me lapa sang mekaros, o sota me pan kak ki sang irail ni lim en Sam ai. <sup>30</sup> Ngai o Sam me ta men. <sup>31</sup> Sus oko ap pil rik takai, pwen kasuk i. <sup>32</sup> Iesus kotin sapeng irail: Dodok mau toto, me I kasale ong komail er sang ren Sam o, a menia dodok ren mepukat, me komail kate kin ia? <sup>33</sup> Sus oko ap sapeng i: Kaidik dodok mau eu, me se kate kin komui, a pweki lalaue, o pweki aramas amen koe, me wia kin pein uk Kot, <sup>34</sup> Iesus kotin sapeng irail: A so intingidier nan omai kapung: I indada, komail kot akan, <sup>35</sup> Ari, ma a kin wia kin ir kot, me aleer masan en Kot, pwe kisin likau kan sota kak sapungala; <sup>36</sup> A komail kin inda kin i, me Sam a kasarauialar, o kadara dong sappa, koe lalaue, pweki ai indada: Sapwilim en Kot ngai? <sup>37</sup> Ma I so wiawia dodok kan en Sam ai, komail der kamelele ia. <sup>38</sup> A ma I kin wiawia, komail en posonki dodok kan, ma komail sota poson ia, pwe komail en asa o poson, me Sam ai podidi ong ia, o ngai podidi ong i. <sup>39</sup> Irail ap pil song saikidi i. I ari piti sang ni pa 'rail. <sup>40</sup> O kotin purelang palilan Iordan, wasa Ioanes kin wia paptais ia mas; I ari kotikot wasa o. <sup>41</sup> A me toto pokon dong i indada: Ioanes sota wiadar kileleu; a melel eta karos, me Ioanes masanieki men et. <sup>42</sup> A me toto posonla i wasa o.

## 11

<sup>1</sup> OL amen somaudar ad a Lasarus, men Petanien, kanim en Maria o ri a li Marta. <sup>2</sup> Iei Maria, me keieki potik Kaun o, o limwieki a pwilipepei aluwilu a, me ri a ol Lasarus somaudar. <sup>3</sup> Ri a li ko ari kadar wong i kaireki wong i: Maing, kotin mangi, me re pok ong me somaudar. <sup>4</sup> Iesus lao mangi, ap kotin masani: Kaidik somau en mela eu met, a pweki lingan en Kot, pwe Nain Kot en kalingana kila. <sup>5</sup> Iesus kotin kupura Marta, o ri a li, o Lasarus. <sup>6</sup> A lao kotin mangier, me a somaudar, i ari kotikoteta wasa o pong ria pong. <sup>7</sup> Ap kotin masani ong sapwilim a tounpadak kan: Kitail pan purelang Iudaa. <sup>8</sup> Sapwilim a tounpadak kan potoan ong i: Rapi, Sus oko apton men kasuk ir, a re pan kotin purelang ia? <sup>9</sup> Iesus kotin masani: So auer

eisokriau ni ran eu? Meamen alialu ni ran, sota pan dipikelekel, aki a ngingar marain en sappa. <sup>10</sup> A meamen alialu ni pong, a pan dipikelekel, aki marain sota mi re a. <sup>11</sup> A kotin kasoiada mepukat, ap masani ong irail: Kompoke patail Lasarus mairelar, a I kokolan kapidrida i. <sup>12</sup> A sapwilim a tounpadak kan indang i: Maing, ma a mairelar, a pan maureda. <sup>13</sup> Ari, Iesus kotin masanieda duen a melar, a irail kiki ong, me a masanieda duen a mair en kamol. <sup>14</sup> Iesus ap sansal masani ong irail: Lasarus melar, <sup>15</sup> A I peren kida, me I sota mi wasa o pweki komail, pwe komail en posonla. Ari, kitail en koko wei re a! <sup>16</sup> Tomas, me pil ad a Didimus, ap indai ong warok tei kan: Kitail en pil kokola, pwen iang i mela. <sup>17</sup> Iesus lao kotido, ap kotin diarada, me a mi nan sousou pong pa pong. <sup>18</sup> Petanien me koren iong Ierusalem impan mail riau. <sup>19</sup> A Sus oko me toto ko dong Marta o Maria, pwen kamait ira la pweki ri ara ol o. <sup>20</sup> Marta lao rongadar, me Iesus kotido, ap koeila tu ong i. A Maria momod nan im o. <sup>21</sup> Marta ap potoan ong Iesus: Maing, ma re kotikot met, ri ai ol sota pan mela. <sup>22</sup> Ari so, i asa meakot re pan kotin poeki ren Kot, Kot pan kotiki ong ir. <sup>23</sup> Iesus kotin masani ong i: Ri om ol pan maureda. <sup>24</sup> Marta potoan ong i: I asa, me a pan maureda ni ias en ni ran nik o. <sup>25</sup> Iesus kotin masani ong i: Ngai kamaur o maur, me poson ia, pan memaureta pil murin a mela. <sup>26</sup> A meamen me maur o poson ia, sota pan mela kokolata; koe kamelele mepukat? <sup>27</sup> A potoan ong i: Ei Maing, i poson, me ir me Kristus Sapwilim en Kot, me udan pwara dong sappa. <sup>28</sup> A lao indada met, ap koeila ren Maria ri a li, monginki ong i: Saunpadak kotidor kainoma uk. <sup>29</sup> A lao rongadar, ap uda, madang wei re a, <sup>30</sup> A Iesus saikenta lel ong kanim o, pwe a kotikoteta wasa Marta tu ong i ia. <sup>31</sup> Sus oko, me mi re a nan im o, pwen kamait i ala, lao kilangda, me Maria madang uda tang wei, rap idauenla i, indinda: A pan ko ong ni sousou, pwen sangesang ia. <sup>32</sup> Maria lao lel wasa o, o kilang i, ap poridi ong ni aluwilu a indang i: Maing, ma re kotikot met, ri ai ol sota pan mela. <sup>33</sup> Iesus lao masani i sangesang, o Sus oko, me iang i kokodo pil sangesang, ap kupurola, <sup>34</sup> Masani: Komail pwilikidi ia i? Irail potoan ong i: Maing, kotido masani. <sup>35</sup> Iesus kotin tontonir. <sup>36</sup> Sus oko ap inda: Kilang duen a pok ong i! <sup>37</sup> A akai ir me indada: A so kak pan men et me kapad pasang mas en me maskun o, me ol men et ender mela? <sup>38</sup> Iesus pil kupurola koti dong sousou o. A por o ulong nan kisin dol o takai eu mi poa. <sup>39</sup> Iesus kotin masani: Katapure wei takai en! A Marta, en me melar ri a li, indada: Maing, a matalar, pwe a mi

met pong pa pong. <sup>40</sup> Iesus kotin masani ong i: I so indai ong uk, ma koe poson, koe pan kilangada lingan en Kot. <sup>41</sup> Irail ap katapure sang takai o. A Iesus kotin masanda masani: Sam, I danke komui, me komui mangi ia er. <sup>42</sup> A i asa, me komui kin mangi ia ansau karos, a pweki pokon o, me u sili, I indaki mepukat, pwe irail en poson, me komui, me kadar ia do. <sup>43</sup> A lao kotin masani met, ap kapitie laudeta masani: Lasarus, koeido! <sup>44</sup> A me melar o ap pedoido, likau en sousou kidim pena na o pa kan, o mas a me pirapinki pena lim en puto. A Iesus kotin masani ong irail: Lapwada kapitila i! <sup>45</sup> Men Sus toto, me ko dong Maria, o kilanger, me Iesus kotin wiadar, posonla i. <sup>46</sup> A akai ir kowe ren Parisär oko, kaire kin irail me Iesus kotin wiadar. <sup>47</sup> Samero lapalap o Parisär akan ap pokon pena kapung indada: Da me kitail en wiada? Pwe aramas men et kin wia kilel toto. <sup>48</sup> Ma kitail sota pan mokidi ong i, karos pan posonla i, o men Rom pan kodo, ki sang kitail wei o atail kainok. <sup>49</sup> A amen irail ad a Kaipas, me samoro lapalap ni par o, indang irail: Komail meid so lolekong. <sup>50</sup> O sota lamelame, me a mau ong komail, aramas ta men en kam kila aramas akan, pwe kainok pokon ender lokidokila. <sup>51</sup> A kaidik sang pein i, me a katitiki met, a i me samero lapalap ni par o, i ari kopada, me Iesus pan kamataki kainok o. <sup>52</sup> A kaidik kainok eta, pwe a pil pan kapokon pena seri en Kot akan, me muei pasang nin sap akan. <sup>53</sup> Sang ni ran o irail raparapaki en kamatala i. <sup>54</sup> Iesus ap solar kotikot sili sansal ren Sus oko, pwe a kotilang eu sap impan sap tan ni kanim eu ad a Epren, o kotikot ia iang sapwilim a tounpadak kan. <sup>55</sup> A pasa en Sus oko me korendor, o me toto koeie sang nan sap karos, kodalang Ierusalem mon pasa, pwen kamaui pein irail. <sup>56</sup> Irail ari raparapaki Iesus idedok nan pung arail, ni ar pokopokon nan im en kaudok: Da me komail lamelame, a sota pan ko dong kamadip o? <sup>57</sup> A samero lapalap o Parisär akan wiadar kusoned eu, meamen me asa wasa a kot ia, i en kasaleda, pwe ren saikidi i.

## 12

<sup>1</sup> PONG wonu pong mon pasa Iesus kotilang Petanien, wasa Lasarus me melar, kauson ia, me Iesus kotin kamauredar sang ren me melar akan. <sup>2</sup> Irail ari kaonopada konot, pwe a en kotin kasipong re 'rail; Marta papa, a Lasarus amen irail me iang I kotikot ni tepel. <sup>3</sup> Maria ap wado paun en men kei eu, udan pil en narde, me kasampwalia, keiedi ong ni aluwilu en Iesus o limwieki a pwilipepei aluwilu a; a im o me dir kila po en men kei. <sup>4</sup> Iudas Iskariot, amen ren

sapwilim a tounpadak kan, nain Simon, me pan pangala i, ap indada: <sup>5</sup> Da men kei wet sota netilar, kareda denar silepuki, ap nek ong samama kan? <sup>6</sup> Kaidik a pok ong me samama kan, me a idokki met, a pweki lipirap amen i, o saunkanikid en moni, wewa moni, me aramas kidar. <sup>7</sup> Iesus ap kotin masani: Der mokidi ong i! Pwe a kaonopadang ran en ai pan saredi. <sup>8</sup> Pwe me samma kan kin potopot re omail, a ngai sota sota kin potopot re omail. <sup>9</sup> Sus oko me toto ari asaer, me a kot wasa o, irail ari kodo pweki Iesus o pil, pwen kilang Lasarus, me a kotin kamauredar sang ren me melar akan. <sup>10</sup> Samero lapalap akan pil raparapaki, en pil kamela Lasarus. <sup>11</sup> Pwe Sus oko toto kola o poson Iesus pweki i. <sup>12</sup> Mandan ran o aramas toto, me toun iang kamadip o, lao rong, me Iesus pan kotilang Ierusalem, <sup>13</sup> Ap paledi ran tuka kan o koeila tu ong i, ngisingisida: Osiana! Meid iasanai me kotido ni mar en Kaun o Nanmarki en Israel! <sup>14</sup> A Iesus lao kotin masani esel pul amen, ap kaipokedi poa, duen a intingidier: <sup>15</sup> Der masak nain Sion sripein! Kilang om Nanmarki kotido, kaipokedi pon nain esel amen. <sup>16</sup> A sapwilim a tounpadak kan sota madang weweki mepukat. A Iesus lao linganlar, irail ap tamanda mepukat, me indingidier duen i, o me ir wiai ong i mepukat. <sup>17</sup> A pokon o, me iang i ni a kotin molipei Lasarus sang nan sousou o, ni a kotin kamauredar i sang ren me melar akan, kadede i! <sup>18</sup> Iei me aramas kokiieilang i, pwe irail rongadar, me a kotin wiadar kilel wet. <sup>19</sup> Parisär oko ap indada nan pung ar: Komail kilang, me komail sota kak wia meakot. Kilang, toun sap akan idauenla i. <sup>20</sup> Akai men Krik iang irail, me koda dong kamadip o, pwen kaudok. <sup>21</sup> Mepukat ko dong Pilipus, men Petsaida en Kaliläa, poeki re a indada: Maing, se men udial Iesus. <sup>22</sup> Pilipus ap kodo kaireki Andreas, a Andreas o Pilipus kaireki Iesus. <sup>23</sup> A Iesus kotin sapeng irail masani: Ansau leler, me Nain aramas pan kalinganla. <sup>24</sup> Melel, melel I indai ong komail, ma wan korn so moredi ong nan pwel o mela, a pan kelepata, a ma a pan mela, a pan kaparapar wa toto. <sup>25</sup> Me pokepoke maur i, pan salongala; a me tounmeteki maur i pali pa, pan diarada maur soutuk. <sup>26</sup> Meamen papa ia, i en idauen ia! A wasa I mi ia, i wasa me papa ia, pan pil mi ia. Ma meamen papa ia, i me Sam o pan kasapwilada. <sup>27</sup> I ap lol olar, a da me I en inda? Sam kamaio wei sang ia ansau wet, ari so, i me I koki dong ansau wet. <sup>28</sup> Sam, kalinganada mar omui! Ngil eu ap peidido sang nanlang indada: I kalinganadaer, o I pan pil kalinganada. <sup>29</sup> A aramas akan me u sili me rongadar, indada: A nansapwe. A akai indada: Tounlang

amen me kasoaia ong i. <sup>30</sup> Iesus kotin sapeng masani: Kaidik pweki ngai, me ngil wet wiauiquier a pweki komail. <sup>31</sup> Met ansau en kadeik en sappa wet. Met kaun en sappa et pan lokidokila. <sup>32</sup> A ngai lao langada sang sappa, I pan kainonga dong ia karos. <sup>33</sup> I me a kotin kokop kidar duen a pan kamatala. <sup>34</sup> Aramas akan sapeng i: Se rongadar sang nan kapung o, me Kristus pan potopoteta, a iaduen, kom kasoiada, me Nain aramas en kakauda. Is Nain aramas men et? <sup>35</sup> Iesus ap kotin masani ong irail: Marain mi re omail ansau kis. <sup>36</sup> Weweid, ni ansau marain mi re omail, pwe rotorot ender kono komail edi. Pwe me kin weweid nan rotorot, kin sasa wasa, me a ko ong ia. <sup>37</sup> Poson marain, ni a mimi re omail, pwe komail en seri en marainla. Iesus kotin masani mepukat, ap kotila karukila pein i sang irail. <sup>38</sup> A i me kotin wiadar kilel toto mo 'rail, ari so, irail sota poson i, <sup>39</sup> Pwe kokop en saukop Iesaia en pwaida, me a masani: Kaun o, is me poson at kasoi? O is me lim en Kaun kasansal ong? <sup>40</sup> Irail ari sota kak poson, pwe Iesaia pil katitiki: <sup>41</sup> A kotin karotonga mas arail o kakekaluakala mongiong arail, pwe ren so kilangki mas arail, o asaki mongiong arail, o wukila, o I en kakel ir ada. <sup>42</sup> Mepukat Iesaia masanier, ni a kilanger a lingan o katitiki i. <sup>43</sup> Ari ren saumas lapalap me toto, me poson i, a pweki Parisar akan re sota ponasa i, pwe ren der lokidokila sang nan sinakoke. <sup>44</sup> Pwe re mauki konekon ren aramas akan mon konekon ren Kot. <sup>45</sup> Iesus kotin kapitie laudeda masani: Me poson ia, kaidin ngai, me a kin poson, a me kadar ia dor. <sup>46</sup> A me kilang ia, a pil kilang, me kadar ia dor. <sup>47</sup> I kodon kamaraini sappa, pwe amen amen me poson ia, ender mimieta nan rotorot. <sup>48</sup> A ma meamen rong ai padak kan, ap sota apapwali, I sota kin kadeikada i, pwe I sota kodon kadeikada sappa, a pwen kamaurida sappa. <sup>49</sup> Me kase ia la o so oke ai padak kan, nan kadeikapa mia: Ai padak, me I kida, i me pan kadeikada i ni ran nik o. <sup>50</sup> Pwe I sota padaki wei sang pein ngai. A Sam, me kadar ia dor, i me ki ong ia er kusoned eu, me I en inda o padakieki. <sup>51</sup> O I asa, maur soutuk a kusoned o. Ari, karos me I padaki wei, I kin padaki duen Sam masani ong ia.

### 13

<sup>1</sup> MON kamadip en pasa Iesus lao kotin mangier, me ansau a pan kotila sang sappa, kotila ren Sam a korendor, duen a kotin kupuramauki sapwilim a kan, me mi sappa, iduen a kotin kupura irail lel imwi, <sup>2</sup> Ni ar kotin kasipong ansau me tewil ki ong er nan mongiong en Iudas Iskariot nain Simon, en pangala i. <sup>3</sup> Iesus lao kotin mangier, me Sam kotiki onger ni lim a kan mekaros,

o me a kotido sang ren Kot, o me a pan kotila ren Kot, <sup>4</sup> Ap kotida sang ni kasipong, kotikidi sapwilim a likau en liki ap ale dauel eu pirakidi pein i, <sup>5</sup> A wutoki pil nan dal, ap pikikidi widen na en sapwilim a tounpadak kan, o limwieki dauel, me a piraki pena. <sup>6</sup> A lao kotin lel Simon Petrus, a ap potoan ong i: Maing, re pan kotin widen na i kat? <sup>7</sup> Iesus kotin sapeng masani ong i: Koe kin sasa, me I wia metet, a mur koe pan asala. <sup>8</sup> Petrus potoan ong i: Re sota pan kotin widen na i kat kokolata. Iesus kotin sapeng i: Ma I sota widen uk, nan sota pwais om re i. <sup>9</sup> Simon Petrus ap potoan ong i: Maing, kaidin na eta, a pil pa o mong ai! <sup>10</sup> Iesus kotin masani ong i: Me duduer, solar mau ong omiom o opinok, pwe a makeleleker, a na eta, me pan wideut; komail me makelekel, a kaidin karos. <sup>11</sup> Pwe a kotin mangi, me pan pangala i; i me a kotin masanieki: Kaidin komail karos me makelelekel. <sup>12</sup> A lao kotin widener na ar akan, a kotin pur ong sapwilim a likau en liki. A pil kaipokedi ni tepel masani ong irail: Komail asaer me I wiai ong komail er? <sup>13</sup> Komail kin adane kin ia Saunpadak o Kaun, ari me pung, pwe iei ngai. <sup>14</sup> Ari, ma ngai, Kaun o Saunpadak widen na omail, komail ari pil widen na omail pena. <sup>15</sup> Pwe I ki ong komail er sansal mau eu, pwe komail en kaalemongi ia, o wia, duen I wiai ong komail. <sup>16</sup> Melel, melel I indai ong komail, ladu me sota laude sang a saumas, de me pakadarado me sota laude sang me kadarado i. <sup>17</sup> Ma komail asa mepukat, komail meid pai, ma komail wiada. <sup>18</sup> Kaidin komail karos, me I indinda. I asa, me I piladar. A pwe kisin likau en pwaida: Me iang ia kangkang prot, kin tiaki ia di. <sup>19</sup> Ansau wet I indai ong komail mepukat mon a pan wiaui, pwe a lao wiaui, komail en poson, me ngai i. <sup>20</sup> Melel, melel I indai ong komail, meamen me kasamo, me I kadar wei, kin kasamo ia, a me kin kasamo ia, kin kasamo, me kadar ia do. <sup>21</sup> Iesus lao kotin masani wei mepukat, ap kupurola kadede masani: Melel, melel I indai ong komail, amen komail pan pang ia la. <sup>22</sup> Sapwilim a tounpadak kan ap soupei pena o sasa, is i, me a kotin masanieki. <sup>23</sup> A amen sapwilim a tounpadak kan, me Iesus kotin kupura mauki, momod ni tepel impan Iesus. <sup>24</sup> Simon Petrus ap olol ong i, en idok, is i me a kotin masani. <sup>25</sup> I ap kai ong pan kupur en Iesus potoan ong i: Maing, is i? <sup>26</sup> Iesus kotin sapeng: Iei i, me I pan ki ong kisin prot i lao kaduedier nan dal o. A lao kotin kaduedier kisin prot o, a kotiki ong Iudas Iskariot nain Simon. <sup>27</sup> A lao tungole kisin prot o, Satan ap tilong lole. Iesus ap kotin masani ong i: Wiada madang, me koe pan wiada! <sup>28</sup> A sota, ren me momod ni tepel, asa, da me a kotin masanieki ong i

met. <sup>29</sup> Pwe akai kiki ong, me Iesus kotin masani ong i: Netie dong kitail kapwa en kamadip o, de a en ki ong me samama ko meakot, pwe a kin wewa ed en moni. <sup>30</sup> A lao tungoler kisin prot, ap madang pedoi wei, a wasa pongier. <sup>31</sup> A lao pedoi sanger, Iesus ap kotin masani: Nain aramas ari linganlar, o Kot me lingana kilar i. <sup>32</sup> Ma Kot lingan kilar i, Kot ap pan pil kalinganaki pein i. A pan madang kalinganada i. <sup>33</sup> Seri ko, I pan ieiang komail ansau kis, komail pan rapa kin ia, a duen I indai ong Sus akan: Wasa me I pan kola ia, komail sota pan kak ong. Iei duen I pil indai ong komail ansau wet. <sup>34</sup> I ki ong komail kusoned kap eu, pwe komail en poke pena, duen I pok ong komail er, iei duen komail en poke pena! <sup>35</sup> Pwe i me karos pan asaki, me komail ai tounpadak kan, ma komail limpok pena. <sup>36</sup> Simon Petrus potoan ong i: Maing, re pan kotila ia? Iesus kotin sapeng i: Wasa me I pan kola ia, koe sota kak idauen ia ansau wet, a koe pan idauen ia eu ran. <sup>37</sup> Petrus potoan ong i: Maing, da me i so kak idauen ir ki met? I pan kasela maur i pweki komui. <sup>38</sup> Iesus kotin masani ong i: Koe pan kasela maur om pweki ngai? Melel, melel I indai ong uk, mon malek pan kakorot, koe pan kamam kin ia pan me sili pak.

## 14

<sup>1</sup> MONGIONG omai der padau! Komail kin poson Kot; en pil poson ia! <sup>2</sup> Nan tanpas en Sam ai pera toto mia. Ma so I pan indai ong komail. Pwe I kokolan kaonopada deu 'mail, <sup>3</sup> Ma I kola kaonopada deu 'mail, I pan puredo, uk komail dong ia. Pwe wasa I kin mi ia, komail en pil mi ia. <sup>4</sup> A komail asa, wasa I kola ia, o komail asa al o. <sup>5</sup> Tomas potoan ong i: Maing, se sasa, wasa re pan kotila ia, o pala se pan asa al o? <sup>6</sup> Iesus kotin masani ong i: Ngai me al, o melel, o maur, sota me kak kodong Sam, ma so ngai. <sup>7</sup> Ma komail asa ia er, komail pil asa Sam ai. A komail asa i sang ansau wet kokolata o kilangadar i. <sup>8</sup> Pilipus potoan ong i: Maing, kotin kasale dong kit Sam, kit ap pan nenenla! <sup>9</sup> Iesus kotin masani ong i: Pilipus, I ieiang komail er ansau warai, a koe so wewe kin ia? Me kilang ia er i me kilangadar Sam. A iaduen om indada: Kasale ong kit Sam? <sup>10</sup> Koe so kamelele, me ngai podidi ong Sam o Sam podidi ong ia? A padak kan, me I ki ong komail, kaidin pein ai, a en Sam, me mi re i, i me kin wiawia dodok pukat. <sup>11</sup> Kamelele ia, ngai podidi ong Sam, o Sam kin podidi ong ia; a ma so, komail kamelele ia pweki ai wiawia kan. <sup>12</sup> Melel, melel I indai ong komail, meamen poson ia, a pil pan wiawia dodok kan me I kin wiawia, o a pan wiada, me lapa sang mepukat, pweki I kokola ren Sam. <sup>13</sup> A

meakot komail pan poeki ni ad ai, iei me I pan wia, pwe Sam en lingana kida Na. <sup>14</sup> Ma komail pan poeki meakot ni ad ai, I pan wia. <sup>15</sup> Ma komail pok ong ia, en kapwaiada ai kusoned akan! <sup>16</sup> A I pan poeki ren Sam, a i me pan porone dong komail amen saunkamait, pwen mi re omai kokolata. <sup>17</sup> Ngen en melel, me sappa so kak ale, pwe re sota kilang i pil sota asa i. A komail asa i pwe a kin mi re omai, o a pan mi lol omai. <sup>18</sup> I sota pan mueid ong komail, en sapoupou, I pan ko dong komail. <sup>19</sup> Ansau kis sappa solar pan kilang ia, a komail kin kilang ia. Ngai me maur, o i me komail pil pan meamaureki. <sup>20</sup> Ni ran o komail pan asa, me ngai podidi ong Sam ai o komail podidi ong ia o ngai ong komail. <sup>21</sup> Me aleer ai kusoned akan o kapwaiada, iei me kin pok ong ia, a me kin pok ong ia, kin konekon ren Sam ai, a I pan pok ong i, o kasansale ong i pein ngai. <sup>22</sup> Iudas, kaidik Iskariot, potoan ong i: Maing, iaduen re pan kotin kasansale ong kit pein ir, a ong sappa so? <sup>23</sup> Iesus kotin sapeng masani ong i: Ma meamen pok ong ia, a pan kapwaiada ai padak kan, a Sam ai pan pok ong i, a se pan ko ong re a kaukauson re a. <sup>24</sup> A me so pok ong ia, sota kin kapwaiada ai padak kan. A kaidik ai padak, me komail kin rong, a en Sam o, me kadar ia dor. <sup>25</sup> Mepukat I padaki ong komail er ni ai mi re omai. <sup>26</sup> A saunkamait, Ngen sarau, me Sam o pan poronedo ni ad ai, i me pan kawewe ong komail meakoros o kataman kin komail me I padaki ong komail er. <sup>27</sup> I mueid ong komail popol. Ai popol me I ki ong komail, kaidin duen sappa kikida, me I ki ong komail. Mongiong omai der patau, pil der masak. <sup>28</sup> Komail rongadar, me I indai ong komail er, I koko wei o pan pure dong komail. Ma komail pok ong ia, komail pan perenki, me I kokola ren Sam, pwe Sam o me lapa sang ia. <sup>29</sup> Ansau wet I indai ong komail er mepukat, mon a pan wiawia, pwe a lao wiawia, komail en poson. <sup>30</sup> I solar pan kasakaso toto ong komail, pwe kaun en sappa o kokodo, a sota a meakot re i. <sup>31</sup> A pwe sappa en asa, me I kin pok ong Sam, o me I kin wiawia duen me Sam masani ong ia er, kitail en uda kokowe!

## 15

<sup>1</sup> NGAi wain melel pot, a Sam ai saumata. <sup>2</sup> Ra karos, me podidi ong ia, ap sota wa, a kin lepuke sang, a karos me wa, a kin koko, pwen wa totola. <sup>3</sup> Komail ari makelekel kidar padak, me I ki ong komail er. <sup>4</sup> Komail podidi ong ia o ngai ong komail. Ra sota kak pein wa, ma a so podidi ong wain, iduen komail, ma komail so podidi ong ia. <sup>5</sup> Ngai wain pot, a ra kan komail. Me podidi ong ia o ngai ong i, iei i, me kin wawa toto; pwe komail sota kak wia meakot ma sota



ngai. <sup>6</sup> Meamen so podidi ong ia, pan loki-dokila dueta ra, ap mongedi; aramas kin wasa ir pena, kase ir ala nani iai, ir ari pan rongala. <sup>7</sup> Ma komail podidi ong ia, o ai padak kan podidi ong komail, komail pan poeki meakot, me komail mauki, a a pan pwai ong komail. <sup>8</sup> Nan i me Sam ai kalingana kila, omail wawa toto, o komail pan wiala ai tounpadak kan. <sup>9</sup> Due Sam o pok ong ia er; iduen I pil pok ong komail; komail podidi ong ai limpok! <sup>10</sup> Ma komail pan peiki ong ai kusoned akan, komail pan podidi ong ai limpok, duen I kin peiki ong en Sam ai kusoned akan, o podidi ong a limpok. <sup>11</sup> Mepukat I padaki ong komail er; pwe ai peren en podidi ong komail, o omail peren en unsokela. <sup>12</sup> Nan iet ai kusoned: Komail en poke pena, duen i pok ong komail er. <sup>13</sup> Sota me a limpok laude sang met, me pan mueid kila maur i kom-pokepa kan. <sup>14</sup> Komail me kompokepa i, ma komail wiawia, me I indai ong komail. <sup>15</sup> I solar kaadaneki komail ladu, pwe ladu sasa, me a saumas kin wia. A I kaadane kin komail kompokepa i kan, aki I kasale ong komail er karos, me I rongadar sang ren Sam ai. <sup>16</sup> Kaidin komail me pil ia dar, a ngai me piladar komail o kilele ong komail, en kokowe kapareda wa, o omail wa en mimieta, pwe karos, me komail pan poeki ren Sam ni ad ai, a pan kotiki ong komail. <sup>17</sup> A iet me I panaui kin komail, komail en poke pena! <sup>18</sup> Ma sappa kailong kin komail, komail en asa, me a kailong kin ia mo omail. <sup>19</sup> Ma kisan sappa komail, sappa pan pok ong me a; a komail kaidin kisan sappa, pwe I pil komail dar sang sappa, iei me sappa kailong kin komail. <sup>20</sup> Tamatamanda kasoi o, me I kasoia ong komail er: Ladu me sota laude sang a saumas ma re kame ia er; re pil pan kame komail. A ma irail pan kapwaiada ai padak, re pil pan kapwaiada omail. <sup>21</sup> A mepukat karos re pan wiai ong komail pweki ad ai, aki ar so asa me kadar ia dor. <sup>22</sup> Ma I so kodo o padaki ong irail, nan sota pan dip arail, a met sota peikid pan dip arail. <sup>23</sup> Me kailong kin ia, pil kin kailongki Sam ai. <sup>24</sup> Ma I so wiadar dodok kan nan pung arail, me sota amen wiadar, nan sota pan dip arail. A met irail kilanger o kailong kin ia er o pil Sam ai. <sup>25</sup> A mepukat wiaui er pwe masan o en pwaiada, me intingidier nan arail kapung: Irail kailong kin ia, a sota karepa. <sup>26</sup> A saunkamait lao kodoer, me I pan kadarado sang ren Sam, iei Ngen en melel, me kin kodo sang ren Sam, i me pan kadede ngai. <sup>27</sup> A komail pil pan kadede, pwe komail iang ia er sang ni tapi o.

## 16

<sup>1</sup> MEPUKAT I padaki ong komail er pwe komail der makarada. <sup>2</sup> Irail pan kase

komail la sang nan sinako, a eu ansau kokodo, meamen kame komail la, pan kiki ong, me a papa Kot. <sup>3</sup> A mepukat re pan wiai ong komail, pweki ar sasa Sam o ngai. <sup>4</sup> A mepukat I padaki ong komail er; pwe ansau lao leler; komail en tamanda, me I indai ong komail er. A mepukat I sota indai ong komail er ni tapi o, pwe I ieiang komail. <sup>5</sup> A met I kola ren me kadar ia do, a sota amen komail kin idok re i: Ia wasa kom pan kola ia? <sup>6</sup> A pweki ai padaki ong komail mepukat, mongiong omail me dir en insensued. <sup>7</sup> Ari so, I kasoi ong komail melel, me mau ong komail I en kola. Pwe ma I so kola saunkamait sota pan pwara dong komail. A ma I kola, I pan kadara dong komail i. <sup>8</sup> A i lao kodo, a pan kasau ong sappa dip, o pung, o kadeik. <sup>9</sup> Duen dip, pweki irail sota poson ia. <sup>10</sup> Duen pung, pweki I kola ren Sam, o komail solar pan kilang ia. <sup>11</sup> A duen kadeik o, pweki kaun en sappa wet me pakadeikadar. <sup>12</sup> I men padaki ong komail me toto, a met komail sota kak ong. <sup>13</sup> A Ngen en melel lao pwarado, a pan padaki ong komail melel akan karos. Pwe a sota pan padaki wei sang nan pein i, a meakot a pan rong, i me a pan indada. O a pan kasale ong komail meakan me pan wiaui. <sup>14</sup> A pan kalingana ia da, pwe a pan ale me ai o kasale ong komail. <sup>15</sup> Sapwilim en Sam meakaros, iei me pil udan ai. I me I indakier; me a pan ale me ai o kasale ong komail. <sup>16</sup> Murin ansau kis komail solar pan kilang ia; o pil murin ansau kis, a komail pan kilang ia, pwe I kola ren Sam. <sup>17</sup> Sapwilim a tounpadak kai ap indada nan pung ar: Dakot met, me a kotin masani ong kitail: Murin ansau kis komail solar pan kilang ia, o pil murin ansau kis, a komail pan kilang ia, pwe I kokola ren Sam? <sup>18</sup> Irail ap indada: Dakot murin ansau kis, me a kotin masanieki? Kitail sota weweki, me a kotin masani. <sup>19</sup> A Iesus kotin angi, me re men idok re a, ap kotin masani ong irail: Komail kakaaki nan pung omail, me I indada: Murin ansau kis komail solar pan kilang ia, o pil murin ansau kis, a komail pan kilang ia. <sup>20</sup> Melel, melel I indai ong komail, komail pan sangesang o mamaiei, a sappa pan pereperen; komail pan mamauk, a omail mauk pan wiki ong popol. <sup>21</sup> Li o ni a pan naitik kin insensued, aki a ansau leler; a a lao naitikidier seri o, a solar kin tamanda a insensued, aki a peren kida, me aramas amen ipwidi ong sappa. <sup>22</sup> Pil dueta komail kin insensued ansau wet. A I pil pan kilang komail o mongiong omail pan pereperen. A sota me pan atia sang komail omail peren. <sup>23</sup> A lao ni ran o komail sota pan idok re i meakot. Melel, melel I indai ong komail, ma komail pan poeki meakot ren Sam ni ad ai, a pan kotiki ong komail. <sup>24</sup> Sang mas

kokodo komail sota poeki meakot ni ad ai. Poeki, a komail pan ale; pwe omail peren en unsokela. <sup>25</sup> Mepukat I padaki ong komail er ni karaseras akan. A eu ansau kokodo, me I solar pan padapadak ni karaseras, pwe I pan sansal padaki ong komail duen Sam. <sup>26</sup> Lao ran o komail pan poeki ni ad ai. A I sota indai ong komail, me I pan kapakapa kin komail ren Sam. <sup>27</sup> Pwe Sam pein pok ong komail, pweki komail pok ong ia er o kamelele, me I kodo sang ren Kot. <sup>28</sup> I kodo sang ren Sam o kodido sappa; I pil kokola sang nin sappa, kokola ren Sam. <sup>29</sup> Sapwilim a tounpadak kan potoan ong i: Masani, ansau wet re kin kotin sansal padaki ong kit o solar ni karaseras. <sup>30</sup> Kit ap asaer, me re kotin mangier meakaros, o re sota mau ong, amen en idok meakot re omui. I me se posonki, me re kotido sang ren Kot. <sup>31</sup> Iesus kotin sapeng irail: Komail posonlar met? <sup>32</sup> Kilang, ansau kokodo, ari a leler, me komail pan kamueit pasang, amen amen nan udan deu a o kase ia la. I ap pan kelepe; ari so, I sota kin kelepe, pwe Sam o ieiang ia. <sup>33</sup> Mepukat I padaki ong komail, pwe komail en popole kin ia. Nan sappa komail kin kalokolok, ari so, komail popol, pwe I kaloedier sappa.

## 17

<sup>1</sup> IESUS kotin masani wei mepukat, ap kotin masanda nanlang masani: Sam ai, ansau o leler, en kalinganada sapwilim omui Ol, pwe sapwilim omui Ol en pil kalinganada komui. <sup>2</sup> Duen komui kotiki ong i er manaman, en poedi uduk karos, pwe a en ki ong karos, me komui ki ong i er, maur soutuk. <sup>3</sup> A iet maur soutuk: Ren asa komui la, me komui ta Kot melel, o Iesus Kristus, me komui kadarador. <sup>4</sup> I kalingana komui dar nin sappa, I kanikialar dodok, me komui kotiki dong ia, I en wiada. <sup>5</sup> A met Sam ai, kom kotin kalingana kin ia pein omui lingan, me I linganakier, ni ai mi re omui, ni sappa saikenta mia. <sup>6</sup> I kasansale ong aramas akan mar omui, me komui ki ong ia er sang nin sappa. Irail udan noumui, a komui ki ong ia er irail; a re kin kapwaiada omui masan. <sup>7</sup> A met re asalar, me karos, me komui ki ong ia er, pwili sang komui. <sup>8</sup> A masan akan, me komui ki ong ia er, i me I ki ong irail er; o irail aleer o wewekilar melel, me I pwarado sang komui, o re posonlar, me komui kadar ia dor. <sup>9</sup> I kin kapakapa kin ir, I sota kin kapakapa kin sappa, a irail, me komui ki ong ia er, pwe noumui irail. <sup>10</sup> Pwe karos me ai, iei noumui; a karos me noumui, iei ai o I lingan kin irail lar. <sup>11</sup> I solar mi sappa, a mepukat mi sappa. I kola re omui. Sam ai saraui, kanikid irail ni mar omui, me komui ki ong ia er, pwe irail en me ta men dueta kita. <sup>12</sup> Ni ai mi re irail, I nikid

irail er ni mar omui, me komui ki ong ia er; I nikid irail er; sota amen ir salongalar, seri salongala eta, pwe kisin likau en pwaida. <sup>13</sup> A met I koko wei re omui. I padaki wei mepukat nan sappa, pwe ai peren unsok en mi re 'rail. <sup>14</sup> I ki ong irail er omui masan, o sappa kailong kin irail er, pwe irail kaidin kisan sappa, dueta, ngai kaidin kisan sappa. <sup>15</sup> I sota kin poeki, komui en wa irail sang nin sappa, a pwe komui en pera wei sang irail me sued. <sup>16</sup> Irail kaidin kisan sappa, dueta ngai kaidin kisan sappa. <sup>17</sup> Kasarau kin ir ala melel, pwe me melel omui masan. <sup>18</sup> Duen komui kadar ia dong sappa, iduen I kadar ir alang sappa. <sup>19</sup> I kasarauila pein ngai pweki irail, pwe irail kasarau kila melel. <sup>20</sup> A kaidin mepukat eta, me I kapakapaki, a pil irail, me pan poson ia pweki arail padak. <sup>21</sup> Pwe irail karos en me ta men, duen komui Sam podidi ong ia o ngai ong komui, pwe irail en pil me ta men re ata, pwe sappa en poson, me komui kadar ia dor. <sup>22</sup> A lingan, me komui ki ong ia er; I ki ong irail er, pwe irail en me ta men, dueta kita me ta men. <sup>23</sup> Ngai ong irail, o komui ong ia, pwe re en song laieu, pwe sappa en asa, me komui kadar ia dor, o pok ong irail, dueta komui pok ong ia er. <sup>24</sup> Sam, I men, irail, me komui ki ong ia er, en pil mi wasa, me I kin mi ia, pwe ren udial ai lingan, me komui ki ong ia er, pwe komui pok ong ia er mon sappa a tapidar. <sup>25</sup> Sam ai pung, sappa sasa komui, a ngai me asa komui, a mepukat asaer, me komui kadar ia dor. <sup>26</sup> O I kasale ong irail er mar omui. O I pan pil kasaleta i, pwe limpok ota, me komui poke kin ia er, en podidi ong ir o ngai ong irail.

## 18

<sup>1</sup> IESUS lao kotin masanier mepukat, ap kotila palilan pil Kidron, o sapwilim a tounpadak kan iang i: Matuel eu mi wasa o, me i o sapwilim a tounpadak kan kotilong ong lole. <sup>2</sup> A Iudas me pangala i, pil asa wasa o, pwe Iesus o sapwilim a tounpadak kan kin purepure wasa o. <sup>3</sup> Iudas lao aleer pokon o papa kan sang ren samero lapalap o Parisar akan, ap kokiieila lamp, o ser akan, o kapwa en pei kan. <sup>4</sup> A Iesus me kotin mangier meakaros, me pan pit i, kotiei wong irail masani ong irail: Is me komail rapaki? <sup>5</sup> Re sapeng i: Iesus men Nasaret. Iesus kotin masani ong irail: Ngai i. A Iudas, me pangala i, pil u iang irail. <sup>6</sup> Iesus lao kotin masani ong irail: Ngai i, re ap puioki sang, pupodi ong nan pwel. <sup>7</sup> A pil kotin kainoma re irail. Is me komail rapaki? Irail inda: Iesus men Nasaret. <sup>8</sup> Iesus kotin masani: I indai ong komail er, me ngai i. Ari, ma komail rapakin ia, en purewei sang mepukat! <sup>9</sup> Pwe lepen masan en pwaida, me a kotin

masanier: Sota amen irail, me komui ki ong ia er, me salongalar. <sup>10</sup> A Simon Petrus, me na kodlas mia, ap usa pasang, päleki en samero lapalap a ladu, päle pasang salong a pali maun. A ladu o me ad a Malkus. <sup>11</sup> Iesus ap kotin masani ong Petrus: Kapure ong om kodlas nan deu a! Da, dal o, me Sam o kotiki ong ia er, i ender nim? <sup>12</sup> Ari, pokon o, o ar kaun, o papa en men Sus akan saikidi Iesus o saliedi i. <sup>13</sup> O kalua mas ren Anas, pwe i sam en Kaipas a paud o samero lapalap ni par o. <sup>14</sup> Tei i Kaipas, me indai ong Sus oko: Me mau, aramas ta men en kam kila aramas akan. <sup>15</sup> A Simon Petrus o pil amen tounpadak idauenla Iesus. A tounpadak men et, me samero lapalap asaer, iang Iesus kotilong ong nan matuel en samero lapalap. <sup>16</sup> A Petrus u liki impan wanim o. Tounpadak teio, me samero lapalap asaer, pedoi sang kasokaso i ong me sinsila wanim o ukelong ong Petrus lole. <sup>17</sup> Seripein o, me sinsila wanim, ap indai ong Petrus: Kaidin amen ren tounpadak kan en aramas men et koe? A inda: Ngai so. <sup>18</sup> A ladu o papa kan u wasa o, saunda kisinia i, pwe a kapau; irail rangerang ia, a Petrus pil iang u rangerang. <sup>19</sup> Samero lalalap ap kalelapok ren Iesus duen sapwilim a tounpadak kan o duen a padak. <sup>20</sup> Iesus kotin sapeng i: I padapadak sansal ong sappa; ansau karos I kaukawewedar nan sinakoke o nan im en kaudok, wasa me Sus oko karos kin pokon pena ia; a sota man meakot, me I padak wasa rir. <sup>21</sup> Da me kom peidokki re i? Kalelapok ren me rong ia er, me I padaki ong irail er, kilang, re asa, me I indada. <sup>22</sup> Ni en Iesus a kotin masani met, amen sang ren papa ko, me uda impa, ap pikir silang en Iesus indada: Iduen om sapeng ong samero lapalap? <sup>23</sup> Iesus kotin sapeng i: Ma ai lokaia sued, koe ap kadede ki duen a sued, a ma me pung menda koe pikir ia? <sup>24</sup> A Anas ap kadar wong sensal ren samero lapalap Kaipas. <sup>25</sup> A Simon Petrus u, rangerang irail ap indai ong i: Ele koe pil amen a tounpadak kan? A kamamada indada: Ngai so. <sup>26</sup> Ladun samero lapalap amen, me sauneki ol o, me Petrus pale sang salong a, ap indada: Kaidin koe me i kilanger re a nan matuel o? <sup>27</sup> Petrus ap pil kamamada. Malek madang kakorotada, <sup>28</sup> Irail ap kalua sang Iesus ren Kaipas, walang nan im en kadeik. Ari, me sangkonai. A irail sota pedelong ong nan im en kadeik, pwe re de kasaminela pein irail, pwe re en kak ong tungole pasa. <sup>29</sup> Pilatus ap pedoi wong re irail indada: Da me komail karauneki aramas men et? <sup>30</sup> Irail sapeng indang i: Ma men et sota me sued amen, se sota pan pangalang komui i. <sup>31</sup> Pilatus ap masani ong irail: Pein komail ale i, kadeikada i duen omail kapung. Sus oko ap indai ong i: A sota muei ong kit,

sen kamela amen. <sup>32</sup> Pwe masan en Iesus en pwaida, me a kotin masanieda, pwen kasaleda, duen a pan kamatala. <sup>33</sup> A Pilatus pur ong nan im en kadeik ekeredo Iesus, kalelapok re a: Komui Nanmarki en Sus akan? <sup>34</sup> Iesus kotin sapeng i: Kom indada mepukat sang nan pein omui pam? De akai indai ong komui duen ngai? <sup>35</sup> Pilatus sapeng: Da, men Sus amen ngai? Toun sap omui o samero lapalap akan panga dong ia komui; da me komui wiadar? <sup>36</sup> Iesus kotin sapeng: Ai wei kaidin men sappa et. Ma ai wei men sappa et, nan ai papa kan pan pepeita, pwe I ender pan pangalang Sus akan; a kaidin ai wei ansau wet, <sup>37</sup> Pilatus ap indai ong i: Ari, Nanmarki amen komui? Iesus kotin sapeng: Komui me inda, me Nanmarki amen ngai. I me I ipwikidier o pwara kidong sappa pwe I en kadede melel. Kisan melel akan kin rongerong ngil ai. <sup>38</sup> Pilatus indai ong i: Dakot melel? A lao indawei mepukat, ap pil pedoi ong ren men Sus indai ong irail: I sota man diar dip a. <sup>39</sup> A tiak eu mi re omail, i en lapwada meamen ni pasa. Komail so men, i en lapwadang komail Nanmarki en Sus akan? <sup>40</sup> Irail karos pil weriwereda indada: Kaidik men et, a Parapas! A Parapas me lolap amen.

## 19

<sup>1</sup> PILATUS ap ale Iesus wokida i. <sup>2</sup> A saunpei ko irada el en tek eu, rap kidang pon kadokenmai o kapwataki i likau waitata. <sup>3</sup> Re ap kai dong i indada: Iong Nanmarki en Sus akan! O re pikir silang i. <sup>4</sup> Pilatus ap pil pedoi indai ong irail: Kilang, i wa dong komail i, pwe komail en asa, me i sota diardar dip a. <sup>5</sup> Iesus ap koteiela, kapwataki el en tek o likau pup waitata. A indai ong irail: Kilang, song en aramas o! <sup>6</sup> Samero lapalap o papa ko lao udial i, irail ap weriwereda indada: Kalopuela! Kalopuela! Pilatus indai ong irail: Pein komail ale i kalopuela i! Pwe i sota diar dip a. <sup>7</sup> Sus oko sapeng i: At kapung mia, a duen at kapung a pan kamatala, pwe a wiaki sapwilim en Kot pein i. <sup>8</sup> Pilatus lao rongadar mepukat, ap masapwekadar kaulap, <sup>9</sup> O purelong ong nan im en kadeik o, kalelapok ren Iesus: Komui koti sang ia? A Iesus sota kotin sapeng i. <sup>10</sup> Pilatus ap indai ong i: Komui sota sapeng ia? Komui sota asa, me i manaman ong kapiti uk ala o pil manaman ong kalopue uk ala? <sup>11</sup> Iesus kotin sapeng: Sota man om manaman en ka oe ia, ma a so muei ong komui sang poa. Ari, dip en me panga ia dong komui er me lapa sang. <sup>12</sup> Ari, Pilatus ap song kapitila i, a Sus oko weriwer indada: Komui kaidin kompoke pan Sisa, ma komui pan kapitila men et. Meamen kasapwiladang nanmarki pein i kin palian Sisa. <sup>13</sup> Pilatus lao rongadar kasoi

pukat ap kapwareda Iesus, kaipokedi pon deun kadeik, wasa me adaneke Pepment, a ni lokaia en Ipru: Kapata, <sup>14</sup> A i ran en onop ong pasa impan auer kawonu. I ari masani ong Sus oko: Kilang, omail Nanmarki! <sup>15</sup> A re weriwareda: Sikenewei! Sikenewei! Kalopuela i! Pilatus masani ong irail: Da, i en kamela omail Nanmarki? Samero lapalap akan sapeng: Sota at nanmarki, Sisa eta. <sup>16</sup> I ari pangalang irail i, pwen lopuela. Rap kolede Iesus kaluala. <sup>17</sup> A pein i kotin wa a lopu, kotilang wasa me adaneke wasan pondal, a ni lokaia en Ipru: Kolkata, <sup>18</sup> Wasa re kalopuela i iangaki riamen, amen ni pali maun, a amen ni pali maing, a Iesus nan pung ara. <sup>19</sup> Pilatus ap pil wiadar inting eu, kakonei ong pon lopu o. A iet inting: Iesus en Nasaret, Nanmarki en Sus akan. <sup>20</sup> Sus akan me toto, me wadokedi inting wet, pwe wasa Iesus kotin lopuela ia, me salong kanim o. A inting o wiauer ni lokaia en Ipru o Krik o Latain. <sup>21</sup> Ari, samero lapalap oko potoan ong Pilatus: Der intingiedi: Nanmarki en Sus akan, a me a indada: Ngai Nanmarki en Sus akan! <sup>22</sup> Pilatus sapeng: Me i intingiedier, i eta ai inting. <sup>23</sup> Saunpei ko lao kalopuela Iesus, rap ale sapwilim a likau kan, lepuk pasang, wiakida pakis paieu, pakis eu ong amen amen en saunpei ko o pil sapwilim a sakit, me so deidei pena, a pon ta sang poa lel pa. <sup>24</sup> Irail ap kasoi nan pung arail: Kitail ender ter pasang i, a kadoropwaki, me pan aneki, pwe kisin likau en pungala, me indinda: Irail nek pasang ai likau kan nan pung ar o kadoropwa ai sakit. Iei me saunpei ko wiakida mepukat. <sup>25</sup> A in en Iesus u ni tapin lopu en Iesus, o ri en in a Maria, en Kleopas a paud, o Maria men Makdala. <sup>26</sup> Iesus lao kotin masani in a o tounpadak men u imp a me a kotin kupura mauki, ap kotin masani ong in a: Li, kilang noum ol! <sup>27</sup> Ap kotin masani ong tounpadak o: Kilang in om! Ari, sang ni auer ota tounpadak o apwali i. <sup>28</sup> Iesus lao kotin mangier, me mekaros nikier, ap kotin masanier: I men nim pilada, pwe kisin likau en pungala. <sup>29</sup> A kasak mi wasa o, me audeki pineka. Irail kaduedi lim eu nan pineka, ki ong ni alek apot, kidalang ni silang i. <sup>30</sup> Iesus lao kotin uraker pineka, ap kotin masani: A nikier. I ari kotin kamotauiedi kadokenmai, kadarala ngen e. <sup>31</sup> Sus oko ap poeki ren Pilatus, me na arail en katipitip pasang o ren wisiki sang, pwe war arail ender langelang nin lopu ran en sapat. Pwe iei ran o ran en kaonop, pwe iei ran en sapat o me lapalap. <sup>32</sup> Saunpei ko ap kai ong, katip pasang na en me pali et o en me teio, me iang lopuelar. <sup>33</sup> A re lao kai ong Iesus o diaradar, me a matalar, rap sota katip pasang aluwilu a kan. <sup>34</sup> A saunpei men

dokoki katieu pot pangepang a; madang nta o pil kusekusewei. <sup>35</sup> A me udial mepukat, kin kadede o a kadede me melel, o a asa, me a kin kadede, iei me melel, pwe komail en pil poson. <sup>36</sup> Pwe mepukat wiauer, pwe kisin likau en pungala: Aluwilu a sota pan tip pasang. <sup>37</sup> O pil eu kisin likau kin inda: Irail pan kangkakali, me re dokodi. <sup>38</sup> Murin mepukat Iosep men Arimatia, tounpadak en Iesus amen, ari me rir; pweki a masak Sus oko, ap poeki ren Pilatus, en mueid ong i kalep en Iesus. Pilatus ari mueid ong i. I ari waiki sang kalep en Iesus. <sup>39</sup> Nikodemus me poto dong Iesus ni pong, pil kodo, wado paun epuki en potik en mire o alos. <sup>40</sup> Irail ap ale kalep en Iesus, kidimki pena likau linen kai iangaki pomau kan, duen tiak en Sus akan, ni ar kin sarepedi. <sup>41</sup> A wasa me a kotin lopuela ia, matuel eu mia ia, a nan matuel sousou kap eu mia, me saikenta amen saredi ia. <sup>42</sup> I wasa me ira nekidala Iesus, pweki ran en kaonop en Sus akan, o sousou me koren.

## 20

<sup>1</sup> NI ran kai eu en wik Maria men Makdala pwara dong sousou o nin soran, a saikenta ran pasang, ap diaradar, me takai o katapur sanger mon sousou o. <sup>2</sup> I ap tanga wei, ko dong Simon Petrus o tounpadak teio, me Iesus kotin kupura mauki, indai ong ira: Irail wa sanger Kaun o nan sousou o, a se sasa, wasa re kidi ong ia i. <sup>3</sup> Petrus ari koeila o tounpadak teio ap ko dong sousou o. <sup>4</sup> Ira wiaki eu tanga wei, a tounpadak teio me madang mon Petrus lel sousou mas. <sup>5</sup> A lao itio kidi, ap kilangada likau linen wonon, ap sota pedelong ong lole. <sup>6</sup> Simon Petrus ap kokodo idauen i, ap pedelong ong nan sousou o, diarada likau linen ko wonon. <sup>7</sup> O lim en pudo me pira a kadokenmai, me sota iang likau linen ko; a lim pena wasa toror. <sup>8</sup> A tounpadak teio me tiong dong sousou o, ap pil ko ong lole; i ari diarada o posonla. <sup>9</sup> Pwe ira kaikenta weweki kisin likau, me a en iasada sang a matala, <sup>10</sup> Tounpadak ko ap pur onger nan deu 'ra. <sup>11</sup> A Maria u liki sal ong sousou o sangesang. O ni a sangesang a poridi, kilanglong ong nan sousou o, <sup>12</sup> Kilangada tounlang riamen momod ia, kapwateki likau pwetepwet, amen liman kadokenmai a amen liman aluwilu a kan, wasa kalep en Iesus kotikot iaer, <sup>13</sup> Ira ari masani ong i: Li, da me koe sangesangki? A indai ong ira: Aki irail wa sanger ai Kaun, a i sasa, wasa re kidi ong ia i. <sup>14</sup> A lao indada met, ap soupei wei kilanger Iesus kotia u o sasa, me i Iesus. <sup>15</sup> Iesus kotin masani ong i: Li, da me koe sangesangki? Is me koe kin raparapaki? A kiki ong, me i me saumata o, ap indang i: Maing, ma komui wa sanger i, indai ong ia, wasa komui kidi

ong ia i, i ap pan wala sang i. <sup>16</sup> Iesus ap kotin masani ong i: Maria! I ari soupei ong, potoan ong i: Rapuni! Iet wewe: Saunpadak. <sup>17</sup> Iesus kotin masani ong i: Der sair ia, pwe I kaikenta pwarala ren Sam ai, a kola ren ri ai kan, kaire kin irail, I kokodala ren Sam ai o Sam omail, ren ai Kot o omail Kot, <sup>18</sup> Maria men Makdala kodo kaireki tounpadak kan, me a kilangadar Kaun o, o me a kotin masani ong i mepukat. <sup>19</sup> Lao nin sautik en ran ota, ni ran kaieu en wik, ni wanim ko me ritidier, wasa tounpadak kan pokon pena ia, pweki ar masak Sus oko, Iesus ap kotido u nan pung arail, masani ong irail: Komail popol! <sup>20</sup> A lao masani-ada met, ap kasale ong irail lim a kan o pangepang a. Tounpadak kan ap perenda ni ar kilangada Kaun o. <sup>21</sup> Iesus ap pil kotin masani ong irail: Komail popol! Duen Sam o kadar ia do, iduen I kadar komail la. <sup>22</sup> A lao masanier met, ap ngidi ong irail masani: Komail ale Ngen sarau! <sup>23</sup> Me komail pan lapwada dip ar akan, re lapwadar; o me komail katengedie dip ar akan, pan tengedier. <sup>24</sup> A Tomas amen ekriamen, me adaneke Didimos, sota iang irail, ni Iesus kotin pwarador. <sup>25</sup> Tounpadak teio ap indai ong i: Se kilanger Kaun o. A i me indai ong irail: Ma i sota pan kilang lip en mata nan lim a kan, o kilong ong nan lip en mata sondi en pa i, o kilong ong pa ni pangepang a, i sota pan poson. <sup>26</sup> Murin ran walu sapwilim a tounpadak kan pil pokon pena, o Tomas iang irail. Wanim ko lao ritidier, Iesus ap kotido, u nan pung arail masani: Komail popol! <sup>27</sup> Ap kotin masani ong Tomas: Kido sondin pa om o kilang pa i kat, o kido pa om, kilong ong nan pangepang ai, o der soposon, a poson ta! <sup>28</sup> A Tomas sapeng indang i: Ai Kaun o ai Kot! <sup>29</sup> Iesus kotin masani ong i: Pweki om kilang ia er, koe poson kilar, a meid pai, me kaikenta kilang ap poson. <sup>30</sup> Kilel toto me so intingidier nan puk wet, me Iesus kotin wiadar nan pung en sapwilim a tounpadak kan. <sup>31</sup> A mepukat me intingidier, pwe komail en poson, me Iesus me Kristus sapwilim en Kot Ol. O komail en poson ap aneki maur pweki mar a.

## 21

<sup>1</sup> A MURIN mepukat Iesus pil kasale ong tounpadak kan pein i pon le en Tiperias; a iet duen a kasaedar: <sup>2</sup> Simon Petrus o Tomas, me adaneke Didimos, o Natanael men Kana nan Kalilaa, o nain Sepedäus ol oko, o pil sapwilim a tounpadak riamen me pokon pena, <sup>3</sup> Simon Petrus indai ong irail: I pan kola laid. Irail indai ong i: Se pil pan iang uk. Irail ari koieila, kereda pon kisin sop pot. A ni pong o re sota saikidi meakot. <sup>4</sup> A lao wasa ranier, Iesus ap kotikot

ni oror; a sapwilim a tounpadak kan sasa, me i Iesus. <sup>5</sup> Iesus ap kotin masani ong irail: Seri ko, sota kan omail? Re sapeng i: Sota. <sup>6</sup> A kotin masani ong irail: Kaduedi uk o pali maun en sop o, a komail pan diarada. Irail ap kaduedi; re ap solar kak apiada pweki mam toto. <sup>7</sup> Tounpadak o, me Iesus kotin kupura mauki, ap indai ong Petrus: Iei Kaun o. Simon Petrus loa rongadar, me i Kaun o, ap pira ong a sakit en liki pwe a kiliso, ap lusedi ong nan le o. <sup>8</sup> A tounpadak tei kan seisei kodo nan kisin sop, pwe re so doo sang sap o, ele tipong en pa riepuki, urakido uk o mam oko. <sup>9</sup> Irail leler sap, rap diaradar kisiniai o mam oko mi poa o prot. <sup>10</sup> Iesus ap kotin masani ong irail: Wado kisan saik omail! <sup>11</sup> Simon Petrus ap koda waikelong dong nan sap uk o, me dir en mam kalaimun epuki limek silimen; mam me toto, ari so, uk sota olar. <sup>12</sup> Iesus kotin masani ong irail: U kodo manga! A sota amen ren tounpadak kan kak idok re a: Is komui? Pwe re asaer, me i Kaun o. <sup>13</sup> Iesus ap kotido limada prot, nek ong irail o pil mam oko. <sup>14</sup> A i me kasilepak en Iesus a kotin kasale ong sapwilim a tounpadak kan pein i, murin a iasada sang a matalar. <sup>15</sup> Irail lao mangaer. Iesus ap kotin masani ong Simon Petrus: Simon, nain Iona, koe kin pok ong ia mon mepukat? A i potoan ong i: Ei Maing, ir me mangi, me i kin pok ong ir. A kotin masani ong i: Apwali nai sippul akan! <sup>16</sup> A pil masani ong i kariapak: Simon, nain Iona, koe kin pok ong ia? A sapeng i: Ei Maing, ir me kotin mangi, me i kin pok ong ir. A kotin masani ong i: Apwali nai sip akan! <sup>17</sup> A kotin masani ong i kasilepak: Simon, nain Iona, koe kin pok ong ia? Petrus ap mamauki a peidok pan silepak: Koe pok ong ia? A potoan ong i: Maing, ir me kotin mangi meakoros, re kotin mangi, me i kin pok ong ir. Iesus kotin masani ong i: Apwali nai sip akan! <sup>18</sup> Melel, melel I indai ong uk, ni om manakap koe pein pirai uk pena, ap alu wei wasa, me koe mauki. A koe lao likailapala, koe nek kida wei pa om akan, a amen pan pirai uk edi o kalualang wasa, me koe kang kola ia. <sup>19</sup> I me a kotin kokop kidar, duen a pan kapin-gaki Kot a matala. A lao kotin masanier met, ap masani ong i: Idauen ia! <sup>20</sup> Petrus ap soupewei, kilang tounpadak o idauen ira, me Iesus kotin kupura mauki o me pil mi pan kupur a ni kamadip o kalelapok: Maing, is i, me pan pang komui la? <sup>21</sup> Petrus lao kilanger i, ap indai ong Iesus: Maing, menda men et? <sup>22</sup> Iesus kotin masani ong i: Ma I mauki, a en mimieta I lao puredo, menda re om? Koe en idauen ia! <sup>23</sup> Kasoi pot et ap loloki sili nan pung en saulang kan, me dene tounpadak o sota pan mela. A Iesus sota kotin masanier, me a sota pan

mela, a: Ma I mauki, a en mimieta I lao puredo, menda re om? <sup>24</sup>Iet tounpadak, me kadele mepukat o intingiedier mepukat; a se asa, me a kadede me melel. <sup>25</sup>A song toto, me Iesus kotin wiadar a ma irail karos pan intingidi, i lamelame, me sappa sota itar ong koleli puk kan, me pan intingidi.

## WIAWIA EN WANPORON AKAN.

<sup>1</sup> MAING Teopilus, i wiadar tapin kasoi duen meakan, me Iesus kotin tapiadar, duen a wiawia o kaukawewe karos. <sup>2</sup> Lao lel ran en a peukedala mon a kotin kakalik ong wanporon akan, me a kotin piladar ren Ngen sarau, <sup>3</sup> Me a pil kotin kasansale ong pein i ieias ki kilel melel toto murin a kalokolok o a pwara dong irail ran paeisok o kapakaparoeki duen tiak en wein Kot. <sup>4</sup> A ni a kotikot re 'rail, a kotin kakaliki ong irail, ren der kowe sang Ierusalem, a ren auiaui, inau en Sam lao pwaidar, me komail ronga sang ia er. <sup>5</sup> Pwe Ioanes wia paptais ki pil, a komail pan paptais kila Ngen sarau ni eu ran me koren. <sup>6</sup> Irail lao pokon penaer, rap kalelapok re a potoan ong: Maing, ansau wet re pan kotin kapure dong Israel wei o? <sup>7</sup> A kotin masani ong irail: Menda re omail, en asa ansau de auer, me Sam okila nan pein a manaman? <sup>8</sup> A komail pan ale manaman en Ngen sarau, me pan di po omail; komail ap pan ai saunkadede kan nan Ierusalem, o Iudaa pon o Samaria, o lel wong irepan sappa. <sup>9</sup> A lao masanier mepukat, ap peukedalar ni ar kangkakil, pali en dapok pali idandalar i sang mon mas arail. <sup>10</sup> Ni ar kilekilang nanlang, ni ansau a kotidala, kilang, ol riamen mi nan likau pwetepwet, kotikot re 'rail. <sup>11</sup> Me pil masani: Ol en Kalilaa komail, da me komail sarakidang nanlang? Iei Iesus, me peukedala nanlang sang komail, a pan kotin puredo, duen komail udialer a kotidalar. <sup>12</sup> Irail ap purelang Ierusalem sang dol o, me ad a Oliwe, me koren iong Ierusalem; a doo sang al en sapat pot. <sup>13</sup> Irail lao kotilong ong, ap kotidang nan pera poa, wasa re kin kotikoteta, irail karos: Petrus, o Ioanes, o Iakopus, o Andreas, o Pilipus, o Tomas, o Partolomäus, o Matäus, o Iakopus nain Alpäus, o Simon Selotes, o Iudas ri en Iakopus. <sup>14</sup> Mepukat karos wiaki eu podidi ong kapakap, li akai pil iang irail, o pil Maria in en Iesus o ri a ol akan. <sup>15</sup> Ni ran oko Petrus ap uda nan pung en saulang kan masani (irail me impan epukirikiek): <sup>16</sup> Ri ai kan, kisin likau en pungala, me Ngen sarau kalokaia ki Dawid mas o iran Iudas, me karedo, me saikidi Iesus oko. <sup>17</sup> Pwe a pil wadawad ong kitail, er o aleeer pwais a dodok wet. <sup>18</sup> Nan ol men et pwaine kidar pwain en a sapung sap eu, a ni a dikaudi, ap lop pasang o kanangan kaped a ap poie sang. <sup>19</sup> Toun Ierusalem karos asada met. Ari, sap o adanekila akeldama ni pein arail lokaia; iet wewe: Sap en nta. <sup>20</sup> Pwe a intingidier nan puk en psalm: Im

a en liselipingala o solar, me pan kauson lole, a amen me pan ale a koa. <sup>21</sup> Ari, amen sang ren ol akan, me poden iang kitail er, ni ansau me Kaun Iesus kotikot re atail, <sup>22</sup> Sang ni muein paptais en Ioanes kokodo lel ni ran o, me a kotin peukada sang kitail er, pan iang kitail wiala saunkadede en a kotin iasada. <sup>23</sup> Irail ari kileledi riamen: Iosep iei Parsapas, me pil ad a Iostos o Matias. <sup>24</sup> Irail ap kapakap masani: Maing, ir me kotin mangi mongiong en amen amen, re kotin kasansaleda, is me re kotin pilada ren me riamen et, <sup>25</sup> Pwe i en ale pwais a dodok wet o koa en wanporon, me Iudas pupe sang, pwen kolang deu a. <sup>26</sup> Irail ap kadoropwada. A doropwa ko ong Matias; i ari iang wadawad ong wanporon ekamen oko.

## 2

<sup>1</sup> RAN en pentikos lao leler, irail karos kot pena wasa ta kis. <sup>2</sup> A madang ngil laud eu likamata ngil en melimel peidido sang nanlang o kadirela im o wasa, re kot pena ia. <sup>3</sup> A lo sirangerang akai likamata kisiniai pwarado sokedi pon amen amen. <sup>4</sup> Irail karos ap dire kila Ngen sarau ap pikikidi padaki wei ni lokaia toror, duen Ngen kotin kamasan irail ada. <sup>5</sup> Men Sus, ol lelapok ko sang nan wei karos pan lang kaikairu Ierusalem. <sup>6</sup> Irail lao ronger duen mepukat karos, ap pokon penaer o puriamui kila, aki amen amen ronger udan a lokaia. <sup>7</sup> Irail karos poneponeki o puriamuiki indada: Kilang, kaidin mepukat karos men Kalilaa, me kin padapadak? <sup>8</sup> A daduen, kit kin rong irail amen amen ni udan ngil atail? <sup>9</sup> Men Partien, men Medien, men Elam, o toun Mesopotamien, o Iudaa, o Kapadosien, o Pontus, o Asien, <sup>10</sup> O Prikien, o Pampilien, o Äkipten, o liman Lipien; salong Kirene, o men Rom, me mi wasa et, karos Sus oko o Proselit oko, <sup>11</sup> Men Kreta o men Arapien, iaduen kitail kin rong kin irail udan ngil atail ar katitiki manaman en Kot akan? <sup>12</sup> Irail karos ari pingidar o ponepondar, indada nan pung arail: Dakot met? <sup>13</sup> Akai lalaue indada: Irail dire kila wain kap. <sup>14</sup> A Petrus iangaki ekamen oko ap kotida, kapi-tie laudeda masani ong irail: Ol en Iudaa kan o komail karos, me kauson Ierusalem, komail en asa duen met, o komail rong mas ai padak! <sup>15</sup> Pwe mepukat kaidin sakaular, duen omail kiki ong, pwe apton auer kasilu en ran wet; <sup>16</sup> Pwe iei mepukat, me lolok ren saukop loel: <sup>17</sup> Kot kotin masanier: Ieteten me pan wiawi ni imwilan ran akan: I pan kamoredi Ngen i pon uduk karos. Noumail ol o li akan ap pan deideikop, o noumail manakap akan pan kilekilang kaudial akan, o noumail di ma kan pan auramenda; <sup>18</sup> A ni ran oko I pil pan kamoredi Ngen i pon

ai ladu o lidu kan, rap pan deideikop. <sup>19</sup> O I pan kapwareda manaman akai nanlang pali poa, o kilel akai nin sappa pali pa: Nta, o kisininai, o adinia; <sup>20</sup> A katipin pan wukila rotorotala, a saunipong pan wiala nta mon ran lapalap o lingan en Kaun o pan pwarado. <sup>21</sup> O a pan wiaui ma meamen likwir ong mar en Kaun o, a pan dorela. <sup>22</sup> Ari ol en Israel, komail rong kasoi pot et: Iesus men Nasaret Ol amen, me Kot kotin kilele kidar nan pung omail dodok kelail akan o manaman akan, o kilel akan, me Kot kotin wiaki i nan pung omail, duen me komail pein asa; <sup>23</sup> I lao pangalar duen kupur en Kot erpit, komail ap saikikidi pa en me sapung kan, ap pasuredi ong ni lopu o kamatalar. <sup>24</sup> I me Kot kotin kaiasadar, ni a kotin lapwada sal en a matala, pwe a sota kak ong, en kolekol i. <sup>25</sup> Pwe Dawid masanier duen i: I ngingar Kaun o potopot mo i; pwe a kotikot ni pali maun i, pwe i endermokid. <sup>26</sup> I me mongiong i perenkida, o lo i popoleki; pil uduk ai pan kamoledi ni kaporopor. <sup>27</sup> Pwe re sota pan kotin likidmaliela ngen i nan wasan mela pil sota kotin muedi ong, me sapwilim ar Sarau i o pan mor pasang. <sup>28</sup> Re kotin kasansale ong ia er al en maur akan; re pan kotin kadir kin ia la popol mon silang ar. <sup>29</sup> Ri ai kan muedi ong ia, en aima padaki ong komail duen sam atail Dawid, me pil matalar o saredier, o sapwilim a sousou mi re atail lao lel ran wet. <sup>30</sup> A saukop amen, ap mangi, me Kot kotin kaula inauki ong i, me kisan wa men pan kaipokedi pon mol a. <sup>31</sup> Ari, ni a mamangi duen en Iesus a iasada, ap kotin masani, me a sota likidmalielar nan wasan mela, o pil uduk a sota mor pasang. <sup>32</sup> I Iesus, me Kot kotin kaiasadar, kit karos saunkadede en mepukat. <sup>33</sup> A lao sapwilekidar pali maun en Kot, a kotin aleer sang ren Sam, en kapwaiada inau duen Ngen sarau i, ap kotin kamoredi, me komail kin udial o rongerong. <sup>34</sup> Pwe kaidin Dawid, me kotidala nanlang kan, a pein i kotin masani: Kaun o kotin masani ong ai Kaun: Mondi ni pali maun i! <sup>35</sup> I lao wiaki om imwintiti utipan na om akan. <sup>36</sup> Ari, men Israel karos en asa melel, me Kot kotin kasapwilada i, en Kaun o Kristus i Iesus me komail kalopuelar. <sup>37</sup> Irail lao rongadar met, ap lel ong nan mongiong arail, re ap indai ong Petrus o wanporon tei kan: Ri at oko, da me sen wiada? <sup>38</sup> Petrus ap masani ong irail: Komail kalula, o amen amen en paptais ong ni mar en Iesus Kristus, pwe dip omail akan en lapwada. A komail pan tungole Ngen sarau i. <sup>39</sup> Pwe nan inau wet ong komail o noumail seri kan, o ong irail karos men ilawei, me Kaun, atail Kot, pan kotin molipe. <sup>40</sup> O pil song en masan toto, me a kadede ong irail, o panaui kin irail, masani: Komail

en dorela pein komail sang nan di sued wet! <sup>41</sup> Irail me duki ong a masan ap paptaisela; ari, ni ran o aramas impan silekid me saulangalar. <sup>42</sup> Irail dadaurata padak en wanporon akan, o ar minimin pena, o kamadip sarau i, o kapakap akan. <sup>43</sup> Lomwi ap kipadi aramas karos o manaman o kilel akan toto wiauier ren wanporon akan. <sup>44</sup> O karos me posonla, kin pokopokon o aneki pena kapwa takis. <sup>45</sup> O netikila ar kapwa kan o nene ong irail karos, duen ar samama amen amen. <sup>46</sup> Irail ari kaukaule wia minimin eu nan im en kaudok o, o pilitiki pena prot nan im ar akan, o re mangamanga ni popul, o lolepot pena, <sup>47</sup> Kapikapinga Kot o konekon ren aramas karos. A Kaun o kotiki ong momodisou, me dorela kan ni ran karos.

### 3

<sup>1</sup> A PETRUS o Ioanes wiaki eu kotidalang nan im en kaudok ni auer en kapakap, auer kaduau. <sup>2</sup> A ol amen me tikida na a dangidang, me kin wisikedo pwiledi liman wanim en im en kaudok, me ad a lingan, ni ran karos, pwen wia poekipoeki ren me kin kolong ong nan im en kaudok. <sup>3</sup> A lao kilanger Petrus i Ioanes, ni ara pan kotilong ong nan im en kaudok, ap poeki, pwen ale meakot. <sup>4</sup> A Petrus i Ioanes masani i, ap masani ong: Saradang kit! <sup>5</sup> I ari saradang ira, kasikasiki, me a pan tungole meakot re 'ra. <sup>6</sup> Petrus ap kotin masani: Sota ai silper de kold, a meakot mi re i, me i pan ki ong uk: Ukida mar en Iesus Kristus en Nasaret o alu! <sup>7</sup> I ari kole di pa a maun o kauada i, a na a o tikil en na ap madang kelailadar. <sup>8</sup> Ap lusada o alu iang ira lang nan im en kaudok, masimasiok sili, kapikapinga Kot. <sup>9</sup> O aramas karos kilang a alialu sili o kapikapinga Kot. <sup>10</sup> A irail asa, me i, me kin poekipoeki liman wanim lingan en im en kaudok, irail pingkidar o poneponeki duen me wiaui ong i er. <sup>11</sup> A ni a iang Petrus, o Ioanes, aramas karos puriamuiki, ap tang penang irail nan palank, me ad a palank en Salomo. <sup>12</sup> Petrus lao masani mepukat, ap kotin masani ong pokon o: Ol en Israel, da me komail puriamui kila met? De da me komail kilekilang kin kit, likamata kit me kakekada i ni pein at kel de lelapok? <sup>13</sup> Kot en Apraam, o Isaak, o Iakop, Kot en sam atail akan kalinganada sapwilim a ladu Iesus, me komail pangala o likidmaliela ren Pilatus ni a kileledier, me a pan lapwada i. <sup>14</sup> A komail likidmaliela me Sarau i, o me Pung, appoeki lolap amen, en lapwa dong komail. <sup>15</sup> A komail kamatalar tapin maur, me Kot kotin kaiasadar sang ren me melar akan, kit kin saunkadede en mepukat. <sup>16</sup> Aki poson mar a, mar a ap kakekada men et, me komail kin kilang o asa, o a poson kare ong i kelail melel wet



mo omail karos. <sup>17</sup> Ari ri ai kan, i asaer, me omail sasa, me komail wiaki met, pil dueta omail saumas akan. <sup>18</sup> A ni mepukat Kot kotin kapwaiadar, me a kotin masanier ren saukop akan karos, me Kristus pan kalokolok. <sup>19</sup> Komail ari kalula o wukila, pwe dip omail akan en sorede sang, pwe muein kamaur en pwaida sang wasailen Kaun o. <sup>20</sup> A lao kotin poronedo, me loki ong komail er: Iesus Kristus, <sup>21</sup> Me pan kotikot nanlang lao lel ansau, me mekaros pan pungala, duen me Kot kotin masanier ren sapwilim a saukop sarau kan sang mas kokodo. <sup>22</sup> Pwe pil Moses kotin masanier: Kaun omail Kot pan kaipwi ong komail Saukop amen, ipwin ri omail akan dueta ngai, i me komail en ronga sang mekaros, me a pan kotin masani ong komail. <sup>23</sup> A iet me pan wiaui: Aramas karos, me kang peiki ong saukop o, pan kasapokela sang ren aramas. <sup>24</sup> A saukop karos irerokedo sang Samuel, karos me padapadak pil kokoper duen ran pukat. <sup>25</sup> Komail sapwilim en saukop akan o en inau, me Kot kotin wiai ong sam atail akan ni a kotin masani ong Apraam: Kainok karos nan sappa pan paieki amen kadaudok om. <sup>26</sup> Kot kotin porone dong komail sapwilim a ladu mas ni a kotin molipe i; pwen kapaia kida komail, en kawuki sang komail kuros dip omail akan.

#### 4

<sup>1</sup> A NI ara padapadak ong aramas akan, samero kan, o saumas en im en kaudok, o sadusar akai, ap pokon dong ira; <sup>2</sup> Pwe re makaraki ara kawewe ong aramas akan o ar padapadaki, me Iesus pan kotin kaiasada me melar akan. <sup>3</sup> Irail ap kol ira di o kila ira nan imateng lao manda, pwe a wasa pongier. <sup>4</sup> A me toto, me iang rongadar masan o, posonlar; ari, toto en ol akan impan limekid. <sup>5</sup> A mandan ran o saumas, o monsap, o saunkawewe kan pokon pene nan Jerusalem. <sup>6</sup> A samero lapalap Anas, o Kaipas, o Ioanes, o Aleksander, o karos, me kisan kainok en samero lapalap, <sup>7</sup> Irail pwiliki ira di nan pung arail, ap kainoma re 'ra: Ni kel en is, de ni mar en is, me komail wiaki met? <sup>8</sup> Petrus me dir en Ngen sarau ap masani ong irail: Maing ko, saumas en wei o monsap en Israel komail, <sup>9</sup> Ma se pan pakadeikada, o komail kainoma re at ran wet, pweki dok mau ong aramas somau men, o da me a kelaile kida, <sup>10</sup> Komail o aramas en Israel karos en mangi, me mar en Iesus Kristus men Nasaret, me komail kalopuelar, me Kot kotin kaiasadar sang ren me melar akan, nan i eta, me men et uki o kelail kidar. <sup>11</sup> I takai o, me lokidokila ren komail sause kan, me id wiala takai en pukakaim. <sup>12</sup> O sota amen, me maur mi re a,

pwe pil sota eu mar pan lang, me pakadara dong aramas, me kitail pan maur kida. <sup>13</sup> A ni ar kilekilanger en Petrus i Ioanes ara pereperen o so masak, rap puriamui kila, pwe re asaer, me ira aramas mal me sota iang skul, o sota non audaud, rap asaer, me ira ianger Iesus. <sup>14</sup> A ni ar kilanger aramas o, me kelailadar, uda imp ara, rap sasalar lokaia. <sup>15</sup> Irail lao kadar ira sang nan kapung, re ap kapukapung pena indada: <sup>16</sup> Da me kitail en wiai ong aramas pukat, pwe toun Jerusalem asaer, me ira wiadar kilele sansal eu, a kitail sota kak kalikama. <sup>17</sup> A pwe ede lolok sili nan pung en aramas akan, kitail en padik inapwi ira di, me ira de padaki ong aramas amen ni mar wet. <sup>18</sup> Irail lao eker ira do re ap inapwiedi me ira der pan padaki de kawewe ni mar en Iesus. <sup>19</sup> A Petrus o Ioanes sapeng masani ong irail: laduen, me pung pan kupur en Kot, sen pwili sang komail mon Kot? Pein komail kasau! <sup>20</sup> Pwe se so kak so katitiki, me se kilanger o rongadar. <sup>21</sup> Irail ap kainapwi ira di kalaudela, re ap kadar ira la, pwe sota me re diaradar, me ira en kamekameki, pweki aramas akan, pwe karos, kapinga Kot, duen me wiaui. <sup>22</sup> Pwe aramas o, me manaman en kakelada wiaui ong, daulier saunpar paeisok. <sup>23</sup> Ira lao lapwadar, ap kola ren iang ara ko, kaireki meakan, me samero lapalap o saumas akan katiti ong ira. <sup>24</sup> A irail lao rongadar, rap wiaki eu potoan ong Kot: Maing ir me Kot, me kotin kapikadar lang o sappa, o madau o audepa 'ra karos. <sup>25</sup> Ir me kotin masani ren Dawid, sapwilim ar ladu: Da me men liki kan lingararaki, o da me wei kan lamelameki me mal akan? <sup>26</sup> O nanmarki en sappa kan kangudier o saumas akan pokon pena, en palian Kaun o sapwilim a Kristus. <sup>27</sup> Pwe meler nan kanim wet irail karos pokon penaer, iet akan: Erodes, o Pontius Pilatus, iangki men liki kan, o men Israel akan pwen palian sapwilim ar ladu sarau Iesus, me re kotin keiedier, <sup>28</sup> Pwen kapwaiada meakan, me lim ar o kupur ar kileledier, en wiaui. <sup>29</sup> Ari Maing, re kotin mangi arail lingararaki, kotiki ong sapwilim ar ladu kan, en kaloki ar masan ni peren. <sup>30</sup> O kotin kapa wei lim ar, pwen kakelada, o kilele, o manaman akan en wiaui mar en sapwilim ar ladu sarau Iesus. <sup>31</sup> Ar kapapak apton nikier, wasa me re kot pena ia, ap mokimokid. Irail karos ap direkila Ngen sarau, ap padapadaki masan en Kot ni pereperen. <sup>32</sup> A mongiong o ngen en ir karos me posonlar, kin lamalam ta pot, o sota me indada duen ar kapwa: Ai met, pwe re aneki pena kapwa takis. <sup>33</sup> A wanporon akan me kelail ni arail kadede me Kaun Iesus kotin iasadar, a mak lapalap iang irail karos. <sup>34</sup> O solar amen irail, me so a tungol, pwe karos, me sap de

im arail mia, ap netikilar o wado pwain en me netilar akan. <sup>35</sup> O pwilikidi ni aluwilu en wanporon akan, o nek ong amen amen duen ar samama. <sup>36</sup> A loses me wanporon akan ki ong mar a Parnapas, (iet wewe: Nain kapol), kadaudok en Lewi amen, men Sipern, <sup>37</sup> Me sap we mia, ap netikilar o wado pwain a, pwilikidi ni aluwilu en wanporon akan.

## 5

<sup>1</sup> A OL amen ad a Ananias o a paud Sapira netikila sap eu, <sup>2</sup> Ap okisang kisan pwain a, me a paud iang asa, o wado lu en moni, pwilikidi ni aluwilu en wanporon akan. <sup>3</sup> A Petrus masani: Ananias menda Satan kadirela mongiong om, pwen likam ong Ngen sarau o okisang kisan pwain en sap o? <sup>4</sup> Kaidin udan om, ma a sota pan netila? O kaidin insen om ni a netilar? A menda koe inauki ong nan pein mongiong om mepukat? Kaidin aramas, me koe likam ong, pwe ong Kot. <sup>5</sup> Ananias lao rongadar masan pukut, ap pupedi mela. A karos, me rongerong mepukat, masakadar kausalap. <sup>6</sup> A manakap oko ap udar, kidim pena i, wala sang, sarepedier. <sup>7</sup> Kadekadeo murin auer silu a paud pwarado, a sota asa, me wiaui. <sup>8</sup> Petrus ap masani ong i: Katitiki ong ia, ma koma netikila sap o ni pwain wet? A sapeng: Ei i eta. <sup>9</sup> Petrus ap masani ong i: Menda koma inauki pena, en kasongesong Ngen en Kaun o? Kilang, nä en me sarepedier om paud mier mon wanim o, o re pan wa uk ala. <sup>10</sup> I ap madang pupedi ni aluwilu a mela. A manakap oko lao pedelong ong, rap kilangada, me a melar, re ap wala sang o sarepedi i impan a paud. <sup>11</sup> Lomui kausalap kipadi momodisou karos, o karos me rongerong mepukat. <sup>12</sup> A kilel o manaman akan toto wiaui ki lim en wanporon akan nan pung en aramas akan. Irail karos kot pena nan palank en Salomo ni lamalam ta pot. <sup>13</sup> A sota amen sang ren men liki kan kak pat ong irail, pwe karos waune kin irail. <sup>14</sup> A me toto, me posonlar wuki ong Kaun o irail me totoia, ol o li akan. <sup>15</sup> Irail wala me somau kan pon al akan, pwiliki irail edi pon pet o ro akan, pwe mot en Petrus en lel ong amen irail, a lau kotido. <sup>16</sup> A toun kanim akan, me mi impa, pwara dong Ierusalem, wado me somau o me kalokolokki ngen saut akai, irail karos ap kelailadar. <sup>17</sup> A samero lapalap o karos me iang i, me pwin en sadusär, ap uda makar kida kausalap, <sup>18</sup> Koledi wanporon akan o ki irail la nan imateng. <sup>19</sup> A tounlang en Kaun o kotin ritingada wanim en imateng oko ni pong, o kotin kalua irail la liki masani: <sup>20</sup> Komail kola sansal mon aramas, padaki ong irail nan im en kaudok duen masan kan karos en maur wet.

<sup>21</sup> Irail lao rongadar met, rap sangkonai ong nan im en kaudok o kaweweda. A samero lapalap o iang oko ap kodo, eker pena kapung, o saumas en men Israel akan karos, o ilakwei ong imateng o, pwe irail en wisikedo. <sup>22</sup> A ladu kan lao pwarado, rap diaradar, me re solar mi nan imateng o, re ap purodo katitiki, <sup>23</sup> Indada: Se diaradar imateng a ritidier mau, o pwin silepa ar uda mon wanim oko, a se lao ritingadar, sota amen me se diar lole. <sup>24</sup> A kapin en im en kaudok, o samero lapalap akan lao rongada duen lokaia pukut, re ap ponepon kidar o sota asa, da imwin mepukat. <sup>25</sup> Amen ap pwarado kaire kin irail: Kilang, ol oko, me komail kilang nan imateng, u nan im en kaudok, padapadaki ong aramas akan. <sup>26</sup> Kapin iangaki ladu kai ap koeila uk irail do, a re kadek ong irail, pwe re masak aramas akan, pwe re de kate irail. <sup>27</sup> Irail wa ir do, ap kidi ong mon kapung o, a samero lapalap idok re irail. <sup>28</sup> Masani: Kit so inapwi komail edi kausalap, me komail ender kawewe ni mar wet? A kilang, komail kadire kila Ierusalem omail lamalam o, o komail kin men kapokon ong kit ntan aramas men et. <sup>29</sup> Petrus o wanporon akan ap sapeng masani: Kitail en oke Kot mon aramas! <sup>30</sup> Kot en sam atail akan kaiasadar Iesus, me komail kamatar, pwe komail pasuredier i ong ni lopu eu. <sup>31</sup> Nan i me Kot kotin kasapwila kidar pali maun a, pwen Kaun o Saunkamaur, pwen kotiki ong men Israel, en kalula o lapwa pan dip akan. <sup>32</sup> A kit me sapwilim a saunkadede ni mepukat, pil Ngen sarau me Kot kotiki onger ren me peiki ong i. <sup>33</sup> Irail lao rongadar met, re ap lingarangar kausalap o kapikapiki pena, en kame ir ala. <sup>34</sup> Amen ap uda nan kapung o, Parisär amen ad a Kamaliel, saunkawewe amen, me masamas ren aramas karos, me masani, ren kila liki ol oko ansau kis. <sup>35</sup> A masani ong irail: Ol en Israel komail, kalaka aramas pukut, me komail pan wia! <sup>36</sup> Pwe ni ran tei ko Teudas udar ponmasoki, me a me lapalap, a ol impan papuki iangala i, I ari kamelar o karos, me peiki ong i, muei pasang o sorecier. <sup>37</sup> A murin ol o Iudas en Kaliläa ap uda ni ansau wanadaw o kaweid sapung aramas toto, ren tuki ong i. Ari, a pil melar o karos, me iang i, muei pasanger. <sup>38</sup> I ap panau komail, en sopwei sang aramas pukut, o der doke irail, pwe ma lamalam o wiawia en me ren aramas, a pan soreci, <sup>39</sup> A ma ren Kot, komail sota kak kawe ir ala, pwe komail de kadiarokada, me kin palian Kot. <sup>40</sup> Irail ari peiki ong i. Re lao ekeredo wanporon akan o woki irail, re ap inapwiedi, ren der padak ni mar en Iesus, o kadar ir ala. <sup>41</sup> Irail ari koei sang ni momod en kadeik o, o peren kida, me re war ong kamekameki mar a. <sup>42</sup> A ran

karos re sota dukedi sang arail kawewe nan im en kaudok o nan deu arail akan, o re padapadaki me Iesus me Kristus.

## 6

<sup>1</sup> A TOUNPADAK kan lao totolar ni ran pukat men Krik kai ap lipaned ong men Ipru, aki sota me apwali ar li odi kan ni ar dodok en ran akan. <sup>2</sup> Ekriamen oko ap molipe pena tounpadak kan masani: A sota mau ong, sen muei sang masan en Kot, pwen papa ni tepel. <sup>3</sup> Ari ri (at) akan, rapaki sang nan pung omal ol isimen, me kalok mau, me dir en Ngen (sarau) o lolekong, me sen kasapwiladang dok wet! <sup>4</sup> A kit pan apapwalita kapakap o dodok pan masan o. <sup>5</sup> Pokon o ari peren kida kaparok pot et. Re ap piladar Stepanus, ol amen, me dir en poson o Ngen sarau, pil Pilipus, o Prokorus, o Nikanor, o Timon, o Parmenas, o Nikolaus, proselite sang Antiokien amen. <sup>6</sup> Re kidang irail mon wanporon akan. Re lao kapakaper ap kidang po 'rail lim ar. <sup>7</sup> Masan en Kot ari pwaida kaulap, o tounpadak kan madang totolar nan Ierusalem, o samero toto pil iang lamalam o. <sup>8</sup> A Stepanus, me dir en poson o kelail, ap wiadar manaman o kilél laud kai nan pung en aramas akan. <sup>9</sup> A akai me udar, me kisan sinako ke en Liperti o men Kirene, o men Aleksandrien, o men Silisia, o Asien akamai ong Stepanus. <sup>10</sup> A re sota kak palian en Stepanus a kupurokong o Ngen o, me aueda i. <sup>11</sup> Irail ari pwain ong ol akai, pwen katiti: Se ronger, me a lalaue moses o Kot. <sup>12</sup> Irail pil kamakarada aramas, o saumas akai, o saunkawewe, re ap saikidi i o koleidi, re ap wa dong i mod en kadeik o, <sup>13</sup> O kapwareda saunkadede likam akai, me katitiki: Aramas men et sota kin dukedi sang a lalaue wasa sarau et o kapung. <sup>14</sup> Pwe se ronger, me a katitiki, me Iesus en Nasaret pan kawela wasa et o kawilianla lamalam kan, me Moses kotiki ong kitail er. <sup>15</sup> A karos, me iang mod ong kapung o, kangkakil i, kasauaiada, me silang a dueta silang en tounlang amen.

## 7

<sup>1</sup> SAMERO lapalap ap masani: Mele mepukat? <sup>2</sup> A masani: Ri ai o sam ai kan, komail rong, Kot en lingan kotin pwara dong sam atail Apraam ni a kotikot Mesopotamien, ni a saikenta kotikot Aran, <sup>3</sup> O kotin masani ong i: Kowei sang nan sap om o sang ren sau om, ko wong eu sap, me I pan kasale ong uk! <sup>4</sup> I ap lipa sang nan sap en Kaltäa o kotikot Aran. Sam a lao matalar, a kotin kalua wong i sap wet, wasa komail kotikot ansau wet. <sup>5</sup> I ari sota kotin mueid ong i, en sapaneki sap o, sota wasa, me laude ong pat en nä eu, ap kotin

inauki ong i, ni ansau saikenta sapwilim a seri, me a pan kotiki ong i o kadaudok a, en sapaneki. <sup>6</sup> A iet duen me Kot kotin masani: Kadaudok a pan kakairu nan sap en men wai, o re pan lidula, o kanaudokala saunpar papuki. <sup>7</sup> O Kot kotin masani: I pan kadeikada toun wei o, me re kin liduliduwu. A murin met re pan lipa sang sap o, ap kaudok ong ia sap wet. <sup>8</sup> I ari kotiki ong irail inau en sirkomsais. A ap wiadar Isaak o sirkomsais i ni ran kawalu, a Isaak wiadar Iakop, a Iakop sam atail ekriamen oko. <sup>9</sup> A sam atail oko peirinki Iosep ap netikilang i Äkipten. A Kot me kotin apwali i, <sup>10</sup> O kotin dorela i sang ni a apwal akan karos, o kotiki ong i konekon ong kupurokong mon Parao, nanmarki en Äkipten. I ap kasapwilada i, en kaun en Äkipten o a dipisou karos. <sup>11</sup> Muein lek ap kipadi sap en Äkipten karos o Kanaan; i ansau o me apwal melel, o sam atail akan sota diadar sak ar kisin sak. <sup>12</sup> A Iakop lao mangi, me manga mi Äkipten, ap kotin poronelar mas sam atail akan. <sup>13</sup> A lao kari-apak Iosep ap diarakadar ren ri a ol akan, o sau en Iosep sansaledo ren Parao. <sup>14</sup> Iosep ap ilake dong sam a Iakop, pwen kotilang re a o sau i kan karos, irail me isiakan limen. <sup>15</sup> Iakop ap kotidilang Äkipten o matalar, i o sam atail akan. <sup>16</sup> Irail ari wisikelang Sikem o saredier nan sousou o, me Apraam netiekida moni kai sang ren nain Emor oko, sam en Sikem. <sup>17</sup> A ansau, me inau en Kot ong Apraam pan pwaida, lao korendor, men Israel ap kaparapar o totolar nan Äkipten. <sup>18</sup> A lao lel amen nanmarki kaunda Äkipten, me sasa Iosep, <sup>19</sup> I me widiwiunga kainok atail oko, o wia sued ong sam (atail) akan, pwe ren kasela nairail kisin seri kan, pwe re de memaurata. <sup>20</sup> I ansau me Moses ipwidier, me seri kaselel amen, ap apapwalieta nan im en sam a saunipong silu. <sup>21</sup> A lao lokidokilar, sapwilim en Parao seripein ap dorela i o kakairada dueta udan na. <sup>22</sup> Moses ari padakeda ni song en lolekong en men Äkipten karos; a i me manaman ni a masan o wiawia kan. <sup>23</sup> A lao saunpar paeisok dauer poa, ap lamedar, en tu ong ri a ol akan men Israel. <sup>24</sup> A lao masani amen, me kalokolok mal, ap sausa i o depuk ong, me kaloke mal, ap kotin kamelar ol en Äkipten. <sup>25</sup> Pwe a kupura, me ri a ol akan pan dedeki, me Kot pan kotin kapiti kin ir sang lim a; a re sota dedeki, <sup>26</sup> A mandan ran o a kotila re 'rail ni ar akamai pena, ap men kotin kapol ira la, masani: Koma pirien eu, menda koma wia sapung nan pung oma? <sup>27</sup> A me wiada sapung ong men imp a o sikon wei i, inda: Is me kasapwil uk adar, pwen at saumas o saunkapung? <sup>28</sup> Koe pan kame ia la dueta koe kamela men Äkipten

aio? <sup>29</sup> Moses ap tangki sang lokaia pot et o kakairu sili nan sap en Midian eu, wasa a kanaitikieda ol riamen. <sup>30</sup> Kadekadeo lao par paeisok dauer poa, tounlang amen ap pwara dong i ni nana Sinai nin tuka teketek wumpul pot. <sup>31</sup> Moses lao masani, ap kotin puriamuiki kasansal o. A ni a koti ong, pwen masani, kapitie en Kaun o ap pei dong i: <sup>32</sup> Ngai Kot en sam om akan, Kot en Apraam, o Isaak, o Iakop. Moses ap kotin rerereda o masak udial i. <sup>33</sup> Kaun o ap kotin masani ong i: Ki sang sut ni nä om akan, pwe wasa koe u ia me sarau! <sup>34</sup> I kilanger kankangeranger en nai aramas akan, o I ronger ar sangesang, ap kodi dong kamaio wei ir ala. Ari kodo, I pan kadar uk alang Äkripten! <sup>35</sup> I Moses, me irail mamaleki ni ar indinda: Is me kasapwil uk ada, pwen at saumas o saunkapung? I me Kot kotin poronela, en saumas o saunkamaur ki lim en tounlang o, me kotin pwara dong i nan tuka teketek. <sup>36</sup> Iei i, me kalua ir sang o wiadar manaman o kilel akan nan sap Äkripten, o nan sed waitata, o nan sap tan saunpar paeisok. <sup>37</sup> I Moses, me masani ong men Israel: Kot pan kotiki ong komail saukop amen sang nan ipwin ri omail ol akan dueta ngai, i me komail en peiki ong! <sup>38</sup> Iei i, me mi nan momodisou nan sap tan ren tounlang o, me kotin mamasani ong i pon nana Sinai, o me kotin ieiang sam atail akan me kotin aleer masan en kamaur, pwen use dong kit. <sup>39</sup> Me sam atail akan kang peiki ong, ap siken wei sang irail i, o nan mongiong arail re men sapalang Äkripten, <sup>40</sup> Potoan ong Aron: Wi ai ong kit at kot akan, me pan tiang mo at, pwe se sasa, da me wi aiu ong Moses, me kalua kit sang nan Äkripten! <sup>41</sup> Irail ari wiadar dikedik en kaupul amen ni ran oko, o mairong ong kilel en ani mal o, o perenki, wiawia kan en pa arail. <sup>42</sup> Kot ap kotin saupai sang irail o kotin muedid ong irail ren kaudok ong usu pan lang akan duen a intingidier nan puk en saukop akan: Iaduen komail men Israel, komail mairongki ong ia man akan nan sap tan ni par paeisok? <sup>43</sup> Melel komail waroki ong mol ong en Molok, o usu en omail kot Rempan, dikedik kai, me komail wiadar, pwen pongi; a I pan kasapoke komail la palila sang Pabilon. <sup>44</sup> Mol en kadede mi ren sam atail akan nan sap tan duen masan en i, me kotin mamasani ong Moses, me ren wiada duen kilel o, me a kotin udialer. <sup>45</sup> Me sam atail akan pil aleer, ap iang Iosua wala ni ar sapaneki sap en men liki kan me Kot kotin koko wei mon silang en sam atail akan lao lel muein Dawid. <sup>46</sup> Me konekon ren Kot o kotin anane kauadang Kot en Iakop mol eu. <sup>47</sup> A Salomo me kotin kauada tanpas eu. <sup>48</sup> A Wasa lapalap sota kin kotikot nan mol,

me pa en aramas wiadar duen saukop o kin katitiki: <sup>49</sup> Nanlang deui, o sappa utipa i, me Kaun o kotin masani. A im da, me komail men kauadang ia, de ia wasa, I en kamol ia? <sup>50</sup> Kaidin pa i, me wiadar mepukat karos? <sup>51</sup> Komail me katiwo o so sirkomais nan mongiong o salong omail, komail kin kaokaoe Ngen saraui ansau karos, komail kin dueta sam omail akan. <sup>52</sup> Is ren saukop akan me sam omail akan sota kaloke? O re kamata ir ala, me kopador Pung men et, me komail pangalar o kamatalar. <sup>53</sup> Komail me aleer kapung ren tounlang kan, ap sota kapwaiada. <sup>54</sup> Irail rongadar mepukat, ap olar nan mongiong arail o re teterok ngi ong i. <sup>55</sup> A Stepanus dir en Ngen saraui kangkakil nanlang o udial en Kot a lingan o Iesus a kotikot ni pali maun en Kot, <sup>56</sup> Ap katitiki: Kilang, i ududial nanlang kan ar ritida, o Nain aramas a kotikot ni pali maun en Kot. <sup>57</sup> Irail ap weriwereda o pinale salong arail o wiaki eu tanga dong i. <sup>58</sup> Irail lao sikenewei sang nan kanim o, rap kate i. A saunkadede kan pwilikidier ar likau ni nä en manakap amen, me ad a Saulus. <sup>59</sup> Irail ari kate Stepanus ni a kapakap o inda: Maing Iesus, re kotin kasamo ngen i! <sup>60</sup> I ari kelepuke o ngil laudedda: Maing re der kapokon ong irail dip wet. A inda met, ap mairredi o ari.

## 8

<sup>1</sup> A SAULUS pil peren kida a kamela. A ni ran ota ansau kamekam en momodisou en Ierusalem tapida; karos ap muei pasang nan sap en Iudäa o Samaria, wanporon akan me so. <sup>2</sup> A ol lelapok kai sarepedi Stepanus o maieiki i kaulalap. <sup>3</sup> A Saulus me kamueit pasang momodisou o kuli ong im karos, wala ol o li karos, kasedi ong irail nan imatang. <sup>4</sup> A irail me muei pasanger, kakan sili padapadak duen masan o. <sup>5</sup> Pilipus ap kotilang kanim en Samaria eu o padaki ong irail duen Kristus. <sup>6</sup> A aramas akan wiaki eu peiki ong meakan, me Pilipus padaki ong irail. Re rongerong i o kilang kilel akan me a wiadar. <sup>7</sup> Pwe ngen saut keredi sang ren me toto ni ar weriwer laud. O me kokon madak o nä dangidang toto me kelailadar. <sup>8</sup> O peren me lapalap nan kanim o. <sup>9</sup> A ol amen ad a Simon, me kin wun ani mas o, kotokotaue men Samaria, me inda duen pein i, me i me lapalap. <sup>10</sup> A irail karos peiki ong i, me titikik o me lapalap akan katitiki: Men et iei manaman en Kot me lapalap. <sup>11</sup> A re kin peiki ong i, pweki a kin kotokotaue irail sang mas kokodo. <sup>12</sup> A re lao kamelele Pilipus, me padaki duen rongamau en wein Kot o duen mar en Iesus Kristus, rap paptaisela, ol o li akan. <sup>13</sup> Simon pil iang posonlar, I lao paptaiselar, ap waroki ong Pilipus. A lao udial kilel o manaman akan,

me wiaui; ap puriamuiki. <sup>14</sup> Wanporon akan me kotikot Ierusalem lao mangi, me Samaria iang duki ong masan en Kot, rap poronelang irail Petrus o Ioanes. <sup>15</sup> Ira lao kotido, ap kapakapa kin irail, pwe re en tungole Ngen sarau. <sup>16</sup> Pwe a saikenta moredi ong amen irail. Re paptaiselar eta ni mar en Kaun Iesus. <sup>17</sup> Ira ari kotiki ong po 'rail lim ar akan, irail ap aleer Ngen sarau. <sup>18</sup> Simon lao kilanger, me Ngen sarau kokido en wanporon oko ara pwil po 'rail lim ar akan, ap men ki ong ira kisin moni. <sup>19</sup> Indada: Koma pil kotiki dong ia manaman wet, pwe ma i pan pwil pon amen pa i kat, i en ale Ngen sarau. <sup>20</sup> A Petrus masani ong i: Noun moni en iang uk lokidokila! Pweki om kiki ong, me mana en Kot kokido moni. <sup>21</sup> Nan sota pwais om de om tungol ni dodok wet, pwe mongiong om sota inen mon Kot. <sup>22</sup> Ari, kalukila om sued wet, o poeki ren Kaun o, ma a sota pan kotin makeki lamelam sued nan mongiong om. <sup>23</sup> Pwe i kilanger, me koe me dir en edi katik o tengiteng ni me sapung. <sup>24</sup> Simon ap sapeng indada: Koma kotin kapakapa kin ia ren Kaun o, pwe mepukat, me koma masani ong ia, ender pwai dong ia. <sup>25</sup> A ira lao katitiki o kotikida masan en Kaun o, ap purelang Ierusalem, o padak sili rongamau nan kisin kanim en Samaria toto. <sup>26</sup> A tounlang en Kaun o masani ong Pilipus: Uda kola pali air pon al o, me kodi sang Ierusalem, ko ong Kasa me tan! <sup>27</sup> I ari uda sapalewei. A kilang, ol en Etiopia, saumas manaman en Kandase, li nanmarki en Etiopia, me kokoaki a dipisou karos, me kotido, pwen kaudok nan Ierusalem. <sup>28</sup> A ni a purela sap we, a kotikot pon dakepa o dondropwe saukop Iesaia. <sup>29</sup> Ngen o ap kotin masani ong Pilipus: Kai ong o iangala dakepa! <sup>30</sup> Pilipus ap tanga wong i, ap rongadar a dondropwe saukop Iesaia masani: Komui weweki, me komui doropwe? <sup>31</sup> I ari masani: Pala i pan asa, ma sota, me pan kawewe ong ia? I ari poeki ren Pilipus en kereda mondi re a. <sup>32</sup> A iet wasa nan kisin likau o me a wadoker: Duen sip amen, me pakara wei, pwen kamela, o duen sippul, me kin nenenlata pan me kote sang wun a, iduen a sota kotin dauasa pasang silang i. <sup>33</sup> A ni a karakarak a solar pakadeikadar. A is me pan kak kaweweda duen sau i kan? Pwe a ieias wisike sanger sappa. <sup>34</sup> Saumas ap sapeng Pilipus masani: I men poeki re omui, is me saukop katitiki met? Duen pein i de duen amen? <sup>35</sup> Pilipus ap kotiki pasang au a, padaki ong i rongamau en Iesus, tapiada nan kisin likau wet. <sup>36</sup> A ni ara kokowei, ira lel ong pil apot, a saumas o masani: Kilang pil o, da me karompa, me i sota paptais ki? <sup>38</sup> I ap masani dakepa en udi. Ira karos ap kodi ong pil o, Pilipus o

saumas o; i ari paptais i. <sup>39</sup> Ira lao kododo sang nan pil o, Ngen en Kaun o ap pokada sang Pilipus. Saumas o ap solar kilang i. I ari daulul kokowei popol. <sup>40</sup> Pilipus ap diarokadar Asdod; a dadaulular, padak sili rongamau nan kanim karos lao a lele dong Sásarea.

## 9

<sup>1</sup> A SAULUS dadaurata a lingarangaraki tounpadak en Kaun akan, ap pan kame ir ala, o kola ren samero lapalap o, <sup>2</sup> Poeki re a kisin likau ong sinakoke en Damaskus akan, pwe ma a pan diar meamen, me iangala lamalam, ol de li i en sali irail edi o kalu-alang Ierusalem. <sup>3</sup> A ni a sapasapal kokola koren iong Damaskus, marain eu kodido sang nanlang, sereda i. <sup>4</sup> Ni a pupedi nani pwel, ap rongada ngil eu, me masani ong i: Saul, Saul, da me koe kame kin ia? <sup>5</sup> A ap inda: Is komui Maing? A kotin masani: Ngai Iesus, me koe kin kame. <sup>6</sup> Paurida, kolang nan kanim en, nan a pan loki ong uk, me koe en wiada. <sup>7</sup> A ol oko, me iang i kokola, sapaimokid, pwe re rongadar ngil o, ap sota amen me re kilangadar. <sup>8</sup> Saulus paurida sang nan pwel, mas a papad eta, ap sota kilang meamen. A re kolokol pa a, kalu-alang i Damaskus. <sup>9</sup> I ari sota kilang wasa pong sili pong. A so kang de nim meakot. <sup>10</sup> A tounpadak amen mi Damaskus, ad a Ananias me Kaun o kotin masani ong ni kasansal eu: Ananias! I ari potoan ong: Iet ngai Maing! <sup>11</sup> Kaun o ap kotin masani ong i: Paurida kowei ong nani al o, me ad a Inen, ap idok nan im en Iudas amen, me mar a Saulus en Tarsus. Pwe kilang, a kapakap <sup>12</sup> A kilanger ol amen ni kasansal eu, me ad a Ananias, me ko dong i o pwil poa pa a kan, pwe a en kilangki wasa. <sup>13</sup> A Ananias potoan ong: Maing, i rongadar ren aramas toto duen ol men et, duen a kin kaokaoe sapwilim ar sarau kan, me mi Ierusalem. <sup>14</sup> O a aleer sang ren samero lapalap akan manaman, en saliedi karos, me kin likwir ong mar omui. <sup>15</sup> A Kaun o kotin masani ong i: U kowei, pwe iei ol o, me I piladar, en wala mar ai ren men liki o nanmarki kan o men Israel. <sup>16</sup> Pwe I pan kasansale ong i duen won a pan kamekameki mar ai. <sup>17</sup> Ananias ari kola, pedelong ong nan im o, pwil poa pa a pokon, indada: Ri (ai) Saul, Kaun o me kotin porone ia do; iei Iesus, me kotin pwara dong komui nani al o ni omui kokodo, pwe komui en kilangada wasa o dire kila Ngen sarau. <sup>18</sup> A madang likamata un en mam akai, me pupedi sang ni mas a, i ari kilangadar wasa o udar paptaiselar. <sup>19</sup> I lao mangaer, ap kelailadar, ap mimieta ren tounpadak en Damaskus akan ran akai. <sup>20</sup> A madang padapadak nan sinakoke kan duen Iesus, me i sapwilim en

Kot. <sup>21</sup> A karos, me rongerong i, puriamui kila indada: Kaidin i, me kin kaokaoe ir, me kin likwir ong mar wet nan Ierusalem o kodo wasa et, pwen sali ir edi, kalua ren samero lapalap akan? <sup>22</sup> A Saulus me manaman kokoda o kapingada Sus oko, me kauson Damaskus ni a kawewedar, me i me Kristus. <sup>23</sup> Kadekadeo murin ran toto Sus oko kapung pena en kamela i. <sup>24</sup> A Saulus ronger, me re masamasan i; irail pil masamasan wanim akan ni ran o ni pong, pwen kamela i. <sup>25</sup> A tounpadak kan ale i ni pong apiekidi kopou eu sang pon kel o. <sup>26</sup> A Saulus lao pwaro dong Ierusalem a sosong waroki ong tounpadak kan, irail karos masak i, pwe irail sota kamelele, me i tounpadak amen. <sup>27</sup> A Parnapas ale i o kare dong i ren wanporon akan, o katiti ong irail, duen a kilangadar Kaun o nani al o, o me a kotin masani ong i, o duen a so masak padapadaki ni mar en Iesus nan Damaskus. <sup>28</sup> I ari iang irail er kotin pedepedoi sang o pedepedelong ong nan Ierusalem o padaki aima ni mar en Kaun o. <sup>29</sup> I o men Krik kai masan o akamai pena, a re song kamela i. <sup>30</sup> Saulang kan lao asaer, ap iang i kolang Sāsarea, ap kadaralang i Taris. <sup>31</sup> A momodisou kan ap popul o pwaidar nan Iudāa, o Kalilāa, o Samaria, o re weweid ni masak en Kaun o, o toto kilar popul en Ngen sarau. <sup>32</sup> A Petrus lao kakan sili nan sap akan, a pil kotila ren me sarau kan, me kaukauson Lida. <sup>33</sup> A diadarar aramas amen wasa o, me ad a Æneas, me wonon par walu, pwe me kokon dangidang. <sup>34</sup> Petrus ari masani ong i: Æneas. Iesus Kristus kakel uk ada. Paurida, pein lim pena ki om! I ari paurida madang. <sup>35</sup> A karos me kaukauson Lida o Saron, kilangada i, re ap wuki ong Kaun o. <sup>36</sup> A tounpadak li amen mi Ioppe, me ad a Tapea (iet wewe: Torkas), i me dir en wiwia mau kan o kisakis wei. <sup>37</sup> A kadekadeo ni ran oko a somaudar o melar. Irail lao duper i, ap nekidala nan pera poa. <sup>38</sup> A Lida me koren iong Iope. Tounpadak kan lao ronger, me Petrus kotikot wasa o, rap kadarala ol riamen re a, poekipoeki: Kom der peikasal, koti dong ki! <sup>39</sup> Petrus ari kotida iang ir ala. I lao pwarado, re ap ukadala i pera poa, o li odi karos u impa, sangesang o kapwarda sakit o likau kan, me Torkas wiadar ni a mimi re rail. <sup>40</sup> A Petrus kiiei sang ir karos, ap kelepuiki kapapak, ap saupe ong kalep o masani: Tapea, paurida! I ari pad pasang, kilangada Petrus, ap modadar. <sup>41</sup> I ari koledi pa a, kauada i. A lao eker pena me sarau o li odi kan, ap kasale ong irail i a maureda. <sup>42</sup> Ari a loki sili nan Iope, o me toto posonla Kaun o. <sup>43</sup> I ari kotikoteta Iope ran toto ren saun me wiada kil en man amen, me ad a Simon.

## 10

<sup>1</sup> OL amen mi Sāsarea ad a Kornelius, me saumas en pwin en saunpei eu, me ad a men Italien, <sup>2</sup> Me lelapok o masak Kot ian-gaki toun im a karos, me poden kisakis ong aramas, o kapapak ong Kot ansau karos. <sup>3</sup> A masani ni kasansal eu tounlang en Kot amen, me pwaro dong i ni klok silu, masani ong i: Kornelius! <sup>4</sup> A kangkakil i o masakadar, potoan ong: Maing, dakot? A kotin masani ong i: Om kapapak akan o koleir leler wasailen Kot. <sup>5</sup> Koe ari kadar wong Iope ol akai, ukedo Simon, me pil ad a Petrus, <sup>6</sup> Me kin kairu ren Simon saun wia kil en man, me im a sal ong sed; <sup>7</sup> A tounlang o, me kotin masani ong i, lao kotilar, ap ekeredo na ladu riamen o saunpei lelapok amen, me kin mi re a ansau karos. <sup>8</sup> A lao masani ong irail mepukat karos, ap kadar ir alang Iope. <sup>9</sup> A mandan ran o ni ar sapesapalwei o koren iong kanim o, Petrus ap kotila pon im o, pwen kapapak impan klok eisokriau. <sup>10</sup> Ap men sakadar o a pan sak. A ni ar kaonopadang i, ap masani kasansal eu: <sup>11</sup> A kilanger nanlang a ritidar o ed eu likamata tein pwainok kalaimun kokodi, me imwi kan pukopuk pena o pwilidi ong nani pwel. <sup>12</sup> Song en man en sappa karos mi lole, me kin aluki pa, o me lauol, o man korop kai, o manpir en pan lang. <sup>13</sup> O ngil eu peidi dong i masanier: Petrus, paurida, kamela o manga! <sup>14</sup> A Petrus potoan ong: Kaidin Maing, pwe i kaikenta manga me mal kot, de me samin. <sup>15</sup> A ngil o masani ong i karia-pak: Meakot, me Kot kamakekeladar koe der mamaleki! <sup>16</sup> Mepukat wiawier pan silepak! Ed o ap kapuredalang nanlang. <sup>17</sup> A Petrus ni a kotin ponepon kidar wewe en kasansal o, me a masanier, kilang, ol oko me pakadarado sang ren Kornelius, ap rapaki im en Simon o uda pan wanim o, <sup>18</sup> O likilikwir pepeidok, ma Simon, me pil mar a Petrus kotikot wasa o. <sup>19</sup> A Petrus ni a kotin madamadada duen kasansal o, Ngen ap kotin masani ong i: Kilang ol silimen raparapa kin uk. <sup>20</sup> Uda o kodiwei iang irail o so peikasal, pwe Ngai me kadar irail do. <sup>21</sup> Petrus ap kodilang ren ol oko, masani: Kilang, iet ngai, me komail raparapaki. Da karepen omail kodo? <sup>22</sup> Irail inda: Kornelius saumas en saunpei amen, ol pung amen, me masak Kot, o kalok mau ren Sus akan karos, me mangier sang ren tounlang sarau en Kot amen, en poron dong komui, en kotido nan tanpas a, pwen mangi sang komui masan akan. <sup>23</sup> I ari kasamo ir long o kinte kin irail er. A mandan ran o a kotin iang ir wei; o saulang en Iope kai pil iang i. <sup>24</sup> A mandan ran o re leler Sāsarea. A Kornelius kapokon pena sau i o kompokepa kan ap auiaui irail. <sup>25</sup> A Petrus lao pedelong

ong, Kornelius ap tu ong i o pupedi ong ni aluwilu a o kaudok ong i. <sup>26</sup> A Petrus kauada i indada: Uda, pwe ngai pil aramas amen. <sup>27</sup> A ni ara masan pena, ap pedelong ong, diaradar me toto momod pena. <sup>28</sup> I ari masani ong irail: Komail asa, me a sota inen, ol en Sus amen en pat ong men liki amen de kola re a. A Kot kotin kasale ong ia, i ender mamaleki de sauteki amen aramas. <sup>29</sup> I me i koki do o so peikasal ni ar idok ia. Ari, i men kalelapok, da karep en omail eker ia do? <sup>30</sup> Kornelius ap masaniada: Mon pong pa pong ngai kaisesol lel auer wet. A ni klok duau i kapakap nan im ai. A kilang, ol amen me kot mo i, mi nan likau lingaling. <sup>31</sup> O masani: Kornelius, om kapakap me pwaida, o om koleir leler kupur en Kot. <sup>32</sup> Ari, ilakilang komui, pwe Simon me pil ad a Petrus, en kodo. A kakairu nan im en Simon saun wia kil en man, me sal ong sed. A lao pwarado, a pan padapadaki uk. <sup>33</sup> Ngai ari pitipit ilakilang komui, a meid mau omui pwarador. Ari iet kit karos sansal mon Kot, pwe sen rong meakan, me Kot masani ong komui. <sup>34</sup> Petrus ap kotiki pasang silang i indada: Melel, i asaer, me Kot sota kin kotin lipilipiliki aramas, <sup>35</sup> A nan sap karos meamen masak i o wiwia me pung, nan i me konekong re a. <sup>36</sup> Masan o me a kotin kadara dong men Israel, en kaire kin irail popul ren Iesus Kristus. (Nan i me Kaun pan meakaras). <sup>37</sup> Komail asa masan me kalok sili me tapidar nan Kalilaa lel Iudaa pon murin paptais, me Ioanes wiada padak due. <sup>38</sup> Duen en Kot a kotin keiekier Iesus en Nasaret Ngen sarau i manaman, me kotin kakan sili wiawia mau o kakeladar me tanwar en tewil, pwe Kot kotin ieiang i. <sup>39</sup> A kit karos me saunkadede en meakaras, me a kotin wiadar nan sap en Sus akan o pil Ierusalem, me re pasuredi ong nin tuka o kamatalar. <sup>40</sup> Nan i me Kot kotin kaiasadar ni ran kasilu o kasaleda i. <sup>41</sup> Kaidin ong aramas karos, pwe ong saunkadede kai, me pilipildar ren Kot, kit me iang i sak o urak murin a iasadar sang ren me melar akan. <sup>42</sup> I ari masani ong kit, sen padapadak ong aramas o kadede melel, me i, me Kot kotin piladar, pwen Saunkapung pan me maur o me melar akan. <sup>43</sup> A saukop karos kin kadede duen i, me dip en ir karos, me poson i, pan lapwada pweki mar a. <sup>44</sup> A ni Petrus kotikida masan pukut Ngen sarau ap moredi pon karos, me rongerong padak o. <sup>45</sup> A me poson akan, kisan sirkomsais, karos me iang Petrus pwarador, puria-muiki, me Ngen sarau pil moredi pon men liki kan. <sup>46</sup> Pwe re rongadar ar lokaia kida ngil toror kapinga Kot. Petrus ap masanier: <sup>47</sup> Is me pan inapwiedi pil, me mepukat ender paptaisela, pwe re aleer Ngen sarau dueta kitail? <sup>48</sup> I ari masani, me ren pap-

taisela ni mar en Iesus Kristus. Irail ap poeki, a en mimieta re rail ran akai.

## 11

<sup>1</sup> WANPORON o saulang kan, me mi Iudaa, rongadar, me men liki kan pil aleer masan en Kot. <sup>2</sup> Petrus lao pwara dong Ierusalem, me kisan sirkomsais oko ap akamai ong i indada: <sup>3</sup> Kom pwarala ren ol akai me so sirkomsais oko o manga re rail. <sup>4</sup> A Petrus pikikidi masani ong irail karos me wiauier irerokedo masani: <sup>5</sup> Ngai mi nan kanim Iope wia kapakap. O ni ai wukilar, i kilanger kasansal eu: Ed ue kodido sang nanlang likamata tein pwainok kalaimun eu, me imwi kan pukopuk pena o a kodido imp ai. <sup>6</sup> Ni ai kangkakil, i ap diar o kilanger man aluki pa en sappa kai, o man laoalo, o man korop, o manpir en pan lang. <sup>7</sup> Ngai ari rongadar ngil eu, me masani ong ia: Petrus, paurida, kamela o manga! <sup>8</sup> A ngai potoan ong: Kaidin Maing, pwe sota me mal kot, de me saut kin ko ong nan au ai. <sup>9</sup> A ngil kariapak sapeng sang nanlang: Meakot me Kot kamakelekeledar, koe der mamaleki! <sup>10</sup> Mepukat wiauier pan silepak, ap apdar nanlang. <sup>11</sup> A kilang, madang ol silimen kasinenda mon im, me i mi lole, me pakadara dong ia sang Sāsarea. <sup>12</sup> A Ngen kotin masani ong ia, i en iang irail wei so peikasal; a saulang wonemen pukut pil iang ia. Kit ari pedelong ong nan im en ol o. <sup>13</sup> I ari kaire kin kit, duen a kilanger tounlang o kotikot nan im a, masani ong i: Kadara wong Iope ol akai, me pan ukedo Simon me pil ad a Petrus, <sup>14</sup> Me pan padaki ong uk, me koe o noumui kan karos pan maur kila. <sup>15</sup> Ni ai pikikidi padak, Ngen sarau ap moredi ong po rail, dueta a kotin moredi ong po tail ni tapi o. <sup>16</sup> Ngai ari tamanda masan en Kaun o, me a kotin masani: Melel, pil me Ioanes paptais kier, a komail pan paptais kila Ngen sarau. <sup>17</sup> Ari, ma Kot kotin kisakisa irail dueta a kotin kisakisa kitail er, kitail me posonlar Kaun Iesus Kristus, is ngai, pwe i en kak palian Kot? <sup>18</sup> Irail lao rongadar mepukat ap nenenla o kapinga Kot indada: Nan Kot pil kotiki ong men liki kan en kalula, pwen maurela. <sup>19</sup> A me muei pasang ni ansau en kamekam en Stepanus, kakan sili lel Pönsien, o Sipern, o Antiokien o sota padaki ong meamen pwe Sus akan eta. <sup>20</sup> A nan pung arail ol akai mia, men Sipern o Kirene, me pwara dong Antiokien, ap pil padaki ong men Krik rongamau en Kaun Iesus. <sup>21</sup> A lim en Kaun o ieiang irail o me toto posonlar wuki ong Kaun o. <sup>22</sup> Rong en mepukat ap peidong momodisou en Ierusalem. Ir ari poronelar Parnapas, pwen kokola lel Antiokien. <sup>23</sup> I lao pwarador o kilanger mak en Kot, ap peren

kidar o panau irail karos, ren kelail ni mongiong arail o podidi ong Kaun o. <sup>24</sup>Pwe i me ol kelail o mau amen, me dir en Ngen sarau i o poson. A aramas toto me wuki ong Kaun o. <sup>25</sup>A ap kola Tarsus rapaki Paulus. <sup>26</sup>A lao diardar i, ap ukedo i Antiokien. Ira ap mimi ren momodisou par eu o padapadaki ong me toto. A nan Antiokien tounpadak kan tapidar adaneke sapwilim en Kristus akan. <sup>27</sup>A ni ran pukat saukop akai ko dong Antiokien sang Ierusalem. <sup>28</sup>A amen irail, me ad a Akapus me u kokopki Ngen, me muei lek lapalap pan kipadi sappa; ari, a pwardar ni muein Klaudius. <sup>29</sup>A irail inauki pena, me re pan kisakisa saulang kan, me mi Ierusalem duen ar kapwapwa amen amen. <sup>30</sup>Mepukat re wiadar; re kadar wong saunkoa kan Parnapas o Paulus me wala.

## 12

<sup>1</sup>I ANSAU nanmarki Eroses pikikidi kame akai nan momodisou. <sup>2</sup>I ari kamata kila kodlas Iakopus ri en Ioanes. <sup>3</sup>A lao kilanger, me Sus oko peren kidar, ap pil saikidi Ianger. Nan i ansaun prot somut. <sup>4</sup>A saikidi i o kilang i nan imateng, o kasilaki i pwin en saunpei paieu. Pamen me wia eu pwin, pwe murin pasa a men kasale ong pokon i. <sup>5</sup>Petrus ari sensal nan imateng a momodisou poden kapakapki i ren Kot. <sup>6</sup>Pongpong mon Eroses pan kasansaleda i, a saimokela nan pung en saunpei riamen, salikidi sal mata riapot. A silepa ko masamasan imateng mon wanim ko. <sup>7</sup>A kilang, amen tounlang en Kaun o pwardado o marain eu sarada nan imateng o. I ari pikir Petrus ni pangepang o kapaurida i masani: Paurida pitipit! Sal mata ko ap pupedi sang ni lim a kan. <sup>8</sup>A tounlang masani ong i: Pirapirada o suteda! I ari wiadar met. A ap masani ong i: Upuedi o idauen ia do! <sup>9</sup>I ari pedoido sang o idauenla i, o a sota dedeki, me melel en tounlang a wiawia. Pwe a kiki ong, me a auramandar. <sup>10</sup>Ira lao kotin dauiler pwin en silepa kaieu, o kariau, ira ap lel ong wanim mata, me salong kanim, i me pein ritida mo 'ra. Ira ari kotila pon al apot. A tounlang ap madang kotin rir sang mo a. <sup>11</sup>A Petrus lao dedeki me wiauier, ap masaniada: I ap asa melel, me Kaun o kotin poronede sapwilim a tounlang o kapit ia sang ni pa en Eroses o sang en Sus akan ar masamasan. <sup>12</sup>A ni a kotin madamadaua, ap lel ong im en Maria in en Ioanes, me pil ad a Markus, wasa me toto pokon ia wia kapakap. <sup>13</sup>A ni en Petrus a letelet ni wanim o, lidu men, ad a Rode, ap pwara dong rong. <sup>14</sup>A lao asa kapitie en Petrus, a sota ritingada wanim o pweki a peren. A a tanglong katitiki, me Petrus kot mon wanim o. <sup>15</sup>A irail indai ong i: Koe

iakala. A i kelail indada, me melel. Re ap inda: Kaidin i, a sapwilim a tounlang o. <sup>16</sup>A Petrus wiawia leteleteta. Irail lao ritingada o kilanger i, re ap puriamui kilar. <sup>17</sup>A i olole irail, en nenenla. A ap masani ong irail duen Kaun o, me kotin kalua i sang nan imateng o, o pil masanier: Kaireki Iakopus o saulang kan mepukat! I ap kotie sang kotilang ekis wasa. <sup>18</sup>A lao ran pasanger, saunpei kan ap puriamuiki kaulap en Petrus a pitilar. <sup>19</sup>A Eroses lao idok o so diardar, ap itetokenkone silepa ko o masani, ren kamela. I ari kotilang Säsarea sang Ierusalem kaukauson ia. <sup>20</sup>A Eroses ongiongidar pan men Tirus o Sidon, re ap wiaki eu poto dong i kadekadeke Plastus saunkoa en nanmarki o poeki muei mau, pwe re kin memaureki sap en nanmarki. <sup>21</sup>A kadekadeo eu ran Eroses ap puriong likau en nanmarki, kaipokedi pon mol o kapakaparok ong irail. <sup>22</sup>A aramas akan ngisingis indada: Nan i kapitie en kot amen, a kaidin en aramas. <sup>23</sup>A madang amen tounlang en Kaun o poki i, pweki a so wauneki Kot. A maas akan me kangala i; i ari mela. <sup>24</sup>A masan en Kot pwaida o lok sili. <sup>25</sup>Parnapas i Paulus puredo sang Ierusalem, ira lao kanikielar ar dodok, o ira pil ukedo Ioanes, me ad a Markus.

## 13

<sup>1</sup>NAN momodisou en Antiokien saukop o saunpadak kai mia. Iet akan: Parnapas, o Simeon me pil ad a Niker, o Lusius men Kirene, o Manaen, me iang monsap Eroses apwalidar, o Saulus. <sup>2</sup>A ni arail papa ong Kaun o, o kaisesol, Ngen sarau ap kotin masani: Katorore sang ong ia Parnapas o Saulus, pwen wia dok eu, me I ki ong ira er! <sup>3</sup>Irail ap kaisesol o kapakap o kidang po 'ra pa ar, re ap kadar ira wei. <sup>4</sup>Ira ari me pakadara kila Ngen sarau ap kotila Seloisia, wasa ira kereda pon sop pot tangalang Sipern. <sup>5</sup>Ira lao mi Salamis, ap padaki duen masan en Kot nan sinakoke en Sus akan. A Ioanes papa men pil iang ira. <sup>6</sup>Irail lao kakan sili nan dake lel kanim Papos, rap diardar ol amen, me kin kati ani, saukop likam amen, kisan men Sus, ad a Par Iesus, <sup>7</sup>Me kin mi ren Serkius Paulus ollelapok amen. I me ekere dong i Parnapas o Saulus, pwe a men rongrong masan en Kot. <sup>8</sup>A Elimas widingak (pwe i wewe en ad a) palian ira, pwen kapure sang saumas ni poson o. <sup>9</sup>Saulus, me pil adaneke Paulus, dir en Ngen sarau, kangkakil i, <sup>10</sup>Indada: Koe meid dir en widong o mesued, o nain tewil o me kailongki me pung karos. Koe sota pan dukedi sang palian al inen en Kaun akan. <sup>11</sup>A kilang met, lim en Kaun o mi po om. A koe pan maskun, ap solar kilang katipin ansau kis. Ari, a madangediedelar o



rotalar; i ap raparapaki sili men ale pa a, en kaweid i.<sup>12</sup> Saumas lao masani me wiauier, ap posonlar, pwe a puriamuiki padak en Kaun o.<sup>13</sup> Paulus o a warok kai ap kotila sang Papos tangatang ko dong Perke nan wein Pampilia. A Ioanes muei sang ira, purelang Jerusalem.<sup>14</sup> A ira masalewei sang Perke o kotilang Antiokien en Pisdien o kotilong ong nan sinako ke ni ran en sapat kaipokedi.<sup>15</sup> A lao nikier ar dondropwe kapung o saukop akan saumas en sinako ke kai ap ilakilang ira masani: Ri (at) oko ma masan en panau pot ong aramas pukat mi re oma, koma ari kida!<sup>16</sup> Paulus ap kotida ooleki lim a masani: Ol en Israel komail o me kin masak Kot, komail en rong!<sup>17</sup> Kot en men Israel pukat, me kotin piladar sam atail akan o kapakapaiaada aramas oko ni ar kakairu sili Akipten, o lim a manaman, me a kotin kalua kin irail sang wasa o.<sup>18</sup> A impan saunpar paeisok a kotin apapwali irail nan sap tan.<sup>19</sup> Kadekadeo a lao kotin koko sang wei isu nan Kanaan, ap kotin nek ong irail sap arail.<sup>20</sup> O murin met a kotiki ong irail saunkapung kan irerokedo par papuki limeisok lel ong saukop Samuel.<sup>21</sup> A sang ni ansau o re inong iong nanmarki amen. Kot ap kotiki ong ir Saul nain Kis, ol en kadaudok en Peniamin amen, saunpar paeisok.<sup>22</sup> A lao kasapokelar, ap kotiki ong irail Dawid, pwen nanmarki, me a pil kotin kileledier masani: I diaradar Dawid nain Iese, ol amen duen inong en mongiong i, me pan wiada insen ai karos.<sup>23</sup> Sang nan kadaudok a Kot kotikido Iesus, pwen Saunkamaur pan men Israel, duen sapwilim a inau.<sup>24</sup> Murin Ioanes a kotin padaki ong men Israel karos duen paptais en kalula mon a kotido.<sup>25</sup> A Ioanes lao kapwaiada sapwilim a dodok, ap kotin masani: Is me komail lamelame me ngai? Kaidin ngai i. A kilang amen kotido, kisin sal en sapwilim a sut i sowar en lapwada.<sup>26</sup> Komail ol o ri ai kan, komail kadaudok en Apraam, o meamen me masak Kot re omail, padak en kamaur pot et pakadara dong komail.<sup>27</sup> Pwe me kaukason Jerusalem o ar saumas akan kapwaiada kokop en saukop akan, me kin wadawad ni sapat akan karos ni ar kadeikada i, pweki re sasa i.<sup>28</sup> A sota me re diaradar, me a kak kamata kila. Ari so, re poeki ren Pilatus, me a en kamatala i.<sup>29</sup> Irail lao kapwaiada karos, me intingkidi i, re ap kidi sang i nin tuka o kidi i nan sousou o.<sup>30</sup> A Kot me kotin kaiasada i sang ren me melar akan.<sup>31</sup> O ran toto me a kotin pwara dong me iang i kotilang Jerusalem sang Kalilaa, me sapwilim a saunkade de ong aramas akan.<sup>32</sup> A kit padaki ong komail rongamau duen inau ong sam atail akan,<sup>33</sup> Me Kot kotin kapwai ong kitail nairail

seri kan, ni a kotin kaiasadar Iesus duen a intingidier nan psalm kariau: Koe nai Ol, I kanaitik uk adar ran wet.<sup>34</sup> A duen a kotin kaiasada i sang ren me melar akan, pwen der mor pasang, i me a kotin masanieki met: I pan ki ong komail pai melen en Dawid akan.<sup>35</sup> I me a pil masanieki ekis wasa: Re sota pan kotin mueid ong, sapwilim ar Sarau i pan mor pasang.<sup>36</sup> Pwe Dawid lao kapwaiada a papa ong kupur en Kot ni a ansau, ap saimokelar, a saredier impan sam a ko, ap mor pasang.<sup>37</sup> A i me Kot kotin kaiasadar, nan a sota kotin mor pasang.<sup>38</sup> Ari ri ai kan, komail asa, me lapwa pan dip akan ren men et kin kaloki ong komail.<sup>39</sup> A me pan poson i, nan i me pungalar sang meakaros, me komail sota kak pung kila kapung en Moses.<sup>40</sup> Ari, komail kalaka, pwe a depa pwai ong komail, me saukop akan masanier:<sup>41</sup> Kilang, komail me kin lalaue, puriamuiki o soredi, pwe I pan wia dodok eu ni omail ansau, me komail sota pan kamelele, ma amen pan kasokaso i ong komail due.<sup>42</sup> Irail lao pedoi sang ap poekipoeki, kasoi pukat en kalok ong irail ni ran en sapat kokodo.<sup>43</sup> A sarau lao nikier, men Sus o Proselit lelapok toto idauenla Paulus o Parnapas, me mamasani ong irail o panau irail, ren podidi ong mak en Kot.<sup>44</sup> A ni sapat kokodo karos toun kanim o pokon pena, pwen rong masan en Kot.<sup>45</sup> A Sus akan lao kilanger pokon o, ap pepeirinki o lidere meakan, me Paulus kaweweda; re palian o lalaue.<sup>46</sup> A Paulus o Parnapas ap so masak katitiki: Masan en Kot en loki dong komail mas, a pweki omail kase sang, o wia kin komail sowar ong maur soutuk, kilang, se sope wei ong men liki kan.<sup>47</sup> Pwe iet duen me Kaun o kotin masani ong kit: Ngai me kasapwil uk adar, pwen marain pan men liki kan, pwe koe en kamaur sili lel sap karos.<sup>48</sup> Men liki kan lao rongadar met, ap peren kidar, o kapinga masan en Kot o karos, me kileledi ong maur soutuk, posonlar.<sup>49</sup> A masan en Kaun o lolok sili nan wei kan karos.<sup>50</sup> A Sus oko kamakarada li saupeidi lelapok o saumas en kanim kan, o kapei ong Paulus o Parnapas aramas o kasapo ke ir sang nan sap arail,<sup>51</sup> A ira sipede sang ni aluwilu ar pwel, pwen kadede ong irail, ap kotilan Ikonien.<sup>52</sup> A tounpadak kan me dir kila peren o Ngen sarau i.

## 14

<sup>1</sup> A IET me wiauier nan Ikonien: Ira karos kotilong ong nan sinako ke en Sus oko, ap padapadak kelail, lao kisan men Sus o Krik toto posonla. <sup>2</sup> A Sus oko, me so poson, kamokimokid men liki kai o kalolap irail ong saulang kan. <sup>3</sup> A ira mimieta warai wasa o, o aima padapadak duen kupur en

Kaun o, me kotin kapwaiada masan en kupur a, ni a kotin kasaleda kilel o manaman akan ki lim ara. <sup>4</sup> A toun kanim liak toror pasang. Akai me iang Sus oko, a akai iang wanporon akan. <sup>5</sup> A moromorong lao wiauier sang ren men liki kan o pil Sus oko iangaki ar saumas akan, pwen kame o kate ira, <sup>6</sup> Ira lao mangier, ap pitilang kanim Likaonien, o Listra, o Derpe, o sap me mi imp a, <sup>7</sup> Wasa o ira padapadak rongamau. <sup>8</sup> A ol amen momod Listra, me pat en näluet o kokon dangidang sang ni a tikitik, me saikenta alu. <sup>9</sup> I me kin rongerong en Paulus a padak. A lao masani i, ap kotin kasauiada, me a poson itar ong en kakelailada, <sup>10</sup> Ap kotin kapitie laudedada masani: Ukida nä om! I ari masiokadar o aluwei. <sup>11</sup> Aramas lao kilanger, me Paulus kotin wiadar, rap ngilada kapitiki nin lokaia en Liakonien: Kot akan wia aramasala ap koti dong kitail. <sup>12</sup> Irail ari ki ong mar en Parnapas Iupiter, a Paulus Mercurius, pweki a kaunda kaparok. <sup>13</sup> A samero en Iupiter, me kin mi mon kanim o, ap wado kau ol o al en tuka kai mon kanim o, ap men iang pokon o wia mairong isis. <sup>14</sup> A wanporon oko Parnapas i Paulus lao mangi mepukat, ira ap ter pasang ara likau o tang wong nan pung en aramas akan likelikwir: <sup>15</sup> Maing ko, da me komail wiawia i mepukat? Kit aramas dueta komail, ap padaki ong komail, pwe komail en wuki sang kot mal pukat, wuki ong Kot ieias, me kotin kapikadar lang, o sappa, o sed, o audepa rail karos. <sup>16</sup> Me kotin muedi ong toun sap karos en wia pein insen ar mas o. <sup>17</sup> Ari so, a sota kotin okila pein i, pwe a kotin wiawia mau o kotiki ong komail katau sang nanlang o rak o, o kadireki nan mongiong omail manga o peren. <sup>18</sup> Ira kotin masani mepukat, a ekis ta, ira sota kak katukiedi en pokon o ar pan mairong ong ira. <sup>19</sup> A Sus oko ap kodo sang Antiokien o Ikonien, kamakarada aramas. Ir ari kate Paulus o uradokilang likin kanim o, re ap kiki ong, me a matalar. <sup>20</sup> A ni en tounpadak kan ar kapil pena i, a kotida ap kolong ong nan kanim o, a manda a iang Parnapas koeila Derpe. <sup>21</sup> Ira lao padapadak rongamau nan kanim o, o kasualangalar me toto, ira ap purela Listra, o Ikonien, o Antiokien. <sup>22</sup> Ira kakelada ngen en tounpadak kan o panau irail, me ren dadaurata poson, o me kitail en leleki wein Kot kamekam toto. <sup>23</sup> Ira lao kasapwilada saunkoa kai nan momodisou karos, ap kapakap o kaisesol, ap kapakapa ki irail ren Kaun o me re posonlar. <sup>24</sup> Ira kakan sili Pisdien ap lel ong Pampilien. <sup>25</sup> Ira lao padaki duen masan o nan Perke, ap kotilang Atalien. <sup>26</sup> A sang ni wasa o ira tangalang Antiokien, wasa ira sapwile kidar mak en Kot ong dodok o me ira kapwaiadar. <sup>27</sup> Ira lao pwarador, ap kapokon

pena momodisou, rap kotin kasoia ong irail duen en Kot a kotin wiaki ira, o duen a kotin ritingada wanim en poson en men liki kan. <sup>28</sup> Ira ap kotikot warai ren tounpadak kan.

## 15

<sup>1</sup> A AKAI me kodido sang Iudäa, ap padaki ong saulang kan: Ma komail sota sirkomsais duen tiak en Moses, komail sota pan kak maurela. <sup>2</sup> A irail lao liak toror pasang o akakamai ong Paulus o Parnapas, re ap inauki pena, me Paulus i Parnapas, o pil akai irail en kotidalang Ierusalem ren wanporon o saunkoa kan pweki mepukat. <sup>3</sup> Momodisou ap likid ir wei lao ekis wasa. Irail ap weweid nan Pönisien o Samaria o kasokasoia duen en men liki ar wukila. Irail ari kaperenda melel saulang kan karos. <sup>4</sup> Irail lao lel Ierusalem, momodisou o wanporon, o saunkoa kan ap kasamo ir. Irail ap katitiki meakan, me Kot kotin wiaki irail er. <sup>5</sup> A akai kisan pwin en Parisär, me saulangalar, me uda indada: Me pung, en sirkomsais ir ala, o kapi ong irail, en wiawia kapung en Moses. <sup>6</sup> A wanporon o saunkoa kan pokon pena, pwen kaparok duen met. <sup>7</sup> Irail lao kapukapung pena warailar, Petrus ap kotida masani ong irail: Ri ai kan, komail asa, me mas o Kot kotin pil ia dar sang nan pung omail, pwe men liki kan en rongang sang nan au ai masan en rongamau o posonla. <sup>8</sup> A Kot me kotin ereki mongiong en aramas, kotin kadede irail o kotiki ong irail Ngen sarau dueta kitail, <sup>9</sup> O a sota kotin wiada irair eu nan pung en kitail o irail ni a kotin kamakel mongiong arail ki poson. <sup>10</sup> Ari, da me komail kasongesongki Kot, en kidang pon pop en tounpadak kan lopu eu, me sam atail akan o pil kitail sota kak wa. <sup>11</sup> A kitail kin kamekamelele, me kitail pan kamaureki mak en Kaun Iesus Kristus dueta irail. <sup>12</sup> A pokon o nenenlata o rongerong en Parnapas i Paulus ara katiti duen manaman oko o kilel kai, me Kot kotin wia kidar lim ara nan pung en men liki kan. <sup>13</sup> Irail lao nenenlar, Iakopus ap kaparok masanida: Ri ai kan komail rong ia! <sup>14</sup> Simon me kasoiada duen en Kot a kotin pwaro dong men liki kan ni tapi o pwen pili sang irail kainok eu ong mar a. <sup>15</sup> Pwe iduen masan en saukop akan duen a intingidi: <sup>16</sup> Murin mepukat I pan puredo o kawiliakapada im en Dawid, me rongki pasanger, o pur ong kauada wasa me olar. <sup>17</sup> Pwe luan aramas akan en raparapaki Kaun o, pil men liki kan, me wan ad ai, iei me Kaun o masaniadar, me kin kotin wiawia. <sup>18</sup> Mepukat me lolok sang ni tapi o. <sup>19</sup> Ari iet me i kasuiada, kitail ender katoutoui irail me wuki ong Kot sang ren men liki kan. <sup>20</sup> A sen intinge wong irail, ren liki sang kasaut en kot mal akan, o nenek,

o man mopelar akan, o nta. <sup>21</sup> Pwe sang mas kokodo saunkawewe en Moses kin mi nan kanim karos, pwe re kin padapadak duen i nan sinakoke kan ni ran en sapat akan karos. <sup>22</sup> Wanporon o saunkoa kan, o momodisou ap maukidar, en pilada ol akai sang ar pokon o porone ira wei iang Paulus i Parnapas, en kotila Antiokien: Iudas, me pil ad a Parnapas o Silas, ol pukat, me kaun pan saulang kan. <sup>23</sup> A iet eten, me re intingiedier ap kadar wong irail: Iet kit wanporon o saunkoa kan o saulang kan kadar wong komail, ri at akan, me ko sang ren men liki kan nan Antiokien, o Sirien, o Sisilia at ranamau. <sup>24</sup> Aki at ronger, me akai, me koiei sang re at, kin kaponepone kin ngen omail ar padak kan ni ar kasapunge komail lar indada: Komail en sirkomsais o kapwaiada kapung o; a se sota ki ong irail kusoned akan. <sup>25</sup> Kit ap wiaki eu ni at maukidar en piladar ol akai, ap kadar wong komail iangaki kompoke pat Parnapas o Paulus. <sup>26</sup> Ol oko me tonmeteki maur ara ong mar en Kaun Iesus Kristus. <sup>27</sup> Kit ari kadar wei Iudas o Silas, me pil pan kasoi ong komail mepukat. <sup>28</sup> Pwe Ngen sarau i kit kin kupukupura, me mau, se ender ki ong komail eu lopus; mepukat eta me kasampwal: <sup>29</sup> Komail liki sang uduk, me mairong ong kot likam, o nta, o man mopelar, o nenek. Ma komail liki sang mepukat, nan komail kin wiawia me mau. Ran kasele! <sup>30</sup> Irail lao pakadarala, ap kotilang Antiokien, re ap kapokon ir pena, ki ong irail kisin likau o. <sup>31</sup> Irail lao wadoker, ap peren kidar kamait parail. <sup>32</sup> A Iudas i Silas, me pil saukop oko panau kin saulang kan kasoi toto o pil katinai ir ada. <sup>33</sup> Irail mi wasa o lao ran akai, ap pakadarala popol sang ren saulang kan, pwe ren kola ren me kadar ira ala. <sup>35</sup> A Paulus i Parnapas kotikoteta Antiokien, kawewedar o padapadaki masan en Kaun o, o me toto pil iang. <sup>36</sup> Kadekadeo murin ran akai Paulus masani on Parnapas: Kita pan purela ren saulang kan, me mi kanim akan, wasa kita padakier duen masan en Kaun o, o kalekalelapok due 'rail. <sup>37</sup> A Parnapas men ukada Ioanes, me pil ad a Markus. <sup>38</sup> A Paulus kupura, me a sota mau, ira en ukada i, me muei sang ira nan Pampilien o solar iang ira kolang dodok. <sup>39</sup> Ira ari akamai pena lao ira muei pasang. Parnapas ari ukada Markus tanga wong Sipern. <sup>40</sup> Paulus piladar Silas ap kotila. A saulang kan mueidela ira ni mak en Kot. <sup>41</sup> I ari kakan sili nan Sirien o Silisia katinada momodisou kan.

## 16

<sup>1</sup> PAULUS ari kotilang Derpe o Listra. A kilang tounpadak amen mi wasa o, me ad a Timoteus, nain li en Sus me poson amen, a

sam a men Krik. <sup>2</sup> Nan i kalok mau sili ren saulang en Listra o Ikonien akan. <sup>3</sup> Paulus kotin men, i en waroki ong i. I ari uk i o sirkomsais i, pweki Sus oko, me mi wasa o, pwe irail asaer, me sam a men Krik amen. <sup>4</sup> A ni arail kotikot sili nan kanim akan, re padaki ong irail me ren kapwaiada kusoned oko, me wiauier ren wanporon o saunkoa kan nan Ierusalem. <sup>5</sup> Momodisou kan ari kelailada ni poson o re totolar ni ran karos. <sup>6</sup> A Ngen sarau kotin inapwiedi, me ren der padak duen masan ran Asien, re ap kakan sili Priken o Kalatien. <sup>7</sup> Irail lao pwara dong Misien, re song daulul wei ong Pitinien, a Ngen en Iesus sota kotin mueid ong. <sup>8</sup> Irail lao daulul lar Misien, ap kodilang Troas. <sup>9</sup> A kasansal eu pwara dong Paulus ni pong: Ol en Masetonien amen me tolar, poekipoeki i indada: Kom koti dong Masetonien, sauasa kit! <sup>10</sup> A lao udiaker kasansal o, kit madang kolang Masetonien, pwe se asaer, me Kaun o kotin molipe kit, en kolan padaki ong irail rongamau. <sup>11</sup> Kit ari masel wei sang Troas o inen wong Samotrasien, a manda lel ong Neapolis, <sup>12</sup> O sang wasa o lel Pilipi, kanim lapalap ni apali en Masetonien, me kisan sap en men Rom. Kit ari mimieta nan kanim o ran akai. <sup>13</sup> Ni ran en sapat se koiei sang kanim o, kolang pon pilap pot, wasa re kin kapapak ia. Kit ari mondi o kawewe ong li akai, me kin pokopokon wasa o. <sup>14</sup> A li amen ad a Lidia, men saunet en likau waitata, men Tiatira amen, me kin kaudok ong Kot. Nan i me rongerong kit. A Kaun o kotin ritingada mongiong i, pwen apapwali meakan, me Paulus masanier. <sup>15</sup> I o a penainai lao paptaiselar, ap poeki re at indada: Ma komail kasau ia da, me i posonlar Kaun o, komail pan pedeleng ong nan im ai o kotikot ia; i ari ngidingide kin kit. <sup>16</sup> Kadekadeo ni at kolan kapapak lidu amen, me kin wun ani, ap tu ong kit, me kin kare ong moni toto ren a saumas kan ki a wun ani. <sup>17</sup> I me idauen Paulus o kit weriwer indada: Aramas pukat me sapwilim en Kot lapalap ladu ko, me kin padaki ong komail duen al en maur. <sup>18</sup> A mepukat a wiadar ran toto. A Paulus kupurola kaulap ap kotin saupeila masani ong ngen o: Ni mar en Iesus Kristus me i indai ong uk, keredi sang i! I ap keredi sang ni auer ota. <sup>19</sup> A saumas akan lao diarada, me solar kapoporop en ar men wiaki moni, ap saikidi Paulus o Silas, wai ira long dong wasan net ren saumas akan. <sup>20</sup> O kalua ira wei ren saunkapung kan katitiki: Aramas pukat kisan men Sus kin kaokaoe atail kanim, <sup>21</sup> O padapadaki tiak me sota pung se en ale de wiada, pwe kitail men Rom. <sup>22</sup> Aramas karos ap uda por ong ira, o saunkapung ko dere sang ara likau kan o kapi, ren woki ira. <sup>23</sup> Irail wokiwoki ira pan pak toto, rap

kase ira di nan imateng o kapiedi silepa o, en katengeteng ira di. <sup>24</sup> A lao aleer kusoned wet ap kase ira di ong nan warong, en imateng o saliedi aluwilu 'ra nin tuka kai. <sup>25</sup> A lao ni ailep en pong Paulus o Silas kapakap o melkaka ong Kot, o me salidi ko rongrong ira, <sup>26</sup> A sap o madang rereredar, kasukasuk en imateng mokidedar, wanim ko ap madang ritida o ar sal akan karos lapwadar. <sup>27</sup> A silepan imateng lao pirida sang a mair o kilang wanim ko ar ritidar, ap ngapekida a kodlas o, a pan kamela pein i, pwe a kiki ong, me salidi ko me pitila. <sup>28</sup> A Paulus kapitie laudedda masani: Kom der kame uk ala, pwe kit karos mia. <sup>29</sup> A ap idok lamp eu o tang rerer o dairukedi sang Paulus o Silas. <sup>30</sup> O wa ira wei sang indada: Maing ko, da me i en wiada, pwen kamaurela? <sup>31</sup> Ira ap masani: Poson Kaun Iesus, a koe o toun im om pan maurela. <sup>32</sup> Ira ari kawewe ong i o toun im a karos masan en Kaun o. <sup>33</sup> I ari uk ira ni auer ota ni pong o, widen ara pwal oko. I o na kan karos ap madang paptaiselar. <sup>34</sup> I ap kalua wong ira nan im a, ap kida mo 'ra kisin manga, o peren kidar a posonla Kot, i o iang a kan. <sup>35</sup> A lao ran pasang, saupeidi ko poronela papa ko indada: Lapwada aramasan pukak! <sup>36</sup> Silepan imateng o ap kaireki Paulus masan pukak indada: Saupeidi ko me ilakido, koma en lapwada. Koma ari kotila popol <sup>37</sup> A Paulus kotin masani ong irail: Irail sansal kadeike kit adar o woki kit men Rom, ap kase kit ale nan imateng, a met re men kadar kit ala so sansal. A so, irail en pein kodo, wa kit wei. <sup>38</sup> A papa ko kaireki saupeidi kan masan pukak. Irail ap masakadar ni ar rongadar, me ira men Rom. <sup>39</sup> Irail ari kodo, poeki re 'ra o wa ira la sang, o ngidingideki ira, en sapat wei sang nan kanim o. <sup>40</sup> Ira ari pedoido sang nan imateng o, ap kotila ren Lidia. Ira lao tu ong saulang kan, ap panaui irail o sipale wei.

## 17

<sup>1</sup> IRA kotin weid nan Ampipolis o Apolonia, ap pwara dong Tesalonik, wasa sinakoke en Sus oko mi ia. <sup>2</sup> Paulus ap kotilong ong re 'rail duen a kin wiawia o iang ir kapakaparok pena sang kisin likau kan ni ran en sapat silu. <sup>3</sup> A kotin padaki o kasaleda, me Kristus udan kalokolok o iasada sang ren me melar akan, o me Iesus men et, me i kawewe ong komail, me Kristus. <sup>4</sup> O akai irail me posonla ap waroki ong Paulus i Silas, o pil men Krik lelapok me toto, o li saupeidi me kaidin me malaulau. <sup>5</sup> A Sus oko pepeirindar, ap ukada ol sued kai, o kapokon irail pena o kapeida kanim o, o kapil pena im en Iason, pwen wa ira dong pokon o. <sup>6</sup> Irail lao so diar ira da re ap waikelong dong saumas

akan en kanim o Iason o saulang kai indada: Mepukat kamokimokidadar sappa, nan ira pil pwara dor met. <sup>7</sup> A Iason kasamo ira er, o irail karos kin tiakedi masan en Sisa ni ar katitiki, me dene amen Nanmarki Iesus. <sup>8</sup> Irail ari kamakaradar aramas o saumas akan nan kanim o ni ar rongadar mepukat. <sup>9</sup> Irail lao aleer sang ren Iason o me tei kan ar kapwa, re ap kadar ira la. <sup>10</sup> A saulang kan madang kadarala Paulus i Silas ni pong Peröa. Irail lao pwarado, ap kotilong ong nan sinakoke en Sus oko. <sup>11</sup> Mepukat me mau sang irail nan Tesalonik, pwe re pitipit aleer masan o pereperen kalelapokki kisin likau ni ran karos, ma melel mepukat. <sup>12</sup> Ari, me toto irail posonlar, li o ol en Krik kan kisan saupeidi me toto iang. <sup>13</sup> A men Sus en Tesalonik ko lao ronger, me Paulus pil padapadak nan Peröa masan en Kot, irail ap kodo o kamakaradar aramas akan. <sup>14</sup> A saulang kan madang kadarala Paulus, dene a pan kotidila ni oror. A Silas i Timoteus mimieta wasa o. <sup>15</sup> O me pelikid Paulus akan kalua i lel Aten. Irail lao aleer kusoned ong Silas o Timoteus, me ira en pitipit ko dong i, re ap samalar. <sup>16</sup> A ni en Paulus a kotin auiaui ira nan Aten kupura ap ola ni a masani nan kanim o dikedik en ani rok ia. <sup>17</sup> I ari kotin padaki ong Sus oko o me toun kaudok kan nan sinakoke pil wasan net, me a kotin padaki ong, me kin pokon pena wasa o ni ran akan karos. <sup>18</sup> A saunpadak en Epikurios o Stoik kai ap akamai ong i o akai indada: Da paupaulap men et men inda? O akai indada: Likamata i saunpadak en kot en wai akan aki a padaki ong irail rongamau en Iesus o en aramas ar pan maureda. <sup>19</sup> Irail ari ukada i o walang Areopak indada: Kit sota pan kak rong duen padak kap pot et, me koe kin kaweweda? <sup>20</sup> Pwe kasoi en wai pot, me kom wa dong kit, kit ari men weweki duen mepukat. <sup>21</sup> Pwe toun Aten o men wai kan, me mi wasa o, kin sapisokki ar kasokasoi o rongrong duen mekaros me kap. <sup>22</sup> A Paulus kotida pon dol en mars masani: Komail ol oko en Aten, i kasauidar, me komail kin masak kaulap kot likam akan, <sup>23</sup> Pwe ni ai koko sili met, o kilekilanger omal sarau kan, i ap diaradar pei sarau eu, me intingidier poa: Sapwilim en kot me so diarokadar, me komail kin kaudoki ong ap sasa i, i me i kin padapadaki ong komail. <sup>24</sup> Kase me kotin wiadar sappa o audepa karos i me Kaun en nanlang o sappa, nan a sota kotikot nan im en kaudok kan me aramas wiadar. <sup>25</sup> O sota me kin upaki i pa en aramas likamata a kotin anane meakot; pwe pein i kin kotin nene ong karos maur, o asingok o mekaros. <sup>26</sup> O a kotin wiadar wein aramas en sappa karos kapaparap sang nta ta ieu, pwen kaukauson

nan sap karos, o a kotin kileledier warai o wasan ar kauson. <sup>27</sup> Pwe ren raparapaki Kot, ma ir kak pam o diar i, pwe a sota kin doo sang amen amen kitail. <sup>28</sup> Pwe i me kitail kin memaureki, o mokideki, o mimiaki, duen akai omai saunkaul pil indadar: Pwe kis a kitail karos. <sup>29</sup> Ari, ma kitail kisan Kot, kitail ender lamelame, me Kot rasong kold, de silper, de takai, de dikedik eu, me aramas lolekong diaradar. <sup>30</sup> Ari, kot kotin kanongama ong kitail ni ansaun atail rotorot. A ansau wet a kotin masani ong aramas karos, ren kalula wasa karos. <sup>31</sup> Pwe a kotin kileledier ran eu, me a pan kotin kadeika kida sappa Ol amen, me a kotin katororedar ni tiak pung. A iet kilel, me a kotiki ong aramas karos: A kotin kaiasadar i sang ren me melar akan. <sup>32</sup> Irail lao rongadar duen mauredan me melar akan akai ap lalaue, a akai inda: Se men pur ong rong sang komui duen met. <sup>33</sup> Paulus ari kotila sang re 'rail. <sup>34</sup> A ol akai waroki ong i o posonlar. Amen ir Dionisius kisan saunkapung kan; a li amen, me ad a Damaris, o pil akai iang irail.

## 18

<sup>1</sup> MURIN mepukat a kotila sang Aten o kotilang Korint, <sup>2</sup> A lao diaradar Sus amen me ad a Akwila me ipwidier Pontus, me apton kodo sang Italian o a paud Prisila, aki Klaudius masani, me Sus oko karos en kokoke sang Rom, i ari kotilang re 'ra. <sup>3</sup> O kotikot re 'ra, iang dodok, pwe ira song ta ieu wiada ni likau. <sup>4</sup> O ni ran en sapat karos a kin kotin padapadak nan sinakoke o kalekalelekonge men Sus o men Krik kan. <sup>5</sup> A Silas o Timoteus lao kodido sang Masetonien, Paulus kotin sopisokki kaulap padak o, pwe a kadede ong Sus akan, me Yesus me Kristus. <sup>6</sup> A irail lao akamai o lalaue, a ap sipededi sapwilim a likau masani ong irail: Dip omai en kapokon ong pein komail. Ngai me makelekel sang met, i pan kola ren men liki kan. <sup>7</sup> I ari kotila sang wasa o ap kotilang nan im en amen me ad a Sust me kin kaudok ong Kot, me im a pat ong sinakoke. <sup>8</sup> A Krispus, saumas en sinakoke posonla Kaun o, iangaki karos toun im a; toun Korint me toto lao rongada, ap posonla o paptaisela. <sup>9</sup> Kaun o ap kotin masani ong Paulus ni a auramen ni pong: Der masak, padapadak ender nenenna! <sup>10</sup> Pwe Ngai iang uk, o sota me pan sair uk, pwen kame uk, pwe nai aramas me toto nan kanim wet. <sup>11</sup> I ari kotikot wasa o par eu o saunipong wonu kaweweda masan en Kot nan pung arail. <sup>12</sup> Ni muein Kalion kakaundar Akaia, Sus akan ap wiaki eu, saikidi Paulus o wa dong i mon mol en kadeik o, <sup>13</sup> Indada: Lap men et kin pitipiti aramas, ren kaudok ong Kot ap palian kapung. <sup>14</sup> Paulus lao men

masanda, Kalion ap masani ong Sus oko: Komail Sus oko, ma sapung eu de me sued kot, i pan rong komail. <sup>15</sup> A ma akamai duen lamalam, o ad akan, o omai kapung, nan pein komail pan wia, pwe ngai sota men saunkapung pan mepukat. <sup>16</sup> I ari siken ir wei sang ni mol en kadeik o. <sup>17</sup> A karos ap saikidi Sostenes, saumas en sinakoke o woki i mon mol en kadeik o. A Kalion sota insenoki mepukat karos. <sup>18</sup> Paulus lao kotikot wasa o ran toto, ap kotin kamurimuri ong saulang kan o iangala sop pot kotilang Sirien; Prisila i Akwila iang i. Mas a kotin kotedar tapwi nan Kenkräa, pwe a inau mia. <sup>19</sup> I ari supi ong Epibus, pwilikidi ong ira wasa o, a pein i kotilong ong nan sinakoke o kaparak ong Sus oko. <sup>20</sup> Irail poeki i, en mimieta re 'rail ansau warai, a sota kotin duki ong. <sup>21</sup> O a kotin kamurimuri ong irail masani: I udan iang kamadip kokodo nan Ierusalem. A ma Kot pan kotin mueid ong ia, i pan pure dong komail. A ap kotin masel sang Epibus. <sup>22</sup> A lao kotin keredi Säsarea, ap kotidala ranamau ong momodisou ap kotilang Antiokien. <sup>23</sup> A kotikot wasa o ansau kis, ap kotila kakan sili nan wein Kalatia, o Prikien, kakelada tounpadak kan karos. <sup>24</sup> A men Sus amen, me ad a Apulus, me tikidar Aleksandrien, iei ol kadek lokaia, o me ereki kisin likau kan, a ko dong Epibus. <sup>25</sup> Men et aleeer padak ni al en Kaun o, o a kelail ni ngen e, a padapadak o kaweweda mau meakan duen Yesus; a paptais en Ioanes me a asa. <sup>26</sup> I ari tapiada aima padapadak nan sinakoke. A Akwila o Prisila lao rong i, ap uke dong ira i, kawewe ong i al en Kot. <sup>27</sup> A lao men kola Akaia, saulang kai ap inting wong tounpadak kan, poeki re 'rail, ren kasamo i. I lao pwarado, ap sauasa irail, me poson kilar mak en Kot. <sup>28</sup> Pwe a manaman ong Sus akan, kasale ong irail sang kisin likau kan me Yesus me Kristus.

## 19

<sup>1</sup> A ni ansau Apulus mi Korint, Paulus kotin kakan sili sap en pali poa kan, ap lele dong Epibus wasa a diarada tounpadak kai. <sup>2</sup> A kotin masani ong irail: Komail aleeer Ngen sarau ni omai posonlar? Irail potoan ong i: Se sota man rong, me Ngen sarau mia. <sup>3</sup> A ap kotin masani: A is, me komail paptais ong? Irail inda: Ong paptais en Ioanes. <sup>4</sup> Paulus masani: Ioanes paptais ki paptais en kalula, ni a masani ong aramas akan, me ren poson i me pan pwarado mur i, i Yesus. <sup>5</sup> Irail lao rongadar met, re ap paptais ong mar en Kaun Yesus. <sup>6</sup> Paulus lao kotin pwil po 'rail lim a kan, Ngen sarau ap kotidi po 'rail, irail ari lokaia ngil toror pasang o deideikop. <sup>7</sup> A ir ol oko me ekriamen. <sup>8</sup> I ari kotin purepure

nan sinako ke o aima padapadak saunipong silu, kapakaparok o kawewedar meakan duen wein Kot. <sup>9</sup> A akai lao kapitakailar, o so poson, o lokelokaia sued ong aramas akan duen lamalam, a ap saupej sang irail o katorela tounpadak kan, o padapadaki ong irail nan im en padak en Tiranus <sup>10</sup> Mepukat wiauier saunpar riau; toun Asien karos ari rongada masan en Kaun o, men Sus o men Krik karos. <sup>11</sup> O Kot me kotin wia kida lim en Paulus manaman kapuriamui akan. <sup>12</sup> Re pil aleer lim en pudo o likau moa sang pali war a, pwilikidi ong me somau kan, somau o ap sare sang, o ngen sued akan keredi sang. <sup>13</sup> Men Sus widingok kai, me kin koko sili kati ani, ap song sakaraki dong irail, me tanwar en ngen sued kai, mar en Kaun Iesus, indada: Kit kaukilang komail Iesus, me Paulus kin padapadak due. <sup>14</sup> A ol isimen mia nain samaro lapalap Skepas, ol en Sus amen, me wiadar mepukat. <sup>15</sup> A ngen sued sapeng irail indada: I asa Iesus, o i asa duen Paulus, a komail, is komail? <sup>16</sup> A aramas o, me ngen sued mi poa, ap luse dong irail o kaloe irail edi. Ir ari tanga sang nan im o kiliso o kili olar. <sup>17</sup> A met lok sili ren men Sus o Krik akan, me kauson Epikus. O masak kipa irail edi, o mar en Kaun Iesus me lomuinar kausalap. <sup>18</sup> O me iang posonlar me toto kodo weokadar o kasaledar arail wiawia kan. <sup>19</sup> O pil me toto, me kati ani, wa pena nairail puk o isik ir ada mon karos; ir ari wadok pwain ar o diar, me a dok ong moni limenen. <sup>20</sup> Masan en Kaun ari pwaidar kausalap. <sup>21</sup> Murin mepukat Paulus ap kotin inong iong ni ngen e kakan sili wein Masetonien o Akaia, ap kotilang Ierusalem masanidar: I lao milar wasa o, i pil pan kilang Rom. <sup>22</sup> I ari kadalala Masetonien riamen, kisan me papa i: Timoteus o Erastus. A pein i kotikoteta mas nan Asien. <sup>23</sup> I ansau me moromorong laud wiauier pweki lamalam. <sup>24</sup> Pwe amen, me ad a Demetrius, saunmata amen, me kin wiada im en kaudok silper kan ong Diana, me kare ong irail, me kin wiawiada, moni toto. <sup>25</sup> I ap kapokon irail pena o toun dodok en song ota indada: Maing ko, komail asa, me dodok wet meid kadepa ong kitail, pwe i me kitail kapwapwaki. <sup>26</sup> A komail kilekilang o rongerong, me Paulus men et kin kaloedi o kawukila aramas toto a kaidin nan Epikus eta, pwe pil koren iong nan Asien pon, ni a kin padaki ong aramas akan, me dene kaidin irail kot akan, me wiauier pan pa en aramas akan. <sup>27</sup> Mepukat meid apwal ong kitail. Pwe kaidin atail dodok eta me pan kamala, pwe pil im kaudok en kot Diana lapalap o a lingan, me toun Asien o sappa karos kin kaudoki ong pan sorela. <sup>28</sup> Irail lao ronger mepukat, re ap makara kida kausalap o weriweradar

indada: Meid lapalap Diana en men Epikus! <sup>29</sup> A karos toun kanim o ap pingidar, wiaki eu, tangalang im en madong, tangaki Kaios o Aristarkus men Masetonien, me waroki ong Paulus oko. <sup>30</sup> A Paulus lao pan kotilong nan pokon o, tounpadak kan ap sota meuid ong i. <sup>31</sup> O saumas en Asien kai, me kompokepa kan, ilake dong i, panaui i, ender kotilang im en madong o. <sup>32</sup> Ari, akai wia eu song en lokaia, a akai eu, pwe pokon o pingidar. A me toto re 'rail sasa karep en ar pokon pena. <sup>33</sup> Irail sikon sang nan pokon o Aleksander; Sus oko me sikonla i. A Aleksander olol ong irail, ap men sapeng pokon o. <sup>34</sup> Irail lao asa, me i kisan Sus oko, re ap wiaki eu weriwerada auer riau: Meid lapalap Diana en men Epikus! <sup>35</sup> A sauninting en kanim o lao kadukiedi pokon o, ap indada: Komail ol oko en Epikus, is aramas, me sasa, me kanim en men Epikus kin kaukaudoki ong Diana lapalap o dikedik, me pupedi sang nanlang? <sup>36</sup> A ma sota, me pan kak kalikame mepukat, komail en nenenla o der wiada me sapung! <sup>37</sup> Pwe komail ukedo ol pukat, me sota kin kuliada im en kaudok o, pil sota lalau e mail kot li. <sup>38</sup> A ma Demetrius o iang a kan mauki meakot ren amen, kapung ap pan wiauier, pwe saunkapung kai mia, ren kapukapung re 'rail. <sup>39</sup> A ma komail mauki eu song toror, i me pan kapungala nan kapung o. <sup>40</sup> Pwe kitail pan pukoki morong en ran wet, pwe sota karepen, me kitail en kapungki pokon wet ar tangatang pena. <sup>41</sup> A lao masani ong irail mepukat, ap kadar pasang pokon o.

## 20

<sup>1</sup> MORONG lao dukedier, Paulus ap molipe pena tounpadak kan, ap kotin kamurimuri ong irail o kotila, pwen sailokelang Masetonien. <sup>2</sup> A lao kakan sili sap oko, o panapanauier irail kausalap, ap kotilang wein Krik. <sup>3</sup> A lao kotikot wasa o saunipong silu, ap men kotilang Sirien, ari so, a kotin pure dong Masetonien, pwe Sus oko masamasan i. <sup>4</sup> A iet akan, me likid i lel Asien: Sopater nain Pirus men Peröa, a Aristarkus o Sekundus men Tesalonik, a Kaius men Derpe, o Timoteus, o Tikikus, o Tropimus men Asien. <sup>5</sup> Mepukat tiang mas ap aui kit nan Troas. <sup>6</sup> Murin kamadip en prot somut se serok wei sang Pilipi, tangatangki ran limau kokola re 'rail Troas, wasa se mimi ia ran isu. <sup>7</sup> A ni ran kaieu en wik, ni at pokon pena, pwen pilitiki pena prot, Paulus ap kotin padaki ong irail. A mandan ran o a pan samala. A kotin kawarailar a padak lao lel ailep en pong. <sup>8</sup> A lamp toto mi nan kokon poa, wasa se pokon pena ia. <sup>9</sup> A manakap amen, me ad a Eutikus, me momod nan wanimtuk, me mair kalikala. A ni en Paulus a padak

warai, i ari mair kalikala melel, ap pupedi sang ni kasilu en kokon poa, o re pokada, a melar. <sup>10</sup> A Paulus me kotidi kipedi ong poa o polodi i masani: Komail der mauk, pwe a memaur! <sup>11</sup> I lao kotidala o pilitiki pena prot, o konoter, o padapadak warai lao lel wasa ran, ap kotilar. <sup>12</sup> A irail wado manakap memaur ap pereperen kaulalap. <sup>13</sup> A kit me madang iang sop o, tangatang kolang Asos, wasa se pan uk ia Paulus, pwe i me a kakalik ong kit. A pein i pan sapal. <sup>14</sup> A lao tu ong kit nan Asos, se ap uk i, tangalang Mitelene. <sup>15</sup> Kit tangatang kodo sang wasa o, a manda se lel ong likin Kios, o manda se lele dong Samos, o se mondi Trokilion, a manda se pwara dong Miletus. <sup>16</sup> Pwe Paulus kileledier en dauili Episus, pwe a der pwapwand nan Asien, pwe a kotin karawaru, ma a pan kak, a pan lel ong Ierusalem ni ran en Pentikos. <sup>17</sup> A sang Miletus a kotin ilakilang Episus molipe saunkoa en momodisou kan. <sup>18</sup> Irail lao pwara dong i, a kotin masani ong irail: Komail asa duen ai wiawia re omail ansau karos sang ni tapin ran o, me i lel Asien, <sup>19</sup> Duen i papa Kaun o ni aktikitik, o sangesang, o kamekam nan pung en Sus oko, ni ar rukiruki ia di. <sup>20</sup> O duen i sota oki sanger meakot me katepan, pwe i kaireki komail karos, o padapadaki komail sansal o nan im akan. <sup>21</sup> O i kadede ong men Sus o pil men Krik kalula ong Kot o poson atail Kaun Iesus Kristus. <sup>22</sup> A kilang, i ap kokodalang Ierusalem, ngen i salidi o i sasa, da me pan pid ia wasa o. <sup>23</sup> A Ngen sarau kin kotin kadede ong ia nan kanim karos, me sal akan o kamekam kin auiaui ia. <sup>24</sup> Ari so, i sota kin insenoki mepukat, i pil sota kasampwaleki maur i, pwe i en kaimwisokela ai koa dodok, me i aleer sang ren Kaun Iesus, en kadede rongamau en mak en Kot. <sup>25</sup> A kilang, i ap asaer, me komail karos, me i padapadaki onger wein Kot, pan solar udial mas ai. <sup>26</sup> I me i kadede ong komail ran wet, me i makelekel sang ntan komail karos. <sup>27</sup> Pwe i padaki ong komail duen kupur en Kot, o sota man meakot me i okisang komail. <sup>28</sup> Komail ari kalaka komail o momodisou karos wasa, me Ngen sarau kotin kasapwil komail dang silepa ko, pwen apawali momodisou en Kot me a kotin pwainiki pein nta. <sup>29</sup> Pwe i asaer, me murin ai samalar kidi komad akai pan pwara dong komail, me sota pan kasampwaleki pwin o. <sup>30</sup> A ol akai pan uda sang nan pein komail, me pan padak sapung, pwen wiaki tounpadak kan pein ar warok kan. <sup>31</sup> Komail ari masamasan o tamanda, me i sota dukedi, panaui amen amen, sangesang ni ran ni pong saunpar silu. <sup>32</sup> Ari, i pan mueid ong komail Kot o masan en kupur a, me manaman ong kapwai komail ada, o kotiki

ong komail soso eu ren me sarau kan. <sup>33</sup> I sota noroke en amen a silper, de kold, de likau. <sup>34</sup> Pein komail asa, me pa i kat kin papa ia o ai warok kan. <sup>35</sup> I kasale ong komail er meakan duen komail en dodok, pwen sausa me luet akan o tamatamanda masan en Kaun Iesus akan, duen a pein kotin masani: Kiki wei me kaperen sang ale. <sup>36</sup> A lao kotin masanier mepukat, a kelepuiki iang irail karos kapapak. <sup>37</sup> Irail ari sangesang kaulalap o polodi tapin wor en Paulus o metik i. <sup>38</sup> Re insensuedekier kaulalap a masan, me dene re solar pan udial silang i. Irail ari likid i koti ong pon sop o.

## 21

<sup>1</sup> KADEKADEO kit lao maselwei sang murin at kamurimuri ong irail se tangatang inen wong Kus, a manda lel ong Rodus, a sang wasa o se tangalang Patara. <sup>2</sup> Kit lao diadarar sop pot, me pan kola Pönisien, se ap keredang poa maselwei. <sup>3</sup> Kit lao kilanger Sipern, se dauili ni pali maun, tangatang kolang Sirien ap supi ong Tirus, pwe i wasa audepan sop o pan pwilidi ia. <sup>4</sup> Se lao diadarar tounpadak kan, kit ap mimieta wasa o ran isu. Irail ap masanki Ngen, Paulus ender kodalang Ierusalem. <sup>5</sup> Kadekadeo kit lao kaimwisokela ran oko, se ap masel kokola. Irail karos me likid kit lel likin kanim, li o seri kan pil iang; kit ap kelepuiki ni oror, o kapapak. <sup>6</sup> Kit lao kamurimur pena, se ap kereda pon sop o, a irail purelang deu 'rail. <sup>7</sup> Kit tangatang kodo sang Tirus ap ko dong Ptolomais; kit ap ranamaui saulang kan o kairu re 'rail ran eu. <sup>8</sup> A mandan ran o se maseler, ap lel ong Säsarea, kit ap pedelong ong nan im en saunpadak Pilipus, me kisan isimen oko, o mimieta re a. <sup>9</sup> A men et na sripein makelekel pamen mia, me kin deideikop. <sup>10</sup> A ni at kaukauson wasa o ran toto, saukop amen ap kodido sang Iudäa, me ad a Akapus. <sup>11</sup> A lao pwara dong kit, ap ale sapwilim en Paulus pirapir pira pena pein pa a o nä a kan, katitiki: Iet me Ngen sarau kotin masani: Iet duen men Sus oko, me mi Ierusalem, pan saliedi ol o, me a pirapir wet, o pangalang i nan pa en men liki kan. <sup>12</sup> Kit lao rongada mepukat, kit o pil irail karos toun wasa o ap poekipoeki a ender kotidalang Ierusalem. <sup>13</sup> A Paulus kotin sapeng: Da me komail sangesangki o kawekila nan mongiong i? Pwe kaidin salidi eta, me i kak ong, pwe pil mela nan Ierusalem pweki mar en Kaun Iesus. <sup>14</sup> A lao sota duki ong, kit ap nenla indada: Kupur en Kaun o en pwaida. <sup>15</sup> Murin ran pukat se ki pena at kapwa kan o daululang Ierusalem. <sup>16</sup> A tounpadak en Säsarea kai pil iang kit, o re ukado Mnason men Sipern, tounpadak ma amen, me se

pan kairu re a. <sup>17</sup> Kit lao lel Ierusalem, saulang kan kasamo kit popul. <sup>18</sup> A mandan ran o Paulus iang kit kotila ren Iakopus o saunkoa karos pokon pena wasa o. <sup>19</sup> A lao ranmaui irail, ap kotin kasakasoia meakan, me Kot kotin wiari ong me liki kan ki a dodok. <sup>20</sup> Irail lao rongadar mepukat, re ap kapingaki Kot indai ong i: Ri at, kilang men Sus me totoia me iang posonlar, o irail karos kin kasampwaleki kapung o. <sup>21</sup> Nan a loki ong irail duen komui, me dene komui kin kaukawewe men Sus, me dondole men liki kan, ren kasela Moses o padapadaki, re ender sirkomsais seri kan, o pil der dadaur tiak kan. <sup>22</sup> A iaduen, pokon pan wiawui, o re pan rongada, me komui samador. <sup>23</sup> Ari, komui pan wiada met, me se pan indai ong komui: Ol pamen mi re at, me ar inau mia. <sup>24</sup> Uk irail ada o kamakelekel komui da iang-gaki irail, o pwain irail pwe mong arail en seisei, o karos pan kilang, me likam pot, me re ronger duen komui, o me komui pil kin kapwaiada kapung o. <sup>25</sup> A duen me posonlar sang ren men liki kan, se intingiedier o kusoned edar, me ren der kapwaiada mepukat. A iet eta: Ren liki sang uduk me mairong ong kot likam, o nta, o man mopelar, o nenek. <sup>26</sup> Paulus ap kotin ukada ol oko, a manda a kamakelekelada pein i ap iang irail kotilong ong nan im en kaudok o kotin kasaledar ran en arail kamakelekel, lel mairong en amen amen wiawuier. <sup>27</sup> A ran isu lao koren iong nikier, men Sus en Asien ap kilanger i nan im en kaudok o, rap kamoromoroda aramas karos o saikidi i, <sup>28</sup> Weriwerada indada: Ol en Israel, komail sauasa, iet aramas o me kin kaukawewe ong karos wasa karos, ren palian Sus akan, o kapung, o wasa kis et, o a pil kalua dong nan im en kaudok men Krik kai, o kasaminela wasa sarau wet. <sup>29</sup> Pwe mas o re kilangadar, me Tropimus men Epistus iang i nan kanim o, re ap kiki ong, me Paulus kalualong ong i nan im en kaudok. <sup>30</sup> A kanim o moromorongada kaulap o aramas akan tang pena. Re ap saikidi Paulus o waike sang i nan im en kaudok o, a wanim ko ap madang ritidi. <sup>31</sup> Irail pan kamela i, a rong ap lel ong saumas en saunpei kan, me Ierusalem moromorongda. <sup>32</sup> I ari madang ukada saunpei o saumas akai ap tangadi wong irail. Ir lao kilang saumas o saunpei ko, re ap solar woki Paulus. <sup>33</sup> Saumas o ap kai ong, koledi i masani, i en salikidi sal mata riapot, o idok: Is i, o da me a wiadar? <sup>34</sup> A akai sang nan pokon o weriwer wiada ong song en lokaia a akai eu. A ni a sota kak weweki, me re moromorongki, ap masani, a en wisikelang nan im en saunpei. <sup>35</sup> A lao lel ong kandake o, saunpei ap wewa i, pweki pokon o koiden pena i. <sup>36</sup> Pwe pokon o, me idauen, weriwer indada: Siken wei

i! <sup>37</sup> A ni en Paulus a pan wisikelong ong nan im en saunpei, a ap masani ong kaun lapalap o: A sota muei ong ia, en indang komui meakot? A ap masani: Komui asa lokaia en Krik? <sup>38</sup> Ari, kaidin komui ol en Akipten, me kapeida aramas oko mon ran akai, ap kalualang sap tan ol lolap pakid? <sup>39</sup> A Paulus masani: Ngai ol en Sus amen, men Tarsus, kanim indand en Silisia eu, i men poeki re omui, en mueid ong ia, en kapakaparok ong aramas pukat. <sup>40</sup> I ari mueid ong i. Paulus ap kotida pon kandake o lolong aramas akan. A lao molelar kaulap, Paulus ap kaparok ong irail ni ngor en Ipru masani:

## 22

<sup>1</sup> RI ai ko, sam ai ko komail, rong mas ai sapeng komail. <sup>2</sup> Irail lao ronger, me a masani ong irail ni lokaia en Ipru, re ap nenenla kaulap. I ari kotin masani. <sup>3</sup> Ol en Sus amen ngai, me tikidar Tarsus en Silisia, a i kakairida nan kanim wet ni aluwilu en Kamaliel, padapadaki kapung en sam atail akan, o nantiong pongipongi Kot dueta komail kin wia ran wet. <sup>4</sup> O i kawelar al pot et lel ong kamelar aramas, ni ai saliedi o pangalang imateng ol o li akan. <sup>5</sup> Pwe iduen me samero lapalap o saumas akan kin kadede kin ia, pwe i aleer sang irail kisin likau, ong ri (atail) akan. I ap kolang Damaskus, pwen pil saliedi o wa dong Ierusalem, me mi wasa o, pwe ren kamekame. <sup>6</sup> A ni ai koko wei korendor Damaskus, nin sauas, marain eu kodido sang nanlang, sare ia da. <sup>7</sup> Ngai ari pupedi nani pwel o rongada ngil eu, me masani ong ia: Saul, Saul, da me koe kame kin ia? <sup>8</sup> Ngai ari potoan ong: Is komui Maing? A kotin masani ong ia: Ngai Iesus en Nasaret, me koe kin kame. <sup>9</sup> A me iang ia udialer marain o, ap masapwewekadar, a re sota rong kapit en me masan dong ia. <sup>10</sup> Ngai potoan ong: Da me i en wiada Maing? Kaun o ap kotin masani ong ia: Paurida u koweid ong Damaskus, nan a pan kapare ong uk wasa o, me kaonop ong uk er, en wiada. <sup>11</sup> A i solar kak kilang wasa, aki lingan en marain o, i ap daululang Damaskus; me iang ia kalua kin ia pa i. <sup>12</sup> Ananias, ol lelapok amen duen kapung o, me kalok mau sili ren Sus akan karos, me kauson wasa o, <sup>13</sup> Ap ko dong ia kasikasinen imp ai indai ong ia: Ri ai Saulus, kilangada wasa! Ari, ni auer ota i saradang i. <sup>14</sup> I ari katitiki: Kot en sam atail akan, me pil uk adar, pwe koe en lolekongki a kupur, o udial me Pung o, o rong kapit en silang i. <sup>15</sup> Pwe koe pan sapwilim a saunkadede ong aramas karos, duen me koe kilangadar o rongadar. <sup>16</sup> Ari, da me koe auiaui? Paurida o paptaisela, pwe dip om akan en widen sang, o sakarkidang mar a.



17 A kadekadeo i lao pwaro dong Ierusalem o kapakap nan im en kaudok o, i ap wukilar.  
 18 O i kilang i, me kotin masani ong ia: Kanangata, madanga wei sang Ierusalem, pwe irail sota pang duki ong om kadede kin ia.  
 19 Ngai ari potoan ong: Maing, pein irail asa, me i pangalang nan imateng o woki nan sinakoke kan me kin poson komui.  
 20 A ni sapwilim ar saunkadede Stepanus kamatalar, ngai pil u impa o peren kidar a kamatalar, nekinekid likau en me kamatalar i ko.  
 21 A ap kotin masani ong ia: U ko wei, pwe I pan kadar uk ala wasa doo ren men liki kan.  
 22 Irail rongerong i lel ong masan pot et, ap ngil laudeda indada: Siken wei sang sappa lap men et! Pwe a sota mau ong, i en memaureta!  
 23 A ni arail weriwerada, o kasalar ar likau, o kasadar pwel par,  
 24 Kaun lapalap o ap masani, i en wisikelang nan im en saunpei o masani, ren woki i, pwe i en lelapok kila, da me re weiweilokeki i.  
 25 Irail lao saliedi i, Paulus ap idok ren kaun o, me u impa: Me pung, en woki aramas en Rom amen, me kaikenta pakadeikadar?  
 26 Kaun o lao rongada met, ap koda ren kaun lapalap o indada: Da me kom pan wiada, pwe aramas men et men Rom amen.  
 27 Kaun lapalap o ap kodo indai ong i: Katitiki ong ia, ol en Rom amen komui? A sapeng: Ei.  
 28 Kaun lapalap o sapeng: Pwai laud me i saladok kilar. A Paulus masani: A ngai me tikidar saladok.  
 29 Me kodo kadeikada i, ap madang pure sang i, o kaun lapalap lao asadar, me i ol en Rom amen, a pil masakadar, pweki a saliedi i.  
 30 A mandan ran o a inong iong melel asa karep en Sus oko ar pangala i, ap lapwada i o kapokon pena samero lapalap o toun kapung o, ap wadila Paulus o kotikidi ong i mo 'rail.

## 23

1 A PAULUS kotin aupwil sili nan kapung o ap masani: Ri ai ko, i dadaurata me mau ong Kot lao lel ran wet.  
 2 A samero lapalap Ananias masani ong men impa, ren pikir au a.  
 3 Paulus ap masani ong i: Kot pan kotin pikir uk malaun men koe, pwe koe momod wasa en, en kadeik ia da duen kapung o, ap tiakedi kapung o ni om indada, ren pikir ia.  
 4 A men impa indada: Koe pan lalaue sapwilim en Kot a samero lapalap?  
 5 Paulus ap masanier: Ri ai ko, i sasa, me i samero lapalap o, pwe a intingidier: Koe der nan au sued duen omail kaun lapalap o!  
 6 A Paulus lao diaradar, me akai irail Sadusär, a akai Parisär, ap kapitie laud nan kapung o masani: Ri ai ko, ngai Parisär amen o nain Parisär amen, ai kaporopor en me melar akan ar pan maureda, i me i pan pakadeikada.  
 7 A lao masanier met, Parisär o Sadusär akan ap akamai pena; ari momod

o muei pasang.  
 8 Pwe Sadusär kin inda, me dene sota me pan maureda, o pil dene sota tounlang, pil so ngen, a Parisär kin kamelele karos.  
 9 A weriwer laud wiawier: A saunkawewe kan, me kisan Parisär kasinenda kaporok katitiki: Sota me sued kot en aramas men et, me se diar. A ma ngen eu de tounlang amen masani ong i, kitail der palian Kot!  
 10 A lao moromorong kaualap, kaun lapalap o ap masak, me Paulus pan dapenok pasang, ap masani, me saunpei kai en kodilan koledi i, wado sang nan pung ar o wa dong nan im en saunpei.  
 11 A pong pena sang ran o kaun o kotikot re a masani: Kaporopor mau, pwe duen om kadede ia nan Ierusalem, iduen koe pil pan kadede ia nan Rom.  
 12 A lao ran pasang, Sus akai ap inauki pena o kaukila, me re pan solar kang o nim meakot, re lao kamelar Paulus.  
 13 A irail, me wiadar inau wet, me paek sama.  
 14 Irail kodo ren samero lapalap o saumas akan katitiki: Se inauki pena o kaukila, me se solar pan kang o nim meakot, se lao kamelar Paulus.  
 15 Komail o toun kapung ari poeki ren kaun lapalap o, a en kadara dong komail i. Dene komail pan raparapaki melel re a, a kit pan masamasan kamela i, mon a pan pwaro dong komail.  
 16 A wawan Paulus seri amen lao ronger ar ruki i, ap pedelong ong im en saunpei kai kaireki Paulus.  
 17 Paulus ap ekeredo kaun amen, masani ong i: Kare wong manakap men et ren kaun lapalap o, pwe meakot mia, me a men kaireki i.  
 18 I ari ukada i kare wong i ren kaun lapalap o indada: Paulus me salidi, eker ia dong i o poeki re i, i en wa dong komui manakap men et, pwe meakot mia, me a men kaire kin komui.  
 19 Kaun lapalap ap koledi pa a o koieila wasa rir kalelapok: Da me koe men kaire kin ia?  
 20 I ari katitiki: Sus akai inauki pena, en poeki re omui, en kadara dong kapung Paulus lakap, dene komui men pur ong raparapaki mau due.  
 21 A komui der duki ong irail, pwe ol paek sama, me rukiruki i, me inauki pena o kaukilar, me re solar pan kang o nim re lao kamela i. A irail auiaui ansau wet, me komui en mueid ong irail i.  
 22 Kaun lapalap o ap kadalara manakap o masani ong i: Der indang meamen, me koe kaire kin ia met!  
 23 A lao ekeredor kaun riamen, ap masani: Kaonopada saunpei riepuki, pwen kola Säsarea, o pil me dake os isiakan, o me wa katieu riepuki sang ni klok duau en pongpong wet.  
 24 O pil kaonopada man akai, me re en kida poa Paulus, o ren kanakanai ong walang i ren kopina Peliks.  
 25 A pil intingidier kisin likau duen met:  
 26 Ngai Klaudius Lisias kadar wong komui maing kopina Peliks ai ranamau.  
 27 Ol men et, me Sus oko saikidier, o metar kis a pan kamela re 'rail. A ngai ukada saunpei

kei dorela i ni ai rongada, me i men Rom amen. <sup>28</sup> A ni ai men kalelapok, da me re weiweilokedi i, i ap wadila ren ar kapung o. <sup>29</sup> Ngai ari diaradar, me a pangpangala pweki peidok en ar kapung. A sota me i diar, me a pun kak kame kila de salikidi. <sup>30</sup> I lao asadar, me Sus oko rukiruki ol o, i ap madang kadar wong komui i, o i kaka-liko ong me pangala i kai, en kaireki wong komui duen i. Ran kasele! <sup>31</sup> Saunpei ko ap ukada Paulus kalua i Antipatris ni pong o duen a kawad kin irail. <sup>32</sup> Mandan ran o re ki ong me dake os akan, ren wala i, ap purelang im en saunpei. <sup>33</sup> Mepukat lao lel ong Sāsarea, ap ki ong kisin likau ren kopina, o pil kasale ong i Paulus. <sup>34</sup> A lao wadoker o idok, menia i, o mangier, me a kisan men Silisia, ap masani: <sup>35</sup> I pan rong uk, lao me pang uk ala pil pwarador. I ari masani, i en nekinek nan tanpas en Erodes.

## 24

<sup>1</sup> A MURIN ran limau samero lapalap Ananias kotido iangaki saumas akai, o saunlokaia men, me ad a Tertulus; irail weiweiloke Paulus ren kopina. <sup>2</sup> A lao wisikedo, Tertulus ap pikikidi weiweiloke i indada: <sup>3</sup> Kit asaer duen muein popul re omui o duen kamau toto kan ong toun wei wet, pweki omui kalangan maing Peliks. O i me se kapikapinga kin komui ansau o wasa karos. <sup>4</sup> A i sota men kapangai komui, iet eta me i poeki re omui: Komui en kotin mangi kit duen omui kalangan. <sup>5</sup> Pwe se diaradar, me ol men et me morsued o me kin kapeida Sus akan karos, me mi sappa, o i me saumas en pwin likam en Nasaret, <sup>6</sup> Me pil song kasaminela im en kaudok o, i me se koledi i, pwen kadeikada, duen at kapung o. <sup>7</sup> A monsap Lisias kotin pwarado, kotiki sang i nan pa at ki a manaman lapalap, <sup>8</sup> Masani ong me weiweiloke i, en potu dong re omui, a komui lao kalekalelapok re irail, kom pan pein mangi duen meakan, me se pang kila i. <sup>9</sup> A Sus oko pil weiweiloke Paulus indada: Mepukat melel! <sup>10</sup> A kopina lao olol ong Paulus, en kaparok, a ap kotin sapeng masani: Ni ai asaer, me komui saunkapung pan toun wei wet saunpar toto, i peren kida, ai pan indinda duen pein ngai. <sup>11</sup> Pwe komui pan mangi, me pong ngaul ria pong eta, me i kodalang Ierusalem pwen kaudok. <sup>12</sup> A irail sota diar ia da lokaia ong amen nan im en kaudok, de kapeida aramas oko nan sinako ke kan de nan kanim o. <sup>13</sup> O re pil sota kak kadede, me re pang kin ia la met. <sup>14</sup> A iet eta, me i men kadede ong komui, ni ai kin kamelele karos, me intingidier nan saukop akan o kapung o, i kin kaudoki ong Kot en sam ai kan duen tiak en ir, me re kaadaneki pwin likam. <sup>15</sup> O i kaporoporeki Kot me irail pil kamelele me melar akan pan maureda,

me pung o me sapung kan. <sup>16</sup> A i me i kin sosongki pein ngai, pwe lol i en pung mon Kot o aramas akan. <sup>17</sup> A murin par toto i kodon wa dong toun sap wet kisakis eu o wiadar mairong. <sup>18</sup> I ansau, me re diar ia makelekeladar nan im en kaudok o sota weriwer de moromorong. <sup>19</sup> A ir pukat Sus akai nan Asien menda re sota mi met mo 'mui, kadede ngai, ma re diar me sued kot re i? <sup>20</sup> De mepukat en pein kasansaleda sapung da, me re diar re i ni ai mi mon kapung o. <sup>21</sup> A iet eta lepen lokaia, me i kida ni ai udar nan pung ar indada: En me melar akan ar pan maureda, i pan pakadeikki ran wet re omail. <sup>22</sup> A Peliks lao ereki mepukat, pwe a mangi mau duen al pot et, ap kasau ir wei masani: Kaun Lisias lao kotido, i ap pan kaimwisokela omil kapung. <sup>23</sup> I ap masani ong kaun en kolekol Paulus o kasaladokela i, o ender inapwiedi iang a kan, en kodon papa i. <sup>24</sup> A murin ran akai Peliks pwarado, a paud Drusila iang i, iei li en Sus amen, ap molipedo Paulus o karonge i duen lamalam en Kristus. <sup>25</sup> A ni a kapakaparok duen pung, o makelekel, o kadeik, me pan wiaui, Peliks ap masapwekadar o sapeng: U kowei ansau wet, i lao pisokalar, i pan eker uk do. <sup>26</sup> A pil kaporoporeki, me Paulus pan kotiki ong i moni, pwen lapwada i; i me a purepure eker kidi o i kasokasoi ong i. <sup>27</sup> A murin par riau Porsius Pestus sapwiladar wiliandi Peliks. A Pelisk men konekon ren Sus oko, ap sota lapwada Paulus.

## 25

<sup>1</sup> PESTUS lao pwarador nan wei, ap kotidalang Ierusalem sang Sāsarea ni ran kasilu. <sup>2</sup> Samero lapalap o saumas akan en Sus oko ap pwara dong re a weiweiloke Paulus o poekipoeki re a, <sup>3</sup> O inong iong konekon re a, pwen palian Paulus, pwe a en wa dong Ierusalem i, a re masamasan i, pwen kamelele ni a kotikot kodo. <sup>4</sup> A Pestus masani, me Paulus pan mimieta Sāsarea, a pein i pan madang masel wei. <sup>5</sup> A me lapalap re omail pan kak iang ia kodila o kadede ol o, ma dip a mia. <sup>6</sup> A lao kotikot re 'rail pong walu pong de ngaul, ap kotidilang Sāsarea o mandan ran o a kaipokedi pon mol en kadeik o masani, Paulus en wisikedo. <sup>7</sup> A lao pwarador, Sus oko, me kodido sang Ierusalem, ap kapil pena i o kadape i kaulap, ap sota kak kadede. <sup>8</sup> Pwe Paulus kotin sapen masani duen pein i: I sota wiadar dipi ong kapung en Sus oko, de ong im en kaudok o, de ong Sisa. <sup>9</sup> A Pestus men konekon ren Sus oko, ap sapeng Paulus masani: Koe men kodalang Ierusalem, pwen pakadeikada re i wasa o? <sup>10</sup> A Paulus kotin masani: I mi mon mol en kadeik en Sisa, wasa me mau ong, i en pakadeikada. Sota me sapung eu, me i wiai

ong Sus oko, duen me pein komui mangi.  
<sup>11</sup> Ma i wiadar sapung eu de meakot me warong kamela, i sota pan kang mela. A ma so melél, me mepukat kine kin ia, sota me pan kak pang ia lang irail. I dorolang Sisa!  
<sup>12</sup> Pestus lao kalelapok ren momod en kadeik o, ap masani: Koe dorolang Sisa, ari koe pan pwarala ren Sisa.  
<sup>13</sup> Murin ran akai nanmarki Akripa o Pernise koti dong Sásarea, pwen ranamau ong Pestus.  
<sup>14</sup> Ira lao kotikot wasa o pong toto, Pestus ap kaireki nanmarki duen Paulus masani: Ol sensal amen mi met, me Peliks saliedi ap samalar.  
<sup>15</sup> A samero lalalap o saumas en Sus akan kaire kin ia duen i ni ai potopot Ierusalem inong iong i en kadeikada i.  
<sup>16</sup> A ngai sapeng irail: Kaidin duen tiak en men Rom, en pangala aramas amen, en kamela, mon me pangala i kan saikenta sansal mo a, o a muei ong i er, en sapeng duen me re pang kila i.  
<sup>17</sup> Irail lao pokon dong met, a mandan ran o i madang mondi pon mol en kadeik o inda, ol o en wisikedo.  
<sup>18</sup> A me pangala i kan lao pwarado, re sota katitiki mesued kot, duen i kiki ong.  
<sup>19</sup> A akai peipeidok mia duen pein arail lamalam o duen ol mela amen me ad a Iesus, me Paulus kin inda, me dene a memaureta.  
<sup>20</sup> Ngai ari poneponeki duen mepukat, i ap idok re a, ma a sota men kodalang Ierusalem, pwen pakadeikada wasa o duen mepukat.  
<sup>21</sup> A Paulus lao dorolang kadeik en Aukustus, ngai ap inda, ren koledi i, i lao kadarala i ren Sisa.  
<sup>22</sup> Akripa ap masani ong Pestus: I pil men rongrong aramas o. A masani: Lakap kom pan rong i.  
<sup>23</sup> A mandan ran o Akripa i Pernise lao kotin pwarado ni ar kapwat ligan kaulalap o kotilong ong nan im en kapung, o ol lalalap akan iangaki kaun en kanim o, Pestus ap masani, Paulus en wisikedo.  
<sup>24</sup> A Pestus masani: Maing nanmarki Akripa o komail ol akan karos, me iang kit kotikot wasa et, komail masani, pweki men et, Sus akan karos kin poekipoeki re i nan Ierusalem o pil met; ni ar palian i indada, me dene a sowar ong memaureta.  
<sup>25</sup> A i lao diarada, me sota me a wiadar, me war ong kamela o pein i dorolang Aukustus, ngai ap kileledier me i pan kadarala i.  
<sup>26</sup> A sota me i asa, en intingiedi wong nai saupeidi. I me i waki dong komail i, mo 'mui ta maing nanmarki Akripa, pwe kapung lao nikier, i en asa, da me i en intingieki wei.  
<sup>27</sup> Pwe i lamelame, me sapung, en kadarala me salidi amen, ap sota kaireki duen karep en salidi.

## 26

<sup>1</sup> AKRIPA ap masani ong Paulus: Koe me saladoklar en kapakaparok ki pein uk. Paulus ap kapa wei lim a, kadededar pein i:  
<sup>2</sup> I ap peren kidar maing nanmarki Akripa,

me i pan kapakaparok mo 'mui ran wet duen meakan, me Sus oko pang kin ia la,  
<sup>3</sup> Pwe komui me erekilar en Sus oko ar lamalam o peipeidok kan, i ap poeki re omui, en kotin kanongama mamangi ia.  
<sup>4</sup> Ai wiawia kan arain maur i, me tapida Ierusalem ren sau i kan, Sus akan karos asa due.  
<sup>5</sup> Irail me asa ia sang mas kokodo, ma re men kadede ia, me ngai kisan pwin kelail en at lamalam, me ad a Parisär.  
<sup>6</sup> Ngai ari mi mon kadeik, pweki ai kaporoporeki inau o, me Kot kotiki ong sam at akan.  
<sup>7</sup> Nan i inau o, me at kainok eisokriau kin kaporoporeki, me re pan pwaiki ong nan nantiong kaudok ong Kot ni ran o ni pong. Maing nanmarki Akripa iei kaporopor me i pang kila ren Sus oko.  
<sup>8</sup> Da me komail sota kamelele, me Kot kotin kaiasada me melar akan?  
<sup>9</sup> Mas o i kiki ong, me i en wiada meakan, me kaokaoe mar en Iesus en Nasaret.  
<sup>10</sup> I me i pil wiadar nan Ierusalem; o me sarau kan toto me i saliedier ong nan imateng murin ai aleer manaman sang ren samero lalalap akan o irail lao kamelar, ngai pil sauaa.  
<sup>11</sup> I kame irail pan pak toto nan sinako ke kan karos, o koidong ong irail, re en lalau e, o ngai lingarangar kaulalap pa 'rail; i kin kame irail lel ong kanim en wai kan.  
<sup>12</sup> A ni ai wiawia mepukat, o kokolang Damaskus ni manaman en samero lalalap,  
<sup>13</sup> Maing nanmarki, nin sauas i ap kilangadar nani al o marain eu sang nanlang, me ligan sang katipin, me senereda imp ai o me iang ia kai.  
<sup>14</sup> Kit karos lao pupedier nani pwel, i ap rongadar ngil eu, katitiki ong ia ni lokaia en Ipru: Saul, Saul da me koe kamekame kin ia? Nan a pan apwal ong uk, en tametame tek o.  
<sup>15</sup> Ngai ari idok: Is komui Maing? Kaun o ap kotin masani: Ngai Iesus, me koe kin kame.  
<sup>16</sup> Koe ari pauida, kasinenda, pwe i me I pwaraki dong uk, pwen kasapwil uk ada, pwe koe en papa o saunkadede men en meakan, me koe kilangada, o meakan, me I pan kapwara dong uk.  
<sup>17</sup> O I pan dondoro sang uk ni pa en aramas akan o men liki kan me I pan kadar uk wei ong,  
<sup>18</sup> Pwen kapad pasang mas arail, pwe re en wuki sang rotorot, wuki ong marain, o sang ni manaman en Satan ong Kot, pwe re en lapwa sang dip ar akan, o ren ale ar soso ren me kamakelekele kidar poson.  
<sup>19</sup> Ari maing nanmarki Akripa, i sota sopeiki ong kasansal en nanlang o.  
<sup>20</sup> Pwe mas i padaki ong toun Damaskus o Ierusalem, o sap en Iudäa kan, o men liki kan, en kalula o wuki ong Kot, o kapwaiada wan kalula mau.  
<sup>21</sup> Nan i me Sus akan saik ia kidi nan im en kaudok o, o re song kame ia la.  
<sup>22</sup> Ari so, en Kot a kotin ieiang ia, me i mimieki lao lel ran wet, padapadaki me tikitik o me laud akan, o sota me i inda, i eta, me saukop akan o Moses pil masanier, me pan wiawia:

23 Teteten, Kristus en kamekam, o me a pan men mas en me pan iasada sang ren me melar akan, o padaki ong toun wei o pil ong men liki kan duen marain o. 24 A ni a kapung kila mepukat, pein i Pestus ap ngil laudedada masani: Paulus, koe iakalar! Om sukesukul toto me kapwepwe uk adar. 25 A Paulus kotin masani: I sota iakalar maing isou Pestus, a i kin kida kasoi melel o pung. 26 Pwe nanmarki kotin mangi duen mepukat; i me i pil aima padapadakieki ong i, pwe i asa, sota meakot, me a sota kotin ereki, pwe kaidin wasa rir, me mepukat wiawier. 27 Nanmarki Akripa, komui poson saukop akan? I asa, me komui kin poson. 28 Akripa ap masani ong Paulus: Me tar kis, a komui pan kainong ong ia en saulangka. 29 Paulus masani: I ngongki ong Kot, me komui o karos, me rongerong ia ran wet, en dueta ngai, a iermen sal mata pot et. 30 Nanmarki, o kopina, o Pernise, o me iang irail kaipokedi wasa o, ap kotida, 31 O kelepala, ap kapakaparok nan pung ar mamasani: Aramas men et sota kin wiada me war ong kamela de salidi. 32 Akripa ap masani ong Pestus: Aramas men et pan lapwada, ma a sota dorolang Sisa.

## 27

1 A LAO kileledier, me se pan serokelang Italien, re kasilaki Paulus, o akai me salidi, kaun en saunpei amen, me ad a Iulius, kisan pwin en Aukustus. 2 Kit ari kereda pon sop en Adramitien pot, me pan supi ong kanim en Asien akan, me mi pon oror, ap tang wei. Ari, Aristarkus, men Masetonien amen sang Tesalonik iang kit. 3 Mandan ran o se leler Sidon. A Iulius me kadek ong Paulus, ap mueid ong i, en kotila ren kompokepa ko pwen kasaroleit. 4 Kit ari maselar sang wasa o, ap tangatang panangen Sipern, aki ang me u dong kit. 5 Kit tangatang kotela lepen sed en Silisia o Pampilien, se ap lel ong Mira en Lisia, 6 I wasa kaun en saunpei o diarada sop en Aleksandrien pot, me pan maselang Italien, i ari kasau ong kit poa. 7 A kit pwapwand kokola, pong toto meid apwal ong kit lel ong Knidus, pwe ang me kawela; kit ari tangatang panangen Kreta, tang wong Salmone. 8 A meid apwal at dauili wasa o; kit ari lel ong sap eu, me ad a Kapitau mau koren iong kanim Lasaa. 9 A ansau lao dauilier o a apwalur ong sailok sili, aki ran en kaisesal dauilier, Paulus ap kotin panaui o 10 Masani ong irail: Ol oko, i asaer me sailok wet pan suedela a pan apwal kausalap, kaidin ong audepan sop o sop eta, pwe pil ong maur atail. 11 A kaun en saunpei o liki saunilil o saumas en sop o sang masan en Paulus. 12 A kapitau me sota non mau ong sop en mimieta ni ansau kapau. Koren iong karos ari men samala

sang wasa o, o re song, ma re sota kak ong lel Pöniks, pwen mimita wasa o ni ansau kapau, i kapitau en Kreta eu, me mi ni pali air o pali apang. 13 A ang lao udo sang pali air, re ap kiki ong, me re pan pwaida, ap apiada paipung ko tangala liinan Kreta. 14 A madang melimel udo sang Kreta, me ad a alepip en kisiniang. 15 A ang lao kapeila sop o, o sop solar kak ong, kit ap nenenla o peila. 16 Ni at tangala panangen dake tikitik eu, me ad a Klauda, me tar kis, a se solar kak ong koleidi pot o. 17 Irail apiada i, pwen kak piradi ong ni sop o, ap lilidi, pwe re masak re de serada nan Sirte, ap pungipungidok sili. 18 Kit lao pungipungidok sili kausalap, manda ap kamaradar sop o. 19 A ni ran kasilu irail kase kila pein pa arail kapwa en sop o. 20 Kadekadeo ran totola sota katipin o sota usu, o melimel kalaimun u dong kit, ap solar at kaporopor en pitila. 21 A kit lao kaisesol warailur, Paulus ap pwarada nan pung arail masani: Ol oko mak eta, komail en peiki ong ia er o so masel sang Kreta, pwe kitail ender lel dong kaupatail. 22 A met i panaui komail, en kaporopor mau, pwe sota me pan mela, sop eta me pan ola. 23 Pwe tounlang en Kot, me sapwilim a ngai, o me i kin papa, me kotida imp ai pong, 24 Kotin masani: Paulus, koe der masak, koe pan wisike wong ren Sisa. A kilang, Kot me kotiki ong uk er karos me iang uk. 25 Ari ol oko komail kaporopor mau, pwe i kin poson Kot, me a masan pan pwaida. 26 A kitail pan serada nin dake eu. 27 A lao pong ngaul pa pong lar, kit peipei sili nan sed Adria. Ni ailep en pong toun sop o kasauia, me se koren iong sap eu. 28 A irail lao kasedi men song, re ap diaradar, me ngap rieisok, o re kaila ekis wasa o kasedi men song, re ap diaradar, me ngap eisoklimau. 29 A re masak, se de serada pon mat, rap kasedi paipong paieu sang ni murin sop, ap mauki en ran pasang. 30 A toun sop o lao men pitila sang nin sop o, o re apiedi pot apot nan sed, dene re pan kasedi paipong kai ni mon sop o, 31 Paulus ap masani ong kaun o saunpei kan: Ma mepukat sota pan mimieta pon sop o, komail sota pan kak dorela. 32 Saunpei kan ap leke sang pot o kasela o ari. 33 A lao pan ran pasang, Paulus ap panaui irail, ren manga, masani: Nan a pong ngaul pa pong lar, me komail kin auiaui o kaisesol o sota manga. 34 Ngai ari panauki komail, en manga, pwe i me komail pil pan piti kila. Pwe sota pit en mong pit pan pupedi sang amen komail. 35 A lao masanier met, ap ale prot, danke Kot mo 'rail karos. I lao pilitiki pasang ap sak. 36 Irail karos ap kaporopor maular o pil manga. 37 A kit karos me mi nan sop o, me riepuki isikaran wonumen. 38 Irail lao medier, rap kamaradar sop o, kasedi ong nan madau korn. 39 A lao wasa

ran pasang, re sasa sap o, A re diaradar kapitau eu, me mad mia; i wasa re lamedar en walang sop ia, ma re pan kak ong. <sup>40</sup> Irail lao leke sang paipong ko, rap kase ir ala nan madau, o lapwada padil akan, o apiadar serok en moa ni ang o, ap tangala ni oror. <sup>41</sup> Irail lao lel ong mad eu, sop o serada o solar mokid. Mon sop o tengela, a muri ola nan iluk kan. <sup>42</sup> Saunpei ko ap men kamela me salidi kan, pwe amen de pan pitila sang. <sup>43</sup> A kaun en saunpei o men dorela Paulus, ap sota mueid ong irail me re men wia o masani: Me asa pampap, en lusedi ong nan madau pap wong sap o. <sup>44</sup> A me tei kan pon tenap de kisan sop o. A ap pwaida, me irail karos dorelar o lel ong sap o.

## 28

<sup>1</sup> KIT lao pitilar, se ap rongadar, me dake o adaneke Melite. <sup>2</sup> A men liki kan me kadek ong kit kaulap, pwe irail saunda kisiniai o kasamo kit karos, pweki katau moremor o pweki kapau. <sup>3</sup> Paulus lao wasai tui pena o kidi ong nani iai, serpent men ap lusadar sang nani iai pweki karakar o teng ong ni lim a. <sup>4</sup> A men liki ko lao udial man o a tetengeng ni lim a, re ap kasokaso nan pung arail: Melel aramas men et me kamelar aramas, a piti sanger nan madau, ap rialar. <sup>5</sup> I ari sipede wong man o nani iai o sota mesued kot lel ong i. <sup>6</sup> Irail masamasan, ma a sota pan umposada de pupedi matala, a re lao masamasan warai o kilang, me a so suedi ong, re wukidalar ar lamelam o katitiki, me dene kot amen. <sup>7</sup> Saupedi en dake o, me maraneke Puplius, kin sapaneki wasa o, kasamo o apapwali kit ran silu. <sup>8</sup> A sam en Puplius wononeki somau karakar o somau nta. I me Paulus koti dong re a kapakapaki, pwil lim a kan po a, kakeladar i. <sup>9</sup> Men en lao wiauiet, karos me somau nin dake, ap kodo kakelailadar. <sup>10</sup> O re pil kaka kin kit kaulap. Kit lao maseldar, irail ari kidang pon sop o at kapinwar kasampwal. <sup>11</sup> A murin saunipong silu se iang sop en Aleksandrien pot, me mimi ni dake o ni ansaun kapau, me kilel en mpor. <sup>12</sup> A se keredi Serakus o kairu wasa o pong sili pong. <sup>13</sup> O sang wasa o se pidok tangatang lela dong Rekiun, o manda ang air irepokedo o pong ta pong se lel ong Puteoli. <sup>14</sup> I wasa o se tu ong ia saulang kai, me poeki re at, sen mondi re 'rail pong isi pong. Kit ari tangatang kokolang Rom. <sup>15</sup> O saulang kan en wasa o lao rongadar duen kit, re ap kodo tu ong kit Apipor o Treptapern; Paulus lao diar ir ada, ap kapinga Kot o kaporopor maular. <sup>16</sup> Kit lao lel Rom, kaun en saunpei ap pangalang kaun en silepa kan me salidi ko, a Paulus me saladok kotikot wasa toror, saunpei men me sinsila i. <sup>17</sup> Kadekadeo murin ran silu Paulus ap

molipe pena saumas en Sus akai. Irail lao pokon penaer, a ap masani ong irail: Ri ai ko, nan sota mesued kot, me i wiadar ong aramas, de ong lamalam en sam atail akan, ari so, ngai me salidi o pakadara dong ni pa en men Rom akan sang Ierusalem. <sup>18</sup> Irail lao kalekalelapoki ia, ap men lapwa ia dar, pwe sota dip ai, me i en kame kila. <sup>19</sup> A Sus oko lao palian ia, i ap dorolang Sisa, kaidin ai men mpimpäki toun sap ai. <sup>20</sup> I me i ekerä komail ki pena, i en kilang komail o kasokaso ong komail, pweki en Sus akan ar kaporopor, me i salikidi sal mata pot et. <sup>21</sup> Irail sapeng i: Sota kisin likau, me se ale sang Iudäa duen komui, pil sota saulang amen, me kodido, me kaire kin kit o kadedeki, me dip omui mia. <sup>22</sup> A se men ronga sang komui duen omui lamelam, pwe se ronger duen pwin wet, me re kin palian wasa karos. <sup>23</sup> Irail ari kileledi ong i ran eu, ap pokon dong re a nan im en kairu. I ari kawewe ong irail o katitiki duen wein Kot, kapakaparokki ong irail Iesus sang nan kapung en Moses o saukop akan, sang ni mansang lel nin sautik. <sup>24</sup> Akai irail me kamelele a padak a akai so. <sup>25</sup> Irail ari sota minimin pena nan pung arail, re ap pur pasang ni en Paulus a katitiki masan pot et: Melel, saukop Iesaia kopadar ren Ngen saraui ong sam atail akan. <sup>26</sup> Masani: Ko wong ren aramas pukat indada: Komail kin rong ap so lelapok ki o ngingar, ap sota dedeki. <sup>27</sup> Pwe mongiong en aramas pukat suedalar, o salong arail ponlar, o mas arail mair penaer, pwe re de ngar kida wasa mas ar, o rong kida wasa salong arail, o asaki nan mongiong arail o sapaledo, o I en kakele ir ada. <sup>28</sup> Komail ari en asa, me maur wot sang Kot mueidalang men liki kan o re pil pan peiki ong. <sup>29</sup> I lao masanier mepukat, Sus oko ap ko pasang o kapakaparok nan pung ar kaulap. <sup>30</sup> A Paulus kotikot nan im eu, me a kin isesa par riau, o kasamo karos, me ko dong i, <sup>31</sup> Kaweweda wein Kot o aima padapadaki duen Kaun Iesus Kristus pwe sota me inapwiedi.

## EN PAULUS A KISIN LIKAU ONG MEN ROM.

<sup>1</sup> PAULUS ladun Iesus Kristus men, me paeker, en wiala wanporon amen, me katorong papa rongamau en Kot, <sup>2</sup> Me a kotin kopekidor sapwilim a saukop akan nan kisin likau sarau kan. <sup>3</sup> Duen sapwilim a Ol me kisan kadaudok en Dawid ni tiak en pali uduk, <sup>4</sup> O me kadede kidar, me a Sapwilim en Kot a manaman, duen a kotin iasadar sang ren me melar akan ki Ngen sarau, Iesus Kristus atail Kaun, <sup>5</sup> Me kit ale sanger mak o koa en wanporon, pwen padaki ong men liki kan karos ni mar a, pwe irail en poson o peik, <sup>6</sup> Pwe komail pil kisan irail, me paeker dong Iesus Kristus. <sup>7</sup> Komail karos kompoke pan Kot, me paeker me sarau kan, me mimi Rom mak o popol sang ren Kot Sam atail o Kaun Iesus Kristus en mi re omail! <sup>8</sup> Iet kaieu, i kin kapinga ai Kot ki Iesus Kristus pweki komail karos; pwe omail poson me kalok sili lel penang sap karos. <sup>9</sup> Pwe Kot, me i kin papa ong ni ngen i ni ai padapadaki wei rongamau en sapwilim a Ol, me saunkadede pai, me i kin tamataman kin komail ansau karos, ngidingid ni ai kapakap akan. <sup>10</sup> Ngidingideki ansau karos, ma i sota pan kak pwarala re omail, ma iduen kupur en Kot. <sup>11</sup> Pwe i inong iong udial komail, pwe i en katungole kin komail ekis pwais ngenin, pwe komail en tinainda. <sup>12</sup> Pwe i en kasarleleid re omail, pweki atail poson ta ieu. <sup>13</sup> Ari, ri ai ol akan, i sota men, me komail en sasa duen ai kileledier pan pak toto, en pwar wong komail, ap saik pisoki ong, pwen diar ekis wan ai dodok re omail, dueta ren wei tei kan. <sup>14</sup> Pwe ngai me pwaipwand ong men Krik o men liki kan, o ong me lolekong o me so lolekong kan. <sup>15</sup> Pwe duen a pan kak pai, i men pil padaki ong komail men Rom rongamau. <sup>16</sup> Pwe i sota kin namenok ki rongamau, pwe i manaman en Kot, me kin kamaurela me poson akan karos, Sus oko mas, ap pil men Krik. <sup>17</sup> Pwe i me kin kasansaleda pung en Kot, me kin pwili sang poson, pwen poson duen a intingidier: Me pung o pan memaureki poson; <sup>18</sup> Pwe ongiong en Kot pan sansaleda sang nanlang ong me doo sang Kot akan o me sapung en aramas akan, me kin kawela melel ni arail sapung. <sup>19</sup> Pwe duen me pwarada sang ren Kot me sansal ong irail, <sup>20</sup> Pwe meakan me so sansal duen i, iet akan, a manaman soutu o pil duen a udan Kot sang ni ansau sappa wiauer, kin sansal kida sapwilim a dodok kan, pwe

solar pekid parail: <sup>21</sup> Pweki irail asadar Kot, a re sota wauneki i duen me kon ong Kot pil sota masak tol a, a re aklemai ong i, mongiong sapung arail ap rotorotalar. <sup>22</sup> Irail akereki pein irail ap lamponlar. <sup>23</sup> Irail kawukilar lingan en Kot me so kak mor pasang, ong mom en aramas me kin mor pasang o mom en manpir akai, o man aluki pa, o man korop akan. <sup>24</sup> I me Kot kotin mueide kila irail, en inong iong kasaminlar mongiong arail ni ar kasautela pein war arail nan pung arail, <sup>25</sup> Me kawukila melel en Kot ong likam, ap pongi o papa ong dipisou mon Saun wia meakros, me iasanai potepoteta amen. <sup>26</sup> Nan i me Kot mueidela kin ir ong inong sued akan, en lel ong arail li akan, en wuki sang ira 'rail, kaokaoe ira 'rail. <sup>27</sup> Pil dueta ol akan lingsang aran li, ap kalel nan pung arail; ol asada ol, me so kon, ap pein kapokala nan war arail mangidi en ar wiawia kan. <sup>28</sup> Nan duen irail kang kataman ong Kot, Kot ap mueidalang irail, en kapitakaila kamom ong wia meakan me sued. <sup>29</sup> Me dir en sapung karos, morsued, norok kapwa, sempok, dir en peirin, lolap, akamai, widing, weid, lidu mongin, <sup>30</sup> Pil en pan moli, likinekine, kasenta Kot, kang kapunglol, aklapalap, ponmaso, me kin diar me sued akan, so oke sam ar o in ar, <sup>31</sup> Lampon, inausopousok, sempok, somak. <sup>32</sup> Re asa duen kapung pung en Kot, me kin wia mepukat, pan mau ong mela, a kaidin i eta, pwe re pil kin perenki irail, me kin wia mepukat.

## 2

<sup>1</sup> NAN i sota pakid pa om, aramas amen koe, amen amen me kin kadeikada, pwe ni om kadeikada amen, pein koe me koe kin kariaala, pwe koe, me kin kadeikada, kin wiawia me dueta. <sup>2</sup> A kitail asaer, me kadeik en Kot me melel ong ir, me kin wiada mepukat. <sup>3</sup> A dadue aramas amen koe, me kin kadeikada, me kin wiewia mepukat, ap wiada dueta, koe kiki ong, me koe pan piti sang kadeik en Kot? <sup>4</sup> De koe mamaleki kalangan en Kot sapan, o a kanongama o papadake; koe sota asa, me kalangan en Kot kamaterok uk alang kalula? <sup>5</sup> A koe ni mongiong om me katiwo o kakalauak, me koe ki penang uk ongiong ong ni ran en ongiong o kasansal pan kadeik pung en Kot, <sup>6</sup> Me pan kotin depuk ong amen amen duen a wiawia kan. <sup>7</sup> Irail me kin dadaurata ni ar wiawia mau kan o lingan, o indand, o me so kin mor pasang, maur soutu. <sup>8</sup> A kamekam o wairok ong irail me katiwo o so oke melel, a me kin oke sapung. <sup>9</sup> O kanaudok o kalokolok ong aramas karos, me wiadar sued, mas ong Sus akan ap lel ong men Krik. <sup>10</sup> A lingan, o wau, o popol ong amen amen, me kin wia mau, mas ong

Sus akan o pil ong men Krik. <sup>11</sup> Pwe Kot sota kin lipilpil aramas amen. <sup>12</sup> Pwe karos me wiada dip likin kapung, pan lokidokila likin kapung, pil karos, me asa kapung, ap wiada dip, pan pakadeikada pan kapung. <sup>13</sup> Pwe kaidin me rongerong kapung kan pan pung kila mon Kot, a me kin angada kapung pan pung kila. <sup>14</sup> Pwe ma men liki, me sota arail kapung, ap pil wiawia tiak en kapung sang nan pein irail, iei me irail, me sota arail kapung pein kapung parail. <sup>15</sup> Me kin kasansaleda wiawia en kapung me intingidier nan mongiong arail, i me in-sen arail pil kadedeki o ar lamalam, me irail sakara kida de kalole mau ki nan pung arail. <sup>16</sup> Lao ran o, me Kot pan kotiki ong Yesus en kadeikada dip okiok kan ren aramas akan, duen ai rongamau. <sup>17</sup> A ma koe adaneki Sus amen, me kin liki kapung o suaiki Kot, <sup>18</sup> O asada kupur a, o koe pung kila lamalam, ni om padapadaki sang nan kapung, <sup>19</sup> Koe me lameda, me koe itar ong, en kalua wei me maskun akan, o kamarain pan me rotorot akan, <sup>20</sup> O saunkaian pan me lampon kan, o saunpadak en kisin seri kan, me asa tiak en lolekong o melel en kapung. <sup>21</sup> Ari, koe kin kawewe ong amen, ap sota kin kawewe ong pein uk, o koe kin padaki me ren der pirap, a koe kin pirap; <sup>22</sup> Koe kin inda, me aramas ender kamal, a koe kin kamal? Koe kin suedeki dikedik en ani mal akan, a koe kin pirap me sapwilim en Kot? <sup>23</sup> Koe kin suaiki kapung, a koe kin kisang Kot wai ni om tiakedi kapung? <sup>24</sup> Pwe mar en Kot kin mamale kila komail ren men liki kan, duen a intingidier. <sup>25</sup> Pwe sirkomsais me mau, ma koe angeda kapung; a ma koe tiakedi kapung, om sirkomsais pan sosirkomsais. <sup>26</sup> Nan i, me sosirkomsais, angada pung en kapung, daduen a sosirkomsais so pan wadok ong i sirkomsais? <sup>27</sup> Ari, ma me udan sosirkomsais akan pan kapwaiada kapung, re sota pan kadeik uk ada? Pwe koe kin mi pan kisin likau o sirkomsais, ap tiakedi kapung o. <sup>28</sup> Pwe kaidin i Sus amen, ma pali liki ta, o pil kaidin i sirkomsais, me sirkomsais liki nan uduk eta. <sup>29</sup> A i Sus amen, me Sus en lole, o i sirkomsais, me mi nan mongiong i, ni ngen e, a kaidin ni inting; me a kapingepa sota mi ren aramas akan pwe ren Kot.

### 3

<sup>1</sup> ARI, da me Sus akan paieki mon me tei kan de da kadepan sirkomsais? <sup>2</sup> O me toto, ni song karos; iet kaieu: Masan en Kot akan kanikid ong irail. <sup>3</sup> A ma akai soposon a pil menda? Pwe ar soposon pan kak kawela kalangan en Kot? <sup>4</sup> O so! Pwe Kot udan melel, a aramas karos me likam duen a intingidier: Ir eta me pung ni ar masan akan, o komui pan kotin poedi

ni ar pakadeikada. <sup>5</sup> A ma atail sapung kaindinda pung en Kot, da me kitail en inda? Dadue, Kot me pil sapung, pweki a kotin ongiong kida? I kin lokaiia ni tiak en aramas. <sup>6</sup> O so! Pwe ma iduen, Kot pan kak kadeikada sappa? <sup>7</sup> Pwe ma melel en Kot pwai kida ai likam kan, pwen kalinganada i, menda i pan pakadeikada, dene dipan amen ngai? <sup>8</sup> A so mau ong duen at indand sued, pwe akai kin inda, me dene kit kin padaki wei: Kitail en wiada me sued, pwen kareda me mau? Nan arail kalokolok me pung. <sup>9</sup> Iaduen atail pai mau sang arail? Kaidin, pwe se kadededar, me Sus o men Krik karos mi pan dip, <sup>10</sup> Duen a intingidier: Sota me pung amen, sota amen. <sup>11</sup> Sota me lolekong amen, sota me kin rapaki Kot. <sup>12</sup> Karos me sapunglar, irail wiaki eu mamalar, sota meamen, me kin wiada me mau, sota amen. <sup>13</sup> Tapin wor arail me rasong sousou eu, me saikenta sarep pena, lo arail me re liiapaki, wini en kamela mimi ni oton ngi arail; <sup>14</sup> Au ar me dir en lalau o katik, <sup>15</sup> Nā arail me marara ong kamela aramas; <sup>16</sup> Nan al arail me dir en sued o mauk; <sup>17</sup> A al en popol me re sasa; <sup>18</sup> Re sota kin masak Kot. <sup>19</sup> A kitail asaer, me kapung o lolok ong, me kin papa kapung pwe au karos en sapaimokid o sappa pon lodi ong kadeik en Kot. <sup>20</sup> Ari mon Kot sota uduk me pan pung kila a wiawia kapung, pwe kapung me dip kadiarok kidar; <sup>21</sup> A ansau wet pung en Kot sansaledar likin kapung o kadede kidar kapung o saukop akan. <sup>22</sup> A pung en Kot me pwili sang poson Yesus Kristus, ap lel ong karos me poson. <sup>23</sup> Pwe sota lipilpil, karos me wiadar dip o sota kak konodi ligan en Kot. <sup>24</sup> Irail pan pung kila a mak sapan, pweki en Kristus Yesus a kotin dore kitail lar, <sup>25</sup> Me Kot kotin kasansaledar en wiala mol en kalangan ni poson n'ta, pwen kasansaleda a pung ni a kotin lapwada dip en mas akan, me mier pan papadake en Kot. <sup>26</sup> A ansau wet a kotin kadeded a pung. Ieteten, me pein i me pung, ap pan kotin kapungala karos me poson Yesus. <sup>27</sup> Ari, ia men suaiki? A lokidokilar! Ren kapung da? En wiawia kan? Kaidin, a ren kapung en poson. <sup>28</sup> Ari, iet me se inda: Aramas en pung kila poson a kaidin wiawia en kapung kan. <sup>29</sup> De Kot en men Sus akan arail Kot eta? Kaidin pil Kot en men liki kan? Ei melel, pil en men liki! <sup>30</sup> Ari, Kot me ta men, me kin kapung kila me sirkomsais akan pweki poson, pil sosirkomsais akan pweki poson. <sup>31</sup> Iaduen, kitail kin tiakedi kapung pweki poson? O so! Pwe kitail kin kapwaiada kapung o.

### 4

<sup>1</sup> ARI, da me kitail en inda duen Apraam sam atail ni pali uduk, da me a diaradar?

<sup>2</sup> Pwe ma Apraam pung kilar a wiawia kan, nan a men suaiki mia, a kaidin mon Kot. <sup>3</sup> Pwe da me kisin likau masanier? Apraam poson Kot, o i me wadok ong i kapunga pa. <sup>4</sup> A me kin keleki a wiawia kan, nan pwan a pan wad ong i nin tiak en kuseded a kaidin ni mak. <sup>5</sup> A me sota kin keleki a wiawia kan, ap poson i, me kin kapungala me doo sang Kot akan, nan a poson me wadok ong i kapunga pa i. <sup>6</sup> Duen Dawid kapaiaki aramas amen, me Kot kotin kapungala likin a wiawia kan: <sup>7</sup> Meid pai, me ar sapung kan lapwadar, o me dip ar akan pwaipwaidier! <sup>8</sup> Meid pai ol o, me Kaun o solar pan kapokoki ong dip a! <sup>9</sup> Ari, me sirkomsais eta, me pai wet kin ko ong, de a pil itar ong me sosirkomsais? Pwe kit me indada: En Apraam a poson me wadok ong i kapunge pa. <sup>10</sup> Ari, iaduen a wadok ong i? Ni a sirkomsaiselar de ni a sosirkomsaiselar? Kaidin ni sirkomsais, pwe ni a sosirkomsais. <sup>11</sup> A a aleer kile en sirkomsais, men kadede a pung kilar poson, me a anekier ni a sosirkomsais, pwen wiala sam en me poson ap sosirkomsais akan karos, pwe pung wet en pil wadok ong irail. <sup>12</sup> O pil wiala sam en me sirkomsais akan. A kaidin arail me sirkomsais akan eta, pwe pil en irail, me aluki poson ota, me mi ren sam atail Apraam ni a sosirkomsais. <sup>13</sup> Pwe kaidin ki kapung o me Apraam o kadaudok a aleer inau o, me a pan sosoki sappa, a ki poson pung. <sup>14</sup> Pwe ma irail, me men kapwaiada kapung o, pan ale soso, nan poson me mal kot, o inau olar. <sup>15</sup> Pwe kapung o kin kareda ongiong, pwe ma sota kapung, a pil sota sapung. <sup>16</sup> I me pung pan tapi sang ni poson, pwe karos en tapi sang mak; o inau ong kadaudok o en tengeteng. A kaidin ir eta, me mi pan kapung o, pwe pil karos, me mi pan poson en Apraam, me sam en kitail karos. <sup>17</sup> Duen a intingidier: I wia kin uk alar sam en wein sappa toto mon Kot, me a poson me kin kamaureda me melar akan o molipei ir, me saikenta mia, pwen miala. <sup>18</sup> I me poson, ap sota kaporopor mia, pwen wiala sam en wein sappa toto, duen a lokido: Nan iduen kadaudok om. <sup>19</sup> Ap sota luetalar ni a poson o so lamelame, me war a melar, pwe a koren iong saunpar epuki; pil sota lamelame war en Sara a melar. <sup>20</sup> Pwe a sota peikasaleki inau en Kot ki soposon, a a kakairida ni poson, o i me a kin kapingaki Kot. <sup>21</sup> A asa melelia, me i kotin inauki ong i, a pan kotin kapwaiada. <sup>22</sup> Nan i wadok ong i kapunga pa. <sup>23</sup> Mepukat sota intingidier pweki i eta, me a wadok ong i mepukat, <sup>24</sup> A pil pweki kitail, me a pan wadok ong, ma kitail pan poson i, me kotin kaiasadar Iesus atail Kaun sang ren me melar akan. <sup>25</sup> Pwe i me pangalar pweki dip atail, o a kotin iasadar pwen kapung patail.

## 5

<sup>1</sup> KITAIL ari pung kilar poson, ap popolen Kot, pweki atail Kaun Iesus Kristus, <sup>2</sup> Me kotin kasamo kitail ki poson ong mak wet, me kitail aleer, ap kaporopor o suaiki lingan en Kot, <sup>3</sup> A kaidin i eta, pwe kitail pil suaiki at apwal akan, pwe kitail asa, me at apwal akan kin kareda kanongama; <sup>4</sup> A kanongama kin kareda kakairida, a kakairida kin kareda kaporopor; <sup>5</sup> A kaporopor sota kin kanamenokala, pwe limpok en Kot me wudokidi ong nan mongiong atail ki Ngen sarau, me kitail aleer. <sup>6</sup> Pwe ni atail luet Kristus mata kin kitail, me doo sang Kot akan ni ansau me kileledier. <sup>7</sup> Pwe iaduen, amen pan mekila me pung amen? Ele pweki me mau amen, me amen pan mekila. <sup>8</sup> A Kot kotin kasansaleda a limpok ong kitail ni en Kristus a mata kin kitail lar, ni ansau atail dipan. <sup>9</sup> Melel kausalap, ansau wet kitail kapung kilar nta; kitail ap kamaul kila i sang ni ongiong. <sup>10</sup> A ma kitail kalolamaui ong Kot ki en sawilim a Ol a matala ni atail imwintiti, nan melel kausalap murin atail kalolamaui kitail pan dorela ki a ieias, <sup>11</sup> A kaidin i eta, pwe kitail pil suaiki Kot ren atail Kaun Iesus Kristus, me kitail paieki tom patail. <sup>12</sup> Ari, duen aramas ta men, me dip tapiki dong sappa, ap tialang mela, o mela lel penang aramas akan karos, pwe karos me wiadar dip, <sup>13</sup> Pwe dip mi nan sappa mon kapung, a sota kapung pan dip, ma sota kapung, <sup>14</sup> Ari so, mela wiawaiada sang Adam lel Moses, pil ren me so wiadar dip laud dueta sapung en Adam, iei me mom en me pan pwarado. <sup>15</sup> A pai en mak kaidin dueta dip, pwe ma dip en me ta men me toto mekila, nan melel kausalap mak en Kot o pai en mak sang ren aramas ta men Iesus Kristus itar ong me toto. <sup>16</sup> A pai o kaidin dueta met, me wiauiere ren amen, me wiadar dip, pwe kadeik o tapi sanger me ta men, pwen kalokolok, a pai en mak o kin lapwada dip toto, pwen pungala. <sup>17</sup> Pwe ma dip en me ta men mela peokidier, nan melel kausalap, irail me pan ale mak o pai en pung, pan poedi o mamaureki me ta men: Iesus Kristus. <sup>18</sup> A duen dip en me ta men aramas akan karos me kadeik ki ong mela, i dueta pung ta ieu itar ong kapung kila aramas akan karos, en kamaurela. <sup>19</sup> Pwe duen sopeik en aramas ta men me toto wia kilar dipan, iduen peik en me ta men me toto pung kilar. <sup>20</sup> A kapung pil wiauiere, pwe dip en kadiarok kidar, a wasa me dip paraparada ia, iei wasa mak o laude sanger. <sup>21</sup> Pwe duen dip dialang mela, iduen mak o pung pan dialang maur soutuk ki Iesus Kristus atail Kaun.



## 6

<sup>1</sup> ARI, da me kitail en inda? Kitail en dadaurata dip, pwe mak en lalaudala? <sup>2</sup> O so! Pala kitail pan dadaurata dip, me kitail mela sanger? <sup>3</sup> De komail sota asa, me karos, me paptaise ong Kristus Iesus, paptaise ong a matala? <sup>4</sup> Kitail ari iang i saredier ni paptais ong mela, pwe duen Kristus kaiasa kidar lingan en Sam sang ren me melar akan, iduen kitail en pil weweideki ni maur kap. <sup>5</sup> Pwe ma kitail kaparoki ong i ni a matala, nan kitail pil pan paroki ong i ni a iasadar. <sup>6</sup> Pwe kitail asaer, me atail aramas maring iang kalopuelar, pwe war en dip en mokonaidier, pwe kitail solar papa dip. <sup>7</sup> Pwe me melar, maiodar sang dip. <sup>8</sup> A ma kitail iang Kristus matalar, nan kitail kamelele, me kitail pil pan iang i ieiasata. <sup>9</sup> Kitail asa, me Kristus kotin iasadar sang ren me melar akan, ap solar pan pur ong matala; mela solar pan poedi i. <sup>10</sup> Pwe ni a kotin matalar, a kotin matalar pan metapak pweki dip, a ni a kotin ieiasata, a kotin ieiasadang Kot. <sup>11</sup> Iduen komail, komail en wia kin komail me melar sang dip, ap memaur ong Kot ren Kristus Iesus. <sup>12</sup> Ari, komail ender mueid ong dip, en kaunda war omail luet; pwen papa a inong sued akan. <sup>13</sup> Komail pil der mueid ong dip o kokon omail akan, pwen men wia sapung a komail mueid ong Kot pein komail, duen me kamauradar sang ren me melar akan, o kokon omail akan en papa me pung ong Kot. <sup>14</sup> Pwe dip sota pan kak poe komail edi, pwe komail solar mi pan kapung, pwe pan mak. <sup>15</sup> Ari da, kitail en wia dip, pwe kitail solar mi pan kapung, a pan mak? O so! <sup>16</sup> Komail sota asa, ma komail pan wiala pein komail ladu en peik, ari komail pan ladu en me komail kin pepeiki ong? Ma dip komail pan mekila, a ma peik, komail pan pung kida. <sup>17</sup> A danke ong Kot pwe komail solar ladu en dip; pwe met komail kin peiki ong tiak en padak me komail ianger sang mongiong omail. <sup>18</sup> Komail ari maioda sang dip, komail id wiala ladun pung. <sup>19</sup> Ngai me inda met nin tiak en aramas, pweki luet en uduk omail. Pwe duen omail pangalang kokon omail akan, en ladun samin o sapung kan, pwen palian kapung, iduen komail en pang ong kokon omail, en lidui me pung, pwen sarauila. <sup>20</sup> Pwe ni ansau me komail ladun dip, komail maio sang me pung. <sup>21</sup> A iaduen wan mepukat ni ansau o, me komail kin namenokki ansau wet? Pwe imwi pan mepukat mela. <sup>22</sup> A met komail maiodar sang ni dip, ap id wialar ladun Kot, o omail wan saraui mia o imwi pan maur soutuk. <sup>23</sup> Pwe pwain en dip mela, a pai en mak en Kot maur soutuk ren Kristus Iesus atail Kaun.

## 7

<sup>1</sup> DE ri ai kan, komail sota asa — i kin peidok ren me asa kapung o — me kapung o kin poedi aramas arain a memaur? <sup>2</sup> Pwe li amen, me a warok mia, kin kaupingki kapung en a warok arain a memaur. A ma a warok melar, a muei sanger kapung en a warok. <sup>3</sup> A ma a pan paudeki amen ol ni a warok memaur, a pan adaneki kamal amen; a ma a warok melar, a muei sanger kapung, ap sota pan kamal amen, ma a pan pur ong amen ol. <sup>4</sup> Ari ri ai kan, iduen pil komail mekilar kapung o pweki war en Kristus, pwen wiala nain amen, iet, me iasadar sang ren me melar akan, pwen kaparapar ong Kot. <sup>5</sup> Pwe ni at kekeideki tiak en pali uduk, inong en dip me kelail nan kokon atail pweki kapung o, pwen kaparapar ong mela. <sup>6</sup> A met kitail muei sanger kapung o, pwe sal pat ong mela olar, pwe kitail en papa ong tiak kap en ngen, a kaidin ong tiak maring en inting. <sup>7</sup> Ari, da me kitail en inda? Me dip kapung o? O so! A i pan sasa dip, ma so kapung. Pwe i pan sasa duen inong sued, ma kapung so kalok kidar: Koe der norok! <sup>8</sup> A dip kadiarok kidar kusoned, ap kainong ong ia song en inong sued karos, pwe ma sota kapung dip mela. <sup>9</sup> Pwe mas o i sota mi pan kapung, ap mamaureta, a kusoned lao mia, dip ai ap diarokadar. <sup>10</sup> A ngai melar; kusoned, me loki dong ia, pwe i en maure kida, kare ong ia mela. <sup>11</sup> Pwe dip kadiarok kidar kusoned liapai ia dar, ap kame ia lar. <sup>12</sup> Ari, kapung o me sarui o kusoned me sarui, a pung o mau. <sup>13</sup> A iaduen me mau kot kare ong ia mela? O so! A dip en sansale kida me kamau o ni a kare ong ia mela, pwe dip en sansale kida kusoned. <sup>14</sup> Pwe kitail asa, me kapung o me ngenin, a ngai me uduken o netilang dip. <sup>15</sup> Pwe i sota asa, da me i en wia. Pwe kaidin me i mauki, me i kin wiada, a me i kin suedeki, iei me i kin wia. <sup>16</sup> Ari, ma i kin wiada, me i kang wia, nan i kin kasansaleda, me kapung me mau. <sup>17</sup> A ma i wiadar, me i sota men wia, kaidin ngai me wiadar, a dip me mimi lol i. <sup>18</sup> Pwe i asa, me sota mau kot mi lol i nan uduk ai, pwe i kin men wiada me mau, a en angada me pung i sota kak ong. <sup>19</sup> Pwe me mau o, me i men wiada, i sota kin kapwaida, a me sued, me i kang, i me i kin wiada. <sup>20</sup> A ma i wiada, me i so men wiada, kaidin ngai me wiada, a dip me mi lol i. <sup>21</sup> Iet me kapung kadiarok ong ia: Ni ai men wiada me mau, me sued mimi re i. <sup>22</sup> Pwe i kin mauki kapung en Kot pali lol en aramas. <sup>23</sup> I ap diaradar eu kapung ni ai kokon akan, me kin palian kapung en loli, ap kalua ia di pan kapung en dip, me mi nan ai kokon akan. <sup>24</sup> O ngai aramas luet amen! Is me pan kamaio wei ia sang ni war mela wet! <sup>25</sup> I danke Kot pweki Iesus Kristus atail Kaun.

Nan lol i i kin papang kapung en Kot, a ni pali uduk kapung en dip.

## 8

<sup>1</sup> ARI, solar me mau ong pakadeikada, me mi ren Kristus Iesus. <sup>2</sup> Pwe kapung en Ngen en maur ren Kristus Iesus kamaio ia da sang ni kapung en dip o mela. <sup>3</sup> Pwe me kapung sota kak ong, aki a luete kila pali uduk, iei me Kot kotin wiada ni a kotin poroneda sapwilim a Ol ni mom en uduk en dip, pweki dip, pwen kadeikada dip ni pali uduk. <sup>4</sup> Pwen kapwaiada pung en kapung re atail, me sota weideki pali uduk a pali Ngen. <sup>5</sup> Pwe me kisan pali uduk, kin lame-lame duen inong en uduk, a me kisan pali Ngen, kin lamelame duen inong en Ngen. <sup>6</sup> Pwe tiak en uduk iei mela, a tiak en Ngen maur o popol. <sup>7</sup> Pweki tiak en uduk kin palian Kot, pwe a sota kin duki ong kapung en Kot, pwe a pil sota kak ong. <sup>8</sup> A me kisan pali uduk, sota kak konekon ren Kot. <sup>9</sup> A komail kaidin kisan pali uduk, pwe kisan pali Ngen, ma Ngen en Kot kotikot lol omai. A me sota aneki Ngen en Kristus, i kaidin sapwilim a. <sup>10</sup> A ma Kristus kotikot lol omai, war mekilar dip, a ngen memaureki pung. <sup>11</sup> A ma Ngen o, me kaiasadar Iesus sang ren me melar akan, kotikot lol omai, nan i me kaiasadar Kristus sang ren me melar akan, pil pan kamaureda war omai mela ki Ngen e, me kotikot lol omai. <sup>12</sup> Ari ri ai kan, kitail solar pwaipwand ong pali uduk, pwen kapwaiada inong en uduk, <sup>13</sup> Pwe ma komail memaureki uduk, komail pan mela, a ma komail pan kamela wiawia en pali war ki Ngen, komail pan memaureta. <sup>14</sup> Pwe karos me weweideki Ngen en Kot, nan irail seri en Kot akan. <sup>15</sup> Pwe kaidin ngen en ladu, me komail aleer, pwen pur ong masak, a Ngen en seri, me komail aleer, me kitail kin eker kida: Apa, Sam! <sup>16</sup> Pein ngen o kotin iang ngen atail kadedeki, me kitail seri en Kot akan. <sup>17</sup> A ma kitail seri kan, nan kitail pil seri en soso, seri en soso en Kot o kisan toun soso en Kristus, ma kitail iang kamekam, kitail pil pan iang linganla. <sup>18</sup> Pwe i asaer, me kamekam en ansau et sota mau ong en kaparoki ong lingan kokodo, me pan kasansaledang kitail, <sup>19</sup> Pwe audepan sappa poden anane kaulap papasan en seri en Kot ar pan maioda. <sup>20</sup> Pwe audepan sappa o pangalang mela, kaidin pweki pein insen arail, a pweki i, me pang ir alang kaporopor. <sup>21</sup> Pwe audepan o pil pan maioda sang ni a lidulidui ong tiak en sorede, ong maio en lingan en seri en Kot akan. <sup>22</sup> Pwe kitail asaer, me audepan sappa karos kin sangesanglol o mimi pan wairok en naitik lao lel met. <sup>23</sup> A kaidin irail eta, pwe kitail pil iang, me mesenin Ngen, pil pein kitail kin sangesang, auiaui

lao ansau en pali war atail ar kawilikapada. <sup>24</sup> Pwe kitail kamaurelanger kaporopor. A kaporopor me sansal, i kaidin kaporopor; pwe me amen kin ududial, menda en kaporoporeki? <sup>25</sup> A ma kitail kaporoporeki, me kitail sota udial, kitail kin kanongama auiauieta. <sup>26</sup> Pil Ngen o kotin sauasa kitail ni atail luet akan, pwe kitail sasa, da me kitail en poeki, o da me kon ong, pwe pein Ngen o sangesangelol o laolao kin kitail. <sup>27</sup> A me kin kotin kasauiaada mongiong akan, mangi duen kupur en Ngen, pwe a kin kotin laolaoki sarau kan duen tiak en kupur en Kot. <sup>28</sup> A kitail asa, me karos kin kamauiala me pok ong Kot akan, irail me paeker duen ar kileledier. <sup>29</sup> Pwe me a kotin piladar mas o, iei me a pil kotin kileledier, en tialang mom en sapwilim a Ol, pwe a en meseni nan pung en ri a kan. <sup>30</sup> A me a kotin kileledier mas o, a pil kotin waronge irail edo, a me a kotin warongedor, a pil kapung irail alar, a me a kapungalar, a pil kotin kalingan irail adar. <sup>31</sup> Ari, da me kitail en sapenki mepukat? Ma Kot iang kitail, is me pan kak palian kitail? <sup>32</sup> I me sota kotin kasampwaleki sapwilim a Ol, pwe a kotiki wei en wiliandi kitail, dadue, a so pan kotin sapan iangaki dong kitail meakaros? <sup>33</sup> Is me pan kapung ong en Kot a piladar akan? Pwe Kot eta, me kotin kapungada; <sup>34</sup> Is me pan kadeikada? Pwe Kristus me matalar, me pil kaiasada o me pil kaipokedi ni pali maun en Kot, o me pil kin laolao kin kitail. <sup>35</sup> Is me pan irawei sang kitail ni limpok en Kristus? Ansau apwal, de masak, de kamekam, de isesol, de kiliso, de kamasak, de kodlas? <sup>36</sup> Duen a intingidier: Pweki komui kit kamekame kilar kaukaule, kit me wadok ong sip akan, me kileledier ong kamela. <sup>37</sup> A ni mepukat karos kitail me poedier kaulap pweki i, me pok ong kitail er. <sup>38</sup> Pwe i asa, me kaidin mela, de maur, pil kaidin tounlang kan, de saupeidi, pil kaidin men met, de men mur, de me manaman akan, <sup>39</sup> Pil kaidin men poe, de men pa, de okotme pan kak irawei sang kitail ni limpok en Kot, me mi ren Kristus Iesus atail Kaun.

## 9

<sup>1</sup> NGAi kin lokaia meler ren Kristus, o i sota kin likam, pwe insen ai o Ngen sarau kadede ia da, <sup>2</sup> Me i kin patautau o insensud nan mongiong i kaukaule. <sup>3</sup> Pwe pein ngai inong iong en riala, pwen dooki wei sang Kristus pweki ri ai kan ni pali uduk. <sup>4</sup> Iei men Israel me udan seri en Kot, me ar lingan, o inau kan, o kapung, o upa Kot, o kokop akan mia, <sup>5</sup> Me samaneki sam atail akan me Kristus pil tapi sang ia ni pali uduk a, me poedi meakaros, iei Kot me iasanai kokolata, amen. <sup>6</sup> Pwe kaidin dene masan

en Kot so pwaida, pwe kaidin karos men Israel, me tikidar Israel; <sup>7</sup> Pil kaidin karos seri kan, me kisan kadaudok en Apraam; pwe sang ren Isaak kadaudok om pan tapi sang ia. <sup>8</sup> Ari, kaidin irail seri en Kot akan, me seri kan ni tiak en uduk, a seri en inau kan pan wad ong kadaudok o. <sup>9</sup> Pwe i masan, masan en inau eu: Ni ansau o I pan kodo, a Sara pan naitikada seri ol amen. <sup>10</sup> A kaidin i eta, pwe pil Repeka lao lisean ong sam atail Isaak. <sup>11</sup> Pwe ni ansau seri ko kaikenta ipwidier, o pil kaikenta wiadar meakot mau de me sued, o pwe kupur en Kot en pwaida, kaidin ni wiawia a ni lipilipil ren me piladar o, <sup>12</sup> A kotin masani ong i: Me laud o pan papa me tititik! <sup>13</sup> Duen a intingidier: Iakop me I pok ong er, a Esau me I likidmalialar. <sup>14</sup> Ari, da me kitail en inda? Kot me sapung? O so! <sup>15</sup> Pwe a kotin masani ong Moses: I pan maki ong, me I men maki ong, o I pan pokepoke, me I men pokepoke. <sup>16</sup> Ari, sota katapa, ma amen pan pein inong iong de tange wei, a ma Kot pan kotin maki ong amen. <sup>17</sup> Pwe kisin likau me katitiki ong Parao: Nan iet me I kilele uk adar, pwe I en kasale kida uk ai manaman, o pwe mar ai en indandeki sili ni sap akan karos. <sup>18</sup> Ari, a kin kotin maki ong, me a kotin kupura, ap kapitakaila, duen me a kotin mauki. <sup>19</sup> Koe ap pan indang ia: Ari da me a kailong kin ia? Pwe is me kak palian kupur a? <sup>20</sup> Ei melel aramas koe, is koe, me men palian Kot? Da, dipisou pan indai ong me wiadar i: Menda koe wiai ong ia momuei? <sup>21</sup> Pala saun wiada dal sota manaman ong, en wia kida lupon en pwel ota dal eu me kaselel, de eu me sakanekan? <sup>22</sup> A Kot kotin kanongama ong dal sued akan, me wiauiet ong lokidokila, ni a men kasaleda a ongiong o manaman, <sup>23</sup> O a pil men kotin kasaleda a dir en lingan ki dal en a mak kan, me a kotin kaonopadar mas o en lingana. <sup>24</sup> Iei kitail, me a kotin warongdo, kaidin sang ren Sus akan eta, a pil sang ren men liki kan. <sup>25</sup> Duen a pil kotin masanier nan puk en Osea: I pan kaadaneki irail, me kaidin nai, nai aramas akan, o me so kompoke pai, kompoke pai. <sup>26</sup> A pan wiaui wasa o me a loki ong irail: Komail kaidin nai aramas, i wasa re pan adaneki seri en Kot ieias. <sup>27</sup> A Iesaia likelikwir duen men Israel: Ma seri en Israel akan pan rasong pik en oror, lua ta pan maurela. <sup>28</sup> Pwe a pan kotin kairela sapwilim a dodok o kamode kila ni a pung, pwe Kaun o pan kotin wiada dok motomot nin sappa. <sup>29</sup> O duen Iesaia masanier mas o: Ma Kaun Sepaot so nikideki ong kitail kaparapar, kitail pan dueta Sodom o Komora. <sup>30</sup> Ari, da me kitail en inda duen men liki kan me sota rapaki pung, re diadar pung, a pung eu, me tapi sang poson. <sup>31</sup> A men Israel me inong iong kap-

waiada kusoned en pung, ap sota konodi kusoned wet. <sup>32</sup> Pwekida? Pweki a sota tapi sang ni poson a ni wiawia kan, pwe irail dipikelekeleki takai en dipikelekel. <sup>33</sup> Duen a intingidier: Kilang, I pasonedi takai eu nan Sion, takai en dipikelekel eu o paip en kamakar. A me pan poson i, a sota pan sarodi.

## 10

<sup>1</sup> RI ai kan, inong en mongiong i, o ai ngdingid kin irail ong Kot pan dore ir ala. <sup>2</sup> Pwe ngai kadede parail, me re kin nantiong Kot, ap sasa tiak. <sup>3</sup> Pwe re sasa pung en Kot, ap sosong kapwaiada pein arail pung, ap sota duki ong pung en Kot. <sup>4</sup> Pwe Kristus kaimwisok pan kapung o; karos me poson en pung kila. <sup>5</sup> Pwe Moses masanier duen pung en me pwili sang kapung o: Aramas o, me kapwaiada song pukat, a pan maur kila. <sup>6</sup> A iet me pung, me pwili sang poson, kin inda: Der inda nan mongiong om: Is me pan daudala nanlang? Iet wewe: En wadido Kristus. <sup>7</sup> De is me pan daudi wasa lol? Iet wewe: En wadado Kristus sang ren me melar akan. <sup>8</sup> A da me a kin inda? Masan o me koren iong uk, a kin mi nan au om o nan mongiong om; iei masan en poson, me se kin padaki wei. <sup>9</sup> Pwe ma koe pan kadedeki au om Iesus, me i me Kaun, ap poson nan mongiong om, me Kot kotin kaiasadar i sang ren me melar akan, koe ap pan doro kila. <sup>10</sup> Pwe poson kin tapi sang nan mongiong o, pwen pung kila, o kadede kin tapi sang nan au o, pwen maur kila. <sup>11</sup> Pwe kisin likau me masani: Amen amen me pan poson i, sota pan soredi. <sup>12</sup> Pwe sota irair eu nan pung en men Sus o men Krik, pwe Kaun en irail karos me ta men, me dir en kalangan ong karos, me kin likwir ong i; <sup>13</sup> Pwe amen amen me likwir ong mar en Kaun o pan dore kila. <sup>14</sup> A iaduen, irail pan likwirlang i, me irail sota poson? A iaduen, irail pan kak poson i, me re saikenta rong? A iaduen irail pan kak rong, ma sota saunpadak? <sup>15</sup> A iaduen, irail pan kak padaki wei, ma re sota pan pakadarala? Duen a intingidier: Meid pai nã en me padaki rongamau en popol, me padaki rongamau en me mau kan! <sup>16</sup> A kaidin karos me peiki ong rongamau. Pwe Iesaia masani: Maing, is me kamelele at padak? <sup>17</sup> Ari, poson kin pwili sang padak, a padak kin pwili sang masan en Kot. <sup>18</sup> A ngai me inda: Irail sota rongadar? O ei! Pwe ngil arail leler sap karos, o ar padak lel ong irair en sappa. <sup>19</sup> A ngai me inda: Israel sota wewekier? Pwe iet kaieu, me Moses masani: I pan kasarowei kin komail, me kaidin nai aramas, o I pan kamakara kin komail aramas pweipwei kan. <sup>20</sup> A Iesaia kelail masani: Ngai me kadiarokada sang

ren me sota rapa kin ia, o Ngai me pwara dong, me sota idok ia. <sup>21</sup> A kotin masani duen Israel: Kaukaule I kapawei pa i kat ong aramas katiwo o kangudi kan.

## 11

<sup>1</sup>ARI, iet me i men inda: Kot kalikalar sapwilim a kan? O so! Pwe ngai pil kisan men Israel, o kadaudok en Apraam, o kainok en Peniamin. <sup>2</sup> Kot sota kalikalar sapwilim a kan, me a kotin piladar mas o. De komail sota asa, da me kisin likau masanier duen Elias ni a kadipia men Israel mon Kot masani: <sup>3</sup> Maing, irail kamelar sapwilim ar saukop akan, o karongk pasang sapwilim ar pei saraui kan, a ngai ta me lua, a irail pil rapakin ia, pwen kame ia la. <sup>4</sup> A da me Kot kotin sapengki i? Ngai me kanikidi ong ia ol isikid me so kelepuki ong Paal. <sup>5</sup> Nan iduen ansau wet: Luan me piladar akan mia pweki mak en Kot. <sup>6</sup> A ma pweki mak, nan kaidin pweki wiawia kan; pwe ma iduen, mak solar pan mak. <sup>7</sup> Ari, iaduen mepukat? Me men Israel raparapaki, re sota diaradar, a me piladar akan diaradar, a me tei kan kapitakailar. <sup>8</sup> Duen a intingidier: Kot kotiki ong irail ngen en men mair, o por en mas akan, pwe ren der kilang wasa, o salong akan, pwe ren der rong wasa lao lel ran wet. <sup>9</sup> O Dawid masani: Arail tepel en wiala insar parail, o litip arail, o kapup parail, o karia parail. <sup>10</sup> Mas arail en rotorotala, pwe ren der kilang wasa, o irail en kakos pena kokolata. <sup>11</sup> Ari, iet me i men inda: Irail dipikelekel pwen pupedi? O so! A pweki arail pupedi, en id kamaurela men liki kan, pwen kapopot kin irail do. <sup>12</sup> Ari, ma arail pupedi id pai ong sappa, a arail momalar id pai ong men liki kan, ia wan pai, ma irail karos pan sapaledo! <sup>13</sup> Pwe men liki komail, me i men padaki ong, pwe ngai wanporon en men liki kan, i men kaindinda ai dodok. <sup>14</sup> Pwe ma i kak ong, i pan kainong irail, me kit eu ni pali uduk pwe akai re 'rail en dorela. <sup>15</sup> Pwe ma arail kalikilar id kalamalam maula sappa, arail kasapaledo so pan kamaurela sang ren me melar akan? <sup>16</sup> A ma kalap me sarau, plaua amas pil pan sarau; o ma kalaua me sarau, ra kan pil pan dueta; <sup>17</sup> A ma ra kai tapengok sang, a koe ni om wos mal id peus iong, ap iang nim pil en tuka o iang maurki kalaua, <sup>18</sup> Koe ap der suaiki ong ra kan! A ma koe suaiki ong irail, kaidin koe me kin wa kalaua, a kalaua kin wa uk. <sup>19</sup> Koe ap pan indada: Ra kan tapengok wei sang, pwe i en id peus ong. <sup>20</sup> Me pung; soposon, me re tapengok kilar, a poson, me koe maur kila, koe der aklapalap a masak! <sup>21</sup> Pwe ma Kot kotin mui sang udan ra kan, kalaka, pwe ele a pil pan mui sang uk! <sup>22</sup> Ari, kilang kalangan o ongiong en Kot; ongiong ong irail, me

salongalar, a kalangan ong uk, ma koe pan dadaurata a kalangan, a ma so, koe pil pan tapengok sang. <sup>23</sup> A pil irail, ma irail sota pan mimieta ni arail soposon, re ap pan peus sapa, pwe Kot kotin kak ong kapure irail do. <sup>24</sup> Pwe ma koe lepuk sang ni tuka olip mal, ap peus sapa ong tuka olip mau, a iaduen udan ra mau kan, re sota pan kak pur ong udan ar tuka? <sup>25</sup> Ri ai kan, i men, komail en lelapok ki kaponepon wet, pwe komail de aklolekong, duen apali en Israel me kapitakailar, lao lel ansaun irail me pilipilar ren men liki kan pwarador. <sup>26</sup> Men Israel karos ap pan maureda, duen a intingidier: Amen pan kotido sang Sion, me pan kawela karos me doo sang Kot akan ren Iakop. <sup>27</sup> Pwe iet ai inau ong irail, i lao lapwa sang irail di pan arail akan. <sup>28</sup> Iran rongamau irail me imwintiti pweki komail, a iran lipilipil irail me kompekepa kan pweki sam akan. <sup>29</sup> Pwe Kot sota kin kalukila a pai en mak akan de me a kotin piladar. <sup>30</sup> O duen komail, me pil sota poson Kot mas o, a met komail aleer mak, pweki arail soposon. <sup>31</sup> Iduen irail me sota poson mak, me komail diaradar, iei me re pil sota diaradar mak en Kot. <sup>32</sup> Pwe Kot me kotin kapata pena irail karos ni soposon, pwen mak pena ong karos. <sup>33</sup> O meid laud erpit en Kot o a kotin mangi meakaros, sota me kak weweki a kadeik kan, de pamedal en a wiawia kan! <sup>34</sup> Pwe is me asaer kupur en Kaun o, de is me padaki ong i meakot? <sup>35</sup> De is me ki ong i meakot, pwen depuk ong i? <sup>36</sup> Pwe meakaros tapi sang re a, o mia pweki i, o wiwai ong i, lingan en ko ong i kokolata! Amen.

## 12

<sup>1</sup> RI ai kan, i ap panau komail pweki kalangan en Kot, komail en kida war omail, pwen wiala mairong maur, me sarau o kaperenda kupur en Kot, iei omail kaudok me pung. <sup>2</sup> Komail der kaalemongin sappa, a komail en kawilikapada lol omail, pwe komail en kak kasaukada, da me kupur en Kot, me mau o kaperen, o unsok. <sup>3</sup> Ki mak, me i aleer, i indang amen amen nan pung omail, ender inong iong pein i, laude sang me kon ong, a en lamelame me a en pung, duen Kot kotin nek ong amen amen wan a poson. <sup>4</sup> Pwe duen ni pali war atail kokon toto mia, a dodok en kokon akan kaidin dupeneta, <sup>5</sup> Iduen kitail me toto, war ta ieu ren Kristus, kitail ap kokon pena nan pung atail. <sup>6</sup> Atail pai en mak akan mia ap toror pasang, duen mak o me kitail aleer: Ma deideikop kitail en kokopada duen wan poson, <sup>7</sup> O ma dodok eu, kitail en kolekol atail dodok; o ma saunpadak amen, i en wiada padak, <sup>8</sup> Ma amen kin panau, i en panau, ma amen kin kisakis wei, a en opampap, ma kaun

amen, a en kanekanaiong, ma amen, kin kalangan, a en peren kida. <sup>9</sup> Omail limpok ender sapung, tateki me sued, tengeteng ni me mau. <sup>10</sup> Omail limpok pena en tapi sang mongiong omail; wauneki amen, mon a pan waune kin uk. <sup>11</sup> Der tanganga ni omail dodok; ngen omail en inong iong dodok ong Kaun o. <sup>12</sup> Peren ni kaporopor; kanongama ni ansau apwal; podidi ong kapakap. <sup>13</sup> Kisakis ong sarau samama kan; kasamo ki peren. <sup>14</sup> Kapaiada me kin paki komail; kapaiada o der kariala. <sup>15</sup> Perenda ren me popul akan; o sangesang ren me sangesang kan. <sup>16</sup> Komail minimin pena ni omail lamelam, der inong iong meakot me lapalap, a inong iong me tikitik; komail der aklolikong. <sup>17</sup> Komail der depukki ong en amen a me sued me sued, a inong iong me kon ong aramas akan karos. <sup>18</sup> Ma a pan kak pa omail, polaul ong aramas akan karos. <sup>19</sup> Kompoke pai ko, komail der pein depuk, o komail der madang makar, pwe a intingidier: Ai depuk, Ngai me pan depuk, me Kaun o kotin masani. <sup>20</sup> Ari, ma om imwintiti amen men gangadar, kamanga i; ma a men nim piladar, kanim pileada, pwe ma koe pan wia mepukat, nan koe ap pan ki penang mong a kol molus. <sup>21</sup> Koe der lodi ong me sued, a poekidi me sued me mau.

### 13

<sup>1</sup> AMEN amen en upa kaun akan, me kin poe irail edi, pwe sota kaun akan me sota sang ren Kot, a wasa kaun akan mia, nan irail me ren Kot. <sup>2</sup> Ari, me pan katiwo ong kaun akan kin katiwo ong kusoned en Kot, a me katiwo kan, pan lodi ong kapung. <sup>3</sup> Pwe saupeidi kan sota kin kamasakki, me kin wia mau, pwe me kin wia me sued. A ma koe sota men masak kaun akan, en wiada me mau, koe ap pan indandeki pa 'rail. <sup>4</sup> Pwe a papan Kot o iei me mau ong uk, a ma koe wia me sued, masak, pwe a sota kin wa mal kodlas. Pwe a papan Kot o, pwen kame me wia sued. <sup>5</sup> Iei me komail en peiki ong, a kaidin pweki kamekam a pweki insen omail. <sup>6</sup> Iei me komail pil wiai ong nopwei, pwe irail me papan Kot, me kin kaukaule papa wet. <sup>7</sup> Komail ari kapungala omail pwaipwand ong amen amen! Taksis ong me taksis kin wiaui ong, nopwei ong me nopwei kin wiaui ong; masak, me masak kin ko ong; ki ong wau, me wau kin ko ong. <sup>8</sup> Der pwaipwandeki meakot ong amen; iet eta: Omail limpok pena, pwe me kin pok ong amen, kin kapwaiada kapung o. <sup>9</sup> Pwe iet akan: Koe der kamal! Koe der kamela aramas! Koe der pirap! Koe der norok! O ma pil eu kusoned mia, iet orlepa: Koe en pok ong men imp om due pein uk! <sup>10</sup> Limpok sota kin wia sued ong men imp a. Ari, limpok audepan kapung. <sup>11</sup> O pil met:

Kitail en dedeki duen ansau o, pwe auer leler, me kitail en pirida sang mair; pwe ansau atail dorela me koren sang ni tapin atail poson. <sup>12</sup> Pongpong daulier, a ran me korendor. Kitail en pwilikidi wiawian rotorot akan, ap ale tatan marain. <sup>13</sup> Kitail en kekeid ni tiak mau, pwe ni ran; der kaped en manga de kamom soko, der samin de saut, de luak, de peirin. <sup>14</sup> A komail ale Kaun Iesus Kristus, o der kangongala pali udok, pwen angeda a inong sued.

### 14

<sup>1</sup> KOMAIL apwali me luet ni poson o der kaping irail ada. <sup>2</sup> Amen kin lame-lame, en kangkang song karos, a me luet kin kangkang wan tuka. <sup>3</sup> Meamen me kin kangkang, ender mamaleki, me sota kin kang; o me so kin kangkang, ender kadeikada me kin kang, pwe Kot kin apawali i. <sup>4</sup> Pwe is koe, me kin kadeikada en amen a ladu, pwe ma a pan uda de pupedi a pan nain a saumas eta. Melel, a pan pil uda, pwe Kaun o me kotin kak ong kauada i. <sup>5</sup> Amen kin pilada a ran kasampwal mon me tei kan, a amen ran karos dupeneta re a; a amen amen en pung ni a lamelame. <sup>6</sup> Meamen me moaki ran eu, Kaun o me a moaki ong, me kin manga, Kaun o me a manga ong, pwe a kin dangke Kot, o me sota manga, nan Kaun o me a so manga ong, ap kin danke Kot. <sup>7</sup> Pwe sota meamen re 'tail kin memaur iong pein i, o sota me kin mela ong pein i. <sup>8</sup> Pwe ma kitail memaur, Kaun o me kitail kin memaur iong, o kitail mela, Kaun o me kitail pan mela ong, ari, kitail memaur de mela, sapwilim en Kaun o kitail. <sup>9</sup> Pwe i me Kristus matalar ap iasadar, pwen kaunda me melar o memaur akan. <sup>10</sup> Ari, menda koe kin kadeikada ri om? De koe, menda koe mamaleki ri om? Pwe kitail karos pan wisikelang mol en kadeik en Kot; <sup>11</sup> Pwe a intingidier: Kaun o kaukila pein i masani: Nā karos pan kelepuke ong ia, o lo karos kadede Kot. <sup>12</sup> Nan i kitail karos pan weokada pein kitail ong Kot. <sup>13</sup> Kitail ari ender kadeikada amen amen; a mak eta, kitail en kadeikada iet akan, ender ki ong ri atail kasasepa de men kamakar. <sup>14</sup> Ngai me lamedar o asadar pan Kaun Iesus, me sota okotme me udan samin; a meamen, me kasamineki meakot, nan i me samin ong. <sup>15</sup> Pwe ma ri om pan insensuedeki om kisin manga, koe sota kin weweid nin tiak en limpok; ender kawé kila om manga i, me Kristus mata kilar. <sup>16</sup> Komail ari kalaka, pwe omail wiawia mau de kalok sued: <sup>17</sup> Pwe wein Kot kaidin manga o nim, a pung, o popul, o peren ren Ngen sarau. <sup>18</sup> Pwe me kin papa Kristus ni mepukat, i me pung ren Kot o pil konekon ren aramas akan. <sup>19</sup> Kitail ari en inong iong meakan,

me kin kareda popol o kamakamaui kitail pena amen amen. <sup>20</sup> Koe ender kawe kila kisin manga wiawia en Kot. Ari, karos me min, ap sued ong aramas amen, me luet ap mangamanga. <sup>21</sup> Me mau, koe ender kang uduk de nim wain, de wia meakot, me ri om ol pan pupe kidi, de makaraki, de kaluete kila. <sup>22</sup> A ma om poson mia ni mepukat, ari kamaui pein uk mon Kot. Meid pai, me sota kin kadeikada pein i ki meakan, me a kin kasampwaleki. <sup>23</sup> A meamen, me peikasal ap manga, me pakadeikadar, pwe a sota tapi sang poson. A karos me sota kin tapi sang poson, iei dip.

## 15

<sup>1</sup> A MAK eta, kitail kelail akan, en sauasa me luet akan, ap der peren ki pein kitail. <sup>2</sup> Amen amen kitail en pok ong men impa, pwen kamauiala i. <sup>3</sup> Pwe Kristus pil sota kin pok ong pein i, a duen intingidier: Pakainak en me kainaki komui, me I dikidier rau. <sup>4</sup> Pwe karos me intingidier mas o, me intingidier, pwen padaki dong kitail, pweki kanongama o kamait en kisin likau kan kitail en kaporopor. <sup>5</sup> Ari, Kot en kanongama o kamait en kaminimin komail pena duen Kristus Iesus. <sup>6</sup> Pwe komail en kalinganada Kot o Sam en atail Kaun Iesus Kristus ni lamalam ta pot o au ta ieu. <sup>7</sup> I me komail en apapwali pena dueta Kristus me kotin kasamo komail ong lingan en Kot. <sup>8</sup> Pwe ngai inda, me Iesus Kristus wialar papan sirkomsais pweki melel en Kot, pwen kapwaiada inau kan ong sam akan. <sup>9</sup> Pwe men liki kan en kalinganada Kot pweki a mak duen a intingidier: I me I pan kad-ededa komui ren men liki kan o kauleki mar omui. <sup>10</sup> O pil eu me a kotin masani: En popol komail men liki kan iangaki sapwilim a aramas! <sup>11</sup> O pil eu: Kapinga Kaun o, komail men liki kan karos o kalinganada i, komail wei karos! <sup>12</sup> O pil eu me Iesaia masani: Ip en Iese pan pwarado, a pan pwarado, pwen kaunda men liki kan, i me men liki kan pan kaporoporeki. <sup>13</sup> Ari, Kot en kaporopor en kadire kin komail peren o popol karos ni poson, pwe omail kaporopor en laudeki manaman en Ngen sarau. <sup>14</sup> A ngai asa mau duen komail ri ai kan, me komail dir en kamau o audaudeki erpit, o koiokki ong panapanau pena amen amen. <sup>15</sup> Ari so, ri ai kan, i inting wong komail er duen met, pwen kataman kin komail mak eu, me Kot kotiki ong ia er. <sup>16</sup> Pwe i en papan Kristus Iesus ong men liki kan, padapadaki wong ir rongamau en Kot, pwe men liki en wiala mairong eu, me konekon, me kasarau kila Ngen sarau. <sup>17</sup> I me i kak suaiki pan Kristus Iesus pweki meakan me sapwilim en Kot. <sup>18</sup> Pwe i sota pori ong inda meakot, me Kristus sota kotiki ong ia, i en kalua

men liki ong peik, ki ai padak o wiawia kan. <sup>19</sup> O kilel o manaman akan, en Ngen sarau. Ari, i me i kadire kila rongamau en Kristus sap karos, tapiada Ierusalem, ap lel ong Ilirien. <sup>20</sup> Ngai nanting ni ai padaki rongamau wasa me saikenta asa duen Kristus pwe i de kauada pon pason en amen. <sup>21</sup> A duen a intingidier: Me saik kalok ong irail pan kilang, o me sota rong, re pan weweki. <sup>22</sup> Nan i me karompwa ia pan pak toto, pwen sota kak pwar wong komail. <sup>23</sup> A met solar wasan dodok ni sap pukat, a par toto me i inong iong en pas wong komail. <sup>24</sup> I lao sailokelang Spanien, i pan pwar wong komail, pwe i kaporoporeki, me i pan sup wasa o ap kilang komail, a komail pan kalua ia lang wasa o murin ai kaserloleit re omail. <sup>25</sup> A met i pan sailokelang Ierusalem, pwen papa sarau kan. <sup>26</sup> Pwe men Masetonien o Akaia kan mauki kisakisa wei ong sarau samama kan, me mi Ierusalem. <sup>27</sup> Irail mauki pwe re pil pwaipwand ong irail, pwe ma men liki kan pwaianekier arail pai ngenin, nan me kon ong, irail en pakisakis dong irail ar pai pali war. <sup>28</sup> I lao kapwaiadar mepukat o ki ong irail er kisakis sapan wet, i ap pan sup re omail o daululang Spanien. <sup>29</sup> A i asadar, i lao pwaralang komail, i pan dir pai ki en Kristus. <sup>30</sup> A ri ai kan, i ap poeki komail pan atail Kaun Iesus Kristus o limpok en Ngen pwe komail en dauki pena ong ia omail kapapak kin ia ong Kot. <sup>31</sup> Pwe i en piti sang men Iudaa soposon akan, o pwe ai dodok ong Ierusalem en sauasa sarau kan. <sup>32</sup> Pwe i en perenki lel ong komail pan kupur en Kot o iang komail tapwenda. <sup>33</sup> Ari, Kot en popol en kotikot re omail karos! Amen.

## 16

<sup>1</sup> I ap kakaliki ong komail ri atail li Pepe, me kin papan momodisou en Kenkrea, <sup>2</sup> Pwe komail en kasamo i pan Kaun duen me kon ong sarau kan, o komail sauasa i ni meakoros, pwe i me sauas pan me toto o pil ngai. <sup>3</sup> Ai ranamau ong Prisila o Akwila, me sauas pai ren Kristus Iesus. <sup>4</sup> Me inepai ia da, me kaidin ngai eta, me kin danke ira pwe pil momodisou akan karos nan pung en men liki kan. <sup>5</sup> Pil momodisou nan im ara. Ranamau ong kompoke pai Epene-tus me tapiada momodisou en Kristus nan Asien. <sup>6</sup> Ranamau ong Maria, me kadek papa kit. <sup>7</sup> Ranamau ong Andronikus o Iunias, kompoke pai kan o me iang ia salidi, me masamas ren wanporon akan, me sau ong Kristus mo i. <sup>8</sup> Ranamau ong Aplias, me kompoke pai ren Kaun o. <sup>9</sup> Ranamau ong Urpan, sauasa pat ren Kristus, o Stakis kompoke pai. <sup>10</sup> Ranamau ong Apeles, me dadaurata ren Kristus, ranamau ong toun im en Aristopulus. <sup>11</sup> Ranamau ong Erodion

kompoke pai. Ranamau ong toun im en Narsisus, me papa Kaun o. <sup>12</sup> Ranamau ong Tripäna o Triposa, me papa Kaun o. Ranamau ong kompoke pai Persis, me porisok ni a dodok ong Kaun o. <sup>13</sup> Ranamau ong Ropus, me pilipildar ren Kaun o o in a pil in ai. <sup>14</sup> Ranamau ong Asinkritus, Plekon, Ermas, Patropas, Ermes o ri atail akan, me mi re 'rail. <sup>15</sup> Ranamau ong Pilolokus, o Iulia, o Nereus, ri ai li, o Olimpás, o sarau kan karos, mi re 'rail. <sup>16</sup> Komail ranamauki pena metik sarau. Momodisou en Kristus akan kin ranamau ong komail. <sup>17</sup> Ari, ri ai kan, i panau komail, komail en kileledi, me kin kamueit pasang o kamakar momodisou palian padak o me komail aleer; komail ari mui sang irail. <sup>18</sup> Pwe song pukat sota kin papa atail Kaun Iesus Kristus, a pein kaped arail o kotaueki ar kadek lokaia o widing mongion en me lelapok kan. <sup>19</sup> Pwe omail peik me indand sili lel penang aramas karos. I me i peren kida komail. A i men, komail en koiokki ong me mau kan, ap sokoiokki ong me sued akan. <sup>20</sup> A Kot popol pan kasuk pasang Satan pan nä omail eden. Mak en atail Kaun Iesus Kristus en mimieta re omail! <sup>21</sup> Timoteus ai warok en dodok, o kompoke pai ko Lusius, o Iason, o Sosipater kin ranamau ong komail. <sup>22</sup> Iet ngai Tertius me intingiedier kisin likau wet, ranamau ong komail pan Kaun o. <sup>23</sup> Kaius me kin apapwali ia o momodisou, a ranamau ong komail. Erastus, sile pan kanim wet, a ranamau ong komail, o ri atail Kwartus. <sup>24</sup> Mak en atail Kaun Iesus Kristus en mimieta re omail karos! Amen. <sup>25</sup> A me manaman ong katinada komail duen ai rongamau, o duen padak iran Iesus Kristus, me kin kasaleda, me sota sansal sang nin tapin kua kokodo lel met, <sup>26</sup> A met a sansaledar, pwe kisin likau en saukop akan kaloki ong men liki kan karos duen kusoned en Kot ieias, pwe ren poson o peik; <sup>27</sup> I Kot eta me erpit, ringan en ko ong i ki Iesus Kristus kokolata! Amen.

## EN PAULUS A KISIN LIKAU KAI EU ONG MEN KORINT

<sup>1</sup> PAULUS me paeker, en wiala wanporon en Iesus Kristus amen pan kupur en Kot o ri atail Sostenes, <sup>2</sup> Ong momodisou en Kot me mi Korint, me saraiu kila Kristus Iesus, me paeker en saraiu o karos me kin likwir ong mar en atail Kaun Iesus Kristus ni deu arail o deu at. <sup>3</sup> Mak o popol sang ren Kot Sam atail o atail Kaun Iesus Kristus en mi re omail! <sup>4</sup> I kin danke ai Kot kaukaule pweki mak en Kot ong komail, me papanga dong komail sang ren Kristus Iesus, <sup>5</sup> Pwe komail me pai kidar i ni meakaros, ni masan karos o lolekong karos; <sup>6</sup> Duen kadede iran Kristus a tengiteng re omail; <sup>7</sup> Pwe sota pai en mak eu, me komail saik pai kidar; ni omail auiaui kasansal en atail Kaun Iesus Kristus. <sup>8</sup> Me pil pan kotin kasone komail di lao lel imwi, pwe en solar dip omail lao lel ni ran en atail Kaun Iesus Kristus. <sup>9</sup> Kot me melel, me komail paekerdo, pwen sau pena ren sapwilim a Ol Iesus Kristus atail Kaun. <sup>10</sup> Ri ai kan, i panau komail ni mar en atail Kaun Iesus Kristus, komail en wiaki eu ni omail kasoi kan, pwe komail de wuki pasang nan pung omail, a komail en mi ni lamalam ta pot o kapung ta ieu. <sup>11</sup> Ri ai kan a kalok dong ia sang toun im en Kloe, me dene komail kin akamai pena nan pung omail. <sup>12</sup> A iet me i men inda, amen komail kin inda: Ngai nain Paulus amen; a ngai nain Apolos amen; a ngai nain Kepas amen; a ngai nain Kristus amen. <sup>13</sup> Iaduen, Kristus me lop pasang? Iaduen, Paulus me lopu kin komail er? De komail paptaisekier ni mar en Paulus? <sup>14</sup> Ngai me danke Kot, me sota meamen re omail, me i paptaisela, Krispus eta o Kaius; <sup>15</sup> Pwe amen de inda, me ngai wia paptaise ong ni pein ad ai. <sup>16</sup> A toun im en Stepanas i pil paptaisela; a solar me i asa, me i paptaisela. <sup>17</sup> Pwe kaidin en wia paptais, me Kristus poron kin ia la, a pwen padaki rongamau, kaidin ni tiak kadek lokaia, pwe lopun Kristus de mal la. <sup>18</sup> Pwe masan duen lopu me mal kot ren me lokidokilar akan, a manaman en Kot ong ir, me pan dorela. <sup>19</sup> Pwe a intingidier: I pan tiakedi lolekong en me lolekong kan, o karotongala marain en me marain akan. <sup>20</sup> Ia me lolekong o? O ia saunkawewe o? Ia me lolekong o en pali pa? Dadue, Kot sota wia lamponki me erpit en pali pa? <sup>21</sup> Aramas akan sota asa Kot pweki udan ar lolekong. Kot ap kupureda, en kamaur kida, me poson akan padak mongai. <sup>22</sup> Pwe Sus akan kin poeki kilel akan, a men Krik kin roporop lolekong. <sup>23</sup> A kit kin padaki Kristus

me lopuedar, men kamakar ong Sus akan o ong men liki kan kasoi mal. <sup>24</sup> A ong me paeker akan, men Sus o pil men Krik, se kaweweda Kristus manaman en Kot o erpit en Kot. <sup>25</sup> Pwe soerpit en Kot me sikida sang en aramas akan ar lolekong, o luet en Kot me kelail sang en aramas akan ar kelail. <sup>26</sup> Ri ai kan, komail kilang duen omail paeker. Pwe kaidin me toto ren me lolekong en pali udok kan. Pil kaidin me toto ren me poe kan, pil kaidin toto ren me masamas akan, me pilipildar. <sup>27</sup> A Kot kotin piladar me so lolekong nin sappa, pwen kapouiala me lolekong kan; o Kot me kotin piladar me luet nin sappa kan, pwen kapouiala me kelail akan. <sup>28</sup> O me mal nin sappa, o me so konekon, i me Kot kotin piladar; o me sota meakot, pwen kawela me lapalap. <sup>29</sup> Pwe udok der aksuaiki mon Kot. <sup>30</sup> A komail tapi sang i ren Kristus Iesus, me wialar atail erpit sang ren Kot, o pung, o saraiu, o maur patail. <sup>31</sup> Pwe duen a intingidier: Me men suaiki, i en suaiki Kaun o.

## 2

<sup>1</sup> RI ai kan, ni ai pwara wong komail er, kaidin ni kadek lokaia de lolekong en aramas, me i padaki ong komail er kadede en Kot. <sup>2</sup> Pwe i sota wia kin ia, en asa meakot nan pung omail, Iesus Kristus eta o a kalopuela. <sup>3</sup> O ngai mimi re omail ni ai luet, o masak, o rerer toto. <sup>4</sup> O ai kasoi o ai padak kaidin ni kadek lokaia en lolekong, a ni kadede en Ngen o manaman. <sup>5</sup> Pwe omail poson de paseoneki lolekong en aramas akan, a manaman en Kot. <sup>6</sup> Ari so, me kit kin padapadaki me lolekong ren me unsok kan, a kaidin lolekong en sappa et, o pil kaidin en saupeidi kan en sappa et, me pan sarodi, <sup>7</sup> A kit kin padaki duen erpit en Kot me rir, iei me so sansal, me Kot kotin kileledier ni en sappa saik mia, pwen kalinganada kitail, <sup>8</sup> Me sota saupeidi en sappa men asadar, pwe ma re asaer i, re sota pan kalopuela Kaun en lingan. <sup>9</sup> A duen a intingidier: Me sota mas eu udialer, o me sota salong eu rongadar, o me sota ko ong nan mongiong en aramas amen, iei me Kot kotin kaonop ong, me pok ong i. <sup>10</sup> A Kot kotin kadiarok ong kitail ki Ngen e, pwe Ngen kin kotin rapaki meakaros, pil duen kupur en Kot. <sup>11</sup> Pwe is aramas, me kin asa duen lol en aramas akan, pwe ngen en aramas eta me mi re a? Iduen Kot, sota me asa meakan me udan Kot, pwe Ngen en Kot eta. <sup>12</sup> A kaidin ngen en sappa, me kit aleer, a Ngen en Kot, pwe kit en asada meakan, me Kot kotiki ong kitail er. <sup>13</sup> I me kit pil kin padaki wei, kaidin ni lokaia o mangin pan lolekong en aramas, a ni masan akan, me Ngen kotin kaweweda, kareda dipisou ngenin akan. <sup>14</sup> A aramas ip pwel sota kin



ale meakot ren Ngen en Kot, pwe me mal kot ong i, pwe a sota kak ong, pwe mepukat kin kasauiaada ren Ngen. <sup>15</sup> A me ngenin kin kasauiaada meakaros, ap sota amen me pan kak kasauiaada i. <sup>16</sup> Pwe is me asa duen kupur en Kaun o, de is me pan kak padaki ong i meakot? A Ngen en Kristus kotikot lol atail.

### 3

<sup>1</sup> ARI ri ai kan i sota kak padaki ong komail dueta ong aramas ngenin, a ong me uduken o kisin seri en Kristus akan. <sup>2</sup> I kamanga kin komail pil en didi, a kaidin kisin manga, pwe komail saikenta kak ong, o komail pil sota kak ong ansau wet. <sup>3</sup> Pwe komail non uduken pwe iaduen, ma peirin o akamai, mi re omail, komail so uduken o weweid ni tiak en aramas akan? <sup>4</sup> Pwe amen kin inda: Ngai nain Paulus amen, a amen: Ngai nain Apolos amen. Komail so kin mi nin tiak en aramas? <sup>5</sup> Pwe is Apolos? O is Paulus, kaidin papa kai, me komail asa sanger lamalam duen Kaun o kotin pang ong amen amen? <sup>6</sup> Ngai me padukedier, a Apolos me kalamu ir adar, a Kot me kotin kaparadar. <sup>7</sup> Ari kaidin i meakot, me padukedi, pil kaidin i, me kalamu ir adar, a Kot eta, me kotikidar wa kan. <sup>8</sup> Ari, me kin padukedi o me kin kalamu ir adar, ira dupeneta, o amen pan katingki iran ara dodok. <sup>9</sup> Pwe kit me sauas pan dodok en Kot, a komail sapasap en Kot, o sapwilim en Kot a kakau im. <sup>10</sup> Ngai me wiadar pason ki mak en Kot me i aleer duen sause lolekong amen, a amen usewei kakau poa, a amen amen en kalaka duen a kakau pon pason wet! <sup>11</sup> Pwe sota me pan kak wia eu pason, me pan toror sang me wiauiet, i eta: Iesus Kristus. <sup>12</sup> Ari, ma amen pan kauada pon pason wet kold, silper, takai, kasampwal, tuka, ra, pain kit akan, <sup>13</sup> Nan wiawia en amen amen pan sansaleda, pwe ran o pan kapareda due, pwe a pan kadiarok kida kisiniai. Pwe kisiniai pan kasaleda wiawia en amen amen. <sup>14</sup> Ma wiawia en amen, me a kauadar poa, pan mimieta, a pan kating. <sup>15</sup> A ma wiawia en amen pan rongala, a sota pan kating. A pein i pan dorela duen amen, me pitila sang nan kisiniai. <sup>16</sup> Komail sota asa, me komail tanpas en Kot, o Ngen en Kot kotikot lol omail? <sup>17</sup> A ma amen kawela tanpas en Kot, nan Kot pan kawela i, pwe tanpas en Kot me sarau, ari iei komail. <sup>18</sup> Sota amen en kotaue pein i! Ma amen nan pung omail lamelame ansau wet, me a lolekong, mak eta, en wiala ol pweipwei men, pwen wiala lolekong amen. <sup>19</sup> Pwe lolekong en sappa et me song en pweipwei ren Kot, pwe a intingidier: A kin kaloe kidi me aklolekong pein ar widiwiding. <sup>20</sup> Pil eu! Kaun o kotin mangi, lamalam en me aklolekong

kan, me mal. <sup>21</sup> Ari, sota amen en akkeleki aramas akan, pwe omail meakaros; <sup>22</sup> Ma Paulus, de Apolos, de Kepas, de sappa, de memaur, de mela, de ma men met, de men mur, pwe karos me omail. <sup>23</sup> A komail sapwilim en Kristus, a Kristus sapwilim en Kot.

### 4

<sup>1</sup> ARAMAS akan en wia kin kit papa en Kristus o saunkoa pan me rir akan ren Kot. <sup>2</sup> A iaduen saunkoa kan? Amen amen en lelapok. <sup>3</sup> I sota insenoki, me komail de kapung en aramas kasau ia da. Pein ngai pil sota kasau ia da. <sup>4</sup> Pwe sota me i pein asa, a kaidin met, me i pung kila, a Kaun o me kin kasau ia da. <sup>5</sup> Ari, komail depa kasau okotme mon a ansau, a lao Kaun o pan kotido, me pan kasansale dang marain okiok en me rotorot akan o kadiarokada lamalam en nan mongioing akan, amen amen ap pan indandeki ren Kot. <sup>6</sup> Ri ai kan, mepukat i kin inda duen ngai o Apolos, pwe komail en ale sang kit, pwe amen ender lamelame, me a siki sang me intingidier, pwe komail ender aklapalapati amen, ap palian me teio. <sup>7</sup> Pwe is me mone kin uk? A sota, me mi re om, me koe sota aleer. A ma koe aleer meakaros, menda koe kin suaiki, likamata koe sota aleer? <sup>8</sup> Komail medier o kapwapwalar, o komail kin kaunda, ap sota ale sang kit. I men, komail en kaunda, pwe kit ap pil pan iang komail kaunda. <sup>9</sup> Pwe i lamelame, me Kot kotin wiaei ong kit wanporon akan, en tikitik melel, me mau ong mela, pwe kit wialar men kapuriamui eu ni sappa mon tounlang o aramas akan. <sup>10</sup> Kit me song en pweipwei pweki Kristus, a komail me lolekongki Kristus; kit me luet, a komail me kelail; komail me indand mau, a kit me indand sued. <sup>11</sup> Kokodo lel auer met kit men mangadar, o pil men nim piladar, o kiliso, o se kin kalokolok, o sota deu at. <sup>12</sup> O dodok ni pein pa at; kit me kalok sued, a se kin kapaiada, kit me kalokolok, a se kin nenenla; Ni at pakaraun mal, kit kin kapakap. <sup>13</sup> Kit wialar tatan kid o kopataun aramas karos. <sup>14</sup> I intingidier mepukat kaidin pwen kanamenok komail, a pwen panau komail nai seri kompok kan. <sup>15</sup> Pwe ma omail saunpadak pan Kristus me nen, nan sam omail akan me sota non toto, pwe ngai me kaipwi komail ren Kristus Iesus ki rongamau. <sup>16</sup> I ari poeki re omail komail en idauen ia do. <sup>17</sup> Pwe i me i kadarki wong komail Timoteus nai seri kompoke o lelapok pan Kaun o pwen kataman kin komail duen al ai kan pan Kristus, duen me i kawewedar ni momodisou karos. <sup>18</sup> Akai komail me aklapalap likomata i sota pan pwar wong komail. <sup>19</sup> A i pan pwar wong komail madang, ma Kaun o pan kotin kupura. I ap pan

kilang kaidin padak en me aklapalap akan, a me manaman. <sup>20</sup> Pwe wein Kot sota mi ni kasoi a ni manaman. <sup>21</sup> Da me komail mauki? I en pwar wong komail wa sokon, de limpok o ngen en opampap?

## 5

<sup>1</sup> I PIL rongadar, me nenek kin wiaui nan pung omail. A eu song en nenek, me sota kin wiaui ren men liki kan; pwe dene amen paudeki en a papa a paud. <sup>2</sup> A komail me aklapalap, ap sota insen suedeki o kasapokela sang komail, me wiadar met. <sup>3</sup> A ni ai doo sang komail ni pali war, ap koren iong komail ni pali ngen i iet me i kapungadar, dueta amen, me mi re omail, <sup>4</sup> Ni mar en atail Kaun Iesus, ni atail pokon pena re omail ni pali ngen atail, ki manaman en atail Kaun Iesus. <sup>5</sup> Me wiadar met i pangalang Satan, pwen kawela uduk o, pwe ngen o en kamaurela ni ran en Kaun Iesus. <sup>6</sup> Kaidin me mau omail suaiki. Komail sota asa, me kalap kis kin kamutala dolepa karos? <sup>7</sup> Ari, kokowei sang kalap kitai, pwe komail en wiala plaua amas kap, pwe komail udan plaua amas kap, pwe atail pasa Kristus kamatalar. <sup>8</sup> Kitail ari en wiada atail pasa, kaidin ni kalap kitai, pil kaidin ni kalap lemai de me sued, a ni plaua amas kap ni pung o melel. <sup>9</sup> Ngai inting wong komail er nan kisin likau o, pwe komail ender waroki ong me nenek kan. <sup>10</sup> Ari mepukat i sota kin inda duen me nenek ren men liki kan, de me norok kapwa, de me lolap akan, de me wun ani, pwe ma idue, komail en katoror wei sang sappa. <sup>11</sup> A met i inting wong komail er ender waroki ong amen, me adaneki saulang, ap nenek, de me norok kapwa, de kati ani mal, de lalaue amen, de kamom soko, de me lolap; komail ender iang i manga. <sup>12</sup> Pwe menda re i men liki? Kaidin ai dodok en kadeik irail ada. Komail sota kin kadeikada nan pung omail? <sup>13</sup> A me mi liki ko, Kot pan kotin kasapoke wei sang re omail me sued o!

## 6

<sup>1</sup> A MA amen wia sapung ong amen, menda komail kapung pena mon men liki kan, a so mon me sarau kan? <sup>2</sup> De komail sota asa, me sarau kan pan kadeikada sappa? A ma sappa pan pakadeikeki komail, iaduen, komail sota itar ong kadeikada kisin dodok tikitik kan? <sup>3</sup> Komail sota asa, me kitail pan kadeikada tounlang kan? Nan melel kaulap pil kisin tiak tikitik en maur et. <sup>4</sup> A ma komail kin kadeikeki tiak en maur et iaduen, komail kin kapukapung iangaki me sota indant mau ren momodisou? <sup>5</sup> Mepukat i indai ong komail, pwen kanamenok komail. Pwe sota amen re omail, me lolekong? Sota amen me

itar ong en wiada kapung nan pung en ri a kan? <sup>6</sup> A amen kin akamai ong amen ri a mon me sopoison akan. <sup>7</sup> Ari, omail akamai nan pung omail pil udan sapung. Menda komail sota mueidala meakot? Menda komail sota kin nenenla? <sup>8</sup> A komail kin sapung o kotaue ong ri omail akan. <sup>9</sup> De komail sota asa, me sapung kan sota pan sosoki wein Kot? Kalaka pein komail! Pwe me nenek de me kati ani likam akan, de me kamal, de me dir en inong sued, de me madong saut ong ol oko. <sup>10</sup> De men pirap, de me norok kapwa, de kamom soko, de kinekin mal, de kuli kapwa kan sota pan sosoki wein Kot. <sup>11</sup> Iduen akai komail mas o, a met komail wideudier, o kasarauialar, o pung kilar mar en Kaun Iesus o Ngen en atail Kot. <sup>12</sup> A mui ong ia mekaros, a kaidin karos me kin kamau ia la; a mui ong ia mekaros, a sota, me pan poe ia di. <sup>13</sup> Melel, kisin manga me mau ong kaped o, o nan kapedi wasan kisin manga en ko ong ia. A Kot pan kotin kawewi ira la karos. A pali war o wiaui ong Kaun o, a kaidin ong nenek, a Kaun kotin apapwali pali war o. <sup>14</sup> A Kot me kotin kaiasadar Kaun o, a pil pan kotin kaiasa kida kitail manaman. <sup>15</sup> Komail sota asa, me war omail kokon en Kristus? A iaduen, i en ale kokon en Kristus, wia kin ir kokon en li nenek amen? O so! <sup>16</sup> De komail sota asa, meamen me waroki ong li nenek amen, me ira pan wiala war ta ieu? Pwe a kotin masanier: Ira pan wiala uduk ta ieu. <sup>17</sup> A me waroki ong Kaun o nan a pan ngen ta ieu re a. <sup>18</sup> Komail tange wei sang nenek, pwe dip karos, me aramas kin wia, kin wiaui likin war a, a me kin nenek, kin wiada dip ong pein war a. <sup>19</sup> De komail so asa, me war omail tanpas en Ngen sarau me kotikot lol omail, me komail aleer sang ren Kot, a kaidin uta 'mail komail. <sup>20</sup> Pwe komail neti kidar pai eu, komail ari kalinganada Kot ki war omail.

## 7

<sup>1</sup> A IET duen me komail intingie dong ia, a mau ong aramas amen, a ender sair li amen. <sup>2</sup> Ari so, amen amen en ale pein a warok li, o amen amen en ale pein a warok ol, pwen der dender. <sup>3</sup> Ol o en wiaui ong a warok li me inen, a pil dueta li ong a warok ol. <sup>4</sup> Li o sota kak poedi pein war a, a a warok. Pil dueta ol o sota kak poedi pein war a, a a warok. <sup>5</sup> Der so oke amen amen, ma so, pweki inau ansau kis, pwen mot isesol rer ekis o kapakap, ap pur pena, pwe Satan de kasongesong komail omail so oke pena. <sup>6</sup> Mepukat kaidin kusoned eu, pwe pein ai lamelam. <sup>7</sup> A i men aramas akan karos en dueta ngai. A amen amen aleer pein a pai en mak sang ren Kot duen amen amen. <sup>8</sup> A ngai indai ong me so papaud o li odi kan, me mau

irail en dadaur dueta ngai. <sup>9</sup> A ma irail sota kak ong, irail en papaud; me mau papaud sang dender. <sup>10</sup> O ong me papaud akan ngai me ilaki wei, a kaidin ngai pwe Kaun o: Li papaud ender kamuei wei sang a warok! <sup>11</sup> A ma a muei wei sanger; i en dadaurata a kirip de kadeke a warok, o ol ender kasela a warok. <sup>12</sup> Kaidin Kaun o, pwe ngai men indang me tei kan: Ma ri atail ol amen mia, me a paud soposon amen, ap men mimieta re a, a ender kasela li o. <sup>13</sup> Pil dueta li amen, ma a warok soposon amen o a men mimieta re a, a ender kasela ol o, <sup>14</sup> Pwe ol soposon me kasaraui kilar li o, o li soposon kasaraui kilar ol o, pwe ma a so due met, noumail seri kan me samin, a met irail me sarau. <sup>15</sup> A ma me soposon o pan muei wei sang, ari i en muei wei sang; ri ol de ri li sota kin kaupindi ni mepukat. A Kot me kotin molipe kitail, pwen popol pena. <sup>16</sup> Pwe iaduen, koe li o, koe asa, me koe pan kak kamaurela ol o? De koe ol, koe pan kamaurela li o? <sup>17</sup> A duen Kaun o pang ong amen amen, duen Kot molipe ong amen amen, iduen dadaurata; nan iduen ngai ilakilang momodisaur akan karos. <sup>18</sup> Ma amen me paeker ni sirkomsais, i en dadaurata a sirkomsais, a ma amen me paeker ni sosirkomsais, i ender iang sirkomsais. <sup>19</sup> Pwe kaidin meakot sirkomsais, o pil kaidin meakot sosirkomsais, a wiawia kusoned en Kot akan. <sup>20</sup> Amen amen en dadaurata udan a koa ni a paeker. <sup>21</sup> Ma koe paeker ni om ladu, koe der insensuedeki, a ma koe pan kak maioda sang, ari pil me mau. <sup>22</sup> Pwe ladu men, me paeker ong Kaun o, nan a maio ren Kaun o; o pil dueta me maio men paeker ap pan ladun Kristus men. <sup>23</sup> Komail me neti kidar pai eu, der wiala ladun aramas akan. <sup>24</sup> Ri ai kan, amen amen dadaurata ut arail ren Kot. <sup>25</sup> A duen peinekap akan, sota kusoned eu sang ren Kaun o; a pein ai lamelam mia, pwe i aleer mak en Kaun, pwen kak melel. <sup>26</sup> Iet me i lameda, me mau ong aramas sota papaud, pwe ni ansau apwal wet. <sup>27</sup> Ma koe kapapaud ong li amen, ender men muei sang, a ma so om paud mia, ender rapaki li amen. <sup>28</sup> A kaidin dip eu, ma koe pan papaud; o ma seripein amen pan papaud, kaidin dip. A a pan apwal ong mepukat ni pali uduk arail. A ngai sota men, me apwal kot en lel ong komail. <sup>29</sup> A ri ai kan, mepukat i indada, pweki ansau o me motomot. A pil eu: Me mau ong me ar warok mier, en wia dene sota ar warok; <sup>30</sup> O me kin sangesang, dene sota sangesang; o me kin pereperen, dene sota ar peren; o me kin netinet, dene sota ar kapwa. <sup>31</sup> O me dodokki sappa, ren kalaka, pwe eder wiaki me sued. Pwe mom en sappa et pan rosala. <sup>32</sup> A i men, komail ender lodi ong me apwal. Me sota papaud, kin apwali me sapwilim

en Kaun o, duen a pan kaperenda Kaun o. <sup>33</sup> A me papaud, kin lamelame, me kon ong sappa, duen a pan kaperenda a paud. <sup>34</sup> A nan pung en li papaud o peinekap me wuk pasang: Me sota papaud, kin apwali me sapwilim en Kaun o, pwen sarau ni pali war o pil ni pali ngen; a me papaud, kin inong iong me kisan sappa, duen a pan kak kaperenda a warok. <sup>35</sup> Mepukat i inda wei, pwen kamaui komail, a kaidin pwen saliedi komail, a pwen sauasa komail, pwe karos en inen o pung re omail, o pwe komail en papa Kaun o. <sup>36</sup> A ma amen lamelame, me sapung, ma a sota pan mued ong na seripein, me mau ong papaud, en papaud; ari, a pan wia duen me a mauki, pwe kaidin dip, ma a pan mued ong i en papaud. <sup>37</sup> A ma amen me kelai ni mongiong i, pil kelail ong kaunda, pein insen a, ap inauki ong nan mongiong i en kolekol na seripein, i me mau. <sup>38</sup> Ari, ma amen pan papaud me mau, a ma amen sota pan papaud, me mau sang. <sup>39</sup> Li papaud amen me kaupina kidi pung en papaud arain a warok memaur; a ol o lao mela, nan a maio ong kapapaud, me a mauki, i eta; a en wiaui ren Kaun. <sup>40</sup> Meid pai, ma a pan dadaurata a kirip duen me i lameda, A ngai asa, me Ngen en Kot pil kotikot re i.

## 8

<sup>1</sup> A kitail asaer duen mairong ong ani mal, pwe kitail karos me lolekong. A lolekong eta kin kaaklapalapiela, a limpok kin kamauiela. <sup>2</sup> A ma amen aklapalapaki a lolekong, nan a sota non dedeki duen me itar ong en asa. <sup>3</sup> A ma amen pok ong Kot, nan Kot me mangi i. <sup>4</sup> A kitail dedekier duen manga uduk en mairong ong ani mal akan, pwe ani mal amen sota katempa nin sappa, o sota amen Kot, pwe i me ta men. <sup>5</sup> Pwe ma akai mia, me adane ki kot, me kin mimi nanlang de nin sappa, pwe kot toto o monsap toto mia; <sup>6</sup> A atail Kot me ta men, me Sam, me dipisou karos tapi sang re a, o me kitail wiaui ong. O atail Kot me ta men: Iesus Kristus, me wiadar meakaros, o me kitail pil wiaui kidar i. <sup>7</sup> A kaidin karos me asa mepukat, pwe akai mia, me lamelame, me ani mal meakot, ap kangang uduk en mairong ong ani mal, o iei insen luet arail kin samin kila. <sup>8</sup> A kisin manga sota kin sauasa kitail ren Kot. Ma kitail sota pan manga, kitail sota pan sued kila, a ma kitail pan manga, kitail sota pan mau kila. <sup>9</sup> A kalaka komail, pwe omail saladokalar ender kadipikelekel ong me luet akan! <sup>10</sup> Pwe ma koe, me asa tiak, ap mangamanga nan im en ani mal o, a me luet amen pan kilang om mangamanga, ap aima kida nan insen a, ap iang mangamanga mairong en ani mal akan, <sup>11</sup> Iduen ri atail luet amen, me

Kristus mata kilar, pan mekila om saladok. <sup>12</sup> A ma iduen omail dip iong ri atail akan, me kin kawela insen luet arail, nan komail kin wia dip iong Kristus. <sup>13</sup> Ari ma kisin manga kamakar ri ai, i solar pan manga uduk kokolata, pwe i de kamakar ri ai.

### 9

<sup>1</sup> KAIDIN ngai maiodar? Kaidin wanporon amen ngai? I sota udialer Iesus atail Kaun? Kaidin ai wiawia pan Kaun o komail? <sup>2</sup> Ma i sota wanporon amen ong me tei ko, a ong komail; pwe komail kasale pan ai koa en wanporon pan Kaun o. <sup>3</sup> Iduen i kin sapengki, ma meamen kin kalelapok re i. <sup>4</sup> A sota muei ong kit er, en manga o nim? <sup>5</sup> A sota muei ong kit er, en paudeki li amen, me pan iang kit sailok sili, duen me wanporon tei kan, o ri en Kaun o, o Kepas kin wiada? <sup>6</sup> De ngai o Parnapas eta me a sota muei ong liki sang dodok en pa at? <sup>7</sup> Is me kin iang mauin ap pwain pein i? Is me wiada mat en wain eu, me sota kin kang kisan wa? Is me kin kamanga pwin man akan me sota kin kang pil en didi en man oko? <sup>8</sup> Mepukat i sota kin inda nin tiak en aramas akan, pwe kaidin kapung o me pil masanier due? <sup>9</sup> Pwe a intingidier nan kapung en Moses: Koe der pira pena au en kau ol amen, me kin tiaka pasang korn. Iaduen, Kot kin apapwali kau ol akan? <sup>10</sup> De kaidin pweki kit, me a kotin masaniekier mepukat? Pwe me kin sapesap, en kaporoporeki a dodok; o me kin dolung en kaporoporeki, me a pan iang ale kisan wa. <sup>11</sup> Pwe ma kit wiai ong komail sapesap ngenin, a kaidin me kasampwal kot, me komail pan apwali kit ni pali uduk. <sup>12</sup> A ma a muei ong me tei kan, ale sang omail dipisou kan, nan kit me so mau ong sang irail? Ari so, kit sota kol ong kit tiak wet, a se men mia ni at apwal akan, pwe sen de karompwa rongamau en Kristus. <sup>13</sup> Komail sota asa, me irail, me sosisokki sarau, pil mangamanga sang nan im en kaudok, o me irail, me kin papang pei sarau, pil aleki pwais ar sang pei sarau? <sup>14</sup> Iduen Kaun o kotin masani, me irail, me padaki rongamau, pil pan mangaki rongamau. <sup>15</sup> A ngai sota kin kol ong ia eu ren mepukat, o i sota inting wei mepukat, pwe komail en kapwai ong ia mepukat, pwe a mau ong ia en mela, mon amen pan kawela mar ai. <sup>16</sup> Pwe ma i padaki rongamau, sota me i en suaiki, pwe i en udan wiada; pwe sued ong ia, ma i sota padaki rongamau. <sup>17</sup> Pwe ma i peren kida dodok wet, i pan ale kating, a ma i kang wiada, nan kusoned mia, i en wiada. <sup>18</sup> Ari, ia kating pai ni ai padaki rongamau ap sota pwaipwai, pwe i ender akapwaiwai sang rongamau meakot. <sup>19</sup> Pwe ngai me udan maiodar sang amen amen, ari so,

i wia kin ia ladun amen amen, pwe i en kamaurela me toto duen i kak ong. <sup>20</sup> I wia kin ia Sus amen ong Sus akan, pwen kamaurela Sus akan; o ong irail, me mi pan kapung, dueta pan kapung amen, pwen kamaur ir ala, me mi pan kapung; ari so, ngai solar mi pan kapung. <sup>21</sup> Ong irail me sota mi pan kapung, i wia kin ia me sota mi pan kapung amen; ari so, kaidin ngai me likin kapung mon Kot, pwe i kin mi pan kapung en Kristus, pwen kamaurela me sota mi pan kapung. <sup>22</sup> Ong me luet akan, i wia kin ia me luet amen, pwen kamaurela me luet akan. Ngai wiala song karos ong amen amen, pwen kamaurela akai wasa karos. <sup>23</sup> I me i kin wiawia pweki rongamau, pwe i en iang i pwaisaiski. <sup>24</sup> Komail sota asa, duen men weir en tang, irail karos kin tang, a amen ta, me pan ale pai? Komail ari en tang idipok, pwe komail en ale. <sup>25</sup> A amen amen me aktang idipok, kin isesol pokon. Irail kin wia me, pwen ale mar kamong a kitail, pwen ale me so kamong. <sup>26</sup> Ngai ari aktang sopuiok; ngai kin pepe, a kaidin dueta me woki nan wawa; <sup>27</sup> Pwe i kin sok pon war ai, pwen katengedi, pwe i de padaki ong akai, ap pein lokidokila.

### 10

<sup>1</sup> PWE ri ai kan, i men, komail en asa duen sam atail akan, me mi pan palin dapok eu o kotela madau o. <sup>2</sup> Irail karos ap paptais ong Moses ni palin dapok o ni madau o. <sup>3</sup> O karos tungoler sak ngenin, <sup>4</sup> O karos nim sang pil ngenin; pwe irail nim sang paip ngenin, me kotikot re 'rail, iei paip o Kristus. <sup>5</sup> A me toto re 'rail, me Kot sota kak kupuramauki, pwe irail lokidokilar nan sap tan. <sup>6</sup> A mepukat wiaui, pwe kitail de kaalemongi, pwe kitail ender inong iong me sued akan duen irail inong iong. <sup>7</sup> Komail pil ender kati ani mal due irail, duen a intingidier: Aramas pukat mondi penang nam o nim ap uda madomadong. <sup>8</sup> Kitail pil der wia nenek, duen me akai irail wiadar, ap rianen silekid mekilar ni ran ta ieu. <sup>9</sup> Kitail pil der kasongesong Kristus, duen akai irail kasongesong i, ap mekilar serpent kai. <sup>10</sup> Komail pil der lipaned, duen akai ir lipanededar, ap kame kilar men kamekam men. <sup>11</sup> Mepukat karos wiaui ong irail men kaalemongi; ap intingidier, pwe men panau kin kitail, pwe kitail leler imwin kaua. <sup>12</sup> Ari ma amen lamelame, me a kasinenda, en kalaka pein i, pwe a de pupedi. <sup>13</sup> Sota songesong eu lel ong komail, i eta, me aramas itar ong, pwe Kot me melel, me sota kin mueid ong komail songesong eu, me komail sota itar ong. A ni songesong a pan kotin kainwisokela, duen me pan kak pa omail <sup>14</sup> Ari kompoke pai kan, komail tange sang kati ani mal! <sup>15</sup> Mepukat i indai

ong komail, pwe komail me lolekong; a pein komail kasauiaada, me i inda. <sup>16</sup> Dal en pai me kit kin kapaiada, kaidin i dal en atail saupena ren ntan Kristus? O prot me kit kin pilitiki pasang, kaidin i atail saupena en war en Kristus? <sup>17</sup> Pwe kitail me toto me lupon ta ieu, o war ta ieu, pwe kitail karos tungole sang lupon ta ieu. <sup>18</sup> Komail kilang Israel pali uduk. Irail me kin kang sang mairong, kaidin irail pil minimini ong pei sarau? <sup>19</sup> A da me i en inda? I en inda me mairong ong ani mal meakot? De dikedik en ani mal meakot? <sup>20</sup> A karos me men liki kan mairongki, re kin mairongki ong tewil akan a kaidin ong Kot. A i sota mauki, komail en minimin ong tewil akan. <sup>21</sup> Komail sota kak nima sang dal en Kaun o pil sang dal en tewil akan; komail sota kak iang tepel en Kaun o pil tepel en tewil akan. <sup>22</sup> De kitail en palian Kaun o? Kitail me kelail sang i? <sup>23</sup> A muei onger meakaros, a kaidin karos me kin kamaula; a muei onger meakaros, a kaidin karos me kin kapungla. <sup>24</sup> Sota amen me pan apwali pein a dipisou, a en amen. <sup>25</sup> Karos me kin netila nan wasan netikila uduk, komail kang, ap der kalelapok duen song ar, pwe komail der katoutouki insen omail. <sup>26</sup> Pwe sapwilim en Kaun sappa o audepa kan. <sup>27</sup> A ma amen, me soposon pan luke komail, en toun kapara kamadip, o ma komail men iang, ari, karos me pan nek ong komail, komail en kang, ap der kalelapok duen song a, pwe komail der katoutouki insen omail. <sup>28</sup> A ma amen pan indang komail: Met kisan mairong en ani mal, komail der kang pweki i, me kasaledar, pwe komail der kawela insen arail. <sup>29</sup> A met i solar inda duen pein insen om a duen insen en amen. Pwe menda insen en amen pan kasauiaada ai saladokelar? <sup>30</sup> Pwe ma i iang kang ki danke, menda i en kalok sued, pwe i tungole ni ai danke? <sup>31</sup> Ari, ma komail kang de nim de wia meakot, komail en wia meakaros, pwen wauneki Kot. <sup>32</sup> Komail der kadipikelekel men Sus, de men Krik, de momodisou en Kot, <sup>33</sup> Duen i kin pok ong amen amen ni ai wiawia kan karos, o so moneki me pein ai, pwen sauasa me toto, pwe irail en dorela.

## 11

<sup>1</sup> KOMAIL idauen ia do duen i kin idauen Kristus. <sup>2</sup> I kin kapingaki komail omail tamataman ia ni meakan karos, o dadaurata pung kan, duen i kakalikidi ong komail er. <sup>3</sup> A i men, komail en asadar, me Kristus tapwin ol akan, a ol me tapwin li, a Kot me tapwin Kristus. <sup>4</sup> A ma amen amen ren ol akan wia kapakap de kokop ap lisoropedi, a kin kasuedeki pein mong a. <sup>5</sup> A ma li amen wia kapakap de kokop, ap sota lisoropedi, nan i kin kasuedeki pein mong a, pwe a

rasong me pit en mong a seisei sang. <sup>6</sup> Pwe ma li amen sota lisoropedi, en koteda, a ma a kanamenok li en kotedar o kotokot, i en pwaindi mong a. <sup>7</sup> A ol o ender lisoropedi, pwe i me kasansal o lingan en Kot, a li o me lingan en ol o. <sup>8</sup> Pwe ol so tapi sang li, a li sang ol o. <sup>9</sup> Pwe ol sota wiaui ong li, a li wiaui ong ol o. <sup>10</sup> I me li o en kida manaman eu pon mong a pweki tounlang kan, <sup>11</sup> Ari so, li amen sota kak mia, ma sota li, a mepukat ren Kaun o. <sup>12</sup> Pwe duen li o a tapi sang ol, iduen ol o wiaui kida li, a karos wiaui ren Kot. <sup>13</sup> Komail en pein kasauiaada, ma a sansal mau, ma li amen kapakap ong Kot, ap so lisoropedi. <sup>14</sup> De pein komail asa, me kanamenok pan ol, ma a pwilipepei. <sup>15</sup> A lingan en li a kusonededa mepukat i sota kin kapinga omail pokon pena, me sota kin kamaui a kasuedeki komail, <sup>18</sup> Pwe ni omail pokon pena nan momodisou, i rongadar, me komail kin liak toror pasang, o i mur kamelele. <sup>19</sup> Pwe komail en liak toror pasang, pwe me pung kan en sansal kida re omail. <sup>20</sup> Komail lao pokon pena wasa kis, kaidin i sak kamadip en Kaun o. <sup>21</sup> Pwe ni kamadip toun kapar kin amatang mas, a amen men mangadar, a amen sokolar. <sup>22</sup> Sota im omail, wasa en manga o nim? De komail kin mamaleki momodisou en Kot o kanamenok ir ala, me sota ar tungol? Da me i en inda? I en kaping komail? Ni mepukat i sota pan kapinga. <sup>23</sup> Pwe i aleer sang ren Kaun o, me i pwiliki ong komail er, me Kaun Iesus pong ota en a pangala, a limada prot, <sup>24</sup> Murin a laolaoki, kamauiada, pilitiki pasang, masangi: Ale tungole war ai met et, me pilitiki ong komail, en wia, pwen katakataman kin ia. <sup>25</sup> A murin sak, a pil kotin limada dal masani: Dal wet iei inau kap, me wiaui kidar nt' ai. Pan pak en omail nima sang, komail wiaki men kataman kin ia. <sup>26</sup> Pwe pan pak en omail kang prot wet o nima sang dal wet, komail kasansaleda en Kaun a matala, lao a kotido. <sup>27</sup> Ari me kang prot wet o nim sang dal en Kaun o ap so war ong iei me dip iong war o ntan Kaun o. <sup>28</sup> Amen amen en kasauiaada pein i, ap kang sang prot o nima sang dal o. <sup>29</sup> Pwe me kang o nim sowar, kin kang o nim kadeik ong pein i, pwe a sota kasampwaleki war o. <sup>30</sup> Nan i me toto nan pung omail me luetalar o somaudar, o me toto mairedier. <sup>31</sup> Pwe ma kitail kasauiaada pein kitail, kitail sota pan pakadeikada. <sup>32</sup> A ma kitail pan pakadeikada, kitail pan kalokolok ren Kaun o, pwe kitail de iang men liki likidokila. <sup>33</sup> Ari ri ai ol akan, komail lao pokon pena

pwen sak, en papasan pena amen amen.  
<sup>34</sup> A ma amen men mangadar, i en manga mas nan im a; pwe komail de pokon penang kadeik o. A me lua kan i pan kapungala ni ai pwara wong.

## 12

<sup>1</sup> RI ai kan, i sota men, komail en sasa duen pwais ngenin akan. <sup>2</sup> Komail asaer, me komail tikidar men liki, ap kakalua ren dikedik en ani loteng akan, duen komail kakaluaer. <sup>3</sup> I me i men kaasa kin komail, sota amen, me lokaiaiki Ngen en Kot, kak kariaala Iesus. O sota amen me pan kak inda: Maing Iesus, ma so ren a Ngen sarau. <sup>4</sup> A pai en mak akan me wuki pasang, a Ngen me ta men. <sup>5</sup> O song en dodok me toto, a kaun me ta men. <sup>6</sup> O akai song en manaman mia, a Kot me ta men, me kotin wiawia meakaras ren amen amen. <sup>7</sup> A pwais en Ngen sarau me pang ong amen amen, pwen men kamauiada. <sup>8</sup> Pwe amen ereki masan en erpit ren Ngen, a amen masan en kaparok ren Ngen ota. <sup>9</sup> O ong amen, en poson, a ren Ngen ota, o ong amen pai kan, men kakekada me somau kan, a ren Ngen ota. <sup>10</sup> O ong amen, en wiada manaman, o ong amen, en deideikop, o ong amen, en kasau ngen akan, o ong amen, en lokaia ngil wuki pasang, o ong amen, en kawukila ngil akan. <sup>11</sup> A mepukat karos wiawian Ngen ota, nene ong amen amen duen kupur a. <sup>12</sup> Pwe duen war eu ta ap kokon toto mia, a kokon en war karos wiala war ta ta ieu, iduen Kristus. <sup>13</sup> Pwe Ngen ta ieu, me kitail paptaiseki ong war ta ieu, ma kitail men Sus de men Krik, ma ladu de me maioda, kitail karos me paptaiseki Ngen ta ieu. <sup>14</sup> Pwe war kaidin kokon ta ieu, pwe kokon toto. <sup>15</sup> A ma pat en na pan inda: Ngai kaidin kumut eu, o i me ngai sota kisan war; a iaduen, i me a sota pan kak kisan war o? <sup>16</sup> A ma salong o pan inda: Kaidin ngai kisan war o, pwe kaidin por en mas eu ngai; a iaduen, i me a sota kisan war o? <sup>17</sup> Ma war pokon por en mas eu, da me pan salong o? A ma war pokon pan salong o, da me pan tuma? <sup>18</sup> Ari, Kot me kotin kokon penang war ta ieu kasong akan, duen a kotin kupureda. <sup>19</sup> A ma kokon karos wiala kokon ta ieu, ia pan war o? <sup>20</sup> Ari, kokon akan me toto, a war o me ta ieu. <sup>21</sup> Por en mas eu sota kak indang kumut: Kaidin meakot re i koe; de pil tapwi sota kak indai ong pat en na kan: Kaidin meakot re i koma. <sup>22</sup> Pwe kokon en war kai likamata re me luet, a so, pwe re me kasampwal. <sup>23</sup> O kokon en war kai, me kitail kin lamelame, me re sota non mau, kitail kin apapwali sang me tei kan, o irail me sota non sansal mau, kitail kin kapwataki. <sup>24</sup> Pwe irail me sansal mau, sota kin mau ong en kapwataki. A Kot kotin

kapad pena war o kapwataki me luet oko sang me tei kan, <sup>25</sup> Pwe war de saparok pasang, a kokon akan en apapwali pena. <sup>26</sup> O ma kasang ta ieu matakada, kasang karos ap iang matakada; o ma kasang ta ieu pan kalinganada, kokon karos pan iang polauleki. <sup>27</sup> A komail war en Kristus o kokon akan amen amen duen pwais a. <sup>28</sup> A iet akan, me Kot kotiki ong momodisou: Kaieu wanporon akan, ap saukop akan, a kasilu saunpadak kan, ap me wiada manaman akan, ap pai kan men kakekada me somau kan, ap men sauasa, o saumas akan, o song en lokaia. <sup>29</sup> Iaduen irail karos me wanporon akan? Karos me saukop akan? Karos me saunpadak kan? Karos me men wia manaman akan? <sup>30</sup> Karos ar pai en mak kan, men kakekada me somau kan mi ren karos? Karos kin lokaia ngil pasang? Karos kin kasiriwuk lokaia? <sup>31</sup> A komail inong iong pai en mak lapalap akan, i ap pan kasale ong komail al apot, me mau sang mepukat karos.

## 13

<sup>1</sup> MA i asa lokaia en aramas akan o tounlang kan, ap sota limpok, nan i rasong ngil en mata mal de ngil en simpel. <sup>2</sup> O ma i asa deideikop o ereki me rir akan karos, o tiak kan karos, o ngai dir en poson, me itar ong en kamokid wei nana kan, ap sota limpok nan sota meakot ngai. <sup>3</sup> O ma i pan kisakisa wei ai dipisou karos, pwen katungoleki me samama kan, o ma i kida war ai, pwen karongala, ap sota limpok, nan sota katepa ong ia. <sup>4</sup> Limpok kin kanongama o kadek, limpok sota kin peirin limpok sota kin ak-momo o so keses. <sup>5</sup> A sota kin aklemai, a sota kin roporop ong pein i, a so serkailong, a sota kin depuk ong en amen a sued. <sup>6</sup> A sota kin peren me sapung, a a kin perenki me melel. <sup>7</sup> A kin kak pa meakaras, o kin poson karos, a kaporoporeki karos, o lolin ong meakaras. <sup>8</sup> Limpok sota pan tukedi, a deideikop akan pan tukedi, o lokaia kan pan sola, o lolekong pan kunla. <sup>9</sup> Pwe kitail me er pali ta, o kokop pali ta. <sup>10</sup> A lao kaun-sokala, me pali ta pan momela. <sup>11</sup> Ni ai seri i kin lokaia dueta seri amen o i lamelame dueta seri amen, o kasau dueta seri amen, a i lao wiala ol amen, i mui sang tau en seri. <sup>12</sup> Pwe ansau wet kitail kin irerong nan klas edied eu, a mur a pan sansal mau. Ansau wet i ekis lolekonglar, a mur i pan asa duen a asa ia. <sup>13</sup> Ari song silu pukot: Poson, kaporopor o limpok pan mimieta, a me lapalap re 'rail limpok.

## 14

<sup>1</sup> KOMAIL anane limpok, pil inong iong pai ngenin akan, a iet me kasampwal re 'rail, kokopada! <sup>2</sup> Pwe me kin lokaia kida

ngil en wai, kaidin aramas akan, me a kin lokaia ong, a ong Kot, pwe sota amen kin dedeki; ari so, ni ngen o a kin lokaia kida me rir akan. <sup>3</sup> A me kin kokop, kin padaki ong aramas akan, pwen kamau, o panau o kamait ir ala. <sup>4</sup> A me lokaiaiki ngil en wai, kin kamau pein i, a me kin kokop, kin kamau momodisou. <sup>5</sup> I men, komail karos en asa lokaia ki ngil toror, a mak eta, komail en kokopada, pwe me kin kokopada, me lapa sang me kin kaparok ki ngil toror, ma a so kak kasiriwukila, pwe momodisou en kamau kila. <sup>6</sup> Ari ri ai kan, ma i pwara wong komail, ap lokaia ki ngil toror, da katepa ong komail, ma i sota kaweweda de kasansaleda, de kokopada, de padak? <sup>7</sup> Iduen meakan, me kin lolokokaia ap sota memaur, ma men kwai de arp sota pan ngor pasang, is me pan kak dedeki, da me ira kauleki? <sup>8</sup> O ma koronete pan popeuk ping, is me pan onopadang mauin? <sup>9</sup> A iduen komail, ma komail pan lokaia ki ngil toror, ap sota kaweweda, is me pan dedeki? Pwe omail lokaia pan me mal kot. <sup>10</sup> Song en lokaia toto nan sappa, a sota eu me so puloi. <sup>11</sup> A ma i sasa wewe en lokaia eu, i pan rasong men wai men ong me kin kaparok, o me kin kaparok, pan rasong men wai men ong ia. <sup>12</sup> A pil dueta komail, pwe komail kin anane pai ngenin akan, komail ari pil ngongki kakairida ni mepukat, pwen kamaue kila momodisou. <sup>13</sup> A ma amen lokaia kida ngil en wai, i en kapapak ap pil kasiriwukila. <sup>14</sup> Pwe ma i wia kapapak ki lokaia ngil en wai eu, ngen i kin kapapak ap sota katepa ong amen. <sup>15</sup> Ari, da me i pan wia? I pan kapapak ni ngen i ap pil pan kapapak ni ai lamelam; i pan kapinga ni ngen i ap pil kapinga ni ai lamelam. <sup>16</sup> A ma koe pan kapaia da ki ngen o, iaduen me sota dedeki pan kak inda amen murin om kapinga? Pwe a sasa me koe indinda. <sup>17</sup> Ei me mau melel om kapikapinga, a sota kadepa ong me teio. <sup>18</sup> I kin danke Kot, pweki i kin lokaiaiki ngil toror sang komail. <sup>19</sup> Ari so nan momodisou i men kida lep in lokaia limau, me pwili sang ai lamelam sang lep in lokaia nen ni ngil toror, pwen padaki ong me tei kan. <sup>20</sup> Ri ai kan, komail der wiala seri ni omail lamelam, a ni me sued komail en rasong kisin seri, a ni omail lamelam komail en unsokela. <sup>21</sup> A intingidier nan kapung: Lokaia o kil en aua toror, me I pan lokaiaiki ong kainok wet, a re pil sota pan duki ong ia, me Kaun o kotin masani. <sup>22</sup> Nan i me lokaia toror mia, pwen kileledi kaidin me poson akan, a me soposon akan; a deideikop kaidin ong me soposon akan, pwe ong me poson akan. <sup>23</sup> A ma momodisou pan pokon pena wasa kis, o ma karos pan lokaia ni ngil toror, a ma akai iang me sota dedeki, de akai me soposon,

irail sota pan inda, me komail iakalar? <sup>24</sup> A ma karos kin kokop, o amen pan pwarado, me soposon, o me sota dedeki, karos pan kasansale ong i dip a, o a pan pakasau ren karos. <sup>25</sup> Iduen a me rir akan nan mongiong i pan sansaleda, o a pan tairokedi ni mas a, kaudoki ong Kot, o pan inda, melel Kot kotikot re omail. <sup>26</sup> Ri ai kan, iaduen komail ni omail pokon pena, kaidin amen amen kin kida psalm eu? A amen kin kawewe, a amen ngil toror, a amen kasansal eu, a amen kin kasiriwukila; a karos en wiaui, en kamauia da. <sup>27</sup> A ma amen pan wia ngil en wai, me ta ri amen, de ma me toto, re pan silimen, a irail pan irok wei a amen en kasirawukila. <sup>28</sup> A ma sota men kasiriwuk mia, i en nenenla nan momodisou; a en kasoi ong pein i o Kot. <sup>29</sup> A ri amen de silimen ren saukop akan pan kak kaparok, a me tei kan en kasuia da. <sup>30</sup> A ma amen, ren me momod wasa o, pan diar kasansal eu, men mas ap pan nenenla. <sup>31</sup> A komail karos kak kokop, irok weida, pwe karos en padakki o kamaitala. <sup>32</sup> A ngen en saukop akan kin duki ong saukop akan. <sup>33</sup> Pwe kaidin kmoan me ping men Kot, a en popol duen ni momodisou en sarau akan karos. <sup>34</sup> Omail li akan en nenenla nan momodisou kan, pwe a sota muei ong irail, en kaparok; a irail en papa, duen kapung me pil masani. <sup>35</sup> A ma irail men asa okotme, irail en kalelapok ren arail warok kan ni deu 'rail, pwe me kanamenok, li en kaparok nan momodisou. <sup>36</sup> De masan en Kot tapi sang komail? De a ko wong komail eta? <sup>37</sup> A ma amen lame-lame, me a saukop amen, de me a ngenin, a en asa wewe en me i intingki wong komail, pwe mepukat kusoned en Kaun o. <sup>38</sup> A ma amen lolepon, i en lolepon. <sup>39</sup> Ari ri ai kan en inong iong kokop, o ender kainapwi lokaia ngil toror. <sup>40</sup> A mekaros en wiaui nin tiak mau o pung.

## 15

<sup>1</sup> RI ai kan i men kataman kin komail rongamau, me i padaki ong komail er, me komail pil aleer o pil tinain kidar. <sup>2</sup> O me komail pil dore kila, ma komail pan dadaurata masan o, me i padaki ong komail er, ma komail so poson mal. <sup>3</sup> Pwe i usaki ong komail er, me i pil aleer duen Kristus, me kamata kilar dip atail akan duen kisin likau kan. <sup>4</sup> O me a saredier o kaiasadar ni kasilu en ran duen kisin likau kan, <sup>5</sup> O me a pwara wong Kepas, ap ong irail me ekriamen ko, <sup>6</sup> Ap kotin pwara wong saulang limepuki sama ni ansau takis; kis arail me toto mimi-eta lel met, a akai mairedier. <sup>7</sup> Murin met a kotin pwara wong Iakopus, ap ong wanporon akan karos. <sup>8</sup> A ikmuri a kotin pwara dong ia mon ai ip sapa, <sup>9</sup> Pwe pokindidi ren wanporon akan ngai, me sota war ong

kaindinda wanporon amen, pweki ai pei ong momodisou en Kot. <sup>10</sup> A mak en Kot, me i wanporon kilar. A kaidin mak mal eu ong ia, pwe i dodok laud sang irail karos, ari kaidik ngai, pwe mak en Kot, me mi re i. <sup>11</sup> Ari, ma ngai de irail, pwe iduen at padaki wei, o iduen komail posonlar. <sup>12</sup> A ma i au de pan at padak, me Kristus iasadar sang ren me melar akan, a da me akai re omail kin inda, dene me melar akan solar pan mauredar? <sup>13</sup> A ma me melar akan sota pan maureda, nan Kristus pil sota iasadar. <sup>14</sup> O ma Kristus sota iasadar, at padak me mal, o omai poson pil me mal. <sup>15</sup> O kitail pil pan diarokada, me se saunkadede likam ren Kot, aki at kadededar, me Kot kotin kaiasadar Kristus, me a so kaiasadar, ma me melar akan sota pan kamaureda. <sup>16</sup> Pwe ma me melar akan sota pan kamaureda, nan Kristus pil so kaiasadar. <sup>17</sup> A ma Kristus so kaiasadar, omail poson me mal, o komail mimieta ni dip omail. <sup>18</sup> Iduen pil irail, me melar ren Kristus akan, lokidokila. <sup>19</sup> A ma kitail kaporoporeki Kristus nan maur et eta, nan kitail me sued sang aramas akan karos. <sup>20</sup> A melel, Kristus kaiasadar sang ren me melar akan, ap wiala meseni nan pung en ir me mamair akan. <sup>21</sup> Pwe mela tapi sang aramas ta men, iduen maureda sang ren me melar akan tapi sang aramas ta men; <sup>22</sup> Pwe duen karos me mela ki Adam, nan iduen karos pan kamaurela ren Kristus, <sup>23</sup> A amen amen ni kakairokdo: Kristus mas ap me sapwilim en Kristus, ni a pan kotin pwarado; <sup>24</sup> A murin mepukat pan imwi, a lao kotiki ong Kot o Sam a wei, a lao kaloedier kaun akan karos, o me poe kan, o manaman akan. <sup>25</sup> Pwe a pan kotin kaunda, lao a imwintiti karos lodi ong pan aluwilu a kan. <sup>26</sup> A iknurin imwintiti iei mela. <sup>27</sup> Pwe a kotin mueid ong mekaros pan aluwilu a. Ari ni a kotin masanier me karos lodier a sansaledar, me i sota iang me kotin kaloedi ong i mekaros. <sup>28</sup> A mekaros lao lodi ong i, Na ap pil pan upang i, me kotin kaloedi ong i mekaros, pwe Kot en kotin poedi mekan karusia. <sup>29</sup> A ma me melar akan solar pan kamaureda, da me irail en wia, me kin paptaiseki ong me melar akan? Menda re paptaiseki ong irail? <sup>30</sup> O menda kit kin kalokolok ansau karos? <sup>31</sup> Pwe ran karos i kin mela, pweki kaping pa i, me i aleer ren Kristus Iesui atail Kaun. <sup>32</sup> A ma i pei ong man laualo nan Epilus, duen aramas akan kin wiada, da kadepa ong ia, ma me melar akan sota pan kamaureda? Kitail en manga o nim, pwe lakap kitail pan mela. <sup>33</sup> Der duki ong, me kasongesong komail! Kasoi sued kin kawela tiak mau. <sup>34</sup> Komail ari pungala, o pirida o der wiada dip! Pwe akai sasa duen Kot. Mepukat i indai ong komail, pwen kanamenokki komail. <sup>35</sup> A ele

amen pan inda: Iaduen me melar akan ar pan kamaureda? O iaduen war ar, me re pan maur kida? <sup>36</sup> Pweipwei men koe! Pwe me koe kin kamore di, sota pan maureda, ma a sota pan mela. <sup>37</sup> O me koe kamore di, kaidin war ota me pan para, pwe wan korn eu ta, ele wan wit de eu wa toror. <sup>38</sup> A Kot pan kotiki ong war a, duen a kotin kupura, o eu eu en war akan pan ale udan mom a. <sup>39</sup> Uduk karos kaidin song ta ieu, pwe eu song uduk en aramas akan, a eu song uduk en man akan, a eu song en manpir akan, a eu song en mam akan. <sup>40</sup> A war lang o war pwel akan mia, a lingan en war lang eu song o lingan en war pwel eu song. <sup>41</sup> A eu song lingan en katipin, o eu lingan en maram, o eu lingan en usu kan, pwe nan usu kan me wuki pasang ki ar lingan eu eu. <sup>42</sup> Nan iduen en me melar akan ar pan maureda. A kin kamore more di ap mor pasang, o pan kamaureda so mor pasang. <sup>43</sup> A kin kamore more di ni so lingan, o pan maureda ni lingan; a kin kamore more di ni luet, o pan maureda ni manaman; <sup>44</sup> A pan kamore more di war pwel o pan kamaureda war ngenin; pwe ma war pwel mia, nan a pil pan war ngenin. <sup>45</sup> Duen a intingidier: Tapin aramas Adam wiaui er, pwen ngen maur amen, a Adam tia mur, pwen ngen en kamaur. <sup>46</sup> A war ngenin kaidin i men mas pwe war pwel, a muri me ngenin. <sup>47</sup> Tapin aramas wiaui kida pwel, a aramas kariamen kotido sang nanlang. <sup>48</sup> A duen tapin aramas wiaui ki pwel, iduen karos me wiaui ki pwel o duen men nanlang o, iduen men nanlang kan. <sup>49</sup> O duen kitail wa mom en pwel, iduen kitail pil pan wa mom en lang. <sup>50</sup> Ri ai kan, iet me i men inda: Uduk o nta sota kak sosoki wein Kot; o me mor pasang kan sota pan sosoki me so mor pasang. <sup>51</sup> Kilang, ngai me kadiarok ong komail kaponepon eu: Kaidin kitail karos pan mela, a kitail karos pan nitwilida. <sup>52</sup> Madang ni marep ta ieu, koronete en muri lao popeuk. Pwe koronete pan popeuk, a me melar akan ap pan kamauredang somor pasang a kitail pan kawilikapada. <sup>53</sup> Pwe mor pasang wet pan kiawikilang so mor pasang; o mela wet kiawikilang somela. <sup>54</sup> A mor pasang wet lao kiawikilang so mor pasang o mela wet kiawikilang somela, masan o ap pan pwaida, me intingidier: Maur kadalala mela. <sup>55</sup> Mela koe, ia om tata? Mela ia om poedi? <sup>56</sup> Mana en mela dip, a manaman en dip kapung. <sup>57</sup> Danke ong Kot, pwe a kotiki ong kitail, en poediki atail Kaun Iesus Kristus. <sup>58</sup> Ari ri ai kompok kan, komail kelail kaukaule o der wukiwuk sili, a kakairida ni omail wiawia en Kaun o, pwe komail asa, me omail dodok ong Kaun o kaidin dodok mal.



## 16

<sup>1</sup> A DUEN kisakis ong sarau kan, me komail pan ki pena, i men, komail en wiada, duen i kakaliki ong momodisou en Kalesia kan. <sup>2</sup> Ni at en ran en wik kan amen amen re omail en nikidala ekis, o ki pena duen wan a kak ong pwe onop de wiaui, i lao pwara wong. <sup>3</sup> I lao pwara weilar, meakai, me komail pan kileledi, irail me i pan ilakewei, en walang Ierusalem omail kisakis iangaki kisin likau. <sup>4</sup> O ma a kon ong, i en pil sailok wei; irail ap pan iang ia sailokala. <sup>5</sup> A i pan pwara wong komail ni ai dauli Masetonien, pwe i pan weid nan Masetonien. <sup>6</sup> Ele i pan mimieta re omail, ansaun kapau lao nikier, pwe komail en kalua ia la wasa, me i pan sailokala ia. <sup>7</sup> Pwe ansau wet i sota pan sup re omail, pwe i kaporoporeki, me i pan mimieta re omail ansau kis, ma Kaun pan kotin mueid ong ia. <sup>8</sup> A i pan mimieta Episu lao pentikos. <sup>9</sup> Pwe wanim tälap ritida mo i, me kareda wa toto; a imwintiti me toto. <sup>10</sup> A Timoteus lao pwara wong komail, apwali i, pwen sondi mau re omail, pwe a kin iang ia wiawia dodok en Kaun o. <sup>11</sup> Sota amen en mamaleki i, a kalua i dong ia popol, pwe ngai o ri atail akan kin auiaui i. <sup>12</sup> A duen ri atail Apolos, ngai me poeki re a pan pak toto, en iang ri atail akan pwara wong komail, a a kang pwara wei ansau wet; a a pan pwara wei lao ansau mau. <sup>13</sup> Komail masamasan o dadaurata ni poson, komail wia duen ol melel, o komail en kelail. <sup>14</sup> Meakaros en wiaui ni limpok <sup>15</sup> I ari panau komail, ri ai kan, pwe komail asa penainai en Stepanas, me ir tapida saulang en Akaia, o me pein irail inong iong dodok ong sarau kan, <sup>16</sup> Pwe komail en peiki ong irail, o ong irail karos me iang ni ar wiawia o dodok. <sup>17</sup> I peren kida en Stepanas, o Portunatus, o Akaius ar pwarador, pwe mekis, me komail so ki ong ia mepukat ki dong ia. <sup>18</sup> Irail kaperenda ngen i o pil ngen omail; komail ari wauneki me due met. <sup>19</sup> En momotisu en Asien akan ar ranamau wong komail. A Akwila o Prisila kin ranamau wong komail pan Kaun o momodisou nan im ara. <sup>20</sup> Ri atail ol akan karos kin ranamau wong komail. Komail ranamauki pena metik sarau. <sup>21</sup> Ngai Paulus me inting kilang komail ai ranamau ki pein pa i. <sup>22</sup> Ma amen sota kin pok ong Kaun Iesus Kristus, a pan anatema! Maranata! Iet wewe; A pan riala! Atail Kaun kotido. <sup>23</sup> Mak en Kaun Iesus Kristus en mimieta re omail! <sup>24</sup> Ai limpok ong komail pan Kristus Iesus pan mimieta re omail! Amen.

## EN PAULUS A KISIN LIKAU KARIAU ONG MEN KORINT.

<sup>1</sup> PAULUS wanporon en Iesus Kristus amen pan kupur en Kot o ri atail Timoteus ong momodisou en Kot, me mi Korint o sarau kan karos, me mi Akaia. <sup>2</sup> Mak o popol sang ren Kot Sam atail o atail Kaun Iesus Kristus en mi re omail. <sup>3</sup> Meid iasanai Kot o Sam en atail Kaun Iesus Kristus, o Sam en kalangan, o Kot en kamait pokon, <sup>4</sup> Me kin kamakamait kit ni at kamekam kan karos, pwe kit en pil kak kamait ir ala, me mi nan song en kamekam akan karos, ki kamait, me kit kamait kila ren Kot. <sup>5</sup> Pwe duen Kristus a kamekam me muladok ong kit, iduen kamait ren Kristus pil itar penang kit. <sup>6</sup> A ma kit pai olar, nan a kin wiaui, pwen kamait o kamaur komail la, mepukat kin wiaui ni omail kanongama ni kalokolok ota, me kit kin kalokolokki. <sup>7</sup> O at kaporopor kin komail me tengeteng, pwe se asa, ma komail iang kamekam, komail pil pan iang kamaitala. <sup>8</sup> Ri ai ol akan, se sota men, komail en sasa duen at kamekam nan Asien o at patau kaulap, lao solar kaporopor en maur at. <sup>9</sup> Ari, kit lamedar, me se pan mela. A mepukat wiaui, pwe sen der keleki pein kit, pwe Kot eta, me kin kaiasada me melar akan. <sup>10</sup> Me kotin dore kit ala sang mela wet, o a pil pan dore kit ala; o se kaporoporeki, me a pil pan kotin dore kit ala kokolata. <sup>11</sup> Komail pil sauasa kit ni omail ngidingid, pwe me toto en danke pweki at pai me se aleer. <sup>12</sup> Pwe iet kaping pat: Insen at kin kadede ong kit, me se weweideki karakarak o meler en Kot nin sappa o nan pung omail, kaidin ni lolekong en pali udok, a ki mak en Kot. <sup>13</sup> At inting wong komail kaidin toror sang me komail kin wadok o kamelele. A i kaporoporeki me komail pan kamelele kit kokolata duen akai komail kamelele kit er. <sup>14</sup> Pwe kit me kaping pa omail, dueta komail me kaping pat ni ran en Kaun Iesus. <sup>15</sup> A ni kaporopor wet, me i men pwar kilang komail mas o, pwe komail en pur ong pereperen. <sup>16</sup> I ap nan daulul lang komail ni ai pan kolang Masetonien, ap pil puredo re omail sang Masetonien, a komail pan kalua ia lang Judaa. <sup>17</sup> A i aduen, ngai me sapung ni ai kileledier mepukat? De i (BEGIN MISSING SOURCE p259) kin kileledi mepukat ni tiak en pali udok, pwen ei ei o so so tapi sang pein ngai? <sup>18</sup> A Kot me meler, pwe me se indang komail me sota ei o so. <sup>19</sup> Pwe sapwilim en Kot Iesus Kristus, me kit padaki ong komail er, ngai, o Silwanus, o Timoteus, i kaidin ei o so, a ei eta re a, <sup>20</sup> Pwe inau en Kot akan karos me ei eta re

a o me amen re a, pwe kit en kalinganada Kot. <sup>21</sup> A me kin katinai kit o komail pan Kristus o keie kitail er, iei Kot, <sup>22</sup> Me pil kotin kileledier kitail o kotiki ong kitail er komoan Ngen nan mongiong atail. <sup>23</sup> A i kin likwir ong Kot me saunkadene en ngen i, me i saikenta pwara wong komail nan Korint, pwe i de katoutoui komail. <sup>24</sup> Kit sota men poedi omail poson, a kit men sauasa ta omail peren, pwe komail keleki poson.

## 2

<sup>1</sup> IET me pein ngai kileledier, i solar men pwar wong komail ni ai insensued. <sup>2</sup> Pwe ma i kainsensuedi komail, is me pan kak kainsenemau ia la? Ma kaidin i eta, me kainsensuedelar re i. <sup>3</sup> Mepukat i inting wong komail er, pwe i ender insensuede kin irail, me i en peren kida, ni ai pan pwara wong komail. A i kamelele komail karos, me ai peren pil pan omail karos. <sup>4</sup> Pwe ni lokolok o masak en nan mongiong i me lapalap, me i inting kilang sangsang, kaidin pwen kamauki komail, a pwe komail en asada, duen ai limpok ong komail kaulapia. <sup>5</sup> A ma meamen wiada kainsensued eu, kaidin ngai eta, me a kainsensuedi, pwe i ender non kapung ong, a ele komail karos. <sup>6</sup> A kalokolok sang ren me toto itar ong i. <sup>7</sup> Mak eta komail en maki ong i o kamaitala, pwe a de lodi ong insensued laud. <sup>8</sup> I ari panau komail, komail en kasale ong i omail limpok. <sup>9</sup> I karepen ai inting wong komail, pwe i en asa, ma komail me pung o peiki ong ni meakoras. <sup>10</sup> A ma komail pan makeki ong meamen meakot, ngai pil pan maki ong i. A ma i makeki ong amen meakot, i makekier pweki komail wilianti Kristus. <sup>11</sup> Pwe Satan ender kotau kitail, pwe kitail asaer duen a lamelam. <sup>12</sup> A ni ai pwaralanger Troas, pwen padaki rongamau en Kristus, o wanim eu me ritida mo i ong Kaun o, <sup>13</sup> I sota insenemaula, ni ngen i, pweki ai sota diar ri ai Titus. I ap kamurimur ong irail daulul wong Masetonien. <sup>14</sup> A danke ong Kot, me kotin kaloe kitail di pan Kristus, ap kasansaleki kitail pomau en a erpit wasa karos. <sup>15</sup> Pwe kit me pomau en Kristus ong Kot ren me pan dorela o ren me pan lokidokila kan. <sup>16</sup> Ong iet akan po en mela ong kamela, a ong me tei kan po en maur ong kamaurela. A is me kon ong mepukat? <sup>17</sup> Pwe kit so dueta me toto, me kin liliyasoki masan en Kot; a at padak me meler, o a pwili sang Kot, o kin wiaui mon Kot pan Kristus.

## 3

<sup>1</sup> A IADUEN kit pil kailandeki pein kit? De ngai me mau ong kisin likau en kaping ong komail de sang komail? <sup>2</sup> At kisin

likau komail, me intingidi ong nan mongiong it, me aramas akan karos kin asa o wadok. <sup>3</sup> Pwe komail sansaleda, me komail kisin likau en Kristus, me wiaui re at ni at papa, me kaidin intingidier ki ingk, a Ngen en Kot ieias; pil kaidin pon slet takai, pwe slet uduken en mongiong akan. <sup>4</sup> Iei atail kaporoporeki Kristus mon Kot. <sup>5</sup> Pwe kaidin udan at koiok, me se kak lamelameki meakot, me tapi sang pein kit, pwe at koiok tapi sang ren Kot, <sup>6</sup> Me pil kotin kaiane kin kit, en papa en inau kap kaidin inau, me intingidier, a inau en ngen. Pwe inting kin kamela, a ngen kin kotin kamaureda. <sup>7</sup> A ma dodok en mela, me intingidier nan pali en takai, me lingan, pwe seri en Israel akan sota kak kilang silang en Moses, pweki lingan en silang i, a lingan wet eu, me pan sorede, <sup>8</sup> Daduen, dodok en ngen a sota pan lingan sikida sang? <sup>9</sup> Ari, ma dodok en kadeik o me lingan, nan melel kaulap, dodok en pung me lingan melel. <sup>10</sup> Pwe men moa me kalinganadar sota kak paroki ong lingan wet. <sup>11</sup> A ma lingan mia ren me pan sorela, iaduen wan lingan en me pan mimieta! <sup>12</sup> Ni at kaporoporeki mepukat, kit kin aima melel. <sup>13</sup> O kaidin dueta Moses, me pera kila likau eu silang i, pwe seri en Israel akan ender kilang imwi en me pan nikila. <sup>14</sup> A mongiong arail me kapitakailar. Pwe lao lel ran wet pera o mimieta ansaun ar wadawadok inau maring; ari, pera o me saroka sanger ren Kristus. <sup>15</sup> A lao lel ran wet ni arail wadawadok Moses, pera mimieta mon mongiong arail. <sup>16</sup> A ma re pan wuki ong Kaun o, pera o pan saroka san. <sup>17</sup> Kaun o iei Ngen, a wasa me Ngen en Kaun kotikot ia, nan i wasan maio. <sup>18</sup> A kitail karos, me mas atail so perapa, kin ududial lingan en Kaun o, ap wuki ong ni mom ota o kakairida ni lingan pweki Kaun iei Ngen.

#### 4

<sup>1</sup> KIT sota kin pangada, pweki at koa dodok me se aleer ki mak o. <sup>2</sup> Pwe kit mui sanger sued okiok kan o se sota weweideki widing o sota liasosa ki masan en Kot; pwe ni at kapwareda melel kit kin kamaui pein kit ong insen en aramas karos mon Kot. <sup>3</sup> A ma at rongamau me malar, nan a malang men lokidokila kan. <sup>4</sup> Me kot en sappa wet karotongala nan mongiong en me soposon akan, pwe ren der kilang marain en rongamau duen lingan en Kristus me mom en Kot. <sup>5</sup> Pwe kit sota kin padaki duen pein kit, a duen Kristus Iesus, me i Kaun, a kit ladu 'mail pweki Iesus. <sup>6</sup> Pwe Kot me masanier, marain en pwarada sang ni rotorot, me kotin kamarainiedar nan mongiong it, pwe sen maraineki o dedeki lingan en Kot ni silang en Iesus Kristus. <sup>7</sup> A kit kin kolekol pai wet ni dal pwel, pwe manaman

en kaindinda Kot a so kit. <sup>8</sup> At apwal akan me andere kit pena, a se sota kin masak; sota wasa, me se pan kak pitila ia ap sota lodi. <sup>9</sup> Pan kamekam, ap sota kamela; pan kalokolok, ap sota mela; <sup>10</sup> O kit kin wewa sili ni war at en Iesus a matala, pwe maur en Iesus en pil sansal ni war at. <sup>11</sup> Pwe kit, me memaur, kin kilele ong mela ansau karos pweki Iesus, pwe maur en Iesus en pil sansaleda ni uduk atail. <sup>12</sup> Nan i mela kin kelail ong kit, a maur ong komail, <sup>13</sup> A kit aleer ngen en poson ota, duen a intingidier: Ngai me poson, i me i padaki wei. Kit me pil posonlar ap padapadaki. <sup>14</sup> Se asaer, me i, me kotin kaiasadar Kaun Iesus, pan pil kotin kaiasada kitail iang Iesus, o pan kotin kasansaleda kitail o komail mo a. <sup>15</sup> Meakaros wiaui pweki komail, pwe mak o ni a laude kilar me toto, en kalaudela melel danke, pwen kalinganada Kot. <sup>16</sup> I me se sota kin pangada, a ma at pali liki en aramas pan sorede, pali lol it kin kokoda ni ran karos. <sup>17</sup> Pwe atail ansau apwal me motomot o tikitik; ap kare ong kitail lingan soutu eu me lapalap melel, <sup>18</sup> Pwe kitail sota kin kilekilang meakan me sansal, a meakan me so sansal. Pwe me sansal me katuk, a me so sansal me soutu.

#### 5

<sup>1</sup> PWE kitail asaer, impwal atail sappa a lao ola, kitail pan id imaneki im eu sang ren Kot, im eu me kaidin wiaui kida pa, pwe a me soutu nanlang. <sup>2</sup> I me kitail kin sangesang o inong iong im sang nanlang en kalikau kitail da. <sup>3</sup> Pwe ma kitail likaudar; kitail solar pan kiliso. <sup>4</sup> Pwe ni atail deula impwal wet kitail kin sangesang o patau, pwe kitail sota men pure sang atail likau, a se men kadupaledi, pwe maur en katalala mela. <sup>5</sup> A me wia kin kitail ong mepukat, i Kot me pil kotiki ong kitail er komoan Ngen. <sup>6</sup> Kitail ari insenemau ansau karos o asaer, ni atail kauson ki war; kitail kin doo wei sang Kaun. <sup>7</sup> Pwe kitail kin weweid ni poson a kaidin ni kilang. <sup>8</sup> Ari so, kitail kin insenemau o inong iong mui sang war atail, ap mimi nan deu atail ren Kaun o. <sup>9</sup> Nan i me kitail kin nantiong kaperen i, ma ni deu 'tail de ni at doo wei sang. <sup>10</sup> Pwe kitail karos pan sansal mon mol en kadeik en Kristus, pwe amen amen en ale pwain en a wiawia arain a maur ni pali war, ma me mau de me sued. <sup>11</sup> Kit asaer, me sen masak Kaun o, i me se kin kanekanai ong at dodok ong aramas akan, ap kin sansal ong Kot. A i pil kaporoporeki me se pil sansal ong nan insen omail. <sup>12</sup> Pwe kit sota sapa suaiki pein kit ong komail, a se pang ong komail, en kaping pat, pwe peikite pamail en mia ong irail, me kin suaiki mas arail, a so mongiong arail. <sup>13</sup> Pwe ni at mi likin war at, a kin wiaui

ong Kot, a ma so, se kin dodok ong komail.  
<sup>14</sup> Pwe iduen limpok en Kristus kangong kin kit, pwe se kasauadar, me amen mata kila karos, i me irail karos mekilar. <sup>15</sup> A i mata kilang karos, pwe irail me memaur, der memaur ong pein irail, a ong i, me mata kin irail lar o me kaiasadar. <sup>16</sup> I me se solar asa amen ni pali uduk. Ei, mas o se asaer Kristus ni pali uduk eta, a met se solar asa i due. <sup>17</sup> Ari ma amen ni ren Kristus, nan a wilikapadar; men mas momelar; kilang, karos wilikapada. <sup>18</sup> A meakan karos sang ren Kot, me kotin kalolamaui ong pein i kitail ki Iesus Kristus, me kotiki ong kit at koa dodok, duen padak en kalolmau. <sup>19</sup> Pwe Kot kotikot ren Kristus o kotin kalokalolamaui ong pein i sappa, o solar kapokon ong irail dip arail akan, o kotiki ong kitail masan en kalolamaui. <sup>20</sup> Ari, kit men en kadar en Kristus, pwe Kot kin panaui ki kit. Kit wiliandi Kristus ap poekipoeki kin komail: Komail kalolamaui pein komail ong Kot! <sup>21</sup> Pwe Kot kotin kapokonki ong, me so dip a, dip atail, pwe kitail en pung kila pa ren Kot.

## 6

<sup>1</sup> KIT men sauasa kai, men panaui komail, pwe komail de ale mal mak en Kot. <sup>2</sup> Pwe a kotin masani: I rong uk er ni ansau mau, o ni ran en kamaur I katoi uk adar. Kilang ansau wet ansau mau; ansau wet ran en kamaur. <sup>3</sup> Kit sota kadipikelekel ong meakot, pwe at koa dodok ede kalok sued. <sup>4</sup> A ni meakos kit kin wia sansal en papa en Kot akai: Ni kanongama melel, ni kamekam, ni paiio kan, ni kamasak kan, <sup>5</sup> Ni wokwok, nan imateng, ni moromorong, ni dodok, ni masamasan, ni isesol. <sup>6</sup> Ni kamelekel, ni lolekong, ni lolin, ni kadek, ni Ngen sarau, ni limpok melel, <sup>7</sup> Ni masan melel, ni manaman en Kot, ki tatan mauin en pung pali maun o pali maing, <sup>8</sup> Ni kaka, o sokaka, ni kalok sued, o kalok mau, dene kaweid sapung, ari so, me melel, <sup>9</sup> Dene pasase, ari so, kit me indang; koren iong mela, a kilang kit memaureta; me kin kamekam, ap sota kamela, <sup>10</sup> Ni insensued, ap pereperen ansau karos, me samama, ap kakepwapwala me toto, sota at meakot, ap aneki meakos. <sup>11</sup> Men Korint, au at ritidang komail, o nan mongiong it me laudi ong komail. <sup>12</sup> Kaidin me tikitik deu 'mail nan mongiong it, a mongiong omail me tikitik. <sup>13</sup> I kin padaki ong komail dueta ong seri kan, pwe komail en pil wiai ong ia dueta, o kalaudela nan mongiong omail. <sup>14</sup> Komail ender paroki ong me so poson akan, pwe iaduen, pung kak minimin ong sapung? De marain pan kak waroki ong rotorot? <sup>15</sup> De iaduen Kristus o Pelial ara kak parok pena? De da pwais en me poson ren me soposon? <sup>16</sup> De tanpas en Kot pan kak pat ong ani mal

akan? Pwe tanpas en Kot ieias iei komail, duen Kot kotin masanier: I pan kauson re 'rail o daudaulole irail, o Ngai pan arail Kot, a irail pan nai aramas akan. <sup>17</sup> Komail ari mui sang irail o katoror sang pein komail, me Kaun o kotin masani, o ender doke me kasaut kot, Ngai ap pan apwali komail, <sup>18</sup> O I pan Sam omail, o komail pan nai ol o li akan, me Kaun lapalap kotin masani.

## 7

<sup>1</sup> KOMPOKE pai kan, pweki inau pukot kitail en mui sang kasaut en uduk o ngen atail karos, o kitail en dadaurata atail kasaraui la ni waunek i Kot. <sup>2</sup> Komail apwali kit, sota amen me se wia sapung ong, sota amen me kit kawelar, sota amen me kit kulia sang okotme. <sup>3</sup> Mepukat i inda kaidin pwen kadeikada, pwe i apton indada, me deu omail nan mongiong it, pwen iang mela o iang memaur. <sup>4</sup> Ngai ari aima ong komail, o ai kapinga komail me lapalap, o i direki kamait; ngai me peren kida melel ni at kalokolok karos. <sup>5</sup> Pwe ni at leler Masetonien, uduk at sota diar kamol, pwe se kalokolok wasa karos: Pali liki pepei o pali lole masak. <sup>6</sup> A Kot me kin kamaitala me karakarak kan, a kotin kamait kit ala ki en Titus a pwarador. <sup>7</sup> A kaidin a pwarador eta, pwe pil kamait o, me pein a kamait kila komail, ni a kasansaledang kit omail anane, o omail sangesang o omail lolete kin ia; i me kalaudela ai peren. <sup>8</sup> Pwe ma i kainsensuedi kin komail er kisin likau o, i sota kalula, a ma i kalular mas o, pwe i diardar me kisin likau kainsensuede kidar komail ansau kis, <sup>9</sup> A met i peren kidar, kaidin pweki omail insensued, a pweki omail insensued ong kalula, pwe omail insensued duen kupur en Kot, pwe komail ender ale me sued kot re at. <sup>10</sup> Pwe insensued duen kupur en Kot kareda kalula ong maur, me aramas sota pan kalu kila, a insensued en sappa kareda mela. <sup>11</sup> Pwe kilang, omail insensued duen kupur en Kot, kare ong komail song toto: Porisok, o pukoki, o makar, o masak, o anane, o inong iong, o depuk! A komail kasansaledar ni song karos, me komail makelekel ni mepukat. <sup>12</sup> I inting wong komail er; kaidin pweki i, me kainsensued, pil kaidin pweki i, me a kainsensued ong, a pweki at apawali komail en sansal re omail non Kot. <sup>13</sup> Kit ari kamaitalar; kit peren kida kaulap en Titus a peren, pwe ngen e dapwenda komail. <sup>14</sup> Pwe ni ai kapingaki komail re a, i sota namenokki, pwe duen ai lokaia karos ong komail me melel, iduen at suaiki mon Titus pwaidar melel. <sup>15</sup> O a kin pok ong komail melel ni a tamatamanda omail oke, duen omail kasamo i ni masak o rerer. <sup>16</sup> I peren kida, me i kare kameleke komail ni song karos.

## 8

<sup>1</sup> RI ai kan, se men padaki ong komail duen mak en Kot en momodisou en Masetonien akan, duen ar kikiwei; <sup>2</sup> Pwe ar kalokolok meid laud, o irail pil meid samama, ari so, mepukat imwilang peren o mairong laud, <sup>3</sup> Pwe ngai kadede irail, me re kida duen me re kak ong o laude sang, <sup>4</sup> Pein irail inong iong ap ngidengideki ong kit, en ale ar kisakis, o ar iang sauasa kisakis wet ong sarau kan. <sup>5</sup> O re wiadar mepukat, kaidin duen at kaporoporeki, a re ki ong Kaun o pein irail mas, ap pil ong kit pan kupur en Kot. <sup>6</sup> Kit ari panau Titus en kanikiela mak wet re omail duen a tapiadar mas o. <sup>7</sup> A duen omail kapwapwaki song karos: Ni poson o masan, o lolekong, o porisok, o omail limpok ong kit, iduen komail pil inong iong, en kapwapwa ni mak wet. <sup>8</sup> I indai ong komail met, kaidin kusioned eu, a pweki porisok en me tei kan, o i kin kasongesong omail limpok, ma a pung de so. <sup>9</sup> Pwe komail asaer mak en atail Kaun Jesus Kristus, duen a kapwapwa, ap samamalar pweki komail, pwe komail en kapwapwa kila i. <sup>10</sup> A iet ai lamelam me i men kasaleda, a meid katepa ong komail, pwe komail tapiadar inong iong ap pil kapwaiada dodok mau wet ni par samalar. <sup>11</sup> Komail ari kanikiela dodok wet, pwe duen omail men iang onop, iduen komail en wiada sang ni omail kapwapwa. <sup>12</sup> A ma amen inong iong, iang dodok wet, a pan konekoneka duen me a pan kak ong, kaidin duen me a sota kak ong. <sup>13</sup> Pwe irail ender mararaki, a komail id toutouki; a karos en parok pena. <sup>14</sup> Pwe ansau wet omail kapwapwa en kaitar arail samama, a arail kapwapwa en kaitar omail samama, pwe karos en parok pena. <sup>15</sup> Duen a intingidier: Me rik penaer mo toto, a sota men nak, o me rik penaer me malaulau, a sota kin dupok. <sup>16</sup> Danke ong Kot, me kotin kainong iong mongiong en Titus; <sup>17</sup> Pwe a duki ong at poeki, a pil pein i inong iong madang pwar wong komail. <sup>18</sup> A kit pil kadar wei ri atail ol o iang i, me indandeki a padaki wei rongamau ni momodisou kan karos. <sup>19</sup> A kaidin i eta, pwe momodisou kan pil piladar i, en iang kit papaki mak wet, me kit kin apapwali ong kalinganada Kaun o kapinga omail inong iong mau. <sup>20</sup> Kanakanai ong, pwe amen de kasapung kin kit at paki kisakis laud wet, <sup>21</sup> Kit pil kin masamasan, pwe karos en inen, kaidin mon Kaun eta, pwe pil mon aramas akan. <sup>22</sup> A kit kadar ir wei iangaki ri atail o, me diarakadar ni song toto, me a porisok, a ansau wet a porisok sang mas ni a liki komail. <sup>23</sup> Ari, ma amen pan idok duen Titus, i ai warok o sauasa pai re omail; a duen ri atail akan, irail me men en kadar en momodisou kan o lingan

en Kristus. <sup>24</sup> Komail ari kasansale ong irail mon momodisou kan omail limpok ni omail apapwali irail duen i kapinga kin komail.

## 9

<sup>1</sup> A DUEN dodok ong me sarau kan, i solar pan inting wong komail. <sup>2</sup> Pwe i asa, me omail inong iong me mau, me i kin suaiki ong men Masetonien, me men Akaia inong iong mepukat sang ni par samalar, a komail kainong iong me toto. <sup>3</sup> I ap ilakiawei ri atail akan, pwe at kaping pa omail ender mail la ni mepukat, pwe komail en onop duen me i inda. <sup>4</sup> Pwe ma men Masetonien kai pan iang ia, ap konodi komail ni omail so onop, kit, se sota men inda komail, ap pan namenok kila ni at liki wet. <sup>5</sup> Ari, i ap lamedar, en poeki ren ri atail akan, ren tiang mo at kolang komail, pwen kaonopada pai wet, me komail inaukidar mas o, pwen pai melel eu, a iermen norok sued. <sup>6</sup> A iet me i inda: Me kin kamorok tikitik, pan dolung tikitik, a me kin kamorok toto, pan dolung me toto. <sup>7</sup> Amen amen duen a kileledier nan mongiong i; der kisa kol, de akpatik, pwe Kot kotin pok ong me kin pein perenki kisakis. <sup>8</sup> A Kot me kotin manaman ong en kalaudelang komail song en mak kan karos, pwe komail en kapwapwa ni song karos o ansau karos, ap kak ong song en wiawia mau karos, <sup>9</sup> Duen a intingidier: A kamoredier, a kisakisa wei ong me samama kan; a pung pan mimieta kokolata. <sup>10</sup> A me kin kotiki ong saumak kisin war akan, o prot men manga, a pan katotoela omail war akan, o a pan kotin kawosada omail wan pung kan, <sup>11</sup> Pwe komail en kapwapwala ni song karos, pwen wiawia mau karos, me kin karedang kit, en danke Kot. <sup>12</sup> Pwe wiawia pan dodok wet kaidin sauas pan sarau kan ta, pwe me toto kin danke Kot. <sup>13</sup> Arail kapwaiada dodok wet kin kalinanganada Kot pweki omail upai ong kadede en rongamau en Kristus, o omail sapan kisakis ong irail o ong karos, <sup>14</sup> O ni arail ngidingide kin komail, re kin anane komail pweki mak lapalap en Kot ong komail. <sup>15</sup> Daken ong Kot pweki a pai lapalap!

## 10

<sup>1</sup> ARI pein ngai Paulus men panau komail nin tiak en opampap o limpok en Kristus; pwe ni ai mi nan pung omail, i kin aktikitik, a ni ai doo wei sang komail, i kin kelail ong komail <sup>2</sup> A i kin kapakapeki, pwe i ender kelail ni ai pan korendo; pwe i kileledier o lamelame, me i pan kelail ong akai, me kin wia kin kit men kekeideki tiak en pali uduk. <sup>3</sup> Pwe melel, se kin mimita nan uduk, ap sota pepepi ni tiak en uduk. <sup>4</sup> Pwe kapwa en at pei kaidin men ni pali uduk, pwe me manaman mon Kot, me mau ong

kawela wasa tengeteng kan. <sup>5</sup> Ni at kin kawela me akapung o me aklapalap, me kin palian erpit en Kot; o kit kin saliedi song en lamelam karos, pwen oke Kristus. <sup>6</sup> O audaude ong kaloedi me katiwo karos, omail peik lao pwanokadar. <sup>7</sup> Komail kin kilekilang meakan me sansal? Ma amen lamelame, me pein i sapwilim en Kristus, i en pein lameda, me kit pil sapwilim en Kristus dueta i. <sup>8</sup> Pwe ma i pan suaiki laude sang at manaman, me Kaun o kotiki ong kit, pwen kamaui a kaidin kawe komail la, i sota pan namenokki. <sup>9</sup> Pwe ender sansal duen amen me kin kamasak kin komail ngai kisin likau kan, <sup>10</sup> Pwe irail me inda: Kisin likau kan me kasampwal o manaman, a sansal en pali war a me luet, o a padak me mal kot. <sup>11</sup> A me duen met, a en asa duen at kin inda nan kisin likau kan ni at doo wei sang komail, iduen pein kit ni at wiawia kan nan pung omail. <sup>12</sup> Pwe kit sota man mauki waroki ong me kin suaiki pein irail; a irail me sololekong, pweki ar sosong pein irail nan pung arail. <sup>13</sup> A kit sota men suaiki me laud sang me kon ong, a duen men song eu, me Kot kotin pang ong kit, song eu, me itar lel ong komail. <sup>14</sup> Pwe kit sota inong iong, me sota kon ong, dene se sota pwar wong komail er, a se pil walang komail rongamau en Kristus. <sup>15</sup> Kit sota kin suaiki me laud sang me kon ong, dene se suaiki en amen a dodok. A se kaporoporeki omail poson lao kakairida, at dodok pil pan laud sang re omail, <sup>16</sup> Pwen pil padaki rongamau nin sap akan palila sang komail, a kaidin wasan dodok en amen o sota suaiki me wiawier. <sup>17</sup> A ma amen men suaiki, i en suaiki Kaun o. <sup>18</sup> Pwe kaidin i meakot, me kin kapinga pein i, pwe i eta, me Kaun o kin kapinga.

## 11

<sup>1</sup> I mauki, komail en mueid ong ia kisin pweipwei, iei ta komail pan mueid ong ia. <sup>2</sup> Pwe ngai me per kin komail dueta Kot, pwe ngai me kileledier komail ong ol amen, pwe i en kasale komail ong Kristus duen seripein makelekel amen. <sup>3</sup> A i masak serpent widin-gok, me kotaue Ewa, ma a sota pan pil kawela omail lamelam sang ni opampap en Kristus. <sup>4</sup> Pwe ma amen pan pwarado, me kin padaki duen amen Iesus, me se sota padaki, de ma komail pan ale eu ngen, me komail sota aleer, de eu rongamau, me komail sota wuki ong, kaidin komail pan peren kida? <sup>5</sup> Pwe i lamelame, me ngai kaidin tikitik sang wanporon lapalap akan. <sup>6</sup> A ma i sota koik ong lokaia a kaidin ni ai dedeki, pwe kit sansal ong komail ni song o wasa karos. <sup>7</sup> De ngai me wiadar dip eu ni ai akmalkila pein ngai? Pwe komail en indandala ki ai padaki ong komail rongamau en Kot so pwaipwai. <sup>8</sup> I atia sang momotisou

tei kan ni ai aleer pwin en dodok, pwe i en kak dodok ong komail. <sup>9</sup> O ni ai mimi re omail o lao samamala, kaidin amen, me i uki pa meakot, pwe ni ai solar ai meakot, ri atail akan me kodo sang Masetonien me kisa dong ia; ngai ari sota katoutoui komail ni meakot, o i pil pan due! <sup>10</sup> A duen melel en Kristus mimi lol i, iduen i sota pan mueid ong amen, en kawela kaping wet nan sap en Akaia kan. <sup>11</sup> Pwekida? Pweki ai so pok ong komail? Kot me kotin mangier. <sup>12</sup> A me i kin wia, i me i pan wiada, pwen kawela karep en akai me inong iong karep en ar suaiki dene irail dueta kit, sota lipilipil is i. <sup>13</sup> Pwe wanporon likam pukot o toun dodok likam akan irail, kin kawukilang wanporon akan en Kristus pein irail. <sup>14</sup> A kaidin kapuriamui eu, pwe iduen Satan kin kawukila pein i, wuki ong tounlang en marain amen. <sup>15</sup> I me kaidin kapuriamui eu, ma na papa kan pil pan wukilang papa en pung kan; a imwilar pan duen ar wiawia kan. <sup>16</sup> I purong indada, sota amen en akpweipwei kin ia, a ma iei, komail ap maki ong ia ai pweipwei, pwe i en suaiki kin ia ekis. <sup>17</sup> A me i inda, kaidin Kaun o me i pwili sang, pwe a tapi sang ni tiak en pweipwei, pwe i suaiki pein ngai; <sup>18</sup> Pwe me toto kin suaiki ni pali uduk, i pil pan suaiki pein ngai. <sup>19</sup> Pwe komail kin mauki me lolepon kan, pweki komail me lolepong. <sup>20</sup> Pwe komail kin mueid ong amen, en wia kin komail ladu kan, de ma amen kaloke komail, de ma amen kuli komail edi, de ma amen aklapalap, de ma amen pikir komail. <sup>21</sup> Mepukat i indang komail, pwen kanamenok ki komail, dene kit luetalar. A ma meamen aima, ngai pil aima, i kin lokaia nin tiak en pweipwei. <sup>22</sup> Irail men Ipru, pil ngai; irail men Israel, pil ngai; irail kadaudok en Apraam, pil ngai; <sup>23</sup> Irail me papan Kristus, i kin lokaia dueta me iak amen, ngai me lapa sang; ai dodok laud sang, i kalokolok laud sang; i salidier toto sang, i koren iong mela pan pak toto. <sup>24</sup> Pan me limpak Sus oko ki ong ia wok paeisok, eu katoror sang, <sup>25</sup> A pan me silepak re woki kin ia sokon; pan mepak me i pakasuk; pan me silepak takepa i sop olar; pong o ran, me i pepe sili nan madau. <sup>26</sup> Ai sailok me toto; i diar ai apwal nan pilap akan; i diar ai apwal ren lolap akan; i diar ai apwal ren ai kainok; i diar ai apwal nan sap tan; i diar ai apwal nan madau; i diar ai apwal ren saulng likam akan; <sup>27</sup> Ni dodok apwal, ni songsongemas, ni men mangadar o men nim piladar, ni isesol pan pak toto, ni pou o so kidi pa; <sup>28</sup> O me pil kin lel ong ia ni ran karos, o ai apapwali momodisou akan karos. <sup>29</sup> Is me luet, a ngai sota pan luet? Is me kin kamakar, a ngai so? <sup>30</sup> Ma i en suaiki, i pan suaiki ai luet. <sup>31</sup> Kot o Sam en Kaun Iesus, me iasanai kokolata, kin mangi, me i

sota kin likam. <sup>32</sup> Nan Damaskus nain nanmarki Aretas kopina amen sinsila kanim en men Damaskus ni a inong iong saik ia di. <sup>33</sup> I ap apikidi kopou eu sang ni wanim tuk en kel o, ap piti sang ni pa a kan.

## 12

<sup>1</sup> ARI, ai suaiki sota katepa ong ia. Ari so, i pan kapareda kaudial akai o kadiarok kai ren Kaun o. <sup>2</sup> I asa duen aramas amen ren Kristus, mon saunpar eisok paieu; i sasa, ma a mi nan war a, de ma a mi likin war a, i pil sasa, Kot me kotin mangi, i aramas o, me peukadala lel nanlang kasilu. <sup>3</sup> O i asa, iei aramas o, ma a mi nan war a de likin war a, i sasa, Kot me kotin mangi. <sup>4</sup> I me peukadalang paradisi, wasa a rongadar kasoi kai, me sota muei ong aramas amen en inda. <sup>5</sup> I me i pan suaiki; a pein ngai sota pan suaiki meakot, ai luet eta. <sup>6</sup> A ma i men suaiki pein ngai, i sota pan pweipwei, pwe i pan lokaia melel. Ari so, i sota pan wia, pwe amen ender wia kin ia me lapa sang duen a kin kilang ia o duen a kin rong ia. <sup>7</sup> A pwe i ende aklapalapaki kaudial kapuriamui kai, tuka teketek pot mi nan uduk ai, iei nain Satan, me kin dokodoko ia, pwe i ende aklapalap. <sup>8</sup> Pan sile pak i ngidingid ong Kaun o, en kotiki sang ia me. <sup>9</sup> I ari masani ong ia: Ai mak itar ong uk, pwe manaman ai kin sansal ren me luet akan. Nan i me i pan suaiki ai luet akan, pwe manaman en Kristus en kotikot re i. <sup>10</sup> I me i perenki ai luet akan, o so konekon, o ansau apwal, o kamekam, o patau pweki Kristus, pwe ma i luet, ngai me kelail. <sup>11</sup> Ngai wialar pweipwei men, i me komail kare ong ia, mak eta, komail en kapinga kin ia, pwe i sota tititiki sang wanporon lapalap akan; ari so, sota meakot ngai. <sup>12</sup> Pwe mangidi en wanporon wiaui er nan pung omail ni kanongama melel o ni kilel akan, o ni men kapuriamui kan, o ni manaman akan. <sup>13</sup> Pwe nin da, me komail tititikki sang momodisou tei kan, ele iet eta: I sota katoutoui kin komail meakot? Komail ari makeki ong ia sapung wet. <sup>14</sup> Kilang, i onoper pwar wong komail kasilepak, o i sota pan kaponedede komail, pwe i sota kin rapaki me noumail, a komail. Pwe kaidin seri kan en naka penang me wia ir ada, a me wia ir da ong seri kan. <sup>15</sup> A i mauki melel kiki wei mearkos, pil pein ngai ong ngen omail, i sota insenoki, ma omail pok ong ia tititiki sang ai limpok lapalap ong komail. <sup>16</sup> Ari i eta, i sota kaponedede komail; a pweki ai lolekong, i kaloedier komail. <sup>17</sup> De i aduen, i adia sang amen komail ekis ren me i kadar wong komail er? <sup>18</sup> I poeki ren Titus ap kadar wong komail pil ri atail iang i. Ari da, Titus pitia sang komail meakot? Kit so aluki ngen ota de ni lip ota? <sup>19</sup> Ansau

warai me komail kiki ong me se pan pur ong, kapungala pein kit ong komail. Kit kin lokaia ki Kristus mon Kot. Kompok kan, mepukat karos kin wiaui, pwen kamauiada komail. <sup>20</sup> Pwe i masak ni ai pan pwar wong komail, me i sota pan diar komail, duen me i mauki, o komail pil sota pan diar ia, duen me komail mauki. Ele kapei lokaia, o peirin, o makar, o akamai, o kawaikoto, o lidou mongin, o aklapalap, o moromorong mi re omail. <sup>21</sup> Pwe ni ai pan pure wong komail, ele Kot pan kotin kanamenok kin ia komail, o i pan insensuedeki me toto, me wiadar dip mas o, ap sota kalukila ar samin, o nenek, o dodok sued, me re wiadar.

## 13

<sup>1</sup> METET ai pwar wong komail kasilepak, karos ap pan pung kila saunkadede riamen de silimen. <sup>2</sup> A duen me i inda mas o o pil ni ai pwar wong komail er kariapak iduen i pil indang komail ansau wet, mon ai pan mi re omail, irail me wiadar dip mas o, o pil me tei kan karos, i lao pwar wong komail kasilepak, i sota pan dukedi, karos lao pungier. <sup>3</sup> Pwe komail kin rapaki kilel eu, duen me Kristus kotin kalokaia ia, me sota luet nan pung omail, a kin manaman nan pung omail, <sup>4</sup> Pwe a kamatala ni a luet, ap id ieiaski manaman en Kot, a ma kit iang i luet, kit ap pan iang i memaureki manaman en Kot nan pung omail. <sup>5</sup> Komail sosong pein komail, ma komail kin weweideki poson; komail kasau pein komail; de komail so asa duen pein komail, me Iesus Kristus kotikot lol omail? A ma so, komail me sapung. <sup>6</sup> A i kaporoporeki, me komail pan dedeki, me kaidin kit me sapung. <sup>7</sup> A se kin kapakap ren Kot, komail ender wia me sued. Kaidin pweki kit en indand mau a pwe komail en wia me pung a kit en dueta me so katepa. <sup>8</sup> Pwe kit sota kak palian melel, a kapwaiada me melel. <sup>9</sup> Pwe kit peren, ma se me luet, a komail me kelail, o i me se men, komail en unsokala. <sup>10</sup> Ari, i me i intingki wei mepukat ni ai doo wei, pwe i de ngil patik ni ai koren, duen manaman, me Kaun o kotiki ong ia, pwen kamaui, a kaidin pwen kawela. <sup>11</sup> Ari ri ai kan, komail en pereperen o unsokala, o insenemau pena, komail lol ta pot o popol! Kot en limpok o popol ap pan kotikot re omail. <sup>12</sup> Komail ranamaui pena metik sarau. En sarau kan karos ar ranamaui wong komail. <sup>13</sup> Mak en Kaun Iesus Kristus, o limpok en Kot, o atail saupena ren Ngen sarau en kotikot re omail karos! Amen.

## EN PAULUS A KISIN LIKAU ONG MEN KALESIA.

<sup>1</sup> PAULUS wanporon amen kaidin sang ren aramas akan, pil kaidin pan aramas akan, a pan Iesus Kristus o Kot Sam, me kotin kaiasadar i sang ren me melar akan, <sup>2</sup> O ri atail akan karos, me mi re i, at ranamau ong momodisou en Kalesia kan: <sup>3</sup> Mak o popol sang ren Kot Sam o atail Kaun Iesus Kristus en mi re omail; <sup>4</sup> Me kotin sokonpaude ki pein i ki dip atail, pwen dore kitail sang ni me sued akan mi sappa, duen kupur en Kot o Sam atail. <sup>5</sup> Lingan en ko ong i kokolata! Amen. <sup>6</sup> I puriamuiki omail madang wuki sang i, me molipe komaail pan mak en Kristus, ap wuki ong eu rongamau; <sup>7</sup> A sota eu mia. Ari so, akai mia, me kin kapingada komaail, o irail men kalikame rongamau en Kristus. <sup>8</sup> A ma kit de tounlang amen sang nanlang pan padaki ong komaail eu rongamau, me toror sang rongamau, me se padaki ong komaail er, i en riala. <sup>9</sup> Duen me se indada mas o, iduen se pil purong inda: Ma amen pan padaki ong komaail eu rongamau, me toror sang me komaail aleer, i en riala. <sup>10</sup> Iaduen, i kin men kaperenda aramas akan de Kot? De i kin rapaki konekon ren aramas akan? Ma i men konekon ren aramas akan, i ap sota ladun Kristus. <sup>11</sup> I katitiki ong komaail ri ai kan, rongamau me i padakier, a sota tapi sang ren aramas. <sup>12</sup> Pwe i sota ale sang ren aramas amen, o sota me padaki ong ia, a a koki dong ia kasale pan Iesus Kristus. <sup>13</sup> Pwe komaail ronger duen ai wiawia en mas nan pung en men Sus akan, duen i kin morouo ong momodisou en Kot lapalapia o kawe ir ala. <sup>14</sup> O i kakairida nin lamalam en Sus akan madang sang me toto, me kit ti ta ieu o toun sap ta ieu, o i nantiong kapwaiada padok en sam at akan. <sup>15</sup> A Kot lao kupurenda, me kotin kilele ia di sang ni kaped en in ai, o me kotin molipe ia ki a mak, <sup>16</sup> En kasale ong ia sapwilim a Ol, pwe i en padaki ong men liki kan duen i, i ap pitipit wiada o sota kalelapok ren uduk o nta. <sup>17</sup> O i pil so pwar lang Ierusalem ren irail, me wanporon akan mo i, a i kolang Arapien ap pil pure dong Damaskus. <sup>18</sup> Ari, murin par silu i ap kodalang Ierusalem, pwen kilang Kepas. I ap mimieta re a ran eisoklimau. <sup>19</sup> A sota amen ren wanporon akan, me i kilang, Iakopus ta, ri en Kaun o. <sup>20</sup> A me i inting wong komaail, Kot me kotin mangi, me i sota likam. <sup>21</sup> Muri i ap kola nan wein Sirien o Silisia. <sup>22</sup> A momodisou en Iudaa kan me mi pan kupur en Kristus sasa ia. <sup>23</sup> A i eta, irail ronger, me i me

kin morouo ong kit mas o, i me kin padaki poson ansau wet, me a kin kaokaoe mas o. <sup>24</sup> Irail ap kalinganda Kot pweki ngai.

## 2

<sup>1</sup> KADEKADEO murin par eisok paieu ngai pil kodalang Ierusalem iang Parnapas o Titus pil iang ia. <sup>2</sup> A i kokidala kasalepa eu; padaki ong irail duen rongamau, me i kin padaki ong men liki kan, ap katoror ong ir, me kalok mau, pwe i ender tang mal, ma met de mur. <sup>3</sup> A pil Titus, me iang ia, men Krik amen, re sota kakaliki ong i, en sirkomsaisela, <sup>4</sup> A pweki akai saulang likam, me wailong, pwen masamasan at saledokalar, me se aleer ren Kristus Iesus, pwen kalidui kit ala. <sup>5</sup> A se sota man peiki ong irail, pwe melel en rongamau en mimieta re omail. <sup>6</sup> A irail me kalok mau, i sota asa duen ar tiak en mas o, a pil menda re i, pwe Kot sota kin lipilpil aramas amen, irail me indand mau, sota ki ong ia eu padak toror. <sup>7</sup> A irail lao kilanger, me i aleer ai koa, en padaki ong me sosirkomsais rongamau, dueta Petrus ong me sirkomsais. <sup>8</sup> A me kamanada Petrus, pwen kapwaiada a koa en wanporon ren sirkomsais i me i pil keleki ni ai dodok ren men liki kan. <sup>9</sup> A Iakopus, o Kepas, o Ioanes, me re wiaki ur oko, re lao kilanger mak o me i aleer, rap itipa ki ong ngai o Parnapas pali maun en pa, o kit karos wiaki eu, me kit en kola ren men liki kan, a irail ren sirkomsais. <sup>10</sup> A re kakaliki ong kit, me sen apapwali me samama kan. Ngai ari nantiong kapwaiada. <sup>11</sup> A Kepas lao pwaralang Antiokien, i ap palian i pwe kalok sued mi re a. <sup>12</sup> Pwe mon akai pwarado sang ren Iakopus, a sakasak ren men liki kai, a ni ar pwarador, a puei sang katororela pein i, pwe a masak men sirkomsais. <sup>13</sup> O pil Sus tei ko iang i malamalaunda; o Parnapas lodi ong pil wia malaun. <sup>14</sup> A ni ai kilanger, me re sota inen weita, duen melel en rongamau, i ap indai ong Kepas mon irail karos; ma koe men Sus amen kin wia tiak en men liki kan, a so tiak en men Sus, menda koe kin kakaliki ong men liki kan, ren wiada tiak en men Sus? <sup>15</sup> Kita udan men Sus a sota dipan dueta men liki kan, <sup>16</sup> Ap asa, me aramas amen sota kak pung kila wiawia en kapung kan, pwe a poson Iesus Kristus eta i me kitail pil posoneki Kristus Iesus, pwe kitail en pung kila poson Kristus, a kaidin wiawia en kapung kan; pwe uduk sota kak pung kila wiawia en kapung kan. <sup>17</sup> A ma kitail men pung kila Kristus, ap diarokada, me kitail me dipan, daduen, Kristus me papan dip? O so! <sup>18</sup> Pwe ma i pan pur ong kauada, me i kawelar, nan i pan wia kin ia me dipan amen. <sup>19</sup> Pwe i mekilar kapung, ap solar memaauri ong kapung, pwen maauri ong Kot; ngai lolular iang Kristus. <sup>20</sup> Kaidin



ngai me memaur, pwe Kristus kotin ieiasata lolei. Pwe arain ai maur en pali uduk, i kin memaureki poson Sapwilim en Kot, me kotin pok ong ia o sokonpaudeki ong ia pein i. <sup>21</sup> I sota kasamal la mak en Kot; pwe ma aramas kak pung kila wiawia en kapung kan, Kristus ap matala mal.

### 3

<sup>1</sup> O komail men Kalesia pweipwei, is me kotaeu komail? Pwe mom en Iesus Kristus a lopular wiawier mon mas omail. <sup>2</sup> Iet eta me i men kalelapok re omail: Komail aleer Ngen ni wiawia en kapung kan, de ni padak en poson? <sup>3</sup> Iduen omail lolepon? Komail tapia kidar Ngen, a komail men kaimwisok kilar uduk? <sup>4</sup> Komail kalokolok laud, ap sota pan katapa? Ma idue met a sota kak wiawia. <sup>5</sup> Me kotiki ong komail er Ngen, o wia manaman akan nan pung omail daduen, wiawian kapung kan me kareda, de padak en poson? <sup>6</sup> Dueta Apraam me poson Kot, ap wadok ong i kapunga pa. <sup>7</sup> Komail ap asa duen irail me kin poson, irail seri en Apraam. <sup>8</sup> A kisin likau o asaer mas o, me Kot, pan kotin kapungala men liki kin ki poson, i me a padaki ong Apraam rongamau mas o: Wein sappa karos pan paie kin uk! <sup>9</sup> Pwe karos me poson, pan lang Apraam poson kapaida. <sup>10</sup> Pwe me kin kaporoporeki wiawia en kapung kan, pan karia. Pwe a intingidier: Karos me riala, me sota pan dadaurata mekaros, me intingidier nan puk en kapung, pwen kapwaiada. <sup>11</sup> A sansal, me sota amen kak pung kila kapung ren Kot; pwe me pung amen pan memaureki poson. <sup>12</sup> A kapung sota tapi sang ni poson, pwe meamen kapwaiada mepukat, pan memaur kida. <sup>13</sup> Kristus me kotin dore kitail sang ni karia pan kapung, ni a ria kin kitail lar; pwe a intingidier: Amen amen me langalong nin tuka o me riala. <sup>14</sup> Pwe pai en Apraam, me tapi sang ren Kristus Iesus, en lel penang men liki kan; pwe kitail en ale inau en Ngen ki poson. <sup>15</sup> Ri ai kan, i pan lokaia ni tiak en aramas akan. Iaduen inau en aramas eu me kileledier, sota amen me pan kawela de ekis, me a pan pouse ong. <sup>16</sup> Ari, inau o wiawier ong Apraam o kadaudok a. A sota masanier: Kadaudok a toto, pwe duen me ta men: Kadaudok om me ta men, iei Kristus. <sup>17</sup> Iet me i inda: Inau me Kot kotin kileledier, a sota kak okila kapung o, me wiawier saunpar papuki sileisok murin inau o, pwe inau ede pwaida. <sup>18</sup> Pwe ma soso tapi sang kapung, a sota kak tapi sang inau; a Kot kotiki ong Apraam ki inau. <sup>19</sup> A menda kapung? A wiawier pweki sapung kan, kadaudok o lao pwarado, me inau wiawia ong, me wiawier ren tounlang kan ki pa en saunkapung. <sup>20</sup> Ari, saunkapung sota kin kelepe eta, a Kot me kelepe eta.

<sup>21</sup> A iaduen, kapung o kin palian inau en Kot akan? O so! A ma kapung eu pan wiawia, me pan kak kamaurela, nan melel, pung ap pan tapi sang nan kapung. <sup>22</sup> A kisin likau o me kol penang dip meakoros pwe inau en tapi sang ni poson Iesus Kristus, en pai ong irail, me poson. <sup>23</sup> Ni ansau poson saikenta pwarado, kitail nikinik o salidier pan kapung, lao poson pan kasansaleda. <sup>24</sup> Ari, kapung atail saunpadak, lao Kristus pwarado, pwe kitail en pung kila poson. <sup>25</sup> A poson lao pwarador, kitail solar mi pan saunpadak o. <sup>26</sup> Pwe komail karos seri en Kot, ki poson Kristus Iesus. <sup>27</sup> Pwe komail me paptaiser ong Kristus, komail likau ki dar Kristus. <sup>28</sup> Solar men Sus de Krik, solar ladu de me maioda, solar ol de li komail karos dupeneta ren Kristus Iesus. <sup>29</sup> A ma komail sapwilim en Kristus, nan komail pil kadaudok en Apraam, o seri soso duen inau o.

### 4

<sup>1</sup> A iet me i men inda: Soso men arain a seri, a so horor sang ladu men, ari so, a kaun en meakoros. <sup>2</sup> A kin upa ong saunpadak o saunkoa kan lao lel ansau me sam a kileledier. <sup>3</sup> Iduen kitail ni atail kisin seri, kitail kin upai ong padak en sappa kan. <sup>4</sup> A ansau lao leler, Kot ap kotin poronedo sapwilim a Ol, me ipwidi sang ren li amen, ap mi pan kapung o. <sup>5</sup> Pwen kasaledoka ir ala, me mi pan kapung, pwe kitail en wiala sapwilim a seri. <sup>6</sup> Komail ari seri kan, i me Kot ap kotin poronedo Ngen en sapwilim a Ol nan mongiong atail, me kin likelikwir: Apa Sam! <sup>7</sup> Ari, solar ladu men, pwe seri ta; a ma seri nan pil seri soso en Kot. <sup>8</sup> A ni ansau o me komail sasa Kot, komail paer me kaidin udan kot akan. <sup>9</sup> A metet komail asalar Kot, o Kot me kotin mangi komail melel, menda komail pil sapa lang lamalam sued o sakanekan, me komail men pur ong papa? <sup>10</sup> Komail kin kasarauiera ran akai, o saunipong kai, o ansau kai, o saunpar kai. <sup>11</sup> I ngong kin komail, pwe ele ai dodok ong komail sota pan kadepa. <sup>12</sup> Ri ai kan, i ngidingidi kin komail, en dueta ngai, pwe ngai kin dueta komail, pwe sota me sued kot, me komail wiai ong ia er. <sup>13</sup> A komail asa due i mas o, me i padaki ong komail er rongamau ni ai luet en pali uduk. <sup>14</sup> O komail sota mamaleki ai songesong ni uduk ai o tata kin ia; a komail apwaila la dueta ngai tounlang en Kot amen, de dueta Iesus Kristus. <sup>15</sup> Iaduen wan omail pai ni ansau o! Pwe i kadede duen komail, ma a kak pa omail, komail pan pwadika sang por en mas omail ap ki ong ia. <sup>16</sup> Iaduen, i wiala omail imwintiti, pweki ai lokaia melel ong komail. <sup>17</sup> Arail nanantiong rapaki komail me sota mau; irail men kamueit kitail

pasang, pwe komail en id idauen irail. <sup>18</sup> Me mau ansau karos en nantiong me mau kan, a kaidin ta ni ai mi re omail. <sup>19</sup> Nai seri kan! I naitik sapa komail ki madaq, lao Kristus kawuk komail la ong pein mom a. <sup>20</sup> I men mi re omail ansau wet o men kawukila ngil ai, pwe i sasalar ir omail. <sup>21</sup> Komail, me kin men mi pan kapung o, indang ia, ma komail sota kin rong kapung o? <sup>22</sup> Pwe a intingidier, me nain Apraam putak riamen mia, amen sang ren na lidu, a amen sang ren me maioda. <sup>23</sup> A me song ren lidu ipwiki uduk, a me sang ren me maioda, ipwiki inau en Kot. <sup>24</sup> Mepukat karasepa eu, pwe met inau riau, eu sang ni nana Sinai, me kin naitiki ong na kan papa, i me Akar. <sup>25</sup> Pwe Akar nana Sinai nan Arapien, me rasong Ierusalem en met, o kin lidilidui iang na seri kan. <sup>26</sup> A Ierusalem, me mi poa, me maioda iei in atail. <sup>27</sup> Pwe a intingidier: Pereperen koe me li dapwan, me sota kin naitik, kadailong o werida koe, me so kaipwi ong, pwe nain li dapwan seri kan me toto sang me a warok mia. <sup>28</sup> A komail ri ai ol akan, me rasong Isaak, me seri en inau kan. <sup>29</sup> A duen mas o, me ipwiki uduk, me kailongki me ipwiki Ngen o, iduen ansau wet. <sup>30</sup> A da me kisin likau o masani? Kasela li lidu o na putak! Pwe putak en lidu sota pan iang nain li me maioda sosoki. <sup>31</sup> Ari ri ai kan, kitail sota seri en lidu, pwe nain me maioda.

## 5

<sup>1</sup> KOMAIL ari dadaurata en Kristus a kotin kamaioda kitail, komail ari kalaka pein komail, pwe komail der pur ong ni omail kanaudok. <sup>2</sup> Kilang, ngai Paulus indai ong komail, ma komail pan iang sirkomsais, nan Kristus sota pan katapai ong komail. <sup>3</sup> I pil kadede ong aramas karos, me pan sirkomsaisela, i en kapwaiada kapung pokon. <sup>4</sup> Komail, me men pung kila kapung o, muei sanger Kristus o pup wei sanger mak. <sup>5</sup> A kit kin auiaui ren Ngen ki poson kaporopor en pung. <sup>6</sup> Pwe ren Kristus Iesus sirkomsais de sosirkomsais sota meakot, pwe poson ta, me kin sansaleki dodok en limpok. <sup>7</sup> Komail tanger mau, is me karompwa komail, pwe ender peiki ong mele? <sup>8</sup> I song en kaweid sota kin tapi sang me molipe komail er. <sup>9</sup> Kalap kis kin kamutala dolepa karos; <sup>10</sup> I kaporoporeki ren Kaun o me komail sota pan wia eu lamalam toror. A me kin kaping komail da, pan lodi ong kapung o, sota lipilipil is i. <sup>11</sup> A ngai, ri ai kan, ma i poden padaki duen sirkomsais, menda i kankangerangirla? Pwe ma iduen, a solar men kamakar pan lopu. <sup>12</sup> I men irail me kin kawe komail la, ren pil kawela pein irail. <sup>13</sup> A ri ai kan, komail paeker ong maio, komail der men maio, pwe tiak en pali uduk en pwaida, a komail papa amen

amen ni limpok. <sup>14</sup> Pwe kapung pon kapwai pan masan ta ieu: Koe en pok ong men imp om due pein uk. <sup>15</sup> A ma komail pakolok kaokaoe amen o amen, kalaka, pwe komail de momela. <sup>16</sup> A ngai inda: Aluki Ngen komail ap sota pan kapwaiada inong sued en uduk. <sup>17</sup> Pwe uduk kin inong iong me toror sang Ngen, a Ngen kin kotin inong iong me toror sang uduk, a ira parongarong pena, iei me komail sota wia kida, me komail kin men wia. <sup>18</sup> A ma Ngen pan kotin kalua komail, komail sota mimi pan kapung. <sup>19</sup> Wiawia kan en uduk me sansal. Iet akan: Nenek, samin, monepil, <sup>20</sup> Pongi ong ani mal, wun ani, kailuk, akatat, luak, makar, akamai, kamaouou, padak likam. <sup>21</sup> Peirin, kamom soko, kaped en manga ape. Iran mepukat i padaki ong komail er mas o, me irail, me kin kapwaiada mepukat, sota pan sosoki wein Kot. <sup>22</sup> A iet akan wa en Ngen: Limpok, peren, popol, kanongama, kadek, kamau, poson, opampap liki sang me sued. <sup>23</sup> Sota kapung pan mepukat. <sup>24</sup> A me sapwilim en Kristus, kalopuelar uduk iangaki tiak sued o inong sued akan. <sup>25</sup> Ma kitail memaureki Ngen, kitail en pil alu-aluki Ngen o. <sup>26</sup> Kitail der inong iong wau ren aramas, o der kamorongada ong amen amen, o der peipeirin amen amen.

## 6

<sup>1</sup> RI ai kan ma aramas amen pan lodi ong me sued kot, komail, me ngenin kasapaledo i ni ngen en opampap, ap masamasan pein uk, pwe koe ender pil lodi ong songesong. <sup>2</sup> Pelikitki pena nan pung omail katoutou pamail, pwe iduen komail pan kapwaiada kapung en Kristus. <sup>3</sup> Pwe ma amen lame-lame, me i meakot, nan a kin kotaue pein i, pwe sota i meakot. <sup>4</sup> A amen amen en kasasong ong pein a wiawia, ap pan suaiki pein i, a kaidin amen aramas. <sup>5</sup> Pwe amen amen en pein wa audepa. <sup>6</sup> A me kin padakki masan o, en kida song en mau karos ong i, me kin padaki i. <sup>7</sup> Komail der kiki ong, me komail pan kak piti Kot, pwe meakot aramas kin kamoredi ong, i me a pan dolung sang. <sup>8</sup> Pwe me kin kamoredi ong ni uduk a, a pan dolung sang ni uduk a men soredi; a me kin kamoredi ong Ngen, a pan tungole sang ren Ngen maur soutuk. <sup>9</sup> Kitail der pangaki atail wiawia mau kan, pwe ni ansau me kon ong, kitail pan dolung, ma kitail sota pan pangadar. <sup>10</sup> Ma a kak pa atail, kitail en wia mau ong karos, a mas ong kisan me poson akan. <sup>11</sup> Kilang duen kisin likau laud, me i inting wong komail er ki pein pa i. <sup>12</sup> Ir me kin men lolok mau ni uduk, kin inong iong komail en sirkomsaiselar; pwe irail ender kamekame ki lopu en Kristus. <sup>13</sup> Pwe pein irail me sirkomsaisela, sota kin kapwaiada kapung,

a irail kin men, komail en sirkomsaisela, pwen suaiki uduk omail. <sup>14</sup> A duen ngai, i sota man mauki suaiki, a iet eta iran lopu en atail Kaun Iesus Kristus, pweki i sappa katia sang ia o ngai katia sang sappa. <sup>15</sup> Pwe sirkomsais de sosirkomsais sota meakot, a me kawilikapadar. <sup>16</sup> Irail karos me inen ki wei ta padak pot et, en popol o kalangan, o ong Israel en Kot. <sup>17</sup> Sang met kokolata sota amen en morouo ong ia, pwe i wa sili ta nan war ai lip en Iesus akan. <sup>18</sup> Mak en atail Kaun Iesus Kristus en kotikot ren ngen omail ri ai kan! Amen.

## EN PAULUS A KISIN LIKAU ONG MEN EPISOS.

<sup>1</sup> PAULUS wanporon en Iesus Kristus amen pan kupur en Kot ong me sarau i o lelapok kan ren Kristus Iesus me mi Episus. <sup>2</sup> Mak o popol sang ren Kot Sam atail o atail Kaun Iesus Kristus en mi re omail! <sup>3</sup> Meid iasanai Kot o Sam en atail Kaun Iesus Kristus, me kapaia kin kitail lar song en pai ngenin karos sang nanlang ren Kristus. <sup>4</sup> A kotin pil kitail dar re a, mon sappa saikenta pasondier, pwe kitail en sarau i o minla mo a ni limpok. <sup>5</sup> Me pil kileledier, me kitail, en wiala sapwilim a seri ki Iesus Kristus, duen a kotin kupura mauki. <sup>6</sup> Pwen kalinganada a mak lapalap, me a kotin make kin kitail ren Kompoke pa a, <sup>7</sup> Me kotin dore kin kitail la nta o lapwadan dip akan ki a mak lapalap. <sup>8</sup> Me a kotiki ong kitail ni song en lolekong o koiok karos, <sup>9</sup> Ni a kotin diarok ong kitail er me rir en kupur a duen a kotin kupuramauki o duen a kileledier ren pein i. <sup>10</sup> Pwen pwaida ansau lao leler en wisik penang tapwi ta ieu meakaros, ren Kristus, men nanlang kan o men sappa kan ong pein i. <sup>11</sup> Me pil kare ong kitail soso eu, kitail me kileledier duen kupur en i, me kin wiada meakan karos, duen a kotin kupura, <sup>12</sup> Pwe kitail en wiala men kalinganada i, kitail, me kaporoporeki Kristus, <sup>13</sup> Me komail pil kaporoporeki murin omail ronger masan en melel o rongamau en kamaur; me pil kileledier komail kidier Ngen sarau en inau, ni omail posonlar. <sup>14</sup> Iei men kamelele en atail soso, lao lel ansau en atail konodi maur soutuk, pwen wiala sapwilim en Kot o men kapinga a lingan. <sup>15</sup> Ari, i lao rongadar duen omail poson Kaun Iesus o duen omail limpok ong sarau kan karos, <sup>16</sup> I sota kin dukedi sang ai danke pweki komail, o i kin tamatamanda komail ni ai kapapak akan; <sup>17</sup> Pwe Kot en atail Kaun Iesus Kristus, Sam en lingan, en kotiki ong komail ngen en er-pit o kaudial, pwen asada i, <sup>18</sup> O kotin kamairaini mas en mongiong omail, pwe komail en kak dedeki kaporopor en omail paeker, o lingan laud en soso, me onoper ong sarau kan, <sup>19</sup> O a manaman kaulap ong kitail, me posonlar, duen a dodok manaman, <sup>20</sup> Me a kotin kasansaledar ren Kristus ni a kotin kaiasada i sang ren me melar akan, ap kasapwiladang pali maun nanlang, <sup>21</sup> Ilela sang meakan karos, o manaman karos, o kelailel o men poa kan o mar karos, kaidin ni mui wet eta, pwe pil ni mui kokodo. <sup>22</sup> O a kotiki ong meakaros pan aluwilu a kan, o kotin kasapwiladang tapwin meakaros ren

momodisou, <sup>23</sup> Iei war a, iei kadir pan me kadirela meakaros.

## 2

<sup>1</sup> PIL dueta komail ni omail melaki sapung o dip akan, <sup>2</sup> Me komail dadaureki mas duen tiak en sappa et, o duen wiawia en saupeidi o, me manaman pan lang, iei ngen o, me kin dodok ren seri sopeik kan ansau wet. <sup>3</sup> A kitail karos pil weweid nan pung arail mas o ni inong en uduk atail, o kapwaiada inong en uduk o lamelam, o kitail me udan seri en ongiong akan dueta me tei kan. <sup>4</sup> A Kot, me dir en kalangan, pweki a limpok me a kotin pok ong kitail lar, <sup>5</sup> Nin dokan atail melaki sapung kan, nan a kamauri kitail dar ki Kristus, pwe mak o, me komail dore kila, <sup>6</sup> O pil kotin kamaur kitail dar o kotin kasapwil kitail dang nanlang ren Kristus Iesus, <sup>7</sup> Pwe a en kotin kasansaleda a mak o kalangan lapalap ni mui kokodo ong kitail ren Kristus Iesus. <sup>8</sup> Pwe ni poson komail kamaur kilar mak; a kaidin pweki pein komail, a pai eu ren Kot, <sup>9</sup> Kaidin ki wiawia kan, pwe sota amen en aksuaiki. <sup>10</sup> Pwe sapwilim a dodok kitail, me wiauier ren Kristus Iesus ong wiawia mau kan, me Kot kotin kaonopadang kitail er, pwe kitail en dadaurata. <sup>11</sup> Komail ari tamatamanda, me komail men liki mas o, me aluki uduk pwel, men kaidinda sosirkomsais ren me sirkomsais, me kin wiaui ni uduk mangin pa. <sup>12</sup> Pwe ni ansau o komail likin Kristus, o likin pai en Israel, o likin inau en soso kan; i me sota omail kaporopor o sota omail Kot ni sappa wet. <sup>13</sup> A komail me doo wei sang mepukat mas o, a ansau wet komail me korendor o mi ren Kristus Iesus pweki ntan Kristus. <sup>14</sup> Pwe i atail popol, me wia kin ira eu, o me kotin kawela kel o, me mi nan pung ara, <sup>15</sup> Ni a kotiki sang imwintiti re 'ra ki pali uduk a. Iei kapung o me audekier kusoned akan, pwe en kotin wia kin ir ala aramas kap ta men ong pein i. <sup>16</sup> Pwen kalolamaui ong Kot ira ni war ta ieu pan lopu murin a kotin tiakedi imwintiti ki lopu. <sup>17</sup> O a kotidoer padaki popol ong komail, me doo wei sang, o popol ong me koren akan. <sup>18</sup> Nan pweki i kita karos kak tu ong Sam ki Ngen ta ieu. <sup>19</sup> Komail ari solar men liki o men wai, a me pweledan akan iangaki sarau kan o kisan penainai en Kot. <sup>20</sup> Me kakauda pon pason en wanporon o saukop akan, a pein Iesus Kristus me takain pukakaim. <sup>21</sup> I wasa kasukasuk kin koda sang ia, wiala tanpas sarau en Kaun o, <sup>22</sup> Me komail pil iang kokon penang mol en Kot ren Ngen.

## 3

<sup>1</sup> I me ngai Paulus en Iesus Kristus a salidi men pweki komail men liki kan, <sup>2</sup> Due me

komail rongadar iran ai koa dodok en mak en Kot, me i aleer pweki komail. <sup>3</sup> A kaudial eu, me kasansale ong ia, me rir akan, duen ai inting motomot ong komail er nin tapi o <sup>4</sup> Ari, ma komail pan wadok, komail ap pan diar, duen ai lolekong ni me rir akan ren Kristus. <sup>5</sup> Me sota kadiarok ong aramas akan ni muein mas o, ap kadiarok ong sapwilim a wanporon o saukop sarau kan ren Ngen: <sup>6</sup> Pwe men liki kan en iang soso o iang kisan war a, o iang a inau ren Kristus Iesus ki rongamau, <sup>7</sup> Me ngai wiala papa men duen ai pai en mak en Kot, me i aleer ki a manaman lapalap. <sup>8</sup> Ngai, me tikitik sang sarau kan karos, aleer mak wet, en padaki ong men liki kan duen kapwapwa lapalapia en Kristus. <sup>9</sup> O pwen kamaraini amen amen duen koa dodok en rir akan, me nekinek sang nin tapin kua ren Kot, me kotin kapikadar meakan karos, <sup>10</sup> Pwe ansau wet men poa kan o me manaman akan, me kotikot nanlang, en ereki momodisou song en erpit en Kot karos. <sup>11</sup> Duen kupur a, me a kotin kileledier ni tapin kua ren Kristus Iesus atail Kaun. <sup>12</sup> Pweki i me kitail pil kak aimaki tu ong Kot ni atail kapoporop o poson i. <sup>13</sup> Nan i me i men poeki, komail ender motot ki ai kamekam kin komail, pwe men kalinganada komail. <sup>14</sup> I me i kin kelepuiki ong Sam en atail Kaun Iesus Kristus, <sup>15</sup> Me mar en penainai pokon nanlang o sappa tapi sang ia. <sup>16</sup> Pwen kotiki ong komail manaman, duen a kapwapwa en a lingan, en kelaileki Ngen i nan pali lol en aramas, <sup>17</sup> Pwe Kristus en kotikot nan mongiong omai pweki omai poson, pwe komail en tengedi o sondi ni limpok, <sup>18</sup> Ap kak ong iang sarau kan karos dedekida talap, o anged, o lol, o ile; <sup>19</sup> O en pil asada limpok en Kristus, me sikida sang erpit karos, pwe komail en direki kupur en Kot karos. <sup>20</sup> A i, me manaman ong wiada, me lapa sang atail poeki o lamelame duen o manaman o, me kin dodok lol atail. <sup>21</sup> Lingan en ko ong i ni momodisou pan Kristus Iesus kokolata soutuk. Amen.

#### 4

<sup>1</sup> NGAi en Kaun a salidi men, kin panaui komail, pwe komail en kekeid inenweita ni koa eu, me komail paeker ong, <sup>2</sup> Ni karakarak melel, o opampap, o kanongama, o limpok pena nan pung omai. <sup>3</sup> Angkelail ong wia minimin eu ni Ngen saupena ki sal en popol. <sup>4</sup> War ta ieu, o Ngen ta ieu, duen me komail paeker ong ni kaporopor ta ieu, en omai paeker ong. <sup>5</sup> Kaun ta men, poson ta ieu, paptais ta ieu, <sup>6</sup> Kot o Sam en karos me ta men me kotin poedi meakaros o daudaulole, o me kotikot lol atail karos. <sup>7</sup> A kitail karos aleer atail pai en mak duen song en kupur

en Kristus. <sup>8</sup> I me a kotin masani: Ni a kotidalang poa, a kotin saliedi me salidi kan, o a kotiki ong aramas pai kan. <sup>9</sup> A iaduen, ma a kotidalang poa, kaidin a pil so kotidilar pa sed, wasa lolia mas o? <sup>10</sup> Me kotidila, i ota, me kotida wei ileila sang nanlang kan karos, pwen kadirela wasa karos. <sup>11</sup> O a kotin kasapwilada akai, en wanporon akan o akai en saukop akan, o akai en warongamau kan, o akai en silepa o saunpadak kan. <sup>12</sup> Pwen kapungala sarau kan ong wiawia dodok eu, me pan kauada war en Kristus. <sup>13</sup> Kitail karos lao lel ong poson ta ieu, o lolekong ki Sapwilim en Kot, o wiala ol melel, me paroki ong Kristus ni a unsokela, <sup>14</sup> Pwe kitail en solar tau en seri pwelel, me mokimokideki sili padak likam, me kin pwai kida kotaen en aramas akan o ar likam, o widiwiding me re kin wiada, pwen kaweid sapung. <sup>15</sup> A kitail en melel ni limpok, ap kakairida ni song karos ong Kristus, me tapwi o. <sup>16</sup> Me war pon kakauda sang o kokon akan karos katengeteng pena ia; a kokon pukat papa pena, duen dodok en kokon akan eu eu, duen ar itar ong, iduen war o kin kakairida o maular ni limpok. <sup>17</sup> I me i indai ong komail o kadede kila Kaun o, me komail ender weweid dueta men liki kan kin wia ni aklapalap en ngen ir. <sup>18</sup> Me ngen arail rotorotalar, o re sang maur en Kot, pweki ar sololekong me mi lol arail o pweki mongiong arail kapitakailar. <sup>19</sup> Me solar pam wasa, ap muedi ong pein irail, en dender o inongiong kapwaiada song en saut akan karos. <sup>20</sup> A kaidin iduen, me komail asadar ren Kristus. <sup>21</sup> Ma komail ronger duen i o padakki i, me tiak melel mi ren Iesus. <sup>22</sup> Komail ari muei sang tiak en mas o aramas maring, me kin kawe kila pein i inong sued. <sup>23</sup> A komail en kawilikapada ngen omai! <sup>24</sup> O danwar anakila aramas kap, me wiauer duen kupur en Kot, ni melel o pung o sarau. <sup>25</sup> I me komail en kasela likam amen amen ap lokaia melel ong men impa, pwe kitail sau ta ieu. <sup>26</sup> Ni makar komail der wia dip, o katipin der kirila mon omai insenemaula. <sup>27</sup> Ender duki ong tewil o! <sup>28</sup> Me pirap, ender pur ong pirap, a mak eta, en dodok, kadokeki pa kan dipisou mau, pwen kaonop da kisakis ong me samama kan. <sup>29</sup> Kasoi saut ender ko wei sang nan au omai, a men kamau, pwen papaki ong me karong akan me mau. <sup>30</sup> Komail der kamauke Ngen sarau en Kot, me komail kilelekier ong ran en kasapaledo! <sup>31</sup> A limelimek sued, o lingarangar, o makar, o men pei, o lalaue en doo wei sang komail, o pil song en sued karos. <sup>32</sup> A komail en kadek pena, o poka pena, o mak pena amen amen, dueta Kot kotin maki ong komail ren Kristus.

## 5

<sup>1</sup> KOMAIL kaalemongi Kot dueta seri kompok kan. <sup>2</sup> O kekeid ni limpok dueta Kristus, me kotin, pok ong kitail, ap kotin sokonpaude kin kitail, pwen wiala kisakis o mairong eu, me kin pomau ong Kot. <sup>3</sup> A nenek, o song en saut karos, o norok kapwa ender man pwaida re omail, duen me kon ong sarau kan. <sup>4</sup> Pil der lokaia sued, o kaman, o lokaia mal, me sota kon ong, a iet: Komail en danke. <sup>5</sup> Mepukat komail en asa o dedeki, me sota me nenek, de samin, de me norok kapwa, me pongi ani tikiti, pan kak sosoki wein Kristus o Kot. <sup>6</sup> Sota amen en kotau ki komail lokaia mal, pwe mepukat kin kareda ongiong en Kot ong seri sopeik kan. <sup>7</sup> Komail ender kis arail. <sup>8</sup> Pwe mas o komail me rotorot, a met komail marainlar ren Kaun o; weweid wei duen seri en marain akan. <sup>9</sup> Pwe wan marain mepukat: Kamau, o pung o melel. <sup>10</sup> O kasauia, me kin kaperenda kupur en Kaun o. <sup>11</sup> O der waroki ong wiawia sued en me rotorot akan, a mak eta, en kapung ong irail. <sup>12</sup> Pwe me re kin wiada wasa rir, me sued o sota mau ong, en inda. <sup>13</sup> A karos me pan kasansaleda, pan kadiarok kida marain, pwe marain kin kasansaleda mekaros. <sup>14</sup> I me a kotin masani: Pirida koe me mamair, o paurida sang ren me melar akan, a Kristus pan kamarain uk ada. <sup>15</sup> Kalaka, pwe komail en keid ineneweita, kaidin duen me lolepon a duen me lolekong kan. <sup>16</sup> Audaud ansau mau, pweki ran akan me sued. <sup>17</sup> Komail ari ender lamponla, a en lolekong, pwe i duen kupur en Kaun. <sup>18</sup> Ender kamom wain, pwe a kin kareda tiak sued, a komail en direki Ngen. <sup>19</sup> O sauas pena ki psalm, o kaul en kaping, o kaul ngenin; komail kaul o kasang ong Kaun o nan mongiong omail. <sup>20</sup> Danke kaukaule Kot o Sam ni mar en atail Kaun Iesus Kristus. <sup>21</sup> O papa komail pena amen amen ni masak dol en Kristus. <sup>22</sup> Komail li akan, udi ong pein omail warok kan dueta ong Kaun. <sup>23</sup> Pwe ol o me tapwin a paud, dueta Kristus me tapwin momodisou, o i me Saunkamau pan war a. <sup>24</sup> A duen momodisou kin udi ong Kristus, iduen li akan en udi ong ar warok kan ni mekaros. <sup>25</sup> Komail ol akan pok ong pein omail warok kan, dueta Kristus kotin pok ong momodisou o kotiki dong i pein i. <sup>26</sup> Pwen kasarauiala i, o kamaekeleleda i ki pil o, iei a masan. <sup>27</sup> Pwen kasansale dong pein i momodisou lingan, me sota topala o omrok ape, a me sarau i so kaopa kot. <sup>28</sup> Nan iduen ol akan en pok ong ar warok kan dueta pein war arail akan. Me kin pok ong a warok, kin pok ong pein i. <sup>29</sup> Sota amen kin suedeki pein uduk a; pwe a kin kamanga o kanainai eta, dueta Kristus kin kotin apwali momodisou. <sup>30</sup> Pwe kitail

me kasang en war a, o uduk a, o a kokon akan. <sup>31</sup> I me aramas o pan muei sang sam a o in a, ap muei ong a paud, ira ari pan uduk ta ieu la. <sup>32</sup> Meid kaponepon lapalap eu; a ngai kaparokki duen Kristus a warokeki ong momodisou. <sup>33</sup> Pil dueta komail, amen amen komail en pok ong a warok dueta pein i, a li o en kakaki a warok.

## 6

<sup>1</sup> KOMAIL seri kan peiki ong me wia komail ada pan Kaun o, pwe i me pung. <sup>2</sup> Kakaki sam om o in om, iei tapin kusoned, me inaup mia, <sup>3</sup> Pwe koe en insenemau o pil maur warai nin sappa. <sup>4</sup> Komail sam akan der kamakar mal noumail seri kan, kakair irail ada ni kaian mau o panau ong Kaun o. <sup>5</sup> Komail ladu kan en oke omail saumas akan ni pali uduk ni masak o rerer o pil ni tiak en karakarak en mongiong omail dueta ong Kristus. <sup>6</sup> Kaidin sansal mon aramas eta, pwen konekon re 'rail, a en dueta ladu en Kristus, me kin pereperen wiawia kupur en Kot sang mongiong omail. <sup>7</sup> O komail en papa mau, pwe ong Kaun o, a kaidin ong aramas akan. <sup>8</sup> Pwe komail asa, me mau kot, me amen pan wiada, Kaun pan katingi ong i sota lipilipil is i, ma ladu de me maioda amen. <sup>9</sup> O komail saumas akan en wia dueta ong irail, o der sakone irail, pwe komail asa, me arail o pil omail Saumas kotikot nanlang, o a sota kotin lipilipil aramas amen. <sup>10</sup> Ikmuri ri ai kan komail ke-laileki Kaun o ni a manaman. <sup>11</sup> Puriong tatan mauin karos en Kot, pwe komail en kak kelail palian tewil a widiwiding kan. <sup>12</sup> Pwe kaidin uduk o nta, me kitail en pei ong, a ong saupeidi o manaman akan, o ong saumas en sappa kan, me kin kakaunda nan rotorot wet, o ong kaun ngenin en lang akan. <sup>13</sup> Ari, pweki mepukat komail en ale tatan mauin karos en Kot, pwe komail en kak kelail ni ran sued, o kasinenda murin omail kapwaiadar mekaros. <sup>14</sup> Komail ari kasinenda, luke pamail en katengtengki melel o pereki pere pan marama me pung. <sup>15</sup> O na omail en kitekit pena, pwen onop ong wa sili rongamau en popol. <sup>16</sup> A pil eu pan ko ong mepukat: Komail ale perepa en poson, pwen kakun kila katieu kisiniai en me sued o. <sup>17</sup> Komail pil ale lisorop en kamaur o kodlas en Ngen, me masan en Kot. <sup>18</sup> O podidi ong kapakap o wia poekipoeki. Ngidingidiki Ngen ni mekaros. O masamasan, o poden kapakapaki sarau kan karos. <sup>19</sup> O kapakapa kin ia, pwe i en ngil meledok o au ai en sara pasang ai aingar en kaweweda me rir en rongamau. <sup>20</sup> Me ngai saunpadakepa, me salidier, pwe i en kelail ong padapadaki, duen me kon ong. <sup>21</sup> A pwe komail en asa ir ai kan, o me i kin wiada, ri atail

kompok Tikikus o papa lelapok en Kaun o, pan padaki ong komail meakaros. <sup>22</sup> I me i kadarala, pwe komail en asadar ir at akan, o pwe i en kamait mongiong omail. <sup>23</sup> Popol ong ri atail, o limpok iangaki poson sang ren Kot Sam o Kaun Iesus Kristus! <sup>24</sup> Mak en mimi ren karos, me kin pok ong atail Kaun Iesus Kristus kokolata!

## EN PAULUS A KISIN LIKAU ONG MEN PILIPI

<sup>1</sup> PAULUS o Timoteus ladun Iesus Kristus ong me sarau kan karos en Kristus Iesus o pisop o saunkoa kan nan Pilipi. <sup>2</sup> Mak o popol sang ren Kot Sam atail o Kaun Iesus Kristus en mi re omail! <sup>3</sup> I kin danke ai Kot ni ai tamatamanda komail. <sup>4</sup> I me i kin wiada ni ai kapakap kin komail ansau karos, o i kin kapakap ni pereperen. <sup>5</sup> Pweki omail dadaurata rongamau sang ni tapi o kokodo lel met. <sup>6</sup> O i kamelele me i, me tapiadar wiawia mau eu re omail, pil pan kanikiela lao lel ran en Iesus Kristus. <sup>7</sup> Me pung i en kamelele mepukat duen komail karos, pwe i kin kolekol komail nan mongiong i ni ai salidi wet, wasa i kin kaweweda o kadededed rongamau; a komail karos kin iang ia kapwaiada mak wet. <sup>8</sup> Pwe Kot ai saunkadede, duen i kin loleiteki komail pan kupur en Kristus Iesus. <sup>9</sup> O me i pil kapakapaki pwe omail limpok en lapalapala kakairida ni lolekong o lamalam akan. <sup>10</sup> Pwe komail en kasauiaada, da me mau sang karos, pwe komail en melel o pung lao lel ran en Kristus. <sup>11</sup> O direki wan pung kan, me kin wiawia ren Iesus Kristus men kalinganada o kapinga Kot. <sup>12</sup> Ri ai kan, i men, komail en asa ir ai, me dialan kaindindar rongamau, <sup>13</sup> Nan i ai salidi kan pweki Kristus, me pwarapwaradar nan im en monsap o wasa karos. <sup>14</sup> O ri atail toto pan kupur en Kaun, me aingar kidar ai salidi kan, ap aima sang mas o, en padaki masan en Kot ap so masak. <sup>15</sup> A akai kin padaki duen Kristus akpeirin, o akamai, o akai sang nan ar inong mau. <sup>16</sup> A met akan ni limpok, pwe re asa, me ngai salidier, pwen kadede pan rongamau. <sup>17</sup> Irail kin padaki duen Kristus kapei lokaia o so melel, re kiki ong, me re pan kalaudela ai salidi kan; <sup>18</sup> A pil menda? Pwe Kristus kin lolok sili ni song karos, ma ni akamai de ni melel, i me i peren kida, ei i pan pereperen. <sup>19</sup> Pwe i asa, mepukat pan kare ong ia maur soutuk ki omail kapakap o sauas pan Ngen en Iesus Kristus. <sup>20</sup> Duen ai inong iong, o auiaui, o kaporoporeki, me i sota pan namenokala ni eu song. A duen mas o, iduen ansau wet Kristus en kapingan laud ni war ai, ma ni ai pan memaurata de mela. <sup>21</sup> Pwe Kristus, i maur i, o mela ai pai. <sup>22</sup> A ma i pan memaurata ni pali uduk, ai wiawia kan pan kadepa; ari i ap sasa, da me i en pilada. <sup>23</sup> Pwe i mauki ira karos: I inong iong mela, pwen mila ren Kristus, pwe i eta me mau. <sup>24</sup> A ai mimieta ni pali uduk me mau song pweki komail. <sup>25</sup> Ari, i ap asa, me i pan mimieta

re omail karos, pwen sausa omail peren o poson, <sup>26</sup> Pwe omail kaping en lapalapala ren Kristus Iesus ki ai pwaralang komail. <sup>27</sup> Ari, komail weweid duen me warong rongamau en Kristus, pwe ma i pwaralang komail, de ni ai doo, i en rong, me komail keleki ngen ta ieu, o komail lamalam ta pot, i iang kelail dodok ong rongamau ki poson. <sup>28</sup> O komail ender waponki, me kin palian komail akan, pwe i kasansale pan arail pan lokidokila, a omail pan maurela; a mepukat sang ren Kot. <sup>29</sup> Pwe a muei ong komail er pan kupur en Kristus, kaidin poson eta, pwen pil kalokolokeki i, <sup>30</sup> Pwe komail kin wia pei ota, me komail kilanger re i, o me komail kin rong duen ngai.

## 2

<sup>1</sup> MA panapanau eu ren Kristus mia, ma kamait en limpok, ma sau pena en Ngen, ma limpok melel, o kadek sang nan ngen omail, <sup>2</sup> Komail ap kaunsokela ai peren ni omail lamalam ta pot, o limpok ta ieu, o min ta ieu, o inong iong song ta ieu, <sup>3</sup> O der aklemai o der wia meakot ni aklapalap a ni karakarak, amen en kakaki amen mo a. <sup>4</sup> Amen amen ender apwali pein a dipisou kan, a amen amen en apwali en akai ar dipisou. <sup>5</sup> Pwe i tiak en mi re omail, me pil mi ren Iesus Kristus. <sup>6</sup> Me mom en Kot, ap sota men ale ong pein i en dueta Kot. <sup>7</sup> Ap akamaleki pein i o wiala ladu men o song en aramas akan. <sup>8</sup> O kotin sansaleda ni mom en aramas, o kasapwilidi pein i, o ni a kotin peiki ong lel mela, ei lel mela ni lopu. <sup>9</sup> Nan i me Kot kotin kasapwilada i wasa ileile, o kotiki ong i mar eu, sikida sang mar karos. <sup>10</sup> Pwe karos en kelepuiki ni mar en Iesus, me mi nanlang o nin sappa o pan sappa. <sup>11</sup> O lo karos en kadedeki, me Iesus Kristus me Kaun pwen kalinganada Kot Sam. <sup>12</sup> Ari kompoke pai kan, duen omail okoke kokodo, kaidin ni omail wokaren ia do, a me sikidar ansau wet ni ai doo, en pere ki, o lomwiniki kadokedoke kamaur pamail. <sup>13</sup> Pwe Kot me kotin wiada karos nan lol omail: Inong o kapwaiada duen kupur a. <sup>14</sup> Komail wiada meakaros so, lipanede o so peikalas. <sup>15</sup> Pwe komail en pung o melel o seri en Kot akan, me so lol riapot nan pung en di sued o sapung, me komail ser sansal nan pung arail, dueta ser en sappa kan. <sup>16</sup> Kasansaleda masan en maur, pwen kaping pa i ni ran en Kristus, pwe i ender tang mal de dodok mal. <sup>17</sup> A ma i dueta mairong urak eu wudoki ong mairong o dodok en omail poson, i kin peren kida, o i pan iang komail karos pereperen. <sup>18</sup> I me komail en pil perenki o komail en iang ia pereperen. <sup>19</sup> A i kaporoporeki Kaun Iesus, me i pan madang kadar wong komail Timoteus, pwe i en pil insenemau, i lao asa



ir omail. <sup>20</sup> Pwe sota amen mi re i, me dueta i, me kin apwali komail melel. <sup>21</sup> Pwe karos kin rapaki me pein ar; a kaidin me sapwilim en Kristus. <sup>22</sup> A komail asa, me a tiak me pung, pwe a sauasa ia ni rongamau dueta seri men ong a papa. <sup>23</sup> I me i kaporoporeki, me i pan kadarala eden, i lao asa ir ai. <sup>24</sup> A i liki Kaun o, me pein ngai pil pan pwara wei madang. <sup>25</sup> A i lamedar, me mau en kadarlang komail ri ai Epaprotitus me ai warok ni ai dodok o ai peipei, iei omail men en kadar, o me papa ia ni ai samama. <sup>26</sup> Pwe komail asa, a ngong kin komail melel, o a patauki melel omail rongadar, me a somau. <sup>27</sup> Melel, a somau meid laud, koren iong mela. A Kot me kotin kupuredar i; a kaidin i eta, pwe pil ngai, pwe i de paiola pokon. <sup>28</sup> A i madang kadarala i, pwe komail en kilang i, ap peren kida, o ai insensued en pil tikitikela. <sup>29</sup> Komail ari kasamo i ni Kaun o popol, o wauneki me dueta i kan. <sup>30</sup> Pweki wiawia en Kristus a koren iong mela, ni a sota kasampwaleki pein maur i, pwen sauasa ia wiliandi komail.

### 3

<sup>1</sup> A PIL eu ri ai kan, komail en perenki Kaun o! I kin inting wong komail song ta ieu ansau karos, ari so, i me i sota insensuedeki, pwe a kin kakelaile kin komail. <sup>2</sup> Kalaka kidi kan! Kalaka toun dodok sued akan! Kalaka song en sirkomsais sued! <sup>3</sup> Pwe kitail, me kaudok ong Kot ki ngen o suaiki Kristus Iesus, o so kaporoporeki uduk, me sirkomsais. <sup>4</sup> Ari so, men suaiki uduk pil, mi re i. O ma amen kin lamelame, me a kak suaiki uduk, a ngai kak laud sang. <sup>5</sup> Pwe ngai sirkomsaiselar ni auel en ran, ngai kisan men Israel o kainok en Peniamin, o men Ipru amen me tapi sang men Ipru, a nin tiak en kapung Parisär amen. <sup>6</sup> A ngai nantiong mepukat lao lel ong kaloke momodisou kan, o ni ai kapwaiada tiak en kapung, ngai me pung melel. <sup>7</sup> A me pai ong ia, i mamaleki pweki Kristus. <sup>8</sup> Iei melel, i mamaleki meakros pwe meid kasampwal en dedoki Kristus Iesus ai Kaun, i me i muei sang karos o wia pwel kilar, pwe i en anek-ila Kristus. <sup>9</sup> O i en kadiarokada re a, me sota pein ai pung, me pwili sang kapung, a me pwili sang poson Kristus, iei pung, me Kot kotin wadok ong poson. <sup>10</sup> Pwe i en dedeki i o manaman en a iasadar, o ai warok ki ong kalokolok pwe i en duela a matala. <sup>11</sup> Pwe i en konodi maureda sang ren me melar akan. <sup>12</sup> Kaidin likamata i konodier de ngai unsokelar; a i kin dadaurata, pwe i en konodi murin Kristus Iesus kotin kono ia dier. <sup>13</sup> Ri ai kan i sota lamelame, me i konodier, <sup>14</sup> A iet eu, me i kin wiada: I likidmaliela men likin sakeri, ap inong iong meakan, me mi moa, o i kilekilang ap tang

wong kilel o, me mi moa, iei kating, me Kot kotin kileledi ong ia ren Kristus Iesus. <sup>15</sup> Ari karos me unsokelar, en lamelame due met. A ma komail wuki sang meakot ni lamalam, Kot pan kotin kadiarok ong komail. <sup>16</sup> A me kitail konotier, kitail en inenki wei eta ni lip ota. <sup>17</sup> Ri ai kan idauen ia do, o ale sang me kin kekeid wei duen me komail kilanger re at. <sup>18</sup> Pwe pan pak toto i indang komail er duen me toto, me kin kekeid wei, a met i indang komail ki sangesang, me irail imwintiti pan lopu en Kristus, <sup>19</sup> Me pan lokidokila ni imwi 'rail, me wia aniki kaped arail, me ar wau pan soredi, me kin paieki dipisou en sappa. <sup>20</sup> A deu atail mi nanlang, wasa me se kin auiaui Kaun Iesus Kristus atail Saunkamaur pan pwarado sang ia. <sup>21</sup> Me pan kotin kalinanada war atail pwel, pwen ras ong war a lingan ki manaman, me a pan kotin kaloe kidi meakan karos.

### 4

<sup>1</sup> ARI ri ai kompok kan, ai peren o ai lingan komail, katengetengdi ren Kaun o kompoke pa i kan! <sup>2</sup> I panaui Ewodia o i panaui Sintike, pwe ira en minimin pena ren Kaun o. <sup>3</sup> O i pil poeki re omui ai warok melel, sauasa ira, me iang ia er dodok ni rongamau, iangaki Klemens o ai warok tei kan, me arail mar akan mi nan puk en maur. <sup>4</sup> Komail peren ki Kaun o ansau karos! I pil pan indada: Komail pereperen! <sup>5</sup> Komail kadek ong aramas akan karos, Kaun o me kotin korendor. <sup>6</sup> Komail der patauki meakot, a komail kasale ong Kot meakros me komail inong iong ni omail kapakap o ngidingid ki danke. <sup>7</sup> O popol en Kot, me lapa sang lolekong, pan apawali mongiong omail o omail lamelam ren Kristus Iesus. <sup>8</sup> Pil eu ri ai kan, karos me melel, karos me kon ong, karos me pung, karos me min, karos me kaselel, karos me kalok mau, o ma pil eu tiak mau de men kaping, komail ap madamadua due! <sup>9</sup> Meakan, me komail padakkier o aleer, o rongadar, o kilanger re i, i me komail wia, a Kot en popol ap pan kotikot re omail. <sup>10</sup> A ngai me perenki Kaun o kaualap, pweki ni ansau wet omail apwali ia me tapwendar; ari so, komail apwali ia ansau karos, a ansau kis komail sota kak ong. <sup>11</sup> I sota inda mepukat pweki ai samamalar, pwe i kin insenemau ni ai samama o ni ai kapwapwa. <sup>12</sup> I asada duen tiak en samama o duen tiak en kapwapwa. Ngai koiokki meakros o song karos, i kak metier o men mangadar, o muei met o tutupok. <sup>13</sup> I kak ong meakros, pweki i, me katin ia da. <sup>14</sup> Ari so, me mau omail apwali ia la ni ai paiolar akan. <sup>15</sup> A komail men Pilipi pil asaer, me sota momodisou apawali ia ni meakros dueta komail sang ni tapin rongamau, ni ai ko wei sang Masetonien.

<sup>16</sup> Pwe komail kisakis dong ia pan riapak ni ai samamalar nan Tesalonik. <sup>17</sup> Kaidin kisakis, me i kin rapaki, a i kin rapaki wa, pwen kalaudela noumail kisin likau. <sup>18</sup> Pwe me mi re i itar ong ia, op il laud sang. Muei met mi re i, ni ai aleer omail kisakis ren Epaprotitus. Meakan ras ong pomau eu o mairong mau eu, me kon ong Kot. <sup>19</sup> A ai Kot pan kotin kaitar omail samama duen a kapwapwa ni lingan ren Kristus Iesus. <sup>20</sup> A lingan en ko ong Kot o Sam atail kokolata! Amen. <sup>21</sup> Ai ranamau ong sarau kan karos ren Kristus Iesus. Ri atail akan, me mi re i, kin ranamau wong komail. <sup>22</sup> Sarau kan karos kin ranamau wong komail, pil toun im en Sisa mon karos. <sup>23</sup> Mak en atail Kaun Iesus Kristus en mi ren ngen omail! Amen.

## EN PAULUS A KISIN LIKAU ONG MEN KOLOSE.

<sup>1</sup> PAULUS wanporon en Kristus Iesus amen pan kupur en Kot o ri atail Timoteus, <sup>2</sup> Ong ri at sarau i o lelapok ren Krisus akan, me mi Kolose; mak o popol sang ren Kot Sam atail o Kaun Iesus Kristus! <sup>3</sup> Kit kin danke Kot o Sam en atail Kaun Iesus Kristus o kapakapa kin komail kaukaule. <sup>4</sup> Kit lao rongadar duen omail poson Kristus Iesus, o omail limpok ong sarau kan karos, <sup>5</sup> Pweki kaporopor eu, me nekineki ong komail nanlang, duen me komail rongadar mas o ni padak meles en rongamau, <sup>6</sup> Me lel wong komail o pil sap akan karos, o a kin wada o kakairida dueta re omail sang ni ran o, me komail rongadar o dedekier meles mak en Kot; <sup>7</sup> Duen omail padakki sang ren Epapras at warok kompok amen, me papa lelapok en Kristus ong komail amen, <sup>8</sup> Me pil kaireki dong kit duen omail limpok pena ni Ngen. <sup>9</sup> I me se sota kin dukedi sang at kapakapa kin komail o poekipoeki sang ni ran en at rongadar, pwe komail en direki erpitan kupur a, o komail en lolekong o koik ngenin, <sup>10</sup> O kekeid wei duen me kon ong Kaun o, o kapareda wan wiawia mau karos, o kakairida ki asa Kot, <sup>11</sup> O keleki kel karos duen manaman en a lingan pwen dadaurata o kanongama ki peren, <sup>12</sup> Danke Sam o, me kotin kamau kitail lar, en iang pwaisanekeki soso en me sarau kan nan marain. <sup>13</sup> Me kotin kapiti sang kitail manaman en rotorot, ap kotin kasau kitail dong nan wein Na kompokepa, <sup>14</sup> Me kotin dore kitail la iei lapwan dip atail, <sup>15</sup> I me kasale pan Kot, me so sansal, me meseni en audepa karos. <sup>16</sup> Pwe karos wiaui ki i, karos me mi nanlang o sappa, me sansal o me so sansal, ma me poe kan, de saumas akan, de wei kan, de manaman akan, meakaros wiaui ki i o ong i. <sup>17</sup> O i me kotikot mon meakaros o meakaros memaureki i. <sup>18</sup> O i tapwin war a, iei momodisou, o i me tapi o meseni en me iasadar sang ren me melar akan, pwe i en mon meakaros. <sup>19</sup> Pwe Kot kotin kileledier me mau kan karos en mi re a. <sup>20</sup> I ari kalolamau penang pein i meakan karos, ma ni sappa de nanlang, ni a kotin wiada mui mau ki ntan a lopu. <sup>21</sup> O komail, me doo wei sang o imwintiti mas o ni omail lamelame o wiawia sued akan, <sup>22</sup> A kotin kalolamau komail lar ki war a uduk ni a matala, pwen kapware kin komail da sarau o pung o so kadeik pa omail mo a. <sup>23</sup> Ma komail dadaurata poson o tengeteng o so mokid wei sang ni kaporopor ki rongamau, me komail rongadar, o me lolok ong

audepa karos me mi pan lang, me ngai Paulus wialar papa men. <sup>24</sup> I ap perenki ai kalokolok ki komail o men kaimwisok kila uduk ai me luedi ni kamekam en Kristus, pweki war a, iei momodisou, <sup>25</sup> Me i wialar papa men duen koa dodok en Kot, me i aleer pweki komail pwen usela masan en Kot. <sup>26</sup> Iei me rir kot, me rir sang nin tapin kaua o men kaua, a met a kadiarok ong sapwilim a sarau kan, <sup>27</sup> Me Kot men kasansaleda kapwapwa en lingan en rir wet ong men liki kan, iei Kristus me kotikot lol omail, i kaporopor en lingan. <sup>28</sup> I me kit kin padaki o panepanau aramas karos, o padapadaki aramas karos ni lolekong karos, pwe kit en kapwareda aramas karos ni unsoki ong Kristus. <sup>29</sup> I me i pil dodok kelail, duen wiawia en i me kin dodok kelail lol i.

## 2

<sup>1</sup> A I men, komail en asa iran ai pei laud pweki komail, o men Laodisaa, o irail karos, me sota kilang mas ai ni uduk o. <sup>2</sup> Pwe mongiong arail en kamaitala o irail en warok pena ni limpok o irail en kakairida ni ar dedeki meles duen me rir en Kot. <sup>3</sup> Pwe pai en erpitan dedeki, me okiok re a. <sup>4</sup> I me i inda mepukat, pwe aramas amen ede kotau ki komail lokaia widening kan. <sup>5</sup> A ni pali uduk o ngai me doo, a ni pali ngen i ngai mi re omail, i perenki o kilang omail sondi mau, o omail poson kelail Kristus. <sup>6</sup> A duen omail wuki ong Kristus Iesus Kaun o, iduen komail en weweideki i, <sup>7</sup> O podidi ong i, o kakau kida i, o komail kelail ni poson, duen me komail padak kidar, o nantiong danke. <sup>8</sup> Kalaka pwe amen ede sali kin komail padak mal o padok en kaua duen tiak en aramas akan en sappa, a kaidin tiak en Kristus. <sup>9</sup> Pwe aude pan me udan Kot karos kotikot re a, nan pein war a. <sup>10</sup> O komail me unsok kilar i, me tapwin wei karos o manaman karos. <sup>11</sup> Me komail pil sirkomsaiseki ong sirkomsais eu, me so mangin pa, a duen pwilikidi war en uduk ni sirkomsais eu, me ren Kristus. <sup>12</sup> Ni atail iang i serkidu paptais, o me komail pil maur kida poson manaman en Kot, me kaiasada i sang ren me melar akan. <sup>13</sup> O ni ansaanu omail mela ni dip o sosirkomsais en uduk omail, a kotin kamaur komail da iangaki i, ni a kotin maki ong kitail sapung kan karos. <sup>14</sup> O a kotin iros wei sang inting o, me kapokon ong kitail, me audekier kusoned akan, ap palian kitail, i me a kotin kawelar ni a pasuredi ong i nin lopu. <sup>15</sup> A lau kaloedier wei kan o manaman akan, ap kasansanle irail ada o wia kin ir kilel en kaperen eu. <sup>16</sup> Sota amen en kadeik komail da pweki kisin manga, de pil nim, de ran a akai, de maram pul, de sapat akan. <sup>17</sup> Pwe mepukat mot en me pan pwarado, a war o iei Kristus. <sup>18</sup> Sota me pan kataua

sang komail kating pamail; pwe iei i me kin wiawia pein insen a ni a karakarak o pongi ong tounlang kan, me a sota kilanger o me akpalapalap o perenki pein i ni tiak en uduk a. <sup>19</sup> O a sota kin keleki tapwi, me war pon ale sang kisin manga ki kokon akan, iduen a pan kakairida ni kupur en Kot. <sup>20</sup> A ma komail iang Kristus melar sang tiak en sappa, menda komail pil lodi ong tiak kan likamata komail memaureta nin sappa. <sup>21</sup> Re kin inda: Koe der doke, koe der song, koe der sair! <sup>22</sup> A mepukat karos pan okila kadokepa; ari kisin kusoned mal akan, me aramas akan ta wiadar. <sup>23</sup> Me sansal en lolekong ni ar wiada pein ar kaudok o karakarak o ar kaloke pali war arail; a mepukat kin kapwaiada pali uduk eta.

### 3

<sup>1</sup> ARI, ma komail iang Kristus iasadar, en rapaki me pali poa kan, wasa Kristus kotikot ia ni pali maun en Kot. <sup>2</sup> Inong iong me mi pali poa a kaidin me mi nin sappa. <sup>3</sup> Pwe komail melar, o maur omail rirlong Kristus ren Kot. <sup>4</sup> Kristus, iei maur atail, lao pwarado, kitail pan pil iang i pwarado ni lingan o. <sup>5</sup> Komail ari kamela kokon omail, me mi sappa: Nenek, samin, tiak sued, inong sued, norok kapwa, pwe iei kaudok sued. <sup>6</sup> Pweki mepukan ongion en Kot kin lel ong seri sopeik kan. <sup>7</sup> Me komail pil kekeideki mas o, ansau omail akmemaurki. <sup>8</sup> A metet komail pwilikidier mekaros: Makar, lingaragar, katantat, lalaue, kasoi kasaut nan au omail; <sup>9</sup> Ender likam nan pung omail, pwe komail pwilikidier aramas maring iangaki a wiawia kan, <sup>10</sup> Ap aleer me kap, me wilikapadang lolekong duen mom en me kausedar i. <sup>11</sup> Wasan sota men Krik, sota Sus, sota sirkomsais, pil sota sosirkomsais, sota men liki, sota Site, sota ladu o sota me maioda men, a Kristus eta me kotikot ni karos. <sup>12</sup> Pwil po omail duen en Kot a pilidar akan, me sarau i o kompok, limpok en nan mongiong, o kadek, o karakarak, o opampap, o kanongama, <sup>13</sup> Apwali amen amen, o mak pena, ma amen kainsensuedi amen, duen Kristus kotin mak ong komail er, iduen komail. <sup>14</sup> O moneki limpok, me ora pena kamau pokon. <sup>15</sup> O popol en Kristus en kaunda nan mongiong omail, me komail pil paeker pena ni war ta ieu, o komail danke. <sup>16</sup> Komail nantiong dodokiki masan en Kristus nan pung omail ni lolekong karos; padapadaki o panapanau komail pena, ki psalm, o kaul en kaping, o kaul ngenin, o kakaul ong Kot nan mongiong omail ki mak. <sup>17</sup> O karos, me komail kin wia ni lokaia, o wiawia kan, en wiada ni mar en Kaun Yesus, o danke Kot o Sam pweki i. <sup>18</sup> Komail li akan udi ong omail warok kan ni Kaun o, duen me kon ong.

<sup>19</sup> Komail ol akan, pok ong omail warok kan o der makar pa 'rail. <sup>20</sup> Komail seri kan, peiki ong me wia komail da ni mekaros, pwe i me kon ong Kaun o. <sup>21</sup> Komail sam akan, der kamakar mal noumail seri kan, pwe ren der sang komail la. <sup>22</sup> Komail ladu kan, peiki ong omail saumas ni uduk ni mekaros kaidin ni dodok mon aramas, pwen konekon ren aramas, a ni impimpai en mongiong o, o lan Kaun o. <sup>23</sup> O karos, me komail wiada en lolm ong wiada, dueta ong Kaun o a kaidin ong aramas akan. <sup>24</sup> Ap asa, me komail pan ale kating en soso ren Kaun o, pwe komail kin papa Kaun Kristus. <sup>25</sup> A me wia sapung, pan pein pukoki sapung me a wiadar pwe Kot sota kin lipilipil aramas amen.

### 4

<sup>1</sup> KOMAIL saumas akan, pwain ong omail ladu kan me pung o me mau, pwe komail asa, me pil omail Saumas kotikot nanning. <sup>2</sup> Podidi ong kapakap o masamasan o danke. <sup>3</sup> O pil kapakapa kin kit, pwe Kot en kotin ritingidang kit wanim en masan eu, en kaweweda en Kristus a me rir kot, me ngai sali kidier; <sup>4</sup> Pwe i en kaparoki duen me pung. <sup>5</sup> Kekeid lelapok wei mon men liki kan, kadokedoke ansau mau. <sup>6</sup> Omail kasoi en wiaui ni mak o doleki sol ansau karos, pwe komail en asada, duen me komail pung sapengki amen amen. <sup>7</sup> Ri atail kompok Tikikus o papa lelapok o ladu en Kaun amen pan kaire kin komail ir ai karos. <sup>8</sup> Pwe i me i kadar wong komail er, pwen asa ir omail, o kamait mongiong omail, <sup>9</sup> Onesimus pil iang i, i ri atail lelapok kompok amen, me kis omail. Ira pan kaire kin komail karos, me wiaui er met. <sup>10</sup> Aristarkus, me iang ia salidi, kin ranamau wong komail, o Markus nain ri en Parnapas pwe komail ale er kusoned akan duen i; a lao pwara wong komail, komail kasamo i; <sup>11</sup> O Iesus, me ad a Iust, me kisan sirkomsais. Irail eta ai warok en dodok ni wein Kot; ira me kamait pa i. <sup>12</sup> Epapras, me kis omail, o me ladun Kristus Iesus amen, kin ranamau wong komail, a ngidingide sauasa komail ni a kapakap akan kaukaue, pwe komail en dadaurata o unsokila o direki kupur en Kot. <sup>13</sup> Ngai me kadede i, me a porisok melel ni a apapwali komail o irail nan Laodisea o Irapolis. <sup>14</sup> En saunwini Lukas kompok o Demas ara ranamau wong komail. <sup>15</sup> Ranamau wong ri atail akan en Laodisea o Nimpas o momodisou nan im a. <sup>16</sup> A kisin likau kis et lao wadawader re omail, komail kanaiong, pwen pil wadawad ren momodisou en Laodisea, o komail pil pan wadok, me i kadalalang Laodisea. <sup>17</sup> Komail indai ong Arkipus: Kanekana i ong dodok, me koe

aleer sang ren Kaun o, pwe koe en kap-waiada. <sup>18</sup> Iet ngai Paulus intingki pa i ai ranamau. Tamatamanda ai salidi. Mak en mimieta re omail!

## EN PAULUS A KISIN LIKAU KAIU ONG MEN TESALONIK.

<sup>1</sup> PAULUS, o Silwanus, o Timoteus ong momodisou en Tesalonik, me ren Kot Sam o Kaun Iesus Kristus. Mak o popol en mi re omai! <sup>2</sup> Se kin poden danke Kot ki komail karos o tamataman kin komail ni at kapakap akan. <sup>3</sup> O se kin tamatamanda omai wiawia kan ni poson, o omai dodok ni limpok, o omai kanongama ni kaporoporeki atail Kaun Iesus Kristus sansal ong Kot o Sam atail. <sup>4</sup> Pwe ri ai kan o kompoke pan Kot akan, se asa duen omai lipilipil re a, <sup>5</sup> Pwe at rongamau lel ong komail er, kaidin nin lokaia ta, a pil ni manaman o Ngen sarau, o ni kamelelepa kaualap, pwe komail asa song en aramas da kit re omai pweki komail. <sup>6</sup> A komail ale sanger kit o sang Kaun o, ni omai aleer masan o ni kamekam kaualap o ni peren en Ngen sarau. <sup>7</sup> Komail wialar kile en saulang karos ni Masetonien o Akaia. <sup>8</sup> Pwe sang re omai masan en Kaun o kaparaparalar, kaidin nan Masetonien o Akaia eta, pwe pil wasa karos omai poson Kot lokila ia; ari, solar me se pan inda. <sup>9</sup> Pwe pein irail kaire kin kit, duen at pwaralang komail me pwaida, o duen omai wuki ong Kot sang dikedik en ani kan, pwen papang Kot, me udan maur o melel. <sup>10</sup> O auiaui sapwilim a Ol sang nanlang, me a kotin kaiasada sang ren me melar akan, Iesus, me kotin dore kitail sang ni ongiong en Kot, me pan sansaldo.

### 2

<sup>1</sup> PWE pein komail asa, ri ai kan, duen at pwaralang komail kaidin me so kadepa. <sup>2</sup> A murin at kamekam nan Pilipi o at kalokolok wasa o, duen me komail asa, kit aimaki atail Kot padaki ong komail rongamau en Kot ni apwal laud. <sup>3</sup> Pwe at panapanaui komail sota wiaui ni kotaue, de samin, de widing. <sup>4</sup> Pwe duen kit ale sang ren Kot en padaki rongamau, iduen at padak kin wiaui, kaidin pwen konekonlar ren aramas akan, a Kot me kotin kasauiaua mongiong it. <sup>5</sup> Sota eu ansau me se lingkapinga komail, duen me komail asa, de norok kapwa, Kot me saunkadede en mepukat. <sup>6</sup> Se pil sota rapaki konekon ren aramas akan, ma re omai de ren akai. A se pan kak katoutoui komail, pwe kit wanporon en Kristiis akan. <sup>7</sup> Ari so, kit kin materok nan pung omai dueta li en kamait amen, me kin apwali na seri kan. <sup>8</sup> Iduen at ngong kin komail melel, se mauki katungole kin komail rongamau en Kot, a kaidin i eta, a pein maur at, pwe komail wialar kompoke pat. <sup>9</sup> Ri ai kan, komail kin

tamanda duen at dodok o at apwal akan. Pwe se dodok ni ran o ni pong, pwen der katoutoui amen komail, o se padaki ong komail rongamau en Kot. <sup>10</sup> Komail o Kot at saunkadede duen at makelekel, o pung, o inen re omai me poson akan. <sup>11</sup> O duen komail asa, me kit panaui o kamekamait amen amen re omai dueta papa men wiai ong na seri kan. <sup>12</sup> O se padaki ong komail er, me komail en alu inen wei ta, duen me kon ong Kot, me kotin molipe komail ong pein a wei o pein a lingan. <sup>13</sup> I me se kin poden danke Kot, pwe ni omai aleer masan en Kot, komail aleer kaidin dueta padak en aramas akan, pwe dueta masan en Kot melel, me pil kin dodok nan lol omai me poson akan. <sup>14</sup> Pwe ri ai kan, komail ale sanger momodisou en Kot akan nan Iudaa ren Kristus Iesus; pwe komail kamekame ren toun omai wei, dueta irail me kamekame ren Sus akan. <sup>15</sup> Me pil kamatalar Kaun Iesus, o saukop akan, me re kaloke, o re sota konekon ren Kot, o re kin palian aramas akan karos. <sup>16</sup> O re kainapwi sang kit, ender padak ong men liki kan, pwe ren der maurela, pwe re kin kadirela dip arail ansau karos, a ongiong mi po 'rail. <sup>17</sup> A kit ri ai kan ni at doo wei sang komail ansau kis ni pali war at, a kaidin ni mongiong it, se ap nantiong o inong iong melel kilang mas omai. <sup>18</sup> I me se men pwar wong komail, ngai Paulus pan mepak o pan riapak, a Satan karompa kit. <sup>19</sup> Pwe is me kapore pat, de kaperen pat, de kapinga pat? Kaidin komail mon Kaun patail Iesus ni a kotido? <sup>20</sup> Pwe komail kalinga pat o kaperen pat.

### 3

<sup>1</sup> I ME se solar kak nenen la, pwe se maukida kelepala nan Aten, <sup>2</sup> Ap kadar wong komail Timoteus ri atail o papan Kot ni rongamau en Kristus, pwen katenge komail o kamait komail la iran omai poson. <sup>3</sup> Pwe sota amen en luet kila kamekam wet, pwe pein komail asa, mepukat kileledier ong kitail. <sup>4</sup> Pwe ni at mimi re omai, se kokopki dong komail kamekam; duen a pwaidar o duen me komail asa. <sup>5</sup> I me i solar kak nenenla, a i ilakila, pwe i en asa, duen omai poson, ma men kasongesong so kasongesong komail, o ma at dodok sota pan dodok mal. <sup>6</sup> A metet ni en Timoteus pwarar dong kin sang re omai, o padaki ong kit rong mau duen omai poson o limpok, o duen omai tamataman kit ansau karos, o duen komail men kilang kit, i dueta kit kin inong iong kilang komail. <sup>7</sup> Ri ai kan, kit ap kamait kilar komail ni at kamekam o apwal akan ki omai poson. <sup>8</sup> Pwe ansau wet kit maureda, ma komail poden tengedi ong Kaun o. <sup>9</sup> Pwe ia danke me sen dankeki

Kot pweki komail, me pan ras ong peren, me se peren kida mon Kot ki komail? <sup>10</sup> Se kin poden kapakapa kin komail ni pong ni ran o ngidingidiki, sen kilang mas omail o kaunsokala omail poson. <sup>11</sup> Ari, pein Kot, o Sam atail, o atail Kaun Iesus en kotin kalua kit wong komail. <sup>12</sup> A Kaun o en kotin kangedere komail la o kalaudela omail limpok nan pung omail o ong amen amen dueta kit ong komail. <sup>13</sup> O kotin katengeteng mongiong omail pwen mau melel, ni sarau mon Kot o Sam atail ong ni ran en atail Kaun Iesus, me pan kotido o sapwilim a sarau kan karos iang i.

#### 4

<sup>1</sup> ARI, ri ai kan, se pil poeki re omail o panaui kin komail Kaun Iesus, duen me komail aleer sang kit, o duen me komail en kekeideki wei, o kaperenda Kot, iduen omail kakairida. <sup>2</sup> Pwe komail asa duen kusoned akan, me se pang ong komail ren Kaun Iesus. <sup>3</sup> Pwe iet kupur en Kot, omail sarauila, pwe komail en liki sang nenek. <sup>4</sup> Amen amen en kanai ong pein war a, pwen sarau o wau o liki sang inong sued, <sup>5</sup> Kaidin ni dender ong inong sued duen men liki kan, me so asa Kot; <sup>6</sup> O sota me pan piti de kasapungi ong ri a ni meakot, pwe Kaun o pan kotin iki ong i, duen me kit inda o kadede ong komail er mas o. <sup>7</sup> Pwe Kot sota molipei kitail ong samin, a pwen sarau. <sup>8</sup> A ma amen komail pan mamaleki mepukat, kaidin aramas me a pan mamaleki pwe Kot, me pil kotiki ong komail er sapwilim a Ngen sarau. <sup>9</sup> A duen limpok en saulang, menda i en intingki wong komail, pwe pein komail padakki sang ren Kot, me komail en poke pena. <sup>10</sup> Nan met komail kin wiai ong saulang karos, me mimi Masetonien pon. A se panaui kin komail ri at akan, komail en kakairida. <sup>11</sup> O komail nenenla o inong iong apwali pein omail dodok, kadokeki pein pa omail, duen me se padaki ong komail er, <sup>12</sup> Pwe komail en sansal mau mon me mi liki kan, o komail der mau ong amen en apwali komail. <sup>13</sup> Ri ai kan, se sota men oki sang komail duen me mairelar akan, pwe komail der insensued dueta irail, me sota ar kaporopor. <sup>14</sup> Pwe ma kitail kamelele, me Iesus matala ap iasadar, nan iduen me mairelar ren Iesus, Kot pil pan kalua ir ala re a. <sup>15</sup> Pwe ieteten me se indang komail ni masan en Kaun o, kit me memaureta lao Kaun o pan kotin pwarado, sota pan ko wei mon me mair akan. <sup>16</sup> Pwe pein Kaun o pan kotido sang nanlang ki masan laud, o kapiti en toulang lalalap amen, o koronete en Kot; me melar akan ren Kristus ap pan maureda mas. <sup>17</sup> Kit me memaureta luadi ap pan iang ir peukadala nan dapok kan, ko ong ren Kaun o nan

wawä, kitail ap pan mimieta ren Kaun o kokolata. <sup>18</sup> Komail ari kamaiteki komail la padak pot et.

#### 5

<sup>1</sup> A DUEN ansau o auer, ri ai kan, menda i en inting wong komail. <sup>2</sup> Pwe pein komail asa mau, me ran en Kaun o pan pwarado dueta lipirap amen ni pong. <sup>3</sup> Pwe irail lao pan inda: A muei mau, o sota apwal kot mia, i ansau kaupa pan lel ong irail dueta li lisean amen; a irail sota pan pitila. <sup>4</sup> A komail ri ai kan, solar mi ni rotorot, pwe ran o de konodi komail duen lipirap amen. <sup>5</sup> Komail karos seri en marain, o seri en ran. Kitail so kisan pong o rotorot. <sup>6</sup> Kitail ari ender mamair dueta me tei kan, a kitail en masamasan o daulikin. <sup>7</sup> Pwe me mair, kin mamair ni pong, o me sokolar, kin sokolar ni pong. <sup>8</sup> A kitail, me kisan ran, en liki sang, til wong nan pere pan marmar en poson o limpok, o lisoroeki kaporopor pan maur. <sup>9</sup> Pwe kaidin ongiong, me Kot kotin kileledi ong kitail, a sen konodi maur soutuk ki atail Kaun Iesus Kristus, <sup>10</sup> Me mata kin kitail er, pwe ma kitail papat de mamair, en maur pena re a. <sup>11</sup> Komail ari panaui o sauas pena nan pung omail duen me komail kin wia. <sup>12</sup> A se poeki re omail, ri ai kan, komail, en apwali me kin dodok nan pung omail, o me kaun komail da pan Kaun o, o me kin panaui komail. <sup>13</sup> Komail kaka kin ir kaulap ni limpok, pweki ar wiawia; o komail popol pena. <sup>14</sup> Se panaui kin komail, ri ai kan, komail en kapung ong me katiwo kan, o kamait, me ar poson tikitik, o apapwali me luet akan, o kanongama ong karos. <sup>15</sup> Komail masamasan, pwe amen ender depukki ong amen me sued me sued, a en inong iong me mau eta nan pung omail o ong amen amen. <sup>16</sup> Komail pereperen ansau karos. <sup>17</sup> Kapakapta soutuk. <sup>18</sup> Komail danke ni meakaros, pwe iduen kupur en Kot ren Kristus Iesus ong komail. <sup>19</sup> Der kakundi Ngen. <sup>20</sup> Der mamaleki deideikop akan. <sup>21</sup> Kasosong ong meakan karos, ap koleledi me mau. <sup>22</sup> Liki sang song en sued karos. <sup>23</sup> A Kot en popol en kasarui komail la kaulap, ngen omail, o mongiong omail, o war omail en nekinek mau ong en atail Kaun Iesus Kristus a pwarado. <sup>24</sup> Melel i, me kotin molipe komail er, me pan pil wiada. <sup>25</sup> Ri ai kan kapakapa kin kit. <sup>26</sup> Ranamaui ri at akan karos metik sarau. <sup>27</sup> I kauki ong Kaun, me komail pan wadok kisin likau kis et ong saulang sarau kan karos. <sup>28</sup> Mak en atail Kaun Iesus Kristus en mi re omail!

## EN PAULUS A KISIN LIKAU KARIAU ONG MEN TESALONIK.

<sup>1</sup> PAULUS o Silwanus, o Timoteus ong momodisou en Tesalonik me ren Kot Sam atail, o atail Kaun Iesus Kristus. <sup>2</sup> Mak o popol sang ren Kot Sam atail o atail Kaun Iesus Kristus en mi re omail! <sup>3</sup> Mak eta sen poden danke Kot pweki komail, ri ai kan, pwe omail poson kin laudela kaulap, o omail limpok pena pwaida kaulap. <sup>4</sup> I me kit suai kin komail ong momodisou en Kot akan pweki omail kanongama o poson ni omail kalokolok o kamekam, me lel ong komail. <sup>5</sup> Iei me kasansal pan kadeik pung en Kot, komail ap pan kon ong wein Kot, me komail kamekamki. <sup>6</sup> Pwe me pung ta ong Kot en depukki ong irail me moromouo ong komail. <sup>7</sup> A komail, me kalokolok, pan iang kit meleileila, ni kasale pan Kaun Iesus sang nanlang iang sapwilim a tounlang manaman akan, <sup>8</sup> Sansaldo ni kisinai umpumpul, kapukapung ong irail me poponsasa Kot, o ong irail, me so peiki ong rongamau en atail Kaun Iesus Kristus. <sup>9</sup> O me pan lokidokilang kamekam soutuk sang mon silang en Kaun o sang mon a manaman lingan. <sup>10</sup> Ni a pan kotido o lingan kila sapwilim a sarai kan, ni ran o, o usun kin ir karos, me posonlar i, pwe komail kamelele atail kadede. <sup>11</sup> I me se kin pil poden kapakapa kin komail, pwe Kot en kotin kakonekon komail ong paeker o a kotin kaerela omail kapunglol o kapwaiada wiawia en poson ki manaman. <sup>12</sup> Pwe mar en atail Kaun Iesus Kristus en kalinganada re omail, o komail en konekonla re a duen mak en atail Kot o atail Kaun Iesus Kristus.

### 2

<sup>1</sup> SE men poeki re omail ri at akan iran atail Kaun Iesus Kristus a pan kotin pwarado, o atail pan peukedalang i, <sup>2</sup> Komail der wukiwuk sili o der wapon kida ngen eu, de kasoi pot, de kisin likau, me dene kit kadar wong komail, me dene ran en Kaun o mier. <sup>3</sup> Sota amen en kotau komail la ni meakot. Pwe ran o sota pan pwarado, lao wiawia en mas more wei sang, o aramas en dip sansal la, nain me sued. <sup>4</sup> Me pan palian meakaros o kasapwilada pein i, en ileila sang karos, me udan Kot de men kaudok kan. A pan mondi nan tanpas en Kot o mome ong pein i Kot. <sup>5</sup> Komail sota tamanda ni ai mimi re omail, i katiti ong komail mepukat? <sup>6</sup> Ari met komail asaer, me meakot mia, me kin kapwandela a pan pwarado. <sup>7</sup> A rir en sapung kan ap mur pwaida met. Ari so, a mimieta me kin

kapwandela, lao a pan poioki wei sang; <sup>8</sup> I ansau me likin kapung o pan sansaleda, me Kaun Iesus pan kotin kame kila ang en silang i, o kawé kila lingan en a pan pwarado. <sup>9</sup> I me pan pwara kido mana en Satan, iangaki manaman o kilel akai o kapuriam ni likam kai. <sup>10</sup> O iangaki widing en sapung karos ong irail, me pan lokidokila, pwe re kang limpok ong melel, pwe ren dorela. <sup>11</sup> I me Kot kotin mued ong irail ni manaman sued eu men kaping ir ada, pwe ren kamelele likam. <sup>12</sup> Pwe karos pan pakadeikada me so kamelele masan melel, a me mauki me sapung. <sup>13</sup> A mak eta, sen danke Kot ansau karos pweki komail, ri ai kompok kan, o pwe sang nin tapi o Kot me kotin pila kidar komail ong maur potopot ni sarai la pan Ngen o ni poson melel o. <sup>14</sup> Pwe ong mepukat a kotin molipei komail er pan at rongamau, pwe komail en pwais aneki lingan en atail Kaun Iesus Kristus. <sup>15</sup> Ari ri at akan, tengedi ong o apwali padak, me komail padakkier, ma sang ni kasoi de at kisin likau. <sup>16</sup> A pein atail Kaun Iesus Kristus o Kot o Sam atail, me pok ong kitail o kupura dong kitail kamait soutuk o kapor mau pan mak, <sup>17</sup> I en kamaitala mongiong omail, o katingi komail ong ni wiawia mau karos o padak.

### 3

<sup>1</sup> ARI ri at akan, komail kapakapa kin kit, pwe masan en Kaun o en pwaida o linganla duen a wiauier re omail. <sup>2</sup> O pwe kit en sapedokala sang aramas solelapok kan; pwe poson kaidin pwais en aramas karos. <sup>3</sup> A Kaun o me melel, me pan katenge komail o nikid sang ni me sued. <sup>4</sup> Se kaporoporeki Kaun o re omail, me komail kin dadaurata o pan wiada, me se kakaliki ong komail er. <sup>5</sup> A Kaun o en kotin wiawia mongiong omail, pwe komail en direki limpok en Kot o kanongama en Kristus. <sup>6</sup> Ri ai kan, se kakaliki ong komail ni mar en atail Kaun Iesus Kristus, me komail en muei sang saulang karos, me kin dadaurata padak, me komail ronger sang kit. <sup>7</sup> Pwe komail asa duen idedauen kit, pwe kit sota wiadar sapung nan pung omail. <sup>8</sup> O se sota ale sang amen kan at manga, ap sota waiipwai, pwe se dodok apwal ni pong o ni ran, pwe sen der katoutouki amen komail. <sup>9</sup> A kaidin pwe a sota muei ong kit, a pwe sen wia kin kit kilen en me komail en alale sang. <sup>10</sup> Pwe ni at mimi re omail, iet me se kakaliki ong komail, meamen me kang wia dodok, a pil sota pan manga. <sup>11</sup> Pwe se ronger, me akai mi re omail, me kin weweid ni mesued ni ar solar kin dodok, a re apwali kisin tiak mal. <sup>12</sup> Ari, irail me due met, se indai ong o panaui irail, pan Kaun Iesus Kristus, me irail en dodok, o nenenla o tungole pein



kan ar manga. <sup>13</sup> A komail, ri ai kan, der pangki omail wiawia mau. <sup>14</sup> A ma amen kang oke at padak nan kisin likau et, i me komail en kileledi, o komail der apwali i, pwe i en namenokela. <sup>15</sup> A komail der wiaki i imwintiti amen, a sauasa i dueta ri omail amen. <sup>16</sup> A Kaun en popol en pein kotiti ong komail popol ansau karos o ni song karos! Kaun o en kotikot re omail karos! <sup>17</sup> Ngai Paulus ranamau ni mangin pa i, me kisin likau karos kilelekidi, iduen ai inting. <sup>18</sup> Mak en atail Kaun Iesus Kristus en mi re omail karos!

## EN PAULUS A KISIN LIKAU KAI EU ONG TIMOTEUS.

<sup>1</sup> PAULUS wanporon en Iesus Kristus amen pan kusoned en Kot Saunkamaur patail o Kristus Iesus, me kitail kaporoporeki, <sup>2</sup> Ong Timoteus nai seri melel ni poson mak o limpok, o popul sang ren Kot Sam o Kristus Iesus atail Kaun. <sup>3</sup> Duen ai poeki re om, en mimieta Episus ni ai pan kola Masetonien, pwe koe en kapung ong akai, ren der wia padak toror. <sup>4</sup> Pil der kamelele kasoi mal o padok en di toto, me kareda akamai ap sota sauasa koa dodok en Kot, me tapi sang poson. <sup>5</sup> Pwe aude pan kusoned limpok sang nan mongiong makelekel, o insen mau, o poson melel. <sup>6</sup> Sang mepukat akai muei sanger, rap wuki ong poupoulap. <sup>7</sup> Re men wiala saunpadak en kapung, ap so weweki, me re inda, o me re kin men padaki kausalap. <sup>8</sup> A kitail asa, kapung me mau, ma amen so kasapunge. <sup>9</sup> O se asa, me sota kapung en wiaui ong me pung amen, a ong me sapung kan, o katiwo kan, o me doo sang Kot akan, o me dipan akan, o me so sarau kan, o me san Kot akan, o me kin kaloke sam ar in ar, o me kamela aramas akan. <sup>10</sup> O me nenek kan, o me madong saut ong ol oko, o me kin pirap aramas akan, o me likam kan, o me kaula likam akan, o ma pil meatok mia, me so kon ong padak en kamour. <sup>11</sup> Duen rongamau en lingan en Kot iasanai me pang dong ia. <sup>12</sup> I ap danke Kristus Iesus atail Kaun, me kotin kamana ia da o kamelel ia ni a kotin kasapwil ia dang dodok. <sup>13</sup> Pwe mas o ngai lalau amen, o kaloke saulang kan, o lolap amen, ari so i diardar mak o, pwe i wiadar mepukat ap sasa o ni ai soposon. <sup>14</sup> A mak en atail Kaun me lapalap alar kausalap ni poson o limpok, me mi ren Kristus Iesus. <sup>15</sup> Melel lepen kasoi lep, o me mau ong kamelele: Kristus Iesus pwaro dong sappa, pwen dorela me dipan akan; a ngai me sued sang karos. <sup>16</sup> Ari so, i diardar mak o, pwe Iesus Kristus en kotin kasaleda a kanongama lapalap re i, pwe men kaalemongi ong me pan poson, pwen maur soutuk. <sup>17</sup> A Nanmarki potopot, me so kak mor pasang, o so sansal, i Kot eta. Wau o lingan en ko ong i potopoteta! Amen. <sup>18</sup> Kusoned wet i men pang ong uk, nai seri Timoteus, duen deideikop akan, me wiaui ong uk er, pwe ren sauasu uk, en wia pei mau eu, <sup>19</sup> Ni om dadaurata poson o kakananai ong insen om mau, me akai pein kase sang irail, ap peila sang nin poson. <sup>20</sup> Amen irail Imenäus o amen Aleksander, me pangalang Satan, pwe ren lelapok ki kalokolok, ap solar lalau.

## 2

<sup>1</sup> Iet me i men panau mas: Komail ngidingideki o kapakapki, o poekipoeki aramas akan karos, o wia danke. <sup>2</sup> Kapakapaki nanmarki o saumas akan karos, pwe sen meleilei o insememau, wiawia me kon ong Kot o melel. <sup>3</sup> Pwe i me mau o kon ong atail Saunkamaur Kot, <sup>4</sup> Me kotin men, aramas akan karos en dorela o lolekong kila melel. <sup>5</sup> Pwe Kot me ta men o wilia patail me ta men nan pung en Kot o aramas akan, iet Aramas Kristus Iesus. <sup>6</sup> Me kotin wiala en aramas karos ar men pwaipwai, kadede en met, en lolok sili ni ansau me kon ong. <sup>7</sup> I me i wia kila saunkair o wanporon amen, i kin lokaia melel o so likam, o saunpadak ong men liki kan ni poson o melel. <sup>8</sup> I me i men, ol akan en kapakap ni wasa karos, ni ar pokada pa ar sarau, so makar o so peikasal. <sup>9</sup> Pil dueta li akan, ren kapwadeki likau makelekel o lelapok, o tiak mau, a kaidin ni ingid pit en monga, de kold, de manaman akan, de likau lingan, <sup>10</sup> A me kon ong li akan, me men kasaleda ar masak Kot ni ar wiawia mau kan. <sup>11</sup> Li akan en nenenla, ap padapadaki ni tiak en impimpai. <sup>12</sup> I sota mueid ong li amen, en wiada padak, de kaunda ol, a en nenenla. <sup>13</sup> Pwe Adam me wiaui ar mas, a muri Ewa. <sup>14</sup> A kaidin Adam, me katiamaula, a li o me katiamaular, ap pupedi ni me sapung. <sup>15</sup> A a pan dorela ni a naitik ma a pan podidi ong poson, o limpok, o sarau, o tiak mau.

## 3

<sup>1</sup> MELEL kasoi pot et: Ma amen rapaki koa en pisop, a kin inong iong wiawia mau eu. <sup>2</sup> A pisop o en pung, o warok en li ta men, o so kowei kodo, a lelapok, o tiak mau, o apwali men kairu, o koiok ong padak; <sup>3</sup> A der kamom soko, o so pamara, a en materok, o der inong iong akamai, o der pok ong moni. <sup>4</sup> Me kin kaunda mau pein toun im a, o me na seri kan kin peiki ong ni tiak pung. <sup>5</sup> A ma amen, me sokoiook ong kaunda pein toun im a, iaduen a pan kak kaunda momodisou en Kot? <sup>6</sup> Pil kaidin saulang kap amen, pwe a ende aklapalap, ap lodi ong kadeik en tewil. <sup>7</sup> O en pil kalok mau ren me mi liki, pwe a de lodi ong kanamenok o katikatiamaul pan tewil. <sup>8</sup> Pil dueta saunkoa kan en lelapok, so lo riapot, so kamom soko, so noroke moni. <sup>9</sup> Me kin kolekol nan insen arail makelekel rir en poson. <sup>10</sup> Mepukat en kasonglam mas, irail ap pan papa, ma irail me pung. <sup>11</sup> Pil dueta en saunkoa ar warok kan, ren wia me kon ong, o so likinekine, o so kowei kodo, o melel ni meakaros. <sup>12</sup> Saunkoa kan en warok en li ta men o ren kaunda mau nair seri kan o toun im arail. <sup>13</sup> A me papa mau, kin kalok mau pein irail, o re pan pereperenki melel

poson me mi ren Kristus Iesus. <sup>14</sup> Mepukat i inting wong uk, o i kaporoporeki, me i pan pwarala re om madang. <sup>15</sup> A ma i pwapwand, koe en asa duen me koe pan wia nan tanpas en Kot, iei momodisou en Kot ieias, o ur o poson en melel. <sup>16</sup> Meid lapalap rir en pai ren Kot: Kot sansaleda ni uduk, ap diarokada me pung amen ren Ngen, ap pwaralang tounlang kan, ap lolok ong men liki kan, ap kamelel lar ren toun sappa, ap peukadalang wasa lingan.

#### 4

<sup>1</sup> A NGEN me kotin kokop melel, ni imwin kaula akai pan pupe wei sang poson, ap id wuki ong ngen widing o padak en tewil akan. <sup>2</sup> Me kin sansale mau ki liki, ap likilikam o insen arail kakaluakalar ki kisin mata karakar. <sup>3</sup> Re kin inapwiedi kapapaud, o dene ren liki sang song en manga, me Kot kotin wiadang irail, me danke, o poson, o dedekila melel o. <sup>4</sup> Pwe audepa karos, en Kot me mau, o sota meakot me mal, ma aramas pan tungole ap danke. <sup>5</sup> Pwe a pan kasaraui kila masan Kot o kapakap. <sup>6</sup> Ma koe pan padaki ong ri atail akan, koe ap pan papa en Kristus Iesus mau amen, me kin keleki masan en poson o padak mau, me koe dadaureta mau lel met. <sup>7</sup> A koe en kang kasoi likam en li laud akai o kaianeki pein uk me kon ong Kot. <sup>8</sup> Pwe kaiane kin uk pali war, a sota n mekon katepa, a meid mau paieki Kot ni mekaros, pwe iei kaporopor en maur et o pil maur kokodo. <sup>9</sup> Nan melel kasoi pot et o a war ong kitail en apwaliela. <sup>10</sup> Pwe iet me se kin dodok ong o kalokolokki, at kaporoporeki Kot ieias, me Saunkamaur en aramas akan karos, a mas ong irail me poson. <sup>11</sup> Mepukat koe en katitiki o kaukaweweki. <sup>12</sup> Sota amen me pan mamaleki om manapak, a wiala men kaalemongi ong saulang kan, ni om lokaia o wiawia kan, o limpok, o poson, o makelekel. <sup>13</sup> O nantiong wadok, o panau, o padak lao i pan pwar wei. <sup>14</sup> Der kasamal la pai en mak o, me koe aleer ki deideikop o ni en saunkoa kan ar pwil pa ar po om. <sup>15</sup> Koe en podidi o sapisokki mepukat, pwe om lolekong en sansal ong karos. <sup>16</sup> Kalaka pein uk o padak o, tengedi ong song pukot, pwe ma koe pan wiada due, koe ap pan dorela pein uk o pil, me kin rong uk.

#### 5

<sup>1</sup> KOE der lokaia kelail ong ol laud amen, a panau i due sam amen, a me pulepul due ri om akan, <sup>2</sup> Li laud due in akan, a me pulepul due ri om li akan ni makelekel melel. <sup>3</sup> Kakaki li odi kan, me li odi melel. <sup>4</sup> A ma li odi na seri kan mia, de wa en na seri ko, re pan padakki mas apwali pein ar peinaui, o depuk ong ar papa o nono, pwe

i me mau o kon ong Kot. <sup>5</sup> A iet li odi melel amen, me kelep, me kin kaporoporeki Kot, o podidi ong ngidingid o kapakap akan ni pong o ni ran. <sup>6</sup> A me kin kapwaiada a inong sued nan i melar ni a memaur. <sup>7</sup> Mepukat padapadaki, pwe ren sota karaunepa. <sup>8</sup> A ma amen sota kin apwali na kan, a mas toun im a kan, i me kasela poson, o a sued sang me soposon amen. <sup>9</sup> Li odi men pan kileledi, ma a sota pulepul sang saunpar woneisok o ma a warok en ol ta men. <sup>10</sup> O me kalok mau ki a wiawia mau, o me wiada seri, o me apwali men kairu, o me widen na en saraui kan, o me kadek ong me kamekame kan, o me kapwaiada song en wiawia mau karos. <sup>11</sup> A der tuki ong li odi pulepul akan, pwe irail lao inong wei sang Kristus, re men pur ong papaud. <sup>12</sup> A irail pan pakadeikada, pwe re muei sanger tapin poson. <sup>13</sup> A re pil ponkake o papang sili im akan, a kaidin ponkaka ta, pwe re pil poupou sili, o pil usa sili en amen a wiawia, o ar lokelokaia me sota mau. <sup>14</sup> A i men, li odi pulepul en papaud, o naitik, o apwali im ar, o der kare ong me sued o, en lalau. <sup>15</sup> Pwe akai me wuki wei, wuki ong Satan. <sup>16</sup> A ma li odi men mi ren ol me poson amen de ren li me poson amen, a en pein apapwali i o der katoutoui momodisou, pwen itar ong me li odi melel. <sup>17</sup> Saunkoa me kin dodok mau, pan waunla melel, ir me kin sauasa ni padak o kawewe. <sup>18</sup> Pwe kisin likau o masani: Koe der penadi au en kau ol, me tiakedi wan wit. O toun dodok me war ong pwain en dodok. <sup>19</sup> Karaun pan saunkoa men der kamelele, ma so saunkadede riamen de silimen mia. <sup>20</sup> Ir me wia dip, kapung ong mon karos, pwe me tei kan en masakala. <sup>21</sup> I kakaliki ong uk mon Kot Kristus Iesus o tounlang lipilipil akan, koe en wiada mepukat, o so lipilipil, o so pwen konekon ren aramas. <sup>22</sup> Der madang pokadang pon amen pa om, o pil der dipane kila dip en amen kai, a pein koe en makelekel. <sup>23</sup> Koe der nim pil, a wain kis me kon ong kaped om o pweki om somau pan pak toto. <sup>24</sup> Dip en akai aramas me sansal ap mau ong kadeikada ansau wet, a dip en me tei kan pan sansal eu ran. <sup>25</sup> Pil dueta en akai ar wiawia mau me sansal metet, a me tei kan sota kak rirala.

#### 6

<sup>1</sup> LADU kan karos en wauneki melel ar saumas akan, pwe mar en Kot o lamalam der lalauela. <sup>2</sup> A irail me ar saumas akan kin poson ren der mamale kin ir aki ar saulang, a mak eta ren peiki ong irail, pweki ar lelapok o kompokelar. Mepukat padapadakiki o panauiki. <sup>3</sup> A ma amen kin wia eu padak toror, o a sota pan dadaurata masan mau en atail Kaun Iesus Kristus o lamalam, me kon ong Kot, <sup>4</sup> Nan a aklapalap

o sota weweki meakot, a somauki akamai o lokaia sued, me kin kareda peirin, kapei lokaia, lalaue, o karaune mal. <sup>5</sup> O song en akamai en aramas akan, me kin suedela ni lol arail, re liki sang melel, re kiki ong, me pai ren Kot pan kareda kapwa. <sup>6</sup> A pai ren Kot o lolapot, iei me pai kasampwalia. <sup>7</sup> Pwe sota, me kitail wa dong sappa a sansal, me kitail pil sota pan wawei sang meakot. <sup>8</sup> A ma kan atail kisin manga o at likau mia, kitail en insenemauki. <sup>9</sup> A irail, me inong iong kapwapwala, pan lodi ong songesong, o kotauepa kan, o inong sued, o kama-tok, me kakirdilang aramas akan, wasan kamekam o sued. <sup>10</sup> Pwe limpok ong moni me tapin song sued karos, me akai inong iong, rap salongala sang poson o kare ong pein irail kamadak toto. <sup>11</sup> A koe aramas en Kot amen, tang wei sang mepukat, a inong iong me pung o pai ren Kot, poson, limpok, kanongama, opampap en Ngen. <sup>12</sup> Wiada pei mau en poson, aneki maur soutuk, me koe pil paeker ong o kadededa kadede mau o mon saunkadede toto. <sup>13</sup> I kakaliki ong uk mon Kot, me kotin kamaureda meakaros o mon Kristus Iesus, me kotin kadededa mon Pontius Pilatus kadede mau o. <sup>14</sup> Koe en kanikid kusoned, o so samin, o so saping, lao en atail Kaun Iesus Kristus a kotin pwarado, <sup>15</sup> Me Kaun iasanai pan kasansaleda ni a ansau, iei Nanmarki en nanmarki kan o Kaun en kaun akan, <sup>16</sup> Pwe i eta ieias soutuk, me kotikot nan marain, me sota meamen kak ong, me sota aramas kilanger, o so kak kilang, i en waunla man-aman soutuk! Amen. <sup>17</sup> Koe en kapung ong me kapwapwaki dipisou en sappa et, me re der aklapalap o pil der kaporoporeki kapwa somelel, a Kot, me kupurai ong kitail sapan meakan karos, pwe kitail en paie kida. <sup>18</sup> Irail en dadaureta ni arail wiawia mau kan, o ren rokekila dok mau kan, o nek pasang, o sapan men sauasa. <sup>19</sup> Wiawia ong pein irail pason mau eu o ki pena ong ansau kokodo pwe irail en konodi maur melel. <sup>20</sup> O Timoteus, pereki pai, me pangalang re om, ni om liki sang poupou mal kai o padak likam en me aklolekong. <sup>21</sup> Me akai lodi ong ap salongala sang poson. Mak o en me re om!

## EN PAULUS A KISIN LIKAU KARIAU ONG TIMOTEUS.

<sup>1</sup> PAULUS, wanporon en Iesus Kristus pan kupur en Kot, duen inau en maur ren Kristus Iesus. <sup>2</sup> Ong Timoteus nai seri kompoke pai: Mak o kapunglol, o popul sang ren Kot Sam, o Kristus Iesus atail Kaun en mi re om. <sup>3</sup> I danke Kot, me i kin papaki insen ai min sang ren sam ai ko mas due i kin poden lamelame uk ni ai kapapak akan ni pong o nin ran. <sup>4</sup> O inong iong kilang uk ni ai tamatamanta duen om sangesang, pwe i en direki peren. <sup>5</sup> O ni ai tamanda poson melel, me mi re om, me mi mas ren in om liakalap Lois o in om Oinike o i asa, me a pil mi lol om. <sup>6</sup> Ari, i me i men kataman kin uk, koe en kamakamaur pai en Kot, me mi lol om ki pwil pa i kat po om, <sup>7</sup> Pwe Kot sota kotiki ong kitail ngen en masak, a en manaman, o limpok o lelapok. <sup>8</sup> Koe ari der namenokki om kadedeki atail Kaun, de ngai sapwilim a salidi men, a koe en iang ia kamekameki rongamau duen manaman en Kot. <sup>9</sup> Me kotin kamaur kitail da o woronge kin kitail worong sarau, kaidin iran atail wiawia kan, a pweki pein a kupur o mak me a kotin kupura ong kitail ren Kristus Iesus mon tapin kaua. <sup>10</sup> A masan wet a sansaleda ni en atail Saunkamaur Iesus Kristus, me kotin kapuiala mana en mela, ap kapwareda maur o so mor pasang ki rongamau. <sup>11</sup> I me i kasapwiladang, pwen saunkair o wanporon, o saunpadak en men liki kan. <sup>12</sup> I me i pil kin kalokolok ki. A i sota kin namenok kila, pwe i asa me i kin kamelele; o i asa, me a kak nekinekid ai pai, me i aleer, lao lei ran o. <sup>13</sup> Dadaurata song en padak en kamaur, me koe rong sang ia er, o poson o limpok ren Kristus Iesus. <sup>14</sup> Pai mau o me pwilidier re om, pera ki Ngen sarau, me kotikot lol atail. <sup>15</sup> Koe asa, me irail karos, me mi Asien, wuki sang ia; kisan ir Pikelus o Ermokenes. <sup>16</sup> Kaun o en kotin maki ong toun im en Onesiporus, pwe pan pak toto a kadek ong ia, o a sota namenok ki ai sal mata. <sup>17</sup> Pwe ni a mi Rom, a nantiong rapa kin ia, ap diar ia da. <sup>18</sup> Kaun o en kotin kupura ong i kalangan en Kaun o ni ran kokodo. A koe asa mau, duen a papa nan Epibus.

### 2

<sup>1</sup> ARI nai seri keleki mak o, me mi ren Kristus Iesus. <sup>2</sup> O me koe ronger sang ia impan saunkadede toto, koe en usai ong aramas lelapok kan, me koiok ong padaki me tei kan. <sup>3</sup> Koe iang ia kamekam duen saunpei en Kristus Iesus mau amen. <sup>4</sup> Saunpei

amen sota kin kadoki pein kan a manga, pwen kon ong me ale i. <sup>5</sup> O ma amen pan weir, a sota pan ale kating, ma a sota weir mau. <sup>6</sup> A saumat amen, me kin sapasap en tungole mas wa kan. <sup>7</sup> Madamadaue duen me i inda, pwe Kaun o pan kotin kalolekong kin uk ni mekaros. <sup>8</sup> Tamataman Iesus Kristus, me iasada sang ren me melar akan, kadaudok en Dawid duen ai rongamau, <sup>9</sup> Me i kamekameki o salikidi dueta me sued amen, a masan en Kot me so salidier. <sup>10</sup> Mepukat karos i kin kamekameki me piladar akan, pwe ren pil konodi maur soutuk ren Kristus Iesus iangaki iang soutuk <sup>11</sup> Meid melel, ma kitail iang matala, kitail pil pan iang ieiasata; <sup>12</sup> Ma kitail dadaurata, kitail pan iang kaunda; ma kitail ponsasa, a pil pan ponsasa kitail; <sup>13</sup> Ma kitail sota pan dadaurata, a pan kotin melel weita, pwe a so kak kalikame pein i. <sup>14</sup> Kataman kin irail mepukat, kadede ong irail mon Kaun o, ren der akamaki ki sip en lokaikan, me sota pan katapai ong meakot, pwe a pan kasapunge ir ala, me karong akan. <sup>15</sup> Nantiong konekonela ren Kot dueta toun dodok amen, me so karepen namenokala mia, me kin padak weita pung masan melel. <sup>16</sup> A koe en kang poupou mal akan, pwe ar sapung pan lapalalapa. <sup>17</sup> Arail padak me pan paraparada due kins. Kisan irail Imenäus o Piletus, <sup>18</sup> Me pirok sang melel ni a inda me dene mauredan aramas wiawier, rap kawela poson en akai. <sup>19</sup> A pason en Kot pan duedueta, a iet kilel: Kaun o kotin mangi sapwilim a kan, o: Karos, me asa mar en Kaun o, en muei sang me sapung. <sup>20</sup> Nan im lapalap kaidin dal kold o silper eta me mia, pwe pil dal tuka o dal pwel, akai men kalingan, o akai kaidin men kalingan. <sup>21</sup> A ma amen pan muei sang song en aramas due met, a pan rasong dal men kalingan me kasarauiala, o katepa ong Kaun o mau ong song en wiawia mau karos. <sup>22</sup> Tang wei sang inong sued en manakap, ap tang wong pung, o poson o limpok, o popul iangaki karos, me kin kapakapaki ong Kaun o sang nan mongiong ar makelekel; <sup>23</sup> A padak mal o likam kan kang, pwe koe asa, me re pan naitikada akamai. <sup>24</sup> Ladu en Kaun men ender akamai, a en kadek ong karos, o koiok ong padak o kanongama ong me sued akan. <sup>25</sup> O opampap ni a kapung ong me katiwo kan, pwe ele Kot pan kotin sausa ir, pwe ren wukilang lolekong en melel. <sup>26</sup> O ren pil piti sang ni insar en tewil, me a insara kin ir di ong insen a.

### 3

<sup>1</sup> A IET me koe en asa, ni imwi en ran akan ansau apwal pan pwaida. <sup>2</sup> Pwe aramas akan pan kasampwaleki pein irail, o norok moni, o ponmasu, o aklapalap, o lalau, o

sota peiki ong me wia ir adar, o so danke, o me sued. <sup>3</sup> O sempok, o sasa mak, o likinekine, o weit, o so kadek, so pok ong me mau kan, <sup>4</sup> O me kin pangala me sarau, o me katil la, o kala, o inong iong me sued mon Kot. <sup>5</sup> Me sansalki lelapok ap sasa a manaman; muei wei sang mepukat. <sup>6</sup> Pwe akai irail kin wailong ong nan im akan o kaloedi li akai, me toutouki dip, o me inong sued kin kaua ir sili. <sup>7</sup> Me kin sukusukul ansau karos, ap sota lolekong kila melel. <sup>8</sup> A duen lanes o lampres palian Moses, iduen mepukat kin palian melel, i song en aramas akan me suedelar ni lol arail, o me sota mau ong poson. <sup>9</sup> A re sota pan pwaida, pwe ar lolepon pan sansal ong karos dueta a wiaui er ren irail. <sup>10</sup> A koe ale sang ai padak o ai tiak, o ai lamalam o poson, o dadaurata, o limpok, o kanongama, <sup>11</sup> O kamekam akan, o kalokolok kan, me lelel ong ia nan Antiokien, o Ikonien, o Listra; song en kalokolok toto, me lelel ong ia. A Kaun o kotin dore ia lar sang ir karos. <sup>12</sup> A karos me men dadaurata duen me kon ong Kot ren Kristus Iesus, pan kamekameki. <sup>13</sup> A aramas sued o malaun akan pan kakairida ni ar sued, irail pan kotaue aramas akan o re pan kotaue irail. <sup>14</sup> A koe dadaurata, me koe padakkier pwe koe asaer, me koe padakki sang er. <sup>15</sup> O koe asa kisin likau sarau kan sang ni om seri, me kak kalolekongi uk ong maur potopot ki poson me mi ren Kristus Iesus. <sup>16</sup> Pwe masan en kisin likau kan karos tapi sang ren Ngen en Kot, me mau ong padak, o kapung, o kamau, o kainene ong me pung. <sup>17</sup> Pwe aramas en Kot en unsokela o koik ong wiawia mau karos.

#### 4

<sup>1</sup> I KAKALIKI ong uk melel mon Kot o Kristus Iesus, me pan kadeikada me maur o me melar akan ni a pan kotido ni a wei, <sup>2</sup> Padaki masan nantiong eta ni ansau mau o ni ansau me sued kasaleda dip, o kapungada, o panau ni kanongama, o kaukawewe. <sup>3</sup> Pwe eu ansau kokodo re sota pan mauki padak en kamaur, a duen pein arail inong kasapwilada saunpadak kai, me pan wiada padak duen me re mauki. <sup>4</sup> O re pan kawuki sang melel salong arail, ap kawuki ong kaso mal akan. <sup>5</sup> A koe en masamasan ni meakaros. Peren ki kamekam, kapwaiada wiawia en wanporon amen. Kapwaiada mau om koa. <sup>6</sup> Metet ngai kamekamela o ansau en ai mela leler. <sup>7</sup> I wiadar pei mau eu, i kanikielar ai weir en tang, i dadaurata poson. <sup>8</sup> Ari, nin en me pung nekinek ong ia, me Kaun o pan kotiki ong ia ni ran o, iei saunkapung pung, a kaidin ong ngai ta, pwe ong karos, me anane a pwarado. <sup>9</sup> Kaporisokki uk, pwen madang kodo re i. <sup>10</sup> Pwe Demas me kase ia lar pwe a pok ong

sappa et, ap samalanger Tesalonik, Kresens Kalesia, Titus Dalmatien, <sup>11</sup> Lukas eta mi re i, ukada Markus, pwen iang kodo met, pwe a katempa ong ia ni ai dodok. <sup>12</sup> A Tikikus i kadalalang Episus. <sup>13</sup> Likau pup, me i pwilikidier Troas ren Karpus, wado ni om pan pwarado, o puk kan o kisin likau kan. <sup>14</sup> Aleksander saunmata wia ong ia me sued toto, Kaun o en kotin depuk ong i duen a wiawia kan! <sup>15</sup> Koe pil kalaka i, pwe a kin nantiong palian at padak. <sup>16</sup> Ni tapin ai pan pakadeikada, sota amen me saüasa, pwe karos tang sang ia, mepukat ender pwaipwai ong irail. <sup>17</sup> A Kaun o kotin ieiang ia o kamana ia da, pwe i en kak kanikiela ai padapadak o men liki kan karos en rong. I dorelar sang au en laien. <sup>18</sup> A Kaun o pan kotin kapit ia la sang ni wiawia sued karos, o kotin kalua wong ia wein nanlang, i en lingan kokolata! Amen. <sup>19</sup> Ranamau, wong Priska o Akwila o toun im en Onesiporus. <sup>20</sup> Erastus mondi Korint, a Tropimus somaudar, i ap pwilikidi Miletus. <sup>21</sup> Kaporisokki uk, pwen kodo mon ansau kapau. En Eupulus a ranamau wong uk, o pil en Pudens, o Linus, o Klaudia, o ri atail karos. <sup>22</sup> Kaun o en kotikot ni ngen om! Mak en mi re omail!

## EN PAULUS A KISIN LIKAU ONG TITUS.

<sup>1</sup> PAULUS ladun Kot o wanporon en Iesus Kristus amen, duen poson en me pilipildar en Kot akan o duen erpit en melé ong pai ren Kot; <sup>2</sup> O kaporoporeki maur soutu, me Kot so likam inaukidar mon tapin kaua. <sup>3</sup> A ni a ansau a kotin kasansaledar a masan ki padak, me ko ong ia, duen kusoned en Kot atail Saunkamaur. <sup>4</sup> Ong Titus nai seri melé ni ata poson ta ieu: Mak o popol sang ren Kot Sam o Kristus Iesus atail Saunkamaur en mi re om! <sup>5</sup> Iet karepen ai kamodang uk edi Kreta, pwe koe en kapwaiada, me kaikenta wiauié o kasapwilada saunkoa kan ni kanim karos, due i kakaliki ong uk. <sup>6</sup> Saunkoa amen en indand mau, o warok en li ta men, o me na seri kan posonla, o so kaindandeki, me re kamom de sopeik. <sup>7</sup> Pwe pisop en pungla, duen saunkoa en Kot amen, der katiwo, der purianikom, der kamom wain, der pamara, der norok moni. <sup>8</sup> A ren apwali men kairu o pok ong me mau, o kanongama, o pung, o sarau, o makelekel. <sup>9</sup> Kolekoleta masan, me udan pung o koiok ong padak, pwen kak ong panauiki padak en kamaur o kapung ong me katiwo kan. <sup>10</sup> Pwe ir me toto me malaun o kapei lokaia o me kaweid sapung, iet eten, kisan men sirkomsais. <sup>11</sup> Me mau ong au ar en pinapinla, pwe re kin kawukila toun im toto, o me kin padapadaki, me sota mau, pweiki moni. <sup>12</sup> Amen irail, pein arail saukop amen inda: Men Kreta me kalap likam, man sued o laualo, nain manga. <sup>13</sup> Kadede pot et me melé. Ari, i me koe en kapung kelail ong irail, pwe ren kelailada ni poson. <sup>14</sup> O ren der insenoki en Sus oko ar kasoi mal akan o kusoned en aramas akan, me muié sang melé. <sup>15</sup> Karos me kon ong makelekel akan, a sota me kon ong me samin o so poson akan, pwe arail lamelame o pil insen arail me samin. <sup>16</sup> Re kin inda, me re asa Kot, a ni ar wiawia kan re kin ponsasa i. Irail meid sued, o sopeik, o so koiok ong song en wiawia mau karos.

## 2

<sup>1</sup> A KOE en padapadakeki duen me kon ong lamalam en kamaur. <sup>2</sup> Padaki ong ol ma kan, ren der wukiwuk sili, a ren indand mau o ngenin, o kelail ni poson, o ni limpok, o ni kanongama. <sup>3</sup> Pil dueta li ma kan, ren wiawia duen me kon ong sarau kan, ren der likinekine der lidun wain, a ren saunpadak en me mau, <sup>4</sup> Pwe ren panau li pulepul akan, en apwali ar paud o pok ong nair seri kan. <sup>5</sup> Ren lelapok, min, apwali

nan im ar akan, kadek, peiki ong ar warok kan, pwe masan en Kot ender lauauela. <sup>6</sup> Pil dueta manakap akan, panau ir, ren lelapok. <sup>7</sup> Ni wiawia mau kan karos koe kasaleda pein uk kaalemongi mau amen, ni om padak melé o lelapok. <sup>8</sup> Kida padak en kamaur o namenokala, pwe me palian kitail en namenokala, o sota diar me sued kot men karaune kitail. <sup>9</sup> Padaki ong ladu kan, me ren peiki ong ar saumas ni meakoros ren kaperen ir ada, o ren der katiwo. <sup>10</sup> Ren der pirap, a irail en mau o melé ong irail, pwe ren kalinganada lamalam en Kot atail Saunkamaur ni meakoros. <sup>11</sup> Pwe mak en Kot pwarado kamaureda aramas akan karos. <sup>12</sup> O padapadaki ong kitail, me kitail en muié sang meakan me doo sang Kot o inong sued en sappa, ap lelapok, o pung, o dadaureta me kon ong ni sappa et. <sup>13</sup> O auiauié kapor mau, o sansal lingan en atail Kot lapalap o atail Saunkamaur Kristus Iesus. <sup>14</sup> Me sokonpaudeki pein i ki kitail, pwen dore sang kitail sapung karos, o kamakelekel ong pein i aramas, me a pan sapwilim aneki, me kin nantiong wiawia mau karos. <sup>15</sup> Mepukat padake kida, o panauiki, o kapung kelail ong; sota amen me pan mamale kin uk.

## 3

<sup>1</sup> KATAMAN kin irail ren peiki ong monsap o me manaman akan, o ren apwali wiawia mau karos. <sup>2</sup> Der lalaué amen, der akamai, a en kamantik, o opampap ong aramas akan karos. <sup>3</sup> Pwe kitail pil pweipwe mas o, o sopeik, o salongala, o papa song en inong o madong sued akan, kokoa me sued, o peirin, pakailok, o kailongki amen amen. <sup>4</sup> A kalangan o limpok en Kot atail Saundor lao pwarado, <sup>5</sup> A kotin dore kitail la kaidin pweiki pein atail wiawia pung, a pein a kupur ki paptais en kaipwi kap o kawilia kap ren Ngen sarau. <sup>6</sup> Me a kotin kupura dong kitail kaualap ren Iesus Kristus atail Saundor. <sup>7</sup> Pwe kitail en pung kila a mak, pwen sosoki maur soutu duen at kaporopor. <sup>8</sup> Melé padak pot et o i men, koe en nantiong kaweweda, pwe irail, me posonla Kot, en kadoke kin ir wiawia mau, mepukat me mau o kon ong aramas akan. <sup>9</sup> A liki sang peidok mal akan, o padok en tiak kan, o akamai, o akamai ki kapung, pwe mepukat sota kadepa o me mal. <sup>10</sup> Aramas likin panau amen, panau pan mepak de riapak ap muié sang i. <sup>11</sup> Pwe koe asa, me i me sapung o kin wia dip, a kadeikada pein i. <sup>12</sup> I lao kadar wong uk Artemas de Tikikus, koe madang dong ia, Nikopolis, pwe i kileledier me i pan kauson wasa o ni ansaun kapau. <sup>13</sup> Saunkawewe Senas o Apolos kadara dong ia madang. Sauasa ira, pwe ira de anane meakot. <sup>14</sup> O naitail akan

en porisok o koiokki ong wiawia mau, pwe  
ren der so wa 'rail. <sup>15</sup> Karos, me mi re i, kin  
ranamau wong uk. Ranamau wong karos,  
me kin pok ong kit ni poson. Mak o en mi re  
omail karos!



## EN PAULUS A KISIN LIKAU ONG PILEMON.

<sup>1</sup> PAULUS salidi en Kristus Iesus amen, o ri atail Timoteus ong Pilemon kompoke pat o at warok ni dodok kan. <sup>2</sup> O ri atail li Apia, o sauas pat Arkipus, o momodisou, me mi nan tanpas omui; <sup>3</sup> Mak o popol sang ren Kot sam atail o atail Kaun Iesus Kristus en mi re omui! <sup>4</sup> I kin danke ai Kot ni ai kapakap kin komui ansau karos. <sup>5</sup> Pwe i ronger duen omui limpok o poson ong Kaun Iesus o ong sarau kan karos. <sup>6</sup> Pwe poson o me mi re 'tail en kakairida re omui, ni omui dedeki duen me mau kan karos, me mi reatail sang ren Kristus. <sup>7</sup> Kit peren kidar o kamait kilar omui limpok, pwe mongiong en sarau kan en kelail kilar komui, ri ai. <sup>8</sup> I me i aimaki ren Kristus kusoned eki ong komui duen me pan wiaui. <sup>9</sup> Ari so, pweki ai limpok ong komui i men poeki ta re omui, pwe ngai Paulus likailapalar o salidi en Kristus amen. <sup>10</sup> I poeki re omui nai seri Onesimus, me i wiadar ni ai salidi, <sup>11</sup> Me so katepa ong komui mas o, a met a katepa ong komui o ngai. <sup>12</sup> I me i kapure ong komui, komui ari apwali i, dueta pein mongiong i. <sup>13</sup> Pwe i mauki a en mimieta re i, pwen papa ia ni ai saliekidi rongamau, wiliandi komui, <sup>14</sup> A i sota men wia meakot, me sota pwili sang kupur omui, pwe omui wia mau ender mansairen a somansairen. <sup>15</sup> Ele a tang sang re omui ansau kis, pwe komui en pur ong naineki i kokolata. <sup>16</sup> Kaidin due ladu amen, a mau sang ladu amen, pwe due ri omui kompok amen; iduen re i, a re omui pan laud sang ni pali uduk a o ni pali en Kaun. <sup>17</sup> Ma komui akawarok kin ia, apwali i dueta pein ngai. <sup>18</sup> A ma a wia sapung ong komui er, de pwaipwand ong komui, i pan kapungala. <sup>19</sup> Met ngai Paulus intingkier pein pa i, i pan pwain, ari so, i so pan inda, me komui pwaipwand ki ong ia pein komui. <sup>20</sup> Ei ri ai, i men paiekin komui ren Kaun o, kainsenemauda mongiong i ren Kristus. <sup>21</sup> I kaporoporeki om peik, ap inting wong komui. A i asa, me komui pan wia laud sang, me inda. <sup>22</sup> I men, komui en kaonopada deu i, pwe i kaporoporeki, me i pan lapwadang komail ki omail kapakap. <sup>23</sup> En Epapras, ai warok ni ai salidi pan Kristus Iesus, a ranamau wong komui. <sup>24</sup> O Markus, o Aristarkus, o Demas, o Lukas ai warok en dodok kan. <sup>25</sup> Mak en atail Kaun Iesus Kristus kin iang ngen omail! Amen.

## KISIN LIKAU ONG MEN IPRU.

<sup>1</sup> MURIN masan toto, me Kot kotin kadede ki saukop akan ni tapin kaua ong sam atail akan, <sup>2</sup> A ni imwin kaua o ran pukat, a kotin masan kidong kitail Na, me a kotin kasapwilada, pwen sosoki meakan karos, o me a kotin wia kida wei pokon, <sup>3</sup> Me kisan a lingan o wewe mau ong mom a, o kotin kaun kida meakaras a masan manaman, a lao kotin kamakelekele ki sang dip atail ki pein i, ap kaipokedi ni pali maun en Kaun lapalap poa. <sup>4</sup> I me a lapalapalar kaulap sang tounlang kan, pwe a aleer mar eu, me lap sang mar arail. <sup>5</sup> A pwe is ren tounlang kan, me a kotin masani ong: Koe nai Ol, ran wet I kaipwi ukadar? O pil eu: I pan wiala Sam a, o a pan wiala nai Ol? <sup>6</sup> O pil eu: A lao pan pil kare dong sappa Meseni o, a kotin masani: Tounlang en Kot karos pan pongi i. <sup>7</sup> A duen tounlang kan a kotin masani: A wiaki sapwilim a tounlang kan man en kadar o a papa kan umpul en kisiniai. <sup>8</sup> A duen Sapwilim a a kotin masani: Mol omui, Maing Kot, pan potopot eta. O sokon en pung, iei sokon en wei omui. <sup>9</sup> Komui pok onger me pung, ap kailongki tiak sapung; iei me omui Kot keie kin komui Maing Kot, potik kaperen, pwen lapa sang nanmarki kan karos. <sup>10</sup> O pil eu: Komui Maing pasonedier sappa nin tapi o, o lang akan wiawia en lim omui kan. <sup>11</sup> Irail pan momela, a komui pan kotikot eta, o irail karos pan maringalar dueta likau eu, <sup>12</sup> Komui pan kotin wilitik ir pena dueta likau eu, o irail pan wukila, dueta likau eu; a komui pan duedueta o omui par akan sota pan rosela. <sup>13</sup> A is ren tounlang kan, me a kotin masani ong: Mondi on ni pali maun i, I lao kaloedi om imwintiti kan pan nä om? <sup>14</sup> Kaidin irail karos ngen en men papa me kin pakadarala pwen papa irail, me pan sosoki maur soutuk?

## 2

<sup>1</sup> I ME kitail en nantiong madamadaua, duen me kitail rongadar, pwe kitail ender so konoti. <sup>2</sup> Pwe ma masan o, me pouasa sang ren tounlang kan, me inen o kaopa karos o katiwo karos kalokoloker duen kapung o, <sup>3</sup> I aduen atail pan kak pitila, ma kitail mamaleki kamaurpa lapalap wet, me tapida ni a kalok sang ren Kaun o ap pil sang ren me rongorong i kan! <sup>4</sup> A pil Kot, me kotin kadede ki kilel akan, o manaman akan, o song en wiawia kelail akan, o kisakis en Ngen sarau, duen pein kupur a. <sup>5</sup> Pwe a sota kotiki ong tounlang kan, en koaki sappa kokodo, duen me se indinda. <sup>6</sup> A

amen me kadede o inda ekis wasa: Dakot aramas o, pwe komui kin kotin kupura i, de nain aramas amen, pwe komui kotin apwali i? <sup>7</sup> Komui kotin kasapwilidi i ansau kis pan tounlang kan, ap kotin nine kin i lingan o wau. <sup>8</sup> Kom kotin kaloedier karos pan aluwilu a kan. A ni a kotin kaloedi ong i meakaras, solar, me sota lodi ong i. A met kitail saikenta kilang, me karos lodi ong i. <sup>9</sup> A kitail kilang Yesus, me kasapwilidi ansau kis pan tounlang kan, pweki a kalokolok ong kamatala, ap nine kida lingan o wau, pwen mata kila amen amen duen mak en Kot. <sup>10</sup> Pwe me mau ong i, me dipisou kan karos wiaui onger o wiaui kidar, ni a kotin kalua wong lingan seri toto, en kaunsokala Tapin maur arail ki kamekam, <sup>11</sup> Pwe i, me kin kasarau, o irail, me pan kasarauila, karos tapi sang me ta men, i me a sota kotin namenokki riane kin irail, <sup>12</sup> Duen a kotin masani: I pan padaki ong ri ai kan mar omui, o nan pung en momodisou i pan kaul kapung ong komui. <sup>13</sup> O pil eu: I pan liki i. O pil eu: Masani, iet ngai o seri kan, me Kot kotiki ong ia er. <sup>14</sup> A duen seri kan, me kisan pali nta o uduk, i me a pil kotin ale ong pein i mepukat, pwe ni a matala i en kaloedi i, me kaun en mela, iei tewil o, <sup>15</sup> O kotin lapwada irail karos, me lodi ong masak mela, ap lidulidu arain arail maur. <sup>16</sup> Pwe kaidin tounlang kan, me a kotin apa-pwali, pwe a kotin apapwali kadaudok en Apraam. <sup>17</sup> I me a kotin udan duela ri a kan ni meakaras, pwen kalangan o wiala samero lapalap melal amen, mon Kot, pwen tomki dip en aramas akan, <sup>18</sup> Pwe duen pein i kanaudokalar o songesong, a kotin mangi duen sausa irail, me songesonger.

## 3

<sup>1</sup> I ME, ri ai sarau kan, komail me pwasanekier en lang a eker, komail madamadaua duen wanporon o samero lapalap en atail lamalam: Yesus. <sup>2</sup> Me melal ong i me kasapwilada i, dueta Moses me melal wasa karos nan tanpas en Kot. <sup>3</sup> Pwe lingan en Ol men et me lapa sang lingan en Moses, dueta aramas amen, me wiadar im eu, me kaka sang im o. <sup>4</sup> Pwe im karos wiauiada ren aramas amen, a me wiadar meakan karos, iei Kot. <sup>5</sup> A Moses me melal ni a koaki tanpas en Kot, dueta papa amen, pwen saunkadade en meakan me pan lokido. <sup>6</sup> A Kristus me udan Na, ap melal nan pein tanpas a. A tanpas a iei kitail, ma kitail kolekoleta poson o peren en kaporopor lao lel imwi. <sup>7</sup> I me Ngen sarau kotin masani: Ran wet, ma komail pan rong kapitie, <sup>8</sup> Komail der kapitakaila mongiong omail, due ni ansau en kaongiong ni ran en songesong nan sap tan. <sup>9</sup> Wasa me sam omail akan kakaudud o kasosong ia o irail

kilanger ai wiawia kan saunpar paeisok.  
<sup>10</sup> Iei me I makaraki pan ti o, ap inda: Mongiong arail kin poden sapungla. A irail solelapokki ai al akan. <sup>11</sup> Iei me I kaukila ni ai makar: Irail sota pan konodi ai moleilei.  
<sup>12</sup> Kalaka ri ai kan, pwe mongiong en amen de suedela, ap so poson o muei wei sang Kot ieias. <sup>13</sup> A komail panau pena ran karos arain omail kak inda: Ran wet; pwe amen de kapitakai kila widing en dip. <sup>14</sup> Pwe kitail wialar kisan Kristus, ma kitail kolekoleta tapin atail liki lao imwisokela. <sup>15</sup> Duen a lokido: Ran wet, ma komail pan rong kapitie, komail de kapitakaila mongiong omail, due ni ansau en kaongiong. <sup>16</sup> A is irail, me kaudud ong i ni ar rongadar? Kaidin irail karos, me ko wei sang Akipten ren Moses? <sup>17</sup> A is irail, me a kotin ongiong kidar par paeisok? Kaidin irail, me wiadar dip, me war arail pupedi nan sap tan? <sup>18</sup> A is irail, me a kotin kaukila, me re sota pan konodi a moleilei? Kaidin irail eta, me sota peiki ong i. <sup>19</sup> Ari, kitail diarada, me re sota kak, konodi, aki ar so poson.

#### 4

<sup>1</sup> KITAIL ari kanakanaiong pein kitail, pwe inau pan pedel ong nan a moleilei mimieta, pwe amen re omail ender dirokada duen amen, me sota konodier. <sup>2</sup> Pwe rongamau pil lolok dong kitail er dueta ong irail; a arail rong masan o sota kadepa ong irail, aki a sota doleki poson ren me rongadar akan. <sup>3</sup> A kitail me posonlar, pan pedel ong nan moleilei o, duen a kotin masanier: I kaular ni ai makar: Re sota pan pedel ong nan ai moleilei. Ari so, wiawia kan unsokalar ni a kotin kapikadar sappa, <sup>4</sup> Pwe ekis wasa a kotin masanier duen ran kaisu: Kot kotin moleilei sang a wiawia kan karos ni ran kaisu. <sup>5</sup> O wasa et a pil kotin masani: Irail sota pan pedel ong nan ai moleilei. <sup>6</sup> Ari, a kak ren akai en pedel ong nan moleilei o; a irail, me aleer rongamau mas o, sota pedel ong, pweki ar sopeik. <sup>7</sup> Kot ap pil kotin kileledier ran eu: Ran wet! Ni a kotin masanier ren Dawid murin ansau warai, duen a masan moa: Ran wet, ma komail pan rong kapitie, komail der kapitakaila mongiong omail. <sup>8</sup> Pwe ma Iosua kamoleilei ir ala, a sota pan kotin katitiki duen eu ran. <sup>9</sup> Ari kamol en sapat pan sapwilim en Kot akan mia. <sup>10</sup> Pwe i, me pedel ong nan a moleilei, a pein pil moleileila sang a wiawia kan, dueta Kot sang sapwilim a kan. <sup>11</sup> Kitail ari kaporisoki pein kitail, en pedel ong nan moleilei o, pwe amen ender lodi ong song en sopeik ota. <sup>12</sup> Pwe masan en Kot me maur, o manaman, o kong sang kodlas au riau, o kin til wong, lao a kasare pasang maur o ngen, pil kokon akan

o kanang en ti o; o kadeikada lamelam o inong en mongiong o, <sup>13</sup> O sota man me maur kot me rir sang i, pwe mekaros me sansal o kadiarokada mon silang i. Kitail en kapungala pein kitail re a. <sup>14</sup> Ari, pweki atail samero lapalap kasampwal Iesus, Sapwilim en Kot, me kotidala nanlang, kitail en dadaurata lamalam. <sup>15</sup> Pwe atail samero lapalap kaidin i amen, me sota kin kotin pam atail luet akan. A i amen me songesong ni song karos dueta kitail ap sota dip a. <sup>16</sup> Iei me kitail en aima ko dong mol en mak, pwe kitail en tungole kalangan o mak, pwen sauas patail ni ansau me mau ong.

#### 5

<sup>1</sup> PWE samero lapalap karos, me pilipildar sang ren aramas akan, pan kasapwilada, pwen sauasa aramas akan ren Kot, pwen wiada kisakis o mairong pweki dip; <sup>2</sup> Me kak pamada duen me sapung o salongala kan, pwe i pil me lued. <sup>3</sup> I me a udan kida mairong pein dip a, dueta a kin tomeiki dip en aramas akan. <sup>4</sup> O sota amen, me kin kasapwilada pein i, pwe a pan kasapwilada sang ren Kot dueta Aron. <sup>5</sup> Pil dueta Kristus, me sota kalinganada pein i, pwen wiala samero lapalap, a i me wiadar me masani ong i: Koe nai Ol, ran wet I kaipwi uk adar. <sup>6</sup> Duen a pil kotin masani ekis wasa: Koe samero duen al en Melkisedek kokolata. <sup>7</sup> O ni ran akan, me a kotikot ni pali uduk, a kotin mairongki laolao, o ngidingid, o kaukauwet, o tontonir ong i, me pan kak dorela i sang a pan matala, o pweki a wauneki Kot, a laolao pil pwaidar. <sup>8</sup> I me Sapwilim a, ari so, a kotin padakki peik ni a kalokolok. <sup>9</sup> O ni a unsokalar a kotin wialar kamaur pan maur soutuk ong irail karos, me kin oke i. <sup>10</sup> O Kot pil kotin kamare kin i samero lapalap duen al en Melkisedek. <sup>11</sup> Iran mepukat kasoi toto mi re at, a me apwal en kaweweda, aki omail sota dedeki. <sup>12</sup> Nan a daulier ansau, me komail en wiala saunpadak, ari so, komail me pil mau ong, amen en kawewe ong komail tapin lamalam en masan en Kot, wialar song dueta irail, me kin tungole pil en didi, a kaidin kisin manga. <sup>13</sup> Pwe amen amen me kin tungole pil en didi, me man salongpon ni masan en pung, pwe a rasong seri pwelel. <sup>14</sup> A me unsokalar akan me mau ong kisin manga, pwe irail me anlar lamalam pweki ar laudelar, ap asa duen me mau o me sued.

#### 6

<sup>1</sup> I me kitail pan muei sang tapin padak en Kristus, ap kakairida o unsokela, a kaidin pur ong wia pason ni at kalukila wiawia en mela kan, de poson Kot, <sup>2</sup> De padak duen paptais, o pokada pa kan poa, o duen en me melar akan ar pan maureda, o duen

kadeik soutuk. <sup>3</sup> A i me kitail pan wiada, ma Kot pan kotin mueid ong. <sup>4</sup> Pwe a so kak pa rail, me marainlar, o me wewekier kisakis sang lang, o audaudkier Ngen sarau, <sup>5</sup> O lolekong kilar masan en Kot mau, o manaman en muei mau kokodo, <sup>6</sup> Ma irail pan pup wei sang, re solar pan kak pur ong kalula, pwe irail pein kalopuela Sapwilim en Kot o kanamenokalar i. <sup>7</sup> Pwe sap me lamelamur ki katau, me kin purepure moredi ong, o me kawosadang irail, me kin wia sapasap kapwa mau, iei sap o me kin ale pai ren Kot. <sup>8</sup> A ma a kin kawosada tuka teketek o dip, iei me sued o mau ong kariala o ni imwi a pan karongala. <sup>9</sup> A kompoke pat akan, se asa, me komail sota kin duota ni meakan me kareda maur, ari so, iduen at kin padapadak. <sup>10</sup> Pwe Kot sota sapung, o a sota kak maliela omail wiawia kan o omail dodok limpok, me komail kasansale ong mar a ni omail papaer me sarau kan, o ni omail kin papa. <sup>11</sup> A kit kin inong iong, amen amen komail en nantiong duedueta kasansaleda kaporo por melel lao lel imwi. <sup>12</sup> Pwe komail der tangangala, a komail alale sang irail, me poson o kanongama ap sosoki inau kan. <sup>13</sup> Pwe ni en Kot a kotin inauki ong Apraam, a kotin kaukila pein i, pwe sota me lap sang en kau kila, <sup>14</sup> Masani: Melel I pan kapai uk ala o kangeder uk ala. <sup>15</sup> I ari auiauieta ni kanongama ap pwaida inau o. <sup>16</sup> Pwe aramas akan kin kaukila me lapa sang ir, o kaula kin kaimwisokala akamai karos. <sup>17</sup> I me Kot pil kotin kaukila, pwen kasale ong irail, me pan sosoki pai en a inau o, me a inau sota kak wukila. <sup>18</sup> Pwe song riau me so kak wuk, pwe Kot sota kak likam, en kamait kit ala melel, pwe kitail en tang wong kaporopor, me mi mo atail. <sup>19</sup> Kaporopor wet me rasong paipong en ngen atail, me melel o teng, me kak lel wong nan pera sarau. <sup>20</sup> Iei wasa atail saunkair kotila ia pweki kitail, Iesus, me wiala samero lapalap ni al en Melkisedek kokolata.

## 7

<sup>1</sup> IEI Melkisedek nanmarki en Salem o samero en Kot lapalap amen, me kotilan tu ong Apraam, ni a pure do sang a kaloedi nanmarki kai, ap kapaida i; <sup>2</sup> Me Apraam pil kotiki ong eisok kis eu sang ni a dipisou karos. Iet wewe kaieu en mar a: Nanmarki en pung; ap pil: Nanmarki en Salem, iet wewe: Nanmarki en popol; <sup>3</sup> Me sota sam a, sota in a, sota a kainok, sota tapin a ran akan, pil sota imwin maur. A a ras ong Sapwilim en Kot, o a pan samero kokolata. <sup>4</sup> Komail kilang ol lapalap men et, me sam atail Apraam kotiki ong eisok kis eu en a dipisou, me lodier. <sup>5</sup> Melel eta kadaudok en Lewi, me kasapwiladang dodok en samero,

arail kusoned mia, me ren ale sang ren aramas akan, iei ri arail akan, eisok kis eu, duen kapung, a ir pil kisan kadaudok en Apraam. <sup>6</sup> A i, me sota kisan irail, ale eisok kis eu sang ren Apraam o kapaiada i, me aleer inau o. <sup>7</sup> Nan melel kaulap me tititik o kin paida sang ren me lapalap. <sup>8</sup> Ari met, aramas akan me udan mela, kin ale eisok kis eu, a mo amen, me kadedepa mia, duen a ieiasata. <sup>9</sup> Ari melel, pil kadaudok en Lewi me kin ale eisok kis eu, kida eisok kis eu ong (Melkisedek) ki Apraam. <sup>10</sup> Pwe a mimieta nan longelong en sam a, ni ansau Melkisedek kotilan tu ong i. <sup>11</sup> Ari, ma dodok en samero Lewi unsokela — pwe i ansau irail aleer kapung o — da katepan amen samero en pwarado ni al en Melkisedek, a kaidin ni al en Aron? <sup>12</sup> Pwe ma dodok en samero wukila, nan kapung pan pil wukila. <sup>13</sup> A i, me se indinda, i kisan eu kainok, a sota amen sang nan kadaudok wet apwalier pei sarau. <sup>14</sup> Pwe meid sansal, me Kaun patail tapi sang Iuda. Ari, iran sau wet Moses sota katitiki meakot duen samero. <sup>15</sup> Mepukat sansal melel, ma amen samero pan kotido ni al en Melkisedek, <sup>16</sup> Me sota kasapwiladar pan tiak en kusoned uduken, pwe pan manaman en maur soutuk. <sup>17</sup> Pwe iet kadedepa: Komui samero soutuk amen duen al en Melkisedek. <sup>18</sup> Pwe i me kusoned en mas nikier, pwe me luet o sota katapa, <sup>19</sup> Pwe kapung sota kak kaunsokala meakot, a kaporopor me mau sang men mas, pan id pwarado, me kitail kak tuki ong Kot. <sup>20</sup> O iet pil eu kasampwal: Pwe a kasapwil kida kaula — a irail wiala samero ni sota kaula. <sup>21</sup> A men et sapwilikida kaula ren i, me kotin masani ong i: Kaun o kaular, a ap sota pan kalu kila: Komui samero soutuk amen duen al en Melkisedek. <sup>22</sup> Iei me Iesus pil wiala kapung pan inau, me mau sang men mas. <sup>23</sup> A irail me toto, me wialar samero, pweki ar matalar, kareda, me irail sota kak mimieta. <sup>24</sup> A i me potopoteta, pwe a kotin aleer dodok en samero soutuk. <sup>25</sup> Ari, i me a kotin kak kamaureda melel ir karos, me kai ki ong Kot i, pwe a kotin ieiasata, pwen laolao kin ir. <sup>26</sup> Pwe iduen samero lapalap me mau ong kitail, me sarau, o so sapung, o so samin, o me liki sang me dipan akan, o ileila sang nanlang. <sup>27</sup> Me sota rasong samero lapalap akan, me kin kida mas mairong pweki pein dip arail ap pweki en aramas akan ni ran karos. Pwe i me a kotin wiadar pan pak ta ieu, ni a kotin mueid ong Kot pein i. <sup>28</sup> Pwe kapung kin kasapwiladang samero aramas luet akan, a masan en kaula, me wiauier murin kapung, kasapwiladar Sapwilim a, me unsokalar soutuk.

## 8

<sup>1</sup> A iet orlepan me se indinda: Atail samero lapalap, me kotikot ni pali maun en mol en Kaun lapalap nanlang. <sup>2</sup> Iei papa en pera sarau i im likau melel, me Kaun kotin kauada, kaidin aramas amen; <sup>3</sup> Pwe samero lapalap karos pan kasapwilada, en kida kisakis o mairong kan. I me udan pung men et en pil kida meakot, me a pan kotin mairongki. <sup>4</sup> Ma a kotikot sappa, a sota pan kak samero, pwe samero kan mia, me kin kidang kisakis duen kapung o, <sup>5</sup> Me kin alale sang meakai mi lang, duen Moses, me Kot kotin kalolekongla, ni a pan kauada im likau. Pwe a kotin masani ong i: Kanai ong, o wiada meakaros, duen me kasansale ong uk er nin nana! <sup>6</sup> A i me aleer papa eu, me mau sang arail, pwe i kapwai pan inau, me mau sang men mas, pwe a tapi sang masan en inau, me mau sang men mas o. <sup>7</sup> Pwe ma inau en mas o unsokalar, sota me pan rapaki wasa en inau. <sup>8</sup> Pwe a kotin kupur sued kin irail masani: Kilang, ni ran oko, me pan kodo, I pan ki ong men Israel o kainok en Juda inau kap eu; iei me Kaun o kotin masani. <sup>9</sup> Kaidin dueta inau o, me I ki ong sam ar akan, ni ran o, me I koledi pa arail, pwen kalua irail do sang nan sap en Äkipten, pwe re sota podidi ong ai inau; ari, I ap sota inseno kin irail, me Kaun o kotin masani. <sup>10</sup> A iet inau o, me I pan wiai ong men Israel murin ran oko, me Kaun o kotin masani: I pan audeki ngen arail ai kapung, o intingiedi nan mongiong arail, I pan wiala arail Kot, o re pan wiala nai aramas. <sup>11</sup> Sota amen me pan padaki ong men imp a, o ri a indinda: Lelapokki Kaun! Pwe amen amen pan lelapok kin ia sang ren me tikitik o lel ong me lapalap re 'rail. <sup>12</sup> Pwe I pan makeki ong ir ar sapung kan, o dip arail I solar pan tamanda. <sup>13</sup> Ni a kotin masani: Inau kap, a kotin kamaringala men mas o. A me maringalar o malar, me mau ong lokidokila.

## 9

<sup>1</sup> A inau kaieu pil a kusoned en wia sarau mia, o pera sarau me sansal. <sup>2</sup> Pwe im likau eu wiauiet, a ni pali liki lamp mia, o tepel, o prot en kasansal; iei wasa, me adaneki wasa sarau; <sup>3</sup> A palila sang pera, ilolong, i wasa me adaneki wasa sarau melel. <sup>4</sup> Iei wasan pei sarau kold en kisiniai o kopa en inau, me kitimeki pena kold wasa karos, a dal kold iangaki mana, o en Aron a sokon, me masel pasang, o slet en inau. <sup>5</sup> A ponangin kopa o Kerupin en lingan mia, me kompaledi wasan tom. A ansau wet i sota pan padaki ong komail due. <sup>6</sup> A mepukat karos lao onoper, samero kan kin pedelong ong nan im likau moa kapwaiada dodok ong Kot ansau karos. <sup>7</sup> A nan im

likau kariau samero lapalap eta kotilong ong kelep pan me pak nan par eu iangaki nta, me a tom kida pein dip a o dip en aramas akan. <sup>8</sup> I me Ngen sarau kotin kasansale kida, me al en nan pera sarau melel saikenta wiauiet, arain im likau moa mia. <sup>9</sup> Mepukat karasepa eu en ansau wet, pwe kisakis o mairong en wiauiet lole, a re sota kak kapungala nan insen en i, me kin kapwaiada dodok ong Kot wet. <sup>10</sup> Pwe met akan wiauita, pwen pil iang manga o nim, o song en kamakelekel akan, o tiak en kamau pali udok, me pan wiaui, lao lel ansau me mau song. <sup>11</sup> A Kristus me kotido, pwen samero lapalap en dipisou en mur, ap kotin weid nan im likau eu, me lapa sang o mau sang men mas o, me kaidin wiaui kidar pa, o me sota udan pali pa et, <sup>12</sup> Pil sota kotikilong ntan kut ol de kau pul a pein nta pan mepak, me a kotikilong nan pera sarau melel, pwen lapwapan dip soutuk. <sup>13</sup> Pwe ma ntan kut o kau ol o pas en kau li usupeki me samin kan ap kaminela o kasarauiala pali udok o, <sup>14</sup> Daduen ntan Kristus so mau sang kaulap, me tonmeteki pein ong Kot ren Ngen soutuk, me sota me suet kot pit, pwen kamakelekel insen atail sang ni wiawia mela kan, pwen papa Kot ieias! <sup>15</sup> I me a kotin wiala sauntom en inau kap; a matala wiauiet, pwen lapwada sapung kan, me wiauiet pan inau kaieu, pwe irail me paeker akan en ale inau en soso soutuk. <sup>16</sup> Pwe ma inau en soso en pwaida, i me wiadar inau o, pan mela mas. <sup>17</sup> Pwe inau en soso kak pwaida murin aramas a mela, ma so, a sota pan kareda meakot, arain maur en i, me wiadar inau o. <sup>18</sup> I me inau kaieu sota pan pwaida, ma nta so iang. <sup>19</sup> Pwe kusoned en kapung karos lao loki ong aramas karos ren Moses, a ap ale ntan kau o kut iangaki pil o wunen man waitata o isop, ap usupeki puk o aramas akan karos, masani: <sup>20</sup> Iet ntan inau, me Kot kotiki ong komail er. <sup>21</sup> A pil usupeki nta im likau o kapwa en papa kan. <sup>22</sup> O koren iong karos pan makelekele kida nta duen kapung o, a ma so nta, nan sota dip me pan lapwada. <sup>23</sup> I me a mau ong mom en dipisou en nanlang kan en kamakelekele kida mepukat. A dipisou en nanlang en kamakele kida mairong eu, me mau sang mepukat. <sup>24</sup> Pwe Kristus sota kotilong ong nan pera sarau, me pa wiaui kida pwe i mom en me melel, a a kotilong ong nan nanlang, pwen pwaralang mon silang en Kot pweki kitail. <sup>25</sup> A sota kotilong ong, pwen tomki pein i pan pak toto dueta samero lapalap, me kin pedelong ong nan pera sarau ni par karos iangaki ntan man oko. <sup>26</sup> Ma iduen, nan a pan matala pan pak toto sang nin tapin aramas akan, a met ni imwin ansau kan, a kotin pwarado pan mepak, pwen lapwada

dip akan ki pein a mairong. <sup>27</sup> A duen a kileledier ong aramas akan, en mela pan mepak, a muri kadeik o, <sup>28</sup> Iduen Kristus me matalar pan mepak, pwen lapwada dip en me toto. A ni a pan kotin puredo, a pan pwara dong ir, me kin auiaui i, a kaidin pweki dip, a pwen kamaur ir ala.

## 10

<sup>1</sup> PWE kapung o iei motan dipisou en mur, a kaidin pein mom en dipisou, a sota kak kaunsok kilar mairong ota irail, me kin wia ir ada ni par karos. <sup>2</sup> A ma iei, arail mairong pan dukedi, pwe solar kataman pan dip en irail, me apwali mairong; <sup>3</sup> Pwe mepukat kin wiaui, pwen katamanda dip ni par karos. <sup>4</sup> Pwe ntan kau ol o kut sota kak wa sang dip akan. <sup>5</sup> Ari, ni a kotin pwara dong sappa, masani: Mairong o kisakis komui sota kotin mauki, a komui kotiki ong ia er pali war ai. <sup>6</sup> Kom sota peren kida mairong isis o mairong men tom. <sup>7</sup> I ap inda: Kilang, I kokodo, nan puk o me intingidier duen ngai, pwen kapwaiada kupur omui, Maing Kot. <sup>8</sup> Mas a masanier: Mairong, o kisakis, o mairong isis, o mairong men tom, kom sota kotin mauki, o kom sota kupur peren ki mepukat, me wiaui er duen kapung o. <sup>9</sup> Ap pil masanier: Kilang, I pwara don kapwaiada kupur omui. A kotiki sang men mas, pwen kapwaiada men mur. <sup>10</sup> Ni kupur wet kitail kasarauilar ki mairong en war en Iesus Kristus pan me pak. <sup>11</sup> Samero karos me kasapwiladar, pwen apwali dodok ni ran karos o purepure mairong ota, me so kak lapwada dip akan. <sup>12</sup> A men et, me kotin mairongki pan mepak dip akan, ap kaipokedi ni pali maun en Kot kokolata. <sup>13</sup> O a kotin auiaui, lao a imwintiti pan wiala utipan aluwilu a kan. <sup>14</sup> Pwe a kotin kaunsokila tom ta ieu karos, me pan kasaraula. <sup>15</sup> Ngen saraui pil kotin kadede ong kitail duen mepukat, pwe murin a kotin masanier: <sup>16</sup> Iet inau, me I pan wiai ong irail murin ran pukat, me Kaun o kotin masanier: I pan ki ong mongiong arail ai kapung, o I pan intingiedi ong nan ngen arail. <sup>17</sup> Dip arail, o arail sapung kan I solar pan tamanda. <sup>18</sup> A ma re lapwadar, ap solar mairong en dip pan wiaui. <sup>19</sup> Ari ri ai kan, ma a mui ong kitail er, en pedelong ong nan pera saraui ki ntan Iesus, <sup>20</sup> Pwe a kotin wiai ong kitail er al en maur kap pot et lel pali lan likau ki uduk a. <sup>21</sup> A ma atail samero kasampwal en tanpas en Kot mia. <sup>22</sup> Kitail ap pan pwaralang i ni melel en mongiong atail, o poson melel, o usupeki mongiong atail, o maio sang insen sued, o widenki pil makelekel war atail, <sup>23</sup> O kitail en tengedi ong atail kadede en kaporopor o der wukiwuk sili, pwe i me melel, me kotikida inau o. <sup>24</sup> O kitail en apwali nan pung atail ni

atail kainong iong limpok o wiawia mau kan. <sup>25</sup> O kitail ender dukedi sang atail mod ong kaudok pena, duen me kin wiaui ren akai. A kitail en nantiong panau pena, pwe komail kilang, me ran o me korendor. <sup>26</sup> Pwe ma kitail inong iong wia dip, murin atail marainiki melel, solar mairong men tom ki dip atail, <sup>27</sup> A kitail pan mimieta ni atail masak kadeik apwalia o ongiong en kisiniai, me pan karosela imwintiti kan. <sup>28</sup> Ma amen pan tiakedi kapung en Moses, a sota pan diar mak, pwe a pan kamela, ma saunkadede riamen de silimen mia. <sup>29</sup> Ari, da me komail lamelame, duen me pan tiakedi Sapwilim en Kot, o kasaminela ntan inau kap, me a kasarauilar o lalau Ngen en mak, a so pan kalokolok laud sang irail? <sup>30</sup> Pwe kitail asa i, me masanier: Ikepa ai dok, I pan depuki ong. O pil eu: Kaun o pan kotin kapung ong sapwilim a aramas akan. <sup>31</sup> Nan meid kalom, en lodi ong ni lim en Kot ieias. <sup>32</sup> A komail tamanda ran en mas oko murin omail marainlar, ap dadaurata ni omail kalokolok laud. <sup>33</sup> Ni omail kenkaurur sansal o pan kidau o kamekam, o ni omail riane kin ir, me pil lel mesued. <sup>34</sup> Pwe komail iangaki me salidi kan ni ar kalokolok, o komail pil pereperen ni omail kapwa kan kulia wei sang, pwe komail asa, me komail aneki dipisou en lang, me mau sang o me sota pan sorela. <sup>35</sup> Komail ari der kasela omail liki, me pan kareda katingpa lapalap. <sup>36</sup> Pwe kanongama me mau ong komai, pwen kapwaiada kupur en Kot o konodi inau o. <sup>37</sup> Ansau tar kis, me onoper pan pwarado, a sota pan pwand. <sup>38</sup> A me pung o pan maureki poson, a ngen i sota pan peren kida, ma a pan pure wei sang. <sup>39</sup> A kitail sota kisan ir, me pure wei sang, ap lokidokila, a kisan irail, me kin poson ap kamaur ngen arail.

## 11

<sup>1</sup> POSON me pason en me kitail kin kaporoporeki o kadede pan me so sansal. <sup>2</sup> Pwe i me men kaua aleer kadede parail. <sup>3</sup> Ni poson kitail asa, me lang o sappa wiauiquier masan en Kot, iei me dipisou kan, me kitail kin kilang, so wiauiqui meaki me sansal. <sup>4</sup> Ni poson Apel mairongiki ong Kot me mau sang Kain, ap dedekilar, me i me pung, pwe Kot kotin kupukupura a kisakis. O i me a kin padapadaki murin a melar lao lel met. <sup>5</sup> Ni poson Enok peukadala, pwen der kilang mela, ari, a soer diarokada, pwe Kot kotin ukadala i, a mon a peukadala kadedepa mia, duen a kon ong Kot. <sup>6</sup> A ma so poson, sota me pan kak kon ong Kot. Pwe me men tu ong Kot, en poson, me a kotin mia, o me a pan kotin katingi ong ir, me rapaki i. <sup>7</sup> Ni poson Noa masakadar, ni a kauada war im, pwen kamaureda toun

im a, ni a aleer masan en Kot, duen me saikenta sansal, o i me a kadeikada sappa, o sosoki pung, me pwili sang poson. <sup>8</sup> Ni poson Apraam peiki ong Kot, ni a paeker, en lipalang eu sap, me a pan sosoki; i ari lipalang o sota asa, wasa me a pan kotila ia. <sup>9</sup> Ni poson a wiala men wai amen nan sap en inau, o kotikot nan im likau kai, a Isaak o Iakop, me pan pil ale soso en inau ota, iang i, <sup>10</sup> Pwe a auiaui kanim eu, me a pason mia, me wiauieda ren Kot. <sup>11</sup> Pil Sara keleki poson ni a pan liseanda, ap naitikada seri amen, ni a li dapwan, pwe a asa, me i melel amen, me kotiki ong i inau o. <sup>12</sup> I me sang me ta men, me rasong mela amen, me toto tapida sang, due usu en lang me totoia, o me rasong pik en ni oror, me sota kak wadawad. <sup>13</sup> Mepukat karos matalar nin poson o kaikenta paieki inau o, a re kilanger sang ni wasa doo, ap peren kidar o kadededar, me re men kairu o men wai nin sappa. <sup>14</sup> A ni ar wia due met, re kin kasaleda, me re rapaki udan sap arail. <sup>15</sup> A ma irail ngongki sap o, me re ko sanger, irail pan kak purelang. <sup>16</sup> A so, pwe re inong iong eu sap, me mau sang sappa, me mi nanlang, i me Kot sota kotin namenokki wiala arail Kot, pwe a kotin kaonop ong irail er kanim eu. <sup>17</sup> Ni poson Apraam mairongi Isaak, ni a kasongesong o muedala na ieros, murin a aleer inau o. <sup>18</sup> Iran i a lokido: Sang Isaak kadaudok om me pan irerok wei. <sup>19</sup> Pwe a asa, me Kot pil kotin kak kamaurada i sang ren me melar akan, i me a pil pur ong naine kin i, pwen wia karasepa eu. <sup>20</sup> Ni poson Isaak kapaiadang Iakop o Esau meakan me pan wiaui. <sup>21</sup> Ni poson Iakop kapaiada nain Iosep putak riamen, ni a pan matala, o a pairukila pon a sokon. <sup>22</sup> Ni poson Iosep, ni a pan matala, a kokopada duen kadaudok en Israel ar pan lipala, o a kakalik ong ir duen ti a kan. <sup>23</sup> Ni poson Moses, ni a ipwidier, okiokilar ren sam a in a saunipong silu, pwe ira kilanger, me a seri kaselel amen, o ira sota masak en nanmarki a kusoned. <sup>24</sup> Ni poson Moses lao laudala, kang inaneki nain Parao seripein. <sup>25</sup> O a piladar en iang sapwilim en Kot aramas akan kamekam, sang peren mal en dip me motomot. <sup>26</sup> O a kasampwaleki kanamenok en Kristus sang kapwa en Akipten, pwe a kupukupura katingpa. <sup>27</sup> Ni poson a lipa sang Akipten, sota lomwiki ongiong en nanmarki, pwe a kotin kaporoporeki, me a sota kilanger, dueta a kilang i. <sup>28</sup> Ni poson a wia pasa o usup en nta, pwe me pan kamela meseni kan, ender kai ong ir. <sup>29</sup> Ni poson irail kotela sed waitata, likamata nan sap madekong, me men Akipten oko pil song, rap mopelar. <sup>30</sup> Ni poson kel en kanim leriko rongki pasang murin ar pidaki ran

isu. <sup>31</sup> Ni poson Raap, li sued amen, sota iang ir, me soposon, kamela, pweki a popol apwali liparok kan. <sup>32</sup> O da me i en pil kasoiada? Pwe ansau me tikitik en wia kasoi duen Kideon, o Parak, o Simson, o Iepta, o Dawid, o Samuel, o saukop akan. <sup>33</sup> Duen ar kaloekidi wei kan poson, kapwaiada lamalam pung, paieki inau kan, kaku pena au en laien, <sup>34</sup> Kakunla kel en kisiniai, piti sang au en kodlas, lueltalar rap kelail lar, komad ni mauin, kaloedier saunpei en wai kan. <sup>35</sup> Li akai pil aleer nair me melar akan, pwen mauredar. A akai kalokolok o kang maiolar, pwe re men konodi maureda sang ren me melar akan me mau melel. <sup>36</sup> Pil akai wewelokelar, o wokiwok, o pil salidi, o lodi ong nan imateng. <sup>37</sup> Irail pakasuk, de rasaras pasang, de kame kila kodlas; re sansarawaru sili, likauiki kil en sip o kut, samamalar, kaankamekam, o apwal akan. <sup>38</sup> A men liki sota war ong mepukat. Irail koko sili nan sap tan, nin nana kan, pan paip o por kai. <sup>39</sup> Mepukat karos lok mau kilar ar poson, a sota paieki inau o. <sup>40</sup> Pwe Kot kotin kaonopadang kitail me mau sang arail pai, pwe irail ender unsokalar mo atail.

## 12

<sup>1</sup> ARI, pweki saunkadede pukat, me ras ong dapok kalaimun eu, me kapil pena kitail, kitail en meui sang katoutou patail o dip, me kin kolekole kitail, ap dadaurata tang ni weir, me mi mo 'tail. <sup>2</sup> Uduial Iesus, me tapi pan o kaimwisoke pan atail poson, me sota kotin kupukupure peren me moa, ap kotin kanongama ni lopu, mamaleki kanamenokpa, ap kotidi ni pali maun en mol en Kot. <sup>3</sup> Komail tamanda i, me wonewei ni kaupara ren me dipan akan, pwe komail ender pangada o ngen omail ender lueltala. <sup>4</sup> Pwe komail saikenta kelail ong en palian dip, me kareda kamela. <sup>5</sup> O komail monokelar kamait pa 'mail, me padaki ong komail ni tiak en seri: Nai ol, koe der rongarongan soreki kapung en Kaun o, o der lueltalar ni a pan kotin kapung uk ala. <sup>6</sup> Pwe Kaun o kin kotin kame, me a kin pok ong o kin kaloke seri karos, me a pan sapwilimaneki. <sup>7</sup> A ma komail pan kanongama ong kalokolok, nan Kot kin kotin wiai ong komail duen ong sapwilim a kan. Pwe ia seri men, me sam a sota kin kaloke? <sup>8</sup> A ma komail sota pan kalokolok dueta irail karos, nan kaidin komail seri, pwe sota sam omail. <sup>9</sup> A ma sam atail en pali uduk kaloke kitail er, o kitail masak irail, iaduen, kitail sota pan peik kaulalap ong Sam en ngen akan, pwen memaur kila? <sup>10</sup> Pwe irail kaloke kitail ran me malaulau, duen insen arail, a i pwen kamaui kitail la, pwe kitail en tungole kisan a sarau. <sup>11</sup> A kalokolok karos

kaidin likamata peren, ni a pan lel ong kitail, pwe insensued, a mur a pan kareda wan pung o popol ong ir me anlar. <sup>12</sup> Komail ari kakelada pa o pukie omail luet akan. <sup>13</sup> O kakeki wei nã omail, pwe me sikilikil ender pirokala sang al o, a ren kelailada. <sup>14</sup> Nantiong popol ong amen amen o sarau; a ma so, sota me pan kak kilang Kaun o. <sup>15</sup> O kalaka, pwe amen depa sota konodi mak en Kot, pwe karepen me sued ende pwaida, kawé komail, o me toto pan samin kila. <sup>16</sup> Pwe sota me pan nenek, de me sued amen due Esau, me netikila a soso ni kisin manga ta ieu. <sup>17</sup> Pwe komail asa, duen muri, ni a men ale pai, a lokidokilar, pwe a sota kak diar ansaun kalula, me a roporopeki pil en mas a. <sup>18</sup> Pwe komail sota lel nana, me aramas kak doke, o me ingkingkon, o pil sota lel wasa rotorot, o wasa pong, o melimel. <sup>19</sup> Pil sota lel ngil laud en koronete, de maod en lokaia, me irail, me rongadar, poeki, ender pur ong. <sup>20</sup> Pwe re sota kak ong rong: O pil man amen, ma a pan sair nana o, a pan pakasuk. <sup>21</sup> Iduen kasansal a kamasak melel, pwe Moses masanier: I ap lomwineki o rerer. <sup>22</sup> A komail leler nana Sion, o kanim en Kot ieias, Ierusalem en lang, o pokon en tounlang ngederenia, <sup>23</sup> O momodisou meseni, me mar arail kiledier nanlang, o ren Kot saunkapung en karos, o ren ngen en me pung kan me unsokelar. <sup>24</sup> O ren Iesus sauntom en inau kap o ntan usup, me mau sang en Apel. <sup>25</sup> Komail kalaka, pwe komail depa sakinwei, me kin mamasani. Pwe ma irail sota kak pitila, me sikin wei i, me kotin padapadak ong irail nin sappa, nan melel, kitail sota pan kak pitila, ma kitail pan sakin wei i, me masan dong kitail sang nanlang. <sup>26</sup> I ansau o kapitie kamokidada sappa. A met a kotin inauki masani: I pan pil kamokidada kaidin sappa eta, pwe pil nanlang. <sup>27</sup> A iet wewe en: I pan pil: Me mokidadar pan kawukila, pwe iei dipisou me wiauier, pwen ir, me sota kamokidada, en mimieta. <sup>28</sup> Kitail pan ale wei eu, me sota pan kak mokidada, i me kitail en dodok ong Kot duen me kon ong i, ni makelekel o masak. <sup>29</sup> Pwe atail Kot kisinia ngkon.

### 13

<sup>1</sup> KOMAIL tengedi ong limpok en saulang! <sup>2</sup> Komail der monokela, en apwali men kairu kan. Pwe i me akai kasamoki tounlang kai, ap sasa. <sup>3</sup> Komail tamanda me salidi kan, due pein komail salidier, o irail me kaankamekam, due pein komail, me memaureki pali war. <sup>4</sup> Karos en wauneki inau en papaud o los en sosamin, a me nenek o kamal akan Kot me pan kotin kadeik ong irada. <sup>5</sup> Komail der norok moni, a komail insenemaui me mi re omail. Pwe

a kotin masanier: I sota pan mui sang uk de kase uk ala. <sup>6</sup> Ari, kitail ap aima ong indinda: Kaun o sauas pa i, i sota pan masak, pwe da me aramas amen pan kak wiai ong ia? <sup>7</sup> Tamatamanda omail saunpadak kan, me kawewe ong komail er masan en Kot, alale sang arail poson, o madamadaua imwin arail wiawia. <sup>8</sup> Iesus Kristus me duedueta, aio, ran wet, o kokolata. <sup>9</sup> Komail ender wukiwukki sili padak likam akai; pwe pai kasampwal eu, mongiong atail en tengetengela, me kin wiauiki mak, a kaidin ni kisin manga, me so kadepa ong, me kin apawali. <sup>10</sup> Atail pei sarau mia, me sota mau ong, irail en tungole sang, me kin papa nan im likau. <sup>11</sup> Pwe war en man akan, me ntar wisikilong ong nan pera sarau ren samero lapalap aki dip, isiser likin kanim. <sup>12</sup> Iduen Iesus, pwen kasarauiala aramas akan ki nta, kamekamela likin kanim. <sup>13</sup> Kitail ari en koie lang re a likin kanim o iang i kankaururla. <sup>14</sup> Pwe sota atail kanim potopot met, a kitail raparapaki eu, me mi mo \*tail. <sup>15</sup> Kitail ari poden mairongki kaping ong Kot ren (Iesus); iei wan kilin aua, me kadededa mar a. <sup>16</sup> Wiawia mau o kisakis, komail der monokela, pwe i mairong me Kot kotin kupura. <sup>17</sup> Peiki ong omail kaun akan o duki ong irail! Pwe re kin tauli kin ngen omail, duen me pan pakasau ren Kot, pwe ren wiawia mepukat ni peren, a so ni insensued, pwe i me sapai ong komail. <sup>18</sup> Kapakapa kin kit. Se kin peren kida atail insen mau, o se kin nantiong wiawia mau ren aramas karos. <sup>19</sup> I panau komail en porisok wia met, pwe i en kak pitipit pwaralang komail. <sup>20</sup> A Kot en popol, me kotin kaiasadar Silepan sip lapalap, iei atail Kaun Iesus sang ren me melar akan, ki ntan inau soutuk, <sup>21</sup> I en kotin kamaui komail en kapwaiada kupur a o song en wiawia mau ren Iesus Kristus. I me udan ringan kokolata! Amen. <sup>22</sup> Ri ai kan, i panau komail, peiki ong ai panau wet. Pwe i inting wong komail er motomot. <sup>23</sup> Komail asa, ri atail Timoteus saladokelar; ma a pan madang dong ia, i pan iang i kilang komail. <sup>24</sup> Ranamau ong omail kaun akan karos o me sarau kan karos. Men Italian kan ar ranamau wong komail. <sup>25</sup> Mak en mi re omail karos!



## EN IAKOPUS A KISIN LIKAU.

<sup>1</sup> IET ngai Iakopus ladu en Kot o Kaun Iesus Kristus ong kainok eisok riau, me pakasar pasanger; komail perenda! <sup>2</sup> Ri ai ko, komail perenki ma komail lel ong kasongesong. <sup>3</sup> O asa, ma omail poson me pung, a pan kareda kanongama. <sup>4</sup> A kanongama pan duedueta lao lel imwi, pwe komail en anla o unsok, o solar anane meakot. <sup>5</sup> A ma amen re omail sota a lolekong, i en poeki ren Kot, me kin kotiki ong amen amen ni so kidaue, ari, a pan ale. <sup>6</sup> A i en poeki ni poson, der peikasal, pwe me kin peikasal, me rasong iluk en madau, me ang kin ipir wei pukepuk. <sup>7</sup> Pwe i aramas ender lamelame, me a pan tungole meakot sang ren Kaun o. <sup>8</sup> A ol amen me peikasal, kin koweikodo ni a dodok karos. <sup>9</sup> A ri atail amen, me samama, en suaiki a kapwapwa. <sup>10</sup> A me kapwapwa en suaiki a samama, pwe duen masal en rä a pan mongedi. <sup>11</sup> Pwe katipin dakada, ap karakar, ap kamongedi rä kan o masal en rä pupedier, o mom a kaselel olar, iduen me kapwapwa o pan sora sang ni a wiawia kan. <sup>12</sup> Meid pai ol o, me wonweita ni songapa, pwe murin a poedi, a pan ale nin in maur, me Kot kotin inauki ong me pok ong i. <sup>13</sup> Ma amen pan songesong, a depa inda, me a songesong ren Kot. Pwe Kot sota kak mi pan songesong en mesued, o a pil sota kin kasongesong amen. <sup>14</sup> A amen amen kin songesong ni a inong sued. <sup>15</sup> A inong sued lao wiawier, ap naitikadar dip; a dip, ni a unsokelar, kin naitikada mela. <sup>16</sup> Ri ai kompok kan, komail der ponepon kida. <sup>17</sup> Kisakis mau karos o a sapan kodido sang poa, sang ren Sam en marain akan, me sota man song toror o sota man wukila. <sup>18</sup> A kotin kanaitik kida kitail masan melel, pwe kitail en wiala meseni en sapwilim a kan. <sup>19</sup> Ri ai kompok kan, komail asa, aramas karos en madang rong, a pwand en lokaia, o pwand en makar. <sup>20</sup> Pwe makar en ol o sota kin kapwareda pung en Kot. <sup>21</sup> I me komail en kasela pwel karos o me sued karos, ap ale ong komail masan o, me padedier lol omail nin tiak en karakarak, i me kak ong kamaureda ngen omail. <sup>22</sup> A komail en kapwaiada masan o kaidin rong eta, a ma iduen, komail kin kotaue pein komail. <sup>23</sup> Pwe ma meamen kin rong masan o, ap sota kapwaiada, nan a ras ong ol amen, me kin kilekilang mas en pali war a nan klas, <sup>24</sup> Pwe murin a kilekilanger duen pein i, a koie la o pitipit monokela duen a sansal. <sup>25</sup> A me kin kilekilang melel nan kapung unsok o kasaledok, o kapwaiada, o ma a sota pan monokela, me

a ronger; a kapwaiada, nan i pan pai kida a wiawia kan. <sup>26</sup> Ma amen lamelame, me a kin papa Kot, ap sota kaineneda lo a, o ma a piti pein mongiong i, nan a dodok ong Kot me mal kot. <sup>27</sup> A dodok min o pung mon Kot o Sam me wet: En apawali sapoupou o li odi kan ni ar apwal akan, o pera ki pein i sang sappa.

## 2

<sup>1</sup> RI ai ko, komail poson atail Kaun Iesus Kriitus en lingan, der lipiliki aramas amen. <sup>2</sup> Pwe ma ol amen pan iang omail sarau, me kapwateki ring kold likau lingan, o pil samama amen, me a tuken likau o sakanekan pan pedelong, <sup>3</sup> A ma komail pan kilekilang me mi nan likau lingan, o komail pan indang i: Re kotido kaipokedi met, wasa mau, ap indang me samama: Koe en uda mo, de met impan utipa! <sup>4</sup> Iaduen komail lipilipil pan pung omail, o komail wiala saunkapung kan ni omail lamalam sued? <sup>5</sup> Ri ai kompok kan, komail rong! Kot sota kotin piladar me samama nan sappa et, me kapwapwaki poson, o me pan sosoki wei, me a kotin inauki ong irail, me pok ong i? <sup>6</sup> A komail mamaleki me samama o. Kaidin me kapwapwa kan kin wia sued ong komail o pangalang komail mol en kadeik kan? <sup>7</sup> Irail sota kin lalaue mar isou, me komail maranekier? <sup>8</sup> Ma komail kapwaiada kapung isou duen masan o: Koe en pok ong men imp om dueta pein uk, nan komail wia me mau. <sup>9</sup> A ma komail pan lipilipiliki aramas, komail kin wia dip, o kapung pan kadiarok ong komail, me komail me dipan. <sup>10</sup> Pwe meamen kapwaiada kapung pon, ap kawela kusoned eu, nan i me tiakedi karos. <sup>11</sup> Pwe me kotin masanier: Koe der kamal, i me pil masanier: Koe der kamela aramas! Ari, ma koe sota kamal, a ma koe kamela aramas, nan koe me tiakedier kapung o. <sup>12</sup> Komail ari lokaia o wiawia duen irail, me pan pakadeikada ren kapung en kamaio. <sup>13</sup> A me sota kin kadek, pan lodi ong kadeik apwal, a me kadek, kin suaiki kadeik o. <sup>14</sup> Ri ai ko, da katepan aramas amen, me pan inda, me a poson mia, ap sota a wiawia mau kan? Iaduen poson pan kak dorela i? <sup>15</sup> Ma ri atail ol de li amen mia, me solar a likau, o solar kan ar kisin manga kaukaule, <sup>16</sup> A ma amen komail pan indang i: Kola popol rangerang o mangamanga! Ap sota, me komail pan ki ong i, me mau ong pali war a, da katepa? <sup>17</sup> Iduen poson, ma a kelep o sota wiawia iang, nan a melar. <sup>18</sup> A ele amen pan inda: Om poson mia, a ai wiawia kan mia; kasale ong ia om poson, me sota wiawia kan mia, a ngai pan kasale ong uk ai poson ni ai wiawia kan. <sup>19</sup> Koe kamelele me Kot me ta men mia, me mau, nan tewil akan pil kin kamelele ap

masakada. <sup>20</sup> A koe aramas aklapalap, ma koe men dedeki, me poson me mal kot, ma sota wiawia kan iang? <sup>21</sup> Iaduen sam atail Apraam? A sota pung kila a wiawia kan, ni a pan mairongki sapwilim a kisin putak Isaak pon pei sarau? <sup>22</sup> I me koe kilang, me poson sauasa a wiawia kan, o poson unsok kilar a wiawia kan. <sup>23</sup> Ari masan o pwardar: Apraam poson Kot, o i me a pung kilar o a maraneki: Kompoke pan Kot. <sup>24</sup> Komail ari kilanger, me aramas amen pan pung kila a wiawia kan a kaidin poson ta. <sup>25</sup> Pil dueta Raap, li sued amen, kaidin a wiawia kan, me a pung kilar, ni a kasamo men en kadar, o kadar ir ala ni apot al toror? <sup>26</sup> Pwe duen pali war mela, ma sota ngen, iduen poson a mela, ma sota wiawia kan iang.

### 3

<sup>1</sup> RI ai ko, me sota mau, ma komail me toto inong iong saunpadakala, pwe komail asa, me kitail pan lel ong kadeik laud. <sup>2</sup> Pwe pan pak toto kitail kin sapung, a ma amen sota kin sapungki lokaia kis, nan i ol melel amen, o a kak koaki pali war a pokon. <sup>3</sup> Kilang, kitail kin ki ong nan au en os kisin mata, pwe ren peiki ong kitail, o kitail kin kawuk sili war arail pokon. <sup>4</sup> Kilang, pil sop akan! Irail me kalaimun o ang kin ipir wei, ari so, men lilil tikitik kak kawuki ong wasa, me kaptin kin inong iong ia. <sup>5</sup> Iduen lo me kokon tikitik eu, a a suaisuai lalalal. Kilang, duen kisiniai tikitik kin isikada nana kalaimun! <sup>6</sup> Iduen lo en aramas, a rasong kisiniai o aude pan sapung karos. Lo o kisan kokon atail, ap kasaminela war pon, a kin isikada wiawia en nan maur atail karos, a pein i isis sang nan pweleko. <sup>7</sup> Pwe song en man laualo karos, o manpir, o me karop, o man akan, me kin memaur nan sed, kin kamandala o kaloedi ren aramas akan. <sup>8</sup> A lo o sota aramas amen me kak kaloedi, nan me sued kot, me dir en men kamela. <sup>9</sup> I me kitail kapingaki Kaun o Sam, o kitail kariaki i aramas akan, me wiauiur ni mom en Kot. <sup>10</sup> Song ni au ota kapai o karia kin tapi sang ia. Ri ai ko, me sota pung, mepukat en wiaui due. <sup>11</sup> Daduen utun pil pot, a kin ki wei pil iau o sadik sang ni por ta ieu? <sup>12</sup> Ri ai ko, pik pot pil kak wa wan le, de wain pan kak wan pik? Pil dueta parer sol eu sota kak kida pil. <sup>13</sup> Is me lolekong re omail, o erekila padak? I en kasaleda ni lamalam mau a wiawia kan ni impai o lolekong. <sup>14</sup> A ma peirin o akamai mier nan mongiong omail, komail der suaiki palian melel o der kalikame me melel. <sup>15</sup> Pwe lolekong wet, me sota tapi sang poa a udan pa et, pali uduk, pali tewil. <sup>16</sup> Pwe wasa peirin o akamai mia, nan i wasan saminimin o dodok sued karos kin wiauiuai ia. <sup>17</sup> A lolekong, me tapi sang ni pali poa, mas a kin makelekel, ap pil

kaminimin, o kampai, o matarok, o dir en kadek, o wa mau, o so peikasal, o so malaun. <sup>18</sup> A wan pung pan kamoremoredi ni popol ren ir, me kin tom pena.

### 4

<sup>1</sup> IA wasa akamai o pei nan pung omail kin tapi sang ia? Kaidin sang nan omail inong sued akan, me kin pepei nan omail kokon akan? <sup>2</sup> Komail kin inong iong, ap sota aneki, komail kin kamela o kailongki, ap sota, me komail pan ale; komail kin akamai o mauin. A sota omail meakot, pwe komail sota kin poeki. <sup>3</sup> Komail kin poeki, ap sota pwaida, pwe komail kin poeki sapung, pwe komail kin kapwaia kida omail inong sued akan. <sup>4</sup> Komail kamal akan, komail sota asa me waroki ong sappa et, kin inwintiti ong Kot? Ari meamen, me men kompoke pan sappa, nan i inwintiti en Kot amen. <sup>5</sup> De komail kiki ong, me puk sarau masani mal: Ngen o me kotikot lol omail, kin inong iong o nantiong dodok ong Kot. <sup>6</sup> A meid laud a mak ong kitail. I me a kotin masanieki: Kot kin kotin palian me aklapalap, ap maki ong me opampap akan. <sup>7</sup> Komail ari duki ong Kot a palian tewil, a ap pan tang wei sang komail. <sup>8</sup> Kakondak mongiong ong Kot, a ap pan kupukupura komail, kamakelekel pa omail, komail me dipan; o kaminela mongiong omail, komail me lol riapot. <sup>9</sup> Kainsino, o maiei, o sangesang; omail kaukaurur en wuki ong me mauk, o omail peren ong insensued. <sup>10</sup> Akitikitik ki pein komail mon Kaun o, a ap pan kasapwil komail da. <sup>11</sup> Ri ai ko komail de lokaia sued nan pung omail. Pwe me kin lokaia sued duen ri a, de kadeikada ri a, a kin lokaia sued ong kapung o kin kadeikada kapung o. A ma koe kadeikada kapung, pwe saunkapung amen koe. <sup>12</sup> Amen ta saunkapung o saunkadeik, me kak o kamaurela o kariaala. A is koe, me kin kadeikada men imp a? <sup>13</sup> Iet pil eu, komail me kin inda: Ran wet de lakap se pan kolang kanim wet o kauson wasa o par eu, o netinet ap kapwapwala. <sup>14</sup> A komail kin sasa, da me pan wiaui lakap, pwe da omail maur? Pwe komail kin ras ong tokoi, me kin mi ansau kis, ap mokonaidi. <sup>15</sup> Mak eta komail en inda: Ma Kaun o kotin kupura, o ma kitail memaureta, kitail pan wiada met de mo. <sup>16</sup> A so, komail kin perenki omail susuai, nan susuai due met me sued. <sup>17</sup> Ari, melel ta, meamen me lelapok ki me mau, ap sota wia, nan i me dip ong i.

### 5

<sup>1</sup> A KOMAIL kapwapwa kan, sangesangki o weriwereki, kampamail pan lel ong komail! <sup>2</sup> Omail kapwa kan olar, o man en mot kangalar omail likau kan. <sup>3</sup> Omail kold

o silper mirelar, ari, ar mir me pan kadede ong komail, o pan ngar pasang uduk omail due kisiniai. Nan komail nakier kapwa ni imwin ran akan. <sup>4</sup> Komail ngar, pwain en toun dodok, me kop penaer dipisou en sap omail, me komail kulia sanger, kin weriwer; o likwir en saundolung akan lel ong karonga en Kaun Sepaot. <sup>5</sup> Komail ipuepuarok kier me sued nin sappa, dender ong, komail kamue matier mongiong omail rasong man wi, me pan kamela. <sup>6</sup> Komail kadeikada o kamela me pung o, a a sota palian komail er. <sup>7</sup> Ari ri ai ko, komail kanongama lao lel en atail Kaun a pan kotin pwarado. Kilang, saumat amen kin auiaui wa mau en sap o, o a kin kanongama lao katau en mas o mur moredier. <sup>8</sup> Komail ari pil kanongama eta, katenge mongiong omail, pwe en atail Kaun a pwarado me korendor. <sup>9</sup> Ri ai ko, komail der pilpil en pan moli ki amen amen, pwe komail ender pakadeikada. Kilang, saunkadeik o mi pan wanim. <sup>10</sup> Ri ai ko, ni omail kalokolok o kanongama komail alale sang saukop akan, me kokopeki ni mar en Kaun o. <sup>11</sup> Kilang, kitail kin kapinga me dadauratar. Komail ronger duen kanongama en Iop, o kilanger imwin Kaun O, pwe Kaun o kin kupukupura o kapunglol kaulap. <sup>12</sup> Ri ai ko, komail kalaka, pwe komail der kaula; der kaukila lang de sappa, o der wia eu song en kaula; a omail sapeng en ei ta, o omail so en so, pwe komail de lodi ong kadeik o. <sup>13</sup> Ma amen re omail kamekam, a en kapakap, a ma amen insenemau, a en kauleki psalm. <sup>14</sup> Ma amen mi re omail me somau, en ukado saunkoa en momodisou kan, pwe irail en kapakapa kin i, murin ar keie kin i le ni mar en Kaun o. <sup>15</sup> Ari, kapakap poson pan kamaureda me somau o, o Kaun o pan kakelada i, o ma a wiaer dip kai, re pan sapedokalar sang. <sup>16</sup> I me komail en weok pena dip omail o kapakapaki amen amen, pwe komail en kelail la. Kapakap melel en me pung amen kin kareda me toto. <sup>17</sup> Elias aramas amen dueta kitail, a kapakapaki katau ender moredi, ari solar katau moredi ong sappa ni par silu o saunipong wonu. <sup>18</sup> O a kotin pur ong kapakap, nanlang ap kamoredier katau, o sap kapareda wa kan. <sup>19</sup> Ri ai ko, meamen mi re omail, me salongala ni melel, o amen kasapaledo i, <sup>20</sup> I en asa, me kasapaledo me dipan amen sang ni a salongala, a kamaureda sang mela ngen eu, me a pan pwain kidi dip toto.

## EN PETRUS A KISIN LIKAU KAIEU.

<sup>1</sup> IET ngai Petrus wanporon en Iesus Kristus amen ong me pilipildar ren me kaikairu pakasar lang Pontus, Kalesia, Kapadosien, Asien o Pitinien. <sup>2</sup> Me pilipildar pan kupur en Kot Sam, ap kasarui kila Ngen, pwen peik o makelekeleda pan ntan Iesus Kristus. Mak o popol en rok re omail! <sup>3</sup> Kaping ong Kot, o Sam en Kaun patail Iesus Kristus, me kotin kaipwi kap kitail ong kaporopor maur, pweki a kalangan lapalap pan Iesus Kristus a iasadar sang ren me melar akan, <sup>4</sup> Ong soso eu, me sota pan dukedi o so samin, o so mongedi, me nekinekid ong komail nanlang. <sup>5</sup> Komail me pakolekoleki mana en Kot ni poson ong maur potopot, me pan sansaldo ni imwin ran akan. <sup>6</sup> Iran met komail kin peren kida, murin omail insensuedeki songesong kai ansau motomot, ma i duen kupur a. <sup>7</sup> Pwe omail poson en diarokada ni pung o, pan kasampwal sang kold sor, a me kin diarok kida kisiniai, men kaping, o lingan, o wau, ni en Iesus Kristus a pan sansaleda. <sup>8</sup> Me komail sota kilanger, ari so, komail kin pok ong i, o komail kin poson i, me komail sota kin kilang ansau wet, a i me komail kin peren kida peren laud kaulapia. <sup>9</sup> I me pan kare ong komail imwin omail poson, iei dorelan ngen omail. <sup>10</sup> Iei maur o, me saukop oko raparapaki o kalekalelapok, me kokop kida mak, me pan pwara dong komail. <sup>11</sup> O re raparapaki, iad ansau o duen ansau me Ngen en Kristus me kotikot re 'rail, kotin kasaledar, o me kotin kokopkido kamekam en Kristus o a lingan, me mi muri. <sup>12</sup> A pakair pwara dong irail, kaidin pwen papa pein irail, a komail, rap kalok ong komail er sang ren me padaki ong komail rongamau ki Ngen sarau, me pakadarado sang nanlang, me pil tounlang kan inong iong kilang. <sup>13</sup> I me komail en katengedi longelone en ngen omail. Komail masamasan o kaporoporeki melel mak en Kot, me pan wisike dong komail ni en Iesus Kristus a pan sansaleda. <sup>14</sup> Komail dueta seri en peik kan, komail der paroki ong inong sued en mas o, me mi re omail ni ansau omail rotorot. <sup>15</sup> A duen i, me kotin molipe komail er, me sarau, iduen komail en pil sarau ni song en wiawia karos. <sup>16</sup> Pwe a intingidier: Komail en sarau, pwe ngai me sarau. <sup>17</sup> O ma komail pan kapakap ong Sam, me sota kotin lipilipil aramas amen, pwe a pan kotin kadeikada duen dodok en amen amen, komail ari kekeide ki ni masak arain omail kaikairu nin sappa et. <sup>18</sup> Pwe komail asa, kaidin kapwa sor: Silper de kold, me komail kamaio kila sang

omail dadaurata kaudok o, me men kau padokedi ong komail, <sup>19</sup> A ki ntan Kristus kasampwal dueta sippul amen, me so samin o so muaimuai. <sup>20</sup> Me kileledier mon sappa pasonedier, ap sansaleda ni imwin ran akan pweki komail. <sup>21</sup> Komail me poson Kot ki i, me Kot kotin kaiasadar sang ren me melar akan, ap kotin kalinganada i, pwe komail en poson o kaporoporeki Kot. <sup>22</sup> O komail kamakelekeleki ngen omail ni peik o melel, pwen pokepoke melel ri omail akan. Komail ari tengeteng limpok pena sang mongiong omail makelekel. <sup>23</sup> Dueta ir, me ip sapa, kaidin sang ni wa mor, a sang ni me somor, iet: Sang nan masan maur en Kot, me pan duedueta. <sup>24</sup> Pwe uduk karos me rasong rä, o ar lingan karos me rasong masal en wan rä. Rä o mongidier o masal en wan rä moredier. <sup>25</sup> A masan en atail Kaun pan potopoteta kokolata, i masan o, me kalok ong komail ni rongamau.

## 2

<sup>1</sup> KOMAIL ari muei sang song en sued karos o widening karos, o malaun, o peirin, o karaun mal karos. <sup>2</sup> A komail en dueta seri pwelel, me apton ipwidier, ap inong iong pil en didi mau o melel, pwe komail en kakairi kida i, <sup>3</sup> Ma komail diaradar, me Kaun o me kalangan. <sup>4</sup> Komail waroki ong i me rasong takai maur, me aramas akan kaselar, ap lipilipiler o kasampwal ren Kot. <sup>5</sup> O pein komail en kakauda duen takai memaur, wiala im ngenin o pwin en samero sarau, pwen kida mairong, me pwili sang Ngen o, me Kot kotin kupura ki Iesus Kristus. <sup>6</sup> I me intingidier nan puk sarau: Kilang, I kidi ong nan Sion takai en pukakaim, me lipilipil o kasampwal, o me poson i, sota pan namenokala. <sup>7</sup> Komail ari, me liki i, pan ale pai kasampwal o, a ren me soposon akan, a rasong takai eu, me men kau im akan kaselar; ari so, a wialar takai en pukakaim, <sup>8</sup> O takai en kapupedi, o paip en kamakar, irail kin dipikelekel, aki re sota peik iong masan o, i me pil kileledi ong irail. <sup>9</sup> A komail sau lipilipil eu, samero isou kan, pokon sarau, aramas me netier, pwen kapara sili manaman akan en me kotin molipedo komail sang nan rotorot ong a marain kapuriamui. <sup>10</sup> Mas komail sota wei eu, a met komail wein Kot; o mas komail sota konekonela, a met, komail konekonelar. <sup>11</sup> Kompok kan, i panaui komail pwe komail men kairu o men wai, komail muei sang inong sued en uduk, me kin palian ngen. <sup>12</sup> Omail wiawia kan nan pung en men liki kan en pung, pwe ni ar kine likam ong komail, dene komail me sued kai, ir lao kilang omail wiawia me mau, ren kapinga Kot ni ran en kasansal. <sup>13</sup> Komail ari duki ong kaun pan aramas akan karos pweki Kaun: Ma nanmarki, pwe

i ta kaun lapalap. <sup>14</sup> A ma saumas akan, me pakadarado sang re a, pwen depuk ong me sapung kan, ap kapinga me kin wiawia mau. <sup>15</sup> Pwe iet eten duen kupur en Kot: Komail en kadukie kidi omail wiawia mau dodok en aramas pweipwei kan. <sup>16</sup> Duen me saladokalar, ap sota wia kin arail saladok, men pwaindi dip arail, a duen ladun Kot. <sup>17</sup> Kakaki amen amen, pok ong saulang kan, lan Kot, wauneki nanmarki! <sup>18</sup> Komail papa kan, upai ong omail kaun akan ni masak, kaidin ong me mau o kalangan eta, a pil ong me kin koweik kodo. <sup>19</sup> Pwe mak eta, amen en kamekameki a pung ren Kot, o kanongama pan me sued. <sup>20</sup> Pwe da kadepa, ma komail pan pukoki pein dip omail? A ni omail wiawia me mau, ap kamekam ki o kanongama, nan i me mak ren Kot. <sup>21</sup> Pwe i me komail paeker kido, pwe pil Kristus kamekam kin komail, wiala kilel pa 'mail, pwe komail en idauen wei lip a. <sup>22</sup> Me sota wia dip, pil sota widing diarok nin silang i. <sup>23</sup> Kasuedi, a so suedeki, kaankamekam, ap sota akdepuke, a a meuid ong i, me kin kadiekada pung. <sup>24</sup> Pein i tomki dip atail nan war a nin tuka o, pwe kitail en mela sang dip atail akan, ap pan maur iong me pung, me moun lip a komail kelail kidar. <sup>25</sup> Pwe komail rasong sip, me salongalar, a met komail sapale dong silepa 'mail o Kaun pan ngen omail.

### 3

<sup>1</sup> PIL dueta komail li akan, udi ong pein omail warok kan, pwe irail me so poson masan o, en pil dore kila wiawia mau en li akan o arail nenenla. <sup>2</sup> Ni arail kilekilang omail wiawia min iangaki lan. <sup>3</sup> Arail kapwat ender ni pali liki ni arail ingid pena pit en monga de kapwat ki kold, de diliong nan likau lingan. <sup>4</sup> A kapwat me so sansal mi nan mongiong en aramas, me so sor, impai, opampap, iei me kasampwal ren Kot. <sup>5</sup> Pwe iduen kapwat en li sarau en kaua kan, me kaporoporeki Kot o duki ong pein arail warok kan. <sup>6</sup> Duen Sara, me peiki ong Apraam o kamare kin i: Ai kaun; a komail wiala na seri kan, ma komail pan wiawia mau o sota masak. <sup>7</sup> Pil dueta komaail o akan, lelapoki ong omail warok kan, kaka kin irail, pwe koma sosoki pena mak en maur, pwe omail kapakap ender poula. <sup>8</sup> A iet imwin mepukat: Komail karos en lamalam ta pot, o pokepok pena, o pok ong ri omail akan, o kadek, o aktikitik. <sup>9</sup> Komail der depukki me sued me sued, de lokaia sued lokaia sued, a kapaiada, ap asa, me a kilele ong komail, en sosoki pai kan. <sup>10</sup> Pwe me men pok ong maur o inong iong ran mau akan, i en pera sang sued lo a, o kil en au a, pwe re depa kotaue. <sup>11</sup> A en muei sang me sued, ap wia me mau, en rapaki popol,

ap dadaurata. <sup>12</sup> Pwe silang in Kaun o kin pera me pung kan, o karong a me mangi ar kapakap. A silang in Kaun o kin palian irail me wia sued. <sup>13</sup> Is i me pan kaokaoe komail, ma komail dadaurata me mau? <sup>14</sup> A ma komail kamekameki me pung, komail meid pai; komail der masak irail o der waponda. <sup>15</sup> A komail en kasarauiki nan mongiong omail Kaun Kristus. Ansau karos komail en kak sapeng ong amen amen me kalelapok re omail duen kaporopor o, me mi lol omail. <sup>16</sup> A mepukat en wiaui nin tiak en opampap, o masak, o insen makelekel, pwe irail, me kineki likam ong komail ni omail wiawia mau ren Kristus, ren namenokala ni ar karaun kin komail likam. <sup>17</sup> Me mau, ma i kupur en Kot, komail kamekameki me mau, sang omail kamekameki me sued. <sup>18</sup> Pwe pil Kristus kamekameki dip pan mepak, me Pung wiliandi me sapung kan; pwen kalua kitail dong Kot. Pali uduk kamekamelar ap kaiasa kida Ngen. <sup>19</sup> I me a kotidilang wasa tengeteng, pwen padaki ong ngen akan, <sup>20</sup> Me sota peik mas o, ni ansau me Kot kotin auiaui o kanongama ong ir ni muein Noa, ni ansau, me war im wiaui, me malaulau, ir me walemen, maure kila pil o. <sup>21</sup> I me pil kin kamaur komail la ansau wet ni paptais a kaidin kaminela pali uduk, pwe inau en insen mau ong Kot eu, ki en Iesus Kristus a iasadar. <sup>22</sup> A kotidalang nanlang, kotikot ni pali maun en Kot. Tounlang kan, o lapalap akan, o manaman akan upai ong i.

### 4

<sup>1</sup> ARI, pweki Kristus kamekameki kitail ni pali uduk a, i me komail en pil ale ong komaail lamalam ota, pwe me kin kamekameki ni pali uduk, muei sanger dip. <sup>2</sup> Pwe a der poden dadaurata inong sued en aramas akan, a dadaurata kupur en Kot arain a memaur ni uduk. <sup>3</sup> Pwe a itarer, omail wiawia en mas duen lamalam en men liki kan, ni omail kekeid ni tiak sued, o inong sued, o sokolar, o kaped en manga, o kamom soko, o kaudoki ong ani sakanakan. <sup>4</sup> I me re puriamuiki, me komail solar kin iang irail ni ar wia sued o kaped en manga, o lalaue. <sup>5</sup> A re pan weokadang i, me pan kadeikada me maur o me melar akan. <sup>6</sup> Pwe i me rongamau pil loloki ong me melar akan, pwe irail en maurela. Ari so, ni pali war arail re lodi onger kadeik o duen a kin wiaui ren aramas akan, a ni pali ngen arail re memaur duen kupur en Kot. <sup>7</sup> A imwin meakaros me korendor, komail ari masamasan o nantiong kapakap. <sup>8</sup> A met eta, komail dadaurata omail puke pena, pwe limpok kin pwaindi dip toto. <sup>9</sup> Komail apapwali men kairu o der lipalipaned. <sup>10</sup> Duen omail aleer omail pai en mak kan, iduen omail papa pena duen

saunkoa mau en mak en Kot. <sup>11</sup> Ma amen pan wiada padak, a en wiada duen masan en Kot, o ma amen kin papa, a en papa duen Kot kotin kupurai ong i a mana, pwe kaping en ko ong Kot ni meakan karos, ren Jesus Kristus, me wau o manaman en ko ong kokolata soutuk! Amen. <sup>12</sup> Kompok kan, komail der puriamuiki songapa 'mail karakar, me pan lel ong komail, pwen kasongesong komail, der lamelame, me komail ta lel ong mepukat. <sup>13</sup> A komail peren kida, pwe komail pwaisaneki en Kristus a kamekam, pwe ni a lingan sansaldo, komail pil pan perenda kaulapia. <sup>14</sup> Komail meid pai, ma aramas pan kaurur kin komail pweki mar en Kristus! Pwe Ngen en lingan o en Kot kotikot re omail. <sup>15</sup> A sota amen re omail en kamekameki kamela aramas, de lipirap, de me wia sued, de kauntenkoma en aramas a wiawia kan. <sup>16</sup> A ma a kamekameki a saulang, a ender namenokki; a en kapinga Kot ni mepukat. <sup>17</sup> Pwe a leler ansaun kamekam, me pan tapida sang ni tanpas en Kot; a ma a tapida re 'tail, ia pan imwi en me sota poson rongamau en Kot? <sup>18</sup> A ma me apwal, en kamaureda me pung o, a ia wasa, me san Kot o me dipan akan pan pwaralang ia? <sup>19</sup> Ari, irail me kamekam pan kupur en Kot, ren liki ong Kot melel ngen arail, ni arail wiawia mau.

## 5

<sup>1</sup> I panau saunkoa kan, me mi nan pung omail, pwe ngai pil kisan saunkoa kan o saunkadede en kamekam en Kristus, o pil iang pwaisaneki lingan, me pan kasansaleda. <sup>2</sup> Komail kamanga pwin isou en Kot, me mi re omail, a kaidin mansairen, pwe ni insenemau ni omail ariri Kot, kaidin pweki moni, a ni peren o limpok. <sup>3</sup> O kaidin akasaupaidi ong momodisou, a men kaalemongi, pwe pwin isou en ale sang. <sup>4</sup> Ari, ni en silepa lapalap a pan pwarado, komail pan ale mar en lingan, me sota pan mongela. <sup>5</sup> Pil dueta komail me pulepul akan, peiki ong me laud akan. Komail karos upa pena o tengedi ong opampap. Pwe Kot kin kotin palian me aklapalap akan, ap kotin maki ong me karakarak kan. <sup>6</sup> Komail ari karakarak pan lim en Kot manaman, pwe a en kotin kasapwil komail ada, ni eu ansau me kon ong. <sup>7</sup> Kadakadar ong i omail inong karos, pwe a kin kotin kupuro kin komail. <sup>8</sup> Komail lelapok o masamasan, pwe omail imwintiti tewil koko sili dueta laien weriwer amen o raparapaki, me a pan katalala. <sup>9</sup> Komail ari kelail palian i o tengeteng ni poson, o asa, me kamekam ota kin lel ong ri omail akan nin sappa, <sup>10</sup> A Kot en mak karos, me kotin molipe komail wong a lingan soutuk, ren Kristus, pan kotin

kaunsokala, o kakelada, o kamanada, o pasonedi, me pan kalokolok ansau motomot. <sup>11</sup> I me udan manaman potopoteta! Amen. <sup>12</sup> I inting wong komail kisin likau kis et ren Silwanus ri omail melel, duen me i kin lamelame, pwe i men panau komail o katti ong komail, me i eta mak melel en Kot, me komail en keleki. <sup>13</sup> Irail, me iang komail pilipildar nan Pabilon o nai ol Markus ara ranamau wong komail. <sup>14</sup> Komail ranamauiki pena metik en limpok. Popol en mi re omail karos, me warok ki ong er Kristus! Amen.

## EN PETRUS A KISIN LIKAU KARIAU.

<sup>1</sup> IET ngai Simon Petrus ladu o wanporon en Iesus Kristus ong irail, me paikier poson kasampwal ota dueta kit, me kitail aleer ki pung en atail Kot o Saunkamaur Iesus Kristus. <sup>2</sup> Mak o popol en roklang komail ki erpit en Kot o Iesus atail Kaun. <sup>3</sup> Song en manaman en Kot karos, me itar ong maur o lelapok, kisakis dong kitail er, ki kupurkong en i, me kotin molipe kitail ki pein a lingan o manaman. <sup>4</sup> Ni mepukat a kotin kisakis ki dong kitail inau lapalapia o kasampwalia kan, pwen kare ong komail maur en Kot, o tang wei sanger me sued akan, me mi sappa ki inong sued. <sup>5</sup> Komail ari nantiong eta, kida sar mau ni omail poson, o ni sar mau lolekong. <sup>6</sup> O ni lolekong koton, o ni koton kanongama, o ni kanongama lelapok. <sup>7</sup> O ni lelapok limpok ong saulang kan, o ni limpok ong saulang kan limpok ong amen amen. <sup>8</sup> Pwe ma mepukat mi re omail, o pwaida re omail, komail ap sota pan tanganga de so wa ni lolekongki atail Kaun Iesus Kristus. <sup>9</sup> A me sota pwaisaneki mepukat, nan i maskun, o a kin dedam sili wasa, aki a monokela a wideud sang ni dip a dip en mas. <sup>10</sup> Ri ai ko, i me komail nantiong katengedi omail paeker o pilipil, pwe ma komail pan wiada mepukat, komail sota pan pupedi. <sup>11</sup> Pwe i me komail pan pedelongki peren nan wei soutuk en atail Kaun o Saunkamaur Iesus Kristus. <sup>12</sup> I me i pan kataman kin komail ansau karos, menda ma komail asa mepukat, o komail keleki melel. <sup>13</sup> I lamelame, a pung, i en kataman kin komail o kamanga komail da, arain ai pan mimieta nan im pwal wet. <sup>14</sup> Pwe i asa, eten i pan pwilikidi war ai duen atail Kaun Iesus Kristus kotin masani ong ia er. <sup>15</sup> A i pan nantiong, pwe komail en poden tamatamanda mepukat murin ai samala. <sup>16</sup> Pwe se so idauenda kasoi widing ni at padaki ong komail duen manaman en atail Kaun Iesus Kristus, o a kotin pan sapaledo, a pein kit kilanger a lingan. <sup>17</sup> Pwe ni a kotin aleer wau o lingan sang ren Kot Sam ni ansau ngil eu peidido sang nan lingan lapalap katitiki: Iet nai Ol kompok, me I kin peren kida. <sup>18</sup> Ngil wet, me peidido sangnanlang, se ronger ni atiang i mimieda pon dol sarau. <sup>19</sup> Ari masan en kokop me pung melel re atail, o meid mau, komail en kasampwaleki dueta marain eu, me kin dakareda wasa rotorot lao ran pasang o usu ran pan pwara dang mongiong omail. <sup>20</sup> Iet me komail en asa mas: Sota kokop nan puk sarau me tapida sang ren aramas. <sup>21</sup> Pwe sota man kokop pwili sang ni insen

en aramas amen, pwe aramas sarau en Kot akan kokopada mokimokidedi Ngen sarau.

## 2

<sup>1</sup> A ren men Israel saukop likam kai pil mia, duen saunpadak likam me pan mi re omail, me pan kawailong do pwin sued kai, o re kin kamamki Kaun o, me dore ir ala, a i me re pan kare ong pein irail kaopar madang. <sup>2</sup> O me toto pan idauen ar padak sapung, i me lamalam melel me pan kaankaururla. <sup>3</sup> O pweki ar nonorok ni lokaia widing re pan paie kin komail; ari, kadeik par duen men mas sota pan pwand, o ar pakamekam sota kin moleilei. <sup>4</sup> Pwe, ma Kot sota kotin kupura tounlang ko, me wiadar dip, a a kotin kase ir di lang nan pweleko, ap salie kidi sal mata pan pwand, nekineki ong ran en kadeik, <sup>5</sup> O ma a sota kupura men kua kan, a kamaureda Noa, saunpadak en lamalam pung, iangaki pil isimen, ni a kotiki ong toun sappung nedolik lapalap. <sup>6</sup> O a kotin wia kila pas kanim Sodom o Komora, o wukidedi, o kadeik ira da en ola, o wia kin ira kile eu ong me san Kot akan, me pan pwarado mur. <sup>7</sup> O a kotin kapitala Lot pung amen, me aramas sued wiai ong song en me sued karos ni ar tiak sued. <sup>8</sup> Pwe i ol pung o kaukason nan pung arail, kilekilang o rongerong ar wiawia, kupur a pung ap lokelokki ar wiawia sapung kaukaule. <sup>9</sup> A Kaun o kotin kak ong kamaiola sang ni sngapan lelapok kan o nekinekid ong ran en kadeik me sapung kan, pwe ren kalokolok. <sup>10</sup> A irail eta, me weweid ni inong samin en pali udok, o mamaleki monsap akan, o laumaum, o katiwo, o somasak, o lalau me lingan akan. <sup>11</sup> A tounlang kan, me lapalap o kelail sang irail, sota kin lalau o kadeik irail da mon Kaun o. <sup>12</sup> A mepukat rasong man akan, me sota ar lamelam, me udan kileledier ong salidi o kamela, pwe re lalau, me re sasa, o re pan mekila ar wiawia sued. <sup>13</sup> Re pan ale kating en ar sapung. Re kin kasampwaleki kaped en manga ni ran o. Irail men kasamin, o kanamenok, o kin ponmasuk i omail mairong, o sokraui omail kapwa. <sup>14</sup> O por en mas arail me dir en kamal, o re sota kak dukedi sang wia dip, kotakotaue ir, me mongiong ar so teng, o mongiong arail nonorok, iei seri en rialar akan. <sup>15</sup> Me kasela al inen, ap salangala, idedauen al en Pileam, nain Peor, me pok ong pwain en me sapung. <sup>16</sup> A a pokoki dip a, man as lotong lokelokaia ki ngil en aramas, kapueoki sang saukop o ni a wiawia sapung. <sup>17</sup> Irail me rasong utun pil matada, o dapok me melimel kin iririp sili; nan rotorot lapalap me nekinekid ong irail. <sup>18</sup> Pwe re kin kida padak aklapalap, me sota kadepa, o ni ar wiawia samin, re kin kainong iong inong

sued en uduk, irail me apton muei sang me sapungki padak likam. <sup>19</sup> Re inauki ong irail, ren saledokala, a pein irail ladu en kasuedpar. Pwe melel, me amen lodi onger, i me a kin liduie kila. <sup>20</sup> Pwe ma re pitila sang nan pwel en sappa, ki ar asaer Kaun o Saunkamaur Iesus Kristus, rap pur ong liseleping kila o lodi ong i nan ar wiawia en mur me sued sang men mas. <sup>21</sup> Mak eta, ma re sota asa duen al en pung, sang ar asa, ap wuki wei sang kusoned sarau, me re aleer. <sup>22</sup> Pwe, karaseras o pwaida re 'rail, me inda: Kiti men kin pur ong kang a mus, o pwik, me duduer, pur ong uledok nan pwel.

### 3

<sup>1</sup> IET kisin likau kariau, me i inting wong komail, kompok kan, pwen kataman kin komail o kapidada ngen omail makelekel. <sup>2</sup> Pwe komail en tamanda masan en saukop sarau kan, kusoned en Kaun o Saunkamaur, me wanporon oko, me pakadar wong komail, wa dong komail. <sup>3</sup> O iet eta komail en asa, ni imwin ran akan aramas lalau pan pwarado, me pan weweid ni pein ar inong sued. <sup>4</sup> Indada: Ia kilel en a pan kotido? Pwe sang ni ran o, sam akan melar kokodo lel met, meakaros kin dueta nin tapi o. <sup>5</sup> Pwe irail kin men ponsasa, me masia lang akan o sappa eu mia nan pil o, ap pwarada sang nan pil ki masan en Kot. <sup>6</sup> I me sappa en mas o okilar nolik lapalap. <sup>7</sup> Pil dueta lang akan o sappa en met nekinek kita masan ota ong kisiniai ni ran en kadeik o kampan aramas me san Kot akan. <sup>8</sup> Kompok kan, iet eta komail en asa, me ran ta ieu o par kid ras pena ta ren Kaun o, o par kid o ran eu dupeneta. <sup>9</sup> Kaun o sota kotin kapwandela inau o, duen akai kin kiki ong, pwe a kotin kanongama ong komail, pwe a sota kotin mauki, akai en lokidokila, pwe karos en wilikapala. <sup>10</sup> A ran en Kaun o pan pwarado dueta lipirap amen. I dokan lang akan pan mor pasang ni morong lapalap o tapipa kan pan pei pasang ki kisiniai kel, o sappa o a dipisou kan pan rongala. <sup>11</sup> Ari, ma mepukat karos pan ola, iaduen a pan re omail ni omail wiawia mau o lelapok, <sup>12</sup> Pwe komail kin auiaui o inong iong ran en Kot, me lang akan pan rong kila kisiniai, o tapipa kan pei pasang, pwe karakar muletok. <sup>13</sup> A kitail kin auiaui lang kap akan o sappa kap, wasa me lamalam pung pan wiaui, duen a kotin inaukidar. <sup>14</sup> Kompok kan, pweki omail auiaui mepukat, komail en nantiong, pwe komail en diarokada re a so samin, o so sapung ni popol. <sup>15</sup> Pwe komail asa duen kanongama en atail Kaun, pwe i kamaur pa 'mail, duen ri atail Paulus kompok inting wong komail er ni lolekong, me ko ong i. <sup>16</sup> Duen a kasokaso ni ran kisin likau karos, a akai wasa me apwal

en dedeki, me sololekong o so lolin akan kin kawukila, dueta ar pil kawukila masan tei kan, me pan kare ong irail pein ar lokidokila. <sup>17</sup> Kompok kan, pweki omail asa mepukat, komail kalaka, pwe komail der sapung kila padak en me sued akan, ap pupedi sang katengeteng komail. <sup>18</sup> A komail kairida ni mak o lolekongki padak en atail Kaun o Saunkamaur Iesus Kristus. I me kon ong en ale wau metet o kokolata lel ong ni ran soutuk.



## EN IOANES A KISIN LIKAU KAIEU.

<sup>1</sup> ME kin mia sang ni tapi o, me se ron-gadar, me se kilang kier pein mas at, me se ududialer, o me pa at dokeer, iei masan en maur; <sup>2</sup> O maur sansaledar, o se kilanger, o kadede, o padaki ong komail maur soutuk, me kotikot ren Sam, a ap sansal dong kitail. <sup>3</sup> Me se kilanger, o ronger, iei me se pil kati-tiki ong komail, pwe komail en pil waroki ong kit. A kitail waroki ong Sam o Sapwilim a Iesus Kristus. <sup>4</sup> Mepukat se intingiedi, pwe at peren en unsokala. <sup>5</sup> A ietet padak, me se rong sang i, ap katitiki ong komail: Kot marain eu, o sota man rotorot mi re a. <sup>6</sup> Ma kitail inda, me kitail waroki ong i ap weweid ni rotorot, kitail kin likam, ap sota wia melel. <sup>7</sup> A ma kitail weweid ni marain, dueta i me kotikot ni marain, kitail warok penaer, o ntan Iesus Kristus sapwilim a Ol kamakele kitail sang ni dip karos. <sup>8</sup> Ma kitail inda: Sota dip atail, kitail piti pein kitail, o melel sota mi re atail. <sup>9</sup> A ma kitail weakada dip atail, i me melel o pung, en makeki ong kitail dip atail o kamine sang me sapung karos. <sup>10</sup> Ma kitail inda: Kitail sota wiadar dip, kitail kalikame i, o a masan sota mi re atail.

### 2

<sup>1</sup> SAMA ko, mepukat i inting wong komail, pwe komail de wia dip, a ma amen wia dip, sauasa patail mia ren Sam, Iesus Kristus, me pung. <sup>2</sup> Iei me tom en dip atail, a kaidin atail ta, pwe pil en toun sappa karos. <sup>3</sup> I me kitail dedeki, me kitail asaer i, ma kitail kapwaiada kusoned akan. <sup>4</sup> Me inda: I asa i, ap sota kapwaiada a kusoned akan, i me likam amen, melel sota mi re a. <sup>5</sup> A me kapwaiada a masan, i me limpok en Kot unsokelar re a, i me kitail asaki, me kitail udan sapwilim a. <sup>6</sup> Me kin inda: I potopot re a, mak eta, i en weweid wei dueta a kotin weweidier. <sup>7</sup> Kompok kan, kaidin kusoned kap eu, me i inting wong komail, a kusoned en mas o, me mi re omail sang ni tapi o. Kusoned en mas, iei masan o, me komail ronger. <sup>8</sup> Pil eu kusoned kap, me i inting wong komail, me melel re a o re omail, pwe rotorot mur tikitikla, a marain melel ap dakadar. <sup>9</sup> Me inda, me a mi ni marain, ap kailong kin ri a, nan a mimieta ni rotorot lel met. <sup>10</sup> Me kin pok ong ri a, pan mimieta ni marain, ap solar men kamakar mi re a. <sup>11</sup> A me kin tatakri a, mier ni rotorot, o weweid ni rotorot, ap kin sasa, wasa a kin ko ong ia, pwe rotorot karotongala mas a kan. <sup>12</sup> I inting wong komail, sama ko, pwe dip omail lapwadar ki mar a. <sup>13</sup> I inting wong komail,

sama akan, pwe komail asa i, me kotikot eta sang ni tapi o. I inting wong komail manakap akan, pwe komail kaloedier me sued o. I inting wong komail er, sama ko, pwe komail asaer Sam. <sup>14</sup> I inting wong komail er, sama akan, pwe komail asa i, me kotikot sang ni tapi o. I inting wong komail er, manakap akan, pwe komail me kelail, o masan en Kot en mimieta re omail, o komail kaloedier me sued o. <sup>15</sup> Der pok ong sappa, de dipisou mimi sappa. Ma amen pok ong sappa, limpok en Sam me sota mi re a. <sup>16</sup> Pwe meakaros mi sappa, inong en ni uduk, o inong en ni mas oko, o lingan mal en maur, a sota tapida sang ren Sam, a sang ni sappa. <sup>17</sup> A sappa pan sorola o a me sued akan, a me wia kupur en Kot, pan mimieta kokolata. <sup>18</sup> Sama ko, metet imwin auer o, o duen omail ronger, me kristus likam pan pwarado, nan ansau wet kristus likam me toto, me pwaradar, i me kitail asaki, met imwin auer leler. <sup>19</sup> Irail me kola sang kitail, a kaidin kis atail, pwe ma irail kis atail, re pan mimieta re atail. A irail kola sang kitail, pwen sansal, me kaidin irail karos kis atail. <sup>20</sup> A komail keidier ren me saruai, o komail asaer meakaros. <sup>21</sup> I sota inting wong komail er, dene sota asa duen melel, a pwe komail asa, o likam so tapida sang ni melel. <sup>22</sup> Is i me likam amen? Kaidin i, me kamamada me Iesus udan Kristus. I me kristus likam, me kamama kida Sam o Na. <sup>23</sup> Amen amen, me kamam kida Na, nan Sam pil sota mi re a, a me ponasa Na, i me pil sapwilim en Sam. <sup>24</sup> Me komail ronger sang ni tapi o, en potopoteta re omail. Ma a pan mimi re omail, me komail ronger sang ni tapi o, komail ap pil pan potopot ren Na o Sam. <sup>25</sup> A iet inau o, me a kotin inauki ong kitail er: Maur soutuk. <sup>26</sup> Mepukat me i inting wong komail er duen irail, me kasapunge komail. <sup>27</sup> A omail kei, me komail aaler re a, pan mimieta re omail. Komail ap solar mau ong, amen en padaki ong komail. A duen kei wet kin padaki ong komail meakaros, iduen me melel, a kaidin likam pot, o duen a padaki ong komail er, iduen komail en dadaurata. <sup>28</sup> Ari sama ko, podidi ong i, pwe ni a pan kotin pwarado, kitail en aima, a so namenok mo a, ni a kotin pwarado. <sup>29</sup> Ma komail asa, me i me pung, komail en pil asa, meamen, me wia me pung, me ipwi sang i er.

### 3

<sup>1</sup> KILANG song en limpok lapalap, me Sam kotiki dong kitail er, pwe kitail en adane kila seri en Kot, ari, iei kitail. I me sappa sasa kin kitail, pwe re kin sasa i. <sup>2</sup> Kompok kan, kitail ari seri en Kot, ap saikenta sansal, da me kitail pan wiala. Ari so, kitail asa, ni a pwarado, kitail pan duála

i, pwe kitail pan kilang i ni udan mom a. <sup>3</sup> O amen amen, me kaporopor due met, a en kamakelekele pein i duen i me makelekel. <sup>4</sup> Amen amen me kin wia dip, pil kin palian kapung, pwe iei dip palian kapung. <sup>5</sup> O komail asa, i me a pwarado, pwen lapwada dip akan. A dip sota kin mi re a. <sup>6</sup> Meamen, me pot re a, sota kin wia dip; meamen wia dip, sota kilang i o sota dedeki. <sup>7</sup> Sama ko, kalaka, pwe amen de kasapunga komail. Me kin wia pung, nan i me pung amen, due i me pung. <sup>8</sup> Me kin wia dip, i nain tewil, pwe tewil me wia dip sang ni tapi o. I me Sapwilim en Kot kotin pwarado, pwen kawela wiawia en tewil. <sup>9</sup> Meamen me ipwi sang Kot, sota kin wia dip, pwe war a mi re a, o a so kak wia dip, pwe a ipwi sang ren Kot. <sup>10</sup> I me seri en Kot o seri en tewil sansale kida, me so wia me pung, i me so sang ren Kot, o me so pok ong ri a. <sup>11</sup> Pwe iet padak, me komail ronger sang ni tapi o, kitail en pokepeke pena. <sup>12</sup> Kaidin due Kain, me udan me sued amen, ap kamela ri a. Ari, menda a kamela i? Aki a wiawia me sued, a en ri a me pung. <sup>13</sup> Ri ai ko, der puriamuiki, ma men sappa kin tata kin komail. <sup>14</sup> Kitail asa, me kitail daulier mela, ap ko ong maur, pwe kitail kin pok ong ri atail akan. Ari, me so limpok, pan mimieta nan mela. <sup>15</sup> Meamen, me kin tata ki ri a, nan i me kamela men. A komail asa, maur soutuk sota kin mi ren me kamela men. <sup>16</sup> I me kitail diar kida limpok. A kotiki wei maur pweki kitail; kitail ari pwaipwandeki maur atail ong ri atail akan. <sup>17</sup> Meamen me muei met ap kilang ri a dupokala, ap sota sauasa i, iaduen limpok en Kot pan kak mi re a? <sup>18</sup> Sama ko, kitail der pok pena ni lokaia ta o lo, a ni wiawia o mekel pot. <sup>19</sup> I me kitail pan asaki, me kitail kisan mekel, o kainsenemauiela mongiong atail re a, <sup>20</sup> Pwe ma mongiong atail kadeikada kitail, nan Kot me lapa sang mongiong atail o lelapokki meakan karos. <sup>21</sup> Kompok kan, ma mongiong atail so kadeikada kitail, nan kitail aima ong Kot. <sup>22</sup> O meakot kitail poeki re a, kitail pan tungole sang i, pwe kitail nekinekid a kusoned akan, o wiada meakan, me a kin pole kila. <sup>23</sup> Iet et a kusoned: Kitail en poson mar en sapwilim a Ol Iesus Kristus, o poka pena, duen a kotiki ong kitail kusoned o. <sup>24</sup> A me kin nekinekid a kusoned akan, pan pot re a, o i pan kotikot re a; o iet me kitail asaki, a kotikot re atail: Ngen o, me a kupurai dong kitail er.

#### 4

<sup>1</sup> KOMPOK kan, komail der poson ngen karos, a kasau song en ngen akan, ma re tapida sang ren Kot. Pwe saukop likam me toto kaparapar sili sappa. <sup>2</sup> Iet me komail asaki Ngen en Kot: Ngen karos, me kadede,

me Iesus Kristus koti dong uduk, nan i me tapida sang ren Kot. <sup>3</sup> O ngen karos, me so kadede, Iesus a sota tapida sang ren Kot, Nan i kristus likam, duen me komail ronger, me a pan pwarado, nan a mier sappa metet. <sup>4</sup> Sama ko, komail tapi sang ren Kot o kaloe irail edi, pwe i, me kotikot re omail, me lapa sang i, me mi ni sappa. <sup>5</sup> Irail me udan sappa, iei me irail lokaiaki sappa, o sappa kin rong irail. <sup>6</sup> Kitail tapi sanger ren Kot, me asa Kot, kin rong kitail. A me so sang ren Kot, sota kin rong kitail. Iei me kitail asaki Ngen en mekel, o me udan likam. <sup>7</sup> Kompok kan, kitail kin poke pena, pwe limpok tapi sang ren Kot, A amen amen, me kin limpok, ipwi sang ren Kot, o a asa Kot. <sup>8</sup> Me so kin limpok, sasa Kot, pwe Kot udan limpok. <sup>9</sup> Ni met limpok en Kot sansal dong kitail: Kot kotin porone dong sappa sapwilim a Ieros eu, pwe kitail en maur ki i. <sup>10</sup> Iet et pason en limpok, kaidin kitail me tapin limpok ong Kot, pwe a tapin pok ong kitail, o poronede sapwilim a Ol, wiala sauntom pan dip atail. <sup>11</sup> Kompok kan, ma Kot kin limpok ong kitail due met, kitail en pil limpok pena. <sup>12</sup> Sota me kilanger Kot ni ansau eu. Ma kitail limpok pena, nan Kot pan kotikot re atail, o a limpok me unsokelar re atail. <sup>13</sup> I me kitail asaki, me kitail mimieta re a, o a kotikot re atail, pwe a kotin kupurai dong kitail er Ngen i. <sup>14</sup> O se kilanger o kadeded, me Sam poronede sapwilim a Ol, en wiala Saunkamaur pan sappa. <sup>15</sup> Meamen me ponasa Iesus, me Sapwilim en Kot, nan Kot me kotikot re a, o i ren Kot. <sup>16</sup> O kitail dedekier o kamelele limpok, me Kot kotin wia ong kitail. Kot me limpok, o me kin potopot ni limpok, kin potopot ren Kot, o Kot kotikot re a. <sup>17</sup> Iet unsok en atail limpok: Kitail pan aima ni ran en kadeik, pwe duen i, iduen kitail nin sappa et. <sup>18</sup> Sota masak ni limpok, pwe limpok mekel kin kausa sang masak, pwe masak kin kareda kamekam. Ari, me kin masak, nan a limpok saikenta unsokala. <sup>19</sup> Kitail kin limpok, pwe i me kotin tapiadar pok ong kitail. <sup>20</sup> Ma amen kin inda: I kin pok ong Kot, ap kin sempok ong ri a, nan i me likam amen, pwe me kin sempok ong ri a, me a kilanger, da a pan kak pok ong Kot, me a sota kilanger? <sup>21</sup> A kusoned pot et kitail aleer sang re a, me i, me pok ong Kot, en pil pok ong ri a.

#### 5

<sup>1</sup> MEAMEN me kamelele, me Iesus me Kristus, nan i me ipwi sang ren Kot, o me kin pok ong me kaipwidi i, kin pil pok ong, me ipwi sanger. <sup>2</sup> I me kitail asaki, me kitail pok ong seri en Kot akan, ni atail pok ong Kot o oke a kusoned akan. <sup>3</sup> Iet limpok ong Kot, atail kapwaiada a kusoned akan, a a kusoned akan me sota apwal. <sup>4</sup> Pwe

meamen, me ipwi sang ren Kot, kin kaloedi sappa. Iet pai en pei, me kaloedier sappa, atail poson. <sup>5</sup> Is me kaloedi sappa, kaidin i eta, me kamelele, me Iesus Sapwilim en Kot? <sup>6</sup> I met, me kokido pil o nta, Iesus Kristus; kaidin pil eta, pwe pil o nta. Ngen me kadedeki, pwe Ngen melel. <sup>7</sup> Irail me silimen me kadede: <sup>8</sup> Ngen, o pil, o nta; irail kin minimin pena. <sup>9</sup> Ma kitail kamelele kadede en aramas akan, nan kadede en Kot me lap sang, pwe i en Kot a kadede me a kotin kadedeki sapwilim a Ol. <sup>10</sup> Me kamelele Sapwilim en Kot, a men kadede mi lole, me so kin kamelele Kot, kin kalikame i, pwe a sota kamelele kadede en Kot duen sapwilim a Ol, <sup>11</sup> A iet kadede o: Kot me kotiki ong kitail er maur soutu; a i song en maur mi ren sapwilim a Ol. <sup>12</sup> Me aneki Na, i me aneki maur, a me sota aneki Sapwilim en Kot, a pil sota aneki maur. <sup>13</sup> Mepukat i inting wong komail er, pwe komail en asa, me maur soutu mi re omail, a komail, me poson mar en Sapwilim en Kot. <sup>14</sup> O iet at kaporopor kaperen: Meakot kitail poeki re a duen kupur a, a kotin mangi kitail. <sup>15</sup> A ma kitail asa, me a kotin mangi kitail, iran meakot kitail poeki re a, kitail ap asa, me kitail pwais anekier, me kitail kapakapaki. <sup>16</sup> Meamen me kilangada ri a wia dip, me so imwilang mela, i en kapakapaki, Kot ap pan kotiki ong i maur, ong ir, me so wia dip, me udan mela. A eu song en dip mia, me imwilang mela, duen song en i sota inda, meamen en kapakapaki. <sup>17</sup> Sapung karos me dip, a song en dip mia, me sota imwilang mela. <sup>18</sup> Kitail asa, meamen me ipwi sang ren Kot, sota kin wia dip; a me ipwi sang ren Kot, apapwali pein i, a men sued o sota pan doke i. <sup>19</sup> Kitail asa, me kitail tapi sang ren Kot, a sappa karos mi ni me sued. <sup>20</sup> A kitail asa, me Sapwilim en Kot pwarador, kalolekong kitail er, pwe kitail en asa i me melel, o kitail kisan i me melel, iei sapwilim a Iesus Kristus. I me Kot melel o maur soutu. <sup>21</sup> Sama ko, kalaka pein komail sang dikedik en ani kan!

**EN IOANES  
A KISIN LIKAU KARIAU.  
IOANES II**

<sup>1</sup> IET ngai me laud o ranamau wong li lipilipil o na seri kan, me i kin pokepoke melel; a kaidin ngai ta, pwe pil irail karos, me asa melel, <sup>2</sup> Pweki melel o, me mi re atail, o a pan mi re atail kokolata. <sup>3</sup> Mak o kalangan, o popol pan mi re atail sang ren Kot Sam, o sang ren Iesus Kristus, me Sapwilim en Sam ni melel o limpok. <sup>4</sup> I ap peren kida kaulap, pwe i diaradar, me akai noum seri kan alialu wei ta ni melel, duen atail aleer kusoned sang ren Sam. <sup>5</sup> Ari, i poeki re omui, Maing, kaidin kusoned kap pot, me i inting wong komui, a me kitail aleer sang ni tapi o kitail en pololol pena. <sup>6</sup> A iet limpok, pwe sen alu weita duen a kusoned akan. A met kusoned o, duen komail ronger sang ni tapi, sen alialuta ia. <sup>7</sup> Men kotaue me toto pwara dong sappa, me sota kin kadede, me Iesus Kristus wia uduk ala, i men kotaue o kristus likam o. <sup>8</sup> Komail kalaka pein komail, pwe omail pai, me komail dodok ong er, de salongala a komail en ale pwaipwai pokon. <sup>9</sup> Meamen me dauli mepukat, o me sota tengedi ong padak en Kristus, a sota paieki Kot; a me tengedi ong padak o, i me paiekier karos, Sam o sapwilim a Ol. <sup>10</sup> Ma amen ko dong komail, me sota wado padak et, der kasamo long ong nan im omail, o der ranamaui i. <sup>11</sup> Pwe me kin ranamaui i, a pan pwaisaneki a wiawia sued. <sup>12</sup> Kasoi me toto mi re i, me i men inting wong komail, a i sota pan wiaki ki kisin likau o ink, pwe i kaporoporeki, me i pan pwara wong komail, kitail ap pan kasoi pena, pwe atail peren en unsokela. <sup>13</sup> Ari, nain ri om li lipilipil seriko me ranamau wong komui. Amen.

## EN IOANES A KISIN LIKAU KASILU.

<sup>1</sup> IET ngai me laud o ranamau wong Kaius kompok, me i kin pokopoke melel. <sup>2</sup> Kompoke pa i, i kin men, koe en pwaida o roson ni wiawia karos duen ngen om me pwaida. <sup>3</sup> Pwe i peren kida kaulap, ri atail oko lao pwarado, katitiki ong ia duen om melel o duen om kin alialu wei ta ni melel. <sup>4</sup> Sota ai peren me lapa sang met, ni ai rong duen nai seri kan, me kin alu wei ta ni melel. <sup>5</sup> Kompoke pa i, me mau, me koe kin wiai ong ri atail o pil men kairu kan, <sup>6</sup> Me katitiki ong momodisou duen om limpok; me mau, ma koe pan sauasa irail, duen me kon ong Kot. <sup>7</sup> Pweki mar a re kin koko wei ta, sota tungole meakot ren men liki kan. <sup>8</sup> I me kitail en sauasa song due met, pwe kitail en wia sauas pan melel. <sup>9</sup> Meakot i intingki wonger momodisou, a Diotrepes me akasaumas ong irail, sota duki ong kit. <sup>10</sup> Ari, i lao pwara wei, i pan katamanki i a wiawia kan, me a kin wiada, pwe a kin lokaia sued duen kit. A kaidin i eta, pwe pein i sota kin kasamo ri atail ko, ap pil inapwiedi, me kin men apwali ir, o kasapok ir ala sang nan momodisou. <sup>11</sup> Kompoke pa i, der idauen me sued a me mau. Me kin wia me mau, me sang ren Kot, a me kin wia me sued, sota kilanger Kot. <sup>12</sup> Demetrius indand ren amen amen o pil ni melel. O kit pil kadededa, a koe asa, me at kadede me melel. <sup>13</sup> Kasoi toto me mi re i, me i kak inting wong uk, a i sota men intingki ink o men inting. <sup>14</sup> A i kaporoporeki, me koren, me i pan kilang uk, kita ap pan kasokasoi pena. <sup>15</sup> Papol en mi re om. Kompok kan kin ranamau wong uk. Ranamauieki kompok kan mar arail.

## EN IUDAS A KISIN LIKAU.

<sup>1</sup> IUDAS, ladu en Iesus Kristus amen, o ri en Iakopus, ranamau wong irail, me pilipildar o me kompoke pan Kot Sam, o me nekinek ren Iesus Kristus. <sup>2</sup> Kalangan, o popol, o limpok en rokalang komail! <sup>3</sup> Kompok kan, ni ai ngongki kaulap, inting wong komail ekis, duen atail dorela ni lamalam ta pot, i men inting wong komail o panau komail, en upaliki poson, me udan pangalang sarau kan. <sup>4</sup> Pwe aramas akai wailong ong, me ar pakadeik mia sang mas o: Irail me doo sang Kot, o re kawukila mak en Kot, ong kapwaiada inong sued en uduk, o re kamameki Kot o atail Kaun Iesus Kristus, me iei eta Kaun. <sup>5</sup> Komail asaer mekaros, ari so, i men kataman kin komail, me Kaun o kotin sausa sapwilim a aramas akan ren men Äkipten, a mur a kotin kame ir ala, me sota poson. <sup>6</sup> O tounlang kai, me sota kasampwaleki arail koa, ap muei sang udan deu arail, a kotin nekid kin arail sal mata soutik ni wasa rotorot ong ran en kadeik lapalap. <sup>7</sup> Dueta Sodom, O Komora, o kanim akan, me mi imp ara, me pil nenenek nin tiak ota, dueta ira, o inong iong uduk toror, ap wiala kilel eu, ni ar kamekameki kisiniai soutik. <sup>8</sup> I dueta mepukat, me kalap auramen, kin kasaminela uduk, o sota duki ong kaun o, lalaue me lingan akan. <sup>9</sup> A Mikael, tounlang lapalap amen, ni a akamai ong tewil, akakamaiki kalep en Moses, a sota kotin aingar ong lalaue o kadeikada i, pwe a kotin masanier: Kaun en kotin kapung ong uk! <sup>10</sup> A mepukat kin lalaue, me re sasa; a meakan me re udan asa, dueta man akan, me sota ar lamalam, kawela pein irail. <sup>11</sup> Suedi ong irail! Irail weweid kier al en Kain, o re lodi ong pakotaue en Pileam pweki moni, o ni ar kangudi dueta Kora, re mekilar, <sup>12</sup> Ir pukat me kaopan omail kamadip limpok kan, ni ar sokrau somasak o kamanga pein irail. Re rasong dapok madekong kan, me ang kin wewa sili, o rasong tuka, me so ta o so wa kan mia, me melar pan riapak, o solar due 'rail. <sup>13</sup> Re rasong iluk en matau, me pungpung potpoteta, kapwereda pein ar kanamenok kan, rasong moal en usu, ap nekinek ong rotorot soutuk. <sup>14</sup> Enok kaisimen murin Adam pil kokop duen irail masanier: Kilang, Kaun o kotido iang sapwilim a sarau kan, me kid ngeder. <sup>15</sup> Pwen kadeikada karos, o kapungada me sang Kot akan karos, pweki ar dodok o wiawia sued akan, me re wiadar ni ar doo sang Kot, o pil ar lokaia sued, me irail dipan akan wiai ong i. <sup>16</sup> Mepukat kin lipaned o pilpil en pan moli ansau karos,

aki ar kapwaiada ar inong sued, o irail aklapalap ni ar lokaia, o lipilpil sansal en aramas pweki moni. <sup>17</sup> A komail, kompok kan, tamanda masan akan, me wanporon en atail Kaun Iesus Kristus akan masanier mas o, <sup>18</sup> Ni ar masani ong komail, me aramas lalaue pan pwarado ni imwin ansau, me san Kot, ap kekeideki pein ar inong sued. <sup>19</sup> Ir pukat kin kamueit pasang saulang kan, irail me pali uduk eta, a sota ngen arail. <sup>20</sup> A komail kompok kan, kaua kida pein komail omail poson mekel, o sarau, o kapakapaki Ngen sarau. <sup>21</sup> Nekinek pein komail ni limpok en Kot, o kaporoporeki kalangan en atail Kaun Iesus Kristus ong maur soutuk. <sup>22</sup> O akai irail me peikasal, komail kadek ong, <sup>23</sup> Saro kin ir wei sang nan kisiniai o dore ir ala. O kadek ong me tei kan ni masak. O komail pil suedeki likau samin en pali uduk. <sup>24</sup> A i me kak pera komail, sang omail pan depikelekel, o kamotan di ong komail mon a lingan, makelekel, o pereperen, <sup>25</sup> I Kot eta Saunkamaur patail, ren Iesus Kristus atail Kaun lingan, lomin, o wiawia, o manaman en ko ong, met o potopot eta kokolata! Amen.

## PUK EN KAUDIAL EN IOANES.

<sup>1</sup> IET kasale pan Iesus Kristus, me Kot kotiki ong i, en kasale ong sapwilim a ladu kan meakai, me pan wiaui met koren. A kotin poronela sapwilim a tounlang, me a kotin kasaleki ong sapwilim a ladu Ioanes. <sup>2</sup> Me kadedeki masan en Kot, o kadede pan Iesus Kristus karos, me a kilanger. <sup>3</sup> Meid pai, me wadokedi o ir, me rong masan en kokop akan, o nekinekid me intingidier lole, pwe ansau me koren. <sup>4</sup> Iet ngai Ioanes, ong momodisou isu nan Asien: Mak o popol ong komail sang ren i, me kotikot met, o me kotikot mas o, o me pan kotido, o sang ren Ngen isu, me kotikot mon mol a, <sup>5</sup> O sang ren Iesus Kristus, me saunkadede melel, me meseni ren me iasadar sang ren me melar akan, o Kaun en nanmarki en sappa kan, me kotin kupura kitail o widen sang kitail dip atail ki nta, <sup>6</sup> O kotin wia kin kitail er samero ong Kot o Sam a. Lingan o manaman en mi re a kokolata! Amen. <sup>7</sup> Kilang, a kotido nan dapok kan, o mas karos pan kilang i, o irail me doke i, o kainok en sappa karos pan sangesangki i. Melel, Amen. <sup>8</sup> Ngai Alpa o Omeka, me Kaun Kot kotin masani, me kotikot eta, o me kotikot mas o, o me pan kotido, iei Dinkel amen. <sup>9</sup> Ngai Ioanes, ri omail, o omail warok ni kamekam, o ni wei, o ni atail auiaui Iesus, i lel dong nin dake o, me ad a Patmos, ki masan en Kot o kadede pan Iesus. <sup>10</sup> Ngen sarau kotikot po i ni ran en Kaun, i ap rongadar mur i ngil laud eu, me rasong ngil en koronete masani: <sup>11</sup> Me koe kilang, intingiedi nan puk eu, ap kadar wong momodisou isu en Epibus, o Smirna, o Perkamus, o Tiatira, o Sardes, o Piladelpia, o Laodisea. <sup>12</sup> I ap soupei ong, en kilang ngil o, me kasoi ong ia. A i lao soupeilar, i kilang lamp kold isu. <sup>13</sup> O nan pung en lamp akan amen mia, me rasong Nain aramas, likauie kida likau eu, me leldi ong aluwilu a, o lukom kida ni maramar waiwai kold eu. <sup>14</sup> A kadokenmai o pit en pepei puetepueteta wun en sip puetepuet, o rasong sno, o silang i rasong umpul en kisiniai, <sup>15</sup> O aluwilu a rasong pras lingan likamata a lingaling nan kisiniai, o kapitie rasong ngirsok en pil toto. <sup>16</sup> O ni lim a pali maun usu isu mia, o sang nan silang i kodlas kong o au a riau u wei sang, o silang i rasong katipin, sirang kelailia. <sup>17</sup> A ni ai kilang i, i ap pupedi ni aluwilu a dueta mela amen. O a kotikidang po i lim a pali maun mamasani: Ender masak, ngai men mas o men mur. <sup>18</sup> O me maur men, o ai melar amen, ari kilang, i memaureta kokolata, o

men kampir en mela o wasan mela mi re i. <sup>19</sup> Koe ari intingiedi meakan, me koe kilanger, o me mier, o me pan wiaui mur. <sup>20</sup> Wewe en usu isu, me koe kilanger nan pa i pali maun, o lamp kold isu. Usu isu, iei tounlang en momodisou isu, o lamp isu, iei momodisou isu.

## 2

<sup>1</sup> INTING wong tounlang en momodisou en Epibus: Iet masan en i, me kolekoleta ni lim a pali maun usu isu, o me kin weweid nan pung en lamp kold isu. <sup>2</sup> I asa om wiawia kan, o lam dodok, o om daudrata, o duen om sota kin mauki me sued akan, o koe kasau ir adar, me akawanporon, a me so, ap diar ir ada me likam. <sup>3</sup> O koe kin kanongama ong o kadokeki mar ai, ap sota pangadar. <sup>4</sup> A iet me I suedeki re om: Koe mui sanger tapin om limpok. <sup>5</sup> Koe ari tamanda, me koe pupe wei sanger, o kalula, o kapwaiada wiawia en mas o; a ma so, I pan ko dong uk, kasau wei sang om lamp sang ni deu a, ma koe sota kalula. <sup>6</sup> A iet me koe kin wia, koe kin suedeki wiawia en nain Nikolaus akan, me I pil kin suedeki. <sup>7</sup> Me salong a mia, i en rong, me Ngen o masani ong momodisou kan! Me dadaurata, I pan ki ong i, en tungole sang tuka en kamaur, me mi nan paradis en Kot. <sup>8</sup> Inting wong tounlang en momodisou en Smirna: Iet masan en men mas o men mur, me melar ap mauredar. <sup>9</sup> I asa om kamekam, o om samama ari so, koe me kapwawia, o lalaue en ir, me kin inda, dene irail men Sus, a kaidin irail men Sus, pwe pwin en Satan eu. <sup>10</sup> Koe der masak, me koe pan kalokolokki. Kilang, tewil o pan kaselong ong nan imateng akai komail, pwe komail en kasongesong, o komail pan kalokolok ran eisok. Dadaurata lel mela. I ap pan ki ong uk mar en maur soutuk. <sup>11</sup> Me salong a mia, i en rong, me Ngen o masani ong momodisou kan! Me dadaurata, sota pan kamekam kila mela kariau. <sup>12</sup> Inting wong tounlang en momodisou en Perkamus: Iet masan en me na kodlas kong o au riau mia: <sup>13</sup> I asa, wasa koe kauson ia, ni wasan mol en Satan, o koe kin podidi ong mar ai, o koe sota kamama kida om poson ia pil so ni ran oko, me Antipas, ai saunkadede melel men, kamekamelar nan pung omail, wasa Satan kin kauson ia. <sup>14</sup> A ekis tikitik ta, me I suedeki re om: Akai mi re om, me kin apwali lamalam en Pileam, me padaki ong Palak, en kasedi ong mon kadaudok en Israel kasapung par, ren tungole kisin man, me olu onger dikedik en ani kan, o ren nenek. <sup>15</sup> O pil akai mi re om, me pil apwali lamalam en nain Nikolaus akan. <sup>16</sup> Ari, kalula! A ma so, I pan madang wong uk o pepei ong irail ki kodlas en au ai. <sup>17</sup> Me

salong a mia, i en rong, me Ngen o masani ong momodisou kan! Me dadaurata, I pan ki ong i mana sosansal, o I pan ki ong i takai puetepuet eu o nan takai mar kap intingidier, sota amen me dedeki, i eta, me pan ale. <sup>18</sup> Inting wong tounlang en momodisou en Tiatira: Iet masan en me Sapwilim en Kot, me silang i rasong umpul en kisiniai o aluwilu a rasong pras lingan. <sup>19</sup> I asa om wiawia kan, o om limpok, o om poson, o om papa, o om kanongama, o duen om wiawia men mur, me toto sang men mas. <sup>20</sup> A iet me I suedeki re om: Koe kin mueding ong li Isepel, me kin inda duen pein i, dene i saukop amen, me kin padaki o kotaue nai ladu kan, ren nenek, o ren tungole, me olu ong dikedik en ani. <sup>21</sup> O I ki ong i er ansau en kalula, a a kang kalukila a nenek. <sup>22</sup> Kilang, I pan kasedi i nan los, o irail me kin kamal re a, nan kamekam lapalap, ma re sota pan kalukila wiawia en Isepel akan. <sup>23</sup> O I pan kamekila na seri kan kamekam eu. Ari, momodisou karos pan asaki, me ngai i, me kin irerong nan mudilik o mongiong kan, o I pan ki ong amen amen komail iran omail wiawia kan. <sup>24</sup> A I indai ong komail tei kan, me mi Tiatira, karos me sota apwali lamalam wet, me so dedeki widing en Satan, duen ar lokaia. I sota pan ki ong komail eu katoutou pa 'mail. <sup>25</sup> A me mi re omail, kolekoleta, I lao pwarado. <sup>26</sup> O me dadaurata o me kanekid ai wiawia kan lel imwi, i me I pan kasapwilada pon wei kan. <sup>27</sup> A pan kaun kida ir sokon mata, due dal en saupal kin ola kaulap, o due I pil aleer mana sang ren Sam ai, <sup>28</sup> I ap pan ki ong i usu ran. <sup>29</sup> Me salong a mia, i en rong me Ngen o masani ong momodisou kan!

### 3

<sup>1</sup> INTING wong tounlang en momodisou en Sardes: Iet masan en me Ngen en Kot isu o usu isu mi re a: I asa om wiawia kan, o me mar en maur mi re om, a so, koe melar. <sup>2</sup> Pirida, katenge me lua, me nok mela, pwe I sota diaradar, me om wiawia kan unsokela ren ai Kot. <sup>3</sup> I me koe en tamanda, duen koe tungoler, o ronger, o kanekid, o kalula. Ma koe sota pan pirida, I pan pwarado due lipirap amen, o koe pan sasa auer, me I pan pwara dong uk. <sup>4</sup> A mar malaulau mi re om nan Sardes, me sota kapwelepwel lar ar likau kan, re pan alialu re i nan likau puetepuet, pwe re kon ong. <sup>5</sup> Me dadaurata, pan kapwad kida likau puetepuet, o I sota pan irise sang nan puk en maur mar a. O I pan kademe mar a mon Sam ai o mon na tounlang kan. <sup>6</sup> Me salong a mia en rong, me Ngen o masani ong momodisou kan! <sup>7</sup> Inting wong tounlang en momodisou en Piladelpia: Iet masan en me sarau, me melel, me men kapir en Dawid

mi re a, me kin ritingida, o sota amen, me kak ritingidi, o me kin ritingidi, o sota amen, me kak ritingida. <sup>8</sup> I asa om wiawia kan. Kilang, I ki ong uk er wanim ritidar eu o sota amen, me kak ritingidi, pwe om kel me tikitik, o koe kin kanekid ai masan, o koe sota kamam kidar mar ai. <sup>9</sup> Kilang, I kanain kin uk akai, me udan pwin en Satan, kisan irail, me akasus, a so, re likam. Kilang, I pan kainong ir do, en pongi ni na om, o ren asa, me I kin pok ong uk. <sup>10</sup> Aki om kanekid ai masan en kanongama, I pil pan kanekid uk ni auer en kasongesong, me pan udong toun sappa karos, en kasongesong irail, me kauson sappa. <sup>11</sup> I pan pwarado madang. Kolekol, me koe anekier, pwe sota amen en kulia sang mar om. <sup>12</sup> Me dadaurata, I pan wiaki i ur eu nan tanpas en ai Kot, o a solar pan pedoi sang kokolata. I pan inting po a mar en ai Kot, o ad en kanim en ai Kot, Ierusalem kap, me peidido sang ai Kot nanlang o mar ai kap. <sup>13</sup> Me salong a mia, en rong, me Ngen o masani ong momodisou kan! <sup>14</sup> Inting wong tounlang en momodisou en Laodisea: Iet masan en me maraneki Amen, me saunkadelelelapok melel, me tapin dodok en Kot. <sup>15</sup> I asa om wiawia kan, koe sota karakar o pil sota lamelamur. I men, koe en lamelamur de karakar! <sup>16</sup> Ari, koe me lou, a kaidin karakar de lamelamur, I ap pan mus kin uk wei sang nan au ai. <sup>17</sup> Pwe koe inda: Ngai kapwapwa, i anekier kapwa kan, o i sota kin anane meakot, ap sasa, me koe sakanekan, o so konekon, o samama, o maskun, o kiliso. <sup>18</sup> I panau uk, koe en neti sang ia kold lingan, aki kisiniai, pwe koe en kapwapwala, o likau puetepuet, pwe koe en likauie uk, o kanamenok pan om kiliso der sansal, o wini en mas o, men elieliki mas om, en kilang wasa. <sup>19</sup> I kin kapung ong o kaloke karos, me I pokepoke. Koe nantiong kalula! <sup>20</sup> Kilang, I kin u pan wanim o letelet. Meamen pan rong ngil ai, ap ritingida wanim o, I pan pedeleng re a, ap iang i mot ong ras sarau, o a iang ia. <sup>21</sup> Me dadaurata, I pan ki ong i, en iang, ia mondi pon mol ai, dueta ngai pil dadaurata, ap iang Sam ai mondi pon mol a. <sup>22</sup> Me salong a mia, i en rong, me Ngen o masani ong momodisou kan!

### 4

<sup>1</sup> MURIN mepukat i kilanger kasansal eu: Kilang, wanim eu ritidar nanlang, o ngil, me i ronger mas, dueta koronete eu kasokaso ong ia: Koda dong met! I pan kasale ong uk, me pan wiaui mur en mepukat. <sup>2</sup> Ngai pitipit katia Ngen. A kilang, mol eu mi nanlang, o amen kotidi pon mol o. <sup>3</sup> A sansal en me kotidi poa rasong takai Iaspis o Sardis o aia me liteui mol o, me sansal dueta takai smaragd. <sup>4</sup> O mol o kapilki pena mol rieisok



paieu, o lapalap riek pamen kotikot poa, likau kida likau puetepuet o nin kida nin kold. <sup>5</sup> O sang ni mol o liol, o ngil akai, o nansapwe kai use wei sang, o lamp isu umpumpul mon mol o, iei Ngen isu en Kot. <sup>6</sup> O mon mol o dueta sed eu, me rasong klas o kristal, o nan warong en mol o, o impan mol o man maur pamen, me rok ki por en mas mo ar o mur ir. <sup>7</sup> Man en mas me rasong laien amen, o man kariamen rasong kau ol amen, o man kasilimen kar i rasong aramas, o man kapamen rasong manpir ikel. <sup>8</sup> O man maur pamen ko pa en pir wonu mi ren amen amen, me rokki por en mas ni kaila o lole, o re sota nenenla ni ran o ni pong, indinda: Me sarau, me sarau, me sarau, Kaun Kot, Kaun en mekaros, me kotikot mas, o me kotikot met, o me pan kotin pwarado. <sup>9</sup> Ari man maur oko, lao pan kalinganada, o kakaki, o danke i me kotidi pon mol o, me ieias soutuk, <sup>10</sup> Me lapalap riek pamen ap pan poridi ong i, me kotidi pon mol o, o re pan pongi i, me ieiasata kokolata, o re pan pwilikidi mar ar mon mol o, indada: <sup>11</sup> Komui Maing, at Kaun, o at Kot, me kon ong, en linganla, o kakala, o manaman, pwe ir me kotin kapikadar meakan karos o pweki kupur omui re mia kier o wiaui kidar.

## 5

<sup>1</sup> O i kilanger nan lim pali maun, en me kotidi pon mol o, puk eu, intingidier lole o liki o katengki pena men kateng isu. <sup>2</sup> O i kilang tounlang kelail amen, pepeidokki ngil laud: Is me kon ong pak pasang puk o, o lapwada a men kateng kan? <sup>3</sup> A sota amen, me mi nanlang de nin sappa, de pan sappa, me kak ong pak pasang puk, o udial i. <sup>4</sup> Ari, i ap sangesang kaulap, aki sota amen, me diarokadar, me kon ong, en pak pasang puk o, de udial i. <sup>5</sup> O amen ren me lapalap akan masani ong ia: Koe der sangesang! Kilang, Laien, me udan kainok en luda, tapin Dawid, me pwaidar ni a peipei, pwen kon ong, pak pasang puk o, o lapwa sang men kateng isu. <sup>6</sup> O i kilang nan warong en mol o nan pung en man pamen o nan pung en lapalap akan Sippul amen u due kamekamelar, me ose isu o por en mas a isu mia, iei Ngen en Kot isu me pakadaralang dol en sappa karos. <sup>7</sup> A kotido, ap kotiki sang puk o ni lim a maun en me kaipokedi pon mol o. <sup>8</sup> A ni a kotin aleer puk o, man maur pamen, o lapalap riek pamen poridi ong mon Sippul o. Amen amen re irail kolekol a arp o dal kold, me dir en potik en isis, iei kapapak en sarau kan. <sup>9</sup> Irail kauleki kaul kap pot indinda: Ir me kotin kon ong, kotikida puk o, o lapwada a men kateng ko, pwe komui kamatalar o neti ki ong Kot nt' omui sang ni kainok karos, o

lokaia karos, o men liki karos, o wei karos. <sup>10</sup> O kotin wia kin irail la wei eu ong atail Kot, pwen samero kan, o re pan nanmarki nin sappa. <sup>11</sup> O i kilanger o i ronger ngil en tounlang toto impan mol o, o man maur ko, o lapalap oko; irail me ngederenia nen nen o kid kid, <sup>12</sup> Irail indinda ni ngil laud: Sippul o me kamekamelar, me kon ong aineki manaman, o kapwa, o erpit, o kel, o kaka, o lingan, o pai kan. <sup>13</sup> Ir karusia nanlang, o sappa, o pan sappa, o pon madau, o aude pan arail karos, i ronger me re indinda: Me kotidi pon mol o, o Sippul en kapinganla, o kakala, o kalinganada o manaman kokolata. <sup>14</sup> Man maur pamen masani: Amen, O lapalap akan poridi ong pongi i.

## 6

<sup>1</sup> I kilang ni en Sippul a laud pasang eu ren kateng isu, o i ronger amen ren man pamen masanieki ngil me rasong nansapwe: Kodo! <sup>2</sup> I ap kilanger os puetepuet amen, o me mondi poa kasik katieu mi re a, o mar eu ko ong i, i ari koti wei, pwen kalokaloedi. <sup>3</sup> Ni a laud pasang kateng kariau, i ap ronger man kariamen masanier: Kodo! <sup>4</sup> Amen os me waitata ap pwarado, o me mondi poa a muei ong i, en kawela muei mau nin sappa, o tou a kan pakamekam pena, a kodlas kalaimun me pangalang i. <sup>5</sup> Ni a laud pasang kateng kasilu, i ronger man kasilimen masani: Kodo! I ap kilanger os tontol amen, o me mondi poa, men tenok mi ni lim a. <sup>6</sup> O i ronger ngil eu nan pung en man pamen indinda: Song en wit eu denar eu, o song en korn silu denar eu, a le o wain der kawela! <sup>7</sup> A ni a laud pasang kateng kapaieu, i ronger ngil en man kapamen masani: Kodo! <sup>8</sup> I ap kilanger os pasas, o me mondi poa, mar a Mela, o wasan mela me idauen i. A kapi ong i en kaunda pakis eu en sappa, en kamekila kodlas, o isesol, o mela, o ren man laualo en sappa kan. <sup>9</sup> A ni a laud pasang kateng kalimau, i kilanger pan pei sarau ngen en me kamekila masan en Kot, o ar kadede, me re wia. <sup>10</sup> Irail likelikwirki ngil laud indinda: Arai da, Maing, Kaun sarau o melel, komui so kadeikada o iki kin nt' at ong irail, me kauson sappa? <sup>11</sup> Likau puetepuet me pangalang irail karos, o a kotin masani ong irail, ren moleilei mas ekis, a lao iang ar o ri ar akan unsokelar, me pan kamekamela dueta pein irail. <sup>12</sup> O i kilanger ni a laud pasang kateng kawonu, rerer en sappa lapalap ap wiaui, katipin rotala dueta likau tontol, wunen eu o maram waitatala dueta nta. <sup>13</sup> O usu en lang akan pupedi ong sappa, due tuka pik pot kasedi wa kan me pul, ni a tuälok ki ang ma, <sup>14</sup> O lang kasaula dueta kisin likau ni a limlim pena, o nana karos o dake karos torak sang deu ar, <sup>15</sup> O nanmarki

en sappa kan, o monsap, o saumas akan, o kapwapwa kan, o me kelail, o ladu kan karos, o maio kan rukila nan por o pan paip en nana kan. <sup>16</sup> Ap indang nana o paip akan: Pupedi po at o pwain kidi sang mon silang en i me kotidi pon mol o, o sang ni ongiong en Sippul. <sup>17</sup> Pwe a leler ran lapalap en a ongiong; o is me pan kak pwaida?

## 7

<sup>1</sup> MURIN met i kilanger tounlang pamen uda ni kaim en sappa paieu kolekol ang paieu en sappa, pwe ang ender ipuip dong sappa, de pon sed, de nin tuka pot. <sup>2</sup> O i kilanger amen tounlang pwarada sang ni mas en lang, kilelekidi kilel en Kot ieias. A likwirki ngil laud ong tounlang pamen, me udan kawela sap o sed, <sup>3</sup> Indinda: Der kawela sappa de madau, de tuka kan, a lao kileledier ladu en at Kot akan ni tam ar! <sup>4</sup> Ngai ari rongadar arail wadok me kileledier me lop panen pakid sang nin kainok en Israel akan karos. <sup>5</sup> Sang ni kainok en Iuda nen riakid kileledier, sang ni kainok en Ripen nen riakid, sang ni kainok en Kat nen riakid, <sup>6</sup> Sang ni kainok en Aser nen riakid, sang ni kainok en Naptali nen riakid, sang ni kainok en Manase nen riakid, <sup>7</sup> Sang ni kainok en Simeon nen riakid, sang ni kainok en Lewi nen riakid, sang ni kainok en Isasar nen riakid, <sup>8</sup> Sang ni kainok en Sepulon nen riakid, sang ni kainok en Iosep nen riakid, sang ni kainok en Peniamin nen riakid. <sup>9</sup> Murin mepukat i kilanger pokon kalaimunia, sota amen me kak wadokedi sang ni wei karos, o kainok karos, o men liki karos, o lokaia karos, o mon mol o, o mon Sippul likau kida likau puetepuet o paini ni lim ar, <sup>10</sup> O re ngil laudedda indinda: Kot kamaur pat, me kaipokedi pon mol o o Sippul. <sup>11</sup> Tounlang karos u kapil pena mol o, o lapalap akan, o man pamen, irail pori kidi mas ar mon mol o, pongi Kot, <sup>12</sup> Indinda: Amen! Pai, o lingan, o erpit, o danke, o wau, o roson, o manaman ong atail Kot kokolata! Amen. <sup>13</sup> O amen ren me lapalap akan sapeng masani ong ia: Is irail me likau kida likau puetepuet, o irail kodo sang ia? <sup>14</sup> I ap potoan ong i: Maing, komui mangier. A sapeng ia: Ir me pwaida sang ni kaankamekam, o re lope ar likau, o kapwad kida ntan Sippul. <sup>15</sup> I me re mikier mon mol en Kot, o papa i ni ran o ni pong nan sapwilim a im en kaudok, o me kaipokedi pon mol o, pan apapwali irail. <sup>16</sup> Irail solar pan men manga potopoteta, o solar men nim pilada, o katipin solar pan daker ir, de eu song en karakar pan lel. <sup>17</sup> Pwe Sippul ni warong en mol o pan kotin wia sile parail, o a pan kalua ir wong ni pil en maur, o Kot pan lim wei sang pil en mas arail.

## 8

<sup>1</sup> NI a lauad pasang kateng kaisu, kaporamen wiaui nanlang alep en auer. <sup>2</sup> O i kilanger tounlang isimen, me uda mon Kot, o koronete isu pangalang irail. <sup>3</sup> Amen tounlang me kotido u pon pei saruai, dal kold, men isik potik, mi re a; potik isis toto pangalang re a, pwen kamanada kapakap en saulang kan, me mi mon mol o. <sup>4</sup> Ad in isik iangaki kapakap en me saruai kan adidalang Kot sang ni lim en tounlang o. <sup>5</sup> Tounlang ari aleda dal en potik o, ap aude kida kisiniai en pei saruai, ap kasedi ong sappa; ari, nansapwe, o ngil akan, o liol, o rerer en sappa wiaui. <sup>6</sup> A tounlang isimen, me ar koronete isu mia, kaonopadang pepeuk. <sup>7</sup> Men mas pepeuk koronete, akel o kisiniai iangaki nta ap wiaui o pisikindi lang sappa; a silekis eu en sappa rongala, o silekis eu en tuka rongala, o rä karos rongala. <sup>8</sup> O tounlang kariamen pepeuk koronete ap likamata nana lapalap eu isisiki kisiniai ap pisikindi lang madau; a silekis eu en madau ap wialar nta. <sup>9</sup> O silekis eu en tou a maur melar nan sed, o silekis eu en sop akan olar. <sup>10</sup> A tounlang kasilimen pepeuk koronete, usu lapalap ap pupedi sang nanlang likamata ser umpumpul eu pupedi pon silekis eu en pilap akan o utun pil akan. <sup>11</sup> Ad en usu o Sadik; silekis eu en pil akan ap sadikalar, o aramas toto mekilar pil aki ar sadik. <sup>12</sup> A tounlang kapamen pepeuk koronete, silekis eu en katipin, o silekis eu en maram, o silekis eu en usu kan ap olar. Silekis eu ari rotongala o ran solar marain ni a silekis eu o pil dueta pong. <sup>13</sup> O i kilanger o ronger ikel amen pipir nan warong en lang, indindaki ngil laud: Apwal, apwal, apwal ong irail, me kaukausonta sappa, pweki ngil en koronete en tounlang silimen, me pan pepeuk mur.

## 9

<sup>1</sup> TOUNLANG kalimen pepeuk koronete, i ap kilang usu en lang eu, me pupedi ong sappa, o ki en wasa lol me pangalang i. <sup>2</sup> A ritingida au en wasa lol, adiniai ap adida sang nan wasa lol o, dueta adiniai en um kalaimun, o katipin o pan lang rotorotala, pweki adiniai en wasa lol. <sup>3</sup> O mansiek kan me pwarado sang nan adiniai, rap paraparalang sappa, o manaman pangalang irail dueta skorpion en sappa. <sup>4</sup> A masani ong irail, ren der kawela rä nan sap, de tuka ta tontol, o pil so tuka laud, a aramas akan ta, me so kileleki kilel en Kot ni tam arail. <sup>5</sup> A so muei ong irail, en kame ir ala, a ren kaloke irail saunipong limau; o ar wairok me laud dueta lip en skorpion, ma a pan ke aramas amen. <sup>6</sup> Ni ran puko aramas pan rapaki mela, ap sota pan diarada; o re pan inong iong mela, a mela pan tang wei

sang irail. <sup>7</sup> Mom en mansiek kan dueta os, me onoper mauin, o pon mong arail meakot, me rasong mar kold, o mas ar dueta mas en aramas. <sup>8</sup> Pit en mong arail rasong pit en mong en li, o ngi arail dueta ngi en laien. <sup>9</sup> Pere me mi re 'rail dueta pere mata, o ngirsok en pa arail dueta ngirsok en war, me os toto me tangaki wong nan mauin. <sup>10</sup> O iki 'rail dueta skorpion, o ose ar mia, o re keleki iki 'rail, o re kin kame aramas saunipong limau. <sup>11</sup> O arail nanmarki ani en kadar en wasa lol, ad a ni lokaia en Ipru Apadon, a ad a ni lokaia en Krik Apolion. <sup>12</sup> Ari, tapin apwal akan daulier, a kilang, pil riau pan pwarado mur. <sup>13</sup> Tounlang kawonemen pepeuk koronete, i ap rong ngil eu, me tapida sang nan ose paeiu en pei sarau, me ni mon Kot. <sup>14</sup> Amen indang tounlang kawonemen, me a koronete mia: Lapwada tounlang pamen, me salidier ni kailan pilap Oiprat. <sup>15</sup> Ari, tounlang pamen oko sapdokalar, me onoper ong auer, o ran, o saunipong, o par, pwe ren kamela silekis eu en aramas akan. <sup>16</sup> Wadawad en tounpei, me dake os riasap; o i ronger duen toto ar. <sup>17</sup> Iduen ai kilanger os akan ni kasansal o, o irail, me mod po arail, pere pras arail dueta kisiniai, me meimei o dueta swepel, o mong en os oko dueta mong en laien; o sang ni au arail kisiniai, o ad, o swepel kin adewei. <sup>18</sup> Kariapa silu pukat silekis eu en aramas akan, me kamekilar, kisiniai, o ad, o swepel, me adewei sang ni au arail. <sup>19</sup> Kelail en os akan ni nan au ar, o ni padaik arail, pwe padaik arail dueta serpent kan, o mong ar mia, o re kamekamki ir padaik ar. <sup>20</sup> A luan aramas akan, me so kamekilar kamekam pukat, kang kaluki wiawia en pa arail, pwe ender pongi ong tewil akan o dikedik en ani, me wiaki kold, o silper, o pras, o takai, o tuka, me so kak ngar wasa, o so rong wasa, o so alialu. <sup>21</sup> Irail sota kaluki ar kamela, o ar wun ani, o ar nenek, o ar lipirap.

## 10

<sup>1</sup> O I kilanger amen tounlang kelail, me kotidido sang nanlang, me likauida dapok eu, o aia mi pon kadokenmai, o silang i dueta katipin, o aluwilu a dueta ur kisiniai. <sup>2</sup> Ni lim a kisin puk mia, me papak pasang, o aluwilu a pali maun sokedi pon madau, a pali maing pon sappa. <sup>3</sup> O a kotin molipe kida ngil laud, due laien amen ni a weriwer, o ni a molipeer, nansapwe isu ap ngiringir. <sup>4</sup> A nansapwe isu ngiringiridar, i men inting, i ap rong ngil eu sang nanlang masani: Katenge meakan, me nansapwe isu masanier, der inting ir edi! <sup>5</sup> Tounlang o, me i kilanger u pon madau o sappa, puekada lim a pali maun, <sup>6</sup> Ap kauki i, me ieiasata soutuk, me kotin kapikadar lang o meakan mi lole, o sappa o meakan mi lole,

o madau o meakan mi lole, me solar pan ansau. <sup>7</sup> A ni doka ngil en tounlang kaisimen ni a pan pepeuk, iei ansau karir pan Kot kaunsokalar, duen a kotin kokop ong sapwilim a ladu saukop akan rongamau o. <sup>8</sup> Ngil o, me i ronger sang nanlang, a pil masani ong ia er masani: U ko wei, aleda kisin puk, me papak pasanger, ni lim en tounlang, me uda pon madau o pon sappa! <sup>9</sup> Ari, i ap ko wong tounlang o, potoan ong i, en ki dong ia kisin puk o. A masani ong ia: Ale, ap kangala, a pan kasadikala kaped om, a ni au om a pan iau dueta onik. <sup>10</sup> I ap aleer kisin puk o sang ni lim en tounlang ap kangalar. Ari, nan au i me iau due onik, a murin i kanger, kaped i ap sadikalar. <sup>11</sup> A masani ong ia: Koe nok pil kokopada iran men liki kan, o aramas akan, o lokaia kan, o nanmarki toto.

## 11

<sup>1</sup> O MEN song dueta sokon pot pang dong ia. Amen inda: Uda, song im en kaudok en Kot, o pei sarau, o irail me kaukaidok lole! <sup>2</sup> A kapil penan im en kaudok kasela liki o der song, pwe a pangalanger men liki kan o kanim sarau re pan kakaue saunipong paeisok riau. <sup>3</sup> O I pan kamanada nai saunkadede riamen, o ira pan kokop wei ran kid riepuki woneisok, likau kida likau tol. <sup>4</sup> Ira tuka olip riapot o lamp riau, me mimi mon Kaun en sappa. <sup>5</sup> Ma amen men kame ira, kisiniai pan lus wei sang nan au ara, ap karongala naira imwintiti kan. O ma amen men kame ira, a pan kamela. <sup>6</sup> Ira manaman ong en pinala lang, pwe ede katau arain ara kokopada, o ira kaun en pil, ira kak kawuk ong nta pil akan o kame ki sappa song en kamekam karos, due ira inong iong. <sup>7</sup> Ira lao kanikiela ara kadede, man o, me pan pwarada sang wasa lol, pan pei ong ira, kaloe ira di, kame ira la. <sup>8</sup> O kalep ara pan wonon nani al en kanim lapalap, me ad a ni karaseras Sodom o Äkipten, wasa ar Kaun pil kalopular. <sup>9</sup> Ari, me toto sang ren men liki kan, o kainok, o lokaia, o aramas akan pan kilang kalep ara ran silu alep, o irail sota pan muedi ong, me ara kalep pan saredi nan sousou. <sup>10</sup> O irail, me kaukausion sappa, kaneket kin ira o pereperen, re pan pakisakis pena, pwe saukop riamen et kin kaloke irail, me kaukausion sappa. <sup>11</sup> A murin ran silu alep maur sang ren Kot pil til wong lol ara, rap u ni nä ara, a irail, me kilang ira, masakada kaulap. <sup>12</sup> O i ronger ngil laud eu sang lang mamasani ong ira: Koma koda dong met! Ira ap kokidalang dapok, o imwintiti ara kilang ira. <sup>13</sup> Ni auer ota sappa rerer kaulap, eisokkis eu en kanim olar ni rerer, o mar isekid en aramas mekilar, me tei kan masakalar, rap

landar Kot en lang. <sup>14</sup> Kamekam kariau wiauier. Kilang kamekam kasilu me pan pitipit wiau. <sup>15</sup> Tounlang kaisimen pepeuk koronete. Ngil laud ap wiauier nanlang indinda: Wein sappa id wialar wein atail Kaun o sapwilim a Kristus. A pan kotin kaunda kokolata. <sup>16</sup> A lapalap riek pamen, me ariri Kot pon mol arail, rap pupedi ni silang ir pongi Kot masani: <sup>17</sup> Se danke komui, Maing Kot, Kaun en meakros, me kotikot metet, o me kotikot mas o, pwe re kotin aleer ar manaman lapalap, o kotin Nanmarki lar. <sup>18</sup> O wei kan makaradar, a ar ongiong leler, o a leler ansau en katingi sapwilim omui ladu saukop akan o sarau kan; irail, me lomwineki mar ar, tikitik kan o lapalap akan, o en kawe irail, me kin kawela sappa. <sup>19</sup> Im en kaudok en Kot, mi nanlang, ritidar, o kopa en inau pingngar nan im en kaudok o; a liol, o ngil akan, o nansawe kan, o rerer en sappa, o akel lapalap wiauwiedar.

## 12

<sup>1</sup> KILEL lapalap eu pingngar nanlang: Li amen linganeki katipin, o maram pan na a, o a mareda usu eisokriau. <sup>2</sup> A liseanlar, a weriwer en naitik, waiwairok en sapedokla sang. <sup>3</sup> Pil eu kilel pingngar nanlang: Kilang, drake lapalap waitata, monga me isu, o salong a eisok, o mar isu pon mong a. <sup>4</sup> O a padaik urakiwei silekis eu en usu en lang, ap sipedi ir ong sappa. O drake uda mon li o, me pan naitik, pwe lao a naitiker, a en katalala na seri. <sup>5</sup> Ari, a naitikadar na seri ol, me pan kaun kida kainok karos sokon mata; ari, na seri peukadalang Kot ong mol a, <sup>6</sup> Li o tang wong sap tan, me deu a onoper ren Kot, iei wasa o re kin kamanga i ran kid riepuki woneisok. <sup>7</sup> Mauin pwaidar nanlang. Mikael o sapwilim a tounlang kan mauini ong drake o, o drake o na kan mauini ong. <sup>8</sup> A re so pwaida o solar deu ar nanlang. <sup>9</sup> O drake lapalap pisikindila, iei serpent, me ad a Tewil o Satan, katiamau pan sappa karos, i me pisikindi lang sappa, o na kan iang i pisikindila. <sup>10</sup> O i ronger ngil lapalap eu nanlang indinda: Metet me pwaidar kamaupapan, o wiaupapan, o wei en atail Kot, o manaman en sapwilim a Kristus, pwe karaune pan ri atail pisikindila, me kin karaun kin irail mon Kot ni ran o ni pong. <sup>11</sup> A re kaloedi i aki ntan Sippul o, o pweki masan en ar kadededa lamalam; o re so pok ong maur arail lao lel ong mela. <sup>12</sup> I me lang en perenda, o komail me kaukason lole! A mesued ong sappa o madau, pwe tewil me kodilang komail, makarada kaulap, pwe a asa, me a ansau me motomot. <sup>13</sup> Drake o ni a kilanger, me a pisikindi sappa, a kansore li, me naitiker seri ol. <sup>14</sup> Pa riau

en manpir ikel lapalap, me pangalang li o, pwen pirlang deu a nan sap tan, wasa o a pan nekinek ia ansau eu, o ansau kan, o alep en ansau, doo sang mas en serpent o, wasa a pan kamanga ia. <sup>15</sup> A serpent o kusepoke wei sang nan au a ong li o pil, dueta pilap pot, pwen kapwiliki wei li o. <sup>16</sup> A sappa puporki li o, o sappa sara pasang au a nimala pilap o, me drake o kusepoke wei sang nan au a. <sup>17</sup> O drake makar pan li o, ap kola, en mauini ong luan kadaudok a, me kin nekidala kusoned en Kot akan o koleledi kadede pan Iesus. A ngai uda pon pik en oror.

## 13

<sup>1</sup> I AP kasinenda pon pik en oror o kilanger man amen pwaradar sang nan madau, me a ose ek o monga isu mia, o mar eisok mier pon ose kan, o ni monga ad en lalau kan. <sup>2</sup> Man o, me i kilanger, dueta parder amen, o na a dueta na en par amen, o au a rasong au en laien. O drake ki ong i a kelail, o mol a, o a manaman lapalap. <sup>3</sup> O i kilanger monga eu dueta kamekamelar, ari so, a kamekam motier, a toun sappa karos puriamuiki man o. <sup>4</sup> Irail ari pongi ong drake, pwe a kapieki man o a kelail, o re pongi ong man o indinda: Is me rasong man o? O is me pan kak mauini ong i? <sup>5</sup> O a pang ong i au en suai lapalap, o en lalau eu, o a pang ong i, en mimieta saungipong paeisok riau. <sup>6</sup> Ari, a sara pasang au a, en lalau Kot, en laue mar a o tanpas a sarau, o irail me kotikot nanlang. <sup>7</sup> O a kapieki i, en mauini ong sarau kan o kaloe irail edi; o a kapieki i, en kaunda wei karos, o men liki kan, o lokaia, o kainok kan. <sup>8</sup> O irail karos, me kaukason sappa, pan pongi ong i karos, me mar arail sota intingidier nan puk en maur en Sippul, me kamekamelar sang nin tapin sappa. <sup>9</sup> Meamen salong a mia, en rong. <sup>10</sup> Ma amen pan kaloedi, nan pein i pan lodila; o ma amen pan kamekila, kodlas, nan a pan kamekila kodlas. Nan iet en sarau kan ar konongama o ar poson. <sup>11</sup> O i kilanger, amen man pwarado sang nan pwel, ose riau mia, rasong sippul amen, o a kasoi dueta drake amen. <sup>12</sup> O man o kin wia manaman akan karos dueta men mas mon por en mas a. O a wiada, me toun sappa en pongi ong man o, me kelailadar sang a kamekam. <sup>13</sup> A wiadar kilel lapalap, kamoredi sang lang kisiniai pon sappa mon aramas akan. <sup>14</sup> O a kotaue kin ir, me kaukason sappa a kilel akan, me kapi ong i, en wiada mon man o, indai ong irail, me kausonta sappa, ren wiai ong man o, me a lop en kodlas mier, ap mauredar, dikedik eu. <sup>15</sup> O a kapi ong i, en kamaureda dikedik en man o, pwe dikedik en man o en pil lokaia, o en wiai ong irail, me kang

pongi dikedik en man, en kamekamela. <sup>16</sup> O wiai ong karos, me tik o me lap akan, o kapwapwa kan, o samama kan, o me maio, o ladu kan, ren wia kilel eu ni pa ar pali maun de ni tam ar. <sup>17</sup> Pwe sota amen en kak net de netikila, pwe ir eta, me kileledier, kilelekidi mar en man de wad en mar a. <sup>18</sup> Iet lolekong. Me lolekong kan en wadokdi mar en man o, pwe a rasong wad en aramas amen; iet a wad: Wonepuki woneisok wonu.

## 14

<sup>1</sup> O I kilanger Sippul o kotikot pon dol en Sion o me iang i lop panen pakid, o mar a o mar en Sam a intingidier ni tam ar. <sup>2</sup> O i ronger ngil eu sang nanlang dueta pungupung en pil toto o dueta ngirngir lapalap en nansapwe; ngil o, me i rongadar, dueta ngil en saunkaul pikipikir ar arp akan. <sup>3</sup> Irail kauleki kaul kap pot mon mol o, o mon man pamen o lapalap akan; o sota amen me kak koledi kaul o, irail lop panen pakid eta, irail me net sapal sang nin sappa. <sup>4</sup> Iei irail, me so samin kila li, pwe irail me makelekel. Iei irail me idedauen Sippul o, wasa a kin kotila ia. Mepukat net sapal sang ren aramas akan, me meseni ong Kot o Sippul. <sup>5</sup> O nan au ar sota likam me diarokadar, nan sota ar samin. <sup>6</sup> O i kilanger amen tounlang, pipir ni warong en lang, rongamau soutuk mi re a, pwen padaki ong irail, me kauson sappa, o ong wei karos, o kainok karos, o lokaia o aramas akan. <sup>7</sup> A masani ki ngil laud: Landa Kot, o wau i, pwe auer en a pan kotin kadeikada me pwarer; o pongi i, me kotin wiadar lang, o sappa, o madau, o utun pil akan. <sup>8</sup> O amen tounlang, kariamen, idauen i masani: A rongkilar, a rongkilar, Papilon lapalap, me kare ong kainok karos kamekam, aki ar nenek re a! <sup>9</sup> O amen tounlang, kasilimen, me idauen ir katitiki ngil laud: Ma amen pongi man o kilel en man, o ale kilel ni tam a o ni pa a, <sup>10</sup> A pan tungole en Kot a ongiong, me wiauier sokadolepa dal en ongiong en Kot, o a pan kalokeki kisiniai o swepel mon tounlang sarau kan o mon Sippul o. <sup>11</sup> O adiniai en ar lokolok peipeidala potopoteta, re so moleilei ni ran de ni pong, irail me pongi man o o a kilel, o irail me kilelekidar mar a. <sup>12</sup> Iet en sarau kan ar kanongama, me kin nekinedik kusoned en Kot akan o poson ong Iesus. <sup>13</sup> O i rong ngil eu sang lang masani: Intingiedi: Meid pai irail me mela ren Kaun o, met o kokolata! Iei, Ngen o me kotin masani, irail en moleilei sang ar wiawia kan, pwe ar wiawia kan iang irail. <sup>14</sup> O i kilanger dapok puetepuet eu, o Amen kotikot pon dapok o, me rasong Nain aramas, marakier mar kold, o ni lim a naip kong apot. <sup>15</sup> O amen tounlang pedoi

wei sang nan im en kaudok, ekekerki ngil laud ong i, me kotidi pon dapok o: Komui kadar om naip paledi, pwe a leler auer en paledi, pwe rak en sappa mater kaulap! <sup>16</sup> Me kotidi pon dapok kasadi sappa a naip, rak kiri sang sappa. <sup>17</sup> O amen tounlang pedoi wei sang nan im en kaudok, me mi nanlang, pil naip kong apot mi re a. <sup>18</sup> O amen tounlang me pwarado sang impan pei sarau, me kin kakaun kisiniai, likwir ong i, me a naip kong mia, masani: Paledi! Tolunga sang wan wain en sappa, pwe wa me matier. <sup>19</sup> Ari, tounlang o paleki sappa naip, o tolung sang wan wain en sappa, o kasedi ong nan kopa laud en ongiong en Kot eu. <sup>20</sup> Irail tiakedi nan kopa en wain likin kanim, a nta kusewei sang nan kopa o lel ong sal en os, lel lang stadien kid wonepuki.

## 15

<sup>1</sup> O I kilanger pil kilel eu nanlang, me lap o kalom: Tounlang isimen, a kalokolok isu mi re 'rail, pwe ongiong en Kot kaimwisokki ir la. <sup>2</sup> O i kilanger sed klas eu, me doleki kisiniai o irail me kaloedi man o dikedik en man, o wadawad en mar a, uda ni kailan sed o, o arp en Kot mi re 'rail, <sup>3</sup> O irail kauleki kaul en Moses ladu en Kot amen, o kaul en Sippul indinda: Omui wiawia kan me lapalap o kalom. Maing Kot, me pung o melel omui wiawia kan, komui Nammarki en wei kan, Kaun en mekaros. <sup>4</sup> Is me so pan landa komui, Maing, o wauneki mar omui? Pwe komui ta me sarau, pwe wei karos pan pwarado pongi komui, pwe omui wiawia pung me sansaleda. <sup>5</sup> Murin mepukat i kilanger nan im en kaudok kad-edepa mi nanlang me ritida. <sup>6</sup> O tounlang isimen pedoi wei sang nan im en kaudok kalokolok isu re 'rail, kapwateki likau min o puetepuet, o ir piraki ni pan ati waiwai kold. <sup>7</sup> O amen ren man pamen pangalang tounlang isimen dal kold isu, direki ongiong en Kot, me ieiasata soutuk. <sup>8</sup> O im en kaudok me topkila adiniai tapida sang ligan en Kot o a manaman; o sota amen me kak pedelong ong nan im en kaudok o lao kalokolok isu en tounlang isimen wiauier.

## 16

<sup>1</sup> O I ronger ngil laud eu sang nan im en kaudok o, mamasani ong tounlang isimen: Komail kowe, wudokedi ong sappa dal isu, me audekier ongiong en Kot. <sup>2</sup> Men mas ap kotiwei wudokila ong sappa a dal, ap wiala kins sued ong aramas akan, me kilelekidi kilel en man o, o me pongi a kilel. <sup>3</sup> O kariamen wudokila a dal ong nan madau ap wiala nta due nt' en melar amen, ari me maur karos nan madau ap melar. <sup>4</sup> O kasilimen wudokila a dal pon pilap o utun pil akan, rap ntaral. <sup>5</sup> I ronger tounlang en pil

akan masani: Komui me pung, me kotikot, o me kotikot mas, me sarau, pwe komui kadeikada due met. <sup>6</sup> Pwe irail kielecier ntan me sarau o saukop akan, ari, kom kotin katungole kin ir nta; ari, me mau ong irail. <sup>7</sup> I ronger me pei sarau o masani: Ei, Maing Kot, Kaun en meakaros, melel o me pung omui kadeik kan. <sup>8</sup> A kapamen wudokila a dal pon katipin, a kapi ong i, en isiki kisiniai aramas akan. <sup>9</sup> Ari, aramas rongkila karakar kaulap, o re lalaue mar en Kot, me Kaun pan kamekam pukat; a re sota kalukila, pwen wauneki i. <sup>10</sup> O tounlang kalimen wudokila a dal pon mol en man o; ari a wei rotorotala; o re ke pasang lo arail pweki motakan madak. <sup>11</sup> O irail lalaue Kot en lang, aki ar madak o ar kins akan, o re sota kalukila ar wiawia kan. <sup>12</sup> O tounlang kawonemen wudokila a dal pon pilap Oiprat, a pil ap ngalengaledi, pwen kaonopada al mon nanmarki, me kotido sang ni pali mas en lang. <sup>13</sup> O i kilanger, me sang nan au en drake, o sang nan au en man o, o sang nan au en saukop likam ngen samin silu dueta pros kai koda sang. <sup>14</sup> Ir ngen en tewil kai, wiawia kilel kai, me kin pwaralang nanmarki en sappa kan, en kapokon ir penang mauin en ran lapalap en Kot manaman. <sup>15</sup> Kilang, I pwarado dueta lipirap amen; meid pai, me kin masamasan, nekinekid a likau kan, pwe a de kilisola, rap kilang a kanamenok. <sup>16</sup> O re kapokon ir penang wasa, me ad a ni lokaia en Ipru Armakedon. <sup>17</sup> O tounlang kaisimen wudokila a dal nin wawä, ngil laud ap pwaradar sang im en kaudok nanlang, sang ni mol o mamasani: A wiauier. <sup>18</sup> Ari, liol o ngil kai o nansapwe wiauier, o sappa rerer kaulap, sota due sang tapin aramas mi sappa, pwe me lapalap o mulatok. <sup>19</sup> Ari, kanim lapalap pal pasang wiala silekis silu, o kanim en sap akan rongk pasang, o Kot kotin tamanda kanim Papilon, pwen kotiki ong i dal en wain en a ongiong lapalap. <sup>20</sup> O dake karos mokid wei sang o nana kan solar sansal. <sup>21</sup> O akel lapalap, toutouki paun epuki, me moredi sang lang lel aramas akan, o aramas lalaue Kot pweki kamekam akel, pwe iei kamekam me lapalapia.

### 17

<sup>1</sup> TOUNLANG amen, kisan isimen me ar dal isu mia, pwara do, masani ong ia: Kodo, i pan kasale ong uk en li sued, me kaunda pil toto, a pan kalokolok. <sup>2</sup> Me nanmarki en sappa kan nenekier, o me kaukason sappa pweipweikier wain en a nenek. <sup>3</sup> Ari, a uke ia lang nan sap tan ren ngen. I ap kilanger li amen, mondi pon man waitata amen, ad a laue toto mia, monga isu o a ose eisok mia. <sup>4</sup> Li o likau kida likau tontol o waitata, o kapwat kida kold o takai kasampwal, o

manaman kai, o ni pa a dal kold eu mia, me dir kila me samin o me saut en a nenek. <sup>5</sup> O ni tam a mar eu intingidier, iet: Okiok pot, Papilon lapalap in en me nenek kan o saut akan en sappa. <sup>6</sup> O i kilang li o a pweipweiki nt' en sarau kan o nt' en saunkade en Iesus akan. Ari, ni ai kilanger i, i ap puri-amui kaulap. <sup>7</sup> A tounlang o masani ong ia: Menda koe waponki? I pan kasale ong uk karasepan om waponki li o, o man o, o me a kin dake, me a monga isu o a ose eisok mia. <sup>8</sup> Man o, me koe kilanger, a mia mas ap soer mia, a nok pwaradado sang wasa lol, ap pan kolang wasan kamekam; o irail, me kaukason sappa, pan wapon ki irail, me mar arail so intingidier nan puk en maur sang nin tapin sappa, ni ar kilang man o, due a mier mas, ap soer mia, ap nok pwarado. <sup>9</sup> Ari, iet lolekong: Monga isu rasong nana isu, me li o mondi poa. <sup>10</sup> O irail nanmarki isimen. Limen nikilar, me ta men mia, a amen kaikenta pwarado, a lao pwarado, a pan sapwilada ansau kis. <sup>11</sup> A man o men mas, ap soer mia, i kawalemen, kisan isimen, ap pan kalokolok. <sup>12</sup> A ose eisok, me koe kilanger, rasong nanmarki ek, me kaikenta ar wei, a re aleer manaman dueta nanmarki kan, pwen sapwileda auer ta ieu ren man o. <sup>13</sup> Ir pukat kin wia insen ta ieu, o re pan ki ong man o ar manaman paki i ar angiangin o. <sup>14</sup> Ir pan mauini ong Sippul, a Sippul pan kaloe ir edi; pwe i ta Kaun en kaun akan o Nanmarki en nanmarki kan. O me iang i, me paeker, o pilier, o melel. <sup>15</sup> A masani ong ia: Pil oko, me koe kilanger, wasa me li sued o mondi ia, iei irail men liki, o kainok kan, o aramas akan, o lokaia kan. <sup>16</sup> O ose eisok, me koe kilanger, o man o, irail me pan tataki li sued o, o kasamallia i, o kakilisauia ta, o re pan kangala uduk a, karongki i kisiniai. <sup>17</sup> Pwe Kot kotin kainongada mongiong ar; en wia kupur a, o en wia lamalam ta pot o en upai man o, a lao masan en Kot pwaida. <sup>18</sup> Li o, me koe kilanger, iei kanim lapalap, me kakaan nanmarki kan nan sappa.

### 18

<sup>1</sup> MURIN mepukat i kilanger amen tounlang kodido sang lang, me manaman kaulap, o sappa marain kila a lingan. <sup>2</sup> A kotin molipeki kapitie laud masani: A rongk pasang, o rongk pasang, Papilon lapalap, ap id wiala deun tewil akan, o deun ngen saut karos, o deun manpir samin, o katantat. <sup>3</sup> Pwe wei karos nim sang wain makar en a nenek, o nanmarki en sappa neneker re a, o saunet en sappa kapwapwakier a kapwa kasampwal akan. <sup>4</sup> O i ronger eu ngil sang lang masani: Ko wei sang i nai aramas akan, pwe komail der ainekida dip ar kan, pwe komail der pukoki

kompar akan. <sup>5</sup>Pwe dip a kan lel onger lang, o Kot kotin tamanda a sued akan. <sup>6</sup>Depuk ong i, duen pein i wiadar! O depuk ong i pan riapak, duen a mau ong a wiawia kan; dal o, me a auedar, i dal ota komail aude ong i pan riapak! <sup>7</sup>Duen a kin kalinganda pein i, o kamuei matier, iei due ki ong i kalokepa o kasonglola, pwe a mongeloleki: Ngai nanmarki li amen, o i so pan li odi, o i sota pan kilang mesued kot. <sup>8</sup>I me kompa kan pan lel ong i ni rang ota: Mela, o maiei, o lek, o a pan rong kila kisiniai, pwe Kaun Kot me manaman, me kadeikada i; <sup>9</sup>O nanmarki en sappa kan, me nenek re a, o muei mat sang i, re pan maieiki, o weriwereki i ni ar kilang adiniai en a rongala. <sup>10</sup>O re pan u wasa doo waponki a kamekam indada: Apwal, apwal Papiilon, kanim lapalap, Papiilon kanim kelail! Ni aur ta ieu kadeik paom pwaida. <sup>11</sup>O saunet en sappa kan maiei o sangesangki i, pwe sota amen me neti ar kapwa kan. <sup>12</sup>Kapwa kold, o silper, o takai kasampwal akan, o manaman akan, o likau linen kaselel, o likau tol, o likau silk, o likau waitata, o song en tuka pomau karos, o song en dal karos, me wia kidar ngi en elepant, o dal akan, wia kidar tuka kasampwal, o mata pras, o mata, o marmor, <sup>13</sup>O simet, o potik, o men isis, o me pomau, o pomau en isis, o wain, o le, o plaua kasampwal, o wan wit, o man akan, o man sip, o os akan, o dake pan os, o ladu kan, o ngen en aramas akan, <sup>14</sup>O wan tuka kan, me kaped om kin iaui, rose sang uk er, o dipisou lingan o kaselel rose sang uk er, a solar pan diarokada kokolata. <sup>15</sup>Saunet en mepukat, me kapwapwadar re a, me pan u wasa doo, wapon kida a kamekam sangesang o mamaiei. <sup>16</sup>Indinda: Apwal, apwal kanim lapalap, me kapwadeki likau ankotitik, o tol, o waitata, o kapwadeki kold, o takai kasampwal, o manaman! <sup>17</sup>Pwe ni auer ta ieu kapwa toto pukat olar. O saupal en sop, o ir, me toun sop, o seler akan, o saunet en nan madau, ir uda wasa doo. <sup>18</sup>O weriwereki, ni ar kilanger adiniai en a isis, indinda: Ia kanim, me rasong kanim lapalap wet! <sup>19</sup>Iraii tukatuk en mong wereda, sangesang, mamaiei, indinda: Apwal apwal kanim lapalap! Tou a, me ar sop akan mi nan madau, kapwapwalar, pwe a neti re a mulatokia. Ni auer ta ieu a mokonaidier. <sup>20</sup>Kaneketeki i lang, o sarau kan, o wanporon kan, o saukop akan, pwe Kot me kotin iki ong i komail. <sup>21</sup>Tounlang roson amen pokada takai due takai lap men iris plaua, ap kasedi ong madau, masani: Iduen Papiilon kanim lap pan karongk pasang, ap pan solar mia. <sup>22</sup>Ngil en me wia arp akan o kakaual akan, o me peuk kasang plôte, o me peuk koronete, pan solar me pan rong re a, o solar saupal, me pan diarok lol

om, o ngirsok en takai iris plaua solar me pan rong lol om. <sup>23</sup>O marain en lamp pan solar senser lol om, o ngil en ol kamod o li kamod solar me pan rong lol om, pwe noum saunet akan, saumas en sappa, kainok karos pakotaue kilar om widing kan. <sup>24</sup>O ntan saukop o sarau kan me diarokadar lol om, o ntan karos, me kamekamelar sappa.

## 19

<sup>1</sup>MURIN mepukat i ronger likamada morong en pokon kalaimun nanlang, masani: Aleluia, kamaur, o lingan, o manaman udan atail Kot! <sup>2</sup>Pwe melo o me pung ar kadeik kan; pwe a kotin kadeikadar li sued lapalap, me kasuedie kilar toun sappa a nenek kan o a ikier ntan na ladu kan. <sup>3</sup>Pil kariapak re inda: Aleluia! A adiniai adidala kokolata. <sup>4</sup>O lapalap riekpamen o man pamen rap poridi pongi ong Kot, me kaipokedi pon mol a, masani: Amen Aleluia! <sup>5</sup>O ngil, me peido sang mol o masani: Kapinga atail Kot, komail sapwilim a ladu kan, komail, me lan i, me tikitik o me lapalap akan! <sup>6</sup>O i ronger morong en pokon kalaimun, o due ngil en pil toto, o due ngiringir en nansapwe kan indinda: Aleluia, pwe Kaun atail Kot, me Kaun en mekaros a wialar Nanmarki. <sup>7</sup>Kitail en insenemau, o pereperen, o wauneki i, pwe a leler en Sippul a kapapaud, o li kamod onopadar. <sup>8</sup>O a muei ong i, en likauwia kida likau linen, me min o makelekel; pwe likau linen makelekel iei kadeik pung en me wiaui pweki sarau kan. <sup>9</sup>A masani ong ia: Intingiedi: Re meid pai, me luke dong kamadip en kapapaud en Sippul o. O a masani ong ia: Mepukat masan melal akan en Kot. <sup>10</sup>I ap upedi ni aluwilu a, en pongi i. A masani ong ia: Koe der, ngai sau om, o ri om, me aneki kadede pan Iesus; pongi Kot. A ngen en kokop iei kadede pan Iesus. <sup>11</sup>O i kilanger lang a ritidar o os puetepuet amen, o me kaipokedi poa, me oroneki Pung o Melel; a kadeikada o mauinda ni me pung. <sup>12</sup>Por en silang i me rasong umpul en kisiniai, o mar a toto mia ni tapwi, a mar eu intingidier, me sota amen me asa, pein i ta. <sup>13</sup>A likau kida likau eu, me kadueki nta, o mar a oroneki: Masan en Kot. <sup>14</sup>O karis en saunpei en nanlang idauen i pon os puetepuet akan, likau kida linen puetepuet o min. <sup>15</sup>O sang nan silang i kodlas kong lus da sang, men kamekameki wein sappa. A pan kotin kaun kida sokon mata pot; o a tiakedi kopa en wain, me ongiong en Kot, Kaun en mekaros. <sup>16</sup>Ni a likau o ni langelange a mar a intingidier: Nanmarki en nanmarki o Kaun en kaun akan. <sup>17</sup>O i kilanger tounlang amen uda nan katipin; a molipeiki ngil laud masani ong manpir akan, me pipir nan warong en lang: Kodo, pokon dong kamadip lapalap

en Kot. <sup>18</sup> Pwe komail en kang uduk en nanmarki kan, o uduk en kaun akan, o uduk en manaman akan, o uduk en os akan, o me mondi po arail, o uduk en me maio ko o ladu kan, me tikitik o me lapalap akan. <sup>19</sup> O i kilanger man o, o nanmarki en sappa kan, o nair karis akan pokon penang mauini ong i, me kaipokedi pon os o na karis akan. <sup>20</sup> Man o lodi ong iangaki saukop likam, me wia kilel kai mo a, me a kotaue kida irail, me kilele kidi kilel en man o, o ir me pongi a kilel. Ira karos lokidokilang nan le en kisiniai, me rongrongki swepel ni ara memaur. <sup>21</sup> Me lu akan kamekame kila kodlas en i, me kaipokedi pon os o, iei kodlas, me lusa sang nan silang i; ari manpir akan mui mat kilar uduk arail.

## 20

<sup>1</sup> I kilanger tounlang amen kotido sang lang, ki en wasa lol mi re a nan lim a o sal mata lapalap. <sup>2</sup> A saikidi drake o serpent en kaula, iei Tewil o Satan, ap saliedi i par kid. <sup>3</sup> O kasedi ong nan wasa lol so kapi, ritingiedi o kileledi poa, pwe ender katikatiamau toun sappa, a lao par kid imwisokala. Muri a nok sapadokala ansau kis. <sup>4</sup> O i kilanger mol akan, o ir me kaipokedi poa, kadeikada; o i kilanger ngen en ir, me mong ar lepuki sanger pweki kadedepan Iesus o masan en Kot, o ir, me so pongi man o, o a kilel, o so kilelekida a kilel ni tam ar o ni pa ar. Irail mauredar ap iang Kristus kakaun par kid. <sup>5</sup> A me melar tei kan sota maureda lao par kid imwisokala, iei iasada kaieu. <sup>6</sup> A meid pai o sarau, me pan konodi ias kaieu; mela kariau so kokoa irail, pwe irail wiala samero en Kot o en Kristus akan, o re pan iang i kakaun par kid. <sup>7</sup> Par kid lao imwisokela, Satan ap pan sapedokla sang a im en kateng. <sup>8</sup> A ap pan parwei katikatiamau toun sap akan, me mi ni kaim paieu en sappa, Kok o Makok, kapokon ir penang mauin; ir me ngederenia rasong pik en oror. <sup>9</sup> Irail paraparalang nan sappa, rap kapil pena pokon en sarau kan, o kanim kapai; kisiniai ap moredi sang lang, karong ir ala. <sup>10</sup> O tewil, me kotaue ir; lokidokila nan le en kisiniai o swepel, wasa me man o saukop likam mia ia, o re pan kalokolok ni ran o ni pong kokolata soutuk. <sup>11</sup> O i kilanger mol puetepuet lapalap eu, o i me kaipokedi poa sappa o lang tang wei sang mon silang i, ap solar deu ara me diarokadar. <sup>12</sup> O i kilanger melar akan tikitik o lapalap akan u mon mol o, o puk kan pak pasanger, o pil eu puk me pak pasanger, me puk en kamaur. Melar akan ap pakadeik kidar meakan, me intingnier nan puk kan duen ar wiawia kan. <sup>13</sup> O madau kapeida melar akan, me mimi lole, o mela o wasan mela kidaer, me mi lol ir.

Ir karos pakadeikadar iran ar wiawia kan. <sup>14</sup> Mela o wasan mela me pisikindi lang le en kisiniai; iei mela kariau. <sup>15</sup> O meamen, me so intingidier nan puk en kamaur, a pisikindi lang le en kisiniai.

## 21

<sup>1</sup> O I kilanger lang kap o sappa kap, pwe lang mas o sappa mas solar mia, o solar madau. <sup>2</sup> O i kilanger kanim isou, Ierusalem kap, peidido sang lang ren Kot, kapwater due li kamod kapwater ong a paud ol. <sup>3</sup> O i ronger ngil laud sang mol o masani: Kilang, tanpas en Kot mi ren aramas akan, o a pan kotikot re 'rail, o irail pan wia sapwilim a aramas ala, o pein Kot pan kotikot re 'rail. <sup>4</sup> O a pan kotin limwi sang pil en mas ar karos; o mela pan solar, pil solar maiei, o solar sangesang, madak kokolata, pwe men mas solar mia. <sup>5</sup> O me kaipokedi pon mol o masani: Kilang, I pan kawilika-pada meakan karos. O a kotin masani: Intingiedi; pwe masan pukat me pung o meleli. <sup>6</sup> A kotin masani ong ia: A pwaidar. Ngai Alpa o Omeka, Tapi o Imwi. I pan ki ong, me men nim pil adar, en nim sang utun pil en maur sapan. <sup>7</sup> Me pan dadaurata, a pan sosoki mepukat, o I pan wia na Kot la, o a pan wiala nai seri. <sup>8</sup> A me masak, o sokamelele, o saut akan o men kamela kan, o nenek kan, o wun ani kan, o me pongi dikedik en ani kan, o likam kan karos deu ar nan le, me rongrongki kisiniai o swepel, iei mela kariau. <sup>9</sup> O tounlang amen, kisan isimen, me dal en kalokolok isu en kaimwisokela mi re a, pwarado masani ong ia: Ko dong met, i pan kasale ong uk li kamod, warok en Sippul o. <sup>10</sup> Ari a kotin kalua kin ia la ren ngen pon nana lapalap eu o ileile, ap kasale ong ia kanim isou Ierusalem, peipeidido sang lang ren Kot; <sup>11</sup> Linganekeki langan en Kot; a marain me rasong takai kasampwal, rasong iaspis lingan eu, <sup>12</sup> A kel lapalap ileile mia, o wanim eisokria, o tounlang ekriamen mi ni wanim ko, o mar akan intingidier, me mar en nain Israel ekriamen. <sup>13</sup> Ni mas en lang wanim silu, o ni apong wanim silu, o ni air wanim silu, o ni kapi wanim silu. <sup>14</sup> Pason en kel en kanim o me eisokria, o mar en wanporon en Sippul o ekriamen intingidier po ar. <sup>15</sup> Me masani ong ia mepukat, men song sokon kold mi re a, pwen song kanim o, o a wanim akan o a kel o. <sup>16</sup> Pali en kanim pali paieu, o anget a dueta talap a; a songki kanim men song o, me anget a stadien nenriakid. Anget a o talap o ileile duepeneta. <sup>17</sup> A sosong kel o, ari me tipong en pa epuki paeisok paieu, duen men song en aramas o, me mi ren tounlang o. <sup>18</sup> A kel o wia kidar iaspis, a kanim o wia kidar kold eta, me



rasong klas makelekel. <sup>19</sup> Pason en kel en kanim o usunakier song en takai kasampwalia karos. Tapin pason takai iaspis, a kariau sapir, a kasilu kalsedonia, a kapaieu smaragd, <sup>20</sup> A kalimau sardoniks, a kawonu sardis, a kaisu krisolit, a kawalu peril, a kat-uau topas, a kaeisok krisopras, a kaeisokeu iasint, a kaeisokriau ametist. <sup>21</sup> O wanim eisokriau manaman eisokriau; ari, wanim eu iei manaman eu; o al en kanim o me kold makelekel, lingan due klas. <sup>22</sup> O i sota kilanger im en kaudok lole, pwe Kaun Kot, Kaun en mekaros o Sippul iei ar im en kaudok. <sup>23</sup> O kanim sota mau ong katipin de maram, pwen dakedaker, pwe lingan en Kot kamaraini i, o Sippul iei arail lamp. <sup>24</sup> O wei kan pan weid wei ni a lingan; o nanmarki en sappa kan pan walang i ar lingan. <sup>25</sup> O a wanim akan sota pan ritidi ni ran, pwe solar pong wasa o. <sup>26</sup> O irail pan wa dong i lingan o wau en wei kan, <sup>27</sup> Sota me pan pedelong ong me samin, de me kin wia saut, de likam, a irail eta, me mar arail intingidier nan puk en maur en Sippul.

## 22

<sup>1</sup> O A kotin kasale ong ia pilap en kamaur pot, makelekel due kristal, me u wei sang ni mol en Kot o Sippul. <sup>2</sup> Ni kailan pilap pali karos tukan kamaur mia, me kin wa song en wa eisokriau, me wa saunipong kaukaule; o tan tuka kan men kamaur toun sappa. <sup>3</sup> O solar men kariale kokolata; a mol en Kot o Sippul me mi lole; o sapwilim a ladu kan pan upa i, <sup>4</sup> O re pan kilang silang i, o mar a pan mi ni tam ar. <sup>5</sup> O solar pong ni wasa o kokolata; re solar anane marain en lamp, pil solar marain en katipin, pwe Kaun Kot pan kotin kamaraini ir, o re pan nanmarki kokolata. <sup>6</sup> A masani ong ia: Masan me pung o melel, o Kaun Kot en ngen en saukop akan poronedo sapwilim a tounlang, en kasale ong sapwilim a ladu kan, me

pan wiaui ni ansau koren. <sup>7</sup> Kilang, I pan madang pwarado, meid pai, me kanekid masan akan en kokop en puk wet! <sup>8</sup> Ngai loanes, me ronger o kilanger mepukat, o ni ai ronger o kilanger, i ap poridier pongi mon aluwilu en tounlang, me kasale ong ia mepukat. <sup>9</sup> O a masani ong ia: Koe der, ngai pil iang uk papa amen o iang ri om saukop akan, o iang ir, me kanekid masan en puk wet, pongi Kot! <sup>10</sup> O a masani ong ia: Koe der katenge masan en kokop en puk wet, pwe ansau o korendor. <sup>11</sup> Me so pung, en sape-sapungeta, o me samin, en samisamineta, o me pung, en pungepungeta, o me sarau en sarau ta. <sup>12</sup> Kilang, i madang pwarado o ai pwain mi re i, en pwain ong amen amen duen ar wiawia kan. <sup>13</sup> Ngai Alpa o Omeka, men Mas o Men mur, Tapi o Imwi. <sup>14</sup> Re meid pai, me lope ar likau, pwe ren kon ong tuka en kamaur, o pedelong ong nan wanim en kanim akan! <sup>15</sup> Liki kiti kan mia, o widngok kan, o nenek kan, o kamela kan, o me pongi dikedik en ani, o amen amen me mauki o me wiada likam. <sup>16</sup> Ngai Iesus kadar doer nai tounlang, en kadede ong komail mepukat, mon momodisou kan. Ngai tapin kadaudok en Dawid, usu ran umpumpul. <sup>17</sup> Ngen o li kamod masani: Kodo! O me pan rong, en inda: Kodo! O me men nim, en kodo, meamen me inong iong, en tungole pil en kamaur sapan. <sup>18</sup> I kadede ong amen amen me rong masan en kokop en puk wet, ma amen pan usai ong, Kot pan kotiki ong i kampa kan, me intingidier nan puk wet. <sup>19</sup> O ma amen pan kase song ekis masan en kokop wet, Kot pan kotiki sang pwais a nin tukan kamaur o kanim isou, me intingidier nan puk wet. <sup>20</sup> Me kin kadede mepukat, masanier: Iei I pan madang pwarado. Amen, kotido Maing Iesus! <sup>21</sup> Mak en Kaun Iesus Kristus en mi ren sarau kan karos! Amen.